

四川大學古籍整理研究所編

# 儒藏

史部  
第四十二冊

四川大學出版社





儒藏





四川大學古籍整理研究所 編

儒藏·史部

儒林碑傳

第六冊

四川大學出版社 二〇〇五年





儒藏

目

錄

# 目錄

宋儒碑傳集

五（卷一三三至卷一六九）

李勇先校點

吳洪澤尹波審稿

.....

—



宋儒碑傳集卷一百三十三

陳居仁 蘇玘 周楫 石斗文

華文閣直學士奉政大夫致仕贈金紫光

祿大夫陳公行狀

曾祖砥、故不仕。妣林氏。祖嘉謨、故贈右朝奉郎。妣黃氏、贈安人。父膏、故任左朝奉大夫、太府少卿、累贈特進。妣蔡氏、贈安康郡夫人。汪氏、封咸寧郡太夫人、贈新平郡夫人。本貫興化軍莆田縣崇業鄉孝義里。陳公居仁、字安行、年六十有九狀。惟陳氏胄出姚虞、爲世著姓。後漢文範先生以來、世系蟬聯、皆可推攷。七世祖司直避五代之亂、自光州徙于泉之莆田。國朝陞邑爲軍、至今衣冠不絕。特進宦游、聯姻四明、遂著籍慶元之鄞。始特進來依甥館、公以建炎己酉生于奉化、未及月而寇攘蠭起。親黨竄伏窮山、公在襁褓不作一聲、同行相與言曰、此貴子也。少長穎悟、性不好弄、厚重如成人。十

歲已學屬文。特進以文章氣節望于朝、始分教汾州、佐延康張公克猷守城捍寇。知惠州、值曾袞之變、徑至賊壘譬曉之、賊氣奪而降。爲御史、四明有僧法恩謀不軌而事覺、或請屠城以示四方。力論多殺非聖世事、得旨、赦不在法恩之籍者。又爭之、謂籍餘萬人、其實不足稽據。況皆脅從、願悉寬宥。兩州皆賴之。其大節如此、宜其有子也。公幼時侍立、聞汾州事、能憤然激烈。特進爲泣下、且曰、此兒當大吾家。特進嘗語之曰、似聞欲以我使敵、固不憚行。汝能任家事乎。公曰、大人惠州見賊時、未嘗反顧、今尙何念。某雖幼、敢不勉。特進益奇之。甫十四歲而孤、執喪如禮。新平夫人挈以依外氏、誓終靡他。公尤盡孝養、相倚爲命。勉之學、益自刻苦。有一日千里之敏。外祖少師、外祖母王夫人撫愛如己子、以特進遺澤補將仕郎、調信州鉛山尉、連取漕薦。紹興二十一年、登進士科。特進舊與秦丞相



儒藏



投分至密、時御史多由此大用、嘗風特進論一二大臣、堅拒之、而抗疏求外、坐此左遷而弗能害也。時秦公威柄方盛、喜公取世科、或勸一見、可得美官。公曰、是有命焉。終不自通。鉛山當孔道、盜賊出沒。公設方略、部分而厲使之、盜不得發。嘗以公事忤泉使、及行縣、以威脅公。公請納告辨白、退束裝以俟、劾使者竟負媿去。繼之者翻以此知公、授永豐令、改監行在點檢贍軍激賞酒庫所糴場。隆興元年、孝宗修高廟聖政、妙選僚屬。時參政范公成大爲和劑局、與公皆自筦庫中兼檢討官。二年考滿、當改秩。既已進卷、丞相壽春魏公使金、公嘗學事之、辟公爲書狀官。時和戰未決、敵兵在淮北、人情恟懼、公以身許。魏公至境上、議久不定、突騎大至、上下失據。公欲上馬、猶從容舉酒告魏公曰、先生冒寒、且酌此觴。觀者壯之。既退京口、尋復北向、眞所謂飛矢在上、行人在下。遣諭敵兵、開道而入、

皆引滿以待。魏公察公無懼色、喟曰、仁者之勇也。卒遂成禮、減歲幣而還。公之贊畫爲多。改左宣教郎、以奉使賞轉兩官、差充諸王宮大小學教授。時魏公曰貴、乾道元二年間進秉國均。公方忍貧需遠次、閉門讀書、未嘗求進。初、虞雍公一見奇公、欲引以爲用、公不欲就。六年始赴、又導公言兵、謝不能。退以書抵之、謂有定力、乃可立事。若徒爲大言、終必無成。幸成、亦旋敗。雍公爲之動色。踰年、始爲軍器監主簿。明年宗寺闕官、競謀攝事、以希寶牒之賞。俄得堂帖權丞、宰執謂公曰、求者紛然、擇不求者授之。輪對奏、立國之要在規模先定。陛下非無可致之資、而規模未立。孝宗初頗不懌、曰、朕未嘗不立規模。公奏、陛下銳意恢復、繼乃通和、和戰守三者、迄今無定論、不知何者爲規模。上曰、此則隨機而應。公復奏、發號施令、使人必信可也。今朝令夕改、人得一闕、臨時更易、尙不能保、外間至有





前降指揮更不施行、已差下人別與差遣之類、此不可以不戒。以錄本納政府、雍公曰、適已見之。規模即前日定力之論、某今益知此言之當也。遷將作監丞、國子監丞、秘書丞。再對、奏文武竝用長久之術、陛下獎進武臣、深得持平救偏之道。正恐未必得智謀勇略之士、或多便佞輕躁之徒、又非兼用之本意。上曰、只爲文臣太勝、要當扶而正之。又奏、聖慮甚至、但又不可過、恐復至于偏勝。又奏、邊民盜馬事、宣諭直旨行下。少蓬去位、公專省事。臺察奏太史局生所學淺陋、請增三二書以試之。公顧同舍曰、國家禁此等書嚴甚、不應用此增試。無敢忤御史者。公入奏、上稱善、即寢前議。議者不樂公乞去。相君堅卻之、且曰、上方譽美未已。將上、則御史不安。是年郊恩、賜緋薦攝禮部郎中。嘗奏論臺閣宜多用明習典故之士。上曰、知名之士試舉一二。公奏、如周必大、洪邁久在禁林、不待臣言。李

燾、莫濟、豈應棄之侯國。上欣納。甫數日、首召李公。尋再請、差知徽州。時朝行三數人以故去、皆乞免對。公不欲爲異、亦乞免謝辭。上指曰、陳某無他、可令陛辭而行。臨遣甚寵。且曰、方欲用卿、乃遽求去。卿其清省獄訟、盡心民事、政成當召。又謂大臣曰、陳某論事明練、貌類汪大猷。曾丞相曰、是其甥也。淳熙四年赴郡。郡自五季楊行密割據、刺史陶雅宿重兵、賦入倍旁郡。祖宗削平、每下寬令、又以山多田少、米則輸八折十、絹匹當重十二兩、徽獨止十兩。左帑忽加退剝、守遽使如令、民益不堪、控訴徹聞。上慨然欲蠲之、出自睿斷、謂申舊制、恐悍吏或能重爲民病、乃命並輸十二兩、而舉郡所輸之數、率十二匹而蠲其二、以絕並緣之姦。公適當其時、官吏奉行過當、揀擇太精、公即諭告而痛革之。時版曹威嚴、無敢忤之者。公貽書謂天子節經費以惠儉瘠、不能推廣聖德、吏則有罪。自今苟及度

程隨至輒受、敢豫以告。已即自以名銜受輸。植二表于庭、有中度而遭抑退者、抱所輸立表下、老校抗聲以告、親爲分明之。鈔至隨即批銷、人無留滯、吏不得搖手、實惠確乎及下。秋苗益選良吏、減加耗之甚者、石可四五升、民往往裹贏以歸。徽之政甚休、而得民之深多此類。又連歲大稔、米至不論錢、民以爲數十年所未有也。郡有大溪、歲晏民未病涉、忽鳩工造渡舟數十艘、莫測所用。梅霖暴漲、遂得以濟、始知公先事遠慮之效。自是歲一舉行、抵今賴之。旣新軍資庫、造閱武亭、復于郡庠創御書閣甚偉、皆取于餘財、民不知役。聽訟明敏、剖析滯事、情法曲盡、或至千言。鄰境有詣臺省、願得公定斷者。御史府索案去、官吏創見、爲之股栗。公略不排比、徑以授之。御史亟稱于朝曰、古之良二千石也。旣受代、吏民遮留、真有截鑿斷橋者。公由他道去、父老或送別數十里外、生爲之祠。去郡十餘

年、遇生日、郡人必來拜壽。後赴武昌、取道郡中、猶聚綵揭旗、填擁道路、亡慮千萬人。非素有以感其心、顧能爾耶。還朝入對、褒諭再三、首曰、新安之政甚好、從臣臺諫屢爲朕言。且舉卿所斷水利之訟、爲之賞歎不已。奏劄四篇、皆依奏付出。其一乞編類隆興以來寬恤詔令、有曰、法久則易玩、事久則易怠。惟申加戒飭、有以儆其觀聽、則千萬年猶一日也。上讀此數句至再、曰、可謂名言。其二論絹賦匹數旣減、吏胥市例大有朘削、恐後日復有苛取重擾、乞加告戒。上曰、變法之初、賴卿盡力、方成實惠。正恐後人未能遵守。尋即御批、行下本路監司、常切覺察。如敢違戾、具申尙書省取旨、重作施行。初在郡、因奏五事、末章極言歸正、忠順過于優渥、而戰士反輕、雖曰猥多、固自有十三處戰功之別。此輩皆出萬死策勳之人、今老矣、添差已罷、廩稍半給、至丐于市。軍士歎恨、有解體者。乞明詔優恤、



以示終始念功之意。堅後生圖報之心。上覽之嘉歎。會駕幸白石大閱。即以是日出命。再添差兩任。衣糧全給。三軍爲之呼舞。至是上又稱。向來五事中論戰功事甚當。此曹旣曾爲國盡死力。豈應老不加卹。卿于職事之外。能用心采訪。尤見爲國。公遜謝。玉色甚悅。且曰。便當用卿。自是受知益深矣。翌日諭大臣曰。陳某詳練敏達。爲政極有聲。奏論又切當。且留爲郎。以俟用。遂除戶部右曹郎官。會要書成。奏篇適在。除郎指揮之後。特旨轉行朝議大夫。且語丞相曰。治行方爲天下第一。一官不足道。嘗兼攝度支貳卿。欲援歲例從南帑借貸。公曰。用度方殷。援例或不從。則無策。去歲明堂借撥左帑金帛。莫若徑乞撥還。上初以借貸不可爲例。知爲還撥。即許之。貳卿曰。公之先見。乃爾耶。再兼禮部。會樞屬闕員。方以著庭名進擬。上曰。陳某今何官。對曰。今爲郎。上曰。豈有人才如陳某而可久爲

郎乎。即除樞密院檢詳諸房文字。二樞不受私謁。差遣恩例。悉令投牒送檢詳所。公爲之考令甲。酌故實。可否立決。右選翕然歸心。年除歲遷。徧歷左右司三年。至中書門下省。檢正諸房公事。天下事上于政省者。無不關都司。公處事明審。持心忠厚。議論寬平。咨白又爲明暢。執政曉然易從。間有不。可。隨事辨析。終歸于是。乃已。退亦不以語人。諸公由是開心相予。綱緡調撥。展轉失序。謂如湘潭來赴昇潤。江西卻上荆鄂之類。道里回遠。費倖滋繁。公盡搜故牘。攷閱程限。擇其便且順者更之。計歲省導行費等百餘萬緡。賞典不預。軍屯得米。旣便且速。嘗因輪對及之。上曰。非卿忠于體國。誰能及此。又歎曰。似此非一端。本爲貪賞。如此鄭重。人樂因循。故不能改耳。荒政方急。事有便民者。立爲稟行。徽旱尤甚。蠲放至八九萬緡。嚴婺亦且十萬。會有論徽饒二守救荒無術。又有言流移多二州之



民上震怒、皆至追停、自是守令罷者相踵。公奏、長吏不能奉行、黜免爲宜。但送迎費重、文書斷絕、職業且廢。今既罷去其太甚者、餘或有聞、請姑從鑄秩、以責來效。上深納之。先是、文書之下六曹、指定勘當者三日之限、或逾月不報。公摘其尤者繩之。長貳徑白宰府、請從闊略。公曰、六卿雖尊、事在有司、安可慢令。吾位固卑、所以糾六曹者、安得以尊撓法。卒治之、朝綱爲肅。刑房獄案如山、翻閱不倦、一以平心應之。謂有罪幸免、則冤者何告、以故平反雖多、而無失刑。士夫陳理恩賞、改正過名、有所拘閔者、一至都司、鮮有克濟。公曰、吾豈賣恩者。若一切沮之、則吏愈弄權、失職者何賴。躬自疏白、不以屬吏。有任滿賞爲部吏所格者、公詰之、乃曰、指揮中有自今後之文。公曰、前乎此後乎此者、皆得之矣。指揮本欲從寬、今乃爲汝輩舞文之具耶。徑爲放行、且請刪此三字、以絕吏姦。又捕盜賞有執

續降爲言者、公曰、格改之法不可用乎。吏駭服。大禮之後、理雪紛至、公爲之裁訂、擇取七人、皆當改正。丞相難之、辨論數四、艷然曰、檢正自將上則可。公曰、丞相以爲多耶。某于二百人中精覈得此、皆坐罪誤而沈抑者。願推內溝之念而行之。固爭不可、退各疏其冤狀、且欲引去。丞相徑以公手疏者將上、上一閱之、即曰、陳某精審、尙復何疑。便與施行。廟堂嘗啓擬某人能文、上曰、朕但聞陳某能文爾。是歲攝侍立者三、嘗因早求言、公應詔、乞公卿務行寬大。頃歲、監察御史京鏗極論從窄之弊、已蒙開納。此風未革、殊無和平氣象、聞者譴之。仲冬、上謂宰執曰、欲令陳某奉使、聞其有親、能爲朕一行否。試諭之。公回奏、有賤息可以奉老親、惟命之從。遂借吏部尙書、差淳熙十一年賀金國生辰國信使。正初陞辭、公嘗兼領左藏三庫、上首曰、每以繁劇相浼、備見忠勤、但非所以累賢者耳。祖宗用



人不拘、清濁全才、須詳試乃見。公奏、每恨驚蹇、不足以共煩使、褒諭非所敢當也。使還、除起居郎。入謝、上曰、卿端靜有文、將處卿以清要久矣。去歲欲用爲諫官、今日立螭、不必多謝。論圩田多勢家所據、使水無所潴、復無所泄。圩田未作、歲多豐稔。作圩以來、水旱屢告、利害甚明。上稱誦久之。又曰、卿今在邇班、凡有所聞、悉當忠告。會西掖暫闕、即令攝事。曰、朕亟欲觀陳某詞。命兼同詳定一司敕令。上曰、朝士中如陳某惟善是從、所謂心平氣定之人也。明年春、兼權中書舍人、泛恩濫賞、封繳無避。有察官奏旅櫬之殯寺院及十年、無子孫祭省者、許自與焚焚。公即繳論、謂如此則緇徒之無賴者得以藉口、而子孫之不肖者亦得以挾詐。請增爲二十年、必經涉郡邑、爲之勘驗得實、方許埋葬。仍標識以待其家尋訪。上大悅。從公之議曰、臺諫給舍多成一律、如此方見和而不同。時金使不通人

情多疑。公因對、上問、卿比出使、見其情狀、果何如。對曰、必不動。自古敵國欲有爲、必匿其壯士健馬。今呈露無餘、又其上下習驕、以兵爲諱、決不輕舉。顧在我不可不備。臣以爲外敵不足畏、而內患不可忽也。前郊祀四日、除中書舍人、人益知上眷之渥。陞兼詳定、既謝、上曰、已將宿齋、百冗中忽記得卿未爲真、豈應更過一郊耶。公會以足疾求去、問勞尤篤。且曰、當自處一方、賜卿須是就補中有去風藥乃佳。移時方得出奏、劄論、上有恩惠、而小民不預。名爲寬逋負、足以惠頑民耳。名爲赦有罪、足以惠姦民耳。願因慶赦、盡放天下五等戶身丁、四等戶一半。上笑曰、正合朕意。乃于赦中之行。公在詞掖最久、論事不爲苛細、而詔令有不便、事關國體、人所難言、公輒論奏、率蒙報可。安定郡王乞封妾爲夫人、公以葵丘同盟事繳奏。他日入對、上迎謂曰、所論子彤事極痛快、且是有補風教。朕爲之

擊節不已。奏事訖，求去。上曰：「今氣宇大勝前時，何爲及此？」對曰：「進退之義所當講明，況近列乎？」上曰：「朕用卿之意殊未艾。」又嘗論朝廷之事失于好詳，君人之道貴在執要。今陛下親細故而忽遠猷，事末節而紊大體，願深思漢明帝黃老養性之言，俯循唐劉洎多記多言之諫，舉綱要以御臣下，省知慮以頤精神。上曰：「邇亦自覺叢脞，遠近大小之臣未曾及此，尤見忠誠。」次曰語輔臣：「陳某之言甚忠，卿等相與持守，簿書細故可省即省，不必繁瑣。自今亦當少降指揮，中書務清，方是朝廷之體。全在卿等留意，熟復其言可也。」後數日，王丞相以外郡財賦事奏。上曰：「前此方言之，如此則又非陳某奏劄中意。朕不欲自催幾錢，此當責之監司。方說不可叢脞，不應又爾。」丞相以下媿謝。此事已編之聖政中。閣老李公獻出疆，以闕官奏。上曰：「陳某一人足辦，不必更差他人。」內相洪公邁典貢舉，復命兼

直學士院。王言俱出公手，應之不繁。上臨朝嘗曰：「官欲擇人，信非虛語。向來中書或用三人，今內外制獨陳某一，人當之，略不見其難。」時因邏者興獄，公奏：「長吏帥屬有賊賊不効，至煩陛下自用耳目，旣非執要之道，又恐人不自安。」乞詔內外長吏各公心考察。陛下端拱責成可也。伺察之風，誠不可長。又論：「列聖德澤至深，自熙豐變更，崇觀侈靡，利源日以浚廣，脂血日以腴竭。今賦入數倍于昔，而大農調度略不少寬，日以益甚。聖心焦勞，固欲省賦以寬之，而養兵所仰有不可闕。然今日曰養兵，明日曰養兵，是終不可爲，豈不深可慮哉？」願詔大臣博議，絕浮費，汰冗兵，以其可省之數，定爲蠲除之目。所以續民命而壽天之脈，豈止召和致豐而已哉？上皆是之。一日從容謂輔臣曰：「陳某老成凝重，可大用。葛邲亦其人也。」又曰：「使是人坐廟堂，自然安靖和平。天下本無事，庸人擾之耳。」秋復丐外，





上固留、且曰、卿忠厚而疏通、朕大用之意已決、切勿曠也。冬、高宗升遐、醫官王涇死有餘罪、止從鑪官編置。公勃然、必欲寘之極典、率同僚俱入奏。省吏謂無前比、公曰、臺官既許全臺、省官獨不許全省乎。極論之、得旨貸命、杖脊于都市、刺配筠州、無不快之。給舍久無連銜之舉、至是復振矣。思陵之役、臺察漕臣相繼以戒苛擾、節冗費爲言、公獨奏、欖宮應辦事重期迫、不無繁擾。議臣不得不以上聞、陛下不得不加申飭。臣剽聞沿路八頓只作二頓、翻餼酌獻、神幄亦欲轉移、酒果微物三日一易、過爲裁抑、四方何觀。願存大體、毋至削弱、以全送往之孝。德壽宮官屬兵衛宜與寬假。上瞿然曰、人但以浮冗當節、不思反失欽奉之意。忽泣數行下、曰、向非卿言、朕亦未悟、尤見忠藎。更降一詔、明示朕意如何。對曰、不必降詔、前日詔百費自內庫支、罷諸路州軍貢獻、已自明白。但乞持之以堅、則聖

孝有光矣。上曰、卿每事盡忠而知體、久欲置卿于經筵、適無闕。近諫大夫有闕、深欲處卿。亟閱班簿、在職已二年、不應下遷。少須、徑爲中司可也。公力辭不敢當。上曰、祖宗時必用淳厚忠直者爲之、卿正其選。又固辭。上曰、別思所以用卿。數日、兵部尙書宇文公价對、方及欖宮事、上遽曰、若欲省費、斷然不可。公與權禮部侍郎顏公師魯俱久次、宰臣奏各二年有半矣。上曰、顏某奉使回、即與爲真。陳某則更欲少俟、近及三年。以其代言論事皆得體、又甚盡忠、俾久留後省、須殊遷以報之。十五年五月、新平已被疾、求對、力丐外祠、以便醫藥。上卻之。且曰、卿每要去、可見易退。即日當峻遷、非平進也。對曰、臣豈敢以求去要進。上曰、尊親壽幾何。何以致疾。公對曰、小人有母、何敢當尊親之稱。具以實對、竟不許去。公再拜、復奏懇切、上爲之蹙額、眷眷不已。雖許留劄子、退及家、則不允之命已頒。上

方之藥踵至。次日旬休，十一日欲下除目，宰執奏已遭內艱矣。上嗟惻久之，亟賻以金帛。公哭過于哀，公卿弔者不惟惜公之去國，而尤慮公之幾于毀也。服闋，除集英殿修撰，知鄂州。鄂號難治，唐崔鄴所謂土沃民剽，雜以夷俗，非用威莫能治者。在今日最爲重鎮，三司鼎立，尤費調娛。及公爲之，從容泛應，三司如一家，軍民帖服。郡計仰商征，公總大綱，加惠行旅，而課入倍蓰，人情翕然。盡心力爲之三四月，而領略江山，得坐嘯之適。政譽流聞，以爲前後所無有。寬賦勸耕，曠土加闢，築隄捍江水，患遂除。興國、沔、鄂之間，私鑄聚衆至數千人，巢穴深阻，浸成盜斂。公聞之，曰：「勢已滋熾，緩之則害大，急之則事生。」諸司欲調兵，公曰：「計必出此。然民兵習知地理，可使大軍持重，以爲聲援，不足平也。」密召總首諭告，纖悉俾圖之。不踰旬，梟其魁以徇，餘皆縱使歸業。始以奏聞，仍乞分戍以鎮其地。郡有

安樂寮，以養窮民病夫，歲久漸墮。公爲增大之，具器用，給公田，至者如歸焉。紹熙三年，進煥章閣待制，褒治行也。秋大比，計使以外郡士子附試。公固持不可，則徑以勢臨考官。公度其必致紛爭，五夜躬至棘闈之前，叱外郡士毋得入，譁者始定。屯兵數萬，軍民有訟，平心而處，隨輕重曲直，牒軍中治罪。主帥旣樂其不相侵，亦不輕貸。由是感悅而知憚。去郡數年，人皆祠之不忘。此豈驅之使然哉？秩滿，移建寧府。俗尤勁悍，動輒殺人。公始治鬪毆，尤嚴于爲首者，環視不勸止，亦且連坐。鬪者爲之衰息。聞浦城有謀弄兵者，戕一家數人，鄰里擾動。公召左翼戍兵五十人，授以方略，計日擒之。崇安又有因告糴而殺傷者，尋亦捕獲。今上覃霈，公與二使者議此輩皆亂民，苟赦之，不惟死者含冤，將復出爲惡矣。遂誅之，而待罪自列。境內肅然。郡苦多訟，蓋有專以把持誣訴爲業者。家已致饒，鑿空造

事吏因爲姦、日不暇給。公親筆數百言、疏其情狀、示以法禁、且戒屬邑無輕受妄訴、受者先坐之、舉必行之令、嚴反坐之法、自此詬訟頓清矣。寬宿逋十餘萬、又代輸下五等繭稅、民以生佛稱之。公在鄂渚、政聲行于江湖間、建去行在所不遠、朝家益知公爲詳。改知鎮江府、適當游饑、請粟于朝、謂郡有餘貲、不應。公再疏曰、舊將所留緡錢十有四萬、不能糴三萬斛、以支兵食、尙不足、何以爲振業計。又不報、直以書抵丞相曰、丞相平昔以愛民稱、一旦得政、豈應遽變所守。畿甸之近、尙委而不顧、遐方遠徼、且將若何。某願乞身以歸、不忍千里之民、徒爲餓莩也。始許稱貸。公分畫詳備、講究深切、委遣僚屬、事無遺慮。猶以爲未盡、乘扁舟、屏騶衛、時一到給散之所。苟朝去而暮可還者、皆不憚往。有弊即懲、有勞即勸、至誠惻怛、無不感勵。吏胥亦習知公勞瘁之意、至不忍欺。人人如使君臨其旁、闔

境均及、全活數萬計、他郡流移者亦及之。邦人以爲自昔賑荒、未有如今日者也。始米價翔甚、雖給糴以平之、正恐不繼。又告糴于荆楚、遠商聞之、曰、是陳待制耶。俱告于湘北計臺、願以米就糴。計使胡公瑒以書來曰、公之恩信固有以孚于商賈、此事殆古所未見。米舟沓至、價遂以平、郡民不知饑之爲害也。前守造閘于丹徒鎮、欲取江潮以灌漕河、而地勢高仰、水終不登。公爲之撤去、改造石碓、以泄淫潦。父老因公按視、羅拜謝曰、固民所願、不謂使君慮及此也。埭下巨艘連檣、櫛比江滸、公問風濤猝起、汝曹安得無患。合詞對曰、沈溺時有之、顧無策以避耳。公訪問舊有海鮮界港、歲久湮塞、亟往營度、鳩工濬治、商旅相賀、謂自此可以無恐矣。又造二巨艦以濟揚子之險、皆爲永久之利。嘗有一僧投牒、自言結廬瀕江、每爲邏卒所侵擾、願行禁止。公察其庸悍、詰之曰、距此幾何。曰、在鎮江





江陰之間、各數十百里。公曰、吾得之矣、地僻而介于二境、官府既遠、盜賊出沒、汝必爲之囊橐。僧懼甚、立命尉曹掩捕、果得盜數輩。其中多爲便房曲室、即破壞之、悉實于理、撤其屋、以增養濟院、籍其田歸焉。吏民驚以爲神、咸曰、此巨蠹也、非迅雷不及掩耳、未易鉏治。自此奠枕矣。饑民既蘇、帑庾赤立、幾不可支。商旅久服公名、願出于塗、課入增羨。公不欲多積、又代下戶之輸。囂訟未息、公自以向者三郡令無不孚、此邦獨未盡服、是吾之過也、乃罰俸以自咎、百姓咸悅。憲使何公異聞之、曰、韓延壽之閉閣、復見于今。具列政績及此事聞于上。三山謀帥、公爲首選。加寶文閣待制。邦人挽留不可。迓吏至、或詆之曰、爾輩乃奪吾慈父耶。赴鎮過建上、父老歡迎如過徵時、喜公容貌不衰、無不以手加額。福之屬邑十有二、有去城數百里者。豫戒令佐毋得詣郡、專以靜鎮之、推所以治建者、行之八

州。初入境、領帥事、狂民有嘯聚者。公念攻之必散、入旁郡、分遣迓兵數路要截、如指諸掌。裨校奉成算以行、賊計窮、曾豪度不能脫、皆自經。餘數人定罪有差、脅從者縱去、姦盜爲之屏跡。治宗子之橫暴、申蠱毒之舊禁、蠲買鹽之宿逋、優貢銀之市估。內侍幹辦啓運宮、忽折簡相要、公惡其桀傲、劾去之。慶元三年二月、召赴行在、長途冒雨得疾、及關遽劇。既平、待對蕭寺、又爲嵐濕所乘、疾復作。力請外祠至再、始進華文閣直學士、提舉江州太平興國宮。六月庚戌抵家。甲寅、疾勢遽變、遂薨于正寢。甫歸、即語諸子、吾之病病矣。仕至禁從、五綰郡組、事君臨民、不敢有媿于心。今日無可憾者。惟先塋之碑未立、義莊規矩未備、汝曹其圖之。其爲我上章休致。尋有旨轉一官致仕。遺表聞、贈金紫光祿大夫、娶王氏、贈朝議大夫居隱之女、封令人、先十三年卒、贈碩人。子男六人、曰鞏、宣議郎。曰革。曰暉。

曰芾、通直郎、新知湖州武康縣。曰卓、宣教郎、新知紹興府餘姚縣。曰卓、宣教郎、新知紹興府餘姚縣。曰阜、承奉郎。輦先一年卒。革、畢未命。女一人未嫁。皆前卒。孫男四人、允協、承奉郎。允迪、允修、允諧。女五人、長適紹興府鄉貢進士石槩、次許嫁王埜、餘尙幼。碩人葬于鄞縣豐樂鄉橫溪西奧之原、諸孤將以十二月甲申奉公之柩合焉。公性資渾厚、風度凝遠、胸次洞然而臨事甚密、與物無忤而見義必勇。和氣襲人、望之而意消。至誠待物、不能以形遁。忠孝篤實、始終不渝。恥言人過、寸善必取、不以己長望人、而喜人之勝己。自奉如寒素、而周人之急則不計有無。善與人交、久而逾敬。道廣而能周、雖有強戾鄙俗之人、一與之處、自然降心。非意相干、恬不之較。彼自悔忤、待之如初。推賢揚善、不遺餘力、無一毫媚嫉之心。人以爲不可及、而公出于中心、不自以爲長也。自爲小官、所立已不苟、出入

朝行、奏論一于納忠。知無不言、言無不聽。推誠薦士、有味其言。一時推挽多名流、有致身法從者。林公栗夔州之罷、上怒未已、公力救之。楊公萬里由秘書監漕江東、上疏留行、皆人所難。獻替甚多、而不自表暴。故天子信之、而士夫推服。在都司、嘗以論事忤王魯公、久乃信服。曰、吾之益友也。知院胡公晉臣同省、嘗曰、舊聞名而未識面、今自以爲得師也。給事中王公信每語人曰、陳公一片心地、所謂海內少雙。少以文受知于魏丞相、汪端明、應辰進學不倦、文亦愈工。尙書韓公元吉稱之曰、文詞溫潤、有制誥體。異時必以名世。正獻陳公嘗薦于上曰、前御史陳某在太上前、挺然爲名臣。今其子賢而有文、金玉之德、絕似乃父。文惠史公屢執手曰、觀公人物器業、必當鼎貴。在相位時、恨不得相成。尙書程公大昌曰、陳同年文章、今日之巨擘。而政事則龔黃當反出其下。待制楊公曰、陳公海內



名勝、某平生之知己也。周益公尤愛公之文、時以佳句誦于百僚上、又薦之孝宗。嘗曰、某交游多矣、耐歲寒者惟公一人。此相知之最深者也。特進之徙于鄞、田廬之在莆者悉與羣從、鄞纔有租四百斛。仲氏蚤世、尤愛其季、每以自隨。特進捐館、新平命公中分以與叔父、後以特恩補官、卒老于貧。公時自窘于用、而周卹其家甚至。試郡奉叔母與板輿俱行、葬送婚嫁、一力辦集。二子諸壻及甥又皆仰給、久而彌篤。二女弟適張氏王氏、夫婦俱亡矣、以張氏中女嫁曾嚴州集、又嫁其季女。王氏妹生一子曰澈、新平尤愛撫之。今上受內禪、公在建、命之奉表、遂補文資。莆中宗族生事死葬無不被賜。從弟翟仕于南而歿、其兄稚方教育其孤、而稚又亡。公取其季以來、愛之猶子也、遂聯入太學。兄子肇頗友愛、而貧無以自存。公以叩益公、益公爲感動、遂官之。公又命諸子斥田二頃、略用范文正公

義莊規矩、以給宗嫗。三山之行、畫繡有光、族黨接踵至戲下、待之如一、捐俸以給之。親故有急、無不周卹。待安康之族、不異汪氏。義襟特達、人有難及。徽州招三衙軍、立表于門、有願行者躬閱之。有一人疑其氣度不類卒伍、問姓名、曰雍彥恭。詳問之、則泣下、曰、有先人之遺澤、可以仕、厄貧、故自棄爲此。公惻然、既飲食之、命取文書來、爲召保任奏上、且給其費。命下、又撫養之至數年。在都司、有稚子訴其父官廣中歲餘不得俸、竟死、曆券具在。即堂白下左帑代支、令本郡償納。仍飭諸道小吏俸不以時給者、劾長吏。在建有嫗自言前推官之家、夫婦俱沒、二子乞食久矣、求自便。公訪其實、乃華亭柳氏、即爲闢官舍、給常平之粟、取布帛于私帑、爲之買田、又教以學、去又以屬代者。公之及物類如此者衆、三事尤其著者。公自宰掾以至禁從、無歲不上丐外之請。或勸止之、則曰、叨在要塗、不可待





君相厭薄而後去。晚臨四郡、在外八年、後來者多已得政。或爲公稱屈、則笑曰、前輩有言、人生五馬、政不惡。與人處處爲春風、故能不薄其官。奉職日謹、精力德量皆不可及。所至惠利及民、水旱有禱、率應如響。若有相之者、尤善因其俗以爲政、寬猛適宜、鋤姦無所顧忌、撫恤善良、若不可解于心。去徽之後、尙爲長慮、論夏稅和買、著在甲令、兩數有差。更法以後、臣旣去郡、乃悉輸十二兩、是欲輕而反重。請竝從定制。上從之。徽人聞此、感德深矣。僚吏各盡其情、樂爲之用。賢者推轂恐後、間有按劾、皆甚不得已而後發。一吏一卒不至屬邑、各置一曆、守宰親筆往復、吏不得窺情實具見、如對面語、不待鉤距出奇、而政成于戶庭矣。未嘗以私喜怒施一箠、亦不妄用一錢、非有疾故不謁告。惜官物如己物、治公事如私事。每曰要當一日必葺、而便坐蕭然。自謂凝塵滿室、澹如也。遂以澹名室。公退

則讀故書、尤熟于班左。摘其精要爲一編、名曰擷芳。故公之文溫厚爾雅、有二書之風。有奏議制藁二十卷、詩文雜著十卷、藏于家。諸孤將版行以傳世。歷任四朝、出藩入從、飭己甚嚴、了無玷缺。天下之言長者、莫先焉。鑰亦汪出、與公俱生長外家。公見老母及舅氏尙書、每興如存之感。待中外諸表俱厚。鑰旣奉祠、無時不過舅家。聞公之歸、謂當春容里社、鄉人已有一舅二甥三學士之謠。天乎。何奪吾表兄之遽也。始公荷孝宗隆眷、垂上政塗、而以憂歸。今春召還、謂必枋用。及門而病不能朝、終不得究經綸之蘊、豈非命耶。嗚呼、姑無問此、以公之仁厚有餘、奇龐福艾、意必享上壽、而年不及七旬以卒、尤爲可痛也。薨之日、上而士夫、下而兒童走卒、識不識、無不傷嘆。內外姻黨哭之盡哀。五郡吏民以次致奠、且道其邦人聞訃涕泣、幾爲罷市。殆傳記所罕見也。諸子承公義方、各以材器自奮。

鞏嘗魁國子監、芾兩以漕薦上禮部、卓登紹熙元年進士科。積善餘慶、其在茲乎。將葬、芾等泣拜求狀公之行。知公之詳無如鑰者、又以舊所聞審于母氏舅氏、謹書之、將以告于太史氏而請謚于朝。若處鄉治家之法、皆公之餘事也、不屢書、謹狀。

樓鑰撰 《玫瑰集》卷八九

華文閣直學士贈金紫光祿大夫陳公居

仁神道碑

士大夫行誼著於鄉、文章顯於朝、豈弟布於郡國、有一焉已爲名臣、況兼是三者乎。求之近世、吾同年陳公其人也。公諱居仁、字安行。曾祖砥、妣林氏。祖嘉謨、贈右朝奉郎。妣安人黃氏。父稟、左朝奉大夫、太府少卿、累贈特進。妣安康郡夫人蔡氏、新平郡夫人汪氏。七世祖自光州避地徙泉之莆田縣。縣升軍、故爲興化軍人。太府再娶汪夫人而家明州。靖康初爲汾州教授、佐守臣張克戩禦虜、時已

有名、後知惠州、單車造賊壘降之。鄞縣僧法恩謀叛、事覺、誅戮將及無辜、太府方爲御史、論救多得免、人知其有後矣。公幼不群、年十四而孤、侍母依外氏、已能屬文。門蔭起家右迪功郎、信州鉛山尉。中紹興二十一年進士第、用舉主陞左從政郎、移永豐令、入監行在點檢贍軍激賞酒庫所糴場。孝宗登極、循左文林郎。隆興改元、修高宗聖政、時參政范公成大監和劑局、與公並兼檢討官、蓋異選也。淮甸交兵、魏丞相杞以宗正少卿使北、辟公書狀官。虜人被甲彎弓夾道脅使者、公馬上舉酒屬魏卿、天寒醕此觴。觀者壯之。減歲幣成禮而還、贊助爲多。先以格改左宣教郎、用出疆賞轉承議郎、擢諸王宮大小學教授、遲次久之。乾道六年四月始供職。明年秋、徙軍器監主簿、充國子監發解點檢試卷官。宗正修玉牒賞厚、適丞闕、朝士競求之。宰相知公恬靜、八年春堂帖兼權、會輪對、論立國



當定規模號令不可輕改。四月遷將作監丞。十月轉國子丞。九年進丞秘書。歷朝奉、朝散郎。中興會要成、轉朝請郎。再對、論文武并用本以救偏、若智謀勇略未進、而便佞輕躁者得之、將復有偏勝之患。孝宗嘉納。長貳闕、公行省事、議試太史局生<sup>①</sup>與臺評異、不自安、請外、不聽。郊恩賜服緋魚、權禮部郎官。淳熙元年再請去、八月選知徽州。陛辭、上曰、政成召卿矣。明日又對、大臣稱其明練。歛在五季爲偏方、夏稅特重、祖宗故輕之、他郡輸絹率以十二兩、惟歛十兩。比歲戶部謂不中度、卻之人以爲擾、上欲仍舊貫、而慮輸有輕重、吏得病民、每十二匹特蠲其二。四年、公適視事、植一表庭下、閱中否親分之、吏不能措手。秋、苗斛捐五升、預造津渡巨舟以待春漲、省費十四五。後遂爲例。決事公明、鄰有訟多詣臺省乞付公、御史間取文案復視、嘆曰、眞良二千石也。奉詔招軍、公令願行者立纛下。有

雍彥恭貌頗異、公詢奚自、泣云、父有遺澤、厄窮至此。公立取文書保任官之、士族感嘆。積閱例累轉朝請大夫、秩滿、邦人挽留、間道乃得去。入對、上諭以從臣言路多薦卿。公請編類即位以來寬恤詔令示民不忘、又乞申戒輸絹之弊。上曰、改法賴卿方成實惠。又曰、卿在郡便民五事、內欲優十三項戰功、朕極不忘。此輩旣爲國宣勞、豈應老不加恤耶。留爲尙書戶部員外郎。命未下、朝士再推會要賞。上曰、陳某治行第一、可因是併賞之。特轉朝議大夫、陞郎中、兼行度支、又兼禮部。明年春類試、公試、秋國子監解試、皆爲考官、遷樞密院檢詳<sup>②</sup>諸房文字。八年三月爲右司郎中、九年十一月進左司、十年轉中奉大夫、檢正中書門下省諸房公事、歷兼提領雜賣場、寄椿庫、左藏封椿庫、左藏南庫、寄椿錢物、及左藏庫措撥封椿錢物。左右史數闕、上輒詔公攝侍立官。閏十一月、假吏部尙書充金國

賀生辰使。十一年使回轉中大夫、遂除起居郎。公徧歷宰掾、精明詳審、議事間有未合、必反復辨析、期協於理。文書下六曹、報應稽緩、公適其尤者治之、不以六卿尊貴而廢也。獄案多所平反、或有叙雪、必歸功乎上、上知之。嘗奏湖湘運米遠下昇、潤江西及沂荆鄂、迂滯勞費、互易爲便。上謂非卿體國、誰能及此。至是直前謝新命、上曰、卿端靖有文、欲真清要久矣。今綴近班、有聞當入告。尋兼同詳定一司敕令。明年兼權中書舍人。御史奏僧坊寓柩子孫十年不至、即聽焚瘞。公言、期迫則緇徒得逞其私、不肖子孫十年不至、亦或興訟、請倍年數、仍從州縣驗問。上曰、臺諫給舍議事或相表裏、如卿可謂和而不同矣。郊祀前四日、眞拜中書舍人、以示簡記、賜服金紫。陞兼詳定敕令。公言、常赦宥過弛欠、惠不及小民、願因慶壽恩蠲四等戶身丁之半、五等盡免。從之。安定郡王子彤乞封妾爲夫

人、公執不可。上大喜、謂有補風教。又論人主當執要、毋親細務。上曰、亦覺叢脞、他人未嘗及。明日、令輔臣清中書之務。已而奏外郡財賦。上曰、方以陳某言諭卿等、此當責之監司。丞相而下皆愧謝。公又乞絕浮費、汰冗兵、計當省之數議蠲除之。曰、此富民要術也。上深然之。學士洪邁知貢舉、命公權直院。上曰、內外制向委數人、今陳某獨能辦。官欲擇人、信非虛語。轉大中大夫。高宗升遐、醫官王涇削官編置刑房、非公所領。公率給舍列銜繳駁、涇坐決配。思陵之役、議者多請節費、公謂稍損可也。酒果三日一易可乎。上泣曰、微卿言、朕何自知。公屢以母病乞去、上不可。內出珍劑以賜。仍獎諭云、卿盡忠知體、欲用爲諫大夫、頗疑左遷。他日處卿中司、亦諭政府陳某久次。方議峻遷、會母夫人卒。上嗟惜再三、厚賻金帛。紹熙元年八月從吉、壽康皇帝前期除公集英殿修撰、知鄂州。三司鼎峙、軍



民訴訟交至、公平心以應、舉得歡心。郡計仰征稅、公寬而有制、商賈輻湊。境多曠土、公禁冒佃、招流逋、田疇日闢。募人築大堤、以防水患、名之曰萬金。安樂寮居養貧病、名存實亡、公括閑田益之、至者如歸。奸賍盜鑄沔鄂間、千百爲羣、亂有萌芽、或請調兵迹捕。公召民兵總首密圖之、立獲渠魁、餘悉縱遣歸農。歲當大比、閩士爭冒試、轉運使右之、公一切禁止。治爲諸郡最。三年春、拜煥章閣待制、十月徙知建寧府。四年轉通議大夫。歲儉糶貴、公出儲粟、弛逋欠以巨萬計、市值頓平。遇水旱、祈禱立應。俗素剽悍、動輒殺人、又喜把持誣訴、公親爲文數百言、疏其情狀、厲以法禁。治鬪毆嚴甚、傍觀弗救、併坐之。五年夏、重華服藥、遠方傳聞洶洶、浦城惡少煽亂、至戕一家數人、公擒捕送獄。今上登極、大赦至、公命戮之、而自劾於朝。先是觀察推官柳某死不能歸、乳嫗扶二子行丐於道、公聞之、給以

粟帛、命士人教養之。德刑並施、人方安其政、會鎮江大旱、調守良難、乃以屬公。覃恩轉通奉大夫。十月至府、力請發封椿粟、擇委僚吏、分場賑給、時屏騎從潛往視之。間遣市米江湖間、大商人人知陳使君、爭出米求售。公區處有方、誠意孚洽、全活不可計。他處流移亦賴霑丐、人謂自昔救荒未有如公者。天塹萬艘銜尾、一遇風濤沉溺相望。公訪古海鮮界港、因民饑濬治之。距城十五里舊造閘通江、潮灌運河、地勢素高、力勞易朽。公命疊石爲斗門、以機引水、遇澇洩之。猾僧廬江陰界囊橐不逞、一日來訴邏卒侵擾、公致詰而色動、縛寘獄中、檄尉曹擒捕、盡獲羣盜、人以爲神。慶元元年冬、荒政策功特轉正議大夫。即代輸下戶稅、增廣貢院、新范文正公舊橋、示餘力也。明年七閩謀帥、五月加寶文閣待制、知福州。閩、公鄉部、且嘗治富沙、熟其風俗。初入界、饑民有嘯聚者、公部分牙兵遮擊之、



首惡自經餘黨望風屏迹。下車除監直之逋增貢銀之價嚴蠱毒之禁。宗室犯法治不少恕。內侍幹辦啓運宮者以例折簡具食公劾。其慢免之。莆中親舊憧憧來賀館待一出私錢慶弔則捐俸有差爲士者隨才成就之。三年二月詔赴闕次近郊以脾疾丐閒不允。五月再請乃除華文閣直學士提舉江州太平興國宮就賜對衣金帶歸而納祿轉正奉大夫疾革語諸子曰吾欲刻碑先塋買田兩頃爲義莊二事未就以是付汝言訖而卒六月甲寅也。遺表聞贈金紫光祿大夫享年六十九爵。自莆田縣男至奉化郡開國侯食邑通一千二百戶。妻碩人王氏贈朝議大夫居隱女先公十三年卒葬鄭縣豐樂鄉橫溪西奧之原。是歲十二月甲申諸子奉公柩合葬焉。子男六人鞏故宣議郎嘗魁國子華畢。未命而亡。曰芾兩試南宮今爲通直郎新知湖州武康縣。曰卓踐世科今爲宣教郎新知

紹興府餘姚縣。阜承奉郎義方之教有自來矣。一女早夭。孫男四人允協承務郎允迪允修允諧。孫女五人長適鄉貢進士石渠次許王埜餘尙幼。初太府自莆徙鄭故鄉田廬推與羣從。鄭產雖薄公念季父貧請於母而中分之。既仕復輟俸爲畢婚嫁。女弟出適又鬻田以資之。上登極遣甥王激表賀補將仕郎其孝友類此。公風猷粹穆資性忠厚處己應物一以誠信事賢友仁心無媚忌樂施周急不計多寡交際之間和氣可掬人負己亦弗校。及臨事則毅然有守不可干以私立朝每以忠言至計裨當路。故相陳正獻公嘗薦公有父風汪端明應辰韓尙書元吉程尙書大昌楊待制萬里當世儒宗文師推公爲名勝。在禁近盡言無隱。夔帥林栗擅格制書上怒不測楊待制以秘書少監諗事外補公皆上疏救止。歷典數郡率乘早歉匱乏公悉心措畫責成其下人樂宣力政事日修財用



自足、寬嚴適中、號稱循吏。所至皆立生祠、道出舊治、迎餞塞塗。平生不以私喜怒加人、退食淡然、讀書晏坐、置家事不問、居室以淡爲名。客至承顏接詞、自謂鄙吝可消、爭心可弭也。所著制稿、奏議二十卷、詩文<sup>⑨</sup>、班左擷芳各十卷。芾等知予與公厚善、以公外弟翰林樓尙書鑰之狀遠來請銘。予嘗愛唐中書舍人王仲舒爲人有古風、守峽、婺、蘇三州、晚帥江西有治理效。韓文公旣誌其墓、又有神道碑、其詩曰、志儒之本、達士之經、有直有諷、以忠遠名。翔於郎省、騫於禁密。發帝之令、簡古而蔚。又曰、久淹於外、歷守大郡。所至極思、必悉利病。化成有代、思以息勞。虛位而俟、忽隨滔滔。嗚呼、孰知數百載之後、斯言殆爲公設與。鄙詞尙何所措、姑拾此意而爲之銘曰、

文與行偕、治民久懷。左右具宜、古難其才。有美陳公、柔惠且直。沉酣載籍、如嗜飲食。入而事君、謀猷

孔嘉。累載代言、燁然其華。出而承流、威愛兼濟。五州去思、亶其豈弟。帝曰汝來、將圖爾庸。胡不慙遺、奄兮告終。公如仲舒、我愧韓子。誰其採詩、尙告太史。

周必大撰 《平園續稿》卷二四

吏部郎中蘇君墓誌銘

公諱玘、安訓直、泉州同安人。其高大父翰林侍讀學士諱某、曾大父觀文殿大學士太子太保諱某、兩世皆贈太師、封魏國公。大父諱某、朝請郎、贈金紫光祿大夫。考諱某、中散大夫、贈正議大夫。兩魏公皆厚德重望、仕至公卿、登載國史。至光祿、正議、仕雖不甚通顯、而學術風節、皆挺挺爲時聞人。游公定夫、銘光祿墓、而正議之銘、則韓公無咎作、兩公皆重許可、然于稱述、猶歉然若不能盡者。正議三子、公最長、而正議之配碩人歐陽氏、實堯文忠公之孫。公生出旣異于人、又天資嗜學、恂恂孝悌、

才雖高而不以驕人、處群衆中、退然若不能者。及遇事奮發、切中事機、于古有考、于後可傳、而公色辭愈謙下、衆或不知其出于公也。初以叔祖待制致仕、恩補將仕郎、調右迪功郎、嚴州遂安尉。會正議通判平江府。正議嘗爲樞密院計議官、同僚胡公銓上書詆斥時相、胡公既貶竄、正議亦株連去國、不調者久之。及來平江、適王晌爲守、揣時相意、日窺伺正議。正議廉且公、無所肆毒。既去、而正議權府事、適中丞常公同卒于海鹽、公爲文歎之、語頗及時相。晌得之曰、此奇貨、可以逞。即爲告密之舉。時相大怒、嗾御史劾奏、且曰、常同、師德之友婿、且其子玘之婦翁。遣玘致祭、以庫金二千緡賻之。雖究得誣狀、正議猶徙汀州、公坐停官。及時相死、正議起于久廢、公亦復官、調台州黃巖縣主簿。台四邑、黃巖爲大、綿地百萬畝、吏與豪民爲市、戶籍惟出鄉有秩手、官莫能稽考。公日夜紬繹、吏不得

欺。雖數十年蠹弊、皆洞見、貧下始得職。徙淮西安撫司書寫機宜文字。又以辟書從舅侍郎方公某使金國、裨助既多、又以其暇繫日爲書、凡山川城邑人情風俗、登載詳密、史官蓋有取焉。歸而知衢州常山縣、其治抑豪右、伸貧弱、下令簡而信、用刑明而寬。前日輸公上不以時者、皆期而至。又因定陽一鄉民病于役、與義役厝置、井井有理。至今爲利、它鄉人不病者亦置之。其虛心裕民如此。歲饑、出倉粟振糶、不待上命、民賴以不死。徙徐、遣吏市米于吳、視常平舊藏、悉如其故。政既成、顧縣學久弗不治、乃力葺之。進秀民于學、以禮延鄉老先生爲之表倡、士亦自知勉勵、儒風益盛。至于橋梁道路、廢置委積、產蓐醫藥、莫不爲之經理、而于掩骼殮死、長養孩幼尤篤。後數十年、士民追論之、猶感涕也。召赴都堂審察、監行在榷貨務都茶場。公事親盡孝、惟恐毫髮不當親意。繼遭家難、執喪毀瘠



注血、食米不鑿、鹽酪蔬果皆不御、終喪期如一日。朋友規以于禮爲過、輒痛哭以對、規者亦爲慘愴。至除喪久之、容貌猶不能復故。通判明州、在官二年、歷兩守、政事獄訟不苟合、亦不爲崖異。然有一嫩事、士民輒譁曰、此出于蘇公也。城東有造船場、晁公以道坐元符上疏、錮不許親民、來爲船官、所著書及文章最多、邦人至今言晁朝散、公慨然爲築祠立碣、致其師尊之意。陳忠肅公嘗謫于明、而豐清敏公明人也、公又言于郡、立二公祠于學宮、風勵學者。其所建類非庸衆人所及如此。會歲歉、常平使者朱公元晦檄公、屬以一郡荒政。客米自海道至者多、公請于朱公、請發積錢廣糴、以爲後備。朱公爲聞于朝、如其請。又建築定海縣崇丘河、灌四千頃、公爲之親駕、不避風雨、歷五月而後成。還朝、除知衡州。大臣薦公才可用、乃改常州。常、股肱郡、守符蓋不輕畀。及入對、所陳皆當上意。且行

矣。會有間言、乃改知泰州。泰亦名城也、公下車已六十、殊無倦意。祀社稷、陟降盥薦、恪敬不懈。學校釋奠、器服有不如禮令者、一皆正之。盡買國子監書、以惠諸生。王公明叟墓在郡境、遣郡僚致奠、人士爲之興起。旣擢爲尙書吏部郎、分職侍郎西銓、吏畏縮不敢肆、孤遠微眇、悉得自伸、譽望日著。以紹熙三年五月某甲子、遇疾捐館舍、享年六十有四。寄祿至朝請大夫。八月庚申、葬于會稽陶山西塢、祔正議墓。娶常氏、封宜人、以賢稱于族黨。先公一年卒。丈夫子二人、湊、文林郎、新知衢州常山縣。有志節、執喪如公喪考妣時。濂、將仕郎。女子二人、長嫁承直郎常州晉陵縣丞徐邦傑、次尙處。孫男、女二人、男曰隨、與其妹皆尙幼。公家世顯于累朝、天資穎異、讀書一過目、輒不忘。尤長考訂異同、其于官名、地里、軍制、民賦、雖甚細微、皆能講畫窮盡、無所放軼。屬文有體制、筆法簡遠、其尺牘尤爲時

所珍愛、往往藏去。少從張公子韶、徐公端立、汪公聖錫游、皆期之甚遠。晚學于朱公元晦、盡門人禮。元晦亦稱其善學。初、公從父有著魏公談訓者、未及成、或附益之。正議嘗以爲有可更定者、而未及書、公卒成之、藏之家塾。又著魏公年譜一卷、累歲乃成、識者貴之。公既歿之年、溱乃以呂祖儉狀來請銘。某曾大父太尉隧銘、實出魏公。而正議之銘、則某實書之。又少時、獲獨拜正議于床下、退而與公相從甚久。山陰之居、又俱在城西南、相望煙水間、扁舟往來、交好不薄、故爲之銘。銘曰、

維相魏公、克有全德、蓄畬三世、是生訓直。事賢友仁、政則宜民、晚才爲郎、志不盡信。陶山之腋、松栝孔碩、峨峨高丘、過者必式。

陸游撰 《渭南文集》卷三九

周伯濟墓誌銘

周氏爲鄞聞族、始慶曆中、殿中丞造以進士起家、

是生三子、曰處厚、溫厚、師厚。伯季俱躋世科、仲亦以特恩入官。父子兄弟皆以儒奮、家聲卓然。伯知建州永州、季爲荊湖兩路轉運判官、終左朝散郎、累贈銀青光祿大夫、娶范氏文正公之女。二子皆有俊聲、鐔登元豐二年第、以宏才直節、有志當世。坐黨籍、仕至左中大夫、知南雄州而止、公論歎息。銖登崇寧二年第、仕爲邑令、小不合、棄官而歸、鄉里尤高之。中大夫長子冲、任右迪功郎、監潭州南嶽廟。憂患之餘、又更建炎兵燬、慕叔父之節、不復仕進、優游終身。蓋自崇寧至淳熙、相去八十有七年、歲在屠維作噩、有燁薦于鄉、焯薦于漕臺。紹熙改元、焯遂登第。鑰時待罪朝行、問之、鄉人曰、此周伯濟之二子、監嶽之孫也。惟周氏名士繼出、仕不甚達、而多以退爲高。中大夫望最偉而不究于用、伯濟守家法、有隱德、不務進取、鄉人亦罕識其面、故其二子能振發如許。鑰晚出、及拜監嶽下風、而





隨侍游宦、在都下嘗見其二子、而聞伯濟之賢、獨未之識。既而奉祠里居、慶元四年二月壬申、聞伯濟之亡、因往弔之。二子一日率諸季泣以請曰、先君雖不及定交、而託契已數世。先君嘗卜通遠鄉、金谷里、銀山之原、去祖塋二里而近、將以九月丙午襄大事、願有以銘。君諱楫、伯濟其字也。莊重剛簡、幼不喜嬉戲。從濟南劉壽夫學、凜如成人。扃戶誦書、率至夜分、家人不得而入。抄書用楷法。既冠、一舉不售、即棄舉子業、而耽翫書史、以詩自娛。好讀杜工部、韋蘇州詩、至忘寢食、故下筆有二公之風。對客清談、無一語及名利事。監獄燕居、好客、日與賢士夫從容觴豆、君無兼侍、奉承惟謹。朝廷搜訪黨籍之後、欲加錄用。清敏豐公、少尹夏公之家、皆以此登仕版。君爲中大夫適長孫、郡上于朝、未報。連遭內外艱、遂不以介意。又不事生產、奉祀之餘、僅取自給。田有逋租、未嘗訟于官。公賦則先期

而輸、間至質貸、了無慍色。寡言若訥、不爲諂諛。克勤小物、憂深慮遠、舉足如蹈規矩。遇人無少長、與之均禮、真有不欺閭室之意。教子甚篤、每以門戶之重訓飭之、且曰、吾家以清白相傳、使汝輩能自奮勵、貧非所患也。延禮師儒、意不少懈、躬自督課、始終如一。鄉校月書季攷、焯謫屢占前列。君曰、吾方以此卜汝之進否。投卷必以實年兩際慶霈、謫年不及、或爲惜之、君更喜其不欺。焯拜恩以歸、賀客滿門、君以爲幸、不失舊物。繼此有望矣、亦不見其甚喜也。焯之官、請君御安輿以行。曰、吾方蕭散物外、寧能閉置車中、自爲局促耶。晚益杜門、簡出入、絕嗜好、薄滋味。康強少疾、不近藥石。先一年、忽以脾疾不喜食、他皆如平時。歲除祀先、不改其度。正旦微覺困憊、疾遽侵矣。諸子曰、奉盥禮不效、竟卒于家、享年七十。善人云亡、識與不識相與嗟悼、是宜銘矣。娶林氏。子男九人、煇、燁、焯、煥、焯、炤、煜、煒、

燁。長子及炤、煜早卒。焯迪功郎、台州臨海縣尉。女三人、壻孫輅、劉佃、紀標、皆里士。孫二人、塤、坦。女四人在室。銘曰、

周爲名門、中有人豪。世以學爲業、而仕以退爲高。猗歟夫君、閱世滔滔。哦詩擁書、隱居以自遨。有子克家爲時髦。君則已矣、後其有遭乎。

樓鑰撰 《玫瑰集》卷一〇三

編修石公行狀

公諱斗文、字天民、越之新昌人。新昌石氏、故衣冠盛族、枝葉散出。公之先獨稍微、居山谷間。曾大父倫、大父彝、皆不仕。父悅可、當青溪寇作、旁州羣盜并起、以勇戰捍鄉邑有功、補保義郎、任宣州巡轄鋪卒官。後公用恩贈父宣義郎。母茹氏孺人。公髫髻不好弄、巖然自重。嗜讀書、輒能諷誦、講畫、應答驚人。九歲而孤、家貧、處僻陋、無師友。太夫人獨奇其子、躬紡績、資遣游學。公即感奮刻苦、問辨思索、

窮日夜不怠、遂工文詞、必根柢於義理。初假館授書、自給、主人一慢易、公徑謝去。士友以此重敬之。試補入太學、報未至、於是太夫人春秋高、無以爲養、門戶未立、人謂公切切爲得失慮、而公方夜讀張公九成廷對、至靖康播遷事、悲泣感動不已。處太學十年、文行卓卓、有盛名、所與游皆一時鉅人長者。登隆興元年進士第、調台州天台尉。未上、丁太夫人憂、毀瘠瀕死。終三年、足不踰其閭內。旣免喪、哀猶未忘、夜寐或連聲呼母、兒啼甚悲、覺而涕淚滿鬚。歲時奉祀、嗚咽泣下、如此終其身。再調邵武軍司戶參軍。親友強之試教官、改授臨安府學教授。臨安學故敝陋、游士以請託冗食其中、士之自好者耻而不入。公至、歎曰、是非所以稱輦下教養之意也。即與同寮周君祐首捐己俸、丐資守帥、新其宮而大之。旣則一視成均、律以法度、拔能表善、訓誨諄切。未幾、鄉風競勸、多成就者。壽皇即位

之九年、銳欲恢復、思度外用、人而張說者、除簽書樞密、講筵官張公栻、中書舍人范公成大、刑部侍郎王公杲、交章論其不可。命既中寢、居頃之、三人相繼去國。公奮然出位拜疏、謂比者縉紳相賀、以陛下舍己從人、改過不吝、真堯湯之主。而道路或言左右僕御、怨此三人入骨髓、將必媒孽其後。臣以謂聖明在上、決不容此。今事卒驗、臣誠駭然。夫以陛下之明、誤舉至此、忽不自覺、浸潤膚受、真可畏哉。羣臣指以相戒、骨鯁沮怠、精銳銷慙、異日國家有大姦慝、政事有大愆繆、陛下何自聞之。因條時政缺失、且言大臣彌縫左右、籠絡士大夫、以保位固寵、而敗壞成法、斲喪名器、不暇顧惜。上以其書示首相、首相議加貶斥、次相救之得免。皇太子尹臨安、掾曹以狀自列、得奏改京秩。或告公教官應處掾曹後、公竟不自言、故賞亦不及。秩滿、近例謁廟堂、當除太學官。公徑從吏部選、得漢陽軍軍

學教授以歸。寓居郡下、授徒累年。至漢陽、學舍尤荒涼、士子絕寡。公居數月、風厲興起、旁郡秀民來遊日盛。守將訪問、因事納忠、裨益宏多。同寮艱急、倡義拯卹、聞者感勸。淳熙五年、召赴行在。上殿、首論我祖宗家法、收大臣展盡底蘊之效、而無權臣竊弄威福之患。惟自朝廷有公論耳。蓋朝廷命令未允、則舍人不行詞、給事不書黃。否則臺諫得彈劾百官、有司得以其職執奏、人主虛心於上、采聽公論、以爲進退賞罰。而天下治。今陛下宵旰勤勞、而羣臣受成苟免。意者學士大夫公論不昌、風采銷靡、而後朝廷得容其私。朝廷容私、而後陛下至於獨煩睿斷歟。前後臣子孤負實多、聖意狐疑、莫適倚託。由是人物多從親擢、而大臣無與進擬。諸司各有承受、而三省無關出納。譬之萬金之家、必嚴大門、以司出入。一旦以守者爲疑、而創開便門、通道旁出、終亦不免使人守之、不知便門之私。乃



復滋甚。何則。大門十手所指。人猶有所忌憚心。便門者無人之境。彼何所不至乎。上從容嘉獎曰。卿論極平。朕亦思之。要須付與外廷。又論。凡事不可無規。撫而規。撫亦自有次第。爲今日計。守和以弔敵。先事而自治。爲恢復規。撫邊計。不以病國。國計有以備邊。爲自治規。撫地使無遺耕。耕使無遺利。羸兵得以自養。精兵得倍養。盜賊歸兵。農屯田佐馬政。其成在官吏無曠職。其機在大小無遺材。爲經理邊計。規。撫此其次第大略。而所以領其事者。必惟其人。誠擇中外文武兼資。望實兩重。如羊祜。祖逖。得二三人。分委責成。不過十年。舉天下爲陛下倚矣。然中外一脈。治先腹心。若網在綱。挈提有會。有如大臣。取充位廟堂。無定論。事有奏請。誰與報聞。人有撼搖。誰與保任。故規。撫次第。又當自朝廷始。又論。今大農歲入常賦之外。不過茶、鹽、酒、稅。而四者之利。比多不登。究其所繇。惟其取利太盡。

遂至利無可取。故茶鹽抵法而盜販。酒坊敗闕而不復。商旅艱棘而輟行。則公上之入能勿虧乎。故知立法務在予民。則其收效自然富國。又口奏其利病甚悉。上更以聖意反覆焉。將退。命公條上所言邊計事。改宣教郎。除樞密院編修官。公條具經理邊地爲三十九日上之。後省疏駁。不得行。當是時。上意方喜得公。而忌者比肩立。公尋請於朝。願得并邊可入一差。遣自效。添差通判廬州。公言往年上書。嘗謂添差非便。今身自爲之。不可。改通判揚州。初。公在漢陽。部使者太守咸敬愛之。將漕劉公焯晚至。風采峻甚。浸忤州。列郡亦數蒙譴。獨雅重公。數招致所。考論古今。或累日不聽去。由是向之敬愛公者。疑且憾焉。不知調護之力固多也。及被召戒行。鄂有士人贊束脩爲敬。言江路風濤。願以大艦載公東下。公察其富賈。必藉我以免征。卻弗許。彼計不遂。則前公行。造所過津吏。給之曰。有



石教授厚載且至矣。於是吏伺公舟、極意搜索、篋筐細碎發露不遺、見其蕭然無有也、則皆媿謝去。然疑憾之黨遂實其謗、布於都下、至是言事者撫其說、且論在邊必喜事不靖。到揚州纔二十日、罷還至瓜州、風怒不可渡、公爲文取酒酌江、略曰、維貪維不靖、臣子大罪。誠一毫髮如議者言、某當盡室溺江、甘死不憾。不然、便風一帆、賜以安濟。凡我同涉、與蒙福焉。語訖解維、則北風送舟而南矣。七年、主管台州崇道觀。九年、差通判婺州。十二年到官。經總制歲額浩繁、異時每病其不登、吏卒符移旁午諸縣。公命罷色目之猥、釀者蠲逋欠之積、久者一爲疏通。期會甚簡、比終更、視前主者所辦反溢緡錢十四萬。吏以賞格進、公弗省、曰、吾乃以是希賞者耶。郡榷酤不售、舊例抑吏兵貰之、月刻其祿廩以償、且高其值。公職董酒征、一令禁止、躬爲區畫、覈滲漏、蠲羨餘、使官酤不貴以惡、課輒大豐。

而宿弊頓除。其他辨枉息爭、表勸風俗、及裨補郡政、爲民物利者、不能悉書。東陽有積冤而得直者、繪像以祠於家、往來人能道之。十五年、差權發遣武岡軍、未上。舊苦痞、浸劇、十六年四月某日終於家。官至朝奉郎、享年六十有一。娶王氏、荆文公之曾姪孫、封孺人。子男一人曰志學、以公致仕恩、當補將仕郎。四女、長適鄉貢進士丁用中、次適漕貢進士周宗元、次適進士杜光朝、幼未行。孫男一人康孫、孫女二人。公謙敬慈良、待人不能爲崖岸、城府、蠢愚幼賤、一接以禮、從容浹洽、人得展盡、聞寸長片善、咨嗟獎譽、自謂不及。仁心惻怛、藹然見於聲容。爲人謀、精思反覆、不啻如己利害。無疏戚、一旦扣門以急難告、情實可矜者、奮然身任之、上下經營、不顧吾力及不及。其捐財濟人、或傾橐裝、解衣輟食、不自留明後日計。人或以此欺之、而不相知者、往往疑其多私、見謂盜名不情、公亦不能改。



也。體羸幾不勝衣、病畏寒暑、常枯槁憔悴。然即之風調清深、意度瀟散、自使人鄙吝消釋。至有所感發、氣槩凜凜、神彩峻徹、語連夕達旦、出入勞苦不倦也。閒居鄉曲、事有關百姓休戚者、必以告有司。尤悉力於救荒、前後以賑贍建白於府帥部使者、因而見委者三、往往以私錢佐其用、蓋嘗質告身乞糴以足。至今一邑之民皆曰、公實生我。然公嘗恨不盡如其志、每爲客誦南豐曾公救災議而屢歎之。其治家不細苛、淡而有恩、寬而不弛、正己以感人。告教子弟、歔歔繼之。汲引後進、尤喜講評文辭。越中士多公門人弟子。公之學自少力舉子業、已獨用意流俗之外、一以古人自期。育德果行、醇粹明白、其所成就植立既高矣。及交廣漢張先生、枳東萊呂先生、祖謙臨川二陸先生、九齡九淵、晚交新安朱先生熹、公年皆其長、而方惓惓師慕、請所以詔之者。顧自恨衰疾早侵、不克盡力竟學餘。

所往來當世名士多後出、或自以不逮公遠甚、公亦皆以師友之禮下之。此其進德爲己之實爲何如、而其心量宏大、豈淺丈夫所能知哉。平生志念無一日不在君民、其考訂今日急政要務、規模細大、本末略無遺者。公或默然終日、至輾轉不寐、通夜以思、大抵皆國家天下之事、而目前瑣細、多闊略不經意。謀生鹵莽、視妻子寒饑、漠如也。世以是疑其疏。然陛對所論茶鹽酒稅、取利太盡、則他日重華之政、蓋略發其意、而效可見矣。至若邊屯綱目、思慮已密、使得施行、加潤澤之、其成績豈少哉。人物衰謝、有志如公者、復棄不及用以死、豈非天下所當痛也。公死、其友族姻故與新昌之人田父野老、哭之皆哀。雖其所及止此、非夫庶幾於古之至誠者、其孰能得之。嗚呼、今之世尙可復見斯人否耶。其孤卜以某年某月日葬公鼓山之原、謹爲之狀、其行實如右。



儒藏

孫應時代石應之撰《燭湖集》卷一一

校記

①生：原作「坐」，據四庫本《文忠集》改。

②詳：原作「討」，據右引改。

③「或有」句：右引作「或有聽斷，必歸於平，上每知之」。

④捕：原作「逋」，據右引改。

⑤治不少恕：原作「必不怒治」，據傳增湘校本《廬陵周益國文忠公集》（下簡稱傳校本）改。

⑥効：原作「敕」，據四庫本《文忠集》改。

⑦爵：原脫，據右引及傳校本補。

⑧華畢：原作「革暈」，據四庫本《文忠集》改。

⑨文：原作「書」，據右引改。

宋儒碑傳集卷一百三十四

朱熹

朝奉大夫華文閣待制贈寶謨閣直學士

通議大夫諡文朱先生行狀

曾祖絢、故不仕。妣汪氏。祖森、故贈承事郎。妣程氏、贈孺人。父松、故任左承議郎、守尚書吏部員外郎、兼史館校勘、累贈通議大夫、妣孺人祝氏、贈碩人。本貫徽州婺源縣永平鄉松巖里。

先生姓朱氏、諱熹、字仲晦、父朱氏爲婺源著姓、以儒名家、世有偉人。吏部公甫冠、擢進士第、入館爲尚書郎、兼史事、以不附和議去國、文章行義爲學者師、號韋齋先生、有文集行於世。吏部公因仕入閩、至先生始寓建之崇安五夫里、今居建陽之考亭。先生以建炎四年九月十五日午時、生南劍尤溪之寓舍。幼穎悟、莊重能言、韋齋指示曰、此天也。問曰、天之上何物、韋齋異之、就傳授以孝經、一閱

封之、題其上曰、不若是、非人也。嘗從羣兒戲沙上、獨端坐、以指畫沙、視之、八卦也。少長、厲志聖賢<sup>①</sup>之學、於舉子業初不經意。年十八、貢于鄉、中紹興<sup>②</sup>十年進士第、以左迪功郎主泉州同安簿<sup>③</sup>。莅職勤敏、纖悉必親、郡縣長吏、事倚以決。苟利於民、雖勞無憚。職兼學事、選邑之秀民充弟子員、訪求名士以爲表率、日與講說聖賢脩己治人之道。年方踰冠、聞其風者、已知學之有師而尊慕之。歷四考、罷歸、以奉親講學爲急。二十八年、請奉祠、監潭州南嶽廟。明年召赴行在、言路有託抑奔競以沮之者、遂以疾辭。三十二年、祠秩滿、再請。孝宗即位、復因其任、會有詔求直言、因上封事、其略言、聖躬雖未有關失、而帝王之學不可以不熟講。朝政雖未有關遺、而修攘之計不可以不早定。利害休戚雖不可徧以疏舉、然本原之地不可以不加意。陛下毓德之初、親御簡策、不過諷誦文辭、吟詠情性、比年



以來、欲求大道之要、又頗留意於老子、釋氏之書。記誦詞藻、非所以探淵源而出治道。虛無寂滅、非所以貫本末而立大中。帝王之學、必先格物致知、以極夫事物之變、使義理所存、纖悉畢照、則自然意誠心正、而可以應天下之務。次言、今日之計、不過脩政事、攘夷狄。然計不時定者、講和之說疑之也。金虜於我有不共戴天之讎、則不可和也。義理明矣。知義理之不可爲而猶爲之、以有利而無害也。以臣策之、所謂和者、有百害而無一利、何苦而必爲之。願疇咨大臣、總攬羣策、鑑失之之由、求應之之術、斷以義理之公、參以利害之實、閉關絕約、任賢使能、立紀綱、厲風俗。使吾修政攘夷之外、了然無一毫可恃爲遷延中已之資、而不敢懷頃刻自安之意、然後將相軍民無不曉然知陛下之志、更相激厲、以圖事功。數年之外、志定氣飽、國富兵強、視吾力之強弱、觀彼釁之淺深、徐起而圖之、中

原故地不爲吾有、而將焉往。次言、四海利病係斯民之休戚、斯民休戚係守令之賢否。監司者守令之綱、朝廷者監司之本、欲斯民之得其所、本原之地亦在朝廷而已。今之監司姦賊狼藉、肆虐以病民者、莫非宰執臺諫之親舊賓客。其已失勢者、既按見其交私之狀而斥去之、尙在勢者、豈無其人。顧陛下無自而知之耳。明年改元隆興、復召辭、不許、即入對、其一言、大學之道在乎格物以致其知。蓋有是物必有是理、然理無形而難知、物有迹而易觀、故因是物以求之、使是理瞭然於心目之間、而無毫髮之差、則應乎事者自<sup>④</sup>無毫髮之繆。陛下雖有生知之性、高世之行、而未嘗隨事以觀理、故天下之理多所未察、未嘗即理以應事、故天下之事多所未明、是以舉措之間、動涉疑貳、聽納之際、未免蔽欺。平治之效所以未著、由不講乎大學之道、而溺心於淺近虛無之過。其二言、君父之讎不

與共戴天、乃天之所覆、地之所載、凡有君臣父子之性者、發於至痛、不能自己之同情、而非專出於一己之私。然則今日所當爲者、非戰無以復讎、非守無以制勝。是皆天理之同然、非人欲之私忿也。未言、古先聖王制御夷狄之道、其本不在乎威強、而在乎德業。其任不在乎邊境、而在乎朝廷。其具不在乎兵食、而在乎紀綱。今日諫諍之塗尙壅、佞幸之勢方張、爵賞易致而威罰不行、民力已殫而國用未節、則德業未可謂修、朝廷未可謂正、紀綱未可謂立。凡古先聖王所以強本折衝、威制夷狄之道、皆未可謂備。三劄所陳不出封事之意、而加剴切焉。先生以爲制治之原、莫急於講學、經世之務、莫大於復讎。至於德業成敗、則決於君子小人之用舍。故於奏對復申言之。蓋學有定見、事有定理、而措之於言者如此。除武學博士、待次。乾道改元、促就職。既至、以時相方主和議、請監南嶽廟、以

歸。三年、差充樞密院編修官、待次。五年、三促就職。會魏掞之以布衣召爲國子錄、因論曾覲而去、遂力辭。先生嘗兩進絕和議、抑<sup>⑤</sup>佞幸之戒、言既不行、雖擢用狎至、不敢就。出處之義凜然有不可易者。尋丁內艱。六年、復召、以未終喪辭。七年、既免喪、復召、以祿不及養辭。四年之間、辭者六。九年、有旨、安貧守道、廉退可嘉。特改合入官、主管台州崇道觀。先生以改秩昇祠、皆進賢賞功、優老報勤之典。今無故驟得之、求退得進、於義未安。再辭。淳熙元年、又再辭。上意愈堅、始拜命。改宣教郎、奉祠。二年、除秘書郎。先生以改官之命、正以嘉其廉退。今乃冒進擢之寵、是左右望而罔市利、力辭。時上諭大臣、欲獎用廉退、執政以先生爲言、故有是命。會有言虛名之士不可用者、以故再辭。即從其請、主管武夷山冲佑觀。五年、差權發遣南康軍事、辭者四。始之任。先生自同安歸、奉祠家居幾二十年、間關貧





困不以屬心、涵養充積、理明義精、見之行事者益霈然矣。至郡、懇惻愛民、如己隱憂、興利除害、惟恐不及。屬邑星子土瘠稅重、乞從蠲減、章凡五六上。歲值不雨、講求荒政、凡請於朝、言無不盡。官物之檢放、倚閣、蠲減、除豁帶納、如秋苗、夏稅、木炭、月椿、經總制錢之屬、各視其邑目、爲之條奏、或至三四、不得請不已。并奏請截留綱運、乞轉運常平兩司撥錢米充軍糧、備賑濟、申嚴鄰路斷港遏糴之禁。選官吏授以方略、俾視境內、具知荒歉分數、戶口多寡、蓄積虛實、通商勸分、多所全活。其設施次第、人爭傳錄以爲法。訖事、奏乞依格推賞、納粟人者凡數四。郡濱大江、舟艤岸者遇大風輒淪溺、因募飢民築堤捍舟、民脫於飢、舟患亦息。先生視民如傷、至姦豪侵擾細民、撓法害政者、懲之不少貸、由是豪強斂戢、里閭安靖。數詣郡學、引進士子、與之講論。訪白鹿洞書院遺址、奏復其舊。又奏乞賜書

院敕額及高宗御書、石經版本、九經註疏等書者至再。每休沐輒一至、諸生質疑問難、誨誘不倦。退則相與徜徉泉石間、竟日乃反。又求栗里陶靖節之居、西澗劉屯田之墓、孝子熊仁瞻之閭、旌顯之、猶以不得悉行其志爲恨。明年、詔監司郡守條具民間利病、遂上疏言、天下之大務莫大於卹民、卹民之本又在人君正心術以立紀綱。今日民間特以稅重爲苦、正緣二稅之入、朝廷盡取以供軍、而州縣無復贏餘、則不免於二稅之外別作名色、巧取於民。今民貧賦重、若不討軍實、去浮冗、則民力決不可寬。惟有選將吏、覈兵籍、可以節軍實。開廣屯田、可以益軍儲。練習民兵、可以益邊備。今日將帥之選、率皆膏粱子弟、廝役凡流、所得差遣、爲費已是不貲、到軍之日、惟望掊斂刻剝、以償債負。總餽餉之任者、亦皆倚附幽陰、交通貨賂、其所驅催東南數十郡之脂膏骨髓、名爲供軍、而輦載以輸

權倖之門者不可以數計。然則欲討軍實以紓民力、必盡反前之所爲、然後乃可革也。授將印、委利權、一出於朝廷之公議、則可以絕苞苴、請託之私、而刻剝之風可革。務求忠勇沉毅、實經行陣之人、則可以革輕授非才之弊、而軍士畏愛。蒐閱以時、竄名冗食者不得容其間。又擇老成忠實、通曉兵農之務者、使領屯田之事、付以重權、責其久任、則可以漸省列屯坐食之兵、稍損列郡供軍之數。軍籍既覈、屯田既成、民兵既練、州縣事力既紓、然後可以禁其苛歛、責其寬恤、庶幾窮困之民得保生業、無復流移漂蕩之患矣。所謂其本在於正心術、以立紀綱者、蓋天下之紀綱不能以自立、必人主之心術公平正大、無偏黨反側之私、然後紀綱有所繫而立。君心不能以自正、必親賢臣、遠小人、講明義理之歸、閉塞私邪之路、然後乃可得而正。今宰相、臺省、師傅、賓友、諫諍之臣皆失其職、而陛下

所與親密謀議者、不過一二近習之臣。此一二小人者、上則蠱惑陛下之心志、使陛下不信先王之道、而說於功利之卑說、不樂莊士之讜言、而安於私讒之鄙態。下則招集天下士大夫之嗜利無耻者、文武彙分、各入其門、所喜則陰爲引援、擢實清顯、所惡則密行訾毀、公肆擠排。交通貨賂、則所盜者皆陛下之財。命卿置將、則所竊者皆陛下之柄。陛下所謂宰相、師傅、賓友、諫諍之臣、或反出入其門牆、承望其風旨、其幸能自立者、亦不過齷齪自守、而未嘗敢一言以斥之。其甚畏公論者、乃略能驚逐其徒黨之一二、既不能深有所傷、而終亦不敢明言、以擣其囊橐窟穴之所在。勢成威立、中外靡然向之、使陛下之號令黜陟不復出於朝廷、而出於此一二人之門、名爲陛下之獨斷、而實此一二二人者陰執其柄。蓋其所壞非獨壞陛下之紀綱、乃併與陛下所以立紀綱者而壞之、則民又安



可得而恤財又安可得而理軍政何自而修土宇何自而復宗廟之讎耻又何時而可雪耶。先生在任嘗用劄子奏事後因臺諫言用劄子非舊制遂奏乞罷黜又以致人戶逃移自劾者再以疾請奉祠者五。將滿除江西提舉常平茶鹽事待次。初廟堂議遣先生使蜀上意不欲其遠去故有是命。詔以修舉荒政民無流殍除直秘閣凡三辭皆以前所奏納粟人未推賞難以先被恩命。會浙東大饑易提舉浙東常平茶鹽事。時民已艱食即日單車就道。復以南康納粟人未推賞辭職名且乞奏事之任。納粟賞行遂受職名入對。其一言陛下臨御二十年間水旱盜賊略無寧歲意者德之崇未至於天與業之廣未及於地與政之大者有未舉而小者無所繫與刑之遠者或不當而近者或幸免與。君子有未用而小人有未去與。大臣失其職而賤者竊其柄與。直諒之言罕聞而諂諛者衆與。德

義之風未著而污賤者騁與。貨賂或上流而恩澤不下究與。責人或已詳而反躬有未至與。夫必有是數者然後足以召災而致異。其二言陛下即政之初蓋嘗選建英豪任以政事不幸其間不能盡得其人是以不復廣求賢哲而姑取軟熟易制之人以充其位。於是左右私褻使令之賤始得以奉燕間備驅使而宰相之權日輕。又慮其勢有所偏而因重以壅己也。則時聽外廷之論將以陰察此輩之負犯而操切之。陛下既未能循天理公聖心以正朝廷之大體則固已失其本矣。而又欲兼聽士大夫之公言以爲駕馭之術則士大夫之進見有時而近習之從容無間。士大夫之禮貌既莊而難親其議論又苦而難入。近習便辟側媚之態既足以蠱心志其胥吏狡猾之術又足以眩聰明。此其生熟甘苦既有所分恐陛下未及施其駕馭之術而先墮其數中矣。是以雖欲微抑此輩而此輩

之勢日重。雖欲兼采公論、而士夫之勢日輕。重者既挾其重以竊陛下之權、輕者又借力於所重以爲竊位固寵之計、中外相應、更濟以私、日往月來、浸淫耗蝕、使陛下之德業日隳、綱紀日壞、邪佞充塞、貨賂公行、兵愁民怨、盜賊間作、災異數見、飢饉荐臻。羣小相挺、人人皆得滿其所欲、惟有陛下了無所得、而國家顧乃獨受其弊。其三言救荒利害、如州縣旱傷、早行檢放、從實蠲減、勸諭人戶賑糶、務得其平、納粟之人早行推賞、所納米數仍減其半。乞撥豐儲倉米三十餘萬石以備濟糶。州縣新舊官物並且住催、紹興丁身等錢預行蠲放、及免米商力勝稅錢、量立賞格、官吏違慢者奏劾、昏病者別與差遣、仍選差得替待闕宮廟持服官員時暫管幹。其四言、水旱三分以上、第五等戶免檢並放。五分以上、第四等戶依此施行。乞行著令、及請頒行社倉條約於諸路。其五言紹興和買、乞議革

其弊。其六言南康嘗乞蠲減星子租稅、有司拒以對補、吝細鄙狹、不達大體。其七言白鹿書院請賜書額。先生所對奏劄凡七、其一二皆自書、以防宣泄。又以南康所上封事繕寫成冊、用袋重封、於閤門投進。後五劄亦有非一時救荒之急者、當倥偬不暇給之際、而憂深慮遠、從容整暇、蓋急於救民、罄竭忠愫、不敢有所隱也。先生所居之鄉、每歲春夏之交、豪戶閉糶牟利、細民發廩強奪、動相賊殺、幾至挺變。先生嘗率鄉人置社倉以賑貸之、米價不登、人得安業、至是乞推行之。白鹿書院事本不暇及、前期執政使人諭以且宜勿言、先生因念主上未必有鄙薄儒生之意、而大臣先爲此言、不可及對、卒言之。上委曲訪問、悉從其請。先生初拜命、即移書他郡募米商、蠲其征、及至、客舟之米已輻湊。復以入奏荒政數事推廣條上、情詞懇惻、條目詳密。日與僚屬寓公鈞訪民隱、至廢寢食。分畫既



定、按行所部、窮山長谷、靡所不到、拊問存恤、所活不可勝計。每出、皆乘單車、屏徒從、所歷雖廣而人不知。郡縣官吏憚其風采、蒼黃驚懼、常若使者壓其境、至有自引去者、由是所部肅然。而尤以戢盜、捕蝗、興水利爲急、大抵措畫悉如南康時、而用心尤苦。初奏紹興和買之弊、至是乞先與痛減歲額、然後用貫頭科敷。惟慮眞下戶受其弊、則請參用高下等第均敷、及減免下戶丁錢以優之、又乞免台州丁錢。至於差役利害、亦嘗條具數千言申省。義役之法、則乞令均出義田、罷去役首、免排役次、官差保正副長輪收義田、仍令上戶兼充戶長。又乞取會福建下四州見行產鹽法、行於本路沿海四州。又乞依處州見行之法、改諸郡酒坊爲萬戶。於救荒之餘、猶悉及他事、以爲經久之計。先生猶以徒費大農數十萬緡、無以全活一道飢民自効。又以前後奏請多見抑卻、幸而從者、又率稽緩後

時、無益於事、蝗旱相仍、不勝憂憤、復奏言、爲今之計、獨有斷自聖心、沛然發號、責躬求言、然後君臣相戒、痛自省改。其次惟有盡出內庫之錢、以供大禮之費、爲收糴之本。詔戶部無得催理舊欠、詔諸路漕臣遵依條限檢放稅租、詔宰臣沙汰被災路分州軍監司、守臣之無狀者、遴選賢能、責以荒政。庶幾猶足以下結人心、消其乘時作亂之意。不然、臣恐所憂者不止於餓殍、而在於盜賊、蒙其害者不止於官吏、而上及於國家也。復上時宰書云、朝廷愛民之心、不如惜費之甚、是以不肯爲極力救民之事。明公憂國之念、不如愛身之切、是以但務爲阿諛順旨之計。然民之與財、孰輕孰重、身之與國、孰大孰小。財散猶可復聚、民心一失、則不可復收。身危猶可復安、國勢一傾、則不可復正。至於民散國危、而措身無所、則其所聚有不爲大盜積者耶。九年、以賑濟有勞、進直徽猷閣、辭。台守唐仲友

與時相王淮同里、爲姻家、遷江西憲、未行。先生行部、訟者紛然、得其姦贓、僞造楮幣等事、劾之。時久旱而雨、奏上、淮匿不以聞、仲友亦自辯、且言弟婦王氏驚悸病篤、論愈力、章至十上。事下紹興府鞠之、獄具情得、乃奪其新命、授先生。先生以爲是蹊田而奪之牛、辭不拜、遂歸。尋令兩易江東、辭及辭職名。且言唐仲友雖寢新命、已具之獄、竟釋不治。則是所按不實、難以復沾恩賞、並不許。受職名、再辭新任、且乞奉祠。言所劾贓吏黨與衆多、並當要路、大者宰制幹旋於上、小者馳騖經營於下、若其加害於臣、不遺餘力、則遠至師友淵源之所自、亦復無故橫肆、舐排。爲臣之計、惟有乞身就閑、或可少紓患害。時從臣有奉時相意、上疏毀程氏之學、以陰詆先生者、故有是言。十年、差主管台州崇道觀。先生守南康、使浙東、始得行其所學、已試之效卓然而卒不果用、退而奉崇道、雲臺、鴻慶之祠者

五年、自是海內學者尊信益衆。十四年、除提點江西刑獄公事、待次、以疾辭、不許。遂拜命。十五年、促奏事、又以疾辭、不許。遂行。又以疾請奉祠者再。淮罷相、遂力疾入奏、首言、近年以來、刑獄不當、輕重失宜、甚至涉於人倫風化之重者、有司議刑、亦從流宥之法、則天理民彝幾何不至於泯滅。又言、州郡獄官乞注有舉主、關陞及任滿銓試第二等以上人、常調關陞及省部胥吏、並不得注擬。若縣獄則專委之令或不得人、則無所不至、亦望令縣丞或主簿同行推訊。又言、提刑司管催經總制錢、起於宣和末年倉卒用兵、權宜措畫、其始亦但計其出納之實數、而隨以取之。及紹興經界、民間投印違限、契約所入、倍於常歲、自後遂以是年爲額、而立爲比較之說。甚至災傷檢放倚閣、錢米已無所入、而經總制錢獨不豁除、州縣之煎熬何日而少紓、斯民之愁歎何時而少息。又言江西諸州科罰





之弊。至其末篇、乃言、陛下即位二十有七年、而因循荏苒、無尺寸之效、可以仰酬聖志。嘗反覆而思之、無乃燕間螻蟻之中、虛明應物之地、天理有未純、人欲有未盡歟。天理未純、是以爲善不能充其量。人欲未盡、是以除惡不能去其根。一念之頃、公私邪正、是非得失之機、朋分角立、交戰於其中。故體貌大臣、非不厚、而便嬖側媚、得以深被腹心之寄。寤寐豪英、非不切、而柔邪庸繆、得以久竊廊廟之權。非不樂聞公議正論、而有時不容、非不聖讒說殄行、而未免誤聽。非不欲報復陵廟讎耻、而未免畏怯苟安。非不欲愛養生靈財力、而未免歎息愁怨。凡若此類、不一而足。願陛下自今以往、一念之頃、則必謹而察之、此爲天理耶。爲人欲耶。果天理也、則敬以充之、而不使其少有壅閼。果人欲也、則敬以克之、而不使其少有凝滯。推而至於言語動作之間、用人處事之際、無不以是裁之、則聖心

洞然、中外融澈、無一毫之私欲、得以介乎其間、而天下之事、將惟陛下之所欲爲、無不如志矣。是行也、有要之於路、以正心誠意爲上所厭聞、戒以勿言者、先生曰、吾平生所學、只有此四字、豈可回互而欺吾君乎。及奏、上未嘗不稱善、曰、久不見卿、浙東之事、朕自知之。今當處卿清要、不復勞卿州縣。除兵部郎、以足疾丐祠、未供職。本部侍郎林栗前數日與先生論易、西銘不合、至是遣部吏抱印迫以供職。先生以疾在告、遂疏先生欺慢。時上意方嚮先生、欲易以他部郎、時相竟請授以前江西之命、仍舊職名、又令吏部給還改官以後、不曾陳乞磨勘。蓋先生改秩既出特恩、其後累任祠官、無績可考、以故不曾陳乞磨勘者十有四年。先生行、且辭曰、論者謂臣事君無禮、爲人臣子有此名、罪當誅戮、豈可復任外臺耳目之寄。章再上、除直寶文閣、主管西京嵩山崇福宮、栗亦罷。辭磨勘及職名、

不許、轉朝奉郎。未踰月、再召。時廟堂知上眷厚、憚先生復入、故爲兩罷之策。上悟、先生復召。受職名、辭召命、以爲遷官進職、皆爲許其閑退、方竊難進、易退之褒、復爲彈冠結綬之計、則其爲世觀笑、不但往來屑屑之譏。又促召。初、先生入奏事、迫於疾作、嘗面奏、以爲口陳之說、有所未盡、乞具封事以聞。至是再辭、遂併具封事投匭以進。其略曰、今天下大勢、如人有重病、內自心腹、外達四支、無一毫一髮不受病者、臣不暇言、且以天下之大本與今日之急務爲陛下言之。蓋大本者、陛下之心。急務則輔翼太子、選任大臣、振舉綱維、變化風俗、愛養民力、修明軍政六者是也。古先聖王兢兢業業、持守此心、雖在紛華波動之中、幽獨得肆之地、而所以精之一之、克之復之、如對神明、如臨淵谷。猶恐隱微之間或有差失、而不自知、是以建師保之官、列諫諍之職。凡飲食酒漿、衣服次舍、器用財賄、與

夫宦官宮妾之政、無一不領於冢宰、使其左右前後、一動一靜、無不制以有司之法、而無纖芥之隙、瞬息之頃、得以隱其毫髮之私。陛下之所以精一克復而持守其心、果有如此之功乎。所以脩身齊家而正其左右、果有如此之效乎。官省事禁、臣固不得而知。然爵賞之濫、貨賂之流、閭巷竊言、蓋久已不勝其籍籍。則陛下所以脩之家者、恐其未有以及古之聖王也。至於左右便嬖之私、恩遇過當、往者淵、觀說、抃之徒、勢焰熏灼、傾動一時、今已無可言矣。獨有前日臣所面陳者、雖蒙聖慈、委曲開譬、然臣之愚、竊以爲此輩但當使之守門傳命、供掃除之役、不當假借崇長、使得逞邪媚、作淫巧於內、以蕩上心、立門庭、招權勢於外、以累聖政。臣竊聞之道路、自王抃旣逐之後、諸將差除、多出此人之手。陛下竭生靈膏血以奉軍旅、而軍士顧乃未嘗得一溫飽、是皆將帥巧爲名色、奪取其糧、肆行



貨賂於近習、以圖進用、出入禁闥腹心之臣、外交將帥、共爲欺蔽、以至於此。而陛下不悟、反寵暱之、以是爲我之私人、至使宰相不得議其制置之得失、給諫不得論其除授之是非。則陛下所以正其左右者、未能及古之聖王又明矣。至於輔翼太子、則自王十朋、陳良翰之後、宮寮之選號爲得人、而能稱其職者、蓋已鮮矣。而又時使邪佞薄闕冗、妄庸之輩、或得參錯於其間、所謂講讀亦姑以應文備數、而未聞其有箴規之效。至於從容朝夕陪侍遊燕者、又不過使臣宦者數輩而已。唐之六典、東宮之官、師傅、賓客既職輔導、而詹事府、兩春坊實擬天子之三省、故以詹事、庶子領之。今則師傅、賓客既不復置、而詹事、庶子有名無實、其左右春坊遂直以使臣掌之、何其輕且褻之甚耶。夫立太子而不置師傅、賓客、則無以發其隆師親友、尊德樂義之心。獨使春坊使臣得侍左右、則無以防其

戲慢嫖狎、奇邪雜進之害。宜討論前典、置師傅、賓客之官、罷去春坊使臣、而使詹事、庶子各復其職。至於選任大臣、則以陛下之聰明、豈不知天下之事、必得剛明公正之人而後可任哉。其所以常不得如此之人、而反容鄙夫之竊位者、直以一念之間、未能撤其私邪之蔽、而燕私之好、便嬖之流、不能盡由於法度。若用剛明公正之人、以爲輔相、則恐其有以妨吾之事、害吾之人、而不得肆、是以選掄之際、常先排擯此等、實之度外、而後取凡疲懦軟熟、平日不敢直言正色之人、而揣摩之、又於其中、得其至庸極陋、決可保其不至於有所妨者、然後舉而加之於位。是以除書未出、而物色先定、姓名未顯、而中外已逆知、其決非天下之第一流矣。至於振肅紀綱、變化風俗、則今日宮省之間、禁密之地、而天下不公之道、不正之人、顧乃得以窟穴盤據於其間、而陛下目見耳聞、無非不公不正之

事則其所以熏蒸銷鑠使陛下好善之心不著疾惡之意不深其害已有不可勝言者矣。及其作姦犯法則陛下又未能深割私愛而付諸外廷之議論以有司之法是以紀綱不能無所撓敗。紀綱不正於上是以風俗頹弊於下。蓋其爲患之日久矣而浙中爲尤甚。大率習爲軟美之態依阿之言以不分是非不辨曲直爲得計。下之事上固不敢少忤其意上之御下亦不敢稍拂其情惟其私意之所在則千塗萬轍經營計較必得而後已。甚者以金珠爲脯醢以契券爲詩文宰相可啗則啗宰相近習可通則通近習惟得之求無復廉恥。一有剛毅正直守道循理之士出乎其間則群譏衆排指爲道學而加以矯激之罪。十數年來以此二字禁錮天下之賢人君子復如崇宣之間所謂元祐學術者排擯詆辱必使無所容其身而後已。嗚呼此豈治世之事而尙復忍言之哉。至於愛養民力修

明軍政則自虞允文之爲相也盡取版曹歲入窠名之必可指擬者號爲歲終羨餘之數而輸之內帑。顧以其有名無實積累掛欠空載簿籍不可催理者撥還版曹以爲內帑之積將以備他日用兵進取不時之須。然自是以來二十餘年內帑歲入不知幾何而認爲私貯典以私人宰相不得以式貢均節其出入版曹不得以簿書勾考其有亡其日銷月耗以奉燕私之費者蓋不知其幾何矣。而曷嘗聞其能用此錢以易胡人之首如太祖皇帝之言哉。徒使版曹經費闕乏日甚督趣日峻以至廢去祖宗以來破分良法而必以十分登足爲限以爲未足則又造爲比較監司郡守殿最之法以誘脅之。於是中外承風競爲苛急此民力之所以重困也。諸將之求進也必先培克士卒以殖私財然後以此自結於陛下之私人而祈以姓名達於陛下之貴將。貴將得其姓名即以付之軍中使自



什伍以上、節次保明、稱其材武、堪任將帥、然後具奏爲牘、而言之陛下之前。陛下但見等級推先、案牘具備、則誠以爲公薦而可以得人矣、而豈知其諧價輸錢、已若晚唐之債帥哉。夫將者三軍之司命、而其選置之方乖刺如此、則其智勇材略之人孰肯抑心下首於宦官宮妾之門。而陛下之所得以爲將帥者皆庸夫走卒、而猶望其修明軍政、激勸士卒、以強國勢、豈不誤哉。凡此六事皆不可緩、而本在於陛下之一心。一心正、則六事無不正。一有人心私欲以介乎其間、則雖欲憊精勞力、以求正夫六事者、亦將徒爲文具、而天下之事愈至於不可爲矣。疏入、夜漏下七刻、上已就寢、亟起、秉燭讀之終篇。明日、除主管太乙宮兼崇政殿說書。時上已有倦勤之意、蓋將以爲燕翼之謀。先生嘗草奏疏、言講學以正心脩身以齊家、遠便嬖以近忠直、抑私恩以抗公道、明義理以絕神姦、擇師傅以

輔皇儲、精選任以明體統、振紀綱以厲風俗、節財用以固邦本、修政事以攘夷狄、凡十事、欲以爲新政之助。會執政有指道學爲邪氣者、力辭新命、除秘閣修撰、仍奉外祠、遂不果上。先生當孝宗朝、陞對者三、上封事者三。其初固以講學窮理爲出治之大原、其後則直指天理人欲之分、精一克復之義。其初固以當世急務一二爲言、其後封事之上、則心術、宮禁、時政、風俗、披肝瀝膽、極其忠鯁。蓋所望於君父愈深、而其言愈切。故於封事之末有曰、日月逾邁、如川之流、一往而不復。不惟臣之蒼顏白髮已迫遲暮、而竊仰天顏亦覺非昔時矣。忠誠懇惻、至今讀者猶爲之涕下。先生進疏雖切、孝宗亦開懷容納、武博、編摩、秘省、郎曹之除、蓋將引以自近。守南康、持浙東、江西之節、又知其不可強留而授之。至是復有經帷之命。先生之盡忠、孝宗之受盡言、亦未爲不遇也。然先生進言、皆痛詆大臣

近習、孝宗之眷愈厚、而嫉者愈深、是以不能一日安其身於朝廷之上、而孝宗內禪矣。光宗即位、再辭職名、仍舊直寶文閣、降詔獎諭、除江東轉運副使、以疾辭者再。覃恩轉朝散郎、賜緋衣銀魚、改知漳州、又再以疾辭、不許。時光宗初政、再被除命、遂以紹熙元年之任。奏除屬縣無名之賦七百萬、減經總制錢四百萬。加意學校、教誘諸生、如南康時。又以習俗未知禮、採古喪葬嫁娶之儀、揭以示之。命父老解說、以教子弟。釋氏之教、南方爲盛、男女聚僧廬爲傳經會、女不嫁者私爲菴舍以居、悉禁之、俗大變。郡有故迪功郎高登忤秦檜貶死、爲奏請昭雪、褒其直。會朝論欲行泉漳汀三州經界、先生初仕同安、已知經界不行之害、至是訪事宜、擇人物、以至方量之法、洞見本末。遂疏其事上之、且言必可行之說三、將必至於不能行之說一、蓋謂經界法行、息爭止訟、大爲民利、而占田隱稅、侵漁貧弱者所不便。及具宣德意、榜之通衢、則邦民鼓舞、而寓公豪右果爲異議以沮之。遂因地震及足疾不赴錫宴自劾。其冬有旨先行漳州經界。南方春早、事已無及。明年屬有嗣子之喪、再請奉祠、除秘閣修撰、主管南京鴻慶宮。先生以當上初政、嘗辭前件職名、已降褒詔從其請、難以復受。辭者再。詔論撰之職以寵名儒、乃拜命。除荆湖南路轉運副使、再辭。漳州經界竟報罷、遂以前言經界可行自劾。三年再以疾辭、乞補滿宮觀從之。又數月、差知靜江府、廣南西路經略安撫。辭。四年又辭主管南京鴻慶宮。未幾、差知潭州、荆湖南路安撫、以辭遠就近、不爲無嫌、力辭。五年再辭。有旨、長沙巨屏得賢爲重。會洞獠擾屬郡、遂拜命赴鎮。至、則遣人諭以禍福、皆降之。申教令、嚴武備、戢姦吏、抑豪民。先生所至、必興學校、明教化。湖湘士子素知學、日伺公退、則請質所疑。先生爲之講說不倦、四方之





學者畢至。又以南康、漳州所申改正釋奠儀式爲請、錄故死節五人爲之立廟。孝宗升遐、先生哀慟、不能自勝。又聞上以疾不能執喪、中外洶洶、益憂懼、遂申省乞歸田里。言、天下國家所以長久安寧、惟賴朝廷三綱五常之教、建立修明於上、然後守藩述職之臣有以稟承宣布於下、所以內外相維、小大順序、雖有彊猾姦宄、無所逞志。不然、以一介書生、置諸數千里軍民之上、亦何所憑恃而能服其衆哉。又草封事、極言父子天性、不應以小嫌廢彝倫、言頗切直。會今上即位、不果上。上在潛邸、聞先生名、每恨不得先生爲本宮講官、至是首召奏事。先生行、且辭、除煥章閣待制、侍講、辭不許、又再辭、且言、陛下嗣位之初、方將一新庶政、所宜愛惜名器。若使倖門一開、其弊豈可復塞。至於博延儒臣、專意講學、蓋將求所以深得親權者爲建極導民之本、思所以大振朝綱者爲防微慮遠之圖。顧

問之臣、實資輔養、用人或繆、所繫非輕。蓋先生在道、聞南內朝禮尙闕、近習已有用事者、故預有是言。又不許、遂奏乞且依元降旨、揮帶元官職奏事者再。及入對、首言、乃者天運艱難、國有大咎、所謂天下之大變、而不可以常理處者。太皇太后躬定大策、陛下寅紹丕圖、可謂處之以權、而庶幾不失其正矣。然自頃至今、亦旣三月、或反不能無疑於逆順名實之際、禍亂之本、又已伏於冥冥之中、竊爲陛下憂之。尙猶有可諉者、亦曰、陛下之心、前日未嘗有求位之計、今日未嘗忘思親之懷。此則道心微妙之全體、天理發用之本然、所以行權而不失其正之根本也。誠即是心而充之、所謂求仁得仁而無怨、終身訢然、樂而忘天下者、臣有以知陛下之不難矣。借曰天命神器不可無傳、宗廟社稷不可無奉、則轉禍爲福、易危爲安、亦豈可舍此而他求哉。充吾未嘗求位之心、則可以盡吾負罪引

慝之誠。充吾未嘗忘親之心。則可以致吾溫清定省之禮。始終不越乎此。而大倫正。大本立矣。次言爲學莫先於窮理。窮理必在於讀書。讀書之法莫貴於循序而致精。致精之本則又在於居敬而持志。又三劄言湖南歲計入少出多。不可支吾。乞裁減差到諸班。換授歸正雜色補官員數。邵州邊防全無措畫。以致徭人侵犯。乞移置寨柵。增撥戍兵。潭州城壁。乞行計度修築。既對。面辭待制。侍講。不許。翌日。又辭待制職名。乞改作說書差遣。以爲未得進說。而先受厚恩。萬一異時未效涓埃。而疾病不支。遂竊侍從職名而去。則臣死有餘罪。上手札。卿經術淵源。正資勸講。次對之職。勿復牢辭。以副朕崇儒重道之意。遂拜命。會趙彥逾按視孝宗山陵。以爲土肉淺薄。掘深五尺。下有水石。旋改新穴。比舊僅高尺餘。孫逢吉覆按。亦乞少寬月日。別求吉兆。有旨集議。臺史憚之。議遂中寢。先生竟上議

狀言。壽皇聖德神功。宜得吉土。以奉衣冠之藏。當廣求術士。博訪名山。不宜偏信臺史罔上誤國之言。固執紹興坐南向北之說。委之水泉沙礫之中。殘破浮淺之地。不報。覃恩轉朝請郎。賜紫章服。兼實錄院同修撰。再辭。不許。拜命。受詔進講大學。先生以平日論著敷陳開析。務積誠意。以感上心。遂奏乞除朔望旬休及過宮日分。不以寒暑雙隻月日諸假故。並令蚤晚進講。又乞置局看詳四方封事。瑞慶節免稱賀。皆從之。復因有旨修葺舊東宮。爲屋三數百間。遂具四事奏言。當上帝震怒。災異數出。畿甸百姓飢餓流離。太上皇帝未獲進見。壽皇因山未卜。太皇太后。皇太后皆以尊老之年。勞然憂苦。不宜大興土木。以就安便。壽康定省之禮。所宜下詔自責。頻日繼往。顧乃逶迤舒緩。無異尋常。太上皇帝必以爲此特備禮而來。其深閉固拒。而不得見亦宜矣。朝廷紀綱尤所當嚴。上自人主。



下至百執、各有職業、不可相侵。今進退宰執、移易臺諫、皆出陛下之獨斷、大臣不與謀、給舍不及議。正使其事悉當於理、亦非爲治之體、況中外傳聞、皆謂左右或竊其柄、而其所行又未能盡允於公議乎。此弊不革、臣恐名爲獨斷、而主威不免於下移、欲以求治、而返不免於致亂。未復申言、敢宮之卜、不宜偏聽臺史膠固繆妄之言、墮其交結眩惑之計。皆不報。先生進講每及數次、復以前所講者編次成帙以進。上亦開懷容納、且面諭以求放心之說甚善、所進冊子、宮中常讀之、今後更爲點來。先生知上有意於學、遂以劄子勉上進德。其略言、願陛下日用之間、語默動靜、必求放心、以爲之本。而於玩經觀史、親近儒學、已用力處、益用力焉。數召大臣切劘治道、俾陳今日要務、略如仁祖開天章閣故事。至於羣臣進對、亦賜溫顏、反覆詢訪、以求政事之得失、民情之休戚、而又因以察其人才

之邪正短長、庶於天下之事各得其理。又奏、禮經勅令、子爲父、嫡孫承重爲祖父、皆斬衰三年。嫡子當爲父後、不能襲位執喪、則嫡孫繼統而代之執喪。自漢文短喪、歷代因之、天子遂無三年之喪。爲父且然、則嫡孫承重可知。人紀廢壞、三綱不明、千有餘年、莫能釐正。壽皇聖帝至性自天、孝誠內發、易月之外、猶執通喪、朝衣朝冠皆以大布、所宜著在方冊、爲萬世法程。間者遺誥初頒、太上皇帝偶違康豫、不能躬就喪次、陛下以世嫡承大統、則承重之服著在禮律、所宜遵壽皇已行之法。一時倉卒、不及詳議、遂用漆紗淺黃之服、不惟上違禮律、且使壽皇已行之禮舉而復墜、臣竊痛之。然既往之失不及追改、惟有將來啓殯發引、禮當復用初喪之服、則其變除之節尙有可議。欲望明詔禮官稽考禮律、預行指定。會孝宗祔廟、議宗廟迭毀之次、有請併祧僖宣二祖、奉太祖居第一室、祫祭則

正東向之位者。有旨集議。僖順翼宣四祖祧主宜有所歸。自太祖皇帝首尊四祖之廟。以僖祖爲四廟之首。治平間。議者以世數浸遠。請遷僖祖於夾室。未及數年。王安石等奏。僖祖有廟。與稷契無異。請復其舊。詔從之。時相雅不以熙寧復祀僖祖爲是。先生度難以口舌爭。遂移疾上議狀。條其不可者四。以爲藏之夾室。則是以祖宗之主下藏於子孫之夾室。至於祫祭。設幄於夾室之前。則亦不得謂之祫。欲別立一廟。則喪事即遠。有毀無立。欲藏之天興殿。則宗廟原廟不可相雜。議者皆知其不安。特以其心急於尊奉太祖三年一祫時暫東向之故。不知其實無益於太祖之尊。而徒使僖祖太祖兩廟威靈相與爭校。彊弱於冥冥之中。并使四祖之神疑於受擯。徬徨躑躅。不知所歸。令人傷痛。不能自己。今但以太祖當日追尊帝號之心而默推之。則知太祖今日在天之靈於此必有所不忍。

又況僖祖祧主遷於治平。不過數年。神宗皇帝復奉以爲始祖。已爲得禮之正。而合於人心。所謂有其舉之。而莫敢廢者乎。又擬爲廟制。以辯議者一旦併遷僖宣二祖。析太祖太宗爲二之失。復引元祐大儒程頤之說。以爲物豈有無本而生者。今日天下基本蓋出僖祖。安得爲無功業。議狀旣上。廟堂持之不以聞。即毀撤僖宣廟室。更創別廟以奉四祖。宰相旣有所偏主。樓鑰陳傅良又復牽合裝綴以附其說。先生所議頗達上聽。忽有旨召赴內殿奏事。因節略狀文。及爲劄子。畫圖以進。上然之。且曰。僖祖國家始祖。高宗孝宗太上皇帝不曾遷。今日豈敢輕議。欲令先生於榻前撰數語。以御批直罷其事。先生方懲內批之弊。因言乞降出劄子。再令臣寮集議。旣退。復以上意諭廟堂。而事竟不行。經生學士知禮者皆是先生。一時異議之徒忌其軋己。權姦遂從而乘之。上之立也。丞相趙汝愚



密與知閣門事韓侂冑謀之。侂冑於太皇太后爲親屬，因得通中外之言。侂冑自謂有定策功，居中用事。先生自長沙辭免待制、侍講，已微寓其意。及進對，復嘗再三面言，又約吏部侍郎彭龜年共攻之。龜年出護使客，侂冑益得志。先生又於所奏四事疏中，斥言左右竊柄之失，後因講筵留身，復申言前疏，乞賜施行。既退，即降御批云：「憫卿耆艾，方此隆冬，恐難立講，已除卿宮觀。」宰相執奏不行，明日徑以御批付下。臺諫給舍亦爭留，不可。除寶文閣待制，與州郡差遣力辭。尋除知江陵府，又力辭，仍乞追還新舊職名。詔依舊煥章閣待制，提舉南京鴻慶宮。慶元元年，又乞追還舊職，不許。趙丞相亦罷，誣以不軌，謫永州。丞相既當大任，收召四方知名之士，中外引領以觀新政。先生獨惕然，以侂冑用事爲慮。既屢爲上言，又數以手書遣生徒密白丞相，當以厚賞酬其勞，勿使得預朝政，且有分

界限，立紀綱，防微杜漸，謹不可忽之意。丞相方謂其易制，所倚以爲腹心謀事之人，又皆持祿苟安，無復遠慮。丞相既逐，而朝廷大權悉歸侂冑。先生自念身雖閑退，尙帶侍從職名，不敢自嘿，遂草書萬言，極言姦邪蔽主之禍，因以明其冤。詞旨痛切，諸生更諫，以筮決之，遇遯之同人。先生默然退，取諫藁焚之，自號遯翁。以廟議不合，乞收還職名，又以疾乞休致，不許。先是吏部取會磨勘，至是轉朝奉大夫，又辭職名，乞休致。又以嘗妄議山陵自劾，又言已罷講官，不敢復帶侍從職名。詔依舊秘閣修撰。二年，又言：「昨來疏封錫服，封贈蔭補磨勘轉官，皆爲已受從官恩數，乞改正。」沈繼祖爲監察御史，上章誣詆，落職罷祠。四年十二月，以來歲年及七十，申乞致仕。五年，依所請。六年三月甲子，終于正寢。十一月壬申，葬建陽縣唐石里之大林谷。嘉定二年，除華文閣待制，與致仕恩澤。傅伯壽故家。

子嘗執弟子禮、恨不薦己、先生辭次對、除修撰也、伯壽行詞有慢僞等語、及先生沒、伯壽守建寧、又不以聞、故復職之命猶生存也、自先生去國、侂冑勢益張、鄙夫儉人迎合其意、以學爲僞、謂貪黷放肆乃人眞情、潔廉好禮者皆僞也、科舉取士稍涉經訓者悉見排黜、文章議論根於理義者並行除毀、六經語孟悉爲世之大禁、猾胥賤隸頑鈍無耻之徒往往引用以至卿相、繩趨尺步稍以儒名者無所容其身、從遊之士特立不顧者屏伏丘壑、依阿巽懦者更名他師、過門不入、甚至變易衣冠、狎遊市肆以自別其非黨、先生日與諸生講學竹林精舍、有勸以謝遣生徒者、笑而不答、先生旣沒、善類悉已排擯、羣小之勢已成、侂冑志氣驕溢、遂至擅開邊釁、幾危宗社、而生靈塗炭矣、開禧三年、侂冑伏誅、凶徒儉黨根株斥戮、嘉定元年、詔賜諡與遺表恩澤、明年、賜諡曰文、又明年、贈中大夫、特贈

寶謨閣直學士、後以明堂恩累贈通議大夫、先生平居惓惓、無一念不在於國、聞時政之闕失、則戚然有不豫之色、語及國勢之未振、則感慨以至泣下、然謹難進之禮、則一官之拜必抗章而力辭、厲易退之節、則一語不合必奉身而亟去、其事君也不貶道以求售、其愛民也不徇俗以苟安、故其與世動輒齟齬、自筮仕以至屬纊、五十年間、歷事四朝、仕於外者僅九考、立於朝者四十日、道之難行也如此、然紹道統、立人極、爲萬世宗師、則不以用舍爲加損也、自韋齋先生得中原文獻之傳、聞河洛之學、推明聖賢遺意、日誦大學、中庸、以用力於致知誠意之地、先生蚤歲已知其說而心好之、韋齋病且亟、屬曰、籍溪胡原仲、白水劉致中、屏山劉彥冲三人、吾友也、學有淵源、吾所敬畏、吾即死、汝往事之、而惟其言之聽、則吾死不恨矣、先生旣孤、則奉以告三君子而稟學焉、時年十有四、慨然有





求道之志、博求之經傳、徧交當世有識之士、雖釋老之學亦必究其歸趣、訂其是非。延平李先生學於豫章羅先生、羅先生學於龜山楊先生、延平於韋齋爲同門友。先生歸自同安、不遠數百里徒步往從之。延平稱之曰、樂善好義、鮮與倫比。又曰、穎悟絕人、力行可畏。其所論難、體認切至。自是從遊累年、精思實體、而學之所造者益深矣。其爲學也、窮理以致其知、反躬以踐其實、居敬者所以成始成終也。謂致知不以敬、則昏惑紛擾、無以察義理之歸。躬行不以敬、則怠惰放肆、無以致義理之實。持敬之方、莫先主一、旣爲之箴、以自警、又筆之書、以爲小學、大學皆本於此。終日儼然、端坐一室、討論典訓、未嘗少輟。自吾一心一身、以至萬事萬物、莫不有理。存此心於齊莊靜一之中、窮此理於學問思辨之際、皆有以見其所當然而不容已、與其所以然而不可易。然充其知而見於行者、未嘗不

反之於身也。不睹不聞之前、所以戒懼者愈嚴、愈敬。隱微幽獨之際、所以省察者愈精、愈密。思慮未萌而知覺不昧、事物旣接而品節不差。無所容乎人欲之私、而有以全乎天理之正。不安於偏見、不急於小成、而道之正統在是矣。其爲道也、有太極而陰陽分、有陰陽而五行具、稟陰陽五行之氣以生、則太極之理各具於其中。天所賦爲命、人所受爲性、感於物爲情、統性情爲心。根於性則爲仁義禮智之德、發於情則爲惻隱羞惡辭遜是非之端。形於身則爲手足耳目口鼻之用、見於事則爲君臣父子夫婦兄弟朋友之常。求諸人、則人之理不異於己。參諸物、則物之理不異於人。貫徹古今、充塞宇宙、無一息之間斷、無一毫之空闕。莫不析之極其精而不亂、然後合之、盡其大而無餘。先生之於道、可謂建諸天地而不悖、質諸聖賢而無疑矣。故其得於己而爲德也、以一心而窮造化之原、盡

性情之妙、達聖賢之蘊。以一身而體天地之運、備事物之理、任綱常之責。明足以察其微、剛足以任其重、弘足以致其廣、毅足以極其常。其存之也虛而靜、其發之也果而確。其用之也應事接物而不窮、其守之也歷變履險而不易。本末精粗不見其或遺、表裏初終不見其或異。至其養深積厚、矜持者純熟、嚴厲者和平、心不待操而存、義不待索而精。猶以爲義理無窮、歲月有限、常慊然有不足之意。蓋有日新又新、不能自己者、而非後學之所可擬議也。其可見之行、則脩諸身者、其色莊、其言厲、其行舒而恭、其坐端而直。其閒居也、未明而起、深衣幅巾<sup>⑧</sup>。方履拜於家廟、以及先聖。退坐書室、几案必正、書籍器用必整。其飲食也、羹食行列有定位、匕箸舉措有定所。倦而休也、瞑目端坐。休而起也、整步徐行。中夜而寢、既寢而寤、則擁衾而坐、或至達旦。威儀容止之則、自少至老、祁寒盛暑、造次顛

沛、未嘗有須臾之離也。行於家者、奉親極其孝、撫下極其慈、閨庭之間、內外斬斬、恩義之篤、怡怡如也。其祭祀也、事無纖鉅、必誠必敬、小不如儀、則終日不樂。已祭無違禮、則油然而喜。死喪之威、哀戚備至、飲食衰絰、各稱其情。賓客往來、無不延遇、稱家有無、常盡其歡。於親故、雖疏遠必致其愛。於鄉閭、雖微賤必致其恭。吉凶慶弔、禮無所遺、賙卹問遺、恩無所闕。其自奉、則衣取蔽體、食取充腹、居止取足以障風雨、人不能堪、而處之裕如也。若其措諸事業、則州縣之施設、立朝之言論、經綸規畫、正大宏偉、亦可槩見。雖達而行道、不能施之一時、然退而明道、足以傳之萬代。謂聖賢道統之傳散在方冊、聖經之旨不明、則道統之傳始晦。於是竭其精力、以研窮聖賢之經訓。於大學、中庸則補其闕遺、別其次第、綱領條目、粲然復明。於論語、孟子、則深原當時答問之意、使讀而味之者、如親見聖賢



而面命之。於易與詩、則求其本義、攻其末失、深得古人遺意於數千載之上。凡數經者見之傳注、其關於天命之微、人心之奧、入德之門、造道之闕者、既已極深研幾、探賾索隱、發其旨趣而無遺矣。至於一字未安、一詞未備、亦必沉潛反覆、或達旦不寐、或累日不倦、必求至當而後已。故章旨字義、至微至細、莫不理明詞順、易知易行。於書則疑今文之艱澀、反不若古文之平易。於春秋則疑聖心之正大、決不類傳注之穿鑿。於禮則病王安石廢罷儀禮、而傳記獨存、於樂則憫後世律尺既亡、而清濁無據。是數經者、亦嘗討論本末、雖未能著爲成書、然其大旨固已獨得之矣。若歷代史記、則又考論西周以來、至于五代、取司馬公編年之書、繩以春秋紀事之法、綱舉而不繁、目張而不紊、國家之理亂、君臣之得失、如指諸掌。周程張邵之書、所以繼孔孟道統之傳、歷時未久、微言大義鬱而不章、

爲之哀集發明、而後得以盛行於世。太極先天二圖精微廣博、不可涯涘、爲之解剝條畫、而後天地本原、聖賢蘊奧、不至於混沒。程張門人祖述其學、所得有淺深、所見有疏密、先生既爲之區別、以悉取其所長、至或識見小偏、流於異端者、亦必研窮剖析、而不沒其所短。南軒張公、東萊呂公同出其時、先生以其志同道合、樂與之友、至或識見少異、亦必講磨辨難、以一其歸。至若求道而過者、病傳注誦習之煩、以爲不立文字、可以識心見性、不假修爲、可以造道入德、守虛靈之識而昧天理之眞、借儒者之言以文老佛之說、學者利其簡便、詆訾聖賢、捐棄經典、猖狂叫呶、側僻固陋、自以爲悟。立論愈下者、則又崇獎漢唐、比附三代、以便其計功、謀利之私。二說並立、高者陷於空無、下者溺於卑陋、其害豈淺淺哉。先生力排之、俾不至亂吾道以惑天下、於是學者靡然向之。先生教人、以大學、語、

孟中庸爲入道之序、而後及諸經。以爲不先乎大學、則無以提綱挈領、而盡論孟之精。微不參之以論孟、則無以融會貫通、而極中庸之旨。趣然不<sup>③</sup>會其極於中庸、則<sup>④</sup>又何以建立大本、經綸大經、而讀天下之書、論天下之事哉。其於讀書也、又必使之辨其音釋、正其章句、玩其辭、求其義、研精覃思、以究其所難知、平心易氣、以聽其所自得。然爲己務實、辨別義利、毋自欺、慎其獨之戒、未嘗不三致意焉。蓋亦欲學者窮理反身而持之以敬也。從游之士迭誦所習、以質其疑、意有未諭、則委曲告之、而未嘗倦。問有未切、則反覆戒之、而未嘗隱。務學篤則喜見於言、進道難則憂形于色。講論經典、商略古今、率至夜半。雖疾病支離、至諸生問辨、則脫然沉痾之去體。一日不講學、則惕然常以爲憂。摳衣而來、遠自川蜀、文詞之傳流及海外、至於夷虜、亦知慕其道、竊問其起居。窮鄉晚出、家蓄其書、私

淑諸人者不可勝數。先生既沒、學者傳其書、信其道者益衆、亦足以見理義之感於人者深也。繼往聖將微之緒、啓前賢未發之機、辨諸儒之得失、闢異端之訛繆、明天理、正人心、事業之大、又孰有加於此者。至若天文地志、律曆兵機、亦皆洞究淵微、文詞字畫、騷人才士、疲精竭神、常病其難。至先生未嘗<sup>⑤</sup>用意、而亦皆動中規繩、可爲世法。是非姿稟之異、學行之篤、安能事事物物各當其理、各造其極哉。學脩而道立、德成而行尊、見之事業者又如此。秦漢以來、迂儒曲學、既皆不足以望其藩牆、而近代諸儒、有志乎孔、孟、周、程之學者、亦豈能以造其闕域哉。嗚呼、是殆天所以相斯文、篤生哲人、以大斯道之傳也。先生疾且革、手爲書囑其子在與門人范念德、黃榦、尤拳拳以勉學及修正遺書爲言。翌旦、門人侍疾者請教、先生曰、堅苦。問溫公喪禮、曰、疏略。問儀禮、領之。已而正坐、整冠衣、就枕而

逝。門人治喪者既一以儀禮從事而訃告所至、從遊之士與夫聞風慕義者莫不相與爲位而聚哭焉、禁錮雖嚴、有所不避也。嗚呼、天又胡不憖遺、以永斯道之傳、而遽使後學失所依歸哉。先生所著書有易本義、啓蒙、著卦考誤、詩集傳、大學、中庸章句、或問、論語、孟子集注、太極圖、通書、西銘解、楚詞集注、辨證、韓文考異、所編次有語孟集義、孟子指要、中庸集略、孝經刊誤、小學書、通鑑綱目、本朝名臣言行錄、古今家祭禮、近思錄、河南程氏遺書、伊洛淵源錄、皆行於世。先生著述雖多、於語、孟、中庸、大學尤所加意、若大學、論語則更定數四、以至垂沒、大學誠意一章乃其絕筆也。其明道垂教、拳拳深切如此。楚詞集注亦晚年所作、其愛君憂國、雖老不忘。通鑑綱目僅能成編、每以未及修補爲恨。又嘗編次禮書、用工尤苦、竟亦未能脫藁。所輯家禮世多用之、然其後亦多損益、未暇更定。平生爲

文、則季子在類次之矣。生徒問答則後學李道傳嘗裒輯鈔版、未備也。娶劉氏、追封碩人、白水草堂先生之女、草堂即韋齋所屬、以從學者也。其卒也以淳熙丙申、其葬以祔。穴。子三人、長塾、先十年卒。次埜、迪功郎、監湖州德清縣戶部新市犒賞酒庫、後十年亦卒。季在、承議郎、提舉兩浙西路常平茶鹽公事。女五人、婿儒林郎、靜江府臨桂縣令劉學古、奉議郎、主管亳州明道宮黃榦、進士范元裕、仲季二人亦早卒。孫男七人、鉅、銓、鑑、鐸、鉉、鉉、鉅、從政郎、新差監行在雜買務雜賣場門。銓、從事郎、融州司法參軍。鑑、迪功郎、新辟差充廣西經略安撫司準備差遣。餘業進士。女九人、婿承議郎、主管華州雲臺觀趙師夏、進士葉韜甫、周巽亨、鄭宗亮、黃輅、從政郎、紹興府會稽縣丞趙師若、黃慶臣、李公玉。曾孫男六人、淵、洽、潛、濟、濬、澄。女七人。先生沒有年矣、狀其行者未有所屬筆、在以榦從學日久、俾



任其責。先生既不假是而著，榦之識見淺陋，言語卑弱，又不足模倣萬一，追思平日步趨警效，則悲愴哽咽，不忍書，亦不忍忘也。竊聞道之正統待人而後傳，自周以來，任傳道之責，得統之正者不過數人，而能使斯道章章較著者，一二人而止耳。由孔子而後，周、程、張子繼其絕，至先生而始著。蓋千有餘年之間，孔孟之徒所以推明是道者，既已煨燼殘闕，離析穿鑿，而微言幾絕矣。周、程、張子崛起於斯文湮塞之餘，人心蠹壞之後，扶持植立，厥功偉然，未及百年，踳駁尤甚。先生出而自周以來聖賢相傳之道，一旦豁然如大明中天，昭晰呈露，則摭其言行，又可略歟。輒採同志之議，敬述世系爵里，出處言論，與夫學問道德行業人之所共知者，而又私竊以道統之著者終之，以俟知德者考焉。謹狀。嘉定十四年正月日，門人奉議郎、主管亳州明道宮黃榦狀。

行狀之作，非得已也。懼先生之道不明，而後世傳者之訛也。追思平日之聞見，參以敘述奠誄之文，定爲草藁，以諗同志，反覆詰難，一言之善，不敢不從，然亦有參之鄙意，而不敢盡從者，不可以無辨也。有謂言貴含蓄，不可太露，文貴簡古，不可太繁者。夫工於爲文者，固能使之隱而顯，簡而明，是非愚陋所能及也。顧恐名曰含蓄，而未免於晦昧，名曰簡古，而未免於艱澀，反不若詳書其事之爲明白也。又有謂年月不必盡記，辭受不必盡書者。先生之用舍去就，實關世道之隆替，後學之楷式，年月必記，所以著世變。辭受必書，所以明世教。狀先生之行，又豈可以常人比，常體論哉。又有謂告上之語失之太直，記人之過失之太訐者。責難陳善，事君之大義，人主能容於前，而臣子反欲隱於後，先生敢陳於當世，而學者反欲諱於將來乎。人之有過，或具之獄案，或見之章奏，天下後世所共知，



而欲沒之可乎。又有謂奏疏之文紀述太繁申請之事細微必錄似非行狀之體者。古人得君行道有事實可紀則奏疏可以不述。先生進不得用於世其所可見者特其言論之間乃其規模之素則言與行豈有異耶。事雖微細處得其道則人受其利一失其道則人受其害。先生理明義精故雖細故區處條畫無不當於人心者則鉅與細亦豈有異耶。其可辨者如此則其尤淺陋者不必辨也。至於流俗之論則又以爲前輩不必深抑異學不必力排稱述之辭似失之過者。孔門諸賢至謂孔子賢於堯舜豈以抑堯舜爲嫌乎。孟子闢楊墨而比之禽獸衛道豈可以不嚴乎。夫子嘗曰莫我知也夫又曰知德者鮮矣甚矣聖賢之難知也。知不知不足爲先生損益然使聖賢之道不明異端之說滋熾是則愚之所懼而不容於不辨也。故嘗太息而爲之言曰是未易以口舌爭百年論定然後知

愚言之爲可信。遂書其語以俟後之君子。榦謹書。

黃榦撰 《勉齋先生黃文肅公文集》卷三四



藏儒

校記

①志聖賢：原空，據四庫本、清抄本《勉齋集》補。

②「中紹」二字原空，「興」原作「典」，據清抄本補、改。

四庫本「中」作「登」。

③「安簿」二字原空，據四庫本、清抄本《勉齋集》補。

④自：原作「目」，據右引改。

⑤抑：原作「仰」，據右引改。

⑥鮮：原作「解」，據右引改。

⑦家：原空，據右引補。

⑧巾：原作「衣」，據右引改。

⑨威：右引作「禮」。

⑩計功：原作「討切」，據右引改。

⑪精：原作「道」，據右引改。

⑫中庸之旨：原空，據右引補。

⑬不：原作「有」，據右引改。

⑭則：原闕，據右引補。

⑮嘗：原作「管」，據右引改。

⑯耐：原作「術」，據右引改。

⑰濟濬：原闕，據右引補。

宋儒碑傳集卷一百三十五

鄭伯英 胡序 李開 黃牧之 宋若水

董爲良 林湜 魏天祐 陸九齡 林

碩

鄭景元墓誌銘

景元、鄭氏、名伯英、永嘉人。隆興癸未進士甲科。滿秀州判官、調杭州、泉州推官、母老、不忍行、食嶽廟祿九年。終母喪、授寧德縣丞、福建提刑司幹官、猶不行。於是六十三矣、遂以紹熙三年四月戊午卒。十一月壬申、葬西山余家奧原上。二子、爲仁、次求仁、早夭。女嫁蔡幼學、李復、陳鑑。世常病景元負氣不屈折、故不用、殆豪士哉。以余考之、景元信道不苟、且寧不用、蓋志士歟。方秦氏以愚擅國、人自識字外、不知有學。獨景元與其兄、推性命微眇、酌今古要會、師友警策、惟統紀不接是憂。今天下以學名者、皆出其後也。其論議憤發、筆寬墨餘、佞者褫

魄、貴者奪色、豈血氣爲之使哉。然則志也、非豪也。故事、第四人與上三人踵躡以進、累日月皆至卿相、景元恥自言、故甘爲選人。最後、朝廷以幹官者拔滯淹之一門也、景元笑曰、此冗官爾、法當廢省、可身踐之乎。卒以疾辭。夫思其職不利其祿、然則志也、非豪也。自其兄及薛士隆、陳君舉、擅一世臧否、號爲方峻。景元不然。雖閭巷一介之善、甚或輩行絕數等、未嘗不委曲外比、售其聲名。家產無十金、僮僕單特、賓從晝夜集、勢肺烹蛤蜊蔬橡雜陳之。急難窘助、扁舟徑往、夜半扣門、攝衣偕出矣。景元果豪耶。不以富貴適己、而以貧賤徇人耶。故曰、亦志而已矣。始、行之游陳、鄭間、後壻鄭氏。景元爲余言、參政李泰發之孫、委禽焉、吾顧不敢。已而中第、今爲臨海丞。景元沒二十三年、夫人黃氏卒、旣合葬、時行之以龍圖閣待制知福州、書來曰、鄭公遠矣。宜於此乎銘。夫豪與生盡、志死不滅、立德之



本也。孔、孟所尊也。何較遠近哉。銘曰、

陳代嘗言、枉尺直尋、孟氏所訶、曰有利心。嗟乎景元、尺何必枉。既定之榮、矢而不往。以介責身、以通恕人。餓於西山、草秋木春。

嘉定八年十一月□日。

葉適撰 《水心文集》卷二一

胡少賓墓誌銘

少賓諱序、姓胡氏。胡氏繇婺徙溫、至荆湖制置司幹辦公事君諱褒、通判滁州君諱哀、宗正少卿君諱襄、兄弟始著、累贈其考諱觀國中散大夫、妣趙氏恭人。滁州君周氏安人無子、以幹辦君之子爲後、是爲少賓也。少賓娶薛氏、故起居舍人徽言之女。世所稱薛士龍者、其妻弟也。年四十有九、以淳熙五年後六月丁未卒于官所、十有一月辛未、歸葬于永嘉縣吹臺鄉梅嶼山先兆之側。子男五人、宗、宇、守、寅、定、女四人。曩余問學于薛士龍氏、往往

見少賓。已而、與鄭純全眞往還。全眞雅從隱君子游、間一至城邑、必食寢於少賓之家。余固心異少賓、而未之知也。前年、官行在所、少賓適赴調、久館於余。師友鄭景望氏、則日得與少賓處語。是時、少賓之從弟千秋、待湖州監酒闕、年方少、母老矣、不樂其爲是官、使來換縣主簿若尉。少賓念人人擇便利、將誰聽吾弟。昔授福州侯官尉、推千秋嘗適市、見宜春走卒、問其族子教授時者亡。恙乎。曰、旣亡矣。爲之涕泣奔走、以求歸宜春之喪、與其父母妻孥者累日。余始知少卿之篤行、全眞之不苟合。鄭薛二氏之常與居、有以也。其後、益聞少賓生平。少嗜酒、倔彊、年三十、盡捨故交、竊聚糧、走千里、見黔人所謂金先生者。先生名梁之、嘗爲奉新尉、一旦棄官、變衣服、垢面罵市、難近。即所可意、復危坐講說、若經生學士然者、最善鄭全眞也。少賓介以見、卒然相懽、飲之於酒家、竟醉。少賓蓋留黔數月。

而後歸其所云云。懷不以語人、迺更自負恃愛惜、

非親黨慶唁、未嘗出門巷。獨旦暮與士龍、孫處厚、子詩相追逐、上下議論。士龍名在天下、士爭趨和、其言、少賓亦自立我、務不爲同、於子詩尤各出奇、不相降下。余頃聞滁州君初讀書天慶觀、故相秦公在永嘉、聞其名、出不意、杖策來覘之。君方讀孟子、書不爲輟也。秦因誦宋勾踐一章以感諷君、君訖其去如初。旦日、且不還謁。秦公再相、有以君爲薦者、曰、是固以三顧望人者耶。滁州竟官不達死。幹辦君以布衣從大將岳飛、定群盜、僅得官以死。少卿稍貴、亦坐言者謂尙胡寅、趙鼎之學、擯十餘年不用。少賓志益壯、連調官、丁內外艱、不赴。晚監湖酒、名字纔出、未幾死矣。胡氏父子蓋如是。宗來乞銘、其可無辭叙哀之乎。宗盡得外氏書、率諸弟力學、或者在茲耶。銘曰、

璞也而或以爲珉、似也而或以爲眞。徒以屈伸、云

誰不泯。吁、嗟乎少賓。

陳傅良撰 《止齋先生文集》卷四七

### 小舟墓誌銘

小舟子名開、字去非、卒以淳熙三年三月十一日、越除祥之一月、乃克葬。其子南幼貧、力未任襄事、父爲子縗、則葬之雖緩、葬禮也。其父爲方舟子、故開以小舟自號、以明世學之傳。初授以元祐諸公、先天皇極以拒新說、爲專門。其季父雲巢子教、以先秦古書章句、開因之擷菁華、去秕稗、一本聖人之正。絢六經之詞、以爲之文、尤深大易、春秋能合傳注變化。其文嚴而通、深而明、機杼宛然、成一家法。多不駁、放不流、如奔海之波、如逸鞅之駟、砥柱不能遏其勢、掣電不能方其躡。鋪張叙述、皇王帝霸無一不具、傲乎蔑然、俗學間綽綽也。俾得少施於用、可涯哉。幼習童子舉、於書無不讀、人有遺忘、問之、應口某書某卷、行綴字次無一或差。然亦苦



備藏

怵心肺、慄慄戚戚、悱憤極矣。天啓其悟而奮其成、亦極矣。未冠、應鄉舉、輒居第一。舉子多蹈襲其語、攘臂場屋者、往往怙黨中傷、以幸其去。引親避之、又多憖之、坐累四舉不利。方舟子三召三逐、小舟往返江湖、風波患難同之。方舟子西漕罷歸、小舟又首薦、避親析入南宮試、又避妻黨嫌入別頭。考官奇其文、至臚誦、擬置巍級。有觀望疵其卷者、終作末卷黜。知舉憐之、謀申理留以賢良科官之、會知舉者出、不果。轉客諸公間、雅爲蘇公嶠所知。會蘇遷臺端、蜀士目語睽睽、小舟懼、還蜀。尋侍行漢中、感目疾、三日喪明、類有蠱之者。醫者投涼劑、胃損氣浮、又誤服附子、流汗如注、猝以卒。年四十二。貧無衣以斂、方舟僅辦一縑束其幹、哀哉。天資孝友、不習邊幅、退然若不勝衣。其臨事鯁亮、雷厲山壓、不能奪其氣、其所自期止此耶。小舟姓李、出唐隱太子後。諱文釋、遷蜀簡池、大墓在焉。後官資之

銀山、爲資人。以父夢五色雲而生、幼名麟兒、小名正稟、更名方、或謂慕柳仲塗之文、更名開、非也。曾祖祐、祖嗣宗、贈朝請大夫。妣宜人蹇氏。父朝請郎、前尚書都官員外郎方舟也。母何氏、安人。娶趙氏、生三子、山孫、四歲而殤。南孫、九歲生臨安、母蓐三日浴血、擁以登舟、乞艘婦乳、飲歸蜀。眉孫、未啐不育。四女、長適彭州蘇謙、次適從政郎王舟、次許婚未行、次幼未字。竊聞之、父昭子穆、世適大小之別、曰祖曰禰、所由以分也。石之祖爲適長、昭也。先君朝請下逮、不肖子石及孫開、皆繼昭而立、以別支庶。開不幸死、自今爲五世遷適、別無禰矣。父母爲元子報服、執杖斬衰、以明繼祖自出、禮與法惟均。惟石有繼母太宜人杜氏在堂、年八十餘、計年而除、逼禪而葬、禮與法之權也。方舟子有不能盡文、其痛者、小舟所交所訓授、俾其弟圓詳甲乙姓名、可以傳小舟業、不畔吾門者。所著書若干卷、籍之



左方。或訝其著書太蚤、惟中書舍人趙達品其文、曰千聖下風、正字劉望之曰、可以世居德行堂矣。李氏讀易堂、望之爲記。銘曰、

曰朔曰洛曰蜀、折衷堯舜、六經誰師。嗚呼小舟、文在茲乎。一慟永窆、豈惟父子之私。

李石撰 《方舟集》卷一七

### 均州黃使君牧之墓碣

黃氏豫章著姓、其派豐城縣進以儒而顯以才者、均州使君也。君諱牧之、字穉卿、世縣人。曾祖表、妣葉氏、呂氏。祖得禮、進士起家、嘗尉武陵郡之桃源、獲盜當改京秩、謝不就。終柳州推官、贈左朝議大夫、妣范氏。六子、三擢第、而君之父次山宣和釋褐第一、名聲籍籍、紹興間擢吏部郎、終左朝散大夫、贈通奉大夫、兵部尙書程瑀誌其墓、配李氏、章氏。君八歲喪父、十歲喪母、哀動弔者。父澤補將仕郎、自幼不群。女兄歸浮梁李氏。族長戶部侍郎椿年

主<sup>③</sup>席君年十三、機警詳雅、李舉以訓其子弟。逮志學、鄉人工部侍郎徐琛以女妻之。從臨川徐世英傳春秋學、經史百家無不貫穿。踰冠、求監潭州南嶽廟、宿其業。秩滿、調江陵府司戶參軍。太史李<sup>④</sup>燾將漕湖北、兼行帥事、高明少許可、選君領秋苗<sup>⑤</sup>。寅<sup>⑥</sup>入西出、悉蠲加耗。松滋、潛江兩邑之間有虎渡堤、蓄水溉田數萬畝、久不葺。松滋令欲葺、潛江曰否、郡貳主潛江、燾屬君定。君曰、從松滋則暫勞永逸、潛江所謂惜近費忘遠憂也。燾喜、薦於朝。太府少卿李安國總六路財賦、軍儲在江陵者大出<sup>⑦</sup>。萬計、命君掌出納、無分毫差。乾道辛卯旱、癸巳疫、拯饑療疾、咸賴以濟。嘗<sup>⑧</sup>行獄掾、盜不應死、帥欲殺之、公執不可。帥徐閱案牘、喜曰、他日無忘此心。諸司交薦。淳熙元年改宣教郎、知建昌軍廣昌縣。正身率下、黠吏奸民皆退聽。罷預借科罰、訟至平心處之。獄犴皆清、里正戶長當役惟恐後。暇日按吏卒



習射、中的者賞、盜發輒得。趙丞相汝愚漕江西、以治績<sup>⑤</sup>聞。請去、令爲京西安撫司幹辦公事。八年、賜緋衣銀魚。漢江齧城、調夫築堤岸、部役非其人、衆情不安。君攝倅董之、不日訖工、堅壯如舊。明年水大至、尺寸弗墊。宜城水渠出中廬之西山、擁鄢水入於沔、後漢王寵復鑿蠻水益之、溉田六千頃。歲久廢壞、治平中縣令朱紘始修復、鄭獬爲作記。歐陽文忠公賦詩美之。兵火後渠又廢、君躬行相視、計日役二千工、一月可成。諸司列上、詔可。荒野爲腴田、自君啓之。轉江西提點刑獄司幹辦公事、多所平反。寧都寨土兵群集於外臺、訴衣糧不時、傳聞洶洶。君白其長代支、徐治爲首者、衆乃帖然。屬邑負經總制錢五萬緡、虛額兩倍、文書追擾。使者用君言輸實欠、餘悉除之。所至上官薦其才能、十三年擢知均州、兼管內安撫。陛對、乞刺舉獄官、以清刑罰、免民兵科斂、試其藝、羅襄陽粟實塞<sup>⑥</sup>下、省

湖南漕運費。上皆嘉納。至則請修城池、備器械。章下本路、或已疑其生事。復疏漢水灘水淺可涉、害之大者、又欲錄用歸正胥朝、杜海、馬清子孫。予在廟堂嘉其不苟、多爲奏行。會武當歸正人辛居簡九家逸去、不察者從而攻之、貶秩一等、尋復報罷。紹熙元年春也。厥初軍糧吏俸皆不足、滿歲倉庫充盈、士民遮道惜其去。是歲七月辛酉卒於鄉、得年五十。官自迪功郎、九轉至朝請郎。明年十一月己未、葬撫州臨川縣延壽鄉金峰山之原、近吏部塋、蓋素志也。配封安人。三男、巒、文林郎、靖州州學教授、紹宗、從事郎、江陵府司理參軍、嶸、將仕郎。四女、適羅阜臣、前死、次適葉侍孫、羅仲孺、曾冕。孫男、文綜、文度。女七人。君早失怙恃、於祭享極其孝敬。吏部聚書萬卷、章碩人取資治通鑑授君曰、讀此足矣。故能明於古今治亂及天時人事。當官每汲汲功業、爲文操筆立就、嘗著芻蕘十議。吏部侍郎



晁公武侍左郎官公遡兄弟望高一時皆以顯用期君。公遡贈詩有過我問道我不如之句。而天不假年。抱能未試。議者惜之。二兄崇道義寧早世。教有二姪。疇若逢吉。皆貢春官。逢吉死無子而有常產。其母求繼於君。君以姪孫思永紹其後。郡守趙燁義之。性廉清。薄奉養。兼<sup>①</sup>官例卻添給。聞人善稱揚。推挽篤意教子。巒暨紹宗連登科。文有家法。其猶子疇若筆力益高。狀君遺事。具言賴叔父之教。遂踐世科。至是巒以墓碣爲請。乃書而系之以銘曰、

世有底法之基。身抱絕人之資。粵趨事<sup>②</sup>。其赴功。在得位與逢時。疇克備此三者。君有之宜似之。嗟陸沉於郡邑。僅得半於期頤。相存亡之交。拂莽天命之難知。尙慶源之不竭。眷後人而永貽。

周必大撰 《平園續稿》卷三八

運判宋公墓誌銘

公諱若水。字子淵。成都府雙流縣人。其先唐相文貞公裔孫。且以給事中從僖宗入蜀。遂家眉之彭山。生五子。散居成都。邛蜀之間。號五房宋氏。雙流其一也。公之曾大父右言。大父傑。父維。皆不仕。其父以公故。累贈奉議郎。母蹇氏亦贈安人。公自幼即知刻苦爲學。邑之賢令如任公淵。李公燾皆愛其文行。屈輩行與交。及將就舉。有欲移公試漕臺者。公曰。欺君誣祖。吾不忍也。卒從州舉試外省。得奏名。對策廷中。切直無所避。考官不說。猶以冠乙科。授左迪功郎。嘉州龍遊縣主簿。未上。丁外艱。更調龍州仁壽縣主簿。監永康軍青城縣味江鎮稅。兼合同場。先時茶禁甚急。而私販益多。商算甚重。而歲額反耗。公至。弛禁薄征。而舊弊頓革。課入大增。或勸獻其贏以規賞。公曰。獨不爲後人計耶。歲旱。民爭水泉之利。羣聚相毆擊。且欲爲亂。公單馬喻之。皆釋仗聽命。公又爲禱於靈湫。一夕不雨而

水溢溝澮皆滿焦槁以蘇物情乃安。明年薦饑民又相聚剽掠以求食有期以某日掠鎮民某氏者。公召諸豪語曰饑民求食此易與耳。私販之徒負勇玩法一與之合非小變也。今能出力以致其黨使爲一境之衛不唯足以銷其姦心饑民知吾有備亦憚不敢進。此一舉而兩得也。諸豪皆應曰諾。悉出金幣椎牛釃酒召致其徒雜於居民保伍之間日以兵徇于市。公亦帶劍躍馬其間衆皆畏服而饑民遂不敢犯。且曰是嘗爲我禱湫出泉者吾當謹避之耳。鎮故無學公爲作孔子廟考古制器率諸生行釋奠禮延師儒躬講說士子競勸制帥汪公暨諸使者聞其賢爭薦之移知神泉縣。始至承廢弛之餘首罷追胥之擾但以幅紙書負租與民爲期無敢後者。不數日盡償前令宿逋爲言州家使得善去。邑產黃雀歲供諸司至以百萬計。公請罷之民用不擾而物生亦遂至今爲法。諸司知

其治行徙知嘉州犍爲縣。神泉民相率留之不能奪也。公於二邑皆治其學校如味江所爲。民有訟者躬以義理恩意辨告諄悉皆大感悅無復犯者。其尤無良不聽令敢以武斷病齊民者乃捕劾之上獄于州罪至流徙。於是閭里正清善良皆得其所。改宣教郎幹辦諸司糧料院擢太常寺主簿齊宿必虔濯漑必潔同列愧歎以爲非所及。新繁故有藝祖神御蜀帥請改築宮于成都事下太常公聞其且將大興土木窮極侈麗使民不得安爲處駁議事乃得寢。遷國子監丞再入太常爲博士轉而爲丞兼吏部考功郎官改兵部除秘書丞復兼吏部三館將以故事爲暴書會而上方閔雨避殿降食公爲官長言君父焦勞如此而臣子相與燕樂誠有不自安者。官長是其言白罷之以旱故詔館職條上闕政公爲書數萬言歷數當時刑賞之繆以爲是所以干陰陽之和者。宰相聞之怒出公



提舉江東常平等事。上稱公誠實、俾移福建。閩俗故多不舉子、公與帥司合議、按律令、嚴保伍、爲所以禁防誨誘之具甚悉、全活者衆。汀州遠且多盜、又名瘴鄉、常時使者按行多避不往。至是羣盜甫平、死傷橫道、疫癘大作、又非常歲之比。公獨慨然引車深入、煮藥自隨、親問病者飲之。民爲盜所攻劫、與能捍禦奮擊以助官軍、有勞効者、皆弛其租。汀民大喜、人人知戴公德。建陽招賢里故常別貯常平米數千斛、凶歲發以賑民。本隱士魏君揆之所爲、而歲久陳腐、出納不時、反以病民。有以版曹所下社倉法告者、公喜、立爲移書、更屬鄉人士君子歲歛散之、一方尤賴其利。除湖南提點刑獄公事、建人老稚邀遮戀慕、至竟日不得發。湖南尤多盜、皆晝伏豪民家、抵夜輒出、以故發不時得。公至、申明保伍之令、使相收司。盜無所容、至有扣頭車下、請得召保、復歸農業者。公皆撫而遣之。又檄諸

郡精閱禁旅、按行所過、察視激犒如法。月調諸縣弓兵、校其藝而誅賞之。由是皆樂爲用、盜發輒得。奏獄官毋得兼攝它職、又條七事以申儆之。於議法尤兢兢焉、每論死刑、必齋戒露香、要質于天、然後敢決。決日輒罷燕設、所以致其欽恤之意者無不盡也。屬郡大札、遣吏挾醫載藥馳以救之。衡山浮戶有與土人不相中者、詣闕言、衡山國之壽嶽、祠城東故有溪、並城南出。後或鑿城北址、導水使西、不能無斷地脈。請築山決水、使復故道。下公平奏、公言、水西出歲久、故道皆爲民居。今欲東之、則是數百家者不無蕩析離居之苦。且壽嶽之云、無所經見。就如其言、則國家中興、慈皇壽考皆在西流之後、尤不宜妄有改作。事乃得已。衡州故有石鼓書院、墟廢亦久。前使者潘侯時始復營之、公成其終、爲增置弟子員、以永嘉戴溪爲之師。割田置書、教養如法。又知處士劉某之賢、與郡守劉清之

交章論薦、詔特補官。於是學者乃知公好賢尚德之意、不獨爲科舉計也。被旨攝帥事、飛虎軍素驕悍、白晝掠人、吏不敢問。公一以軍律繩之、賞信罰必、士民以是得安其居、而軍吏亦皆悅服。會久不雨、請禱過勤、遂得疾。改除江南西路轉運判官、而江西是歲亦大旱、下車首問荒政所宜、發廩勸分、蠲租乞米、以次施行。其奏請者亦多報可。又行帥事事益叢委、公自力不少休。家人有諫止者、皆麾而卻之、遂以大病。然夙興猶視事如常時。夜過中、遂不起。淳熙十五年二月甲子也。年五十有八。方病革時、民相率爲公禳禱無不至、晨夕走府門、偵起居狀。及卒、皆縞素吊哭。行日、號泣挽車、哀送數十里不絕。湖南吏民聞之、有千里來赴義者。蓋公資稟醇厚、隆於孝友、處內外族姻、長少存沒之間、不見其少有遺憾。爲學勤恪不懈、既脫場屋、益玩意於聖賢義理之學。近自周、程、張、馬之言、以達于

經、吟諷辨說、未嘗虛口。推以及人、一以仁愛惠利爲心。聞善即行、如恐不及。故所臨蒞、士民愛戴、見於風謠、非一時諛說空言也。其在朝廷、據經守正、不爲苟合、雅爲虞雍公所知。其爲之言、不過用人材、嚴守備、以俟敵人之釁而已。嘗因輪對、請戒羣下、懷私立異、迎合紛更之弊、損宗戚歲時賜予、貴臣給使宣借、百司吏祿之費、及減畿甸房緡、以惠貧弱、上皆稱善。公因極論恢復大計、反覆數百言。上益喜。顧曰、即當相與赴功名之會耳。事下有司、不得盡施行、而房緡之惠遂及於天下。他議貢舉銓注之屬、又皆廣恩優老、革薄從厚之意。而其應詔言事、則直指宰相挾私罔上之失、無所避。雖以是不得久於朝廷、不悔也。壽皇知公深、嘗語近臣、斯人乃朕於奏對間得之。其在湖南、蓋嘗有召用意。宰相猶以前忿尼之、識者恨焉。而爲文汪洋融液、務極事情。晚歲乃更造約、尤好讀易、嘗夢有問





易之一經孰爲門戶者、應曰、陰陽兩畫、非易門戶也耶。其精詣純熟蓋如此。所著書有經解五卷、書小傳十卷、史論十卷、古今詩百卷、雜著三十卷、奏議五卷。前安人張氏、蜀之故家、漢御史綱之後、歷千餘年而譜牒可考不紊。安人性賢孝、讀書史、善筆札、通古今、識義理、而不肯爲詞章。父岐嘗宰永康、頗以嚴治。安人每陳古誼以諫。既歸公、事舅謹敬、奉祀莊肅、和叔妹有禮、遇族黨有恩、舅喪、悉力佐公辦治如法、人以爲難。公居間久、上官有欲使攝局者、安人不懌、曰、吾之貲尙足以支伏臘、狗祿從人、得無墮素志乎。公善其言、爲謝不往。其方直之操、士夫或有愧焉、不但爲婦人之賢而已。先公十九年卒。後安人字文氏、宣教郎隲之女。子男三人、之源、之潤、之汪、皆嗜學而有文。女一人、適熊應早卒。皆張出也。之源等以十六年十二月某甲子葬公及張安人於成都縣楊侯鄉癸山先墓之次。

遣人來建安請銘、踰年乃達。而予適有臨漳之役、使者以書還。明年復來、則值予哭子悲甚、言不能文。顧與公相得晚而相知深、其爲社倉、書院、皆嘗爲記述、又重之源兄弟之請、越數千里、連歲再至而不倦也、勉爲之銘、以致吾意。銘曰、

資之厚兮學之博、退循循兮進諤諤。三方一節思無斃、九原歸卧不可作。我銘其居詔冥漠、欲知斯人視斯石。

朱熹撰 《晦庵先生朱文公文集》卷九三

### 董君景房墓表

番陽董君景房者、諱爲良、世家德興之海口。大父濬始仕、至宗正少卿。父元一、秀州司法參軍。君少有大志、嘗學於江山徐公誠叟先生之門、受其說而歸。益務求友、講而修焉。不數年、遂以文行聞於州鄉。再試禮部不第、退處于家、讀書講學、不復以聲利榮達爲事。鄉人相與益高仰之、而君之學蓋

日進月益而未可量也。淳熙十一年九月<sup>①</sup>。一旦得疾卒。年甫五十有四。士友聞者莫不哀之。蓋君爲人儻蕩無城府。家故饒給。兄弟始求分異。君力止之。不可。則盡聽其所擇。而獨取其所遺及故書數篋藏焉。旣而兄弟或破其產。君極力資奉。不計有亡。死者葬之而撫其孤焉。族姻鄉黨之貧無歸者。衣食之。罷不能者教誨之。不幸而有急難者救護之。皆極勤懇。鬪訟之不決者。爲曉譬以義理。往往心服。失其所爭而去。歲饑。姦民肆掠。物情大恐。君爲官畫策。以便宜發廩振貸。而密以兵掩其渠帥。寘于法。人賴以安。雅有當世之志。於官政民俗弛張之際。尤孜孜焉。嘗記其見聞思慮所及者。作活國書一編。其言質懇詳盡。不爲華靡。而所規畫常以厚下固本爲先。識者韙之。恨其不得見於用也。君娶周氏。子男二人。從起。從治。女六人。其三已適人。進士齊節。程矩。齊牧其婿也。君卒之明月。葬其

里之黃栢原。沙隨先生程公可久雅知君。實銘其壙。而從起又以君友人太學生程端蒙之狀來請文。以表墓上。予故家君旁縣。頃歲還里中。君以所論經子諸說來見。別後又數以書來。有所問辨。時君猶有四方之志。予因以所聞古人爲己之說告之。而君不以其言爲非也。然則其可無詞。乃取程生狀。摭其可紀之大者。書以授從起。俾歸刻之。嗚呼。君則已矣。而予言不沒。則百世之下於此尙有考也。淳熙丙午三月庚辰。宣教郎直徽猷閣主管華州雲臺觀新安朱熹述。

朱熹撰 《晦庵先生朱文公文集》卷九〇

中奉大夫直龍圖閣司農卿林公墓誌銘

公林氏。諱湜。字正甫。福州長溪人。曾祖巖。祖樗。父師中。贈中奉大夫。中奉迎師於蜀。得師先生以歸。學者常數百人。中奉爲高第。公入太學。與石斗文。吳偁。吳俯。張淵並時知名。登紹興庚辰進士第。爲



富陽尉。虜亮之亂、部弓手截隘處、邑豪乘時販鹽行劫、公捕擒之。代歸、教授明州。朝廷會其勞、改官。改泉州晉江縣。州晉江縣。州分造戰船、公曰、負郭豈有羨錢耶。何忍斂百姓。將捨去。諸番義公之爲、助其役、舟先就而民不知。滿秩、攀留空一城。通判南劍、太守議官自賣酒、公爭曰、賣鹽已病矣、又益以酒。且閩地俱萬戶也、今始自南劍、他郡效之、君不畏八州民怨己乎。守諱其切、自爲奏、朝廷視無通判署、疑之。方下、公條上。言者亦謂閩近瘴、故二稅有酒錢而民自酤、今創禁之、非舊制也。守奏遂格。汀州賦輸無法、吏多取自入、爲百姓患。帥漕請均節之、以委公。公索其征、有公庫鮓脯食次冊、差出貼支等錢、皆數千計、他多此類。守俸俸數倍矣、小官薄、復別貸以給。公約其歲用、增損適平、省緡錢四萬還之民。監司更薦、召審察、幹辦諸司審計司、遷太常寺主簿、國子監丞、太常丞。紹熙元年、遷

監察御史。公久官南方、無中援。旣入朝、名人善士一見如舊識、相謂曰、今士大夫去就、常以臺諫官賢否爲卜。是公格應入臺、得如斯人者、庶幾乎至是。竟用公。故事、臺諫官居同宅、相愛助厚甚。彈劾論諫、必相參審、好惡指趣不少異。曰、所以共持紀綱也。公獨喟然曰、吾不惟賢與善是親、正人之慍於衆、小人是助、好惡去取、不以公論爲歸、而曰共持其紀綱也。夫紀綱者、豈臺諫官爲私之地歟。他日見上、奏曰、陛下託股肱於宰執、而除授多小人、寄耳目於臺諫、而彈擊多君子、治亂之大、無過此也。執論移晷、侍立舍人言於衆曰、今日察院爭何事、反覆不已也。自是與其長不舍矣。時小人知公意、頗自爲計。公與同列三人論劾甚銳、至一日罷數人。內外皆聳、方依公爲重、而上以覺察過數詔諭公。公爲殿試詳定官、考直言者居第一、而上不用。及殿中侍御史劉德脩下遷、公曰、吾可以去矣。

劉公、蓋公所謂親而助之者也。公奏直劉公、不報。錢之望知靜江府、公再論之。上罷之望、出公浙東提刑。宰執合前、願少留、不聽。移江西轉運判官。楚多訟、吏積厭苦、公曰、已恣睢、而使民以弭筆成名乎。取滯訟自判之、數月、至者益少。免贛州科罰、罷龍南安遠折變、減興國淮衣絹、南安聖節銀、及水滄州縣窠名之在漕司者皆除之、歲損數萬、而漕計猶增於舊。召爲吏部郎中、遷太府少卿、以孝宗遺留使虜。始、光宗過重華宮疏闊、公再三請、未效。而孝宗崩。上內禪、公入辭、首以奉親歡、杜讒口爲勸。上俯聽、首肯數四、謂吏部侍郎彭龜年曰、朕初即位、未識羣臣、此老成重厚人也。在道繫帶及國、通名有未合者、連卻虜議。至賜衣、以其服被公、公揮擲去。虜人曰、君命何可慢也。公曰、宋正統相承羣官服視其品。今易左衽、有死而已。爭辯甚久。虜趣入謝、公盛服如故。虜不能屈。復命、上迎謂曰、卿

守禮甚堅、國體不失、朕所知也。遷司農卿。公之還自江西、衆望謂公當遂用、公論事不假借。慶元初、韓侂胄始專國、朝士多自引去。呂祖儉上書爭之、貶嶺外。公見余丞相曰、呂子約匆匆南行、奈何。叔世事不宜有。執奏收回、大臣責也。丞相可不勉乎。語喧一時、權近側睨。公因力請外、除直寶文閣、湖北運副。未幾、與沖佑觀、起知泉州。不樂公者猶謂不可、復與沖佑、畢祠、遂請老。進龍圖閣致仕。嘉泰二年七月二十六日卒。年七十一。公晚而居平陽松山、溫福之間也。遂以三年十二月十九日葬於賢沙里。夫人黃氏、封令人。子介、文林郎。孫孟嘉、孟治、皆登仕郎。孟淮、孫女二人。公合女兄弟十人。兄淳、尉朝陽。夫婦死、公經紀振業、官其子弇。餘弟妹亦自足。再從叔貧無後、爲立嗣、嫁其女。性淡薄、散朗、雖居官精敏、遇事立斷、而平居但教諸生誦說、若不涉世故者。於善惡賢不肖明白、而尤護惜善

類。世所謂善人君子、常欲以一身同其榮悴去留、故議論多激發、見忌於人、以是齟齬廢斥而終不悔。朱公元晦既謫、士諱其學、公執弟子禮不變、未歿數月、猶走書問疑義云。介錄其文號盤隱類藁十卷。介喜節知類、能似公來請銘。余昔與公及詹元善同在太常、續炬縱語、以銘屬余者也。銘曰、大膏寥寥分一燈、耿然自照非外明。奉璋來朝如景星、善人視之爲廢興。紹熙御史慶元卿、義能扶持事不勝。乾剛坤柔相降升、以待後死銘有徵。

葉適撰 《水心文集》卷一九

### 魏府君天祐墓誌銘

始余卬角、知公端人也、嘗欲從之遊。既冠、偶又與偕試于春官、見其粹明而平實、則又知爲純體篤踐之士也。由是爲敬益加於前。一行作吏、涉藝荒淺、不得與之相周旋。逮還自策府、以漢嘉印綬里居、卽爲書幣致公。暨守漢守眉、除館以舍之。望其

容色辭氣、油油翼翼、使人滯吝之意消。驗之不睹、不聞、則懷乎若有臨其左右者。察其所安、則剝落枝葉、玩心高明、無所滯礙。由是將盡舍而學焉。而公固不起疾矣。嗚呼、非公之學前後有淺深、而余之知公之晚、是故余今昨是非之候也。公資性端靖、不妄言笑。少與伯氏天啓齊名、伯氏早與計偕。公年四十有六、始以詞賦登里選、累舉不利。當以恩補官、公辭不受。於是年七十矣、益大肆於學。聖經賢傳、歷覽博究、又卽夫河雒之正傳、以上溯洙泗之源、歷歷乎其獨得而的然亡所疑也。旁及百家異同之論、二氏放遁之詞、貫融異同、摭摘精粹。逮乎日邁月征、恥天下之義理熟、春華秋月、登山亂流、草木之枯榮、歲時之代謝、山川之流峙、禽魚之飛躍、觸處呈露、會心適意、陶然怡然、蓋舉世之可悅可慕、無以易其樂者。余時在旁、則相與命酒張飲、嘯歌夷猶。往往余去、拊卷獨會、援毫疾書、短



楮橫軸、寒燈細字、兀兀窮晨夜不能置。或謂其迂闊於事情、或譏其汎濫於老釋、而公之融液擺落、人蓋不及盡知。雖與公同生長於鄉者、亦鮮克知之也。每燕坐、輒緩聲微吟曰、天何言哉、四時行焉、百物生焉。或問之、則曰、學者須是識、得到此地位、方是極至。其在眉也、一日忽訣余曰、余殆將死矣。姑聽余去。余曰、公奚爲是言也。不可。冬仲朔去之。日、公執余手而言曰、才知有餘者、其陷溺深。吾子勉諸。又曰、高南叔、西叔待問闕廷有日矣。余雖形神彫謝、尙能勉贈其行。索案上紙視之、則古詩數十韻、歷歷皆朝廷大議。又明日與余論鬼神晝夜之蘊、又明日忽書紙曰、死生事大、惟當澄心靜慮等語、凡數十言、末又及孟氏六等之序。又明日則已溘然去矣。蓋嘉定六年朔至之日、丁卯也。年八十有二。嗚呼、今復有斯人矣乎。莫切於饑寒之厄、莫大於死生之變。公以伯氏推酤不登、蕩產以償

官負、終其身約居、不以累其守、泊如也。將死之他日、慮澹氣夷、切切然以講學爲事。暨將啓手足、無一語及家事。嗚呼、是復有斯人矣乎。其子仲許、將以七年七月乙酉、葬公于縣之善何鄉聖亥山之原。先事求余銘、噫、非余誰宜銘者。乃叙其世。公邛之蒲江人、姓魏氏、諱天祐、字德先。曾祖考□□、祖考大臨、考□□、妣□氏。元配邑人吳氏、繼室同里費氏、皆先卒葬。二子男、仲許、謙孫。二孫男、東震、祖傳。謙孫之卒、無後、公命以祖傳爲之子。孫女一人。曾孫二人。公平生不事造請、居縣之十里許、郡縣長吏至、必加延訪、薦紳大夫過其門者、必即之。最後郡守今潼川漕臣張公師夔、以公安貧守道聞于朝、未報而公卒。世謂才難、固也。孰知亦有抱道懷德、白首而不見知者邪。公平生論著有語、孟中庸說、卮言、贅言、信心編、自信編、雞肋編、日錄諸書、及漢議、唐鑑、十國志、國朝史纂、今藏于家。余將爲



哀次以廣其傳焉。銘曰、

大塊噫兮推移、聚散同體兮又奚疑。羨生恒化兮  
小智之私。全而生兮、全而歸之。公則奚憾、余將疇  
依。

魏了翁撰 《重校鶴山先生大全文集》卷七一

### 全州教授陸先生行狀

先生名九齡、字子壽。其先媯姓、田敬仲裔孫齊宣  
王少子通、封於平原般縣陸鄉、即陸終故地、因以  
爲氏。通曾孫烈、爲吳令、豫章都尉、既卒、吳人思之、  
迎其喪葬于胥屏亭、子孫遂爲吳郡吳縣人。自烈  
三十九世、至唐末爲希聲、論著甚多。後仕不偶、去  
隱義興。晚歲相昭宗、未幾罷。邠、隴、華三叛兵犯京  
師、興疾避難、卒、諡曰文。文公六子、次子崇、生德遷、  
德晟、以五代末、避地于撫之金谿、解橐中裝、買田  
治生、貲高閭里。德晟之後、散徙不復可知。德遷遂  
爲金谿陸氏之祖。六子。高祖有程、爲第四子、博學、

於書無所不觀。三子。曾祖演爲第三子、能世其業、  
寬厚有容。四子。祖戩爲第四子。再從兄弟蓋四十  
人。先祖最幼、好釋老言、不治生產。四子。先考居士  
君賀爲次子、生有異稟、端重不伐、究心典籍、見於  
躬行、酌先儒冠昏喪祭之禮、行之家、家道之整、著  
聞州里。六子。先生爲第五子、生而穎悟、能步趨則  
容止有法。五歲入學、同學年長踰倍者所爲、盡能  
爲之。讀書因析義趣。十歲丁母憂、居喪哀毀如成  
人。十三應進士舉、爲文優贍有理致、老成歎異。年  
十六、遊郡庠、每課試必居上游。時方擯程氏學、先  
生獨尊其說。郡博士徐君嘉言、高年好修、留意學  
校、間日獨行訪諸齋。先生侍諸兄、衣冠講論、未嘗  
懈弛。由是徐君雅相禮敬。明年徐君物故、又明年  
新博士將至。先生聞其嗜黃先言、脫略儀檢、慨嘆  
不樂、賦詩見志。歸葺茅齋、從父兄讀書講古、間出  
見故老先達、所咨叩皆不苟。時居士君欲悉傳家



政平日紀綱儀節、更加隱括、使後可久、先生多與裁評。弱冠、造吏部外郎許公忻。許公居閒久、故知少、見先生如舊相識。明年、許公守邵陽、欲先生來、居士君亦啓其四方之志、先生於是游湖湘、抵邵陽。久之而東至臨江、郡守鄧君子延先生于學、臨江士人皆樂親之。居半歲、乃歸。越數年、郡博士苗君昌言復延先生於學、從遊者益衆。苗自謂平生所尊賞者不苟、至其所以禮先生者、特異、人亦以是信之。其與先生啓有云、文辭近古、有退之、子厚之風、道學造微、得子思、孟軻之旨、推尊蓋如此。先生覽收無滯礙、繙閱百家、晝夜無倦、於陰陽、星曆、五行、卜筮、靡不通曉。性周謹、不肯苟簡涉獵、所習必極精詳。歲在己卯、始與舉送。同郡官中都者、適有二人、皆先進知名士、閱貢籍、見先生姓名、相顧喜曰、吾州今乃可謂得人。庚辰、春官試不利。辛巳、補入大學。故端明汪公實爲司業、月試輒居上游。

場屋之文、大抵追時好、拘程度、不復求至當。惟先生之文、據經明理、未嘗屈其意。嘗有先進以是病之、先生曰、是不可改。先生寬裕平直、人皆樂親、久愈敬愛。學校知名士、無不師尊之。明年、丁居士君憂。乙酉、升補內舍。丙戌、爲學錄、學校綱紀、日肅、弊無巨細、皆次第革之、人不駭異。嘗有小戾、規矩者、先生以正繩之、無假借。後或以先生問其人、顧稱先生之德、不以爲怨。丁亥、升補上舍。戊子、館于婺女之張氏。先生授其子以中庸、大學、其父老矣、每隅坐、拱手與聽講授、且曰、不自意晚得聞此。張君之死、其子喪以古禮、不用浮屠氏。己丑、登進士第、授迪功郎、桂陽軍軍學教授。壬辰、當赴、迂吏且至、時太孺人間親藥餌、先生以桂陽道遠、風物不類、江鄉難於迎侍、陳乞不赴。甲午、受興國軍軍學教授。明年夏、湖之南有寇侵軼、將及郡境。先是、建炎虜寇之至、先生族子諤、嘗起義應募。是後寇攘相



次犯州境、謬皆被檄保聚、捍禦往往能卻敵、州里賴焉。至是謬已死、舊部伍願先生主之、以請于郡。時先生適在信之鉛山、聞警報亟歸。抵家、請者已盈門、卻之不去、日益衆。先生與兄弟門人論所以宜從之義甚悉。會郡符已下、先生將許之。或者不悅、謂先生曰、先生海內儒宗、蹈履規矩、講授經術、一旦乃欲爲武夫所爲。衛靈公問陳於孔子、孔子不答、今先生欲身爲之乎。先生曰、男子生以弧矢、長不能射、則辭以疾。文事武備、初不可析。古者有征討、公卿即與將帥、比閭之長則五兩之長也。衛靈公家國無道、三綱將淪。既見夫子、非哲人是尊、社稷是計、而猥至問陣、其顛荒甚矣。故夫子答以俎豆而遂行。夾谷之會、三都之墮、討齊之請、夫子豈不知兵者。其爲委吏、乘田、則會計當、牛羊茁壯、長使靈公捨戰陣而問會計、牧養之事、則將遂言之乎。執此而謂夫子誠不知軍旅之事、則亦難與

言理矣。或者又曰、禮別嫌疑、事有宜稱。使先生當方面、受邊寄、誰復敢議此。閭里猥事、何足以累先生。今鄉黨自好者不願尸此、尸此者必豪俠武斷者也。今先生尸之、人其謂何。先生曰、子之心殆未廣也。使自好者不尸此、而豪俠武斷者卒尸此、是時之不幸也。子亦將願之乎。事之宜稱、當觀其實。假令寇終不至、郡縣防虞之計、亦不可已。是社之初、倉卒應募、非有成法令、備禦文移、類以軍興從事。郡縣欲事之集、勢必假借、主者或非其人、乘是取必於閭里、何所不至。是其爲慘、蓋不必寇之來也。有如寇至、是等皆不可用、無補守禦、因爲剽劫、仁者忍視之哉。彼之所以必誘我者、爲其有以易此也。吾固以許之爲宜。或者又曰、曾子之在魯、寇至則先去、寇退則曰、修我牆屋、我將反爲其爲師也。今先生居於鄉、有師儒之素、命於朝、爲師儒之官、而又欲尸此、無乃與曾子異乎。先生曰、吾居鄉

講授、自窮約之分。吾求仕、爲祿養。今之官、乃吏按銓格而與之耳、異乎曾子之爲師也。今又遲次居鄉、老母年且八十、家累過百人、寇未至先去、固今郡縣所禁、比至而去、必不達、剽劫踐蹂、狼狽流離之禍、往往不可免。去固不可、藉令可去、扶八九十老者、從以千餘指、去將焉之。子欲使吾自附於分位不同之曾子、而甘家之禍、忍鄉之毒、縮手於所得爲之事、此奚啻嫂溺不援者哉。或者乃謝不及。先生於是始報郡符許之。已而調度有方、備禦有實、寇雖不至、而郡縣倚以爲重。丙申夏四月、到任。先生於事無大小、處之未嘗不盡其誠、於人無衆寡、待之未嘗不盡其敬。富川單僻、絃誦希闊、士人在學校者無幾。先生蒞職、舉措謹重、規模雅正、誠意孚達、士人莫不感動興起。先生方將收拾茂異、而遠近願來親依者且衆。富川學廩素薄、而又負逋不輸、歲入僅六百石、而比年不輸者乃七八

百石、民未必盡負、姦吏黠徒乾沒其間、簿書緣絕、莫可稽證。先生爲覈實催理受輸之法、甚簡而便、白郡行之。於是無文移之繁、無追督之擾、簿書以正、負者樂輸、儲廩充裕、士人至者日衆。不滿歲、丁太孺人憂、去職。在富川者、莫不惋惜。己亥四月、服闋、冬末到選。庚子春、授全州州學教授。夏中得寒熱之疾、繼以脾泄、屢止屢作、竟不可療。九月二十有九日卒、享年四十有九。先生雖卧病、見賓客必衣冠、舉動纖悉皆有節法。卒之日、晨興、坐于牀、問疾者必留與語、幼者人人有所訓誨、談笑歡如也。先生未嘗不以天下學術人才爲念、病中言論、每在此、是日言之尤詳。夜稍久、則正卧、整衣衾、理鬚髯、疊手腹間、不復言笑、又數刻而逝。先生道德之粹、繫天下之望、曾未及施、一疾不起、識與不識、莫不痛惜。先生少有大志、而深純浩博、無涯涘可見。親之者無智愚賢否、皆不覺敬愛慰釋、稱其善

者往往各以所見、未嘗同也。不區區撫摩、而藹然慈祥愷悌之風、有以消爭融隙、不斷斷刻畫、而昭然修潔清白之實、足以澄汙律慢、趣尙高古、而能處俗、辨析精微、而能容愚。一行之善、一言之得、雖在巫醫卜祝、農圃臧獲、亦加重敬珍愛。自少以聖賢爲師、其於釋老之學、辯之嚴矣。然其徒苟有一善、亦所不廢。故先生無棄人、而於先生亦鮮有不獲自盡者。與人言、未嘗迫遽、從容敷析、本末洞徹、質疑請益者、莫不得所欲而去。於人言行之失、度未可與語、則不發。或者疑之、先生曰、人之惑、固有難以口舌爭者。言之激、適以固其意、少需之、未必不自悟也。扞格忤狠之氣、當消之、不當起之。責善固朋友之道、聖人猶曰不可則止、況泛然之交者乎。又況有親愛之情者乎。雖朋友商確、至不可必通處、非大害義理、與其求伸而傷交道、不若姑待以全交道。且事有輕重大小、吾懼所益者小、所傷

者大、所爭者輕、所喪者重故也。然有時而遽言之、盡言之、力言之者、蓋權之以其事、權之以其人、權之以其時也。母饒氏、繼母鄧氏、淳熙三年、以慶壽恩封太孺人。娶王氏、魏公曾孫通州使君城之長女也。通州君亦以是年八月卒。先生卧病聞訃、制服成禮、逮遣祭、纖悉皆自經畫。子良之、年十二、女人、皆幼。先生未及著書、若場屋之文、與朋友往來論學之書、則傳錄者頗衆。其餘雜著、古律詩、墓誌、書啓、序跋等、門人方且編次。將以十二月乙酉、葬于鄉萬石塘、謹書其行實之大概、以求誌於當世之君子。淳熙七年十一月既望、弟某狀。

陸九淵撰 《象山先生全集》卷二七

### 林府君墓誌銘

四明有善士林君諱碩、字興祖、開禧二年十一月七日卒、年七十有四。力學而不見于用、言議亦無以表暴于外、躬行于家、里閭敬之。其亡也、弔者盡



儒藏

哀。明年三月丙申，葬于鄞縣通遠鄉金谷里之赤隴。楊敬仲簡既識其壙，袁和叔燮又狀其行。樓鑰納交既久，君之子若孫請銘。銘曰：

惟林之先，著籍于青。五季避地，遂居四明。曾祖曰簡，隱德自高。祖暉漫仕，韶司戶曹。財雄一鄉，積豐施厚。植德名堂，用昌厥後。父嵩儒科，晚仕不顯。節度推官，官止清遠。母也馮氏，賢如軻親。君少挺特，篤于自信。講學至勤，求友至切。質疑請益，甚于飢渴。網羅百家，博覽彊記。或問所在，開卷指示。儉不苟費，傾貲買書。手不停披，萬卷有餘。尋得目眚，謂當佚我。使人誦之，竦聽無惰。君之讀書，根本經學。久而愈明，自詳趨約。恭敬誠懇，檢柅此身。劇暑甚病，飯必冠巾。心若無倦，形體自攝。聖學之要，正在兢業。人靈于物，知反爲累。吾有知哉，道斯可致。執喪盡禮，水漿不入。祭祀必齋，箴規汲汲。救人之失，退無後言。謀人必忠，赴急必先。清心窒慾，不作無

益。聞過則喜，改無難色。嫠不恤緯，惟時是憂。賢否用舍，如身戚休。禹功萬世，予獨何人。究觀聖心，專在爲民。敬奉遺體，不敢不懼。涕唾不輕，爪髮藏去。克勤小物，動有彝則。端勁小楷，見之心畫。誦言行錄，自深愧作。詠康節詩，如在伊洛。躬行于家，是亦爲政。恂恂二子，處恭事敬。伯曰惟忠，叔曰惟孝。字之以全，義方之教。叔既登科，伯亦舍選。人謂君家，慶由積善。伯也忽焉，人疑于天。宗一繼進，纔閱三年。夫人曰任，克相夫子。叔官從政，司越之理。孫主邑簿，宣之旌德。次傳省任，不渝淳則。壻曰周焯，僅試一尉。次曰楊忻，孫女惟二。祖葬豐林，遠七十里。願依九京，今從其志。君疾病矣，呼友執別。神氣泰定，怡然不屑。收視云久，已無晝夜。今忘生死，安有恆化。君則無憾，士友盡傷。尙其不亡，視此銘章。



校記

- ①舉：原作「爲」，據四庫本《水心集》改。
- ②亡：原無「忘」，據道光刻本《止齋先生文集》改。
- ③主：原作「生」，據傳增湘校本《廬陵周益國文忠公集》改。
- ④李：原無，據右引補。
- ⑤秋苗：原缺，據右引補。
- ⑥「寅」上原有「□自」，據右引刪。
- ⑦「大出」：右引作「六」。
- ⑧嘗：原作「掌」，據右引改。
- ⑨治績：原作「政治」，據右引改。
- ⑩塞：原作「賽」，據右引改。
- ⑪兼：原缺，據右引補。
- ⑫趨事：原作「□趨」，據右引改。
- ⑬憾：原作「恨」，據宋浙江刊本《晦庵先生文集》改。
- ⑭猶：原缺，據右引補。

⑮畫：原作「書」，據右引改。

⑯年、月：原作「月」、「日」，據右引改。

⑰固：原作「故」，據四庫本《鶴山集》改。

⑱「女」下留有闕空。



宋儒碑傳集卷一百三十六

張栻 彭元亨 劉愚 祝懷 潘景憲

右文殿修撰張公神道碑

淳熙七年春二月甲申、祕閣修撰、荆湖北路安撫、廣漢張公卒于江陵之府舍。其弟衡州史君杓護其柩以歸葬于潭州衡陽縣楓林鄉龍塘之原。按令式立碑墓道、而以書來謂熹曰、知吾兄者多矣、然最其深者莫如子、今不可以不銘。熹嘗竊病聖門之學不傳、而道術遂爲天下裂。士之醇慤者拘於記誦、其敏秀者銜於詞章、既皆不足以發明天理而見諸人事、於是言理者歸於老佛、而論事者驚於管商、則於理事之正反皆有以病焉而去道益遠矣。中間河洛之間、先生君子得其不傳之緒而推明之。然今不能百年、而學者又失其指。近歲乃幸得吾友敬夫焉、而天下之士乃有以知理之未始不該於事、而事之未始不根於理也。然又不

得盡其所爲而中道以沒、不有考焉以垂於世、吾懼<sup>①</sup>後之君子將有憾於吾徒也。熹之愚固不足以及此、然於共學輩流、偶獨後死、矧定叟之所以見屬者又如此、其何以辭。顧以疾病之不間、後五六年乃得考其事而叙之曰、公諱某、字敬夫、故丞相魏國忠獻公之嗣子也。生有異質、穎悟夙成、忠獻公愛之、自其幼學、而所以教者莫非忠孝仁義之實。既長、又命往從南嶽胡公仁仲先生問河南程氏學。先生一見、知其大器、即以所聞孔門論仁親切之指告之。公退而思、若有得也、以書質焉。而先生報之曰、聖門有人、吾道幸矣。公以是益自奮厲、直以古之聖賢自期、作希顏錄一篇、蚤夜觀省、以自警策。所造既深遠矣、而猶未敢自以爲足、則又取友四方、益務求其學之所未至。蓋玩索講評、踐行體驗、反覆不置者十有餘年、然後昔之所造深者益深、遠者益遠、而反以得乎簡易平實之地。其



於天下之理、蓋皆瞭然心目之間、而實有以見其不能已者。是以決之勇、行之力而守之固、其所以篤於君親、一於道義而沒世不忘者、初非有所勉慕而強爲也。少以蔭補右承務郎、辟宣撫司都督府書寫機宜文字、除直秘閣。是時天子新即位、慨然以奮伐仇虜、克復神州爲己任。忠獻公亦起謫籍、受重寄、開府治戎、參佐皆極一時之選。而公以藐然少年周旋其間、內贊密謀、外參庶務、其所綜畫、幕府諸人皆自以爲不及也。間以軍事入奏、始得見上、即進言曰、陛下上念宗社之讎耻、下閔中原之塗炭、惕然於中而思有以振之、臣謂此心之發、即天理之所存也。誠願益加省察而稽古親賢、以自輔焉、無使其或少息也、則不惟今日之功可以必成、而千古因循之弊亦庶乎其可革矣。上異其言、蓋於是始定君臣之契。已而忠獻公辭位去、用事者遂罷兵、與虜和。虜乘其隙、反縱兵入淮甸、

中外大震。然廟堂猶主和議、至勅諸將毋得以兵向虜。時忠獻公已即世、公不勝君親之念、甫畢藏事、即拜疏言、吾與虜人乃不共戴天之讎、向來朝廷雖亦嘗興縞素之師、然玉帛之使未嘗不行乎其間、是以講和之念未忘於胸中、而至誠惻怛之心無以感格乎天人之際。此所以事屢敗而功不成也。今雖重爲羣邪所誤、以蹙國而召寇、然亦安知非天欲以是開聖心哉。謂宜深察此理、使吾胸中了然、無纖芥之惑、然後明詔中外、公行賞罰、以快軍民之憤、則人心悅、士氣充、而虜不難卻矣。繼今以往、益堅此志、誓不言和、專務自強、雖折不撓、使此心純一、貫徹上下、則遲以歲月、亦何功之不成哉。疏入不報。後六年、始以補郡。臨遣、得復見上。時宰相雖以恢復之說自任、然所以求者類非其道。且妄意公素論當與己合、數遣人致慇懃。公不答。見上、首言、先王之治、所以建事立功、無不如志、

以其胸中之誠足以感格天人之心而與之無間也。今規畫雖勞而事功不立。陛下誠<sup>②</sup>深察之。日用之間、念慮云爲之際、亦有私意之發以害吾之誠者乎。有則克而去之、使吾中扃洞然、無所間雜、則見義必精、守義必固、而天人之應將不待求而得矣。夫欲復中原之地、當先有以得其百姓之心。欲得中原之心、當先有以得吾百姓之心。而求所以得吾民之心者、豈有它哉、不盡其力、不傷其財而已矣。今日之事、固當以明大義、正人心爲本。然其所施有先後、則其緩急不可以不詳、所務有名實、則其取舍不可以不審。此又明主所宜深察也。明年召還、宰相又方謂虜勢衰弱可圖、建遣泛使往責陵寢之故、士大夫有憂其無備而召兵者、皆斥去之。於是公見上、上曰、卿知虜中事乎。公對曰、不知也。上曰、虜中饑饉連年、盜賊四起。公又對曰、虜中之事臣雖不知、然境中之事則知之詳矣。上曰、

何事。公遂言曰、臣竊見比年諸道亦多水旱、民貧日甚、而國家兵弱財匱、官吏誕謾、不足倚仗。正使彼實可圖、臣懼我之未足以圖彼也。上爲默然久之。公因出所奏書讀之曰、臣竊謂陵寢隔絕、誠臣子不忍言之至痛。然今未能奉詞以討之、又不能正名以絕之、乃欲卑詞厚禮以求於彼、其於大義已爲未盡。而異論者猶以爲憂、則其昧陋畏怯又益甚矣。然臣竊揆其心意、其或者亦有以見我未必有必勝之形而不能不憂也歟。蓋必勝之形當在於蚤正素定之時、而不在兩陳決機之日。上爲竦聽、改容稱善。至于再三。公復讀曰、今日但當下哀痛之詔、明復讎之義、顯絕虜人、不與通使、然後修德立政、用賢養民、選將帥、練甲兵、通內修外、攘進戰退守以爲一事、且必治其實而不爲虛文、則必勝之形隱然可見。雖有淺陋畏怯之人、亦且奮躍而爭先矣。上爲嘆息褒諭、以爲前未始聞此論也。



其後又因賜對、反復前說、上益嘉歎、面諭當以卿爲講官、冀時得晤語也。時還朝末期歲、而召對至六七。公感上非常之遇、知無不言。大抵皆修身務學、畏天恤民、抑權倖、屏讒諛之意。至論復讎之義、則反復推明、所以爲名實之辨者益詳。於是宰相益憚公、而近倖尤不悅、遂合中外之力以排之、而公去國矣。蓋公自是退居三年、更歷兩鎮、雖不復得聞國論、而蚤夜孜孜、反身修德、愛民討軍、以俟國家扶義正名之舉、尤極懇至。於是天子益知公可用、嘗賜手書褒其忠實、蓋將復大用之、而公已病矣。病亟且死、猶手疏勸上以親君子、遠小人、信任防一己之偏、好惡公天下之理、以清四海、克固丕圖、若眷眷不能忘者。寫畢、緘付府僚、使驛上之。有頃而絕。嗚呼、靖康之變、國家之禍亂極矣。小大之臣、奮不顧身、以任其責者、蓋無幾人。而其承家之孝、許國之忠、判決之明、計慮之審、又未有如公

者。雖降命不長、不克卒就其業、然其志義偉然、死而後已、則質諸鬼神而不可誣也。始、公出幕府、即罹外艱、屏居舊廬、不交人事。會盜起郴、桂間、聲搖數路。湖南帥守劉公珙雅善公、時從訪問籌策、卒用以破賊。還朝、爲上極言公學行志業、非常人比。上亦記公議論本末、除知撫州。未上、改嚴州。到任、問民疾苦、首以丁鹽錢絹太重爲請、得蠲是歲半輸。召爲尙書吏部員外郎、兼權左右司侍立官。時廟堂方用史正志爲發運使、名爲均輸、而實但盡奪州郡財賦、以惑上聽、遠近騷然、人不自安。賢士大夫爭言其不可、而少得其要領者。公亦爲上言之。上曰、正志以爲今但取之諸郡、非取之於民也、何傷。公對曰、今日州郡財賦、大抵劫劫無餘、若取之不已、而經用有闕、則不過巧爲名色而取之於民耳。上聞之、矍然、顧謂公曰、論此事者多矣、未有能及此者。如卿之言、是朕假手於發運使、以病吾

民也。旋閱其實、果如公言、即詔罷之。兼侍講、除左司員外郎。經筵開、以詩入侍、因葛覃之篇以進、說曰、治常生於敬畏、亂常起於驕淫。使爲國者每念稼穡之勞、而其後妃不忘織紵之事、則心之不存者寡矣。周之先后勤儉如此、而其後世猶有以休蠶織而爲厲階者、興亡之效、於此見矣。既又推廣其言、上陳祖宗自家刑國之懿、下斥當時興利擾民之害、詳焉。上亦歎曰、此王安石所謂人言不足恤者、所以誤國事也。俄而詔以知閤門事張說簽書樞密院事、公夜草手疏、極言其不可、且詣宰相質責之、語甚切。宰相慚憤不堪、而上獨不以爲忤。親札疏尾付宰相、使諭指。公復奏曰、文武之勢、誠不可以太偏、然今欲左文右武、以均二柄、而所用乃得如此之人、非惟不足以服文吏之心、正恐反激武臣之怒也。於是上意感悟、命得中寢。然宰相實陰附說、明年乃出公知袁州、而申說前命、於是

中外謹誦、而說後竟謫死云。淳熙改元、公家居累年矣。上復念公、詔除舊職、知靜江府、經略安撫廣南西路。廣西去朝廷絕遠、諸州土曠民貧、常賦入不支出。故往時立法、諸州以漕司錢運鹽鬻之、而以其息什四爲州用、以是州得粗給而民無加賦。其後或乃奪取其息之半、則州不能盡運、而漕司又以歲額責其虛息、則高價抑賣之弊生而公私兩病矣。公始至、未及有爲、專務以訪求一道之利病爲事。既得其所以然者、則爲奏、以鹽息什三予諸郡。又因兼攝漕臺、出其所積緡錢四十萬而中分之一、以爲諸倉買鹽之本、一以爲諸州運鹽之費。奏請立法、自今漕司復有多取諸州、輒行抑賣、悉以違制議罪。其敢以資燕飲、供饋餉者、仍坐贓論。詔皆從之。所統州二十有五、遼夤荒殘、故多盜賊。徼外蠻夷俗尙讎殺、喜侵掠、間亦入塞爲暴。而州兵皆脆弱慵惰、又乏糧賜、死亡輒不復補。鄉落



保伍亦名存而實廢。邕管斗入群蠻中、最爲重地、而戍兵不能千人、獨恃左右江洞丁十餘萬爲藩蔽、而部選提舉巡檢官初不擇人。公知其弊、則又爲之簡閱州兵、汰冗補闕、籍諸州黥卒伉健者以爲效用、合親兵摧鋒等軍、日習而月按之。悉禁它役、視諸州猶有不足於糧賜若凡戈甲之費者、更斥漕司鹽本羨錢以佐之、申嚴保伍之令而信其賞罰。知流人沙世堅才勇、喻以討賊自效、所捕斬前後以十百數。又奏乞選辟邕州提舉巡檢官以撫洞丁、傳令溪洞酋豪、喻以弭怨睦鄰、愛惜人命、爲子孫長久安寧之計、毋得輒相虜掠、讎殺生事。而它所以立恩信、謹關防、示形制者、亦無不備。於是境內正清、方外柔服、幕府無南鄉之慮矣。朝廷買馬橫山、歲久弊積、邊氓告病而馬不時至、至者多道死。公究其利病、得凡六十餘條。如邕守上邊、則潯江有買船之擾、綱馬在道、則緣道有執牽之

勞。其或道死、則抑賣其肉、重爲鄰伍之患。是皆無益於馬而有害於人、首奏革之。其他如給納等量支券之姦、以至官校參司名次之弊、皆有以究其根穴而事爲之防。由是諸蠻感悅、爭以其善馬來、歲額率常先期以辦、而馬無滯留、人知愛惜、遂無復死道路者。上聞公治行、且未嘗叙年勞、乃詔特轉承事郎、進直寶文閣再任。五年、除祕閣修撰、荆湖北路轉運副使、改知江陵府、安撫本路。湖北尤多盜、州縣不以爲意、更共縱釋、以病良民。公入境、首劾大吏之縱賊者罷之、捕姦民之舍賊者斬之、群盜破膽、相率遁去。公又益爲條教、喻以利害、俾知革心、開其黨與、得相捕告以除罪。其餘禁令方略、大率如廣西時。於是一路肅清、善良始有安居之樂。郡去北邊不遠、雖頗有分屯大軍、而主兵官率常與帥守不相中。帥守所將獨神勁親兵及義勇民兵若干人、比年亦廢簡閱、不足恃。公旣以禮



遇諸將、得其驩心、而所以恤其士伍之私者亦無不至。於是將士感悅、相戒無輒犯公令。每按親兵、必使與大軍雜試、以相激厲。均犒賞、修義勇法、使從縣道階級、喻以農隙閱習武事、以俟不時按驗、而加賞罰焉。其後團教、則又面加慰諭、勉以忠義、而教以敦睦。首領有捕盜者、爲奏補官。由是戎政日修、而士心亦益感奮。會有獻言於朝、請盡籍客戶爲義勇者。公慮惑民聽、且致流亡、亟取丁籍閱之、命一戶而三丁者乃籍其一、以爲義勇副軍、別置總首、人給一弩、俾家習之。三歲一遣官就按、它悉無有所與。且爲奏言、所以不可盡取之故、闔境賴焉。辰、沅諸州自政和間、奪民田募游惰、號刀弩手、蓋欲以控制諸蠻、而實不可用。中廢復修、議者多不以爲便。詔與諸司平處列上。公爲奏去其病民罔上者數條、詔皆施行。人亦便之。並准姦民出塞爲盜、法皆處死。異時官吏多蔽匿弗治、至是捕

得數人、仍有胡奴在黨中。公曰、朝廷未能正名討賊、則疆場之事不宜使數負吾曲。命斬之、以徇於境、而縛其亡奴歸之。北人歎其理直、且曰、南朝於是爲有人矣。信陽守劉大辯者、婺州人也、怙勢希賞、誘致流民而奪見戶熟田、以與之一郡洶洶。公爲遣吏平章、乃定。及是聞北人逐盜有近淮者、則又虛驚、夜棄城郭、盡室南走數十里、軍民復大擾。公方劾奏之、而朝廷用大辯請、以見戶荒田授流民。事下本道、施行如章。公復奏曰、陛下幸哀邊民、前詔占田已墾者不復通檢、其未墾者二年不墾、乃收爲營田、德至渥也。今未及期、而大辯不務奉承宣布、反設詐誣、虧國大信、以濟凶虐。且所招流民不滿百數、而虛奏且十倍。請并下前奏、論罪如法。章累上、大辯猶得易它郡以去。蓋方是時、上所以知公者愈深、而惡公者忌之亦愈力。公自以不得其職、數求去不得、尋以病請、乃得之。然比詔下、



以公爲右文殿修撰、提舉武夷山冲佑觀、則已不及拜矣。卒時年四十有八。柩出江陵、老稚挽車號慟、數十里不絕。訃聞、上亦深爲嗟悼。四方賢士大夫往往出涕相弔、而靜江之人哭之尤哀。蓋公爲人坦蕩明白、表裏洞然、詣理既精、信道又篤、其樂於聞過而勇於徙義、則又奮厲明決、無豪髮滯吝意。以至疾病垂死而口不絕吟於天理人欲之間、則平日可知也。故其德日新、業日廣、而所以見於論說行事之間者、上下信之至於如此。雖小人以其好惡之私、或能壅害於一時、然至於公論之久長、蓋亦莫得而揜之也。公之教人、必使之先有以察乎義利之間、而後明理居敬、以造其極。其剖析開明、傾倒切至、必竭兩端而後已。所爲郡必葺其學於靜江、又特盛暇日召諸生告語不倦。民以事至廷中者、亦必隨事教戒、而於孝弟忠信、睦婣任恤之意尤孜孜焉。猶慮其未徧也、則又刻文以開

曉之。至於喪葬嫁娶之法、風土習俗之弊、亦列其事以爲戒。命閭井各推耆宿、使爲鄉老、授之夏楚、使以所下條教訓厲其子弟、不變然後言之。有司而加法刑焉。在廣西、刑獄使者陸濟之子棄家爲浮屠、聞父死不奔喪、爲移諸路、俾執拘以付其家。官吏有犯名教者、皆斥遣之、甚或奏劾抵罪。尤惡世俗鬼神老佛之說、所至必屏絕之。蓋所毀淫祠前後以百數、而獨於社稷山川、古先聖賢之奉爲兢兢、雖法令所無、亦以義起。其水旱禱祠、無不應也。平生所著書、唯論語說最後出、而洙泗言仁、諸葛忠武侯傳爲成書。其它如書、詩、孟子、太極圖說、經世編年之屬、則猶欲稍更定焉而未及也。然其提綱挈領、所以開悟後學、使不迷於所鄉、其功則已多矣。蓋其常言有曰、學莫先於義利之辨、而義也者、本心之所當爲而不能自己、非有所爲而爲之者也。一有所爲而後爲之、則皆人欲之私、而非

天理之所存矣。嗚呼、至哉言也。其亦可謂擴前聖之所未發、而同於性善養氣之功者歟。公之州里世系已見於忠獻公之碑、此不著。其配曰宇文氏、朝散大夫師中之女、事舅姑以孝聞、佐君子無違德、封安人前卒。子焯承奉<sup>⑤</sup>。郎亦蚤世。二女長適五峰先生之子胡大時、次未行而卒。孫某某尙幼。後數年、胡氏女與某亦皆夭。嗚呼、敬夫已矣。吾尙忍銘吾友也哉。銘曰、

闕尹之忠、文子之清。匪欲之徇、而仁弗稱。孰的孰張、以詔後學。公乘厥機、如寐斯覺。自時厥後、動罔弗欽。孝承考志、忠格天心。唯孝唯忠、惟一其義。惟命有嚴、豈曰爲利。群邪肆誕、公避而歸。兩鎮餘功、以德爲威。帝曰懷哉、汝忠而實。姑訖外庸、來輔來拂。上天甚神、曷監而遺。彼頑弗夭、此哲而萎。往昔茫茫、來今不盡。求仁得仁、公則奚恨。

朱熹撰 《晦庵先生朱文公文集》卷八九

張左司傳

張栻字敬夫。父浚、故右僕射、魏國忠獻公也。生有異質、穎悟夙成、浚愛之、自幼常令在旁、教以忠孝仁義之實。既長、又命往從南嶽胡宏講求程顥及頤<sup>⑥</sup>之學。宏告以孔門論仁之指、栻默然若有得者、宏稱之曰、聖門有人矣。栻益自奮厲、取友四方。初造深遠、卒歸乎平易篤實。少以蔭補右承務郎、辟宣撫司都督府書寫機宜文字、除直秘閣。是時上新即位、慨然以奮伐仇虜、克復神州爲己任。浚起謫籍、受重寄、開府治戎、參佐皆極一時之選。而栻以藐然少年、內贊密謀、外參庶務、莫府諸人皆自以爲不及。間以軍事入奏、始得見上、即進言曰、陛下上念宗社之讎耻、下閔中原之塗炭、惕然於中、而思有以振之、臣謂此心之發、即天理也。願益加省察、而稽古親賢以自輔、無使其少息、則今日之功可以必成。上異其言、於是始定君臣之契。已而



浚辭位去、湯思退用事、遂罷兵與虜和。虜乘隙縱兵入淮甸、中外大震。然廟堂猶主和議、至敕諸將無得以兵向虜。時浚已沒、栻不勝君親之念、甫襄事、即拜疏言、吾與虜乃不共戴天之讎、異時朝廷雖嘗興縞素之師、然旋遣玉帛之使、講和之念未忘於胸中。故至誠惻怛之心、無以感格乎天人之際、此所以事屢敗也。今雖重爲群邪所誤、以蹙國而召寇、然亦安知非天以是開聖心哉。謂宜深察此理、使吾胸中了然、無纖芥之惑、然後明詔中外、公行賞罰、以快軍民之憤、則人心悅、士氣充、而虜不難卻矣。繼今以往、益堅此志、誓不言和、專務自彊、雖折不撓、使此心純一、貫徹上下、則遲以歲月、亦何功之不成哉。疏入不報。服除、久之、劉珙薦於上、上亦記其前日議論、除知撫州。未上、改嚴州。入奏、時宰相自任以恢復之說、且謂栻素論當與己合、數遣人致意、栻不答。見上、首言、先王所以建事

立功無不如志者、以其胸中之誠足以感格天人之心也。今規畫雖勞、而事功不立。陛下試深察之日用之間、念慮云爲之際、亦有私意之發、以害吾胸中之誠者乎。有則克而去之、使吾中<sub>○</sub>局洞然、無所間雜、則見義必精、守義必固、天人之應將不待求而得矣。且欲復中原之地、當先有以得中原之心、欲得中原之心、當先有以得吾民之心。求所以得吾民之心者、無他不盡其力、不傷其財而已。至郡、問民疾苦<sub>○</sub>。首以丁鹽絹錢太重爲請、得蠲是歲之半。明年、召爲吏部員外郎、兼權起居郎。時宰相謂虜衰可圖、建遣泛使往請陵寢、士大夫有憂其無備而召敵者、皆斥去之。於是栻見上、上曰、卿知虜中事乎。栻對曰、不知也。上曰、虜中饑饉、連年盜賊四起。栻又對曰、虜中之事、臣雖不知、然境內之事、則知之詳矣。上曰、何事。栻遂言曰、臣竊見比年諸道亦多水旱、民貧日甚、而國家兵弱財匱、官吏

誕謾不足賴。正使彼實可圖。臣懼我之未足以圖彼也。上爲默然。栻因出所奏疏曰。臣竊謂陵寢隔絕。言之至痛。然今未能奉辭以討之。又不能正名以絕之。乃欲卑詞厚禮以求於彼。則於大義爲已乖。而度之事勢。我亦未有必勝之形。夫必勝之形。當在於早正素定之時。而不在於兩陳決機之日。今日但當下哀痛之詔。明復讎之義。顯絕虜人。不與通使。然後修德立政。用賢養民。選將帥。練甲兵。以內修外攘。進戰退守之事通而爲一。且必治其實而不爲虛文。則必勝之形隱然可見矣。上爲改容歎息。以爲前未始聞此論也。上面諭。當以爲講官。冀時得晤語。廟堂用史正志爲發運使。名爲均輸。實盡奪州縣財賦。遠近騷然。栻爲上言之。上曰。正志以爲今但取之諸郡。非取之於民。對曰。今日州郡財賦大抵無餘。若取之不已。而經用有闕。則不過巧爲之名以取之於民耳。上聞之。矍然。顧栻

曰。論此事者多矣。未有能及此者。如卿之言。是朕假手於發運使以病吾民也。旋閱其實。果如栻言。即詔罷之。兼侍講。除左司員外郎。因講詩至葛覃。進說。治生於敬畏。亂起於驕淫。使爲國者每念稼穡之勞。而其後妃不忘織紵之事。則心之不存者寡矣。周之先后勤儉如此。而其後世猶有休蠶織而爲厲階者。興亡之效於此可見。因推廣其言。上陳祖宗自家刑國之懿。下斥今日興利擾民之害。上歎曰。此王安石所謂人言不足卹者。所以誤國。知閣門事張說除僉書樞密院事。栻夜草手疏。極言其不可。且詣宰相質責之。語甚切。宰相慚憤不堪。而上獨不以爲忤。親札疏尾付宰相。使諭指。栻復奏曰。文武誠不可偏。然今欲右武以均二柄。而所用乃得如此之人。非惟不足以服文吏之心。正恐反激武臣之怒。於是上意感悟。命得中寢。明年乃出栻知袁州。而申說前命。於是中外誼譁。而說

後竟謫死云。栻在朝末期歲而召對六七、栻感上非常之遇、知無不言、大抵皆修身務學、畏天恤民、抑僥倖、屏讒諛之意。宰相益憚之、從臣有忌之者、而近倖尤不悅、遂合中外之力以排去之。栻退居長沙、待次三年。淳熙改元、上復念栻、詔除舊職、改知靜江府、經略安撫廣南西路。廣西去朝廷絕遠、土曠民貧、常賦不支、異時諸州以漕司錢運鹽鬻之、而以其息什四爲州用、故州粗給、而民無加賦。其後漕司又取其半、州旣不能盡運、而漕司又以歲之常責其虛息、於是官高其估、抑賣於民、而公私兩病矣。栻奏以鹽息什三予諸郡。又因兼攝漕事、出其所積緡錢四十萬而中分之一、爲諸倉煮鹽之本、一爲諸州運鹽之費。請立法、自今漕司敢有多取、諸州輒行抑賣者、論以違制。敢以資宴飲、供問遺者、論以贓。詔從之。所統州二十有五、荒殘多盜、徼外群蠻尙讎殺、喜侵掠、間亦入塞爲暴。而

州兵皆脆惰、又乏廩給、死亡不補、鄉有保伍、名存實亡。邕管斗入蠻中、最爲重地、而戍兵不能千人、獨恃左右江洞丁十餘萬爲藩蔽、而吏部以資格注提舉、巡檢官、初不擇人。栻乃簡閱州兵、汰冗補闕、籍諸州黥卒伉健者爲效用、令親兵、摧鋒等軍日習月按、悉禁他役。視諸州有兵食不足、軍實不治者、更斥漕司鹽本羨錢以佐之。申嚴保伍之令、而信其賞罰。知流人沙世堅才勇、喻以討賊自效、所捕斬前後以十百數。又奏乞選辟邕州提舉巡檢官以撫洞丁。傳令溪洞酋豪、喻以弭怨睦鄰、毋相殺掠、立之恩信、謹其禁防、示以形制。於是內寧外服、莫府無南鄉之慮。朝廷買馬橫山、歲久弊滋、邊氓告病、而馬不時至、至者多道死。栻究其利病、得六十餘條、如邕守上邊則瀕江有買船之擾、綱馬在道則所過有執牽之勞、其或道死則抑賣其肉、首奏革之。其他姦弊細碎、皆究其根穴、事爲之



防。諸蠻感悅，爭以其善馬來，歲額先辦，馬無滯留，亦無道死。上聞栻治行，且未嘗叙年勞，乃詔特轉承事郎、直寶文閣，再任。五年，除秘閣修撰、荆湖北路轉運副使，改知江陵府，安撫本路。湖北尤多盜，而府縣往往縱釋以病良民。栻入境，首劾大吏之縱賊者，罷之。捕姦民之舍賊者，斬之。群盜遁去。栻又益爲教條，喻以利害，俾知革心。開其黨與，得相捕告以除罪。於是，一路肅清。郡瀕邊，屯軍，主將每與帥守不相下。帥守所將獨神勁親兵、親勇民兵。栻旣以禮遇諸將，得其驩心，而又加卹士伍，於是將士感悅。每按親兵，必使與大軍雜試，均犒，以相激厲。修義勇法，使從縣道階級。農隙肄武，大閱於府，面加慰諭，勉以忠義。隊長有功，奏之補官。戎政日修，士心感奮。有言於朝，請盡籍客戶爲義勇者，栻慮其擾，亟閱民籍，家三人者，乃籍其一爲義勇副軍。別置總首，人給一弩，俾家習之。三歲一遣官

就按，他悉無有所與。辰、沅諸州自政和間奪民田以募游惰，號刀弩手。栻爲奏去其病民罔上者數條，並準姦民出塞爲盜法，皆抵死。異時置而弗治，至是捕得數人，仍有胡奴在黨中。栻曰：「朝廷未能正名討賊，疆場之事，毋曲在我。」命斬之以徇於境，而縛其亡奴歸之。北人歎其理直。且曰：「南朝有人。」信陽守劉大辯怙勢希賞，廣招流民而奪見戶熟田以與之。請於朝以熟爲荒，乞授流民。事下本道施行如章。栻劾大辯詐諉凶虐，所招流民不滿百數，而虛奏十倍。請論其罪，不報。章累上，大<sup>⑩</sup>辯易他郡。蓋宰相忌栻者，沮之云。栻自以不得其職，數求去不得。尋以病請，詔以栻爲右文殿修撰，提舉武夷山冲佑觀，未拜命而卒。病且死，手疏勸上親君子，遠小人，信任防一己之偏，好惡公天下之理，以清四海，以固丕圖。天下誦之。年四十有八。上深悼之，四方賢士大夫往往出涕相弔。而江陵、靜江之



彭元亨墓誌銘

民皆哭之哀。栻爲人坦蕩明白、表裏洞然、詣理精、信道篤、樂於聞過、勇於徙義、奮厲明決、無毫髮滯吝意。所至郡必葺其學校、暇日召諸生、與之講學不倦。民以事至廷中者、必隨事教以孝弟忠信。至於昏喪之法、風俗之弊、具<sup>①</sup>爲條教、擇耆艾爲鄉老、授之夏<sup>②</sup>。楚使以條教訓其子弟、不變然後言之有司。廣西刑獄使者陸濟之子棄家爲浮屠、父死不奔喪、爲移諸路、俾執以付其家。官吏有犯名教者、皆斥遣、甚者或奏劾抵罪。尤惡世俗鬼神老佛之說、所至必屏絕之、毀淫祠前後百數。至社稷山川、古先聖賢之奉、則兢兢焉。其水旱禱祠、無不應者。所著論語說、洙泗言仁、諸葛忠武侯傳、皆成書、其他如詩、書、孟子、太極圖說、經世編年、皆未及更定云。栻之言曰、學莫先於義利之辨、義者本心之所當爲而爲也、有爲而爲、則皆人欲、非天理。此栻講學所得之要也。子焯承奉郎蚤卒。

慶元改元正月辛亥、安福彭君以疾不起、卜明年十二月庚申葬縣南十里某鄉某原。前兩月、其子經衰經踵門、出左司員外郎李君謙書一通、及太學博士湯君璫所狀行實、以銘爲請。左司<sup>③</sup>之言曰、淳熙乙巳、某尉安福、聞彭君樂易信於鄉里、會歲大祲、郡督勸分、君產中下、首發廩爲倡、乃克有濟。某以是嘉其人、授以著作郎呂君祖謙辨志一編、蓋自洒掃應對推以應物、細行之矜、達於大德、凡前言往行次第畢載。彭君受而服膺焉、傳之副墨、又求名儒達官敷繹之、早夜力行不敢怠。向善如力耕、避惡如遠臭。嗇於自奉、豐於周急。年六十三以沒、其身動無過舉、願有以表其竊。予惟左司介而誠、博士賢而文、皆可取信、宜爲之銘。君諱元亨、字文昌、其先自九江徙居吉州之安福縣。曾祖朝



祖承裕。父知微。勤儉好施。邑人以長者稱之。君世其業。性尤孝謹。父病篤。禱於神。乞損己壽以益親。父尋愈。事嫠姑如事母。家庭熙然。待制楊公萬里。榜其書樓曰春風。興以新詩。工部謝尙書謬亦賦焉。平生著述盈篋。今彙次藏於家。娶同郡歐陽氏。前三年沒。子男四人。經顯綱繼。女三人。鄉貢進士歐陽成務。劉淙。歐陽好仁。其壻也。孫男七人。龜年。耆年。保年。康年。益年。彌年。壽年。女孫七人。嗟乎。秉彝好德。誰無是心。惟能欣慕師友之淵源。推廣其所未至。斯足爲一鄉之善士矣。君之可銘不在茲乎。故予銘曰。

噫彭君。信所聞。善可爲。志則勤。生無玷。沒有名。永其傳。在斯文。

周必大撰 《平園續稿》卷三二

劉靖君墓誌銘

劉靖君。名愚。字必明。太學釋褐。教授江陵府。外遷

安鄉令。乞致仕。嘉定八年正月十二日卒。明年二月某日。葬城北仁塘原。君行己恭。與人敬。節堅而志厲。學必是古。尤邃講說。能自淺入深。荆人聞者。欣朗開達。將校改服以聽。在安鄉。慈允得民和。旁縣自占。季年再倍。夫由果。求藝皆通方之材。非以儒自局也。始君甚幼。家零落。待我而衣食。父死。伯不弔。疑將祔於祖。一夕輦其柩他山。哀呼僵踣。幾不活者數焉。遂羸毀終身。入太學。凡三中上舍。積歲月。始升名。比脫紵袍。五十餘矣。憂患之味。早視衆所甘。殆若辛螫。余丞相素知君。至是且召用。澧守蘇若霍。諸司楊。呂。范。又爭薦君。然自謂逾六十矣。髮墮齒折。何以驅馳一世。竟捨去不顧。買宅城南。四無垣塹。蕭艾數尺。嘗展卷長哦。醺酒薄羹。盎如也。垂二十年至八十三而終。郡人高其行。無不歎惜。觀文殿學士何公率嘗同舍。故學徒共諡曰靖君。明其無競之德。可宗於時。沒有以思。存有以



儒藏

勸也。舍法者、館學之地也、以經任爲限、蓋有委心

歸計於未滿之先矣、未有滅跡絕影於既滿之後

也。作邑者、要路之儲也、以改官爲急、蓋有因緣屬

託於破白之初矣、未有逡巡退卻於及格之際也。

雖然、道遠俗散、而天下無肥遯之士、流風所扇、既

莫不然而君、豈異於人哉。惟尙往於招徠之不豫、

故謂之知恥。迎受於筋力之當衰、故謂之知命。此

君之所以自安於古人、而今人以爲不及也。君之

九世祖曰存、以上柱國自建徙衢、爲龍游人、號江

潭劉。傳緒至君、雖宦未顯、而德皆餘於隱矣。兩娶

徐氏、又繼以留氏。子曰克、曰凡、曰凡。女嫁進士應

彌明。孫四人、女孫二人。銘曰、

量人而退、非曰自晦。量已而止、亦其常理。有或爲

之、有或不能。是名靖君、于後之稱。

嘉定八年十月□日。

葉適撰 《水心文集》卷二一

祝刪定墓誌銘

乾道某年某月、以眞州教授祝櫟爲勅令刪定官。初、金人旣渝盟、孝宗皇帝銳意北討、故相張忠獻公出護諸將、戰小不利、在廷臣群起訐之、上意亦疑。侍御史王公十朋力爭不能得、改吏部侍郎、不拜、出守饒州、明年又移守夔州。士論喧然、謂王公當世正人、朝廷宜以自近、奈何擯之遠方。祝公時爲天府掾、則具以所聞告於殿中侍御史章服、右司諫陳叔達、且曰、二公居天子耳目地、嘿嘿無一語、如天下清議何。章怒、謂公陰黨張、王、奏乞重加貶絀、有旨勒停。然公與二公初未嘗一覲面也。既廢五年、泊然亡仕進意。會陳申公相、始復公故秩、分教儀眞。居亡何、虞雍公相、又擢眞勅局。人謂公久扼甫伸、當深懲前事、務晦嘿爲自全計。時樞密副都承旨張說簽書本院事、朝論蠡起、皆歸責於虞公。公又具以所聞告、且深陳前代戚里用事之

禍、虞公慙然有悔色。語浸傳、說大忿恨、丞相亦疑公賣己取直名、對客及之。公不自安、求補外、弗許、再乞祠、又不許、乞致仕、又不許、遂請急省親疾於三衢。說因機撼公、坐禡兩官勒停。居數年、說果敗、奪節度使、竄流以死。上益知公、命主管建昌軍仙都觀。明年、趙衛公相、首白公事上前、又命起家爲二千石。嗚呼。若公者、其可謂信道篤而用志勇者與。士方平居抗論、孰不慕正直而恥佞諛、一旦身履得喪之衝、逡巡顧望、失其素守者有矣。或雖勉一鳴、坐斥以去、迨其復用、則低回泯嘿、自同寒蟬者有矣。公以區區一府僚、引大義以責宰相、忤寵臣、眦追禡削奪之禍如亡有、非其取舍定於中而寵辱遺乎外、其能蹈道弗悔如是耶。雖然、使公遇非其可、則忠而獲枉名、直而取訐禍、其能自明者鮮矣。況求其能自伸者乎。而前後兩貶官、不旋踵輒復收用、迅雷激電、曾未終晷、慶雲瑞日、已即

盎然。此孝宗皇帝之心、所以與天地同其大也。故因論次公事、竊有感於乾道、淳熙之盛云。公字汝昭。自晉九江太守、巡封國信安、由兗徙食、遂爲西安人。七世祖烏、家於郡南二十里沙步村。曾祖某、以文名成均、不幸早世。祖某、少孤自立、急誼樂施、爲鄉里所稱、以孝義勤儉戒諸子、曰守此四行、可以立身矣。父某、性友悌、篤於義方、贈通議大夫、公其長子也。幼警悟、不群、少長、肆力於學、登紹興甲戌進士第、調新建尉、藉藉有能聲。捕盜如律、當更選、辭不就、再調臨安府錄事參軍。有劉捨兒者、聚群惡少、日酣飲、爲狂不遜語、邏者以聞、下府屬吏、法當悉坐誅。公謂以醉飽語言殺人、非盛世事、請坐其首、餘以註誤決遣。府尹懼不敢從、公徑以白御史晁公武。晁是之、亟以公語告上、詔止僇其首一人、餘皆從公請。既坐前事斥、人有勉之進者、公曰、仕止久速、命也。吾復奚求。即城南廣利僧舍修



篁老木間、誅茅結屋、日繙書其中。時晦菴、南軒、東萊三先生倡道東南、公書問還往亡虛月、所講切皆學問大原與經世切務。既起爲勅局官、旋特命改秩、人謂公且用矣、尋復坐張說斥。故事、刪定官起廢爲貳不爲守、公之復起也、上特命知信陽軍。信陽並邊孤壘、地犬牙入虜境、中興後捐租絜予民、賴以蘇息。至是版曹欲起輸、公不俟對、先馳書廟堂、爭其不可。及造闕、屢詣東閣門、輒引卻。改添差湖北安撫司參議官。秩滿、丐閒、上獨識其姓名、曰、是久棄者、朕念之、宜與近次郡。遂知吉州。諫官陳賈以舊事詆公、改荆門軍、辭、主管仙都觀。知汀州、汀俗素慄悍、有官黃三者屢殺人、不就執、至是贅聚幾千人。公曰、玩寇弗誅、何以爲郡。然官軍素脆、不足以賴、則易使豪民、諭圖之。有楊彬者願自效、因授以計畫、俄生獲官黃三。公聞於朝、請誅之以警後、而命楊彬以官。帥怒不先白己、誣公不受。

令、且害彬功。朝廷知汀事本末、察帥誣、竟官彬承節郎、公賴以免。盜既平、悉蠲下三等逋賦、出所積代其輸。除潼川府路提點刑獄公事。入對、言以正心術爲修身之本、別賢佞爲立國之本、逐貪賊爲愛民之本、上嘉納。至鄂、以疾請祠、改主管建寧府武夷山冲祐觀。明年、起公提舉江東常平。未拜疾浸棘、命諸子前、訓以居官當先廉退、處家務崇儉約。紹熙辛亥三月朔、終於家、年五十有九。積官朝散郎。公爲人堅正有大節、遇事敢言、與人交落落不苟合、以故知公者少。媚疾者多、賴遭值聖明、屢貶輒奮。晚年付以蜀節、蓋將駸駸鄉用、而疾乘之、命也夫。公之學以中庸、大學爲宗、以濂洛諸先生之言爲法、居官玉雪自持、終其身。寄家浮屠氏、囊楮蕭然、惟圖書充牣而已。娶趙氏、贈安人。繼毛氏、封安人。三子某、今爲某官、慶澤、慶流。四女、某官折思齊、某官魏泌、又某人、其壻也。孫某某。某年某月、

葬公於耿山之原。某自兒時熟公名、寶慶初元、孝  
穎來主浦城簿、始得公弟吏部郎所爲行述讀之。  
吏部諱禹珪、亦端直士、其言可信不誣。孝穎屬予  
誌其墓、辭弗獲、廼爲之銘曰、

巍巍祝公、允毅且仁。直道而行、孰識其真。獨知公  
者、以爲當今之古人。有崇茲山、是維其墓。清風如  
存、過者必下。

真德秀撰 《西山文集》卷四三

承事郎致仕潘公墓誌銘

維潘氏世居括蒼之竹溪、已號著姓、後徙金華、益  
爲聞家。君之曾大父諱某、贈右朝議大夫。大父諱  
某、始以儒學起家、仕至左朝奉大夫。父某、以右朝  
散郎致仕、累贈太中大夫。君諱景憲、字叔度。幼穎  
悟、日誦數萬言。年九歲、以童子貢京師、通念十三  
書、說六經大義、作三體字、詔許特試禮部、且賜束  
帛。後入太學、益自刻厲、一時學官如汪公應辰、芮

公燁、王公十朋皆推重焉。擢隆興元年進士第、調  
荆門軍學教授。不行、請爲南嶽祠官。秩滿、宰相知  
君之賢、欲留以爲中都官。君獨力請太平州學教  
授、遠次以歸。宰相問其故、君曰、本無宦情、以汲汲  
於一官、政欲以慰親望耳。今二親俱老、得遠次尙  
可、日從容於其側、它非所望。宰相歎息、以爲不可  
及。君與東萊呂祖謙、伯恭父同年、而齒長、聞其論  
說、行身探道之意、慨然感悟、遂棄所學而學焉。既  
而遭太中公之喪、廬於墓者三年、毀瘠骨立、未嘗  
見齒、寢興食飲皆以古禮爲節。服除、遂不復仕。日  
遊呂氏之門、躬執弟子之禮、誦詩讀書、旁貫史氏、  
下至于茲、靡不該覽、而尤於程氏之易爲盡心焉。  
至它書史、考訂蒐輯、日有程課。鉛黃朱墨、未嘗去  
手。爲人峭直耿介、與世俗少所合。而事親從兄、友  
愛諸弟、怡愉肅穆、人無間言。家本富樂、躬率儉素、  
布衣蔬食、一室翛然。其枯槁淡薄、有人所不可堪



者而君處之甚安。以是中外化服，不敢爲纖芥浮靡事。族黨皆慕尙之，而君自視欲然，常若不足也。始嘗學浮屠說，旣而學於呂氏。晚再悼亡，因葬金華之葉山，而虛其中以自處。築室其旁，取朝聞夕死之意，命之曰可菴。暇日往而遊焉，復取舊書讀之，悠然自得，不知儒釋之有間也。買田儲書，以待四方之學者。又嘗取建寧社倉法，出私穀數百斛，歲時歛散。自葉山以至太中公故居大墓之下，各爲一社，期歲廣之，及九而止。予嘗爲記其事，然亦未及盡如其志也。君旣無當世之願，士友知其心者，如韓尙書元吉、張左司栻、曾卿逢、鄭卿伯熊，皆愛敬之，而不敢有推挽意。獨曾侍郎逮嘗引以自代。頃年，諸大夫薦天下士之賢者三十餘人於周丞相，君姓名亦在數中。而丞相不能用，蓋諸公或未始識君，而君亦漠然無所問。人或扣之，乃獨喟然以曾、鄭兩卿爲知己，人莫測其意也。紹熙庚戌，

君之子自覺以進士試禮部中選。君聞之曰：「此足以代我矣。」即自列於有司，請致其事。遂請得改京秩。命甫下，而君已卒矣。是歲六月己亥也。君先娶邢氏，故龍泉主簿邦直之女。繼室朱氏，其父翌新，仲紹興間爲中書舍人。子男二人，長即自覺，其次自晦。女三人，長適朱塾，次適蘇彪，次適邢文郁。孫男二，曰問學、問禮。蓋自覺嘗調蕭山主簿，而彪今爲臨海主簿。君卒時年五十七，病不伏枕，比終，猶歛襟端坐而沒。語未嘗及其私也。自覺將以十月丁酉葬君葉山之藏，而以書來屬予銘。予始因伯恭父以識君，志同氣合，遂結婚姻之好。往年以江西使事入奏，舟過蘭溪，蘭溪距金華不百里，金華親故往往來相勞問。獨君以書來曰：「甚願一見，以慰離索。」然子今日之行，名爲召客，吾是以不果來也。比以口語罷歸，君又以詩來，若曰：「子今幾過七里灘矣，可以已乎。其未耶。」予不能答，而嘗以是愧



其爲人、乃爲之銘。銘曰、

介剛之節、爲世玉雪。退省其私、敬順怡悅。卻掃耽書、貶身訪道。忘食與憂、以遂于老。昔本不出、今復何歸。異世同心、子平孝威。葉山之陽、上盈下坎。我銘不亡、君則奚憾。

朱熹撰 《晦庵先生朱文公文集》卷九三。

校記

①懼：原作「恐」，據宋浙江刊本《晦庵先生文集》改。

②誠：疑當作「試」。

③州：原作「非」，據右引改。

④場：原作「場」，據右引改。

⑤奉：清賀瑞麟《朱子文集正訛》改作「事」。

⑥頤：原作「顧」，據四庫本《誠齋集》改。

⑦中：原脫，據右引補。

⑧苦：原作「若」，據右引改。

⑨巧：原作「功」，據右引改。

⑩大：原作「天」，據右引改。

⑪具：原作「且」，據右引改。

⑫夏：原作「憂」，據右引改。

⑬司：原作「君」，據四庫本《文忠集》改。

⑭壽：原缺，據右引補。

⑮虜：原作「敵」，據正德本《西山先生真文忠公文集》

改。

⑩ 絜予：原作「稅于」，據右引改。



儒藏

宋儒碑傳集 卷一三六

宋儒碑傳集卷一百三十七

薛季宣

右奉議郎新權發遣常州借紫薛公行狀

曾祖庠、皇不仕。祖強立、皇任江寧府觀察推官、累贈左光祿大夫。父徽言、皇任起居舍人。公諱季宣、字士龍、姓薛氏。其先世家河東、後徙福之長溪廉村。至唐補闕令之後、又自廉村徙永嘉。而光祿公始顯、四子、司封郎中嘉言、敷文閣待制弼及舍人、皆第進士、昌言爲婺州通判。舍人從胡文定先生學、以丞相趙公鼎薦仕于朝。秦公檜相、定和議、舍人廷爭移晷、中寒疾以卒。母胡氏安人、後十三日亦卒。公六歲而孤、撫于待制伯父、長任以官。公從待制宦游四方、尙及見故老、聞建炎、紹興初將相大臣趙、張、韓、岳諸公事、有當世志、而樂道其人。年十七、荆南安撫孫汝翼辟書寫機宜文字。孫氏藏書多、公一意講說紬繹、絕不治科舉業。有隱君子

袁溉道潔、少學於河南程先生、聞蜀薛叟名、求得之道、潔繙六經諸史以觀、叟笑曰、子學博而寡要。其相授受嚴約蓋如此。湖湘間皆高仰道潔、公師事焉。繇是益務自斂制充養。蜀制置蕭振辟公爲屬部將、有狠訴統制者、公當以犯階級法、幕中或論縱之、公以軍政爭不克、謝去。盡其祿直、買蜀書以歸。爲鄂州武昌令。故太尉劉公錡鎮鄂渚、公論武昌形勢直淮蔡、今見戶三千五百、弓級財五十人、土軍十有九人、宜早爲備。因陳屯田分戍保伍以寬民力之策。會有旨營田、一卒二十畝、縣官盡征之。公告鄂守宋似孫曰、是非漢屯田之謂。漢兵民也、使之就田、豈曰不可。今非惰游不從軍、彼不素知田家事、驅之緣畝、必不樂。曩時王彥營田湖外、遣二十將、潰者十有八、而況盡征之乎。且齊民在野、環營以軍、殆必爭利。成閔益戍夏口、公曰、宜戍武昌、備申、蔣。故樞密使汪公澈宣諭江淮、公



上書言、自權臣執國柄、士氣索然。趙、張之放、莫敢  
尙德。岳飛之死、莫敢趨功。今卒有意外之虞、誰其  
禦之。因論邊事甚悉。及營田宜亟罷。歲餘、虜犯襄  
陽、而還兵圍蔣甚急。汪公問策安出。公白以蔡要  
害、得蔡、則蔣圍自解。成閔克蔡、蔣兵果遁。於是虜  
東道軍傳①。合肥王權退次柘臯、李顯忠②亦不利、  
卻成閔東爲援。公又白、蔡不可失、若乘勝拔潁昌、  
道陳、汝直趨大梁、則廬兵不戰可屈。捨蔡援廬、是  
棄投機之會、爲連鷄之棲、淮沔虛矣。又曰、虜空國  
來寇、苻③秦故計也。今我不可復戰、惟當畫江固守、  
而以奇兵遮擊脊④尾。阻前顧後、勢且自沮。輿尸一  
決、其禍必大。初、公試邑、年甚少、方天下無事、豫陳  
邊備、諸公唯唯未遑也。居無何、邊吏倉卒興發騷  
然、柴桑遷孔子宫、避戍將、嘉魚壞學宮、繕壁壘、江  
湖間稍驚於武事矣。公顧以和糴賤傷農三白郡、  
解印綬去、爲奏罷糴乃已。比寇至、斬黃以南、列邑

無寧居、守令竊議內徙、宦江湖者、歸孥相望於道。  
公廼議⑤死守不去、與民期曰、吾家即汝家、一旦有  
急、吾與若偕死敵。民亦自矜奮、三分其衆、更壁縣  
下。二總首帥輕舟守安樂口、白鹿磯、且乞師於汪  
公、得甲三百、樓船十艘、氣聲張甚、渡江來歸者數  
千家、江西恃⑥以無恐。諸公繇是翕然稱慕、交章繼  
薦。汪公虛幕府官以待、比其入也、欲以公朝行在  
所、轉運判官王逖劾罷信陽守、檄攝軍事。旣解縣、  
爭欲辟留、滿考改官、公並辭不受。其後營田、二十  
卒田二頃、歲得穀六佰石、廩錢乃七十三萬、米一  
佰八十石。闊遠或數百里、一壯馬負二石穀、從以  
騎士詣大軍、其費視民間買穀價相若、士苦之、往  
往道棄穀去。又墜民之水利、而掩其善田、州縣莫  
敢如何、營田終廢。虜亮旣斃、明年、蔡果不守。尋復  
議和、朝廷於此亦棄唐、鄧、封略止於沔南矣。蓋一  
如公言。公治縣事、爲之經、必曲折盡人心、不苟作

差役、宿戒里胥披籍次第、條二十餘家、未差已差別爲行、且疏其強弱、某堪一役、某堪再役於其末。自任某人某歲月、序當役以付案、案任之付錄事、錄事任之乃差。差已有訟不均、舉其籍、俾訟者自覆視。伍民五家爲保、二保爲甲、六甲爲隊、若干隊爲總、不以其鄉分畫、惟地之形便。諸總旗各爲色、槍仗皆中度。舍姦有禁、詰盜有賞。其以巡徼遇非常死事者、爲棺贈之、復其家田若干租三歲。總首得與令相問報專達、不關縣胥、巡尉、非縣檄毋得擅征甲士。在邑五日一閱官賦之糧、而賞其最。鄉惟所欲、偶習於總首之射圃、毋贅聚。其爲士若大姓、附編存之、勿藉、俾輸財與力、佐治戎器。其將輸信陽也、凡一<sup>⑦</sup>千八百人、致米九百石。行必爲陳、日暮各以部曲相地頓舍、以槍爲壁、鳴刁斗設伏。公食飲卧興、自同役夫、醫護病者、不偕至不宿。府檄治砦屋百數區、泝流二千三百餘里、程日立辦。公

借材於縣人、度長圍大而加償之、賦鄉挽舟而五分之、以居者之四、共行者之一。匠人亦各俾一鄉償其僦費。舊財賦名色異、爲籍雜、不可省察、爲都籍以提出入之要、鈎撫侵姦、以除無名之歛。諸案事、以其劇易、分日久近、爲旁行譜、每以日加申稽、知其決否。故不決、宿吏于次、抄積不銷、爲走曆、日揭其名數、以便主簿者之鈎攷、而因察其惰。民賴其便。凡公意趣鄉、輒鼓舞從之。豪民衛仲堅、王安道、更數令不能役、及是以次受代、安道語人曰、失今不爲、焉能頽首它令。創鄂營八百架、總隊請分事、公約剪伐某所茅、某所木竹、應日而集。縣有鍾、吳二盜魁、大府屢設方略、求不能得。公以誘總首王宗元、竟諭吳降之、爲買田屋、改業爲民。鍾滋甚、俄斬之。而至信陽之役、選徒鄉屬、而邑二隊首固請從、曰、吾知縣出矣、吾何敢處。是役也、露次不驚、訖歸不惰、道邊梨棗下無跡。邊民謂閱過軍多矣。



未有若此肅者。它所區處民吏皆化服類此。調婺州司理參軍居五年用樞密使王公炎薦召公懇求之官不報。於是上在位七年矣入對進三說一審政本躬細務親<sup>⑧</sup>鞍馬以權爲經本末倒植況動煩宸衷國論靡定權移近密衰職日輕降胡侍從之虞毬獵固寵之術意有所偏患生不察願陛下以靜養恬略小圖大遴三公之選責以進人才張紀綱延端直之士與之講問學求治道歸有司之常務屏馳騁之細娛沉潛待時安往不濟其二冗官冗兵周官惟六漢別九卿自東都有尙書六部唐置內諸司使增員浸多有職蓋寡諸路帥臣在古州牧國朝以來置轉運使副判官提點刑獄提舉常平茶鹽總領市舶坑冶茶馬諸司屯駐之軍又別置都統制牧伯之任分爲五六而州之知通縣之令佐不相統臨各行其意臣之所謂冗官此也唐方鎮之兵今廂軍是周世宗及太祖皇帝增

置禁旅今禁衛與諸州禁軍是神宗皇帝立將兵之法今帥藩係將禁軍是太上皇帝收諸將麾下作三衙御前諸軍今大軍是四者之外復有弓手土軍役兵今惟<sup>⑨</sup>大軍勝戰將兵而下廢爲隸役臣之所謂冗兵此也苟得其道更張不驚願陛下處之何如毋憚難也其三虛稅武昌絕戶屋租屋亡而租在德安岳飛牛租牛亡而租在永嘉海溢濱鹵之田田亡而租在凡此宜悉蠲除以惠貧下當是時上志在中原王公炎方數進見語合驟登用薦公甚力公未至則謝曰聖上天資英特群臣亡將順緝熙之具幸得遭時不能格心正始以建中興之業徒僥倖功利夸言以眩聽今俗皆曰中庸大學陳編厭聞然物不兩大心無兼慮天地之道忽略根本而奔走軍旅之間舛先後之序而卻施之雖復中夏猶無益也比至王公再見縱談邊閫事公曰旣曰論兵竊嘗評以孫子始計之書未見

其可。方今人人異意、不可謂道。災異數起、不可謂天。以江左爭中原、不可謂地。以貪御驕、不可謂將。將不恤士、士不安將、不可謂法。集一圖九、古人寒心。求之時賢、誰能辨之。況今三衙御前舊卒略盡、江南白丁、何以持久。常平錢米、在所虛數、以此饋師、其能繼乎。兵驕民困、或未免蕭牆之悔。即幸勝之、方上勞廟算、伏惟以仁義紀綱爲本、至於用兵、請俟十年之後。如曰上獨斷耳、去位可也。又曰、天長可以入維揚、清流可以向六合、淝水可以下合肥、北峽之隘、廬江之徑、武昌之近、新息、秣歸之比、商於、子午、南達梁、洋、岷、洮、東近威、茂、用兵所徑、忽不之備、然而獻計者但曰無患、非偷則狂。有旨改宣義郎、差知平江府常熟縣。明年、大臣數言、上復召審察、公固辭。其友人秘書省正字劉朔以君命相風厲、公雅意廉耻、道鮮、自一介不宜菲薄、遂白丞相陳公俊卿曰、周公寧以戲封諸侯、開成王不

敢玩人之心。鄼侯身追亡將、移漢祖嫚士之習。古人格君之業、於是乎在。有如假令以匹夫之節、一感上意、亦足以報。陳丞相免、虞公允文相益趣發、不懈。自召命下、公請之任六七、不報。又請奉祠、不報。積十有八月而後就道。至數日、則欲引去。侍從有留行者、除大理寺簿。方虞公銳意於事、一時言利言兵、自銜鬻者甚衆。守經不阿、或被罷斥。公見之晚、猶冀幸一改聽。始從容引番吾君說趙相國公仲連事、諷以功業缺然、咎在進賢未廣、置助不善。丞相亦矍然爲敬。頃之、乃反覆切論、微功太速、興事太輕、速無遠撫、輕則中廢。經濟天下、當與天下士圖之。鄙夫嗜利自市、試跡前事、今皆反繆。願公易慮、勉終、毋爲後悔。會江湖荐飢、民流淮甸、邊州又有言歸正人相屬者、上命帥臣、漕臣共安集之。逾月、奏不至。丞相召公問所當施行、俾條列、將議遣使。公惶恐謝不敏、且淮事難踰度。固以問、因





疏數端。一、責成帥漕、毋以遣使。使者所過州宿留、循行未周、已及春夏。二、新民未見便、輒勞苦州縣百役、爲是懷故鄉、無長居之心。宜略如孫吳屯田都尉故事、自立營壁、他繇使勿與。三、宜先定要束、誠以關地而已、縣官一無利焉、悉以故陝西弓箭手法、復其租四歲。穀既登、漕司致布帛茶鹽、凡民所須、率令穀價視物價稍昂、以傳糴就藏、屯所爲後備。因言、若辟屬吏、若移用錢米、若括隱田、茲事體大、必遣使、非選擇重臣、持節漕帥、州縣何以協使。翊曰、有旨以公將命淮西、公即言、流民或前散寓山谷、依人姓、聞今使者出、必相攜持、聚城邑、仰食於縣官。卒有累萬之衆、將安取給。且請以淮西諸州縣係省不係省錢、一得以便宜調度。朝廷尙難之、公重謝不敏。尋得旨、以見錢米一萬緡、二萬石行、不足用、聽次第以聞。是歲乾道七年也。十有二月八日、公至合肥、明年正月、抵齊安、布宣天子

勞來德意、分遣才謹吏循問、大抵安豐以東、來者略已隸主戶矣、即撫勿徙。沙窩以南、稍稍未有適鄉。公親履阡陌間、審度山澤曠地、以爲合肥廢圩、可因以設險、斷柵江、保巢湖。而舊黃州、古邾城也、路直垂瓠、置莊旁近、異時寇不能潛師徑度。廼與安撫趙善俊修復三十六圩、且於舊黃東北置二十有二莊居之。凡合肥戶三百四十有四、口一千九百九十有六、勝耕夫八百一十有五、爲田三百七頃八十有四畝。齊安戶三百四十有一、口二千一百一十有一、勝耕夫六百一十有四、爲田四百四十有四頃五十二畝。率戶屋二間、二夫、牛一頭、犁耙鋤鍬鑊鎌刀如牛數。三牛、犁刀一。每甲二轆軸、一車。其受田人、種子錢五千、其家以口老壯少爲差。賦米及秋止、凡費錢緡二萬、米石六千。而壽春歸正及自占若爲隸農於大姓者、亡慮振業三千八百餘家。要約明具、器用便利、廬舍有伍、疆場

端正場圃。牢牧陂溝路橋，悉皆治修。病醫死葬，所謁輒得，遷如歸居，廼請還。始，大<sup>③</sup>臣白遣數人，各試其備邊計畫，往往設飾爲辭，以上功。天<sup>④</sup>子雖不盡然之，姑惟闊略，庶幾或報效。公之行也，至固始，求所謂北歸人者，凡一百十有二家，皆土著數年，而新附者才五家。光守宋端友，更以舊戶比新戶，詭爲奏，甚者賊殺歸人，掠其善馬。公即劾奏端友謾蔽。時端友進真環列，根抵連附，不可撼動，人皆危公。奏上，天子獨怒，下其事于理，將窮竟問治。端友暴以憂死，繇是頗疑邊臣亡狀，而所白遣大臣，類無欲得事情之意。於公齊安之請還也，命覈麥田，留累月。覈已，又命視鐵錢事，公歸對，卒展罄所見聞，復上首論，州縣田簿甚具，而淮地實不加闢。臣諏其故，大抵主戶占田一畝數頃，輸租僅斗斛耳，而履其產，彌日不徧。旣不能自耕，又害他人耕，何以聚人保境。宜合剡請，以徠遠民。來者務得，居者

患失，主客力競，將無曠土。再論，今邊郡田野荒蕪，勸墾文具，總首空設，蒐除苟簡，循淮而南，則有和糴，則有鐵炭，則有建康草料之征，勞遠虛邊，以資江左。守將數易，以苛<sup>⑤</sup>繼苛，一郡三邑，二令聾憤，險阨非一，不過合肥、歷陽，居巢三戍。夫以陛下規略，而稽誤至此，或者外治不可成歟。臣愚妄意推本，自夫不計而謾爲，而後外以鹵莽報，不思而出令，而後外以難行寢。號爲責實，未免徇名，則趣辦皆徇名之人。志在大功，卻規小利，則迎合皆規利之輩。誕謾者敗而不誅，諛悅者察而不去。言旣上雍，人多自營。宵旰十年，觀今何補。臣謂內治不修，無以整外，惟望責宰輔以坐論其原，收賢材以博圖其緒，兼聽虛受，以通壅闕，朝廷正則疆場<sup>⑥</sup>理矣。唯陛下留神。三論，左右之人，爲欺囊橐，邇爲援則遠堅，大爲間則小肆。彼其伺候辭色，占揣意鄉，開闔將迎，莫狀其巧。託正以行邪，僞直以售佞。薦退人



物曾非誦言。游揚中傷乃自不意。一旦孚號揚廷。雖出睿斷。喜怒氣焰已歸私門。齊威之強不在阿即墨大夫之誅賞。而在毀譽者之刑。毀譽無證。刑不行焉。胡能禁欺。陛下誠幸聽臣。無自立我。收骨鯁。棄軟熟。察此非難。廼悉數骨鯁軟熟情狀。上極開納。讀奏至齊威事。進曰。臣觀近政。非無阿即墨之斷。奈何毀譽之人自若。上曰。正待理會。公益口疏治邊非是。曰。買馬亡幾。習至盜馬。虜將寄聲問。故卒索歸之。國家何至乏此。而自傷體若是。詔即罷買。又曰。日城淮郡。以臣觀之。未知守所。合肥板榦方立。中使督視。卒卒成之。廼者臣行過郡。一夕風雨。墮樓五堵。歷陽尙壁缺。而居巢庫陋如故。廼聞有靡縉錢鉅萬。而成城四十餘丈者。陛下安取此乎。上問。千秋澗何若。對曰。始臣行時。方冬水落。澗不勝舟。比歸。夏潦時至。江澗合流。渺然矣。是將焉用。上曰。聞亦險要。對曰。若以兵法言之。漸車之

水足以制敵。藉此爲險。無乃不可。又曰。外事無足道。咎根不除。抑臣深憂。左右近侍陰擠正士而陽浮稱道。陛下誠聖明。儻因貌言。萬一垂聽。臣恐石顯王鳳鄭注之智中也。又曰。近或以好名棄士。臣伏思念。好名特爲臣子學問之累。人主爲社稷計。唯恐士不好名。誠人人好名畏義。何鄉不立。上悅。連言極是。於所汲引士。皆旌賞。先是。上即道遷公兩官。又除寺正。有自邊來覲者。則曰。薛某凡可爲國。知無不爲。而又注意傾洽以聽。罷行如響。故諱缺失者相目矣。數日。除知湖州。朝辭劄子論科折。不明示數。輸送不即除籍。及祖家分鎮強邊之法。曰。陝西爲五。而統於永興。河北爲三。而統於大名。有塘灤方田。稻田榆塞爲之險。城堡寨鋪爲之防。弓箭社。弓箭手。番族熟戶爲之羅落。它路迭戍。悉受節度。幕府州縣。惟所辟差。自种折二氏外。別帥則以三衙若三司使。都轉運使爲之。能績效驗。入

備政府。夫地分則守固、勢連則情不隔、權壹則足以有爲、賞明則知勸。光堯中興、沿邊置鎮、茶鹽之外、舉推與之。將以固圉、計亡易此。臣願按行成憲、衆建鎮守、統帥興師、不限文武、忠智是使。且無拘虛<sup>⑧</sup>文、無要小利、無以日月爲斷。卒章尤剴切曰：方今諛媚成俗、舉世尙同。汎觀設施、謹曰盡善。偏辭先入、異議不繼。百辟盈庭、幾成孤立。是日奏罷、上留語良久。公將退、特溫辭寵藉之。大旨謂書生姑息、而辦事者以苛<sup>⑨</sup>爲能、煩卿輔郡、冀以中道理之。公對曰：臣學於師、以事陛下、唯中道爾。上曰：如此、朕復何憂。公至郡、踰月、戶部奏言：諸州經總制錢、皆出場務、酒稅雜錢分隸以納。今多隱餘、分隸不盡、得自便恣用、請更爲令、監司給曆州縣、以凡日收錢、撫實、係曆分隸、否則劾<sup>⑩</sup>。聞令下、吏相顧莫敢建明者。公獨首奮爲當路言之。其略曰：舊額、凡雜納錢、以十分爲率、分隸四爲羅本、六爲係省錢。其

後、廼始增以二分、分隸總制錢。是時州縣未病之也。然亦浸尋於奇羨矣。久之、乃哀羨錢、校數歲之最爲額、以十分分隸之。七爲總制增稅、三爲在州錢、愈非舊比也。復積有上供、月椿大兵、打船、修船、六分、贍軍、移用、降本、竹木等錢、科色不勝繁矣。而隸額如故。既不足以應計、且歲費彌廣、郡用彌匱。由此場務鑿空以取贏、雖有奉法吏、思以寬弛予民、而不得騁。若復隸額外之征、掇其強半、官吏自救、不給、民病甚矣。且以湖之都務羅本係省、初爲錢二十三萬五千六百有奇、自總制之起、爲錢五萬八千九百有奇。與故合、猶日課二十九萬四千餘錢而已。重以七分增稅、爲錢三十五萬三千七百有奇。又重以上供若大兵之須、凡四十<sup>⑪</sup>萬八千錢有奇。使今且共<sup>⑫</sup>得八十萬錢以充入經總制之額、其餘爲上供諸雜須錢、且患若不足、況不盈此。鄉所謂係省、在州之數、悉闕亡有。約此推見、他筭

庫盡然、郡將安仰。如不得已、宜以日收錢先椿上供諸雜須之餘、廼係曆分隸、庶或可行。不然、不敢奉詔。版曹恚、逮郡胥俾持條法詣曹自解。公辨益力、臺諫官感發、相繼疏爭之、上廼寢前奏。湖無苗米饟軍、歲糴七萬一千五百餘石、爲緡錢二十一餘萬、自添差武臣路鈐轄、下至進勇效士一百七十有一員、軍員五百三十有一人、其廩稍爲緡錢距二十萬、以他經費合往歲凡用緡錢五十二餘萬。舊制、烏程、歸安二縣、折丁錢歲十三萬緡、七年有旨減折丁錢太半、其已全輸者、聽以明年除之。是歲所失亡十有餘萬、而大農和糴六萬石、以銀交子高估、徒欲用錢二千省得米一石、郡不忍裁市直、則當補錢萬六千緡、僦載之費不與焉。益以就祿八十有三人、不啻爲緡錢二萬。明年、郊祀進獻賚予之幣賚、亦以二萬緡數、凡增費十萬三千餘緡、以亡加增、大都缺緡錢十有五六萬。公曰、是

雖劉晏、將奈何。亟請於朝、乞以市直償民糴錢、乞以折帛紬絹錢撥除折丁錢、乞汰軍改徙寬郡、乞節冗長、差授在郡。裁三四月、自抗論分隸後、執拒大事累數端、日與權貴征利者爲敵。雖或依或違、郡民少蘇、而不能平者滋衆。獨賴天子簡記、所以見覆護甚至。始公嘗薦某人、有材識、它日某官缺、宰執擬數姓名以進、竟擢某人爲之。郡丞趨時好干政、引章避之、爲易。他丞嘗遣中使有所廉察、浙西諸郡獨不入境、用是故不敢輒動危之。然公歸志決矣、即稱病請奉祠三、不許。會除代、一月章五上、已、又旬四上。改除知常州。公方鄉用、人人期待行所學、不數月、久勞于外、還七日、廼出守、守七月罷、罷歸之百日、以疾卒、年止四十。邦君朋友暨後學哭之過乎哀、四方賢大夫士、千里交相弔也。公之學、蒞事唯謹、宅心唯平。其燕私、坐必危然、立必嶷然、視聽不側歆。雖所狎授、言不以戲。自著抄



書及造次訊報、字畫不以行草。几篋筆研、衾枕屏帳、皆有銘。毫釐靡密、若苦節然。要其中坦坦如也。故其寡欲、信於家、行推於鄉、正直聞世、而居無以逾衆人。公自六經之外、歷代史、天官、地理、兵刑、農末、至於隱書、小說、靡不搜研采獲、不以百氏故廢。尤邃於古封建、井田、鄉遂、司馬之制、務通於今。或者疑公之博、蓋其所自得精一矣。名流問質、或往復累數百言、旨要無二。大抵以古人小學、神而明之。大學之道、傳遠說離。故漢儒守器數、章句名家、小知穿鑿、異端之徒、乃一切屏事、忘言後已。高論虛無、而卑者滯物、卒不合。合歸于一、是爲得之。讀其書、知其爲博之約也。公已不求聞達、於人有一長、薦稱必備。居官不出位、遇大事、義所當爲、斷爲之。嘗掇拾管樂事爲傳語、不及功利。平生所推尊、濂溪、伊洛數先生而已。告學者則曰、毋爲徒誦語錄。有浪語集若干卷、書古文訓若干卷、詩情性說

若干卷、春秋經解若干卷、旨要一卷、中庸、大學說各一卷、論語小學若干卷、資治通鑑約說止若干卷、九州圖志止若干卷、餘未就。公患五代史、缺略修之、亦未就。若陰符、握奇、山海經、古文道德經、焦延壽、易林、及劉恕、十國紀年、莊綽、揲蓍譜、林勛、本政書、姚寬、漢書正異之屬、皆校讎、爲之叙、其文精確趣實、可以濟世。其經說、不並依先儒、其校異書、必解剝其不正者。娶孫氏、父汝翼也。初、汝翼與舍人友相得、舍人死、汝翼遺書待制、自言、吾有女才且淑、異日宜善事夫子、吾將以室起居之孤。比歸、公婦行皆應書。公卒、其友人張淳欲悉遺衣服、以歛、書銘如古法、能俛聽、蓋不失公意云。一子曰、汧補國學生。公以卒後之百四十有四日、十有二月壬申、葬于吹臺鄉慈湖之原。傳良丙戌、丁亥歲、受徒城南、公間來過、教督之。明年謝徒束書、山間屏居、公又過之、問治何業。竭己所已得對、公曰、吾懼



吾子之累於得也。即詔曰：宜若是。歲己丑冬，遂往依公。具區漏上卒學。茅茨一間，聚書千餘卷，日考古咨今其中。明年秋，試太學，公適赴召，於是鄉諸生及它邦之友咸在。又日相與從公居游，凡七八年間，違公久者，惟公使淮，守雪川時爲然。然亦率不一二月書命輒至，至則具道所言與行事故，世多知公詳莫如傅良。今取其出處事言之大關治道學術者爲狀。餘不著。乾道九年十二月某某日，門人迪功郎新泰州州學教授陳傅良謹狀。

陳傅良撰 《止齋先生文集》卷五一

### 薛常州墓誌銘

河東之薛，有降居閩之長溪者，世久不能迹其始。既又家於永嘉，其長老之記曰：唐補闕令之後遷焉。裔孫庠，以馴行聞於鄉。庠生強立，始修補闕之舊，續其祿，蓋終江寧府觀察推官，贈左光祿大夫。光祿四子：嘉言、尚書司封郎中、昌言、通判婺州。弼、

敷文閣待制。徽言，起居舍人。公諱季宣，字士龍，起居之子也。起居學於胡文定公安國，而雅爲趙忠簡公鼎所厚，其立朝皆有本末。最後秦丞相檜建與虜和，起居自殿坳直前，引義固爭，反復數刻，中寒疾以卒。夫人胡氏亦繼卒。於是公生六年矣。伯父待制收鞠之，任以官。公幼逮事過江諸賢，聞中興經理大略，已能識之。喜從老校退卒語，得岳韓二三大將兵間事甚悉。志尙犖犖，與常兒異。年十七，起從妻父荆南帥孫汝翼，辟書寫機宜文字。荆州善袁溉，道潔，虛郡齋迎致之，公遂委己師焉。道潔及登河南程夫子之門，聞蜀隱者薛叟名，晚游蜀，以物色求之，莫能得。未至一郡，並舍有叟旦荷笈之市，午漏下輒扃其戶。道潔從壁間覘之，方隱几默坐，意象靜深。問諸鄰，則曰：是鬻香薛翁，不知其所從來。道潔亟款門，以弟子禮見。旦往陳所學，叟漠然如不聞。久之乃曰：經所以載道，聖人作經



以明道、子何博而寡要也。始與深語。未幾復捨去。道潔漫浪沔鄂間、諱其學、絕不爲人道、獨與公傾倒無所靳。公自是篤意於學。道潔語公、伊洛軼書多在蜀。時同郡蕭振方制置四川、乃往爲其屬。道潔期至蜀授以書、會偏裨有誣其所部將者、公請正階級法。議不合、謝去。遇道潔於峽。而公旣出蜀矣、調鄂州武昌令。武昌號難治、連敗數令。公年尙少、郡將部使者易之、迎謂是邑久不可爲、子敢當之乎。公曰、獨患在上者以縣爲可爲、今知其不可爲、則可爲矣。願寬其銜轡、俾得自盡。皆諾之。科徭興發、率以公故獨不及。唯論和糴、始不見答、欲解印綬去、卒體其誠、得罷。公旣獲乎上、民賴以寬、有所廢置、皆爭趣和。乃大治版籍、期會、簡稽、出納、悉就繩尺、密而不煩、嚴而不迫。虜亮未叛盟、公白其長、視要害、前備禦、輒不省。及兵交、稍稍即公咨計畫。虜亮悉衆瞰江、詔成閔還師入援。時汪樞使澈

宣諭荆襄、公告成閔得蔡有破竹之勢、盍守便宜勿遣。令閔乘虛下武昌、徑陳、汝趨汴都、虜內顧且驚潰、釋此成業、而聚兵相仗、鮮克以濟。不能用。閔晝夜馳不頓舍、後騎能屬者三之一、而陳、蔡新附諸城、亦踵接復爲虜矣。江淮仕者大抵無固志、紛紛遣其孥繫馬庭木以須。公獨留家不遣、誓與民俱死。縣故多盜、鐵冶、營田、棋布諸鄉。亡命姦人出沒其間、所治即孫吳故宮、自古江左重地也。公念除盜上策、莫如聯保甲、疆陲有事、唯素整者可不亂。乃訪求河北、陝右弓箭手保甲法及淮西劉綱保伍要策、討論甚具。會有伍民之令、乃出其法行之。五家爲保、二保爲甲、六甲爲隊、因地形便合爲總、不以鄉爲限、總首、副總首領焉。官族、士族、富族、皆附保蠲其身、俾輸財共總之小用。諸總必有射圃、民暇則習、無蚤暮之節。盡禁捕博、獨許以擊刺馳射角勝。五日更至庭閱、其尤者勞賞之。旗志總



別爲色、槍仗皆中度。候望干擲不幸死者、予棺、復家三歲。諸鄉皆置樓、盜發、伐鼓舉烽以相號召、瞬息徧百里。總首白事、吏毋得預、追胥興發、一以縣檄爲驗。環邑溝瀆不涿、夏潦波道、在事者病之、役大莫敢睥睨。及保甲成、天大雨、公出坐通衢、傳呼總隊、具畚鍤、賦丈尺、三日而畢。市多火、公戒諸隊鈎繩梯缶、各專其一、暮夜倉卒、隨用而索、甚速且整、火不能災。縣治白鹿磯、安樂口、皆置戍。復請於宣諭司、得戰艦十、甲三百、羅落之守計定。訖虜退、人心不搖。大軍之屯州縣、客主不相能、多爲鬭暴。公曲得其歡心、以事至者、必微見曲直而明假借之、皆大喜且大服、誓死以報。內郡發粟輸邊、縣當餽信陽、公部以往。先是諸將出師、部勒無法、或侵苦之、道殣相望。文吏董役者、則又甚焉。民見調輒與親戚爲死決。公語父老曰、子弟相從者、吾受其無咎。皆慨然陽應。旣發、隊伍次舍悉放行軍。親與

役夫同苦樂、病者挾醫護視、始輕所負、劇則皆弛之、增劇則以馬若輿載之、病者未至、隊長毋得即安。號令齊一、道上擔肩相差如引繩、無敢少蹉跌。觀者相語曰、此誰將軍部曲耶、乃整肅如是。旣而知爲武昌白丁、相視歎息。斯役也、在行者千有八百。役罷、死者一人、跌傷者一人、餘還畀其父母妻子如初約。當是時、諸公爭知之、舉辟交至、公一無所就。從吏部銓得婺州司理參軍、召對、首言治體有本末、願遴三公之選、責以進人材、張紀綱、延端直之士、與之講問學、求治道。又論中都官員多職寡、牧伯之任分爲五六、唯大軍勝戰、將兵而下、廢爲隸役。因道遠方民瘼甚悉。王樞使炎前在鄂、熟公治行、及是新得政、求助於公。公語之曰、上天資英特、群臣幸得遭時、乃忽略根本而奔走軍旅之間、盍以仁義綱紀爲本。至於用兵、請俟十年之後。改宣義郎、知平江府常熟縣。退待次、具區漏上。明

年復召審察、公固辭、徘徊踰年乃就道、至則除大理寺主簿。是歲江湖大旱、流民往往北渡江、邊吏復奏淮北民多款塞者。虞丞相允文白遣公行淮西、收以實邊。公持節勞來、耄穉滿車下、爲之表廢田、相原隰、復合肥三十六圩、立二十有二莊於黃州故治東北。以戶頒屋、以丁頒田、二丁共一牛、犁、杷、鋤、鋤、鑿具六丁加一鋤刀。每甲轆軸二、水車一、種子錢丁五千、廩其家、至食新罷。凡爲戶六百八十有五、分處合肥、故黃適等。而合肥贏故黃三戶、戶授二室。受田之丁、合肥八百一十有五、故黃六百一十有四。會其錢若米之費、財二萬緡、六千石。流民已爲大姓有者、仍隸其主戶就撫之。並邊歸正者、振業之。合三千八百餘戶。始公以乾道七年十二月至淮西、反命以明年之夏、計道里往來與察邊郡、檢麥田之屬、專於田事者僅數月、墾築冶鑄、斲削、皆受成於公。賦役省而功堅、度可支數十年。位置向背、經緯條達、民生所須、不外索而足。淮人謂耳目所未睹。公曰、吾非爲今日利也。治合肥之圩、邊有警、因以斷柵江、保巢湖。故黃、實古邾城、地直蔡衝、諸莊益輯、則西道有屏蔽。其措意深遠矣。光守宋端友自上招集北歸戶一百十七、公至固始、驗新民止五戶、餘皆保塞數年、端友混新舊戶爲一、籍以幸賞。異時有以善馬涉淮者、殺而要奪之。公亟舉奏端友有挾人謂章且不下、語聞、上感悟、屬廷尉治。方窮竟、端友以憂死、習爲媒者皆竦。而虞丞相始不樂公矣、故爲多端縻公、以緩其歸。或迎說公、見上、盍少自紓。毋與當路者忤。公曰、上遣我視邊、固欲得利害之實。卒極陳之、且曰、臣根本其敝、不計而謾爲、而後外以鹵莽報。不思而出令、而後外以難行寢。號爲責實、未免徇名、則趣辦皆徇名之人。志在大功、反規小利、則迎合皆規利之輩。誕謾者敗而不誅、諛說者察而不去、左



右爲欺囊橐。邇爲援則遠堅、大爲間則小肆。其薦退人物、曾非誦言、游揚中傷、乃自不意。齊威之霸、不在阿、即墨之斷、而在毀譽者之刑。臣觀近政、非無阿、即墨之斷、奈何毀譽之人自若。上欣然開納。公復進曰、外事無足道、咎根不除、抑臣深憂。左右近侍、陰擠正士而陽浮稱道。陛下誠聖明、儻因貌言、萬一垂聽、臣恐石顯、王鳳、鄭注之智中也。又曰、好名特爲臣子學問之累。人主爲社稷計、唯恐士不好名。誠人人好名畏義、何鄉不立。上是之。隆興以來、經理兩淮受遣者且數十輩、發御府金繪、聽施置自便、閱十年、鮮有當上意者。及公使事有緒、恨得公晚、道進官二等、除大理正、側席遲其至、顧問紬繹、奏請論薦、皆報可、聞者意公且用矣。居七日、出守湖州。入辭、語益懇到、上慰勉遣焉。公旣數摩切左右、而湖多權貴人田宅、與相加尤數、公平心問理如何、不爲變、益害公、合力撼搖、上記其忠

獨保持之。始至、書獄多入死、訊其由、則棄市者民間或竊祠之、名傷神、惡少遂輕相讎殺、不顧。公亟屏絕、死獄大減。條境內淫祠、次第除撤、會去郡而輟。土俗小民悍強、甚者數十人爲朋、私爲約、無得輸主戶租、前爲政者或縱與之。公歎曰、郡國幸無事、而鼠輩頡頏已爾、緩急之際將何若。取其首惡、黥竄遠方、民始知有奴主之分。初陳亨伯割諸道留州錢輸大農、號經制、翁彥國復附以總制、嗜進者競哀歛以應賞格、已而遂定其多數爲歲額。州用日削而供億稍餽、校軍興前五六倍、吏飭法撙挾無遺筆、猶廩廩不能給。至是戶部令提點刑獄司以曆付場務、一錢已上皆分隸經總制如式。諸郡被符、搏手無策、相顧莫敢先。公獨言於朝曰、自經總制立額、州郡罄空以取盈、雖有奉法吏思寬弛而不得騁。若復隸額外征、掇其強半郡調度、顧安所取。殆復爲它謬巧重取之民、民何以勝。戶部

鑄譙愈急、公爭之愈強、臺諫亦交疏助公、遂收前令不布。凡可以紓民力者、知無不言。如論和羅賈賤、請更平直。徙汰軍寬州。添差隸郡者、止今見員、後勿遣。函封相繼、多格於有司、則以病謁祠。朝廷惜之、卻其請至八九、知不可奪、改知常州。未上、以乾道七年九月戊申卒於家、年四十、官止奉議郎。娶孫氏。子法、補太學生。公之沒、其友張淳治喪、程以古禮、公配孫夫人能順聽不違、里中觀法焉。十二月壬申、葬于永嘉縣吹臺鄉慈湖之原。自周季絕學、古先制作之原晦而不章。若董仲舒名田、諸葛亮治軍、王通河汾之講論、千有餘年、端倪蓋時一見也。國朝程顥氏、程頤氏、張載氏、相與發揮之、於是本原精粗、統紀大備。門人高弟、既盡晚出者、或驚於空無、不足以涉事耦變、識者憂之。公之學既有所授、博攬精思幾二十年、百氏群籍、山經地志、斷章闕簡、研索不遺。過故墟廢壠、環步移日、以

驗其蹟。參繹融液、左右逢原。凡疆里、卒乘、封國、行河、久遠難分明、一經公講畫、枝葉扶疎、縷貫脈連、於經無不合、於事無不可行。涖官隨廣狹、默寓之於簿領期會之間、其所部吏曹、經時而不知公爲儒者也。平生所際、文武之職不同、未嘗爲町畦崖岸。而去就從違之際、守義不可奪。言兵變化若神、而在朝每以不可輕試爲主。所見疎快軒豁、潛察之、自律嚴飭、雖倥傯、札翰正楷、無一惰筆。少年豪舉、既知學、銷落不留省其私、泊如也。其爲人平實質確、本於簡易、行於敬恕、而堅志強力、又足以充踐之。善類方共倚屬公、而公則死矣。詩、易、春秋、中庸、大學、論語、皆有訓義。他所論著若九州圖志之屬、稿方立而未究也。歲在壬午、先君子守黃、公夾江爲令、歸以公所爲語某、固已矍然自失。後十載、乃識公於朝、一見莫逆如故交。其葬也、張淳既誌其壙、法復請詩以揭之。喪不能文、今既免喪不死



藏 齋

矣其可不爲公一言乎。詞曰、

墜緒茫茫、獨求諸野。有滌其源、晝夜不舍。繫道之窮、維其尙口。不耀其章、而躬自厚。出乎于長、于長于君。□□施之、乃沒元身。故吳之蹟、故邾之遺。旣堙旣平、其尙有稽。

呂祖謙撰 《東萊呂太史文集》卷一〇

校記

- ①傳：原作「傳」，據四庫本《止齋集》改。
- ②忠：原作「悲」，據《良齋先生薛常州浪語集》改。
- ③符：原作「符」，據四庫本《止齋集》改。
- ④脊：原作「春」，據《良齋先生薛常州浪語集》改。
- ⑤議：原作「誼」，據右引改。
- ⑥恃：原作「時」，據四庫本《止齋集》改。
- ⑦一：原作「十」，據右引改。
- ⑧親：原作「觀」，據右引改。
- ⑨惟：原作「爲」，據右引改。
- ⑩揚：原作「陽」，據右引改。
- ⑪持：原作「待」，據《良齋先生薛常州浪語集》改。
- ⑫前句「疆場」之「場」與本句「場圃」之「場」，原誤倒，今據四庫本《止齋集》乙正。
- ⑬大：原作「人」，據《良齋先生薛常州浪語集》改。
- ⑭天：原作「八」，據右引改。

⑮苛：原作「奇」，據右引改。

⑯場：原作「場」，據四庫本《止齋集》改。

⑰惟：原作「難」，據《艮齋先生薛常州浪語集》改。

⑱虛：原缺，據右引補。

⑲苛：原作「奇」，據右引改。

⑳効：原作「效」，據右引改。

㉑十：原作「千」，據右引改。

㉒共：原缺，據四庫本《止齋集》改。

㉓鈐轄：原缺，據《艮齋先生薛常州浪語集》補。

㉔賴：原作「隸」，據右引改。

㉕易：原作「是」，據右引改。

㉖唯：原作「雖」，據右引改。

㉗授：永嘉叢書本《止齋先生文集》作「笑」。

㉘學：原缺，據右引補。

㉙「乾道九年」至「陳傅良」一段文字原脫，據右引補。

㉚始：原作「如」，據金華叢書本《呂東萊先生文集》改。

㉛其：原作「知」，據《艮齋先生薛常州浪語集》改。



宋儒碑傳集卷一百三十八

趙充夫 樓錫 王自中 沈有開 何松

運判龍圖趙公墓誌銘

嘉泰開禧間、某官富沙。閩漕趙公建臺是邦、年既高矣、清眸炯如、道貌瑩如、有出羣拔俗之態。事無劇易、從容裁決、若不經意、而皆當于人心。某嘗叩請其故、公曰、吾無他長、昔從事于伊洛之學、得其旨趣、從此胸中無復凝滯。某始知其非偶然者。今觀道施君狀公之行、具言丞太和時、邑宰周君賓遇公甚厚、凡所以啓告者、率根本伊洛、公服膺焉。石韞玉而山輝、水懷珠而川媚、發于容貌、形于事業、皆有本而然。此公之所以深可敬也。公諱充夫、字可大、魏悼王之七世孫也。始名達夫、字廉善、孝宗爲更其名、公併字易焉。曾祖諱報之、保大軍承宣使、妣惠國夫人王氏。祖諱公懋、中奉大夫、妣令人孫氏、徐氏。考諱彥孟、朝散大夫、贈金紫光祿大

夫、妣安康郡夫人孟氏、永寧郡夫人羅氏。自中原俶擾、金紫公避地婺源、娶都督孟公庾之女、遂從外舅寓居于信之鉛山。公穎悟而嗜書、外祖奇之、室以孫女。以金紫蔭補官、主永福簿。丁父憂、服除、調太和丞、監青龍鎮、辟泔水檢踏官、知宜興縣、簽書淮南軍節度判官、知新喻縣、通判湖州、守臨汀、嘉禾、吳興三郡。奉祠、起知道州、辭不赴、仍賦祠祿。擢提舉淮東常平茶鹽公事、直秘閣、福建轉運判官。告老、進直敷文閣、與祠。再告老、陞龍圖閣、致其事。初、孝宗屬意錢幣、公以舉爲泉屬、患場兵應募者之寡、請役諸路黥隸嶺南之人、五年無過、給據自便、就役者以千計。久之、新至者欲爲變、公驅車以往、號召從役、收捕無遺、自是無敢叛者。茶寇賴五方熾、駸駸至廣。提點刑獄林公光朝謂公曰、場中黥卒、得無有從亂者乎。公保無他虞。既而帖然。林公因咨禦寇之策、公言、贛、吉間有捷徑數百里、



儒藏

接詔之仁化、宜分兵捍禦。亟遣摧鋒軍控扼其處。賊果至、殲其先鋒、餘黨奔逸。自是不能復振。新喻絕產之家、有專其利、官不得預、公許其自陳、減租二之一、永以爲業、而悉蠲其宿負、靡不樂輸。砂錢禁嚴、犯者猶衆、公言上供空用銅錢、錢荒則多僞、銅楮相半、弊斯革矣。諸司皆許之。盜鑄遂息、而綱運之費亦歲省二十餘萬。臨汀擇守、光宗命公爲之。閩帥趙忠定公議置莊倉、公以爲此固甚善、後有逋負、未免追擾、何如冬儲粟、春糶、略收一分之息、糶本稍增、而民食無闕、經久之利也。帥大然之。朝旨欲行經界、俾公籌之、公謂汀稅產雖多、而所收十纔六七、自足郡計。若行經界、則省額一定、不容擅減、必均于民、輸將重于曩時、必有流離失業之患。條陳利害甚悉。平生好古、而隨時處事、不膠古制者類如此。郡城頽圯、銳意修築、而易募役及堪負重者、補闕額而蠲雜費、得百餘人、不勞而辦。

公之始至也、營卒怯懦、不知紀律、申嚴號令、日日教習、時自臨之、區別武藝、頒賚有差、士皆勇奮。會寧化妖民廖大興等作亂、聲搖諸郡、命左翼將高特率兵討之、巡尉屬焉、授以方略、銜枚宵行、五里爲一鋪、直抵其穴、斷其糧道、遮絕外援、力罷而後取。旁郡兵繼至、咸遵約束、妖氛遂清。吳興上供歲額百十五萬、而累政所發至百餘萬、版曹督索無虛月。公奏蠲之、人情懽然。公曰、此天子之德意也。郡計既寬、捐以與民、未納者代輸焉、催征者併閣焉。皇上雅聞公名、俾司庾事、相度淮田耕種利害、謂平曠之土、水無源流、仰雨浸灌、稍旱則乾、何以殖穀。唯當益浚陂塘、官給工役之費、則于民無擾、而其利至溥。又言、民既執役、而復責免役之錢、是重困之也。請以沒官田產、隨鄉分廣狹、當役者給之、助其不足、以紓民力。鹽商胥吏共爲姦利、以旣支未抹之鈔重請、公推見弊源、任官而不任吏、莫



之或欺。其將漕也。于鹽事尤加意。郡邑有大小戶口有多寡。計其日用之數。定其日用之額。彊不可多得。弱不至乏絕。時論稱其公平。殿司左翼軍分屯汀、建、泉、邵。始用禦寇。出戍。增給小券。名爲一兵。而有二兵之費。公以漸消之。招補闕額。止給本俸。行之不驚。人無怨言。此皆公之善政。可爲後法者也。時望傾屬。聲名焯然。顧何施不可。而公雅意靜退。以道義爲樂。人所汲汲。我則徐徐。始以丞攝尉。全獲彊盜。改秩法也。推以與尉。及攝龍泉。復以盜賞。畀之鄰邑。安恬之稱。已藉藉于搢紳間矣。況學問涵養。日進不止。豈復以世俗所樂。累其清明耶。守吳興時。忤時宰之親。遄歸故里。結亭二十有五。放懷巖壑。若將終身。彊而後起。名流多稱慕之。而誠齋楊公知之最真。有契于心。爾時權姦妄開邊隙。公深言其不然。雖拂其意不恤也。非輕視軒冕。其能爾乎。有樓曰一經。有館曰東塾。子孫滿前。課

以學業。嘗著論言。人而能仁。道足以生。生則安。安則久。魯論一書。求之可也。審處其方。以藥己病。病去則仁。仁則日新。日新則樂。美哉言乎。其古人進德之心乎。筋力尙彊。謝事而歸。優游自適者十有三年。人生真樂。何以尙此。嘉定十一年正月丁亥。終于正寢。享年八十有五。積階朝請大夫。賜四品服。所著有進策、奏稿及東山詩集。宜人孟氏。先公十有五年卒。葬于鉛山縣鵝湖鄉之東山。四子。時授。從政郎。監江淮等路都大提點鑄錢司金銀場。時升。迪功郎。衢州司戶。先卒。時牧。迪功郎。福州司戶。時稷。三女。源伯潛、鄭欽崇、傅煥。其婿也。伯潛今爲迪功郎。某州州學教授。孫男若璜、若璋、若琅、若琛、若璣、若璫、若珍、若干。孫女一。適迪功郎隆興府司戶周景舒。十月丙午。諸孤奉其喪。合葬于宜人墓。某不才。辱公薦舉。遂爲知己。又獲從公之長子遊。契分不薄矣。貽書求銘。義不敢辭。謹撫其表。

表可稱者、揭諸幽堂、昭示無極。銘曰、

皇祖維宣、篤生悼王。天監厥衷、子孫繁昌。維此龍圖、克嗣先烈。有始有終、天潢之傑。不究于用、君子惜之。我懷斯人、播以聲詩。

袁燮撰 《繫齋集》卷一八

先兄嚴州行狀

曾祖常、故任朝議大夫、累贈金紫光祿大夫。妣翁氏、贈永嘉郡夫人。祖昇、故任徽猷閣直學士、朝議大夫、累贈少師。妣馮氏、贈秦國夫人。馮氏、贈魏國夫人。父璩、故任朝議大夫、主管亳州明道宮。母汪氏、封恭人。先兄諱錫、字予善、一字申伯。世家明之奉化、今居于鄞。蓋自我高祖正議先生始、四明之樓實出于東陽、不知所遷。其可尋者、自兄以上才八世。先生以古學教授鄉校、凡三十二年、擢第起家、金紫少師皆以伯仲踵世科。後來者又繼之、衣冠彬彬焉。先公嘗以軍器監丞攝工部郎、有忠厚

廉平之稱。太保魏國史公爲墓銘。生九子、兄其仲也。兄天資穎悟、精力絕人、自幼從學、迥出流輩。年十三游郡庠、三山陳公元裕典教事、鑑裁甚精、兄一試占高等。祖居遭建炎之燬、依外家以居。先公攝事平江、母氏攜伯氏繼往、兄已能理門內如老成人。自爾舉業之餘、幹蠱尤篤。樓汪二族吉凶會集、人夥事叢、他人智力所不給、兄爲主辦、則應酬中度、談笑自若。遇事有膽略、不怯不躁、委蛇曲盡、無劇易必舉。故雖未冠、而中外親識已極口稱其能、而期用于世矣。先公久欲問舍、而無其貲。兄承親意、竭力圖之。銖積寸累、以立堂宇。先公懷太守章歸寓奉川、兄慨然曰、親年益高、茲可緩耶。入城謀度、日以就緒、落成、奉二親定居而後侍行。蓋一力任事、米鹽靡密、有無相通、以全其家者幾二紀。隆興二年、以先公遇郊祀大禮、奏補將仕郎。乾道改元中銓、授右迪功郎、秀州司戶參軍。先公赴處



州兄率諸弟分掌家務、雞初鳴侍左右、至受謁聽訟、則俟于屏內。公退、候伺顏色、承命惟謹。書尺之繁、委行李之往來、一不以累先公之心。故先公專意郡政、無有內顧。既赴戶掾、太守徐公葢、曾公逢一見如故交、事多資決。糾曹憎甚、守方委兄協濟。俄有旨、使錄事專典獄漕。使呂公正己行郡、部民有訴獄冤者、以詰糾曹、喏不能答。兄前曰、茲事甚明。是時新制未行、錫預聞之。因引姓名歲月與事之始末、辯數明暢、四座屬耳。呂公歎曰、作吏不當爾耶。顧吏一依兄所言、糾曹得解、而訴者伏辜。會鎮江有軍校訴于朝、且自言久掌軍用、列校貸錢以萬計、知其欲訴、將殺以滅口。脫身而來、後必有追者、出此門則不得生矣。丞相虞公駭其言、具奏于上。先令郡置獄、盡繫所訴者、欲遣理官以往。今丞相梁公方參大政、慮搖軍心、請敕漕臣擇州縣清強官、許以理寺推獄行。時胡公昉新爲東漕、與

呂公合詞薦兄。呂言秀州事、胡曰、自淮南易節以來、密訪人物、至秀稱樓君者如出一口。徑取旨以檄兄。二公使來見、面趣之行。兄曰、事關軍旅、君相所屬意。錫試吏未半歲、豈應預此。二公不許、曰、隆暑不可久繫、獄吏已候于郊外數日、以待子之來也。請械軍校以自隨、途中時與之語、鉤得其情。比至、桁楊滿庭、所繫有官橫行者、兄以所訴貸錢之日詰之、皆曰、誠有此、而悉已償矣。各以左券來、有須會問于軍者、頌繫一二、餘即日縱遣。復引訴者、謂之曰、爾之妄明甚、察爾之情、欲逃死耳。上罔朝廷、下駭軍伍、死有餘責。即吐實、尙全爾生。其人頓首感服。一箠不用、僅三日而竣事。大理吏謁請曰、事體甚重、今遽已、後必有悔。兄曰、我不知觀望、惟盡其情而已。汝第爲我行文書、他日有責、我當任之。既出、尙書蔡公洸爲守、握兄臂曰、何其神也。始得制書、府庭爲之震動、非君來某亦無所逃責。然

尙疑兄年少氣銳、或有疏略、因爲備言之、暗曰、弗可及已。歸塗比文案、該叙詳密、老獄吏所不能爲。二漕聞兄及門、大驚。既見、道所以喜甚、曰、吾二人舉士不謬矣。亟呼吏草奏、兄曰、已具于此。讀之、又大喜過望。涉筆書名、即攜兄詣丞相府、先入白相、唯唯、問安在。自賓邸徑以便服謁見、色尙不怡、曰、折獄誠敏、然訴者肯默乎。亦得所謂伏辯者乎。二漕相目、兄曰、伏辯有二、如使吏曹附口語代書辭、容有誣服、今其親筆也。袖出囚辭數百言、視首辭筆跡不少異、又無一字措改、注乙者、相始大稱賞。且曰、使者誠知人。翌日與梁公奏聞、上爲之嘉嘆。因共薦兄、謂如此等人不應使沈州縣、請以中都官處之。適左帑吏有巨蠹、既正典刑、以兄監都門、相謂兄曰、是何足慰子。特不欲使子捨祿而遲次也。既就職、潤色成法、隨請于上、積弊浸銷。在法、譏訶出入得其過失者、賞有差、故雖名同事而偵伺

甚嚴、或成仇隙。兄曰、吾儕爲國主藏、任責匪輕、各謹攸司、錫亦不願得此賞也。由是相處甚歡、而事益集。南庫闕官、朝旨命兄兼攝。兄視寶貨品目至繁、而位置紛糅、躬督帑吏彙分之、各得其所、列屋有定數、而總其凡于籍、標識粲然。未幾、上忽遣中使臨視、兄執籍取物、如探諸囊、使無以返命、即取屋角敝繒將封以歸奏、官吏失色。兄徐曰、是非軍衣所需、蓋哀以備賜花等用。數實若干、籍具在也。神氣湛然、使無以詰。尙書張公津曰、某號典領、初不得親臨、胥輩又不任事、微君、吾其殆乎。張公由此受賞、兄不屑也。任滿、主管都茶場會子庫、關陞右從政郎。上方留意楮幣、兄服勤其中、纖悉明備。凡事皆立成規、吏不得搖手。日造萬紙、無不精好。一日、謁丞相曾公、有同僚力言省罷之便。兄立其後、具聞之。僚顧見兄、踧踖而退。兄亦不之辯。果罷已、又進謁、白相君曰、國家賴楮幣以資用度、今罷



已、何敢復言。然度必復于後、吏曹失業、散之四方、他日恐難遽集。況作僞者他皆可爲、惟貫百例不能亂真、故多敗。此曹無聊、若冒爲之、智者不察也。願擇可用者、分隸官司、使得以自活。丞相曰、子不謀身、而遠慮及此。即白于上、如兄言。旋攝主管尙書刑工部架閣文字、遂爲真。職最清簡、靖共自守。垂滿、欲詣銓部。時史魏公再相、素以兄爲可用、力薦上前。丞相趙公又舉鎮江獄事贊之、且奏曰、是時虞某即欲處以職事官、今丞相雖知之、尙避鄉曲之嫌、未敢遽言。上曰、朕猶記向時事、信可用、豈應顧小嫌耶。遂除詳定一司勅令所刪定官。以薦章及格、改宣教郎。時方修一司一路酬賞法、取諸路專降旨揮五千餘項、立條一千三百、繼又編類海行法。兄夙夜疚心、筆削損益多出其手。書成奏篇、轉通直郎。輪對、首誦主上孝儉之德。上曰、朕之即位、卿預觀否。對曰、臣是時雖不及見、今叨朝列、

冬至正旦親見陛下拜太上皇壽、眞千古盛事也。上顧而笑。再奏、請明詔有司議立科目、凡是則是、倣有一于此者、令郡國察舉以聞、擇其尤者尊顯、以風厲天下。孝者舉則忠臣可以求、廉者進則賊吏不必治。又論、乾道修法久已奉行、間有牴牾、重加審核、雖已出于睿斷、修定新書、止緣頒降尙遲、州縣無所依據、胥吏因得爲姦、反致淹延獄訟。欲望頒行、使得遵守。續有陳請、自編別敕、仍下諸道、且用舊法理斷、免致因循待報。遷太府寺丞、又以輪對論紹興和買事、謂、會稽一郡賦額最重、然經界之初、物力及四萬錢者始敷一絹。今乃半之、旣無物力之增、徒有科敷之倍。止緣下戶舊與免科、聖朝優恤之恩、反爲豪戶欺隱之地。上焉者財力豐裕、與吏爲市、莫可究尋、盡以本戶之田析以占籍五等、分立砧基、多至百本、卻致中產之家和買歲增、偏重已甚。乞以產錢均敷、不復更問等第。議



者必曰始科不及下戶、蓋恤之也。今反加賦、可乎。是大不然。今名爲下戶者、實富室也。真是貧乏、十無二三。若仍舊貫、不爲更張、則必盡歸五等之籍、無復可敷之絹矣。又言、身丁錢者、皆出于下戶、欲將所取之額、總計爲絹若干、與和買絹數合爲歲額、止以產錢均開。上戶雖就和買敷身丁、而和買之數則頓減。下戶雖就身丁敷和買、而身丁之免則甚優。上下各得其利、而官賦所入無虧。鈔書仍以和買身丁爲名、用防異時重疊倍敷之患。若有丁無產之民、則又可以全免而爲太平之氓矣。上褒嘉再四、且曰、卿所陳利害甚明、朕卽爲差漕臣與郡守同共措置。又論左帑權出之弊、謂出入之吝、具有科條、物貨權出、勢不能免。此等既非正支、止是私置文記、遇出卽注、纔入卽銷、雖有據憑、終難檢柅。萬一久假不歸、因有重出、不無姦弊。欲從外府印給二簿、付都中兩門專記權出之物、門者

以時拘收、太府每季稽攷。上曰、其弊如此、朕殊不知。卽命行下、至今遵用之。宣諭宰執、天語甚寵。兄前後再對、所陳九事皆蒙睿獎。今錄其施行于時、與其最著者。遷大理寺丞。獄人之司命、廷尉又天下之平、固所當謹。兄尤恪意從事、謂天獄追逮非他處比、一夫所向、閭里驚搖。每見吏牘、必詳究其人、擇不可已者、始稟卿長而行之。旣至、則窮日之力、親加聽察、苟無用拘留、則亟去之。或先有案卷者、豫審事節、一問卽得、故囚之宿于獄者甚寡。拷掠尤稀闊。視之如傷、情實俱露而猶爲度隱者、僅施十數。囚徒至前、未嘗厲威以臨之、斥退吏卒、使得盡其欲言。遇有婦人孺子、深以驚迫爲戒。適有大獄三數、皆曖昧翻覆、最爲難事。兄究見底蘊、處斷公平、不爲勢力顧忌、亦不詭法以惠姦。軍民鬪訟例送寺中、是非立決、率皆厭服而去。由是廟堂相知愈深。士大夫則曰、此真得人矣。始至寺、吏曰、



是爲初官時能決詔獄者。久之、熟見兄官業、咸謂未之見也。兄久去親庭、力求外補。九年四月、差知嚴州。時謁告歸省、拜命于家。未幾、交代奉祠、有旨趣行、不俟臨遣、便道之官。九月到任、郡更旱潦之餘、財用空匱、陋不成邦。逋負動以千萬、督責交至。以郡計訪寮屬、具訴煎熬困急之狀。先是、曹掾筦庫之官分往諸邑、公吏五百又旁午于道、日不暇給。兄曰、郡尙可爲也、何亟如是。悉使歸之、一跡不留也。諸邑旣已肅然、然後使來受要束、盡取財賦本末、審緩急之序與夫當蠲而未蠲、已發而更催者、人皆得以自言。首尾七八日、朝暮相處、如父兄之詔子弟。凡可蠲者、落筆掃盡。其他或爲之倚閣、或爲之分限、其應輸者皆指期至。郡倅貳以下爭以爲不可、兄不爲變。邑無官吏之擾、又罷無名之斂、期會寬而信、欣然承命以行。且各置二曆、緘以紫囊。公文之外、守宰欲有所言、親題曆上、不時往

還、吏不得預聞。其間脈絡貫通、了無壅滯。文移簡寡、上下安便。及期、無一金之負。寮吏聳服。郡始少蘇矣。木枳出于歙郡、由城下以趨錢塘、郡帑賴此以濟。比歲苛取、商賈不通。兄爲之簡節疎目、按舊額而寡取之。會計甫畢、牙儉一爲保識、即縱之順流而下。賈人更相告語、來者益衆。以故三閱月而錢之入大農者踰十萬緡、曾不倍征也。版曹漕司差官相踵至、則與之道其所以然甚悉、又隨所索而應之、相與嘆其通敏。且曰、下車幾何時、洞徹乃至此耶。歸語諸長、故兄之譽益彰。民訟多據案親決、各適其平、受責者亦無辭、舉手加額、稱誦神明者相屬也。外邑番訴、間取其甚者自處之、必窮其情狀、而抑彊扶弱、不爲已甚。有訴喪衣囊于津亭者、期以餉時必獲、已而果然。學校頽圯、所未暇及、兄爲之區處、表裏一新、像設嚴整、士類感嘆、人不知役。或以疑事來諭、從容響答、動中要領、而以愛

民近厚爲先務。近城木場苦于潦水、築牆則善、隤插籬則易壞、或以請、兄應聲曰、種木以環之、則可久矣。聞者以爲難及。大率迎刃而解、庭無留事。馭吏接物、廚傳賓廡、下至舟子軍士之差次、具有方略、人情翕然、愁歎之聲化爲謳吟。傍郡之訴于監司者、亦求直于兄、其感化流聞、有非人力之所及者。十二月、丁先公憂、徒跣扶喪、哀感行路。郡人如失慈父、設祭于道者相望、巷哭以送之。在官僅八十餘日、人謂良二千石終更以去者、未必得此。戶部侍郎曾公逮當今吏師、謂人曰、試郡而辦事者有之、若樓嚴州爲政平靜、百廢具舉、雖老于治民者未易過也。旣歸、追慕摧割不可解于心、力貧謀葬、顏色深墨。十年四月感疾、去卒哭未遠也。閱七日、至五月丁卯、竟不勝喪以歿。嗚呼痛哉。享年五十、官至承議郎、娶馮氏、封孺人。子男三人、澡、滌、濞。女一人、適承務郎、新知紹興府餘姚縣蔣綸。將以

十一年八月壬午葬兄于奉化縣龍潭正議先生之墓左。澡錄兄行事以告于綸、與之相抱持而哭。語之曰、吾尙忍言哉。子之所不知者、吾爲汝書之。嗚呼、兄之所以過人者、天才之優也。然人之有才者、或量不足以容物、或學不能以自將、恃氣而兀傲、矜敏而怠惰、察以爲明、嚴而近刻、爲己而嗜進、計利以自豐者、間有未免。惟兄器度恢洪、莫見涯涘。受人之觸、傍觀爲之憤怒、而辭色不少異。朋友同寮所閱多矣、無不得其歡心。居家作吏、幾無暇日、而學問不倦。尤好說詩、得風雅之深旨。兩薦漕臺、卒困于南宮。筆力日進、動翰如風、對客作書、真行俱精、瞬息數函、不見其勞。嘗見徐公兢作篆、心顧好之、下筆輒工。好事者爭求扁榜、流傳甚多。晚更斂制、稍尋斯冰之體。近方攷證說文、仍集張氏復古與鍾鼎遺文、從韻畧分、欲爲一書、竟不就。錢別慶賀間爲詩詞、皆清新切當、壓倒坐人。此其見



于外者。至涵養饜飫、增益德性、委運自適、則又其所安也。和氣薰然、無貴賤長少與之盡禮。人有所求、惟力是視、告以急難、必傾身以應之。或就之謀、事先究情實、能道人胸中之欲言者、爲之致曲、不翅己事。人亦感其誠而許之、故率能如請者之意。濟則如身得之喜、否則介介若有失焉。蓋其資性篤厚、雅存濟物之心、而才又足以行其志、此所以爲不可學。遇有不可、亦必曲爲言其所以不可者、以曉之。人亦不以爲忤。克勤小物、略不苟簡。所居一日必葺、船居旅次、容膝之地亦務整潔。創造器用、巧思橫出、人取以爲法。終日矻矻、有古人運甓之志。每曰勤則不匱、一有自惰、則不足以立身矣。人之情僞、絲髮不能逃、而自晦其明、含垢匿瑕、如弗聞者。動有規矧、不以己長望人。人有弗及、率歸于恕。徊翔筦庫、知己滿前、不一登權貴人之門。昔人所謂性至通而自然有節者、兄爲近之。心計有

餘、使之利析秋毫、有不足道、而疎財尙義、不問家之所有、貧無告者、時推以濟其須。俸入不足以給用、而食客無虛日。間遇士子就試、親賓坐集、兄豫爲館穀之計、帷帳器用咸備、手行觴豆、彌月無倦色。少閒、又問勞其乏絕、商賈文義、人人自以爲親己。婦家寢寢、輟衣食之資以助之。外舅姑之喪、及葬、皆兄爲之、存歿無憾。再從弟鏞幼孤、求師在所。兄曰、是吾叔父之愛子也。飲食教誨、積數年、遂入上庠。東陽有族子曰溥、以窮來歸。兄育其數口、又爲謀資身之策、溫飽至今。少游西安、與張元晦汝明厚善。乙未、張赴省闈、兄取其新作讀之、曰、君文誠工、而久不售者、正坐用意太深。爲取前三年程文數十通、使熟觀之、曰、是未必勝于子、惟以筆端無滯礙耳。張爽然悟。場屋中一揮成篇、旣在選、謂所親曰、吾霑一第、益友之賜也。其于故舊類此。嗚呼、在私門爲亢宗之子、在公家爲有用之才、德之

感人者深、惠之及物者廣。況復容貌頎偉、素少疾病、謂必將建立事功、爲時聞人、而止于此、是可痛也。故斂之日、親戚交游、下至閭里耄穉、皆相向慟哭、搏膺盡哀。傳聞訃音、交相驚悼、久而後信之。至今弔者尙未絕也。兄亦自度抱負不凡、抗志閔遠、紹興和買之請、旣行、郡民間之、無不鼓舞、且曰、不知是何官來惠吾州耶。帥奏催科方急、未易遽改。上尤注意、令候省限滿日取旨。近臣復有請者、遂遣漕臣以行、僅能蠲減殯宮及寺觀撥賜無名之額、終未能盡如兄之言。兄深惜上意之未究、益訪利害、期申言之、而無及矣。兄之齎志于地下、何止此哉。嗚呼、兄之孝友篤矣。伯氏喪于丹丘、星馳護喪、治葬撫孤、甚有恩意。第八弟鏐之生、先公以多男子之故、命兄育之。撫愛如子、以至成人。澡之居喪、猶實同力以報焉。方伯氏之亡、而諸弟尙幼、每與鏐相語曰、仰事俯育之類、吾二人分任之。鏐自

度才具智略、去兄遠甚、一聽命焉、而悉意以佐其傍。處家從宦、更爲勉勵、欲寡其過、以毋貽親憂。官敕局、丞外府、適相後先、連簷以居、並轡以趨、非敢以爲榮、父母俱存、兄弟無故、誠人間之一樂也。先公七十、同歸拜壽、壬寅屬疾、又同時省侍。已而先公益安、而兄得輔郡、奉雙親西上、鄉曲艷其盛。丞相史公、魏公率里之士、夫大合樂以送之。兄曰、當以一身服爲郡之勞、而使家人女子極奉親之歡、躬調旨甘、又間以政事施設具言于庭闈、以請益甚適也。不幸天禍我家、先公棄諸孤、兄號慕深切、大事未涯、百口仰給、憂苦鬱結、以殞其身。天乎、哀哉。游宦許久、不足以餬其口、生事日廢。幸能以器業自奮、改秩纔四年而得郡絀、卒不及澤其子。竟何爲哉、竟何爲哉。今日之事、固有能言之者、豈真有定數、不可逃耶。世言陰德、隱行有益壽之理、未問兄之平生、以棘寺數月治獄平允之心、嚴陵一

時臨民循良之效、亦宜得祐于神明。而大禍之餘、復不自免、福善禍淫、豈又有時差耶。不可曉也。垂白之母、晝哭之淚未乾、而重以晝夜之哭、門戶責任之重、以兄當之、猶懼不能勝、鑰何以堪之。嗚呼、不可活矣。與澡等忍死以圖竈竈之事、又雪涕以書此。或曰、子之志雖切、詞不亦太繁乎。鑰泣曰、吾兄之亡、斷吾手足、不足以喻其痛。且重悲夫人品才氣如此、而不得顯于用、特書屢書、猶未能形容大槩、以寫吾之悲也。吾暇文乎哉。乃長號授澡而使之求銘焉。謹狀。

樓鑰撰 《攻媿集》卷八五

宋故籍田令知信州王公墓誌銘

共惟乾道、淳熙之盛、俊乂錯出、祖宗德澤之感、前哲風流之被、固非一日、亦惟我孝宗皇帝封培而興作之。是時官無小、士無遠、姓名登聞、朝奏暮召、從容造膝、交啓互發。人知疑必問、問必辯也、莫不

積誠以備對。夫然、故事有中失不可誣也、人有能否不可揜也。淳熙十年、分水縣令王公自中以中書舍人王公蘭特薦、詔赴都堂審察。未至、帝數以問近臣。及見、帝曰、望卿甚久。公曰、昨詣堂、宰執已傳諭聖旨、草茅賤微、何自得此。因反覆敷陳數百言、帝爲動容。徐出二疏、其略曰、臣嘗讀唐兵志有言、蓄兵所以止亂也、及其弊也、反以爲亂。又其甚也、至困天下以養亂、未嘗不爲寒心。今去古既遠、井地之賦不得而論矣。所可論者、唯唐初國無供軍之費、而軍足以待事。故自貞觀至開元、百三十年<sup>③</sup>間、戰勝攻取、伸縮如意。自其法廢、致<sup>④</sup>天下大亂。太祖皇帝有意於更革、而當時議者未能遠謀、故爲今日之計、莫若取唐之意、推而行之。唐初民田皆從官給、今兩淮、荆襄、西蜀、三邊之地、田之在官者、往往散而爲民田、民田正數之外、包占尙多。朝廷務寬邊民、終不致詰。臣請言之。曰營田、曰力



儒藏

田曰屯田、曰官莊、曰荒田、曰逃絕戶田、此邊田之在官者也。曰元請佃田、曰承佃田、曰買佃田、曰自陳、續陳田、此邊田之在民也。曰義勇、曰神勁軍、曰弓弩手、曰山水砦、此邊軍之在民者也。州曰廂禁軍、縣曰弓手、鎮砦曰土軍、其重地皆有戍軍、此邊軍之在官者也。有官軍、有民軍、有戍軍之地、又皆有城池、若可以爲固矣。然有城而不能守、不如無城。今戍軍往來、僅同逆<sup>⑤</sup>旅、人之多寡、不與城稱、號爲義勇者、又爲生生之具、一旦有警、則民必先逃、而軍亦不能守矣。守且不可、奚暇議攻。臣愚謂宜盡以並邊州縣鎮砦、分緩急爲上中下三等、以精卒配之、多者至三五千、人、少者不下數百人。然後以田之在民者、家出一夫爲卒、得免其田稅六七<sup>⑥</sup>十畝。家無常人、人無常數、取其強力武藝堪充軍者而精其選、使勇者知貴、怯者知恥。其民之田多者、聽以田募客爲卒、卒五人以某生<sup>⑦</sup>爲伍長、而

免田稅二百畝、十人則爲什長。田愈多者、軍愈衆、軍愈衆者、稅愈輕、而階級又愈進、入則有主客之恩、出則有部曲之分、租課悉循其初、官無所與、而新募<sup>⑧</sup>流民者、官更量給之、如此則主戶樂出其田募民而爲卒矣。于是因民田之近于州者、三十里內皆使家于州、近于縣者、二十里內皆使家于縣、及新種之時、乃以古制、即田爲廬、田事畢而後反、使與所配之卒犬牙而居、不爲營而爲坊、爲民者因農隙以事武、爲卒者皆分爲三番、而季一上、以給官司之役。蓋一年之間、番上者僅四月、而餘月得自治生。夫如是、則軍民合一、通饋問、結婚姻、皆有安居樂業之念、而吾事集矣。下至鎮砦、亦莫不然。去州縣鎮砦遠、則聚而居之、爲之府、如唐法、上府千二百人、中府千人、下府八百人、立都尉將校之官、爲堡障戰守之具。依險負阻、相<sup>⑨</sup>度經營、務合事宜。名其軍曰衛府、此民田也。官田則官募軍、或





民分屯之、悉從府衛之法、每屯上至千二百人、下至八百人、名其軍曰屯府、此官田也。如是、則並邊之地無一夫非卒、皆思所以保家計、存骨肉、卒然有戎、莫不協心畢力、以事死敵、其與族寓之軍聞風先潰者、功相萬矣。積以數年、屯衛軍益強、官軍缺者勿補、軍益強、費益省、恢復之後、即推其法於西北、而衛屯之軍滿天下矣。然又當先選天下忠良勤幹之賢、不問文武、爲之守令將帥、授以方略、責以事功。賢焉則久其任、且使其子若孫之賢者得世其爵。盡罷諸司而專以總領者統治之、通融有無、品節勞逸、增鼓鑄以給其資、置平糴以收其利。遷移招集、適於便宜者輒行。於是練沿江之屯、以壯邊軍之心、練三衙之軍、以爲順動之備、又練內地州縣軍、以待不時之須。今天下皆設武學、立子弟所、招效士以收翹楚之才。文武並用、軍民雜居、化民爲卒、化卒爲民、使其聲勢足以相接、密疎

足以相維。四頭八尾、觸處爲首、擊其首則尾至、擊其尾則首至、擊其中則首尾俱至。虜若猖狂來寇、則清野入守。虜攻一處、必虞諸處之師、勢不免立營置柵、分兵抄掠。則所在府兵依其鄉井設伏、出奇以破之。若長驅深入、則我表裏之軍夾而蹙之。欲全師而出、則我之諸軍隨而躡之。持重徐行、見可則進。於是六飛親督侍衛之兵出臨江上、氣勢旣合、斟酌號令、明信賞罰、務盡衆善、無一髮差舛。則北方豪傑舍二百年父母之國將安之乎。其二略曰、臣嘗觀自昔興王之世、必有道同志合之士、此不可多得。得四三人或一二人足矣。陛下必已有所屬、臣不得而知也。臣徒怪所在州縣或連數城、以守令問之、民鮮不非笑。是使元元安所倚賴。風俗奚由美。姦盜奚由戢。或重用之、又將何以勝任。奏對之明日、特命改合入官、除籍田令。數語大臣、朕急欲用自中、可與超遷。未幾、又語大臣、自中

必有善類、令舉其所知者。嗚呼、君臣之間、未有相得之素、一朝陳謨、問對蜂出、無慮數千百言、猗其偉歟。後四十有四年、通判紹興王自強以書抵余曰、吾兄道夫有經世大慮、受孝、光兩朝非常之遇、卒困於讒。慶元五年八月癸未、賁志以沒。厥十有一月、葬仙壇故山。中書舍人陳公傅良志其壙、今未有以銘之也。子秉筆太史氏、可使陲沒、無傳、敢狀其事、以惟子也。請按狀、王氏系出瑯琊。五季之亂、自閩徙溫之莆門、高祖父母徙鳳池、葬際坑。公之曾大父正臣、不仕。大父成子、又徙<sup>④</sup>四溪。父<sup>⑤</sup>廷佐、累贈朝請郎、母安人施氏。生三子、公爲長、氣度超絕。年十八、丞<sup>⑥</sup>相葉公夢錫嘗辟塾延之、命諸子從學。明年入都、諸公聞風願交。參知政事周公葵、給事中吳公芾、禮部侍郎王公十朋尤見器重。乾道三年、朝廷議遣歸正人、公嘆曰、是絕中原之望也。詣闕上三疏固爭。其意謂朝廷內虛無賢、掇時

相怒。初議罪、時相面奏云、靖康因士人伏闕幾召亂、嘗著令伏闕者斬。如自中者、陛下前欲從恕、且當遠竄。帝曰、不可。曰、亦須編管。帝又曰、不可。曰、送遠郡聽讀。帝曰、送近處。于是遣之徽州、仍諭知<sup>⑦</sup>臨安府姚令則、差曉事使臣發送。姚面宣上意以戒使臣。是冬、時相去位、戚方以賄敗。公以書自通於尙書周公操、未之識也。得書大悅、率同列白其事、以郊霈得自便、聽讀人該赦自公始。乾道六年春、謁范公成大于西掖、始識韓公彥古、距上書時四年矣。淳熙元年就試兩浙轉運司、爲詩賦第一。四年再舉、登明年進士第。周益公必大爲詳定官、謂公論宣和、大觀事皆人所不能言。暨殿試<sup>⑧</sup>、中第一。孝宗皇帝宣問、籍記其姓名、循修職郎、舒州懷寧主簿。兩淮旱、以賑濟有方、資政趙公彥逾以漕節行郡、舉之以風諸郡。燕公世良代之、以朝命下州、數買六合築城甌、州縣懼乏興、勿敢言。公乃言曰、



早嘆爲虐。而邊臣遽請城築。且以蘄、黃、舒、和、無爲五郡言之。輒以片計二百二十二萬片一十八斤。爲錢三千六百重。人荷四片。爲錢十四千四百。丁庸船。此何從出也。燕用其說。人兩賢之。其後爲令奉常。會監察御史闕。帝善其前對。欲用。公。王魯公謂公嘗言朝士皆不可用。今爲御史則朝士皆當束擔矣。於是忌者併力索瘕。不可得。遂誣公布衣時納韓彥古。今薦其才堪宰相。右正言蔣繼周劾公。方公。上書時。韓在下僚。未之識也。公旣去國。孝宗簡記不衰。蔡邵州必勝陛辭。帝曰。人才不易得。如王自中本無事。等閒教去。心頗念之。於是排沮者益力。明年二月。帝諭輔臣與。邊郡辭以資淺。上曰。且與通判。道授郢州通判。十四年三月之郢。道改知光化軍。初。上諭宰執以見闕。邊郡授武學博士。鄒詡及進呈。上特筆命公。公守邊務。在結人心。固保障。爲民代輸。紹熙元年夏。料役錢。減常貸。

直。免房廊河渡等錢。賞罰有章。人樂爲用。紹熙二年入見。光宗皇帝云。聞卿有忠直之譽。又問常時作郡來。當爲何官。欲留之。公謝曰。朝列有。不相樂者。帝曰。朕嗣位之日。壽皇言卿可用。令朕記取。公固辭。翌日。帝謂宰執曰。王自中以母老再三不肯留。近郡孰闕。守。以常信對。遂差知信州。爲政簡靜。知大體。六邑多逋負。公爲寬補解之。緡嚴當上之數。皆感激思奮。課更以最。期年被命奏事。丁太安人憂。慶元元年二月服闋。監察御史王恬掇拾蔣疏再論公。四年四月差知邵州。中書謝舍人源明封繳。朝廷察其非辜。畀以祠祿。五年。詔填興化見闕。謝猶在後省。同舍又封繳。然未幾公亦病矣。積階至朝請郎。享年六十六。以孝友稱。自奉簡。俸餘悉以給親友之貧者。嘗以差役爲風俗害。率同志爲義社。第貲產以定役次。由是鄉閭息爭。博通古今。文氣奇傑。嘗註孫子新略前後序并歷代年紀。

十二卷、王政紀原三卷、表啓奏劄歌詩五卷。公自號厚軒居士、因以目文集焉。娶林氏、封安人。二子、長遵度、迪功郎、前安豐軍霍丘縣尉。次遵庾。四女子。凡皆狀所述、而狀作于卒葬之年、今追爲之銘曰、  
莫難乎時幾之會、莫樂乎臣主之逢。孰乘壙于陵之時、孰噬肺乎頤之中。弗駿厥庸、以旬我邦。嗚呼、奈何乎公。

魏了翁撰 《重校鶴山先生大全文集》卷七六

王道甫壙誌

嗚呼、此吾友王君道甫之墓也。道甫諱自中、皇曾祖高、皇祖成子。父廷佐、贈朝奉郎。母施氏、封太安人。道甫登淳熙五年進士第、調舒州懷寧主簿、嚴州分水令、未上、以樞密使王公藺薦、除籍田令。未幾、罷、通判郢州、未上、知光化軍、信州、召赴行在。丁太安人憂、服闋、再被召、以論罷、主管建寧府武夷

山冲佑觀。起知邵州、興化軍。連以論罷。興化之命下、道甫已病、慶元五年七月也。八月二十三日卒。官至朝請郎、年六十。娶林氏、封安人。二子、長曰更生、次幼。四女、長適國學內舍生高熙績、餘許嫁進士曾充宗、周伯麟、林浩。道甫居溫之平陽歸仁鄉。晚徙縣之橘莊。雅愛仙壇僧屋之後山、因以爲墳。十有一月二日、林夫人奉其柩葬於此。人皆知道甫少有志當世、嘗以布衣上封事、及對、語合上指、除官。纔數日、趣舉其類奏上、道甫由是絀光化。入覲、今上皇復有朕得卿名於壽皇之語。道甫竟由是死云云爲恨。不知道甫歲晏、抑才爲學、去智爲恬、假之持久、何造不深。余欲銘道甫也、以此而未克就、故識其壙云。

陳傅良撰 《止齋先生文集》卷五〇

朝請大夫直龍圖閣致仕沈公墓誌銘

嘉定五年三月朏、越明日、朝請大夫、直龍圖閣沈



公卒。於是宜人強氏歿十三年。五子、二女。子曰燁。曰鄉貢進士焯。曰嫁承直郎扈武者亦已卒。十二月晦。進武校尉傑從事郎監提領所羅場門燾。迪功郎監鎮江府東比較務然免解進士王唐卿葬。公於開元鄉管社山。與強氏同藏。而使來請銘。沈氏自漢以後冠冕名聞之盛。代不絕於烏程。公六世祖遇。始別居常州。至曾祖宗道。猶未能以仕顯。至王父復。考松年及公。皆中進士第。復爲朝奉大夫。松年登太學爲博士。而公教授處州。掌刑工部架閣文字。國子錄。太學博士。樞密院編修官兼實錄院檢討官。秘書丞。著作郎。贊讀嘉王府兼兵部郎官。遷起居舍人。起居郎。皆兼侍講。有位有賢。相繼益章。然後無錫之。沈始亢其大宗。公諱有開。字應先。少學。志其大者。張欽夫。呂伯恭官京師。浙西士不知敬。公獨從之。薛士隆。陳君舉客於毗陵。公又從之。心爲範防。物爲經制。脈理灌輸。而不以文

字華藻給口耳之求。人視之憤憤。而公陶然有以自樂。不顧也。蓋晚乃奏上舍名。朝廷方選舊人使教國子。而公在焉。竟講下簾重扉深拒。未嘗妄請謁。留丞相異之。喚語揖坐。常聳聽移日。當是時。丞相患淳熙末知名士不采察。而沈廢於賤冗。數年間拔用幾盡。士懽喜誦說。以爲自趙元鎮。陳應求纔有此爾。丞相既得譽於天下。而公陰贊密請。力尤多。天下雖知公助之。而莫知其所以進者何人。公默不以語人。雖子弟亦莫知也。然不悅者固已忌公。及教嘉邸。反覆深切。尤詳於君子小人之際。則忌益甚。上即位。欲習知國家事。故宮僚二三人日再宣。引入禁中賜坐。問民疾苦。皆非前例所有。由是忌者合勢相與排公。最先罷。又以危語中之。坐廢斥十年。公恬不爲動。已而稍悔寤。使知徽州。不得已強起。屢求去。奉使江東。迎吏守門迫公行。固不往。復以知太平州。遂乞致仕。又幾十年。年七

十九而後卒。其居家、無酒肴燕舞、僮奴衰落。終日整坐、間行視園中草木。所從惟耆年久故。南北之過賓及有職任於時者、皆辭以老病、不見也。嗟夫、士非不欲自賢也、迷謬於趨捨操術之異、顛沛於得喪憂樂之殊、壯而合、老而悖、而得其所謂賢者鮮矣。公學不銜於繁而能守其要、及其用也、不榮其身而思以畀其徒。終其老也、安以儉退而無累於得。三者人之大節、而公兼之、斯其爲賢也歟。銘曰、

蘇常中間、季子所國。地卑而爲野兮、無錫之山繚而特。水汙而爲澤兮、無錫之泉洌而食。允矣沈公、以配茲德。

葉適撰 《水心文集》卷二一

何君墓誌銘

初、東萊呂伯恭以經學教授、天下之士靡然從之、而其所居鄉諸生、能自表見者爲多。吾宗同甫又

嗣興之。繇是東陽學者、視它郡盛矣。有何生造者、與其族師說、一日以謁至余、望見生容止恂恂、其東陽學者耶。與之語、出同甫所遺書、果道生之父善教子、逮學於伯恭甚久、造適遇述、則皆從邵康伯之學。伯之之學、蓋亦本呂氏。書又言、逮至今、能卒乃父教事、諸咸受其兄教令、爲學不懈、如父在時。古者重師友、不以其關繫風俗如此哉。生以將耐其母杜氏夫人於父之墓、旣得銘於同甫、而以追銘其父來請余。余雅不善爲銘、且杜氏之銘、併著夫君行誼甚美、雖欲銘之、必亡以出同甫之意外。然旣喜得生、又聞知其鄉學所從來、於吾心有感也而次之。君諱松、字堅才、曾大父諱、大父粹中、父汝能。何氏來徙婺之金華、蓋不知若干世、而家東陽者、於君四世矣。以善輯柔其鄉大姓、積貲至鉅萬。享年四十八、於淳熙辛丑八月壬申卒。越二年、得癸卯十月己未、葬於縣松山鄉寶山原。五子。



藏 儒

女四人、婿郭江、鞏嶸、餘未行。孫三人。娶杜氏、後君六年卒、於是祔。以君才力、曾不得嘗試於世、其平生不可得詳也。余聞志莫難行於家、名莫難著於鄉。如君之內事治、與學士大夫無異、不但整齊之、詩書之習藹然其方興也、斯不謂行於家乎。入其國、欲知其人、顧衆所尊信者與否何如爾。同甫數數爲余言宜銘、斯不謂著於鄉乎。以此可以觀考其餘矣。銘曰、

相爾同穴、有美不亡。以余銘君、豈亦可長。

陳傅良撰 《止齋先生文集》卷四八

校記

- ①遠：原作「遷」，據四庫本《鶴山集》改。
- ②故：原作「放」，據右引改。
- ③年：原作「之」，據右引改。
- ④致：原作「改」，據右引改。
- ⑤逆：原作「送」，據右引改。
- ⑥某生：疑當作「其主」。
- ⑦募：原作「幕」，據右引改。
- ⑧相：原作「祖」，據右引改。
- ⑨功：原作「攻」，據右引改。
- ⑩爵：原作「鬱」，據右引改。
- ⑪招：原作「照」，據右引改。
- ⑫才：原作「方」，據右引改。
- ⑬沒：原作「院」，據右引改。
- ⑭徙：原作「徒」，據右引改。
- ⑮父：原作「曾」，據右引改。



①⑥丞：原作「承」，據右引改。

①⑦知：原作「之」，據右引改。

①⑧試：原作「射」，據右引改。

①⑨虐：原作「雪」，據右引改。

②⑩用：原作「遂」，據右引改。

②⑪可得：原倒，據右引乙。

②⑫公：原作「言」，據右引改。

②⑬與：原作「在」，據右引改。

②⑭有：原作「省」，據右引改。

②⑮闕：原作「關」，據右引改。

②⑯孰：原作「就」，據右引改。

②⑰噬肺：原作「就肺」，據右引改。

宋儒碑傳集卷一百三十九

蔡元定 林暮 林周卿 孫逢吉 謝零

程洵 劉人傑

蔡元定傳

蔡元定字季通建州建陽人生而穎悟異於常人八歲能作詩文十歲日記數千言其父發示以西銘等書既又示以程氏語錄邵氏經世張氏正蒙且語之曰此孔孟正脈也元定自幼而沉涵其義既長而辨析益精時建安朱熹爲學者所宗遂師事焉年四十不就科舉太常少卿尤袤秘書少監楊萬里以律曆論薦于朝召之以疾辭既而西遊襄漢循淮渡江道建鄴經都城朝之名宿無不傾倒有欲言于上而留行者即日命舟西歸自韓侂胄專政十餘年間指道學爲僞學引繩排根以傾善類然莫敢誦言攻朱熹者繼何澹劉德秀爲言事官輒上疏詆之且及其從游最久者元定知不

免嘗簡學者劉礪曰化性起僞烏得無罪未幾命下謫道州親故送別酒酣賦詩有曰執手笑相別無爲兒女悲衆皆謂宜緩行元定曰獲罪於天天可逃乎至道州來學者漸衆元定憂之曰神人惡衆吾殆不免也與諸子書戒以死生有命訓其自脩曰獨行不愧影獨寢不愧衾勿以吾得罪故遂懈其志在道逾年一日謂其子沉曰爲我謝客且安靜俟命凡九日命移寢正室而卒時慶元四年後九年侂胄誅始贈迪功郎元定天資高聞道早於書無不讀於事無不究而尤精於天文地理禮樂兵制度數凡古書奇辭奧義人所不能讀者一見即解朱熹嘗曰人讀易書難季通讀難書易又曰造化微妙惟深於理者能識之吾與季通言而不厭也及葬以文誅之曰精詣之識卓絕之才不可屈之志不可窮之辨今不復見矣天之生是人也果何爲耶學者尊之曰西山先生所著書有大



衍詳說、律呂新書、燕樂原辨、皇極經世、太玄潛虛指要、洪範解、八陣圖說、陰符經解、運氣節略、脈書、傳于世。叙正邵氏曆法、未就。子淵知方、沉沈能卒其業焉。

杜範撰 《清獻集》卷一九

貢士林君丕顯行狀

君姓林氏、諱暮、字丕顯、福州連江縣鄭崎人。鄭崎、州之東南海中、水環之、去市郭絕遠。島居之民耕且漁以生、罕業儒。儒名者率狹陋守尋常、無超越之見。君少穎悟、讀書不數反、輒成誦、爲文操紙筆立就。從鄉之儒先三山林公遊、與東萊呂先生爲同舍生。東萊先生年最少、少於君且數歲。先生所爲詩若文、輒手抄默誦之。其後先生以道德文章爲四方學者師、搢衣從者數百人。君聞之、慨然曰、吾得師矣。裹糧浮海、跣首受業。從諸生後、惟謹。君年四十有二矣。先生方哀集諸儒詩、春秋之說、其

所編次、君與有力焉。諷玩抄錄、窮日夜不少懈。勞心疲精、甚或眩瞽僵僕、幾不可支持。少定、復據案誦習如初。先生常曰、此閩中瑞物也。每舉其立志用力者以誨諸生焉。語及當世名儒、歛衽起敬、而於武夷朱夫子尤拳拳不少忘。後嘗一再侍函丈、猶以貧且老、不得朝夕見聞。其鄉人有嘗從學於夫子者、雖後出晚輩、必造門願交。孜孜扣問、樂善好學之意、至於老而愈篤也。其天資樂易純實、事親孝、友於兄弟、於親故之誼尤篤。平居與人言、怡然惟恐傷之、雖待子弟僕隸亦然。家庭瑣碎、心事隱微、雖毫髮未嘗有所隱於人。方從學金華、母夫人鄭氏尙無恙。君思親之在遠、中夜感念、歔歔以至泣下。及歸、鄉人慕君之賢、郡文學以禮延致之。居數月即引去、曰、不遠千里而辭其親者、爲道故也。今又安能舍其親而爲人乎。即歸杜門、竭力致養。執親之喪、哭泣悲哀、鄉人不忍聞。旣反、哭曰、



吾朝夕侍吾親而忍一旦離之乎。晝奉几筵、夜宿墓下、更三年如一日。名其所居之廬曰著存、除喪猶不忍去、廼率其子弟若兄弟之子肄業焉、終其身。平生未嘗計資產豐約、兄弟同室無間言。輕財急義、朋友之貧者力調之、衣服囊篋恣所取。至有背義忘施而復請於君者、君待之如初、無毫髮怨望、靳惜意。君家伏臘本粗足、卒以是取困乏、鄉人皆嗤之。君曰、吾有讀書教子而已、貧富貴賤、天也。死之日、家無餘財、朋友善類無不爲之齎咨灑涕者。嗚呼、人之所以溺於利慾之私、而忘其天理之樂、資不美而學不足也。世之所謂學者、又不惟取科第、夸聲名、則反以濟其利欲、而斲喪其良心。若君者、乃能於大海之濱、荒茁之隈、超然知以從師問道爲事、而不惑於世俗尋常之見、豈不賢於人乎哉。君之曾祖、蘇祖□、父元炳、皆隱德不仕。至君始獲與薦書。娶柳氏、潘氏。子二人、審向、審尙。女二

人、長適將仕郎趙汝渙、次未行。君以紹熙癸丑年正月卒、享年五十有九。將以甲寅年後十月葬於金聲坑之原。審向來言曰、先人之友最厚者莫如君、知先人之志趣行事最詳且實者宜亦莫如君。今不幸先人歿、不次其事、無以發先志、示後人、敢以爲請。幹、卅角聞君名、旣冠從師於武夷、金華、遂獲與君爲忘年友。二十餘年之間、辱君之教、而於金華之日、相與爲最密、故知其所以爲學者尤詳焉。遂不敢復辭、而次其事之大槩如右。謹狀。紹熙五年九月日、江夏黃幹狀。

黃幹撰 《勉齋先生黃文肅公文集》卷三三

### 通直郎致仕林公行狀

公姓林氏、諱周卿、字少望。林氏爲閩大姓、孝友之風、著自古昔、散而處者、亦多聞人。公之先占籍福州之江南、五世矣。江南爲州之中土、其俗質實、渾厚。故公之家世皆以篤行厚德稱於閭里。公敏悟

端重、色溫氣和、襟懷坦夷、與物無競。少從合沙先生鄭公少梅學、通易大旨、所交遊皆世名勝。及壯失所怙、事母馮氏、年八秩、公鬚髮皓白、怡愉戀慕、有嬰兒之狀。處兄弟友愛、常恐傷其意。貲產厚薄、一不經念、悉推祖父遺業奉其兄。鄉閭有同氣爭產不平者、必舉公盛德以爲訓。仲兄蚤世、撫其孤女、使有所歸。宗族單微、婢獨不能立、死喪嫁娶、不能舉者、極力調之、無倦色。其居家未嘗厲聲怒容、居鄉未嘗後人先己。趨人之急、如己隱憂。聞人之善、若自己出。以是服公之仁、慕公之義者、內外老稚無間言。公自少遊場屋、已嶄然見頭角、人固蘄公以大其家矣。已而蹭蹬不遂、公處之恬然、安貧守義、擇師教子之外、無他念。公之子司業君垌、遂入太學、連中有司、竟以舍選魁多士、出綰郡紱、入儀天朝、斑衣爛綵、極其孝養。公亦未嘗少易平素。遇貴賤、必與之握手劇談、無復畦畛。語及桑梓、則

動心墮淚、不知宦遊之樂也。會兩學與京尹競、司業君謂待士宜以禮、力爭去國、兩學諸生扣相府門乞留者數百人。公以得歸爲幸、趣家人指日就道。既歸、即所居之旁鑿池築室、樓以儲書、亭以宴客。草木成陰、風日晴燠、親賓畢集、醺酒高會。年幾九十、視聽步履不減少壯、飲食倍人。儀狀甚偉、聲音滿堂。進拜公於前者、不知其已老也。忽晨興、命家人取瓜果杯勺羅列庭下、公起攝衣、焚香酌酒以告曰、某年八十有六、天地芘護之力也。生平心事毫髮不敢欺、請酌此而逝。又呼兒孫下逮僕隸、飲以辯曰、人生如寄、吾年至此、尙復何望。此心無累、可行即行、今與汝曹酌此而別。越三日、疾有瘳、家人問安否、公笑曰、清明即行。至晚命浴、索酒一飲、整襟正寢而逝。嘉定庚辰六月十九日也。其達於窮通死生之變如此、則公之處於家於鄉者、又不足以盡公之蘊也。公寬厚博大人也、豈若是淺



儒藏

丈夫然哉。利害未毛髮許、兄弟骨肉反自如仇讎。榮辱得喪之際小不如意、則戚然若不可以生者。一旦意得志滿、則前恭後倨、視故交如路人。於公得無愧乎。公教其子以書生起家、名聲震當世、立朝挺挺有風節、不可謂無所自。以子恩封至通直郎。娶陳氏、追封安人、先三十二年卒。子一人、司業君也。孫男三人、昌嗣、昌壽、昌敬。昌壽國學生、餘業進士。孫女五人、長適國學生陳嘉謨、次迪功郎、前潭州湘潭縣主簿陳興龍、次勅賜同進士出身魏復亨、次進士黃輶、次尙幼。將以是年十二月十日葬于移風鄉龍灣之原、從先兆也。幹於公爲後輩、獨嘗拜識公於三十年之前。旣與司業君爲筆硯交、後復託姻婭之好、於公行事知之審矣。司業君以述公之行見屬、不容辭、謹掇其梗槩、以諗來者。謹狀。

黃幹撰 《勉齋先生黃文肅公文集》卷三三

寶謨閣待制獻簡孫公神道碑

開禧三年、歲在丁卯、余以衰疾引年、幸而得謝。因自念以凡才叨近列、一時同朝多君子寮、投閒以來、相忘道術、遂隔死生者多矣。忽得故吏部侍郎孫公從之之子新瑞金西尉鏐之書、寄示從之行述、且曰、先公不幸、薨于慶元五年四月之丁丑、葬未有銘、因仍八九年。重不幸二兄俱蚤世、凜然門戶之託、惟先友有以碑于隧道、以惠顧九京、以少贖不孝之愆。余執書以泣曰、方公之薨、余方遭嚴譴、不得致生芻于前。已而又自遭內艱、憂苦無生意、以至于今、悲愧多矣。老而學落、本不足以銘公義、激于中、有不容已。閱五年、始克謹撫行實之大概、序公平生而繫以銘。公諱逢吉、從之其字也。先世居南蘭陵、五季避地于吉之太和。五世祖德弼、奉其父銀青霸之命、徙名數于龍泉、今爲邑人。曾祖文、妣李氏。祖叔遇、通經博古、倜儻有奇節。雅不

喜王氏學、棄科舉不就、尤爲里人所推。晚以經旨授諸孫、卒昌其家。公以按行阜陵、恩特贈承務郎、妣李氏。考宜文行尤高、兩上禮部而不及祿。以公貴、累贈奉直大夫。妣羅氏、贈令人。奉直三子、公居長。次逢年、終上猶令。季逢辰、終袁州守、俱中儒科。里人有三傑之稱。公生于紹興五年、時方俶擾、學士解散。公就學雖晚、而資實俊邁、課藝穎出、父祖奇之。自弱冠三薦于鄉。隆興元年擢進士第、調左迪功郎、郴州司戶參軍。乾道四年、校試長沙、場屋喧動、同列踰垣避之。公諭以義理、衆方帖息。尙書沈公介爲帥、給事黃公鈞領漕計、相與愛敬。沈公留寘幕府、御史剛嚴、無敢忤其意者。公自以受知之深、知無不言、未始一語詭隨。始若難合、終必垂聽。豪民匿罪、越訴捕之不獲、吏執其子于獄、麓書院。沈公怒甚、旣得其父、必欲併杖之。公獨不僉書、且曰、父有罪、子不知情、何可從坐。爭之數日而後

得、因力辭攝事而歸。沈旣薦公、關陞旣而又畀以京削。或謂公未可用。沈公曰、但知舉賢、安知其他。歸欲力薦于朝而不果。七年、陞左從事郎。黃公還朝、薦于廟堂、欲處以學官。公以二弟游宦、懼闕子職、授常德府教授。會侍郎李公燾出守常德、以史局自隨。熟聞公之該洽、先以書約、見于公安。傾蓋之頃、質以數疑、公了辯如響、恨得之晚。且曰、儀曹有京削、留以待鄉人、今日不可失士。亟以畀公。樞密劉公珙、少司成鄭公伯熊、劉公焯皆有重名、薦章交上、初不識面。淳熙五年、改宣教郎。太令人春秋高、不忍去左右。閱兩歲、令人強之、始授袁州萍鄉縣。公以學道愛人爲心、不爲赫赫名、而慘怛惠利之政出于至誠。值歲大祲、待哺者數萬、荒政皆有實惠、不爲便文逃責事。已而得雨、又教民芟旱苗、養禾孫。是歲饑而不害。例有添給、別貯之、久而盈溢、輟四十萬市穀、創社倉以濟貧乏。擇賢士主





之民賴其利。催科不亟不徐。行雨露于膏火中。民亦樂輸。縣計既裕。稍蠲其餘。還以予民。邑之西北。土瘠民窶。受役甚苦。公與錢市田。教之義役。縣苗稅素重。爲裁酌而損其額。又以餘力代貧民之賦。爲錢四百餘萬。馬驛三在境內。歲有繕修芻藁之擾。事又不集。公既葺其陋。又糴粟以給之。遂有經久之計。修學市書。督課諸生。身爲之師。士風大振。公之政直可比古之循吏。非有矯飾求名之心。而邑當孔道。謠誦藹然。起居舍人吳公燠出使湖陰。過縣。貽書江西諸司曰。部有賢令如此。雖欲蔽賢可乎。諸臺競列上治最有旨籍記。士民亦至今歌之。代還。丁內艱。服闋。家居又久之。十三年。幹辦行在諸軍審計司。十五年九月。遷國子博士。十六年。光宗覃恩。轉朝奉郎。賜緋衣銀魚。六月。除司農寺丞兼實錄院檢討官。紹熙元年五月。徙秘書郎。八月。兼皇子嘉王府直講。二年二月。雷雪交作。詔求

直言。公疏八事以獻。一曰去蔽諛。二曰親講讀。三曰伸論駁。四曰崇氣節。五曰省用度。六曰惜名器。七曰拔材武。八曰飭戎備。明白剴切。深中時弊。輪對。論今歲初郊。請遵用隆興二年詔書。節用惠民。以當天心。上諭公曰。園壇不尙華飾。亦事天簡素之意。又曰。中外支賜合從減省。復勸上容納狷直。併論和買折帛之弊。上喜。悉可其奏。會諫官鄧駟請增諫員。即擢公右正言。首奏。帝王經世之學。根于一心。大而陰陽寒暑之變化。小而人民事物之統紀。皆係于此心之運。此心融徹。發之政事。則天地可位。萬物可育。舉無難者。其言甚備。時營繕浸廣。一第之建。撤民居數百。咨怨者衆。公力言其弊。公自以受天子特達之知。思欲補報。切磨治道。七旬中。章二十上。多人所難言者。期于不負所學。無復顧忌。故亦不得久居其職。臨安守潘景珪交結謀進。鄧公疏其罪。反以計傾之。鄧移大匠。公曰。名

爲優遷而罷其言職。後不可爲矣。兩疏不報。再對。復論言路壅塞。諫臣結舌。天下利害無由上聞。願留神于逆心遜志之戒。則雖失之于前。尙可收之于後也。併論景珪脅持臺諫。蔑視紀綱。連章劾奏。竟逐之。未幾。公亦有遷官之命。大臣奏踐阼以來。屢易諫臣。非所以示中外。若以二監處之。必不肯留。遂除國子司業。辭不拜。上諭旨曰。士論所推。此師儒之選也。不得已就職。而求去愈力。公之初除。或議其弱。丞相留公正曰。是有仁者之勇。上之親擢。得人矣。及是。丞相曰。某有獻替。上豈能一一垂聽。然不敢以是求去也。公對曰。宰相與諫官不同。宰相平章國事。不能無可否。官以諫爲名。是專以言爲職業也。不得其言而不去。人將狗彘我矣。烏可與丞相比哉。君相知其不可奪。九月。遂除荆湖南路提點刑獄公事。兩學之士數百人出祖關外。人謂中興以來。纔一再見。公褰帷入境。風采凜然。

守法度。識大體。不專按刺。傳經決獄。多所貸宥。案牘盈几。披閱參攷。決遣如流。未數月。文書爲清。民亦自以爲不冤。尤篤意人物。太府卿項安世。吏部吳鎰。方銓。工部徐應龍。皆所薦也。五峰胡先生宏之子大時。元城劉先生安世之曾孫孝昌。俱隱衡嶽。公請官之。以繼賢人之世。事雖不行。聞者韙之。兩攝漕事。通融有無。深得計度之體。衡之茶陵秋輸特重。公曰。昔祠官使臣大軍。仰給于邑。不免加賦。今則咸無焉。尙取贏可乎。量出計入。蠲十之三。令下。歡聲如雷。邑人相與作佛家道場。三晝夜。以報伐石刻詞。至今尸而祝之也。愛惜公帑。不以毫髮自奉。諸臺月餽。隨以還之。一無取焉。參政陳公騭。首疏六名士。公在其中。上亦念公久外。嘗曰。孫逢吉。好士人。三年九月。召爲秘書少監。訓詞有當。今第一流人物之褒。承上意也。五年。朝謁重華。不以時。公數具疏。援引古誼深言之。又率同館列名。

以進。七月、主上受內禪、登用舊學。越三日、擢公兼權尙書吏部侍郎。初、公入諫省、翊善黃公裳曰、孫直講問學醇正、勸講多益、今遂失助。上曰、言路得斯人、尤可慶也。又言、所論有不樂者。上曰、旣爲言事官、豈可不使之盡言。蓋上之在嘉邸、知公已深。至是首陳初政、有曰、陛下嗣膺大寶、蓋非得已。願起敬起孝、數申溫清、撫接宗戚、俾之開釋、太上推明陛下之本心。乃若建立長秋、推恩隨龍人之屬、皆可緩也。又請進學以養其明、揆事以審其斷、凡立政造事、皆明以先之、斷以輔之、則守經事而得其宜、遭變事而達其權、天下可運于掌矣。上欣然納之。覃恩、轉朝奉大夫。九月、除權尙書吏部侍郎、賜金紫服。明堂恩、封廬陵縣開國男、食邑三百。嘗告丞相以和買折帛之價太重、宜因初政稍議蠲減、庶可固結民心。丞相舉行之、然止限以三年、非公之本意也。十月、擢兼侍講。公在嘉邸、嘗集羣經

格言以獻。至是請講論語。蓋公平日潛心此書、有自得之趣、欲以遂格君之志也。差充孝宗殯宮、按行使、朝方議撤秘書省以爲壽康宮、而以東宮爲館閣。公毅然力爭、謂于理非順、地狹屋敝、不可以奉慈極、事亦竟止。待制朱公熹在經筵、持論切直、忽奉祠而去。公于上前爭論甚苦、因講權輿之詩、反覆紬繹以爲諷。上曰、朱熹所言多不可用。公曰、熹論祧廟獨與衆論不合、他所說皆正理、未見其不可施用。願留之以重經幄。冬有震雷、詔求闕失。公言過失所當謹者二、曰奉親、曰親儒。闕違所當講者二、曰謹爵祿、曰節用度。又論治體之要曰治化之原、肇于宮壺、而達于外廷。宮壺嚴則內外之禁肅、外廷正則上下之職修。后妃之家多啓私謁、嬪御或養私身。願擇老成宮嬪佐六宮之政。內侍本備掃除、自閣長而上、願遵舊制、選年四十以上者知內省之事。樞宰之職論道經邦、願萬幾之暇、



從容與之議政。近習之臣、職在禁密、願全其恩數、勿使預事。上深然之。十二月、假煥章閣學士、提舉萬壽觀、兼侍讀、充館伴金國賀正使。金使需竹牛角之屬、期以必得。公奏、皆難得之物、戎心無厭、當遏之于初。大璫王德謙典司國信所、密請匪頒、公卒卻之。慶元元年正月、兼實錄院同修撰使。事畢入對、因奏、臣比緣館伴、刺求北事、竊聞自孝宗上賓、浸有輕視中國之心。此年公卿習安、將帥習嫵、士卒習惰、風俗習侈、上恬下嬉、無復有枕戈復讎之意。願陛下拔材賢、旌循良、核名實、蓄財用、選將帥、簡精銳、城要害、備器械、講求孝宗內治外攘之策。上尤嘉納。而公于是時已有不見容者矣。待制朱公熹之去、公力救之。侍郎彭公龜年補郡、又論不應爲近習而逐正人、忤韓侂冑之意。又嘗扈蹕、有馬上迴揖之者、公獨不顧。彼又以爲簡驩也。一日、會食部中、或報王喜除閣門祗候、公曰、此乃優

伶、嘗于內廷效朱侍講容止、以儒爲戲者、豈可以汙清選。當抗疏力爭、否則于經筵論之。有飛語上聞。五月、內批與郡、而王喜之命亦寢。或以爲出于誤報、而公憂國愛君之心亦云至矣。潛邸恩、轉朝散大夫。七月、除知太平州、累章丐祠。九月、提舉江州太平興國宮。三年、轉朝請大夫。五年三月、起知贛州。言者始疏前事沮之。公素有德量、未嘗語人以去國之由。杜門深居、時事一不掛口。書史自娛、不以得喪介意。至是以言者傳播、公之直節愈顯。而公已屬疾、上章納祿矣。終于里第、壽六十有五。五月、除集英殿修撰致仕。嘉定五年、上以公舊學、軫其遺忠、特贈寶謨閣待制、仍度越彝典、賜諡獻簡。娶李氏、累封令人、與公相繼而卒。子男三人、鉢、承奉郎、監鄂州在城鹽稅務。鉢、迪功郎、新臨安府餘杭縣尉。季即鉢也。女五人、進士李三聘、李拓、羅沂、迪功郎、前臨江軍司戶羅晟、通直郎、前知南康

軍都昌縣事胡杙其婿也。孫男四人、渙、溱、溍、溥。女一人尚幼。六年十一月乙酉、葬公于萬安縣龍泉鄉綿津之原。公資稟醇澹、于外物一無所好。惟刻意經史、不可解于心。自幼至老、手不釋卷、務爲有用之學。尤精于國朝典章事物之源委、宦族之譜系、除拜之歲月、與夫前代疆理卒乘之法、封國行河之利、參貫融液、無不通流。修世教、植治道、誠有志焉。發爲文詞、以理爲主、以意爲先、體制具備、關鍵嚴密、簡而有法、不爲綺麗之習。晚歲自號靜閱居士、有文集七十卷、外集三十卷、藏于家。左規右矩、言笑不妄、恂恂似不能言。遇人無賢愚、貴賤少長、咸接以禮。平實誠懇、表裏如一、修身踐言、樂于聞過。遜賢達善、心無媚忌。喜怒不形于色、而正大剛方之氣、有臨大節不可奪之風。以鑰平昔之所見聞、攷之胡君之行述、不隱不誣、足以傳遠。而瑞金必欲以銘見屬。老復病瘁、豈敢言文。念公之三

子而失其二、余亦視蔭幾何、有不能已者。與公爲同年、初未相知。晚幸定交、情義至篤。爲少司成、則實爲交承、出入從班、又爲寮于講讀之官。余與給事林公大中于晚講之次、論救呂祖儉之貶、公從旁贊言尤力。嘗論日食事、謂上即位未久、多有陰翳、一得明照、必有背氣等變。三月朔、去正陽之月、一聞、先一日大雨、謂必以陰雲不見。至朔日乃瞭然、使萬目見其剝蝕、天之示戒如此。公又奏曰、至次日則又雨。此雖片言、爲助多矣。當紹熙、慶元之間、上旣隆寬、下亦多盡言、余幸周旋其間、固有激于忠憤、不容不言。惟公天與諒直、事君不以犯顏爲難、與同列不以忤意爲憚。劉德秀爲諫官、以私意劾左史劉光祖、公謂之曰、人君寄心膂于宰相、寄耳目于臺諫、皆當以天之心爲心。倘任私以害忠良、如彼蒼何。願自此三思而後行。其盡言類此。居之不疑、惟義所在。嗚呼、斯人而在、諫爭論思之



列可謂天下選。時非不遇、位非不至、而道卒不行。任以史事、尤爲當才、相與論修史之規模甚備、汗青無日而身去矣。嗚呼、殄瘁之悲、識者所同、孰知余心之悲有在于此乎。銘曰、

帝王之興、四門以闢。無人不言、猶恐不力。官以諫名、惟言是職。視古已狹、言又不得。憂世之士、所共太息。孰爲敢言、爲糾邪慝。矯矯孫公、古之遺直。學爲有用、博聞多識。其處友朋、直諒三益。幕中之辯、不爲婉畫。一登諫垣、身任言責。有犯無隱、撻鱗之逆。天姿則然、不動聲色。鯁論日聞、不容煖席。召還蓬山、上方御極。首擢從班、寵光赫奕。經帷史館、人望丞弼。遑遑靡寧、期補君德。飛語中人、又成去國。命非不通、而道之塞。不容何病、爲天下惜。銘以昭之、後人斯式。

樓鑰撰 《攻媿集》卷九六

承議郎謝君墓誌銘

余家世業儒、五世祖正議始以鄉先生決科起家。五子俱傳業、而季子夢弼諱肖尤攻小學、又傳其五子。其仲元應諱奔、獨殿諸老、說文解字、經典釋文始末通貫、幾于成誦。鑰侍教累年、故頗知字學。客授東嘉、與諸名士游、獨謝君季澤最爲同好、相與攷訂文字、毫髮必計。後十五年、復叨假守、時過郡齋、晤語甚樂也。別後時見其筆畫愈工。余旣投閒、聞其亡矣。亡又十五年、當嘉定四年、得其子有開書、以銘爲請。旣列君之行實、又以張忠甫所作乃祖志銘、陳君舉序君所著正字韻類五卷來。撫其書、爲之傷歎。此眞季澤留意之書也。因爲掇其大概而系以銘。君諱雱、季澤其字也。溫之永嘉人。曾祖文淵、祖君任、有鄉行。父知柔、嘗居瑞安之樂善里、里人稱樂善先生。君仕升朝、贈承事郎。母張氏、贈孺人。兄黔、有聲上庠。君性穎悟、承父兄之訓、博學強記、自經子百家之書、皆手自校定、音訓句



讀一一不苟。以是文亦日進、援筆立就、不爲艱深之辭。紹興三十年入太學、乾道五年登進士科、授左迪功郎、福州連江縣主簿。丁母憂、服除、再調台州司戶參軍、關陞從事郎。淳熙十二年、爲高郵軍軍學教授。改宣教郎、知福州寧德縣。主上覃恩、轉奉議郎、賜緋衣銀魚。慶元改元、年勞轉承議郎。三年、以疾卒于官、享年六十有三。娶萬氏、有婦道。先君五年卒、贈孺人。十一月庚申、合葬于西山廣惠院先塋之後山。二子、有開、有大。孫四人、師中、師善、師愈、師心。女三人。君講學務出于正、早受知于舅氏端明忠簡張公聞。忠甫名淳、君之內兄、君舉名傳良、又張氏壻。龍圖鄭公伯熊、毗陵薛使君季宣、皆里之名公。周旋其間、不扶而直。聞佛老、巫覡之說、必深排之。既仕而知者益衆。丹丘郡用不足、取于民者多。居嘗受輸、爲之撙額外之求、宿蠹一空。五邑稱之。朱公熹爲庾使、風裁甚高、一見君如故

交、留語或至終夕。屬以荒政及滯訟、以辦集稱。祭酒李公祥爲淮南提舉、薦四人于朝、籍記中書、高郵教官預焉。錢公之望爲帥、舊與君同舍、知其才、訪以民瘼。君爲論科買瓦、甃薪葦、泊差役工匠之害尤悉。師得書、喜曰、仁人之言、其利溥哉。下屬郡盡蠲之。及試邑日、危坐聽事、事至立決、故無留獄。出儲粟以賑乏、增學糧以養士。閩有蠱毒、法禁數嚴、而姦民反以誣善良、吏復鍛鍊、或至誣服。君察其誣、白之部使者曰、蓄蠱者固不可赦、誣人者自應反坐。卒平反之。鄰邑連江亦有是獄、太師鄭公僑復以委君、又得其情、無不感服。故吏畏其明、而民樂其寬焉。死之日、巷哭相聞、有攀號輻車不忍去者。士夫挽章盈帙、祭文率數十百言、且祖與祠于老氏之宮。平時勤謹禮法、冠昏喪祭、皆有典則。律子弟尤嚴于拜跪舉止之際、衣冠服色、斥去浮薄之飾。君既亡、其子行絞紵之制、悉去世俗不經



之文、承君志也。君性孝友、二兄早世、撫育諸孤、爲之畢婚嫁、治室廬、又勉之學、勇于赴人之急、惟力是視。樂聞人善、有過多面折之。敏而善謀、審度事宜、往往中的。惜乎不假之年、其見于用者僅止此耳。韻類一書、援據精確、不知者以爲苟然、惟好之者然後信其積學之工。每謂使之在天祿校讎之職、必有補于斯文。然亦不及此、余所以重歎也。銘曰、

古之設教、學有大小。六藝之目、殆不爲少。幼而貞淳、習之既成。壯而用世、足了一生。惟此字學、是爲一藝。後世忽之、謂學之細。禮樂既壞、射御罕知。數亦失傳、惟書可爲。我家有原、余亦素嗜。間亦語人、鮮有同志。頃仕東嘉、日親友朋。惟此謝君、時稱筆精。以文發身、又敏于政。篤意斯文、字爲之正。亡年五十、始得其書。著之于銘、以賁幽墟。

樓鑰撰 《攻媿集》卷一〇九

程知錄洵傳

程知錄洵、字允夫、婺源人。父鼎、朱韋齋先生內弟。少孤、與龜山門人羅仲素、蕭子莊數公從韋齋學于閩。韋齋贈以六言、皆事親修身爲學之要。鼎拜受其言、益自樹立、博覽經史、尤好讀左氏傳、爲文輒效其體、不能屈意舉子尺度、以故不利場屋。韋齋嘗有舅家、今三世筆耕、未逢秋之嘆。家故貧、至鼎益困。中歲奉親徙居窮山間、自號韓溪翁。晦菴先生表其墓。洵初以詩文求教文公、公答書曰、如欲爲文章士而已、自應不在他人後。如果有意古人之學、則所示猶未得其門。嘗以道問學名齋、文公易其扁曰尊德性、因爲作銘。其他往復問答累數十書、載于大全集者僅十三書耳。初任衡陽簿、士友雲集、登其門者如出文公之門。再調廬陵錄參、與新使君不協。臺章有吉州知錄程洵亦在僞學之流之語。洵與文公書曰、濫得美名、恐爲師門



之辱。公答曰、今日方見吾弟行止分明。又云、滕珙兄弟謂與吾弟爲中表、因其有志、宜善誘之。鄉里少知此學、得從事者衆、漸以成風、亦非細事。洵沒文公祭文云、中外兄弟蓋亡幾人、有如允夫、尤號同志、學與時背、仕皆不逢、猶計暮年、更相勉勵、卒其舊業、以畢餘生、何意允夫之才學而遽止此邪。有克菴尊德性齋集十卷、周益公序之、曰平正和粹。楊誠齋愛之、謂如寶玉大弓云。其後有名樗、字文伯、韓溪翁之裔孫也。謁文公于精舍、求爲學之要、復往見南軒先生討論至極、復親炙董公叔重、相與問難、遂留學一年歸。文公語曰、學問之道無他、求其放心而已。由是篤意家學、不事舉子業。里有訟不決者、爲開道理、雖頑嚚亦感悟。丙午歲歉、鄰境有椎牛劫廩、因爲嘯聚。樗挺然入羣、從容撫喻、衆解散去。其家學淵源、素知於人如此。年五十、作原化論、深達性命之理。纂集先賢格言若干卷。

晚號翠林逸民。

汪師泰撰 《尊德性齋小集補遺》卷五

### 程克庵傳

先生名洵、字欽國、後更字允夫、號克庵、姓程氏、婺源人、韓溪翁之子、晦庵先生文公之內弟也。姓繫世德、見文公表韓溪墓。先生少有意祿仕、因攻進士業、授經之暇、則取時文誦習而學焉、然非所嗜也。間獨取河南程氏、眉山蘇氏之書讀之、自謂心開目明、恍然若與數先明者、對坐於卷中而親聞警亥也。久之、文公自閩還、一見愛之甚篤、而所以啓迪之者亦甚力。先生每欲棄去進士業、一意學問、以求進於聖賢之域、貧不果也。屢薦不第、後以特恩授信州文學、識者恨之。尋主衡之衡陽簿、臨江劉公清之與州事、先生以縣吏見。劉公曰、子所遺吾書、自爲之邪、抑倩人邪。先生曰、自爲之也。劉公頷之。他日又召與語、乃大異之、曰、子吾黨也。自

是每趨府議公事、竟往往延先生入便齋、相與講所疑、上自聖賢精義致用之要、下至古今屬辭比事之旨、無所不及。風晨月夕、盃酒流行、則又更倡迭和、不以屬吏遇先生也。而士友雲集、登其門者如出文公之門。再調廬陵錄參、丞相周益公必大弭節里中、敬其學行、屈輩行與之友。僞學難作、與新使君不協、臺章有吉州知錄程洵亦是僞學之流等語。先生與文公書曰、濫得美名、恐爲師門之辱。文公答曰、今日方見吾弟行止分明。將代、遽以疾卒。乃慶元丙辰九月八日也。年六十二。文公聞訃、哭之慟、爲文祭之曰、中外兄弟、蓋無幾人。有如允夫、尤號同志。學與時背、仕皆不逢。猶計暮年、更相勉勵。卒其舊業、以畢餘生。何意允夫而遽止此。先生之學、初敬慕蘇氏之議論、復謂程、蘇之道同。蓋當是時、世之學士大夫、惟蘇學是尊也。文公與之辨難數千百言、卒竟從事于語孟濂洛之書、剖

析推明、文公亟稱許之。其於易曰、敬以直內、義以方外、敬以養其心、無一毫私念、可以言直矣。由此心而發、所當其理、是之謂義。此與中庸言喜怒哀樂未發、謂之中、發而皆中節、謂之和、相表裏。中庸言學、易言理。朱子曰、此說是。於論語曰、四時行、百物生、皆天理之流行、其理甚著、不待言而後明。聖人之道、亦由是也。行止語默、無非道者、不爲言之有無而加損益也。有言乃不得已、爲學者發耳。明道先生言、若於此上看得破、便信會禪、亦非謂此語中有禪。蓋言聖人之道坦然明白、於此見得分明、則道在是矣、不必參禪以求之也。朱子曰、如此辯別甚善。近世甚有病此語者、每以己意曉之、亦不能如是之快也。仕優而不學、則無以進德。學優而不仕、則無以及物。仕優而不學、固無足議者。學優而不仕、亦非聖人之中道也。故二者皆非也。仕優而不學、如原伯魯之不說學是也。學優而不仕、如荷蓀丈人之流是也。子夏



之言、似爲時而發。其言反復相因、而各有所指。或以爲仕而有餘、則又學。學而有餘、則又仕。如此、則其序當云學而優則仕、仁而優則學。今反之、則知非相因之辭也。朱子曰：此說佳。舊亦嘗疑兩句次序顛倒、今云各有所指、甚佳。於正蒙曰：天性在人、猶水性之在冰。凝釋雖異、其爲物一也。觀張子之意、似謂水凝而爲冰、一凝一釋、而水之性未嘗動。氣聚而爲人、一聚一散、而人之性未嘗動。此所以以冰喻人、以水性喻天性也。然極其說、恐未免流於釋氏。朱子曰：程子以爲橫渠之言誠有過者、正謂此等發耳。於上蔡語錄眞我之語曰：不必如此立論、恐啓後人好奇之弊。蓋毋我之我、與我所固有我字、同義異本、自分明只下一眞字、便似生事。二程先生議論不如此。上蔡之學、所造固深、此亦似是小疵也。朱子曰：此說甚當。上蔡所云以我視、以我觀者、語亦有病。發明經傳類如此。每謂孔氏之門、雖所學者有淺深、然皆以誠實不欺爲主。子

曰、由、誨、汝、知之乎。知之爲知之、不知爲不知、是知也。教之以誠也、若未得謂得、未證謂證、是謂自欺。如此人者、其本已差、安可與入道。樊遲問知、孔子既告之矣、又質之子夏、反覆不知己、不敢以不知爲知也。凡此皆爲學用力處。朱子曰：善。故云於誠上甚得力也。朱子曰：誠子得力、甚善。嘗以道問學名齋、文公爲更曰尊德性。所著有尊德性齋集十卷、文公稱其意格超邁、程度精當、雖諸老先生猶撫掌降嘆、況熹尙未足以盡窺其一二、其敢有妄議乎。益公序之曰：議論平正、辭氣和粹。楊誠齋愛之如寶玉大弓云。

程瞳撰 《尊德性齋小集》補遺

### 新淦劉德萬人傑墓誌銘

乾道九年、余被命起家守富沙。將趨朝、道過臨江之新淦、有劉君德萬來訪予。講賓主始相見禮已、出書<sup>③</sup>袖間、累數百言、陳古聖賢出處之誼、孔孟之

於其君、大夫辭命或應或不應者、假設爲問以質予。予固甚壯其意而愛其文辭也。自是不復見德萬、然心獨識之不忘。今吏部侍郎程公往年使江西、求門下士、遂以<sup>④</sup>德萬對。程公於許予人不假借、間以書<sup>⑤</sup>稱德萬甚善、與論經史今昔即往復不已、及於鄉部公事宜奈何即不答、余於是始得其行事焉。今其兄德從以狀來乞銘曰、噫、昌方之弟死矣。弟力學、事親孝、於伯仲輯睦無違言、與人交用情、聞鄉鄰親戚卒葬嫁娶其有缺、不以貧爲解。且曰、吾弟生不能自振白、幸及識公、猶可以不腐、敢請勿辭。余既竊悲之、且益知德萬之行與其言果不繆。余於德萬未之先施也、辱惠見、又辱切磋<sup>⑥</sup>告之、而德萬乃年止四十、嘗一上春官不第、其父兄不勝哀焉、而欲托余言以見世。以余所睹及程公稱道校德從所爲狀、其務自立亦誠有應書者、然則皆宜銘、遂次其世系年月而銘之。德萬世爲永

靜東光人、其先自寺丞君誥始仕。曾祖安上、贈武經大夫。祖履、武節大夫、泗州兵馬鈐轄。父迪、從議郎、前辰州辰溪縣尉。建炎間虜南侵、守佐下皆遁去、鈐轄獨取州印佩之以守。虜連使人說降、鈐轄斬以徇。攻急、城陷、遂遇害。縣尉走匿亂兵間、乞獲遺骸、負之渡江、葬建康。稍南、徙其家淦邑。生四子、三曰人傑者、德萬也。娶鄒氏、卒、再娶玉牒趙氏。一子侯<sup>⑦</sup>、七歲、以淳熙二年四月丙辰卒、其年十月某日附葬於邑城南之先塋。銘曰、  
祖也死、以徇其君。父也亡、以徇其親。宜嗣有人、而縉不伸。嗚呼、尙永閔其身。

周必大撰 《平園續稿》卷三三

校記

①之：原闕，據四庫本《勉齋集》補。

②二：原作「三」，據諸史志改。

③書：原作「其」，據四庫本《文忠集》改。

④遂以：原作「道」，據右引改。

⑤書：原作「正」，據右引改。

⑥切磋：原脫，據右引補。

⑦侯：右引作「僎」。



宋儒碑傳集卷一百四十

胡實 陳安節 羅愿 舒璘 陳琦

欽州靈山主簿胡君墓表

惟建州崇安胡氏至文定公而始大其。上世皆居里中。文定公宦遊荆楚歲久。皇考宣義公淵沒葬於荆門。紹興初。因徙家衡嶽之下。於是二弟寔從仲曰安止。仕爲朝奉郎。生子寔字廣仲。是爲君。君雖生晚。不及親受文定之教。而自幼敏茂。氣識異於常兒。年甫十五。從家塾習辭藝。從兄五峰先生宏察其質之美也。從容告之曰。文章一小技。於道未爲尊。所謂道者。人之所以生而聖賢得之所以爲聖賢也。吾家文定之業。子知之乎。君拱而作曰。某不敏。故竊有志乎此。願有以詔之。先生嘉其志。樂以告語。君雖素羸<sup>①</sup>。多疾。而矻矻自力。不肯實由是所見。日以開明。先生之沒。君獨念前賢淪落。且懼緒業荒墜。慨然發憤。見於辭色。孜孜訪友。惟恐

不逮。講辯反復。以求至當。議論貴決白。不爲含糊模稜態。其居家雍睦而有制。閨門內外無不敬愛之。或譏其所以致此。則曰。家道之失和平。皆由小知自私害之。吾一以公心惻怛居其間。故無事耳。始朝奉公沒。時幼子寓僅垂髫。君撫育教訓。恩意甚力。輕財好施。意氣豁然。舅之子貧無所依。君收養之終身。以至族姻之不能自振者。賴君區處調護非一。而其好善疾惡。亦本於天資。親朋有過。盡言不隱。雖甚愚窒。不忍棄。必反復開導。至其以非意相犯。則恬不與較。平時誦習文定公春秋之說。尤患末俗統系殺亂<sup>②</sup>。每舉莒人滅鄆之義。言意深切。其操心主於忠厚。爲學謹於人倫。貴實用而恥空言。行事之可見者。大抵如此。早以門蔭補將仕郎。殆將二紀。約居恬然。不急仕進。近歲始就廣西銓選。得欽州靈山縣主簿。亦未上也。乾道九年秋。因事至湘陰。得疾。堅痞在腰股間。醫者誤以快藥





下之則益甚、亟歸舊廬、以十月庚辰沒於正寢、享年三十有八。娶黃氏、知鄂州抗之女。子男二人、大同、大有、皆幼。一女才及笄。君之沒、士之識君者莫不爲德門惜。君之賢、至其所居鄉里之細民亦曰、何善人之不壽也。予與君交幾十五年、志意相合、歲時會遇、與夫書尺往來、無非以講論切磋爲事、則予之惜君、又豈常情可比哉。嗟夫、學者之病固非一端、以予觀於近世、其大者有二焉、貪高慕遠、則不能循序而有進、負己自是、則不能降心以從善。是二者、抑學者之所甚病也。數年以來、矚君熟矣、蓋務實趨本、自反於卑近、而虛中求益、不私其故常、予是以知其所造將不可量也。孰謂天之降年止於斯邪。學力而未極其成、才高而未著於用、予之所深痛也。予豈不知修短之有命耶。是歲十二月癸酉葬於衡山縣雲密峰之東、從其先君之兆。其友同郡吳翼以狀來求表墓、明年乃克爲之。

淳熙改元九月戊申述。

張栻撰 《新刊南軒先生文集》卷四〇

朝散郎直祕閣致仕陳君墓誌銘

丞相贈太師魯國陳文恭公之仲子名安節、字行之、爲朝散郎、新提舉荊湖北路常平茶鹽公事。淳熙八年、請于朝曰、體弱多病、願致爲臣。時年四十六矣、朝之士相與驚嘆、是蓋克家而文者也。恬于勢利若此。上恩允從、寵加直祕閣。然行之已屬疾、其辭祿勇退、謂所瘳也。其年三月二十一日、竟以疾終。里中士夫來弔、皆失聲慟哭、以謂文恭公之勲德固宜有後、而行之之賢實可後者、乃不幸短折。及觀其臨終所作韻語、則超然脫去世累、且區處其家事纖悉備盡、無凝滯惑亂之意。然後知士大夫徒爲之哀、而行之終有所自得也。其孤將以明年三月某甲子、葬行之于弋陽縣玉亭鄉之橫原、而來請銘、因叙之曰、行之家信之弋陽、其祖而

上名德世系與其勞烈官爵有文恭公之誌與傳在不問可知。惟行之幼警敏日誦千言涉筆成文豐腴典麗既冠文恭將仕以恩行之謝曰姑欲自致也。及試國子監果名第一。既而不獲上于禮部始受監潭州南嶽廟。及金主亮敗文恭不處其功天子內禪公懇辭相位上欲加異之特旨改行之右宣議郎繼主管官告院隆興二年敵復犯淮詔中使馳驛起文恭于鄉文恭辭以病使者迫趣就道既入對用司馬康故事命行之扶掖至殿廷復用龐穎公例賜行之同進士出身文恭五上章不肯受至以敕牒納尙書省而文恭薨于位行之居喪始不敢辭監尙書六部門除將作監主簿遷軍器監丞改司農寺丞請外除權發遣南劍州始至帑廩空乏行之不事科擾凡所經畫久而有餘民俗類不舉子行之勸其舉者官賦之粟者三年土風浸革而負販私鹺率千百爲羣急則爲盜行之

榜諭之曰若羣聚而來是爲盜矣吾不敢貸苟善去即平人不汝追也羣賈道郡境相視潰去郡據雙溪積雨暴漲行之禱于神願以身當其危且爲排筏以援溺發倉庾以膳饑一郡以安明日詣學舍指楊龜山陳諫議二祠像以勸學者曰二公延平之望也諸生可外求哉慕是得所師矣于是郡民皆服其愷悌而悅其能化行之驟得末疾郡之老稚扶攜日候于門至相與斂錢卽州第爲禳醮之禮行之遂請主管武夷山冲佑觀以歸疾亦少間朝廷倚以爲部使者欲稍試其才嗚呼不謂其止此也行之忠厚儒雅出于天性居家孝而篤敬而和與物無忤語恂恂惟恐傷人從之遊益久而益愛平居聲色未嘗加于僕妾其親與舊至號爲小魯公上嘗面謂之曰卿敦龐福艾甚似先相公也未爲州耶善爲朕牧民爾所以期用甚遠方辛巳之冬文恭外理邊務內裁庶事延見賓客入則



密與行之商確議論、其助甚多。父子之間、自爲知友。行之既篤于學問、復喜浮屠氏書、深詣其理、故居官不表暴、泊然若無意于世。異時部門之選、或遂爲郎、至行之爲監主簿、議者迂之、行之則笑曰、任寧有迂直哉、皆可以承上命也。既論對、力陳治道、精擇監司而已。得郡陞辭、上雖稱文恭之功、行之一不復自叙、願效力民事、以勸農桑。而施于一州、大略可見。若天假之年、其所立顧可量哉。居鄉惟杜門誦書、頗務周人之急、施之衣食、與之藥餌、贈以樽櫝者、不可勝數。至餘力則甃街衢、航津涉、惠于往來。故其喪不特士大夫爲陳氏惜、而田夫野叟、咨嗟涕洟、亦爲其鄉之惜也。所爲詩文、有集二十卷、藏于家。妣魯國夫人何氏、端明殿學士志同之女。娶鄭氏、先二十五年卒。繼室韓氏、左司郎膺胄之女。二子、景參、景惠、皆承奉郎。銘曰、

三代之懿、象賢以世。尹躬姬旦、亦紹亦繼。惟木惟

喬、莫盛我朝。若呂范韓、勳名昭昭。噫文恭公、相于艱難。笑談麾兵、宗廟再安。文公之子、仲則是似。帝曰嘉哉、其錫以第。才惟後良、器實端厚。溫至春風、美若醇酎。曷以試之、外付一州。玉節煌煌、嶷然好修。式佇其歸、光于前人。何恙之亟、何命之屯。死生斯常、君所自識。臨絕琅琅、不但不惑。豈無顯庸、世爲君惜。往追文恭、後其在德。

韓元吉撰 《南澗甲乙稿》卷二

### 鄂州太守存齋羅公愿傳

故鄂州太守存齋先生羅公卒之百三十五年、爲至大戊申歲。其曾孫婿黃仲宣山長以公之曾姪孫前容州文學洪所具生年官歷卒葬之略來視、使潤飾成篇、待附家傳。涇生晚、不及識公、然從鄉先生四方名鉅游、槩知之矣。宋南渡後、文字有先秦、西漢風、惟公一人。乾淳間、朱文公、周益公視爲畏友。淳安縣社壇記文、公自謂不如、謂公文有經

緯又謂公文止此可惜。邇歲湯東澗公漢寶藏公小集、每爲文、必讀數千百過方下筆。客猝至、肩篋惟謹。馬碧梧公廷鸞久在翰苑、身至宰輔、里居之日、訪問公小集、愿見不可得、至從某轉求之、然則存齋之所以不亡者有在矣。羅氏之先在春秋爲小國、隸襄之宜城、徙荆之枝江、因以爲民。公之先五季時、自豫章避地來歙、遂爲徽州歙縣人。七傳至尙書公、爲大家。尙書公、公父也。年十六、上辟雍。宋政和二年進士、由大諫、中丞遷吏部尙書、贈少師。六男子、公爲第五人。諱愿、字端良、存齋其自號也。幼凝重寡言、資特穎異。甫七歲、能爲青草賦以壽父。少長、落筆萬言。旣冠、乃數月不妄下一語。紹興二十五年、蔭補承務郎、授臨安府新城縣監稅。連丁內外艱、服闋、監饒州景德鎮稅、有能名。乾道元年、監南嶽廟、遂踵世科。才望斗著。授饒州鄱陽知縣、不樂往、主台州崇道觀。八年、通判贛州、遄攝

州事。寇攘甫定、壹以政清訟簡、化美風俗爲務。教官劉清之子、和官事之暇、時至學宮、不爲倦煩、縫掖生淑艾之功居多。詳刑使者剡聞于朝、謂公宜在清要之選。秩滿、差知南劍州、陛對第一劄、主於富民、不爲浮文、切中積弊。孝廟大賞異、曰卿磊落議論可采、必副朕委任。從臣亦交口薦之、改畀鄂州。至郡、上五事、其一謂鄂爲古來用武之地、城壁未立、下流陽羅、正係險要。舊嘗築城、僅存堆阜、宜併議築、不可憚費。其二謂民饑、以田質穀、後日乃爲準折非法、至於奪田還主、宜立中制。其三謂所收諸州配隸強盜貸命之人、久不問落、頂冒實多、滋長姦宄。乞下有司、戒敕諸郡、少駐遣發、且候問落申數。其四謂重湖曠土、舊佃每行包占、官行新佃、又欠存恤。宜令標立界至、官鈔明與指定、庶得兩便。其五謂民間所雇奴婢、只憑客人販到、半是誘略。宜令遭誘略者自言于官、官爲立賞追捕。凡



皆論病識源、切證用劑、一本儒術、如古循良。他所罷行可類推已。貳車劉公清之子澄、學行端飭、相與勸學、劭農甚力、所謂令修庭戶之間、而民自得於湖山千里之外。報政纔期、而公不少延矣。淳熙十一年甲辰七月十三日也。公生于紹興丙辰之三月、得年僅四十九。新安續志謂值旱、立日中精禱致疾。志公之猶子任臣、毅臣所共訂也。鄂人繪像靈竹寺、孟宗泣竹處。劉貳車爲刊小集于郡。喪還、夫人吳氏卒。明年、公兄端規自鎮江請檄歸視窀穸、陰陽家以西峰先壟之次爲擬。族黨一辭、謂公生而孝、奉祖考其安樂之、遂葬于是。吳夫人祔。四月六日也。所著書有新安志、爾雅翼、鄂州小集行世。其與小集同類已抄而未刊者尙十之八九。年遠事殊、併爲亡、是太息而止。雖然豹斑鼎鬲、不必求盡、姑從爾雅翼漫閱一則、社壇記讀之百遍、公胸次所貯何可量數、筆底之文又可以人力企

勉也哉。公曾祖諱承吉、贈承事郎。祖諱舉、贈朝議大夫。父諱汝楫、通奉大夫、龍圖閣學士、吏部尙書、贈少師。妣呂氏、魏國夫人。王氏、楚國夫人。余氏、魯國夫人。兄顥、朝散郎。籲、承議郎。俱通判福州。頡、奉議郎、通判夔州。頌、即端規、朝奉大夫、知郢州、有狷菴集刊布。郢、鄂二公齊名。嘗聞家居講學時、東西異窗、鑽研各趣。飯餘酒隙、已晚未燈、說書交鋒、謹如辨訟。既定、怡怡如初。茲未可與上車不落之輩同日語也。弟頊、朝散大夫、通判蘄州、贈中散大夫。子男四人、縉、臣、考、臣、欽、臣、皆早卒。睦、臣、承直郎、南康軍錄事參軍。女三人、其一適吳文肅公之子垌。文肅、竹洲先生也。孫一人、樸。已上據文學公所具外、從人旁搜足之、來示於公官階所歷所止。吳夫人封秩爲何、孫曾實計若干、俱欠登載、不敢臆度。念昔昌黎伯爲樊宗師誌銘、即能似其語。陳師錫序五代史、王荊公顯譏之。某何人、敢操此筆、無韓

之似涉陳之庸、血指汗顏、衆知之矣。仲宣幸是正之。仲宣名宣子、自號中山。能詩、爲虛谷方公所稱、屢攝紫陽山長事。二丈夫子世其家、羅氏甥也。某旣自詭爲傳、亦併效顰、爲之贊曰。

彼貴一品、或壽期頤。負乘幸免、夸不償嗤。官止分符、五十猶嗇。公有不亡、衆人不識。達而彌芬、大也無垠。存齋之存、其惟斯文。

曹涇撰 《新安文獻志》卷九四

宜州通判舒元質墓誌銘

慶元五年己未九月二十九日、友人宜州通判舒元質氏卒。訃聞、某哭諸寢門之外、旣而奔奠於元質之廬、又哭、盡哀而反。十有二月望、厥子將卜兆於嵩溪里之公棠山、使以窆期告且徵銘焉。簡哭而對諸使曰、某尙忍爲元質銘也哉。弱壯而爲執遊、強而茅拔於春官、艾而期伸執於采服。今迫頤而遂永訣矣。某尙忍爲元質銘也哉。使速之曰、弗

銘、何以掩夫子於幽。乃拭袂而序以銘之。元質諱璘、其先皋陶庭堅之後、三代時國於舒、舒亡而其裔即以國氏、世望廬江。十三傳邵、爲漢阜陵長。又廿三傳而元興相唐。弟元褒官司封員外郎、褒子守謙以伯父甘露之變、徙居於越。再傳而遷四明之奉化。善積慶餘、更四葉而實娠元質之大父宣議郎卞、文才武略、名冠一時。建炎中、禦金有功、鵬舉岳公招而置之幕下、鄉人銘績焉。父曰黻、由進士歷官通直郎、後以明堂恩進秩承議。元質生而敦樸、得子淵之愚、道心融明、所覺非思。一時師同門、志同業者、則某與沈叔晦、袁和叔也。元質於書無所不貫、尤精於毛、鄭詩。早遊上庠、爲南軒識荆。乾道壬辰中進士第、擢信州教授。隨丁承議憂、易喪誠信、哀毀骨立、孝友聲益彰。服闋、特差充江南西路轉運司幹辦公事。載遷教授新安、愈自磨勵。其於晦翁、東萊、南軒及我象山之學、一以貫之、新



安之士執經而問難者堂溢階充、兩端不竭不怠。築風雩亭以自娛、其萬物同春氣象、或狂點不得爭殿最也。時世故紛糅、天災沓臻、國病於需、民艱於食。元質緯不暇恤、憂常在公。於是議常平、商鹽政、經荒策、論保長、凡爲書若干章、上之刺史、守尉、其採而試者、效輒響應。當道廉而賢之、曰、文學政事兩擅其優、是爲天下第一教官、豈宜投置閒散。乃擢令平陽。平陽之民沐元質之德者咸興誰嗣之歌。三載考績、遷宜州通判。元質以仕路頗榛、拜命便歸。未果即行、遽夢兩楹之奠。元質生於紹興丙辰九月廿八日巳時、至是卒、享年六十有四。始元質在徽、賢聲籍籍。自中書密府諸貴人交口薦譽、咸欲出自己門。而元質澹然於聲利之場、惟道德性命是究。其於津要無寸楮及故材、不得盡其長、道不得大其用、而竟以別駕終。昔韓退之誌子厚之文曰、使子厚斥不久、窮不極、雖有出於人、其

文學辭章必不能自力以致、必傳於後、如今無疑也。雖使子厚得所願、爲將相於一時、以彼易此、孰得孰失、必有能辨之者。嗚呼、退之可謂知子厚之深矣。吾與元質也亦云然。元質兄弟七人、長曰琬、進士、福州簽判。次曰琰、次曰球、進士、潁州太守。次曰琳。次曰琥、任國學。次曰璘、是爲元質。季曰琪。琪與琥俱遊象山陸君之門。配童氏、即奉議郎大定持之之女、早世、無所出。繼娶於汪迪功季顏、生子五人、曰鉞、叔晦、壻。曰鉦、娶袁氏。曰銑、某女女焉。曰鐸、娶趙氏。曰鏐、和叔之壻也。孫男俱幼。銘曰、猗歟元質、道心懇至、誘也匪牽。樂恬簞瓢、隙廬蕭蕭、鏗然誦絃。按鐸按鐸、有勳其燠。百里大賢、維藏之石、某最其迹、永、永萬年。

楊簡撰 《慈湖先生遺書補編》

廣平舒先生傳

舒先生璘、字元質、奉化人。雅有大志、恥以一善自



名篤實不欺、無毫髮矯僞。入太學、師張宣公栻、又從陸文安公九淵、與朱文公及呂成公兄弟講磨、躬行愈力。嘗曰、吾非能一蹴而入其域也、刻苦磨厲、改過遷善、日有新功、亦可以弗畔云爾。第進士、教授徽州、以身率多士、日日詣學、寒暑不少懈、暮夜亦間往。築風雩亭、日有講求涵泳之功、質或不美、未嘗忿疾、端吾矩矱、需其自新。作詩禮講解、啓迪諸生。徽人追思之、曰、吾鄉學問之源、窒而復通者、先生實開之也。因祠於學。信道甚篤、利祿之念不萌。宰平陽、臨政聽斷、人服其平。終於宜州通守。慈湖先生銘其墓、謂孝友忠實、道心融明。門人國子博士李元白傳其經學。淳祐中特諡文靖。

王應麟撰 《深寧先生文抄摭餘編》卷一

陳擇之墓誌銘

君諱琦、字擇之、陳氏。清江人。祖宗禮、以高年賜爵迪功郎。父善、明經、尤邃於易。君幼刻苦自奮、必欲

續聞。既冠、以易學再貢、擢乾道丙戌第、主衡州衡陽簿。未上、張公孝祥帥潭、愛其材、招與之俱。因從南軒先生張公栻受學焉。及官衡陽、有殺人于野、而主名不立、提點刑獄鄭公丙責游徼甚急、吏迹一驛卒、其檐有血、掠訊誣服。吏獻之鄭、鄭下之州、詰<sup>⑤</sup>之皆不冤。州下之邑、君攝邑、疑之。初診屍、得死者禍署曰羅仲美、君即揭諸衢、有見而哭者、曰、吾子也。蓋仲美與其族弟餘偕商、而仲美貲倍、餘殺而取之。君逮餘、辭服。白之鄭、釋驛卒。由是名聞一路。郴饑、官糶無紀、人相蹂死。部使者命君往振之、書當糶者伍之、而畀以一券、曰<sup>⑥</sup>。許一人持券遞遞以糶、簡而周、整而無譁。諸郡法焉。用薦舉循從事郎、調贛州贛縣丞。南軒先生帥桂、招君攝莫府。廣西諸郡計仰漕司鹽子錢、漕輒齎<sup>⑦</sup>帥。以聞、請益下漕、漕輒格。會漕闕、帥攝漕、君贊帥、歲增諸郡子錢十三。邕歲市大理馬、馬來已二千里、自邕達諸軍

又倍<sup>⑧</sup>。故多道斃。桂舊有園。君請憩而飼之。瘠者止。良者行。後者至。先者發。馬用不耗。帥辟奏爲眞。不報。既至贛。太守尙書留公正待以客。縣賦不給。每訟不直者。令入金錢。君首除之。官錢曰經總制者。隸提點刑獄司。有使者析秋毫。計一路逋錢大萬。君亟言曰。此錢舊制所無。借未能除。不失凡最足矣。今又益之。可乎。媿而止。部使者列其治于朝。詔中書書其姓名。用薦舉轉宣教郎。知贛州興國縣。未上。會留公制置四川。辟掌機宜文字。西南夷舊爲蜀患。近時復創馬市。歲不能徹戍。議者欲用利路義士法。什伍黎雅之民。如李德裕雄邊子弟。以代更卒。朝廷下其議制置司。檄君經紀之。君言其不可。兩州之士無慮六千。盍析爲二。擇壯者二千。以備邊。餘以居守。則民可用。戍可徹。蜀法榷<sup>⑨</sup>酒錢。曰折估者。病民。上欲損甚。下蜀議制置檄君益昌。定議。君上書總領馮公憲。詞甚懇惻。卒減緡錢三

十萬。初蜀之民私以楮券爲貨。謂之交子。至天聖中。官始權之。再歲一易。謂之交界。其後有司並緣巧取。凡券之微壞者。皆沒入之。不賂不易。蜀之兵爲屯十有八。所隸之將三。士之廩給當折物爲錢者。必其視所屯之地。稱其土物之直。以直之低昂爲錢之多寡。故米之估則龍州得仙人<sup>⑩</sup>。關之半。絹之估則興元得西和州三之一。銀之估則大安得龍州之半而過之。乃有軍在某州之屯。反用他州之估者。故軍多怨讟。留公憂之。乃與君謀。杜交界之姦。以信楮券。平廩給之估。以慰士心。君雖在遠。而賢稱曰<sup>⑪</sup>。至于朝。近臣有欲薦君爲郡而君死矣。人皆惜其用之不盡也。君天資敏而靜。密而寬。遇事迎刃而解。亦不自功。事至不拒。事已不有。聽訟從明。決訟從恕。與人言若無所拂。而實有所規。事上官細粗介通不同。不爲逢迎。每言輒聽。與同寮處如家人。不見崖異。亦不詭從。君自受學於南軒。



進進日新。嘗扁其齋曰克南軒銘焉。其蜀意於君蓋甚遠云。爲文覃思深湛。詞乃夷易。尤工於詩。得江西體。年四十有九。淳熙十一年五月二十有六日卒于官。明年二月。其孤返柩。自蜀九月丁酉葬于建安鄉古堂之原。娶曾氏。子三人。男復之。渙之。女適郭琛。皆舉進士。孫三人。二男一女。復之不遠二千里。走行在所。以太學博士彭龜年所狀君之行。謁銘於某。某與君雅故。敬銘之曰。

猗嗟擇之。其挾不訾。其趨不卑。南軒是師。趾其堂基。衷其壁圭。一笑而歸。將遐其蜚。而蚤其披。侯豐其資。侯畱其施。云誰之司。

楊萬里撰 《誠齋集》卷一二九

校記

①羸：原作「羸」，據四庫本《南軒集》改。

②亂：原作「辭」，據正誼堂本《南軒先生文集》改。

③恭：原作「公」，據聚珍本《南澗甲乙稿》改。

④謂：原作「爲」，據右引改。

⑤詰：原作「誥」，據四庫本《誠齋集》改。

⑥日：原作「目」，據右引改。

⑦帥：原作「師」，據右引改。

⑧倍：原作「位」，據右引改。

⑨權：原作「權」，據右引改。

⑩人：原作「之」，據右引改。

⑪日：原作「目」，據右引改。

⑫樞：原作「樞」，據右引改。

宋儒碑傳集卷一百四十一

黃何 劉穎 宋蘊 王炎 王時會 呂

祖謙

母舅故朝議大夫太府寺丞黃公行狀

黃氏世緒高辛、代有顯異。其在新安休寧、始大者則公也。奉直弱冠有文名、未強仕、卒公生僅三月。祖奇公、謂當亢吾宗、愛之特異諸孫。奉議郎吳公舜選、公之祖妣之弟也。祖垂歿、託公於吳公。吳公使與二子俯、偁遊、已而復從程公尙書大昌遊、所得益超詣。與賢書、登丙戌第。時太恭人華髮在堂、公調吉州太和主簿而歸、喜運慈顏、里黨羨豔。周旋膝下凡三年、丁太恭人艱、再調饒州番易簿。公謂賦版公私所繫、不輕出朱入墨、不敢少縱。三年三易守、皆知其才、委檄沓至、公悉心區處、上下翕然。有部使者以私怒一尉、俾餘干丞核其臬、丞以無臬報、使者怒、復委公。公察之寔無臬也、併丞直

之。使者愈怒、斥公庭府、謂當與尉併効、公不爲運。俄使者罷、乃免。公平時出語如恐傷人、至臨義則毫髮不屈、類如此。既滿、郡守王公師愈留爲掾、凡數月、公辭而歸。關陞用三表、公獨登五、陞從事郎、堂除三衢教官。衢多士、學校不肅、有宗姓爲學生者、以其父與公雅好、干規矩、屏去不恕。職掌無小大、陞補必以課試、有謁于郡于外臺、送至者、皆不內。士樂其公。復市田及僦屋、歲增以萬計、使教與養俱備。薦者如式、改宣教郎、知興國大冶。冶當孔道、彫落殊甚、公痛革浮費、銖粒有經。下車期年、公私浸洽。蜀騎西來、歲無虛月、前此芻粟不備、凡部送者繫馬縣庭、毆擊吏胥。公經理閒田、許民耕佃、顓一司掌之、以備馬綱之用、且具言于郡與部、使者俾勿壞、至今賴之。土產鐵、境有湖、中峙三山、適兩淮嚴盜鑄之禁、麇至其山、至四千餘人。尉出警輒角敵、尉慮其有他、乃不白州縣而密聞帥憲司。



儒藏

帥聞之朝、調九江官軍、軍且至、公曰、彼民爾、奚至是哉。乃檄主將軍于境、走一介持尺紙諭以禍福、且抽戍兵開間道、使可以趨生辟死。其徒未信也、遣數輩來覘、知果撤戍也、乃一夕遁去幾半。公復匹馬入其巢穴、其不去者望見公、單騎小艇自湖中來、乃相與言、知縣果無害我意、遂相帥俱去。公復取屋廬柵寨與凡盜鑄之具悉焚之、乃歸。不費一鏃、不僇一人、卒使一邑晏然。邑人合詞、以爲不然、必生大變、濫殺無辜、當如大奚山茶商之事矣。士民相與祠于鄉校、人謂可以言功、公嘿不言。初、縣有學、無以爲資、塵封講席、公爲具繒廩、延其鄉之秀民萬人、英嘗從晦菴先生遊者、爲之長、勸來學、徒講貫問難、不顧爲科舉計。縣事之暇、公復橫經與之發明大義。自是誦聲日盛、邑之應舉者倍曩時、偕郡計者浸多。學宮隳毀、徧爲葺治。春秋器服、不惟不備、抑多非制、乃選學徒持書旁郡、求齊

公慶胄淳熙間、討論制度更造之。俎豆冠冕、煥然一新、每釋菜濟濟洋洋、觀者知所向矣。秩滿、適四明僉幙、近次、公亟就之。會甲寅、乙卯、明越大侵、殲死相屬、公佐其長修舉荒政、謂使當食者羣集一所、則紛然殺亂、乃家至戶到、不辟涂潦雨雪、米圭撮必使人被之、不爲虛文。時樞密何公帥四明、知公寔勞、且遇公素厚、言之朝、減磨勘、擢提轄樞務。務弊如毛、公隨事剔疏、洞見幽隱、吏不敢欺。且請罷優潤以惠商人、以革坐賈顯利、由是歲增四十萬緡。遷司農寺主簿、遷太府寺丞、皆出內之地。公究心其職、剗革姦蠹、蚤莫出入、寒暑不渝。初、內帑有積金、前後稱校折閱殊甚、廟堂疑焉、命公稱之。公權衡精密、有增無虧、吏戟手旁眎、大懼不免。廟堂以爲能、樞密何公尤加稱賞。公居官不苟細物、大抵然也。凡再轉對、奏議四篇、卷卷懇惻、欲廣聖德、結人心、嚴郡守責寔之政、重縣令之權、上嘉內



之。論者謂既達大體、復切時用。求外任、時秉軸者與公全年進士、再三諭公盍少留、序遷在朝夕。公請益力、分括蒼左符。括山深、人多盜奪、凡有訴者、公欲示急捕之意、必檄尉逮之、小擾不恤也。至若擁糈植良、不啻乳哺。首與屬縣約、情均一家、應有逮會、悉書于歷、囊以往來、不遣一吏至縣。旁有貪沓撓政者、事無鉅細必私請、公據理從違、多不欲、乃旁午遣人、造說百端。侍御史陸公貽公書曰、是譏譏者豈足恤。願益推所學、以惠彫郡。若因浮言輒裏退縮、則張官置吏皆可廢矣。公不遣一書入長安、唯自信其所志。已而流傳公當祠去者、公笑曰、朝廷黜陟豈容預知邪。已而命下、乃在月餘之後、原其故、乃前譏譏者自倡其說。公謂臺諫清明、決無此。讀其奏、乃出部使者。蓋先是、郡計赤立、凡前後政四方月餽、公到官悉罷之、怨謗已譁。適又有以宗姓祠祿來請者、寔已溢額、公遲之、浸不

悅、遂與譏譏者醞釀。至其奏無他語、專言癯老不事事、在告之日多、而不知公在括半歲、帥以未听治事、僚吏苦之、且自至迄去、未嘗一日在告、此可覆也。公歸纔數月、清議益白、復畀岳陽。凡所施行、悉如括舊、爲政亡幾、聲誦翕然、具見於士民仁明十事之稱。謂太守入境之初、四縣義勇凡七千餘人、例迓于境。公曰、若等遠來、寧不落事。亟散遣之。此仁明一也。本州受牒、例於五鼓投廂、職官檢査、吏胥批朱、所訴未伸、費已不少。公乃於卯時大開譙門、縱其投廂、檢査批朱一切不用。此仁明二也。城市之間、帥苦求發、如蜀藥鋪不願開、張屠家相帥逃去、其困傷甚矣。公市物絕少、每市一物、一眎市賈、滿城懽嘆、以爲復見官常。此仁明三也。昔丁提刑奏議、謂岳陽臨湘、最爲湖北一路窮下之鄉、自後無言之者。公到任未幾、即揭榜曰、此郡土瘠民貧、深可憫念。今將嘉泰三年下等人戶所欠苗

米權行倚閣。此仁明四也。本州今歲薄歉、有田之家預以官賦爲憂、公洞督民隱、復將嘉泰四年夏稅權行住催。三年四年未遠也、逋負尙多、追逮正繁、蠲帖一出、驩聲雷運。此仁明五也。岳陽征商比年浸急、至號爲沿江一路法場、蓋由公征既重、復困專攔。公悉自斟酌、蠲減倍常、所謂專攔莫得恐喝舟楫往來、萬口傳誦。此仁明六也。老胥弄法、蠹公害私、民無所訴、公閱民訟、悉出裁斷、吏不與知。此仁明七也。本州間有三年五年七年之訟不能決者、公自到官、盡索故牘、反覆詳視、原情按法、決遣一空、屈者獲伸、悍者屏息。此仁明八也。官事無程、運經歲月、得錢則斷、無錢者留。自公交印、凡下案者限以時呈稟、下縣者限以日結絕、檢舉如期、吏不得留。此仁明九也。方八九月、冷雨浸淫、氣候如冬、民旣艱糴、復慮晚稻有傷、亟發常平、且精加祈禱、霽色旋闐、禾黍登場、市無閉糴、賈亦浸平。此

仁明十也。十事之稱巴陵之人家傳誦之、人方恃公以爲父母。乃有游士不足於公、而又當路適有與前譏譏爲姻黨者、復有予祠之命、奏疏亦無他語、一如前部使者奏、惟曰老不任事而已。公笑曰、予無意於仕久矣、今成吾志也。即日東歸、父老遮車號泣載路、車殆不能進。歸涂過武昌、計使總卿見公皆曰、巴陵至武昌亦遠矣、而巴陵士民來此借留意甚懇切、非其他文具比。足見得人心如此、令人嘆息。公寓嚴四十年、至是乃還新安故山、省松楸、會故老。秘之母蓋公之姊也、年八十、公奉之如母。里有竭曰清陂、溉田千餘畝、竭久廢、田不治。公一日過之、曰、是亦可以利人也。乃捐資帥衆築之。是春旱、種不入土、而竭下之田秧獨以時、秋倍入、人懽戴之。又爲選命主者、授之經理、庶其久。于今數年、昔時礪确皆爲沃壤、里社欲祠公焉。居山間再閱歲、山深地滋、公平時無病苦、至是感肺虛





之疾。家人以醫藥不便爲請，乃買舟復下嚴瀨，又數月浸苦脾虛，遂終於正寢。階爲朝議大夫、爵爲休寧開國男、食邑三百戶。娶方氏，故京西轉運方公扔之孫、承議郎傑之女，封恭人。先公二十六年卒。男四人：渙，前江州德化簿，居三年，太守才之，無一日不兼他領，關陞脩職郎，秩謝還侍甫數日，公乃易簀。次閱，迪功郎，新安豐軍安豐簿，未試也，篤學有敏才，皆能大其緒。次全，次興，早卒。一女未行。孫男一人華，將乞公遺澤。女二人。公性至孝，侍太夫人疾，祁寒不解帶。念幼孤，爲天地間孽子，終身以爲痛，謂大父存育之恩，圖報無所，欲以年榮一階，少答冥冥，未遂而終。奉兄姊采篤，舉先人貲產，悉畀伯氏，不問。伯氏沒，復經紀其孤。有舅之子老而獨，館之終其身，死擇爽塏葬焉。其隆風誼若是。其孤考卜玄宮，乃得於淳安縣神童峰之原，期以嘉定二年正月十五日奉公于窆。公天資清苦，務

自植立，然即之粹然和氣襲人。其學瞻博無涯，惟以格物窮理爲宗。如論洪範五行，謂水性寒，出於水者宜愈寒，而其味乃作醎，醎溫也。火性烈，出於火者宜愈烈，而其味乃作苦，苦涼也。是皆物以極而反，味以激而生，故寒不生寒而一陽生，暑不生暑而一陰生。其講學爲後進宗師，凡以此。其爲文則韻平思遠，咳唾成章，著述多未暇編次。性廉介，洗手居官，入仕四十餘年，所居環堵，堂庭不備。歲上熟，飯不足半歲。既歿，其孤粥產以畢葬祭，里評益仰其清云。某方髫髻，公期責甚重，已而挈以自隨，不異己生，厥今粗免不肖之歸，皆公之教也。然則備述行治以俟秉史筆者，可諉之他人耶？謹狀。

程秘撰 《洛水集》卷一五

寶謨閣直學士贈光祿大夫劉公墓誌銘

公諱穎，字公實，衢州西安人。曾祖嶺，祖持，右迪功郎。父蘊，贈正議大夫。公紹興丁丑中進士第，主溧

陽縣簿。虜窺江退，州索民租未入者，公白留守，虜事急，民不勝病矣，請因以賜民。張丞相悟，謝曰：「虜不及此，即奏閣免。」由是知公令其子棡與游，教授全州，勤苦自力，率諸生同夜旦，湖湘化之，士人增倍。改官，知鉛山縣，陳丞相訝曰：「薄職事官耶？」公謝以當應新制而已。正議卒，知常熟縣，素號繁難，前後健者盛氣鉏剗，顧不克，公降心條理，更以治稱。簽判潭州，帥負其能，僚吏憚懼，公約以中道，常屈而改爲。及陳峒反，所禽滅多，公計策既入朝，乃言簽判功在臣上，臣實愧之。召監進奏院，遷太常寺主簿，遷丞兼兵部郎官監司，皆上自選。提舉浙西常平茶鹽事，公言：「特備糴本，盡廢圍田者，再未及用。」就遷提刑。禁州縣毋得法外自恣，間詣獄，察不應繫數十爲曹，縱遣之，百姓走愬，道相屬。權勢交恨，御史遂以介僻劾公罷。久之，御史去，除江西轉運判官。德化縣田逃徙太半，守乞免稅至五六，不

報。公以見種實稅均其荒萊，民願佃者第減之，上供自若而逃田盡復。屬州緣紹熙登極，科進奉千餘，公亟奏黜，而薦其名士潔廉者十數。除直秘閣，淮東運副。初，水敗楚州城，幫修久未定，總領扳公預議。公接伴虜生辰，入對，言：「劉超欲壞舊城改築，國家何故捐數百萬緡爲軍帥幸賞地？」可一語決也。光宗從之。城完牢至今。除戶部郎中，淮東總領。務場以額鈔抵賞，陰失餉計，積二十年無知者，公隱核得之，度賣絕增餉一年。遷司農少卿，總領淮西。先是有總領自乞爲都釀，抱淨息而私其贏，後稍益侵，反以大軍錢佐之，邀糴徧江淮，遷復歲月，回易如負販，王人之體盡矣。公在事雖無幾，名實有辨，義利判然。斥部內竊借總司爲姦者，其人大吏難動搖者也。太夫人董氏卒，除直寶謨閣，江東運副。又知平江府，皆未上。除宗正少卿，起居郎，實錄院檢討官，權戶部侍郎，同修撰。瘍生於頰，提舉



興國宮。除集英殿修撰、知寧國府。改知紹興府。越東西都而彫郡也。數旱災。然衆欲所轡。念不暇卹。公歎曰。民何罪。吾不忍用太守禮。食其粟過矣。浮餽妄請皆不與。又乞鬻僧道。止添差。曰。庶幾寬之。遽差知平江府。公徑歸。復提舉興國宮。知泉州。泉土富樂。其暴桀椎埋羣偷而衆奪者。悉株連送遠地。則一以靜鎮。事從其俗。人尤愛之。蕃舶至。舊與提舉閱視。公不往。第遣職官喻曰。貨不汝買也。待制華文閣。次子正學死。復乞興國而歸。公歷官大小各有意。隨其病傷。鍼石施焉。蘇愈而止。不執寬猛之偏術。抑人以徇己也。余所述近是矣。立朝進退必以義。立德所尙。陳說正理而扶救之。不懷避就之淺心。貶己以合時也。孝宗時。博謀盡下。人臣爭承風自獻。公乃奏。今日之失。在輕聽人言而已。昔之施爲。今復棄置。損盛德矣。上旣優待三衙。與執政鈞禮。公又言。兵權惡專。況今之將帥。何足稱。

頤指哉。光宗時。論人主難克而易流者四。曰逸豫無節。賜予無度。儒臣易疏。近倖易昵也。慶元初。始得親近。即疏言。二三執政。非所謂坐而論道耶。致今日之治。要須深講。今不過尋常文書。肯首而退爾。大官大職。安得輕授。冗兵冗吏。所宜痛減。橫恩濫賞。不可輒啓。巧請他比。不可曲從。皆今日大患也。又言。修德莫先於務學。學之道。存在己不息之誠。極取人爲善之益者也。夫易貴朋友之講習。禮戒獨學之寡陋。今勸講久廢矣。方是時。風俗一變。其正邪消長而好惡向背之際。有甚難言者。公獨謂黨與傾擠。報復迭起。願陛下御之以道。容之以德。不然。元祐崇觀可監也。且今日已爾。又將如後世何。公立朝論事。落落多此類。余所謂不貶己以合時者也。公自泉歸。而興國滿四年。不再請。有爲言而與者。辭不獲。然後受。已而復請老。進敷文閣待制。致仕。嘉定元年。除刑部侍郎。公曰。臣已得謝。

矣。惟陛下哀憐，俾全末路。進龍圖閣，宮觀數月，復以公知婺州。公又曰：「若強臣此行，狼狽殞越，身無處所，有虧名義。」取諫士論。上知不可奪，祿宮觀者再。又請老，以寶謨閣直學士致仕。嘉定六年三月二十七日鄉晨，坐索湯盥潔而終，年七十八，贈光祿大夫。碩人楊氏，先公四年卒。三子：曰強學，奉議郎、主管仙都觀；曰正學，宣義郎；曰志學，宣教郎。知仙居縣。三女：婿曰承事郎、華亭知縣陸三省，進士徐冲、通直郎、蕭山縣丞余岡。孫男六：常道、迪功郎、監車輅院、常德從事郎、晉陵縣尉、常武迪功郎、監紹興府都稅院、常寧、常明。常先登仕郎。孫女五：婿曰將仕郎徐士廉，承事郎趙與懃，進士毛用之，潘自楚。曾孫男三，女二。十二月壬寅，葬公於靖安鄉巖山。余既錄公終始大節，而又知其自少年高識，特立無倚附。陳應求、劉共甫，名公卿也，挽致不得。寧甘服州縣。其出浙西連七八，外徙十餘年，有以

淹速訊之，公笑謝曰：「吾所欲也。其在侍從，而故與周旋，傾吐無間者，方居中用事，提將相與人如反手，然公從是絕矣。常言：士以不辱身爲重，用捨命也。其爲少宗正，而趙丞相適歸，相遇於廢寺，泥雨不能伸足，但僧床立語曰：『寄謝余參政，某雖去而人材猶在朝廷，幸善待之。』公曰：『相公人材，即參政人材也。使果賢，參政之責，非宰相之憂也。』揖而別。余公繼相，卒於善人多所全佑，公助之也。及後落公致仕，而同時被落者皆已起爲執政，獨公不顧詞婉而正，志恬而安，嗚呼，斯完矣夫。銘曰：公先幽潛，始自正議。隆興初元，匭書千至。天子驚嗟，曰：『纔一二。』公時已仕，德器早成。物羸兼融，理冲獨榮。前方後方，不斲而行。勢有險夷，情有戚休。昇我百爲，從容並酬。階卿級侯，衆俯僂之。峙而莫前，公則戶<sup>①</sup>之。始居疊石，巖開洞劃。九仙爛柯，今古一奕。後依菱塘，陂斜浦橫。欸乃其歌，五湖夜明。有芝

九折、有松千尺。雪藏霧冪、以庇茲刻。

葉適撰 《水心文集》卷二〇

果州流谿縣令通直郎致仕宋君墓誌銘

某少聞諸父兄曰、吾鄉蒲江其俗質實而近本、以除塾館士、教子務學、競相標尚。高魏氏所館多賢、屈指姓名、尤稱彭山二宋君。某避席請曰、其略可得聞歟。曰、元發名蘊、紹庭名希祖。元發未冠即有聲鄉曲、經史百家、觸手成編、爲文尙體制、耻華靡。里父師折輩行與交。父久客梁洋、元發奉母持家、訓諸弟、人不知其爲貧。紹興二十九年、朝廷以四科取士、元發在選。乾道四年、與季弟元璧及從遊者又聯與賓貢。淳熙五年、與紹庭及前東關令華祖、皆元發從父弟也、同舉進士。其後元發終流谿令、紹庭終石泉軍教授、士論惜之。其教曷以。曰、使人精講力踐、不專以語言文字爲利祿計。流谿君又嘗館于同郡之楊崇慶之成、得其師法者後多

可稱。予時聞而識之。流谿君卒之年而予始仕、不及與君接也。嘉定十二年五月庚申、君之二子少章、秉國以治命葬君於彭山縣鼎鼻鄉安東里考君之墓側、哀萃行實、將求銘於予。會少章即世、厥十年、秉國造庭待問、道荊州、以書抵靖曰、先君之葬也、緩不肖孤無辭于罰、必子之諸父羣從也、知先君者、墓道之銘、故惟子請、儻有以自贖。予追感前事、不復以晚陋辭。宋氏系出微子、爲京兆大姓。隋末有諱遠、以直諫謫隆山、則今眉之彭山也。墓在縣北十里。子孫散處於蜀、而彭山之名數日蕃、別爲五院。五院之後曰爲善、贈中散大夫、則君之五世祖也。始卜居縣之西郊曰翠微莊。四子、仲曰岳、舉進士、官朝散大夫、秘書丞。紹聖中、安章用事、以臺官薦之、固辭。知嘉州、未滿秩、致其事里居。自中散後、世舉進士。翠微宋氏由是爲眉之聞家。曾大父周士、宣教郎、成都府郫縣丞。大父亘古、父煇、



藏

以恩授迪功郎致仕。妣楊氏封孺人。生三子。君爲長。逮事大父左右無違。即以迪功郎主應靈縣簿。祖考妣猶在殯。君食息弗置。將謁告歸營宅兆。迪功曰。是能養志矣。雖然。家事也。第居。吾歸視其成。凡親所欲爲。率先意成之。縣仰給鬻井。民有逋課。莫能償。君攝令。問故。則曰井堙已久。徒繫我于此。故積負益多。君縱遣。聽自爲約。皆如期畢輸。民有怙貨數犯法。君至。亦以瓜果嘗試。君笑卻之。由是無敢一毫恣肆。迪功卒。解去。服除。主射洪縣簿。以才選攝戶曹。兼僉廳。前後守勾龍公佃。朱公時敏。皆異席咨之。邑有錄民男女於神祠。曰舍身。君白刑獄使者厲其禁。踰年定差不報。改赤水縣簿。司農卿楊公經與君居同鄉。學同舍。時爲川秦茶馬使。視君謁入。愀然曰。如吾元發而官不遂。朋友之責也。即以上諸朝。於是三仕爲簿正。前後薦書皆不請而獲。陞從政郎。調果州流谿縣令。未上。戶部

郎官馮公震武總蜀計。以同年進士招君爲屬。君條蜀利病。其一曰。今疆場不警而激賞絹者科歛如故。此何爲者耶。馮公感其言。節末用。定經費。歲免絹三之二。果之諸邑舊無經界。民并緣貿易爲姦。流谿負錢帛萬計而業亡。稅存者無以輸。君討論發擿。宿逋盡入。貧者得釋。俗囂於訟。取其險健者折之。部使者戒諸縣毋以役人入鄉督賦。倚之保正。小不應程輒笞掠。君聽令以庸代役。常平司委君發廩。採荒。郡欲以七分糴而三分賑。君反而行之。郡弗能詰。嘗以醕羨爲縣創譙樓。或請刻石紀之。君謝曰。吾職當爾也。去官。中道感疾。明年病。致其仕而卒。實慶元六年三月丙寅。年六十有五。尋轉通直郎。配劉夫人。朝請大夫諱高之孫。石泉軍錄參諱況之季女。家世宦達。閑家謹儉。上怡下順。後君一年八月癸卯卒。合葬于君之兆。視夫爵當封孺人。二子。長即少章。次秉國。舉紹定三年進

士授迪功郎。三女、長適楊行之、次程文仲、季侯森、皆業儒。適程與侯者皆卒。孫男五人、曾來、申之、曾顯、坤之、曾賢。孫女四人、外孫男女九人。君褻嚴而裏夷、家儉素而調恤弗吝。常曰、士非無賄之患、不能行其志之憂。臨終戒二子曰、吾自幼立學、不妄語、不欺暗、教人子如己子、理官事如家事。雖憂患困躓、然所爲無不可語人者、一夕之枕晏如也。以是遺汝曹、勉之哉。遺文有論語略解二十卷、尚書講義五十卷、撫仕編十卷、翠微編以親友酬唱合八卷、藏于家。銘曰、

一心存存、萬善攸集、豈惟子孫賴之、使國人弟子咸有所矜式。宋氏之祀、其永永無極。

魏了翁撰 《重校鶴山先生大全文集》卷八〇

### 王大監炎傳

王大監炎、字晦叔、婺源武口人。自幼篤學、登乾道五年進士第、調明州司法參軍。丁母憂、再調鄂州

崇陽簿。時南軒先生張公帥江陵、聞而器之、檄于幕府、議論相得。秩滿授潭州教授、以教養爲己責。提學蘇詡補一學職、炎辨之不從。蘇怒、欲易教武岡。炎遂投劾出關、諸生卷齋乞留、不獲。大帥李椿親出關挽之、竝車而回。蘇悟、乃以特立有守薦。用舉主改秩、宰岳之臨湘。邑在蘆葦中、蕭條特甚、賦出無名。會朝廷下蠲減之令、條陳宿弊、得旨歲減二千八百餘緡。邑賴以寬。通判臨江軍、三攝郡政、庭無留訟。除太學博士、遷秘書郎、著作佐郎、兼實錄院檢討官、陞著作郎、兼考功郎、吳興郡王府教授。又兼侍左郎官、又兼禮部員外郎、除軍器少監、主管武夷山冲佑觀。起知饒州、尋與部使者不合、去、改知湖州。湖甲浙右、素號難理。炎不畏強禦、邸第貴介有撓政者、炎注于牘曰、汝爲天子親、亂天子法。炎爲天子臣、正天子法。浙右人多誦之。竟以謗罷、再奉祠。積官至中奉大夫、軍器監、賜金紫。嘉





定十一年卒于家。年八十一。所居有雙溪。築亭寄興。以白樂天自比。所著書有讀易筆記、尚書傳禮記、論語、孝經、老子解、春秋衍義、象數稽疑、禹貢辨考、工記、鄉飲酒儀、諸經考疑、編年通紀、紀年提要、天對解、韓柳辨證、傷寒論、總曰雙溪類藁。初著易解未竟。病革。夜分祝天。願須臾無死。以成書。卒如其言。

胡升撰 《新安文獻志》卷六九

王季嘉墓誌銘

予自尚書郎罷歸。屏居鏡湖上。郡牧部使者多不識面。至縣大夫以耕釣所寄。尤避形迹。弗敢與通。惟兩人曰山陰張君橐、會稽王君時會。相從歡然如故交。張君端亮英達。不幸卒于官。王君尤淵粹有守。官滿造朝。來別予。悵然語之曰。贈行當以言。願足下自愛。毋以用舍愧初心。敗晚節。君曰。是我志也。及見除書。從天官銓調湖南轉運司主管文

字以去。方是時。大臣多知君賢。近臣或奏疏薦君。而揚歷久。且嘗爲邑以最聞。近比當得美官。君一不顧。方上書論進退。人才當考實。不宜以近似斥善士。已而迂道來過予。喜津津見眉宇曰。某于是粗能不負公所期矣。予作而答曰。僕不失言。足下不失己。皆可賀也。及卒。予聞訃。嘆驚。爲朝廷惜此一士。亦竊喜君仕雖躋而志達也。會其子前葬來求銘。因叙而銘之。君字季嘉。慶元府奉化縣人。曾大父起。大父元發。皆布衣。考中立。以君有列于朝。再贈至宣教郎。君自少時事親孝。事兄悌。處鄉里學校。從師擇友甚嚴。言語舉動。忠敬有法。與兄時叙同登乾道五年進士第。仕自台州司戶參軍。歷袁州州學教授。監行在左藏西庫。知紹興府會稽縣。最後終于長沙。自迪功郎七遷至朝散郎。賜緋魚袋。初。魏惠憲王判明州累年。君移書丞相史魏公。言國家早建儲宮。以定天下之本。而魏王偃藩



在外天下皆以爲當然者。父子異宮、天下爲家、東藩之守、猶異宮也。然父子兄弟之情、終若有間。雖曲加恩禮、豈若用故事、使得日奉朝謁、外庭濟濟、示天下以公、內庭熙熙、從家人之樂哉。史公讀之、太息稱善。會魏王薨、言不果行。觀君此事、使得居中任用、其補國家、化天下、必有大過人者矣。有識之士、恨君之不遇也。會稽歲霖潦、郡方督已蠲之賦甚急、君持不可。守不聽、乃袖告身、易服、立庭中力爭、守爲之奪氣、民賴以紓。遂修社倉之政、因立保伍、以察不孝不悌惰游不逞者、風俗一變。會營奉永阜陵、吏按舊比、抱文檄如山、環案立。君徐視去十之七、餘不可已者、召民面給錢粟、與爲期會。于是民不知役、而事悉集。君所至設施、多可稱述、論事亦多識大體。予所書、特其章章可備史官之求者。若廉于貨財、簡于自奉、不納妄饋、不受羨俸、此在君爲不足言、故皆略之。君銳意經學、有易詩、

書、論語、訓傳、鄉飲酒辨疑、凡數十百卷。文辭簡古、尤喜爲詩、與范文穆公及尤延之、楊廷秀倡酬、諸公皆推之、有泰庵存稿三十卷。病已亟、猶強起、拱手端坐、無惰容。顧家人曰、吾學易、晝夜之理甚明。遂卒、享年六十有四。慶元六年正月丙申也。娶楊氏、封安人。淑柔孝恭、晚益好靜、安于死生、有學士大夫所難者。先君一歲卒。男女各五。男宗廣、以君遺恩入官。宗大、太學生。宗樸、早卒。宗野、宗愚、女長嫁進士楊琪、迪功郎沈黯、進士杜思問、進士孫之穎、幼尙處。孫男五人、與點、與回、與賜、與文、與求。孫子七人、皆尙處。諸孤將以十二月甲午、泰君及安人之柩合葬于某地之原。銘曰、

君才雋偉、天所授、早篤于學、晚益富。年過六十、是亦壽、道悠運促、志弗究。子孫森然、敏而秀、如芝在庭、驥在廐。築丘植櫬、日高茂、盛德表表、宜有後。

呂祖謙墳記

宋故朝請郎直秘閣、主管亳州明道宮呂公諱祖謙、字伯恭、其先河東人、後徙壽春。六世祖申國文。靖公自壽春徙開封、遂爲開封人。曾祖諱好問、資政殿學士、大中大夫、贈太師。妣王氏、贈秦國夫人。祖諱弼中、右朝請郎、贈右正議大夫。妣章氏、文氏、皆贈碩人。考諱大器、右朝散郎、贈朝請大夫。妣曾氏、贈宜人。公紹興七年三月十七日生、以祖致仕恩、補將仕郎、監潭州南嶽廟、嚴州桐廬縣尉。未上、登隆興元年進士第、又中博學宏詞科、改南外敦宗院宗學教授。丁先妣憂、免喪、除太學博士。有旨、中都官待次者補外、添差嚴州州學教授。踰年、復除太學博士、兼國史院編修官、實錄院檢討官。召試館職、除秘書省正字。丁先考憂、免喪、主管台州崇道觀。召爲秘書郎、兼國史院編修官、實錄院檢討官。遷著作佐郎、著作郎、兼權禮部郎官。淳熙五

年冬得疾、請去職。先是奉詔編類皇朝文鑑、至是書成、除直秘閣、主管建寧府武夷山冲佑觀。病少間、除著作郎、兼國史院編修官、不就。添差兩浙東路安撫司參議官、亦不就。主管亳州明道宮。八年七月二十九日、以疾終于家、享年四十有五。兩娶韓氏、今龍圖閣學士元吉之女。又娶芮氏、故國子祭酒燁之女、皆先卒。子男三人、岳孫齊孫早夭。延年甫三歲。女二人、華年適進士潘景良、螺女亦早夭。呂氏家世葬鄭州新鄭縣懷忠鄉、建炎南渡、太師而下皆葬婺州武義縣明招山、遂以是年十一月三日葬于祖塋之右麓。公之問學術、業本于天資、習于家庭、稽諸中原文獻之所傳、博諸四方師友之所講、參貫融液、無所偏滯。晚雖卧疾、其任重道遠之意達于家政、纖悉委曲、皆可爲後法。葬日薄、未能深考公之言行、求正於有言之君子、以詔來世。姑舉其可得而形容者、以志悲思焉。公所爲

書有呂氏家塾讀詩記三十卷、參取毛鄭衆氏之說而間出己意、其後更加刊定、迄於公劉之首章。大事記起春秋後終于五季、書法視太史公所錄不盡用策書凡例、其條綱端緒、槩見於通釋解題。之二書雖絕筆於征和之三年、亦未脫稿。其它遺文及所纂輯者尙衆、以未倫次、皆藏於家。弟祖儉泣記。

呂祖儉撰 《東萊呂成公外錄》卷四、明刊本

校記

①校注云：「戶，疑作『有』。」

②文：原闕，據《東萊呂太史文集》附錄補。



藏書

宋儒碑傳集卷一百四十二

陳傳良

宋故寶謨閣待制致仕贈通議大夫陳公

行狀

公諱傳良字君舉姓陳氏其先自閩徙溫州瑞安縣之帆遊鄉至公八世矣曾祖靖祖邦皆有隱德考彬深於易學潔行自晦鄉里稱爲長者以公貴累贈朝請大夫妣徐氏贈令人公英邁不羣彊學篤志其爲文出人意表自成一家人相與傳誦歲從游者常數百人宗正少卿鄭公伯熊大理正薛公季宣皆以經學行義聞于天下公每見二公必孜孜求益脩弟子之禮一日與薛公語恍然若有所失乃獨潛心易論語二書求古聖賢所以窮理盡性之要近思深探弗造其極致弗措也既而薛公客晉陵公往從之薛公與公語合喜甚益相與考論三代秦漢以還興亡否泰之故與禮樂刑政

損益同異之際蓋於書無所不觀亦無所不講經年而後別去還過都城始識侍講張公栻著作郎呂公祖謙數請問扣以爲學大指互相發明二公亦喜得友恨見公之晚是歲乾道六年也其秋入太學國子祭酒芮公曄雅聞公名親訪公于所隸齋見其二子且即以公爲學諭俾爲諸生講說經義公以非故事固辭芮公不可公遂謁告去從容天台雁蕩間益究其學越二年禮部以名聞孝宗方銳志治功慨然慕唐太宗之爲人於是臨軒以太宗事策新進士公對言陛下有無我之量而累於自喜有知人之明而累於自恃是以十有一年于茲而治績未進於古下情猶鬱公論猶沮士大夫猶有懷不敢盡且以太宗求諫崇儒等事反復規諷其言深婉切至有司奇之將請實第一或議不合猶在甲科當是時公名震天下其文流入夷貊授迪功郎泰州州學教授未赴參知政事龔公



茂良爲孝宗稱公之材、持除太學錄、車駕幸學、改承奉郎、居歲餘、力求外補、呂公方在三館、謂公曰、盍少留、公曰、出處之義、不敢不謹其始也、添差通判福建、丞相梁公克家領帥事、委成于公、公爲之畫、凡一路若郡所當興廢及訟獄之曲直、一裁以義、無所回屈、疆禦者不得售其私、始忌且怨、州人有方在諫省者、論公罷之、居二年、主管台州崇道觀、又二年、差知桂陽軍、又三年、乃之官、居閒既久、日覃思於六經、將有所述、以開後學、一室蕭然、與士友終日澹如也、治桂陽、首爲教條、戒其吏以徙善遠罪、諭其民以孝弟婣睦、人感公德意、不嚴而化、蠲民宿負及縣月輸之未入者、凡廩藏受輸以例取贏者悉裁之、明條目、簡文移、縣得達情於郡、而吏無所容姦、郡計自裕、歲小旱、預出錢糴于旁郡、置數場以糴、糴已復糴、循環不乏、又聽民以薪易官粟、或就役于官、食其力、民無飢者、連帥潘公

時以緡錢五千助糴、公益以郡錢、立式貸之、約歲登償、及期不復索、光宗受禪、除提舉湖南常平茶鹽、去郡、老稚遮送不絕、明年、就除轉運判官、湖湘民無子孫者、率以異姓爲後、吏利其貲、輒沒入之、公曰、使人絕祀、非政也、況養遺棄、固有法、存其後者幾二千家、潭州常平粟且四十萬、而全、永、道等州數絕少、無以備歉歲、公曰、移多益寡、使者職也、旣掌漕、猶攝庾事、乃令諸州各留歲運粟以益常平、以潭之常平代其輸、郡告乏者、減其送漕司之錢、民輸折苗錢重、爲損其直、潭州榷<sup>②</sup>州市酒課、歲嘗至緡錢二十萬、遂以配于民爲額、公攝州事、按舊籍頓減之、民得少紓、改提點浙西刑獄、過闕、留爲吏部員外郎、論對奏言、藝祖皇帝垂裕後人、專以愛惜民力爲本、熙寧以來、用事者始取藝祖約束一切紛更之、諸路上供歲額增於祥符一倍<sup>③</sup>、崇寧重修上供格、頒之天下、率增至十數倍、其他雜

斂則熙寧以常平寬剩、禁軍闕額之類、今項封樁而無額。上供起於元豐、經制起於宣和、總制、月椿起於紹興、皆迄今爲額、折帛和買之類又不與焉。茶引盡歸於都茶場、鹽鈔盡歸於榷貨務、秋苗斛斗十八九歸於綱運、州縣無以供、則豪奪於民、民困極矣。方今之患、何但夷狄、蓋天命之永不永、在民力之寬不寬耳、豈不甚可畏哉。陛下宜以救民窮爲己任、推行藝祖未泯之澤、以爲萬世無疆之休。且言、今天下之力竭於養兵、而莫甚於江上之軍。都統司謂之御前軍馬、雖朝廷不得知、總領所謂之大軍錢糧、雖版曹不得與。於是中外之勢分、而事權不一、施行不專、雖欲寬民、其道無繇。誠使都統司之兵與向者在制置司無異、總領所之財與向者在轉運司無異、則中外爲一體、中外一體、則寬民力可得而議矣。上從容嘉納、謂公曰、朕思見卿久矣、卿學問深醇、著書必多、可悉以進也。遂

遷秘書少監。公進周禮說、以格君心、正朝綱、均國勢爲目、目各四篇。兼實錄院檢討官、選兼皇子嘉王府贊讀。公以爲王者之學、經世爲重、祖宗成憲、尤當先知、乃纂次建隆以來行事之要、爲王講誦大指。每至立國規摹、必歷叙累朝因革利害、附見其下、本末粲然、如示諸掌。紹熙三年十二月、擢起居舍人。四年正月、兼權中書舍人。先是上少不豫、群臣奏請、或弗時決、公言、一國之勢譬如一身、少有壅底、便生疾恙。若今日遷延某事、明日阻節某人、人心益玩、主勢益輕、設有姦愼、乘時爲利、則中外之情不接、威福之柄可移。雖是擅傳旨揮、將亦無從覺察。陛下何不務自寬大、以怡精神、出則從順動之宜、居則享燕閒之福、而乃徒速無故之謗、且貽萬一之憂哉。又言、人主不自彊、則讒間迎合之計得以乘之。因其厭省覽也、則有以好名之說中傷忠讜、因其憚改作也、則有以生事之說沮壞





事功。凡若此皆讒間也。因其近聲色也。則有以勿問外人之說固結宮禁。因其樂燕飲也。則有以勿親小事之說竊弄威福。凡若此皆迎合也。讒間之計中。則君子曰疏。迎合之計中。則小人曰親。而其極至於天變不告。邊警不聞。如是而天下不多事者。未之有也。給事中兼嘉王府翊善黃公裳以封還除目改兵部侍郎。公言。給舍封駁。是謂官守。若以爲是。則當聽從。若以爲非。則當罷黜。今陰廢其言而陽遷其官。是非不明。賞罰倒置。不謂清時有此過舉。乞令裳依舊供職。以釋在廷之疑。池州副都統制率逢原就除都統制。公言。逢原專橫培植士伍咸怨。淮西總領鄭湜姑按其偏將以警之。逢原懼而自劾。方詔放罪。不應信宿之間遽有遷擢。詔依已降旨揮。公復繳論之。陳源除入內侍省押班。給事中駁之。不可以書讀矣。公言。源僭侈專橫。得罪高宗。投竄遠方。籍入家產。及許逐便以來。

間有恩命。則臣僚相繼論奏。悉蒙開納。今瑣闥迫於天威。黽俛書讀。臣必不敢奉詔草詞。內批張子仁除節度使。公言。留正輔相初政。于今五年。待罪郊外。而去留未決。趙雄以前宰相起帥江西。抱病告終。而恤典不及。西陲擁兵十萬。吳玘物故。擇代不可不謹。恤終不可不至。而屏去申奏。以爲失實。當此時也。乃遽獨加恩於勳舊之家。輕重不倫。先後失序。臣深爲聖明惜之。詔子仁係勳臣子。可與書行。公又言。報答舊勞。孰與輔初政者之爲親。矜憐後裔。孰與專帥閫者之爲重。陛下儻下察末議。少霽威嚴。天意豁然。群疑冰釋。事關廊廟。則立賜施行。憂在疆場。則亟須處置。庶幾國家尊榮。朝野欣豫。奏雖不報。然陳源竟不命詞。張子仁亦不果授。越是歲十二月。遷起居郎。公言。陛下覆護臣子。容忍不棄。而不務明其去就之誼。比有以臺官察宰屬者矣。陛下皆出之。俄而並召。並用爲卿將。孰

是孰非耶。有以後省駁從班者矣。陛下爲罷給事中、已而並除職名、一去爲郡、一爲王府官、然則是俱有罪耳。有以諫官疏大臣者矣。陛下欲並用之、大臣乞去不得請、諫官乞去又不得請、然則是俱賢耳。至如臣不度疏賤、論奏內侍不當爲知省官、陛下雖納臣之章、不行詞、不賦祿、而其人至今出入禁闥、與見任無異、則是中書後省與黃門相持不決、尤所未喻。願陛下明人臣去就之誼、自不肖臣始。時上疾猶未平、重華之朝稍闕、大臣而下、交進更諫。公自以受知最深、每入對、必以父子天性、及古今禍福安危之際、委曲開陳、期以感悟上心、上亦爲之動。及孝宗有疾、公踰旬三請對、以爲兩年以來、以不過宮諫者多矣。陛下間或聽之、亦無過勉強一出。臣獨私念、陛下特誤有所疑、積憂成疾、以至于此。每於陛下心事之間、反覆開明、至於深入切中、陛下爲臣傾倒、一無隱情。然而今日確

許、明日中變、以誤爲實、而開無端之釁、以疑爲信、而成不療之疾。是陛下自貽禍也。公敷奏剴切、上未能聽、因面乞納祿、不許。最後復言、今天下本無事、而陛下以憂疑失人心。若聖意釋然、則群情自解、轉禍爲福、不過反掌之間。臣言不足聽、當永辭闕庭。是以復論人心可畏之說。願陛下亟圖之。是日公論諫益切、度上意弗回、乃上致仕之奏。上曰、甚好甚好。公退、則申尙書省、自免而歸。改秘閣修撰、復兼嘉王府贊讀。公辭不拜。今上受內禪三日、詔公歸班。又四日、除中書舍人。公三辭而後受。未至、命兼侍講。時方博延名德之士進諸朝廷、知潭州朱公熹召爲煥章閣待制、侍經筵、與公同日造朝、班行相慶。公入見、首言、陛下嗣守丕圖、宜上稽孝宗明斷總攬之政、兼體上皇隆寬不自用之美、參酌兩朝治體、擇其爲天下後世便者兼行之。詔知閣門事謝淵係皇太后親弟、特給全俸。今同知



樞密院事樓公鑰時爲給事中、封還錄黃。公言、樓鑰所駁允當、望追寢前命。臣失於論奏、乞正鹵莽之罪。因言、陛下臨御未久、每事當遵守法度。近因臣下妄有陳乞、往往直降內批、或與差遺、或添請給人從。深恐自此浸開倖門。願陛下念付託之重、加兢懼之誠、凡宮禁請求、斷勿垂聽。兼直學士院。會有詔、朱熹與在外宮觀、公請對、將陳其不可。詔俟別日宣引。公連疏言、朱熹三朝故老、難進易退、欣慕聖明、幡然一出、天下相賀、以爲得人。則進退之間、豈宜容易。內批之下、舉朝失色、臣不敢書行。後四日、詔朱熹進寶文閣待制、與郡。未幾、以公兼實錄院同修撰。公以史事宜有專官、再辭不許。阜陵復土、上始自重華宮入居大內。公首請增置諫員、收用恬退之士、詔問民間疾苦。上雅敬公、每對必虛己以聽。始、上在潛邸、寮案因誕日以詩爲壽。公與翊善黃公詩皆以開導德性、冀有所規益。上

感二公意、各親書其詩謝之。於是上屢趣公爲跋語刊石、同進者以上眷公厚、始多忌之。知閣門事韓侂胄浸竊威福、倚言路以排斥忠正、有上章詆公者、詔提舉江州太平興國宮。慶元二年夏、言者復交章詆公、詔降三官、罷宮觀。公屏居杜門、一意韜晦。榜所居室曰止齋、日徜徉其間。賓至、則相與講論經史、亶亶不厭。故舊之在朝者、或因人問公起居、公皇恐遜謝而已。嘉泰二年正月、詔復元官、提舉江州太平興國宮。三年、起知泉州。公以疾力辭、許之。授集英殿修撰。疾益侵、請謝事、授寶謨閣待制。以其年十有一月丙子卒于家。屬纊、酌酒與兄訣、凝然而逝。年止六十有七。積階至朝議大夫、爵永嘉縣男。訃聞、贈通議大夫。娶張氏、主管禮兵部架閣文字孝愷之女。封令人。以婦德稱。先公八年卒。子男二人、師轍、承務郎、新監臨安府鹽官縣買納鹽場、師朴、承務郎。女七人、長適迪功郎、新光

化軍司理參軍潘子順先卒次適從政郎福州連江縣丞薛師雍次適迪功郎新處州儒學教授林子熙次適迪功郎新福州連江縣尉徐冲次適進士張紹次適進士張疇次未行孫女一人開禧元年三月庚寅師轍等奉公之喪合葬于所居前山令人之兆公剛毅洞達寬博樂易其爲學先於致知充以涵養默識自得不可企及而篤於躬行周於人情事物兼博約貫精粗不倚于一偏與同志論學必以兢業爲先蓋其所自用功處也事兄恭謹終老不懈自奉清約閨門肅然其接人委曲周盡人人得其歡心汲引後進如恐不及小善曲藝獎予無倦士多不遠數千里樂從公遊公隨其所長誘掖磨琢以成其材在湘中奉詔薦湖廣之士以今四川安撫制置使吳公獵爲稱首其他如宋文仲楊炤蔣礪皆一時之選及在後省丞相留公正知樞密院事胡公晉臣數訪人物公爲言某人

有德某人有材宜兼收而器使之毋有所偏廢二公以公言多所引用公未嘗以語人也公早有重名媚疾者衆往往爲謗語以中傷公故當孝宗有爲之時主上願治之始而不得少安於朝退而家食者前後且二十年比上念公起鎮名藩天下期以復用而公已病篤矣卒之日室無餘貲田不過二頃其葬也資友朋之賻以集事然後誘沮公者始皆愧服公在三山閱故府所藏累朝詔條凡財賦源流國史所不盡載者考之悉得其要領常以爲祖宗德澤深厚而後來有司乘時易令取民之數乃過於前代宜有以變而通之故一見光宗首陳其要及轉對則乞議免役錢進故事則乞除身丁錢至上初親政則又乞出內帑助版曹經費少寬催理以紓民力然皆言之而未及用天下不少被其澤也公旣沒之四年上誅韓侂冑盡黜其黨一時故老爲侂冑所排斥者收用略盡使公尙在

得復見上、以素所考論次第條奏、見於施行、其所補豈有淺淺哉。公有毛氏詩解詁二十卷、周禮說三卷、春秋後傳十五卷、左氏章指三十卷、讀書譜一卷、建隆編一卷、制誥集五卷、文集三十卷。公深於春秋、其於王霸尊卑、華夷消長之際、及亂臣賊子之所由來、發明獨至。又以爲左氏最有功於經、能存其所不書、以實其所書、故作章指以明筆削之義。樓鑰爲之序曰、自有春秋以來、蓋未有此書也。平生篤於學易、嘗爲之說、而未及就。幼學未冠、從公遊、朝夕侍側者且十年、公愛而教之、勉以前輩學業。幼學雖不敏、然佩公之訓、不敢自棄、每視公以爲出處、知公獨詳、敢狀其言行之大略、以上於太史氏。謹狀。嘉定元年十一月日、學生朝議大夫、試尚書吏部侍郎、兼侍講、兼直學士院蔡幼學狀。

蔡幼學撰 四部叢刊本《止齋先生文集》卷五二附錄

寶謨閣待制贈通議大夫陳公神道碑

嘉泰三年、集英殿修撰陳公告老于朝。天子歎曰、此吾舊學、且書命之臣也。除寶謨閣待制。遺奏聞、贈四官、錄其後、所以飾其終者如故典。門弟子哭之失聲、里人聚而相弔、四方士夫聞之、無不蠶傷者。蓋非他人云亡之比也。公諱傳良、字君舉。其先自閩徙溫州瑞安縣帆遊鄉澍村里、至公八世矣。曾祖靖、祖邦、父彬、皆不仕。父以公貴、累贈朝請大夫、妣徐氏、贈令人。朝請遽于易、教授鄉里、以篤行稱。公天分高勝、其于學問、心悟神解、而苦志自勉、精力亦絕人。隆師親友、有不可解于心者、興化劉復之、朔以南省第一人來爲司戶參軍、攝教官、得公程文、以爲絕出。公之年甚少也、而名已高、開門受徒于仙巖僧舍、士子莫不歸敬。薛寺正士龍見公問所安、公曰、毋不敬。士龍曰、比參倚如何。公釋然增進、歸心薛氏。後又相從于漏上、讀書一日千



里。其爲薛氏祭文云、我昔自喜、壁立倚天。見兄梅潭、忽若墜淵。梅潭卽仙巖也。伊洛之學、東南之士自龜山楊公時、建安游公酢之外、惟永嘉許公景衡、周公行己數公、親見伊川先生、得其傳以歸。中興以來、言理性之學者、宗永嘉、惟薛氏後出、加以考訂千載、自井田、王制、司馬法、八陣圖之屬、該通委曲、眞可施之實用。凡今名士得其說者、小之則擅場屋之名、大可以行于臨民治軍之際。公游從最久、造詣最深、以之研精經史、貫穿百氏、以斯文爲己任、綜理當世之務、攷覈舊聞、于治道可以興滯補敝、復古至道、條畫本末、粲如也。本朝名公鉅卿、不可縷數、自韋布而名動宇內者、不過數人。公自爲舉子業、其所論著如六經論等文、所在流播、幾于家有其書。蜀中文學最盛、讀之者無不動色、文體爲公一變。至傳入夷貊、視前賢爲尤盛。乾道六年始入太學、士無賢不肖、斂衽下風。八年、公之

高弟蔡公幼學爲省元、公次之、徐公誼又次之。薛公叔似、鮑君瀟、劉君春、胡君時等、皆鄉郡人、非公之友、則其徒也、尤爲一時盛事。旣登甲科、朝野想望風采、授泰州教授以歸。參政龔公茂良帥江西、以書幣招之、願與定交。公曰、此古人羔雁之禮、不行于世有年矣。善辭之、未赴。會太學錄闕、求之者衆。龔公實行宰相事、奏孝宗曰、待次不改闕、初官不堂除、陛下良法也。太學錄一闕、而睥睨者衆、臣欲擇取名儒、爲士林所推者、越拘攣而用之、則人自服矣。上問爲誰、以公對。上曰、是朕所素知者。除命一下、果無異辭。就職幾月、車駕幸學、改承奉郎。龔公旣罷政、亦寢有相嫉者、添差通判福州。帥相梁公克家得公、喜甚、以政委之。公悉心裨贊、不事形跡。卒以專擅論罷。時淳熙七年也。尋主管台州崇道觀、起知桂陽軍。閒居八年、始赴郡。提舉荊湖南路常平茶鹽事、就遷轉運判官、改兩浙西路提



點刑獄。公在桂陽、蠲除宿負、罷弛斜科、倉司則補糴諸郡米至十萬斛、漕司亦蠲錢數萬緡。力講荒政所及者廣。進登極銀三千兩、屬方救荒、力不能辦、申請減額、損三之二、實惠遂及一方。以服勤使事、嘗感寒疾、至是以奏事再入脩門、鬚鬢如雪。丞相留公正一見、歎曰、幾年陳君舉、尙可使外補耶。奏留爲吏部員外郎。初對、上曰、卿去國幾何時。朕欲見卿久矣。知卿學問深醇、有所著書進來。時上臨朝淵默、罕有聖語。公敬謝而退。以周禮說進。擢秘書少監。訓詞曰、朕日御便朝、延見郎吏。有郎白首、色夷而氣溫、儻者贊其名、則汝傳良也。朝列傳誦實黃公裳之詞也。兼實錄院檢討官。皇子嘉王府妙選官寮、以公兼贊讀。未幾、除起居舍人兼權中書舍人。期年、始遷起居郎。紹熙末年、龍樓問寢不以時。自大臣而下更進讜言、從班多連名騰奏、或同班叩請。公自以受不世之遇、必欲身任其責、

請對直前、幾無虛月、剴切痛憤、指陳利害、無所不用其至。蓋嘗贊嘉邸爲中宮言之。又嘗奏疏謂、臣等在王邸、于古今父子君臣之際、人之大倫、天地之正義、以開導賢王、而會慶闕上觴之禮、長至虧稱賀之儀、區區口耳之感、必不能勝躬行之化、紙上之習、必不如家傳之法。今旣上失三宮之歡、則臣等講讀皆爲空言矣。其餘骨鯁之言、有敵己以下所不能堪者。上終不加譴、而言亦不用。一日奏云、陛下屢許臣以出、又令傳旨于廟堂、而復不然。臣貪戀厚恩、未忍決去。容臣遂思補過、更圖入奏。若不垂聽、則有致爲臣而去耳。又從而草奏曲盡事節、犯顏極論、度上意不回、遂上挂冠之奏。上雖不受、玉音賜可。公即申省乞致仕、宰輔留之不可。旣行、授秘閣修撰、嘉王府贊讀。皇上御極、以中書舍人召還。兼侍講、兼直學士院、實錄院同修撰、謂可行素蘊矣。而言者指其學術不正、罷爲提舉江



州太平興國宮。慶元二年，復劾其在太上朝奏對狂率，降三官，罷祠。嘉泰二年，叙復元官，再畀祠祿，遂除泉州。以病力辭，除集英殿修撰，病革謝事，遂有次對之命。十一月十有二日，終于里第，享年六十有七。積官至朝議大夫、爵永嘉縣開國男、食邑三百戶。娶張氏，名幼昭，字景惠，主管禮兵部架閣文字，孝愷之女。以婦德著聞。先公九年卒。子男二人，師輒迪功郎、安豐軍壽春縣主簿、師朴、承務郎。女七人，長適迪功郎、監鎮江府凌口酒庫潘子順，次適從政郎、新福州連江縣丞薛師雍，次適迪功郎、處州州學教授林子燕，次適迪功郎、新福州連江縣尉徐冲，次適進士張紹，次適進士張疇。一尙幼。令人葬于前山。開禧元年三月庚申，二子奉公之喪合焉。嗚呼！以公之抱負偉傑，學博而精，觀書別有高識，作文自出機杼，類非今人所可企及，求之古人，亦未易多得也。受知三朝，掌內外制，經帷

史館，不爲不遇，而名高多忌，卒不得究其經世之學，爲可痛也。公行誼著于鄉曲，述作擅于當世，不待屢書。敢摭其論奏之大者列之，然後知其非諛墓之詞也。公之赴郡，免奏事而去。歸覲光宗，以舊欲奏之孝宗者陳之。蓋公憂國之心，澤民之具，其說不易。謂藝祖創業垂統，無非可傳之法，而深仁厚澤裕我後人，則專以愛惜民力爲本。攷之故牘，自建隆至景德四十五年間，南征北伐，未嘗無事，而金銀錢帛、糧草雜物七千一百四十八萬計，在州縣不會，古所謂富藏天下者也。諸道上供，隨所輸送，初無定額。留州錢物，雖盡曰係省，而不盡取。大中祥符元年，三司始奏立上供稅額。熙寧用事者始取藝祖之約束，一切紛更之。新法既行，增上供之額一倍。至崇寧遂增數倍。此特上供耳，其他雜物、熙寧則有令項封椿，元豐則有無額上供，宣和之經制，紹興之總制，月椿皆至今爲額，而折帛

和買之類不預焉。茶引盡歸都茶場、鹽鈔盡歸榷貨務。秋苗以十之八九爲綱運、是皆不在州縣。于是取之斛面、取之折變、取之科敷、抑配贓罰、而民之困極矣。方今之患何但夷狄。蓋天命之永不永、在民力之寬不寬。豈不甚可畏哉。上曰、莫急于此、但以處置爲難。公奏第三劄子、乃是處置之說。既奏、褒美再三。其大略曰、嗣位之初、詔爲寬民、置局講究、而民窮如故。蓋以裁抑細微、或蠲空張之數、未有以稱明詔、慰民望也。國家財力竭于養兵、又莫甚于江上之軍。故每欲省賦、朝廷以爲可則版曹不可、版曹可則總領不可、總領可則都統司不可。以謂之御前軍馬、雖朝廷不得知、謂之大軍錢糧、雖版曹不得預、中外勢分、職掌不同、事權不一、施行不專、雖欲寬民、得乎。使都統司之兵與向者在制置司時無異、總領所與向者在轉運司時無異、事出一體、而後可議寬民力矣。轉對、又論藝祖

治大而不治細、以上書人文字令知制誥看詳、升降以聞、次對章奏、下尙書省參詳。人主所自擇、不過臺省長官、豈不甚易行哉。又嘗論役法、謂免役錢者本以恤民、使出錢雇役而逸其力也。自罷募戶長壯丁而取其錢、今隸總制之類、于是役者白著而法不得不壞。保正長催科、是以保甲法亂役法而行之也。熙寧自有役法、五等簿是也。自有保甲法、魚鱗簿是也。五等則通縣計之、魚鱗以比屋計之。保甲但以稽察盜賊、與免役初不相關。熙寧七年始以保丁充甲頭催稅、而耆戶長壯丁之屬以次罷募、利其雇錢而封椿之法起矣。元豐遂著爲令、以甲頭同大保長催科。元祐匆匆復舊、隨即紛更。至紹聖二年、催科悉用大保長、役法轉而爲保甲。嘉祐以前、固無此法、至此又非王安石之舊、特章惇爲之。今士夫恥言安石之爲人、指章惇爲罪魁、而方世守其變亂之餘、以爲成憲、萬古設法、



一安石能改之、章惇能力行之、此斯民最大之害、乃若出于三代之舊而莫敢議、有議之者、則付之有司、不過檢坐見行條法、申嚴行下、此臣尤所未喻也。誠能不以保甲法亂役法、雖未足以盡寬民力、亦可謂至恩矣。進故事以眞宗詔兩浙、福建、荆湖身丁錢並特除放、其論尤詳。以爲減折帛不如身丁切于窮民、此皆公平時攷古驗今、可舉而行、非若泛然美觀之言、卒不得見于用。若其封還詞頭、遇事輒發、未易悉數。如請還黃裳給事中、則引唐呂元膺、紹興程瑀以爲比。論張子仁之建節、則請先處分留正之去、留吳挺之除代。而其甚難者、莫如陳源與率逢原二者。源之貫盈、幸不及誅、忽除內侍省押班、瑣闥攝事者、繳章五上、人皆傳誦。大臣力請、觸雷霆之怒、幾不自全。一爲書行、公議沸騰、黨與凶焰不可嚮邇、而公獨當之。逢原粗暴、恃有奧援、所至兇橫。其在池陽、幾至軍變、爲總領

鄭湜所發、按其偏裨。上命樞臣鑄戒、方待罪間、自副統制陞都統、公又論之。源供職自如、而詞命不行、終不得俸。逢原先被宣劄、已自書銜、而公于二者執奏再三、終不奉詔、以至乞身而去。公去未幾、而內禪、子仁訖不得節鉞、源亦罷去、逢原以病廢。惟此三事、無敢嬰其鋒者。公神色不動、來則繳奏、旁觀者爲之寒心、而外間罕知之者。鑰與公同生于丁巳、少我九日。自分教東嘉、爲布衣交、義兼師友。後雖一同朝蹟、而情義日篤。一旦同在西掖、同攝北門、相與如弟昆然。至于同寅協恭、尤非他人之比。藝祖東嚮宗廟大典、集議至再、始正百年之禮。而臺諫有異論、鑰極論之。丞相趙公宣旨、鑰又執不可。公從旁力贊其決、而事遂定。謝知閣淵以太母之弟有旨、請給等依祿格全支。公已書行、而鑰駁之。再命特與書行、公上奏、先具鑰之駁章、且曰、樓鑰委是允當、始知臣失于點檢、不及論奏。若

更書行、臣有三罪、一則迎合聖意、不敢執奏。二則衝改旨、揮使有司無所憑守。三則恥過遂非、無見善則遷之義。欲望追寢御筆、仍正臣鹵莽之罪。其事遂已。嗚呼、孰有負重名于時、致身至此、而服義引慝、同濟公議如公者乎。汲引人才、如恐不及。在湖南、應詔薦宋文仲、吳獵、蔣礪、楊炤、在朝則薦朱熹、葉適、吳仁傑、王明清、修史、苟知其賢、不復以私嫌爲忌。其他成就延譽、使就聲名者、不知其幾也。博極羣書、而于春秋左氏尤究極聖人制作之本意。左氏翼經之深旨、著春秋後傳、左氏章旨二書。蓋經止獲麟、孔子卒、傳止韓魏、反而喪之之後、殆未有此書也。願見不可得、則曰、此吾身後之書。近旣得之、誦讀不已、不揣而爲之序。其門人遂以銘爲請。鑰欲述公行事、或恐有觸忌之嫌。自以投閒十有三年、已掛衣冠、視蔭幾何。知公爲最詳、若畏避而沒其實、豈不負吾亡友。會粹未集而病、深恐

溘先朝露、不究此志。小愈、遂扶憊而畢之。公風度高遠、動輒過人。詩律之精深、字畫之適媚、登覽高致、吟諷低昂、親之則使人意消、王謝韻度、尙可想也。方主上在宮邸時、寮案以詩爲壽、惟翊善黃公與公之詩皆有諷諫。上爲置酒、各親書所上詩謝之。公後嘗奏知、以御札登諸石而跋其下。以其參示鑰、未及刻而公歸。訪求此藁不可復得、猶記其略云、季札觀樂歌頌、而曰哀而不愁、太史公讀虞書、至于君臣相勅、維是幾安、未嘗不流涕也。成王作頌、推己懲艾、可不謂戰戰恐懼、善守善終哉。蓋頌者不專于美盛德之形容、皆敕戒之義。秦斯以來、此義殆絕。鑰讀之、爲之感咽。嗚呼、此又先儒之所未發也。銘曰、

溫居瀛壖、儒學之淵。間氣所鍾、挺生斯賢。舒向金玉、游夏淵源。群書博極、本末貫穿。退然布衣、名震八埏。晚登周行、帝席爲前。典刑具存、訓詞是專。王



邸螭陛、史館經筵。獨當雷霆、刀欲回天。經世澤民、  
竇志終焉。天之生才、夫豈偶然。儲神毓秀、其必有  
年。宦匪不達、受才則全。道之不行、賴有遺編。後有  
百載、復見儒先。哀哉止齋、見此銘鐫。

樓鑰撰 《攻媿集》卷九五

寶謨閣待制中書舍人陳公墓誌銘

公姓陳氏、諱傳良、字君舉、溫州瑞安人。初講城南  
茶院時、諸老先生傳科舉舊學、摩蕩鼓舞、受教者  
無異辭。公未三十、心思挺出、陳編宿說、披剝潰敗、  
奇意芽甲、新語懋長。士蘇醒起立、駭未曾有、皆相  
號召、雷動從之。雖縻他師、亦藉名陳氏。由是其文  
擅於當世。公不自喜、悉謝去、獨崇敬鄭景望、薛士  
隆、師友事之。入太學、則張欽夫、呂伯恭相視遇兄  
弟也。四方受業愈衆。乾道八年、策進士殿廬、定公  
第一、奏入、不果用。教授泰州。朝廷難以銓法持之、  
遂授太學錄。將召試館職、復不果、使告公、將以爲

編修官、公辭焉。通判福州、右正言黃洽引王安石  
事劾公罷。主管崇道觀、知桂陽軍。或言知名士廢  
不用、凡三十三人、公爲其首、執政病之、稍遷提舉  
湖南常平茶鹽、轉運判官、浙西提刑、吏部員外郎。  
去朝十四年、至是而歸、鬢鬚無黑者、都人聚觀嗟  
嘆、號老陳郎中。光宗逆勞曰、卿昔安在。朕思見久  
矣、其以所著書示朕。遷祕書少監兼實錄院編修  
官、皇子贊讀、歷起居郎、舍人、皆兼中書舍人。會上  
疾、不能覲重華、公陰諷顯諫、危論婉說、因乞致仕、  
下殿徑行。改祕閣修撰、復兼贊讀、不至。今上即位、  
除中書舍人、侍講、同實錄院修撰。御史中丞謝深  
甫論、公言不顧行、提舉興國宮。居三年、察官交疏、  
削秩罷。時慶元二年也。嘉泰二年、始復官、再爲興  
國宮、知泉州、辭。授集英殿修撰、待制、寶謨閣。三年  
十一月丙子卒。開禧元年三月庚寅、葬于帆遊鄉  
澍村前山、距家巷語可達也。夫人張氏、封令人。子



師朴、承務郎。師轍、新監鹽官買納場。潘子順、薛師雍、林子燕、徐冲、皆壻也。既仕，未仕者張紹、張疇。未嫁者一女。孫女一人。公之從鄭、薛也，以克己兢畏爲主，敬德集義於張公，盡心焉。至古人經制、三代治法，又與薛公反復論之。而呂公爲言：「本朝文獻相承，所以垂世立國者，然後學之，內外本末備矣。公猶不已，年經月緯，晝驗夜索，詢世舊，繙吏牘，蒐斷簡，採異聞，一事一物，必稽於極而後止。千載之上，珠貫而絲組之；若目見而身折旋其間，呂公以爲其長不獨在文字也。公既實究治體，故常本原祖宗德意，欲減重征，捐末利，還之於民，省兵薄刑，期於富厚。而稍修取士法，養其理義，廉恥爲人材地，以待上用。其於君德內治，則欲內朝外庭爲人主一體；羣臣庶民並詢迭諫，而無壅塞不通之情。凡成周之所以爲盛，皆可以行於今世，視昔人之致其君，非止以氣力荷負之，華藻潤色之而已也。」

嗚呼！其操術精而致用遠，彌綸之義弘矣。蓋魯有臧文仲，鄭有子產，齊有晏嬰，晉有叔向，四人者當周之末造，能新美舊學而和齊用之，尊奉前聞而斟酌行之，不啻於古，不狃於今，是能輔當時而傳後世，此春秋名世之士，孔子之所賢者也。今公亦考元祐、慶曆，上極建隆，以達乎紹興之後，將櫛理絃續，起廢疾，解倒懸而燠休之。使公而得盡其用，則未知於四人者孰先後也。始，公以盛名，天下歸重，意其將有爲矣。其錄大學也，議科舉敝法，頗櫟括之而已。然而拘於常而習於故者，以爲異矣。其倅福州也，平一府曲直，使不得隱而已。然而畏其明而苦其決者，以爲專矣。流言轉易，應和喧然，而公之道不得行矣。孝宗嘗於禁中，從容讀公所論著，光宗嘗因直前獨對，許公且大用。及今上御極，有講堂之舊，招徠初載，有咨謀之美。然而奪其眷者，使反爲怒，蔽其知者，使不復思。而公之身，竟以

斥矣。以彼四人、使其君臣之際、上下之交、不遂靡然爲時所向、而謗譽雜於朝市、疑信異其始終、則夫功烈之成就、曾不能萬一、而況其有大於四人者乎。此余於公所以歎其開物之易、而周身之難成名之厚、而收功之薄也。悲夫。公葬四年、吏部侍郎蔡公行之始、狀其行於太史。行之從公蚤、載之詳。余亦陪公游四十年、教余勤矣。故摭其平生大指、刻於墓上、以記余之哀思、而行之已載者、不復述也。銘曰、

嗚呼陳公、未壯而興。羣士驚奔、來師來承。三代統紀、漢唐制度、百世雖遠、一二以數。事研於終、德復於初、發爲詞華、乃學之餘。內聖外王、本末洪纖、春秋四人、孔子所嚴。建隆之元、實維下武、斟酌損益、可繼堯禹。天欲平治、必待其材、生之實難、莫我肯培。名胡忌高、實奚惡富。裂棄文錦、縫彼敗素。寄印如累、其讒云云、擁書如林、其樂欣欣。有橘之蔽、有

茵之芬、有挈其舟、音遠不聞。我瞻澍村、泚矣南塘。二物則存、公乎在亡。

葉適撰 《水心文集》卷一六



校記

①桂陽軍：原作「桂楊軍」，據四庫本《止齋集》改。下同。

②櫛：右引作「儲」。

③倍：原作「培」，據右引改。



藏儒

宋儒碑傳集卷一百四十三

樓鑰

資政殿大學士贈少師樓公行狀

曾祖常、朝議大夫、贈太師。妣翁氏、贈陳國夫人。祖  
昇、徽猷閣學士、朝議大夫、贈太師、追封楚國公。妣  
馮氏。父璩、贈兗國公。妣汪氏。氏、贈兗國夫人。公諱  
鑰、字大防、舊字啓伯、姓樓氏、著籍于明、明今爲慶  
元府。粵自周武王封有夏之後于杞、爲東樓公子、  
孫因之以樓爲氏。國朝家于婺、于明者最著、相傳  
爲明樓氏、由婺徙焉、本一族也。家于婺者、紹興間、  
襄靖公炤簽書樞密院事、其門始大。家于明者、其  
盛久矣。公七世祖諱皓、六世祖諱杲、皆卓卓有賢  
行。至高大父郁、浸以昌大、自奉化徙鄞、卜居于郡  
城之南。儒學精深、爲後進師。皇祐中擢第、得廬江  
主簿、以祿不逮親、弗肯仕、贈正議大夫。太師知興  
化軍、台州、皆有惠政。楚公當政和間、以才侍從、再

牧鄉邦、名所居坊曰晝錦。兗公歷官中外、仁厚廉  
直、蔚有令聞。三世皆以公登廊廟、贈至極品、門第  
之盛、于是鮮儷矣。公幼警敏、始就外傳、鄉人王先  
生默、李先生鴻漸爲嚴師。旣冠、三山鄭屯田鏐寓  
館鄉鄰、公又師之。隆興元年、試于南宮、主司偉其  
辭藝、欲以冠多士。而所答策偶犯廟諱、胡忠簡公  
贊知貢舉洪公奏言其故、有旨置末等之首。是歲  
廷不策士、即禮部所次定爲五等、賜同進士出身。  
以啓謝諸公、胡公大稱之曰、此翰苑長才也。明年、  
中教官選、調溫州州學教授。範物以躬、出入冠帶、  
惟謹、日與周旋、講明爲學之要、務在篤實、毋溺浮  
華、議論有可採者、問所從來、具以實對。公愛其不  
欺、再三獎之。學者日益歸心、爭執經席下。里居賢  
士大夫稱美一辭、相與定交。公亦虛心叩擊、甚于  
飢渴。于是學問之源委、治道之綱目、制度之沿革、  
靡不研究、胸中之蘊、日富。秩滿、諸公餞送之。公請



益焉、或告之曰、前輩有云、拆破藩籬即大家。君之藩籬、不憂不拆、直恐過甚爾。公正色曰、某于無利害事則拆、有利害事則否。聞者悚服、乃知公雖氣貌薰然、物我渾融、而其中介特有不可奪者。立朝之大節、蓋定于此時矣。充詳定一司、敕令所刪定官、對選德殿、論善爲天下者、貴實用不貴空言。名爲空言、而實可底績者、乃所以爲實用、名爲實用、而行之無益者、適以爲空言。陛下大開言路、收攬人才、念治功之未集、鄙無用之空言、而務求其切于用者、誠得孝宣總覈之意。而進說者不思旁援曲取、毛舉細故、民力方匱、而言利不已、法令日繁、而變更益增、委以經畫、課其績效、則蔑焉無稱。曾是以爲實用乎。魏徵勸行仁義、近于空言。封德彝法律之說、若實可用。然太宗惟徵言是從、以成貞觀之治、且曰、惜不使德彝見之。然則孰爲實用、孰爲空言、惟陛下審思之。時禁中火、公言、魏相之事

宣帝、多以異聞爲言、李沆之相、眞宗每奏不美之事。此忠臣愛君之至也。人主尊居九重、生殺在我。諂士曰獻佞說、而直臣難以盡言。祥瑞之出、則潤色以張大其事。災異之見、則掩覆而變易其占。此二者、臣之所憂也。陛下之畏天、可謂至矣。不以崇高富貴爲樂、而惟水旱盜賊是憂。天之仁愛陛下、亦可謂至矣。不以休祥爲太平之應、而時出災異爲儆戒之端。罪己而興、斷非虛語。遇災而懼、實惟盛德。臣愚欲望陛下深求其故、何如斯可謂應天之實、勤而行之、上答天心、下遂人欲。今日之異、後日之福也。上嘉納之。修淳熙法、議者欲降太學釋奠爲中祀、與右學等。公曰、乘輿臨幸、于先聖則拜武成、惟肅揖、厥禮異矣。祀可均敵乎。遂得無變。兼玉牒所檢討官、以進仁宗皇帝玉牒遷秩。復因面對、申述玉牒中所登載聖語、願持守勿渝。又請念財賦之孔艱、罷土木之不急、敢言人所難言。公之

進用、參政龔公力也。受知雖深、而謁見有時、無阿比之迹。三歲不遷、安恬自若。及龔公去國、出其門者皆罷、而公獨不及。力求去、添差通判台州。太史公以故相待經幄、壯公此舉、曰：何其決哉！宗正丞范揆出領郡事、性剛急、喜怒過差、官吏震惕。公俟其氣定、徐以一二語解之、必翻然以改。銅錢之禁、入海五里、盡沒其貲。有商冒法、而獄稍緩。臨海縣弓兵鄭慶訴守臣及郡丞之正員于朝、提點刑獄趙某被旨覈之、密以叩公。公曰：禁所以嚴、爲越海也。今猶在城下、事理甚明、而輒誣之。又名其守貳、階級紊矣、而可縱乎？趙悟、具以實奏、遂論鄭慶如法。除太常寺主簿、以先諱辭。改宗正寺主簿。奏對稱人主之德與臣下不同、百行衆善、一毫無歉、萬幾庶務、一事無闕、然後足以御四海而圖治功。故雖堯舜之聖、而曰儆戒無真、曰兢兢業業、一日二日萬幾、此心未嘗斯須忘天下、惟恐吾身有毫髮

之不及也。臣不佞、竊希古人責難于君、恥不及堯舜之意、欲望陛下仰稽往古、俯鑑近代、兼備其可爲法者、而力去其所當戒者。又曰：國家深長之計、不可速成、要當審訂。凡行之而終無益者、必盡省之。可行而尙費歲月者、明著于籍、次第而爲之、不辦不止、則事有端緒而治效可睹矣。遷太府寺丞。俄除太常博士、班寺丞下、上疑焉。丞相言：議禮之地、最要得人、臣欲重其選爾。公復以家諱請仍舊職、許之。遷宗正丞、對延和殿言：天下之大患、每起于細微。漢之黨錮、始于南北二部之謠。唐之朋黨、始于二三士大夫不得志之徒。事之初生、若不足慮、橫流不止、害不可言。今朝廷清明、豈復有此。然端倪已見、不敢不言。夫道者天下之所通行、學者士君子之所當務。秦、漢而下、此道不明、論說相夸、去本逾遠。國家累聖傳授、丕闡大原、名儒間出、究極微旨、然後語道者不涉于異端、爲學者不至于



無用。恭惟陛下得執中之傳、體克己之仁、嚴謹獨之戒、篤正心誠意之學、躬行此道于上、而士大夫諱言于下。凡端謹好修、談論經理者、例指之爲僞學。小則譏笑、甚則疾之如仇、不謂聖世乃有此風。詩曰、君子實維、秉心無競。誰生厲階、至今爲梗。士大夫自相傾軋、爲害最大。惟人主能用中、然後可以消弭。謂宜明詔中外、咸推無競之心、勿徇偏曲之見、精白一意、以仰承人主之休德。奏畢、上曰、卿懼其爲黨耶。公言、陛下建中立極、躬行著見、屬者趙雄辭位、人皆意蜀士必相繼去、而陛下方叙遷之、或召用焉。上曰、唐世人主云、去河北賊易、去朝廷朋黨難。朕嘗笑之、有何難事、特主聽不聰爾。公頓首謝。又言、仁宗開天章閣、命名臣條上當世急務、太上逐權臣之黨、更化善治、皆在履位二十餘年之後、非始勤終怠者可比。臣願陛下益自警勵、及此閒暇、亟爲永圖。採孟子之格言、明政刑之二

柄。丁堯公憂、服除、選知溫州。視事之始、邑長咸至、諭之以經賦之外、秋毫不取。申吏卒入鄉之禁、豪民慢令、三不如約、始嚴追胥。又不服言于郡、逮治之。宰所欲言、有不可形于公牘者、密緘以報、吏無得預。郡計仰于酒課、吏請嚴禁、公曰、吾奉使典州、首在布宣德意、奈何以是爲急。姑置之。久而懲其已甚者、威刑罕用、課入增衍。尤詳于聽訟、咸得其情。已悔而終止者、聽其息訟。閨門幽昧事、則掩覆之。或稱辟廬司業之後、乞以限田免役、爭者不服、而莫能難。公曰、安有終于承直郎而爲司業。是必嘗以辟廬正兼攝爾。官品旣殊、限田隨減可也。其人遂屈。劉生訴小商負錢十萬、官責之償、負家忽以商溺死告、紛拏于庭。旣而得屍沙磧、遂以爲眞死矣。公謂永嘉尉曰、此事可疑者三、遺鞋于岸、而足貫扉屨、一也。谿流激急、形骸已散、二也。小人貪賞、知死者寡髮、爲假髻以實之、三也。意其流屍乎。

彼方潛竄而適與茲會、故益肆其欺爾。不如姑資送之、若商實死而密迹捕焉。尉如其策、果得之平陽道中、人以爲神。遂正其罪、而督逋如故。又謂劉生、彼藍縷、如是何所從出。勉使折券、出自汝意。于是釋之、闔郡服其明恕。公又慮鄉落間疾苦、不能上達、咨于士大夫之郊居者甚悉、故田里情狀、若親睹然。聞樂清主簿唐煜有能名、叩以邑中利害、具言有方質者大爲姦利。公默不洩、久而得其實迹、併與其黨號八虎輩、鯨竄之。是邑之左原、民多蔬食、而盜販者衆。牙儉有被重傷幾死者、其黨揚聲報仇、將以上巳日舉事。老而黠者、至謂方臘之變、閏在五月、縣令姓秦。今二事皆同、變且復起。邑人大恐、而倡之者、主名不立。令微伺得之、單車至其所、指舊習魔教、而今祀神不預、陳慶等數人、執以詣郡。公編隸其爲首者而逐其徒境外。堂帖問故公直陳本末、且援蘇公洵之語、有亂之形、無亂

之實、是謂將亂、不可以有亂急、不可以無亂弛。丞相周益公然之、遂錮陳慶終身、而公名著矣。光宗嗣位、赴行在奏事。公進言、人主初政、當先立乎其大者、至大莫如恢復。欲謀西北、先保東南、誠能加之聖心、自然畏天益謹、遵祖宗法益嚴、事親益孝、求賢必廣、用財必儉。讒諂面諛之人、自疏、嗜欲宴安之念自息。邊防以修、軍政以肅、故雖甲兵未動、而恢復之計成矣。又曰、國家用度日廣、租稅已重、又有茶鹽權酤之屬、既專其利、則不得不立法以禁止之。至于今日、網密甚矣。欲望陛下軫念元元、以設禁爲不得已、而犯法者非甚可罪、凡有創意增益者、寢而勿行。或懲其尤、所以保護元氣而壽天下之脈也。除考功郎中、兼禮部、進對言、無難之世、聖人畏之。如人之一身、時有小疾、起居飲食、無不戒謹、固有尪羸而壽考者。強壯之人、氣血方盛、恣所欲爲、疾偶未形、因謂之安、此固良醫之所懼



也。今日之無事、乃陛下愛日之時。無益于治道者、宜緩于施行。而所當豫備者、旦旦而圖之、以待可用之機、以保盈成之業。時民多流移、公又曰、富弼賑濟之政、在本朝爲稱首。然考其時、弼守青州、流民乃自河北而來、弼不以非吾土之人而不任其責、調護惠養、委曲周盡。迨麥熟而歸、又與以道路之費、收其強壯、以備卒伍。今日流民顛頓暴露、未知息肩之所。臣愚欲望睿慈惻然興念、詔監司帥守各以富弼之心爲心、隨宜措置、救于瀕死、實國家之仁澤也。考功爲今顯曹、士大夫資歷升轉之屬、靡不由之。吏緣爲姦、小有不合、動成留滯。公曰、昔人以簡要清通爲尙書郎之選、詎當爾耶。考覈精詳、宿弊寢革、人得所欲焉。潘顯伯之獄、定法過輕、一時官吏俱責。公因轉對言、宸斷如此、足以懲姦矣。顧恐自時厥後、懲創往事、議讞之際、未免刻深。望速以玉音諭之。遷國子司業。先是居此官者、

多以學校舊游爲之。前司成許公識公之賢、語諸生之送別者曰、樓公之進、雖不階舍選、而修其職業、殆將過之。旣而信然。諸生有與其長交訟者、公以爲禮義教化之地、不當遽以法令從事。姑遷延之。度其兩忿漸息、而後罰之有差。凡所施爲、采諸公議。自糾錄而下、必擇其實堪表倡者、毫髮無私。人人悅服。會雷雪交作于仲春之月、應詔條陳闕政言、疏遠之臣、惟願陛下之憂勤。親密之臣、惟願陛下之逸樂。憂勤則幽枉必達、下情得通、而膏澤及民矣。逸樂則伺候顏色、干求恩澤、而私意得行矣。陛下自雷雪之變、憂形玉色、宵旰興嘆、度數日間、干請必希。以是推之、聖心憂勤、恩倖自遠、誠能日謹一日、宸襟泰然、淵靜鑑明、其視燕游之惑、豈不相千萬哉。又曰、今朝行不聞直聲、而或以多言見黜、士氣消沮、無敢論事、豈國家之福哉。臣願陛下開忠直之路、窒宣諭之門、遇災而懼、不諱盡言、



力行消弭之道。遷太常少卿、改太府少卿、亦以家諱故、兼玉牒檢討官。遷起居郎、直前奏事、言進德可以養生、養生可以進德。人受天地之中以生氣、不可過盛、亦不可過弱、惟得其中、則養生之要、心廣體胖、神氣舒暢、雖有陰陽之寇、豈能爲吾害哉。兼權中書舍人、繳奏錄黃、無所顧忌、戚里近習、望風畏縮。時干請恩澤、有爲給事中封還、而意未厭者、援次官故事、上問爲誰、則以公對、上曰、朕亦憚之、不如止也。刑部建言、天下獄案多奏裁者、中書之務由此不清、請令實有疑者始奏。公曰、三宥制、刑古有明訓、宜詳而略、傷聖世欽恤之仁。力論不可、乃止。會慶節上壽、扈從班集、乘輿不出、公言、陛下承付託之重、以天下養、猶未足以報天地之恩。今百官趨班、恭俟鳴蹕、而燭殘日出、寂不聞聲。今日何日、而可若此。願深思大計、形于告諭。若曰屬以某事不及稱壽、今欲以某日詣重華宮、則羣疑

頓釋而兩宮交歡矣。玉牒會要、聖政書成、涓日以進、而屢更之。公言、事有至大、而陛下以爲至小。朝夕之所當行、而視之如曠典。此所以疑而懼、懼而憂。進香一出、而人心歡然、會慶一不出、而人心遽駭、事可睹矣。聖政之成、全載壽皇一朝之事、玉牒會要足成淳熙末年之書、陛下所以奉承詒謀、鋪張聖父之闕休者、惟有此爾。禮儀咸備、俄又遲之、萬衆震驚、莫曉其故、殆非所以全聖孝也。惟速定其日、無復再展、以慰天下之人。又奏、累歲隨班末、見陛下上壽重華、歡動慈極、又見嘉王日趨朝謁、恪勤不懈、聖心必喜。竊料壽皇望陛下之來、亦猶此也。于是天子感悟、越六日進書成禮、薄暮乃還。侍御史林公大中彈奏大理少卿宋之瑞、不從、遷吏部侍郎、力辭、與郡。公與給事中尤公袤奏言、大中最蒙眷注、今因論一少卿而同日與郡、實傷國體。公議皆願還大中言職、或留之論思獻納之班。



若不可留、亦宜優禮以遣之、與被論者殊科、猶足以示四方也。尋詔之瑞與祠。知和州劉煒將漕淮西、以禁私鑄錢、一路大擾而罷。廟堂稱其已然之效、有旨復與監司。公奏、煒行一切之政、不生事者幸爾、尙可以爲功乎。此命一出、必大駭物論、且無以謝淮甸之民。丞相頗不悅。公曰、吾有去爾。羅公點時爲兵部尙書、爲丞相言之、始悟而止。公以母老思歸、乞祠不允。人知其爲劉煒也。應公孟明從容語及之、公曰、士大夫臨小利害、此心猶在兼顧間、蓋途轍從此分爾。某竊鄙之、故不敢不勉。應公極嘆重之。語人曰、是公利害之間、其守正如此、真可敬也。內殿奏事、論獄者、天下之大命。欽恤忠厚、未有如本朝列聖之臻其極者。今士大夫論重囚、則曰、漢祖約法三章、殺人者死。論賊罪、則曰、我太祖立法、滿三千者皆死。而不知高祖除去秦法、則殺人之外、凡死罪皆去之矣。太祖制法雖嚴、比五

代已甚輕。其後累朝日趨于寬、故以太祖爲重。今朝廷清明、刑罰當罪。然臣每疑州郡斷獄、未必皆其本情。請以奏案依斷者、下提刑司更加詳審、或有不當、責罰隨之、益廣陛下好生之德。鄭汝諧除吏部侍郎、給事中黃公裳封還錄黃、既累日、詔除裳兵部侍郎、以失職引咎。汝諧請補外、不許。公言、小大之臣一聞給舍臺諫語及姓名、不當辨說是非、即合奉身而退、所以存廉恥也。今裳雖蒙眷留、終奪其封駁之職。汝諧心不自安、必將再辭、宜因而從之。未報。汝諧再有供職之命。公言、論事者罷、被論者留、自此給舍臺諫不復可爲矣。汝諧憤恚、即乞致仕。公力求罷黜、居家俟命。汝諧竟以修撰知池州。公又奏、陛下奉兩宮之養、應萬務之繁、可謂至難矣。然實非甚難者、一月四朝、如期盡禮、則事親之道昭矣。大昕視朝、興居出入、皆有定時、則君臨之道宜矣。飲宴有節、則聖體日康。賜予有度、

則財用日積、采公議以用人才、則衆心服。開言路以廣聰明、則下情通。引以廉恥、則臣下之節勵。嚴其律度、則僥倖之門塞。水旱爲災而勤撫之、則盜賊消。事變始萌而早辨之、則姦雄戢。凡此十者、陛下爲之、曉然無難。其餘數端、英斷之下、俄頃可畢。而稽留不決、深爲國家惜之。時丞相以潛邸舊人、黜而復召、援李絳故事、俟于郊者累月、樞臣卒而卹典未頒、蜀帥死而不除代、宮邸近親相繼不幸而喪禮未舉、宦闥陳源起于罪籍而未斥去、公力贊聖主之決、故辭旨明切如此。自往歲會慶節輟稱壽禮、及是期年、公同從官先期奏請、至其日又僅用拜表之禮、宰執及從官皆求罷、卿監而下求免赴宴。公積憂薰心得疾、幾不可支。既愈、請同班奏事、不許。久之、始獲進對、上許以必出、既而果出。除中書舍人兼實錄同修撰、論宗廟社稷之重、繫乎陛下之一身、陛下之一身、主乎陛下之一心。側

聞陛下晨興之後、未與事接而先澄心靜慮、天德清明、夜氣沖融、照臨百官、是非瞭然、眞社稷之福也。欲望保持此心、退朝之暇、更以二時頃凝神儲精、省閱章奏、付之大臣、擇而行之、則盡善盡美、無可議者矣。壽皇疾狀著聞、中外憂恐、宰執請上詣重華宮侍疾、從官繼之、皆未報。上御後殿、丞相率同列固請、侍從臺諫俱入閣門、吏以故事止之、不可。丞相開陳既畢、抗聲索輦、上拂衣起、丞相引裾力諫、公等從之、苦言交進、上意猶未決。宰執引咎出、公獨乞對、力言、陛下視朝、輔臣無一在列、何以示天下。上曰、已令宣押矣。諸公由是復入。兼直學士院、時有自列卿擢左史兼西掖者、公奏其人重玷臺評、實污清選、斷不可復用、且有請避三舍之語。丞相言上初欲用某人、某人皆以不可、對至三而後及此、雖深知不可、重違上意也。卒寢前命。上倦于勤、內禪詔書實出公手、辭婉而切、朝野傳誦。



今天子始即位、內外制雜然俱下、公獨當之、筆不停綴、而皆明白正大、得代言體、初政有光焉。尋進言、自古人君臨御之始、多能自強、銳意求治。在位既久、君子曰疏、小人曰親、逆耳之言不聞、而佞諛之辭日進、故偃然自安、而不知禍亂之作。陛下任天下之重、承社稷之託、兢兢業業、當如今日。及其小而圖之、則不至于大。自其近而防之、則不及于遠。遷給事中。國朝太廟舊爲七世之室。太祖祀僖、順、翼、宣四祖、而虛其三。嘉祐中、以親未盡、猶虛祫享東向之位以待。太祖故尙居昭穆之間。英宗祔廟、祧僖祖于夾室。熙寧五年、復以僖祖爲始祖、禮官爭之不得。紹興間、董弅、趙渙又請正之。言既行矣、諫大夫趙霈沮之而寢。淳熙初、渙之從子粹中爲吏部侍郎、悉條往時羣臣所奏、言于孝宗、復下之禮官。禮部侍郎戴幾先沮之。孝宗祔廟、當祧宣祖、曾少卿三復請乘此時就祧僖祖、正太祖東向

之位。集議御史臺、公具陳本末、自鄭公僑以下議皆合。公爲奏稿、其略曰、太祖肇造區夏、功邁百王、廟號太祖、蓋以尊無與二。今郊祀已配天、宗祀已配上帝、而在廟獨不得爲始祖、祫享獨不得正東向、可乎。屈受命開基之君、列于昭穆之序、何以示後。揆之禮經、僖祖親盡當祧。況今日九廟已備乎。惟斷自宸衷、蚤正鉅典、以慰太祖在天之靈。尋以祧廟之主宜有所歸、復令集議。又奏、去古既遠、禮制不能盡循。按唐張齊賢之言曰、古之有天下者、事七世。始封之君、謂之太祖。太祖之廟、百世不遷。至祫祭、則毀廟之主、皆以昭穆合食于太祖。商、周遷主皆出太祖後。故合食之序、尊卑不差。漢、魏、晉、隋、唐、太祖以上、皆不合于祫。臣等竊謂齊賢之言、可施于今日。蓋太祖之興、上無所因、與漢祖同。今日既伸東向之位、則僖祖之主、當再入于夾室。然自熙寧以來、推尊既久、難以遽變。唐有興聖廟以

祀涼武昭王、今當效之、別立僖祖廟以代夾室、順祖、翼祖、宣祖之主、皆藏其中、祫祭即廟而饗、于禮爲稱。于是度太室之西、建四祖廟焉。孟冬、雷震不已、公旣草罪己詔、又條陳時政曰、雲漢之詩、宣王側身修行、誠實溢于言語之外、桑林自禱、六事自責、懇切可風。伊陟告大戊曰、妖不勝德、德者非他、至誠之謂也。陛下肆頒明詔、責躬求言、修荒政、布德澤、亦可謂應天之實德矣。然臣區區愚慮、猶恐有聲音笑貌之爲、有無人則輟之僞、要在益自修省、慄慄危懼、如前日雷轟于上之時、則是心精一矣。待制朱公熹以鴻儒碩學、侍講經帷、上尊禮之、俄有除職與郡之旨、公奏、陛下容受直言、無愧仁皇、熹之正直、陛下所知也。若閔其耆老、當此祁寒、立講不便、何如畀之內祠、仍令修史、少俟春和、復還講筵、則君臣之義、始終周盡矣。不報。內侍毛伯益以宣勞轉行遙郡、公奏、此曹甚衆、趨走服役、何

勞之云。此門一開、僥倖者多矣。上意不悅。丞相謂公、繳奏誠是、顧八寶之至、嘗宣力爾。令下之初、上即俾宣諭某、謂給舍欲其舉職、當俟有勞而始叙之。今果封還、始敢具述上意。公曰、官守所在、不容徇私、此君相美意也。始與侍讀趙忠定公嘗同考試南省、官舍又比鄰、時時徒步還往、每謂人曰、樓公當今人物也、直恐臨事頗少剛決爾。及見其持論堅正、始嘆曰、吾于是大過所望矣。權吏部尙書、兼侍讀。初、公爲館伴使、知閣門事、韓侂冑副之。上之受禪也、侂冑預聞傳命、遂尸其功、有弄權之漸。吏部侍郎彭龜年因內引力攻之、且求去。于是侂冑轉一官、在京宮觀、彭公除待制、與郡。樞密林公時在西掖、公與之合辭論奏、陛下始潛嘉邸、眷禮賓僚、一旦龍飛、延見訪問、幾無虛日。天下不以爲私、而誦陛下好賢念舊之美。今惟龜年猶在從列、天資伉直、敢于論事、陛下之腹心也、其可去乎。惟

更加三思、留龜年于經筵。不然則命侂冑以外祠、與龜年事體適稱、猶庶幾焉。彭公竟去。公久列從班、負廟堂之望、侂冑聞其不助己也、怒天官之除、雖陽遷之、而實抑之也。時臺諫誦言故相定鼎乘龍之夢、有褊心銜恨者、對公云云、公曉之曰、趙嘗夢李公召入禁中、取御鑪金瓶授之曰、朕之用卿如此湯瓶。又夢立班殿下、見白龍升天。未幾、上以褊服御極、其夢兆止此爾。而便謂之定鼎乘龍、可乎。某親聞諸趙公、不可誣也。主人唯唯。同僚有並坐者、退而言曰、某代爲公汗下。公自知直道難行、去志已決、于是請對、言、天尊地卑、乾坤定矣。然天不以高爲貴、而以下濟爲光明。君臣亦然、其分貴嚴、其情貴通。唐末五季之際、去古遠矣、而宰輔進見、命坐賜茶、猶有坐而論道之意。藝祖收攬權綱、可畏可仰、然與趙普圖畫大計、或夜半而躬至其家、其相與何如也。陛下臨朝淵默、巍如上帝、臣下

奔走拜伏、罔敢不恭。人主之尊、不患不至矣。欲望明泰否之道而通君臣之情、陛下體天之下濟、羣臣以卑而上行、歡欣交通、而後天下可爲也。先是、諫臣假尊君之說、排逐賢相、榛塞正途、上下之情日益隔絕、故公言及之。對畢、求去堅確、除顯謨閣直學士、知婺州。朝辭、又奏、陛下日宴坐朝、躬親聽斷、不爲不勤矣。然猶慮僅能趨辦目前、未必及于幽遠、治道多端、未可謂止于斯也。陛下試于清燕之時、披輿地圖、某爲監司帥臣、某爲郡守、某爲將帥、人之才不才、政之治不治、察其事實而賞罰隨之、此我孝宗聖訓所謂朕日于天下游行一匝者、惟陛下取以爲法。始公自永嘉趨召、至是九年、暫還里中、展省先墓。遇太夫人得疾、公亦雅志閒退、三奏乞祠、提舉太平興國宮。申命牧婺、以繳奏寢。御史又攻之、奪其職。久之、乃復差知寧國府。是日、丁太夫人憂。坐親黨累、再奪職。又逾年、始復。遂告



老至于再許之、除龍圖閣直學士、食興國之祿。前後凡七任、書問未嘗一入都門。權臣于天下善類中、怨公最深。嘗語人曰、彭侍郎非有雅故、見攻雖急、不敢深怨。樓公嘗與共事、一旦鄙我、實不能堪。羣姦窺知其意、協力排根、怨毒滋甚、久而後稍悔悟。舊于都亭驛中、以所藏蘇黃門答其伯祖忠彥辭嘉彥尙主詔草、求公跋語、公作詩曰、今日猶存卯君筆、向來誰造粉昆書。又爲言其所以然。一日以示從班曰、某與樓公本厚、意若拳拳、有寄聲使通問者、公不爲動。盜權益甚、晦迹愈深。親故間以利害怵公、請效持書之役、公指席間曰、寧死于此、此志不可移也。時廉恥道喪、阿尊事貴者、無日不數于權姦之門、甚者召自外來、未及對而先謁之。公謂某曰、紹興間、從臣有初入都門者、秦丞相使人諷之來見、答曰、豈有人臣未見天子而先謁宰相者乎。當時士大夫猶能守正、不爲權貴屈。今此

風衰矣。太息久之。公之官永嘉也、聞寺正薛公季宣深于兵略、屢請問焉、乃知兵者古人之常、若樂舞行綴之類、皆兵法也。每言儒不知兵、無以應猝。惟講之有素、則緩急可用。然自隨仲舅尙書汪公大猷使燕、見所歷險要之地、皆爲金據、知深入之難。故初被召、雖嘗進恢復之說、及聞權臣妄開邊隙、則蹙額曰、南渡今八十年、州縣積貯、惟有虛名、闔外禦敵、委之債帥、而欲疲民以逞、深恐非徒無益。至逆曦之變、則又曰、三世爲將、道家所忌。負恩狂僭、必無與者。旣而皆如其言。公之識慮、可謂明且遠矣。閒適旣久、德望益尊。天子更新大化、招延舊德、起公于旣老、除翰林學士、固辭、不許。進對、首言、天道好生惡殺、本朝以不殺爲家法、而金嗜殺猶故、其將孰佑乎。擁兵南來、不能大入、皆由不嗜殺人、積累忠厚、天實相之也。次陳、十餘年來、無復公道、紀綱隳廢、賄賂公行。仕者朘削民財以奉權





臣、則美官可翹足而待。兵官剋剝士卒以媚權臣、則將帥可計日而取。民力益竭、軍政大壞。今籍其家資、數累鉅萬、皆出于鞭箠膏血之餘。陛下縱未能捐以與民、亦宜救其倒垂之急、會計凡日、以補經費。少紓州縣之督趣、則吾民受賜矣。上傾聽之。遷吏部尚書、兼翰林學士、兼侍讀。頃之、兼修國史、實錄院修撰。時和好未定、公數預集議、屢言關隘最不可失。奉使王栲再行、蜀帥收復關外四州、敵情浸屈、于是就和。金嘗指公及林正惠公姓名問栲爲誰。答云、舊爲從臣、自侂冑擅朝、兩人絕不交通。故更化之始、皆召歸爾。金驚嘆良久。知嘉定元年貢舉、既奏名、撫對策中有益於時者爲一編以進。趙丞相之子崇憲奏雪其父冤、朝廷令兩省史官看詳。公與今吏部尚書汪公達等言、紹熙之末、宰執惟乞建儲。孝宗升遐、留正引疾而去、人情洶洶。汝愚始決大計、翼戴聖明、正位宸極、天地宗廟

實臨之。橫遭讒誣、卒以貶死。十餘年間、是非貿亂、賞罰倒置。權臣既誅、汝愚諸子始敢有請。今當亟與辯明、立碑賜額等事、次第而舉。檢會章奏、誣以叛逆者、泯絕其迹。正趙師召乞斬汝愚之罪、重蔡璉漏洩幾事之責、毀龔頤正所著續稽古錄板、皆所以昭雪故相之辜也。從之。除端明殿學士、簽書樞密院事、兼太子賓客。公耆德宿望、二三大臣待之加敬、倚以爲助。公亦輸寫肝膈、無纖芥嫌疑之迹。廟堂之上、以是協和。股肱明主、羽翼儲貳、兩宮無間言。進同知樞密院事、參知政事。公之伯父故揚州太守璫爲於潛令時、圖耕織之勞、因事爲詩、嘗以進御。公重繪二圖、仍書舊詩、而跋其後、獻之東宮。請時時省閱、知民事之艱難。太子斂衽聽受、且致謝焉。公宿昔誦顧愷之之言曰、命有定分、非智力所移、惟應恭己守道、信天任運。而闇者不達、妄意僥倖、徒傷雅道、無關得喪。每以此語爲持循

之要、掖垣瑣闥、風節凜然、所養者固矣。洎爲執政、不忘斯言、終身途轍、有一無二、遵乎正道而已。行險詭遇、而他岐是適、公所不爲也。其言曰、古人所謂三公三孤者、取其至公無私、故謂之公、孤立無黨、故謂之孤。既名其官、可無其實哉。日思東歸、屢有陳控、上曰、卿忠直、正賴輔佐。又曰、忠實老成、東宮亦固留之。或問公何去之果、公曰、昔人所以不安其位者、有數端焉、人主之眷已衰、同列之隙已成、在下者軋己、不樂者見攻、遂不得已而去。今皆無之、顧老軀不堪勉強爾。南郊侍祠、馳驅得疾、予告者三、求去不已。除資政殿學士、知太平州、辭。進大學士、提舉萬壽觀、居從其便、賜以器幣香茗、東宮再有頒。丞相及兩執政送之江亭、握手歔歔、殆不忍別。既還鄉、乞休致、愈力、轉兩官致仕、命下而公薨。實嘉定六年四月己丑。享年七十有七。積階至金紫光祿大夫、爵至奉化郡公、食邑至五千二

百戶、眞食千二百戶。遺奏聞、天子震悼、贈少師、輟視朝一日、賻白金五百兩、帛五百疋、官其後如格。越數月、東宮讀唐鑑終篇、第賞官屬、念公舊僚、賜銀若絹皆再百焉。娶王氏、工部尙書俟之孫女、德性寬平、曉習書史、有中原故家之風、封太原郡夫人。子男四人、淳、承議郎、行籍田令。濛、幼亡。瀟、奉議郎、新通判臨安府。治、承奉郎、監西京中嶽廟。女二人、長適迪功郎、監中嶽廟王棐、次適從政郎鄭圭。皆以公大禮恩封孺人。孫男七人、杓、從政郎。杞、承務郎。栝、登仕郎。扶、機、移、杓。孫女一人、曾孫男一人。十月、有旨以杓爲添差沿海制置司準備差遣、俾護公葬。七年二月辛酉、諸孤奉公之柩、葬于鄞縣通遠鄉四明山報忠福善寺左馬鞍裏之原。公資稟高明、風儀峻整、頎然如長松巨柏、立乎羣木之表。接對賓客、語音琅琅、聽者忘倦。而事親篤孝、下氣怡聲、承顏順志、躬執鄙事、有所教飭、一言一句、

服膺不忘。倅台之日、亮公以議幕沿檄、公以行縣、會于天台、奉二老山行、覽觀奇趣、春容累日。雁蕩山秀絕聞天下、之官永嘉、侍太夫人游焉。又修行春賞柑故事、安輿所至、旌纛前列、公從其後。太夫人年登耄耄、奉承惟謹。宛陵之命、或謂公姑受諸公曰、親老矣、跬步不敢離、雖展墓不越三宿。禮九十者其家不從政、可遠役乎。色養無違、慈顏悅豫、至年九十五乃終。公忠孝感神、有相之者矣。家素清貧、重以建炎之禍、先廬故物、一簪不留。亮公依外舅少師汪<sup>③</sup>公以居、辛苦植立、不墜先緒。宦游既久、生理尙窄、樸素如寒士、諸子無復豪習。公從師里校、至無蓋以障雨、敝衣糲食、僅免寒飢、以此益自磨厲、日充日長、器業宏偉、爲時名臣。仲兄大理丞錫出守嚴陵、迎二親就養、數月而亮公薨、護喪以歸。十月三旬而寺丞卒、適歲大祲、闔門百口、外而襄奉、內而伏臘、多方經營、僅無闕事。明年、畢寺

丞之葬、弟有孤女、悉力嫁之、皆身任其責、斯已艱矣。後雖通顯、自奉甚薄、食飯不過適口、服用僅足而止。奉祠家居、日虞不給、夫人撙節用度、纖微必計、始有餘米、罷祠之後、賴以相續。及再得祠、而米適盡矣。平生靜專、瑣瑣塵務、不經于心、惟酷嗜書、潛心經學、旁貫史傳、以及諸子百家之書、前言往行、博采兼取、森如武庫。曾侍郎逮嘗問雨、必以夜所出、公曰、此鹽鐵論中語。曾喜、報其兄大理卿逢曰、吾兄弟往來于懷者、今豁然矣。崔府君廟食甚盛、而逸名氏、多以爲漢之子玉、或曰、此魏之伯深爾。及公奉詔作顯應觀碑、推尋其實、始知其爲唐之賢令。山經地志、星緯律曆之學、皆欲得其門戶。研精字書、偏旁點畫、纖悉無差、世所承用、而于義未安者、亦必辯正之。謂字者、朋友所以表其德、不當自言。姪者、對姑立稱、不當以爲兄弟之子。甲子所以繫日、非紀年也、不若直書其年。正寢爲今聽



事非寢室也、不當于此書卒。及其他精審皆如是。屬辭叙事、以意爲主、不事雕鐫、自然工緻。舊有詩聲、晚造平淡、而中有山高水深之趣。以銘墓爲請者、與之不靳、英辭妙語、散落人間、殆如唐人所謂碑版照四裔者。而屬稿之初、後生小子輒指其瑕、欣然改定、曾不自知其名位之崇、德齒之尊也。懼儒學之不續、勉勵諸子、俾世其家、頻舉謝太傅自教兒之語。自正議先生與太師相繼登第、太師之子宗博及楚公復繼之、鄂州使君鏐、臨安教授鉉、皆公之從兄也、爲同年進士、而公及從弟鏞、從子汶、淮、後先相望、皆預是選、一門決科之盛至如此。淳三預薦書、與二弟俱嗜學、杓亦偕漕計、駸駸乎躋登顯要矣。然公所謂世其家者、詎止于此。榜書齋以攻愧、曰、人患不知其過、知之而不能改、是無勇也。自號爲攻愧主人、小有過差、不敢自恕、期至于無愧之可攻。銘諸座右曰、逆境進德、順境誤人。

其子隨牒州縣、以詩送之、于淳則曰、知行勤所職、通塞聽何如。于瀟則曰、不應頻來往、恃有檄可沿。皆所以勉其進修也。慕杜正獻公、范忠宣公之爲人。豐清敏公、鄉之先達也、賦荷花詩、有人心正畏暑、水面獨搖風之句。蔡元長見之、曰、此人豈肯受我籠絡。公心敬之、以爲標的、能言其賢德甚詳。淳熙中、有以剛直自名、致位顯榮者、密察其言、規切上躬、一語不及公、無取焉。觀其所稱慕及其所不與者、足以知其心矣。薦士于朝、必以公議所與。今將作監楊公簡、故知濠州劉仲光、度支郎官鄭肇之、宗正丞李兼之流、世皆賢之。下至于片言可錄、小善可書者、亦稱道不置。仁于宗族、同氣加厚、歡焉無間、三弟一兄子、皆奏以官。故吏部侍郎莫公叔光、中書舍人陳公傅良、與公所師屯田鄭公、皆潛藩舊學也。莫、鄭二公、不得親見龍飛之盛。陳公雖幸見之、一斥而竟不復。公前後力爲上言之、莫



公遂被追榮之恩、陳、鄭二子亦拜君命。公于師資甚篤、故所以勸導明主者、亦出于此。李先生、公童幼時所受業爾、人所易忘、念其子仁、常賑卹之終身。韋布場屋之交、窮達不侔、賓接如舊、劇談樂飲、客至未嘗託故、曰、彼或有求、從違在我、烏得不見。告急者與書、庶或周之、雖饋之薄、不疑輕己、以故人亦不厭。乳母趙氏、去而不知所在、博訪得之、年垂七十矣、攜以之官、率其婦子敬待以禮、其篤厚類如此。公生長外氏、外祖少師及越國王夫人撫之教之、與諸孫等、公事之如大父母、諸舅如諸父。尙書舅長于政事、公屢請問以居官治民之要、啓告甚悉、且曰、子以辭華知名、若外庸奏最、斯通才矣。後聞其爲政可紀、甚喜。及列于朝、數進讜言、又益喜。尙書謫居康廬、或勸之貽書近習、求爲己援、卒不屈、公亦不降志于權姦、舅甥風操若是相類耶。公以辭學士奉祠、而尙書及從母之子中書舍

人陳公居仁亦然、鄉人遂有一舅二甥三學士之語、莫不榮之。四明他山源泉注於城中、匯而爲湖、舊有十洲三島之勝、最南一洲、密邇故廬。楚公之守鄉郡也、築錦照堂、懷綬軒、刻祐陵御製其上、中燬于兵、舊觀蕪沒。隆興初、郡復新之、更名竹州、久而浸壞。于是上從其請、以私錢自葺之、求奎畫錦照及東宮書懷綬以爲賜、煌煌乎有光于初矣。藏書既富、欲別貯之、營度累歲、執政之次年、東樓始成、有登臨之快、叢古今羣書其上、而累奇石于前、嶄然有二十四峰之狀。又取楚公登封令時所藏嵩嶽圖石刻、列屏其下、仍以仰嵩舊名名之。雅好琴奕、達其妙趣、得閒之後、方將攜以自隨、往來于錦照、東樓之間、極燕衍之適、以遂其初志、而病尼之矣。歸舟中、觀書不輟。弟鏞以詞來賀、援筆賡之、雅麗如平日。又賦鑑湖二詩。其始歸也、卧于別榻、旬餘而更得其正而終焉、怡然不亂。遺稿皆藏于

家方將編次成集。葬有期，諸孤以當世知公莫詳于某，屬狀其行。某誠鄙陋，然我高祖父光祿公實師事正議先生，源流相續，以至于今。公又不以衆人遇我，嘉泰開禧間，從公于寂寞之濱，數以安于命義，保全名節之語勉我，斯意厚矣。一日，語及吾道一以貫之，某叩其旨，見告以會歸于一之說。某曰：「此乃吾以一道貫之，非吾道一以貫之也。夫道未嘗不貫。公聞之，矍然已而稱善再三，契合如此，何敢忘諸。庸敬述其梗槩，上之太史氏，以備采擇。辭雖不工，庶幾乎古良史不虛美之意云。」

袁燮撰 《絜齋集》卷一一

校記

① 據：原闕，據《袁正獻公遺文鈔》附錄校勘記補。

② 汪：原作「江」，據右引及樓鑰《亡妣安康郡太夫人行狀》改。

③ 汪：原作「江」，據右引及樓鑰《亡妣安康郡太夫人行狀》改。

宋儒碑傳集卷一百四十四

黃文晟 舒邦佐 唐堯章 戴日宣

余大雅

黃公墓誌銘

南豐黃世成、少事場屋、再舉不第、即棄去、益繙經史、百家言、究窮其道理、結廬石僊巖、有終焉之意。其兄世永、甫冠登科、所志穎脫以出、暇日憇石僊、與世成劇論時事、歎美其才、勉之使出、堅不可奪。世永益奇之、名其廬曰壺隱。其父南雄府君、官至正郎、澤及世成、世成推以與弟、澤再及、又推以與次弟、有季弟澤不及、則推己田與之。或惡其背馳、議之曰、是非人情、曰矯、曰好名、世成處之泰然、議者浸以熄。久之、遠近咸服、不稱姓字、但曰壺隱。在童稚時、嘗爲橫浦張公賞識、及長、結交皆一時名流。雖絕意仕進、其於國之治忽、民之休戚、未嘗不關其心。故舊居職任事者、每賴以有聞。江西之救

荒、湖廣之弭盜、往往出其策。比年移書左司楊廷秀、諫議謝昌國、其言尤剴切深至。二公還書、推重嘉歎、然卒不能有所施行。余不識世成、而得其爲人至詳。粹然其容、懇然其中、剴煩若易、處大若細、其施不匱、其守不渝。爲文操筆立成、藻思瞻蔚、統紀不紊、有苦心極力所不到者。得諸儒言論、必沉涵紬繹、頗復論著、訂其真僞、然不自以爲是也。比十數年、辱余以書無曠時、若所嚴事。學絕道喪、片善寸長、必自介恃、世成之所可挾者衆矣。乃自視欲然、汲汲於求道、過人亦遠矣。今其亡也、其子來請銘。以世成之賢、雖不吾屬、猶將彰之、況請之勤邪。世成諱文晟、曾祖履中、康州司理參軍、妣葉氏。祖俯、左迪功郎、處州司理參軍、贈左朝請大夫、妣太宜人呂氏、曾氏。父越、左朝奉大夫、知南雄州、妣宜人曾氏。娶曾氏。子男五人、長曰楫、先四年卒、次曰枏、曰槐、曰椿、曰棐。女三人、長適湛覺、次適曾林。



儒藏



宗幼在室。孫男二人、壽、勲、女一人。世成生於紹興丁巳二月己亥、卒於淳熙丁未十二月壬辰、享年五十有一。將以戊申十一月己酉、葬于石僊巖之金鵝谷。銘曰、

匪屋之潤、于其身、匪爵之尊、于其仁。無其責而有其言、非其位而及其民。孰曰余咎、孰曰余咎。烏乎壺隱、豈其隱淪。誰尙顯之、在其後人。

象山陸某誌。

陸九淵撰 《象山先生全集》卷二八

舒邦佐墓誌銘

公諱邦佐、字輔國、後更字平叔、隆興府靖安縣人。曾祖達先、祖機、父茂、皆有潛德。父贈承事郎、母李氏贈孺人。公自幼穎悟不群、讀書過目輒解、學聚問辨、日啓歲益、卓然有成。初以辭賦絢麗見推先達、值朝廷兼設經義、詞賦科、益討論墳典、求爲有用之學、蜚聲文場、亟預賓選。登淳熙八年進士、初

授鄂州蒲圻簿。會有旨并簿與尉爲一、改潭州善化簿。公謂朱墨勾稽一不謹審、則催科重複、蠹弊叢生、乃悉心清釐、日力不足、繼之以夜、吏姦爲之頓銷。長沙輸送苗米踰三十萬斛、郡委公與戶掾李公肅領其事、區處合宜、未嘗多取其贏、民皆德之。有今年官米兩平量之謠、蓋語實也。公每晨起受輸送、逮暮乃罷、凡所需微物、下至烏薪、亦攜以自隨。郡以每歲輸納例有所餽、號曰優潤錢、公舉而寄諸縣帑。其後公將瓜代、復有所贐、公合所得悉返諸縣、以簿解圯毀、請留爲繕修費、潭人皆服其廉。寧鄉告旱、連帥潘公時知公賢、貽牒專委之。是時官疑訴者失實、徧諭諸鄉、訴不實許人告。民懼、俱不敢訴。公白於郡、寬首告之禁、由是實旱者乃敢有辭、連帥韙之。用薦書授文林郎、調衡州錄事參軍。公以明謹用刑、哀矜折獄、人皆稱之。嘗有欲鍛鍊者、公曰、吾不能爲阿曲、但當穿扉屨以歸。



耳。時囚繫者或以饑寒瘐死獄中。公命爲衾裯。飲食及禦寒卻暑之具。靡一不整。有茶陵縣倪氏子訴胥長譚良佐受賕。逮鞠正則嘗許而未受。守倅臨問。將併訴者罪之。公言吏蠹易滋。民冤難伸。於是訴者得從。未減。未幾。祥刑使者因閱積牘。見公辨論之語。深賢之。乃併縣胥郡吏皆置於理。有宗室子擊娼優於邸舍而誤入主人之室。破其寢帳。什器。廂官白於郡。以白晝持杖之罪罪之。守怒。將聞於朝。公言其情本出過誤。且無賕可證。竟從寬典。嘗攝憲司檢法官。又攝郡僉幕。皆著勞績。有翁姓兄弟訟分財不平。憲以成案委檢法詳閱之。公得其實。感諭以天性。皆頓首服。憲命牒旁郡爲矜式。時郡議蠲民賦。公言某鄉蠲若干。某戶蠲若干。當具數揭諸通衢。其合蠲已輸者許豁新賦。庶民得霑實惠。郡從之。遂爲例。公在衡時。諸部使者多以案牘委公審訂。公酌以情法。凡所擬定。後莫能

移。聲華煒然。刺史暨部刺史皆以薦書聞。時丞相京魏公長憲部。亦畀剡牘。僉謂公當即通籍尙書銓。平步清華矣。紹熙甲寅歲。忽得末疾。二女一孫皆刲股以進。連帥朱文公以其家孝友。欲聞於朝。予以祠祿。公先夕夢謁嚴陵釣臺。留詩有倒翻江水洗塵顏之句。慨然有感。乃力乞還山。文公賢而從之。買舟西歸。從容三徑。文史自娛。手錄皇朝典故數巨帙。不以利達縈其胸次。仿范希文設立義莊以贍鄉里。建望烟樓於天澤池上。見有斷炊者。立周以錢粟。邑舊有學田。爲豪家侵佔。稅官權酷。多非法橫索。公皆力爭之。得復其舊。蓋愛人濟物。自其天性然也。公蚤負盛名。自膺仕籍。當路往往以牋奏屬之。是時周丞相益公。永嘉陳紫微皆重公之文行。褒稱不置於口。其與公爲文字交並有時名者。則孫從之。吳仲權諸人也。余於公有鄉里之誼。雖仕宦相望南朔。不通款密。然於公之文則

平昔固已嘗鼎一臠、窺豹一斑。而公家所彙雙峰猥稿者、則手之而不釋也。蓋嘗評公詩溫潤而縝密、雋逸而清新、如太羹元酒、素有典則、如瓊杯玉笋、爛然可珍。謂宜徑上扉掖、小卻猶當在蓬山壁水間、位不滿才、爲之慨嘆。然公之爲學、先道德而後文章、生平得力在退爲進基、靜爲動主二語。朱文公亟稱許之。或出或處、綽然洞見本原也。嘉泰壬戌歲、公以致仕授通直郎、明年合宮肆霈、錫服朱銀。嘉定甲戌歲十二月八日、公震夙之旦也、子姓皆舉觴爲壽、情意懽然。上泮之日、忽語子孫曰、吾將逝矣。以十一日終於正寢、享年七十有八。公處生死之際、凝然不亂、聞者以爲學力致然。娶閔氏、夙有壺範。男四、長迥、早世；次選、肆舉子業、有聲；次逸、邁、俱待補上庠。女六人、長適進士劉允中、次適名族向之武、次適待補上庠張緒、次適進士鄒鎬、次適登仕郎王九思、次適鄉貢進士袁允中。孫

男十六人、峻、巘、辛、甲、嶧、兌、庚、崧、嶺、壬、癸、餘未名。峻、辛、甲俱待補上庠、巘與癸酉歲計偕。孫女七人、曾孫男八人、相、鉉、楫、模、餘未名。曾孫女十人。公自爲壽藏於福壽之源、諸孤將以嘉定八年九月庚申奉柩闕幽窆、公之次嗣選以檢正胡公所書行狀來請銘。余於公夙懷緇衣之心、不敢以蕪陋辭、迺叙而銘之。銘曰、

嗚呼平叔、文高於今世、行儼於古人。涖官行己、學出以醇、使其踐登樞要、固當資啓沃而贊經綸。德豐位裔、遇合奚論。惟有清芬之澤、方將大其家世、昌其子孫。

李大異撰 《雙峰猥稿》卷首

處士唐君煥文行狀

君姓唐氏、諱堯章、字煥文、福州閩縣王埔人。州東南際大海、江水之所入、有山屹然錯立於其中者、五、王埔據其上流、視諸山爲傑出。居其間多秀民、



去而操巨資、航大海、以牟什一之利者相踵也。君世家焉。曾大父感大父正甫、父恩皆隱晦不仕、尤不喜營利、輕財急義、聞於鄉。紹興間、君大父以綱運有功當補官、棄不顧。出藏鏹二百萬以賑貸鄉人、疾革、取券焚之、遺命勿責償焉。人皆以爲難。君幼孤、大父撫教尤至。君承祖父之訓、不復以生業爲念、賑乏已<sup>①</sup>責、無毫髮靳惜意。始治進士業、不售、即棄去、視世之榮利泊如也。嘗曰、讀書務明理、豈必爲利祿計耶。留意經籍、至老不倦。歲晚視昏、諸子誦書、必令高聲、曰、庶我聞之而有益也。聞晦菴朱先生講道武夷、語其子曄曰、吾老矣、不能從夫子遊、爾其毋忘吾志乎。旣而曄獲登門授業、以歸、詰其所聞、竦然曰、吾得聞所未聞、死不憾矣。繼而曰、入耳出口、學者大患、爾其戒之。其輕利重義、而篤於問學如此、故其處己應事、往往有人所不能及者。居家孝友、接人樂易。執親之喪、三年如一日、

旣免喪、猶不忍服華飾。夫婦相敬如賓、親屬閭里、遇之有恩、未嘗有違言。下至奴僕、撫之亦各得其意。終日恂恂如不能言、至其見義必爲、則斷然有所不惑也。性不喜浮屠、常謂學佛者曰、謂事佛爲可求福田利益耶。是教人以爲善而有所利也。謂能懺雪罪惡耶。是導人以爲惡而有所恃也。使人皆有是心、則爲善不誠、爲惡不忌、佛之教使然也。尙何足學哉。識者以爲知言。娶陳氏、先君五年而逝。治喪不用浮屠、鄉人皆異之。君不爲少變。爲文以示諸子、大略以古人治喪自有常典、羌胡之教不足爲法。吾百歲後、汝曹謹毋爲邪說所惑、以背吾言。故君之歿也、諸子得以不敢徇俗者、君之教也。自佛之說入中國、鼓天下之衆而從之、雖豪傑之士有不能自解免者。王氏入閩、崇奉釋氏尤甚、故閩中塔廟之盛甲於天下。家設木偶、繪像堂殿之屬、列之正寢、朝夕事之惟謹。髡其首而散於他

州者、閩居十九焉。其崇信如是。君乃獨能不爲所惑、非其義利之素明、問學之素講、其安能若是耶。若君者、可謂勇於義而篤於自信者矣。君以慶元戊午正月晦日歿、享年六十有二。子男三人、曄、暉、習。女四人、長許適歐公旦、次蚤亡、餘未笄。孫男一人、復。孫女一人。先是君爲母潘氏築墳於九龍山之原、曰、吾生事之未足、死當祔之、朝夕必往省焉。至其衰病、猶扶杖以往、忽自歎曰、吾老矣、登陟良苦、孰若蚤從吾母遊地下乎。諸孤從其治命、將以四月二十九日葬于潘氏塋之東偏、而記其平生言行以求狀於余。余於曄有舊好、辱聞君之行爲最詳、哀其請而不得辭也、故爲之類次其大略于右。謹狀。

黃幹代梁大亮作 《勉齋先生黃文肅公文集》卷三三

台州僊仙居縣主簿戴君墓誌銘

某之先叔父常德通守之末第<sup>②</sup>也、以德行經學師

表後進、里中俊秀多從之遊、戴君德甫亦受業焉。德甫諱日宣、自少嗜學、未嘗一日廢書。鄉先生李公若訥、胡公仲臯、俱耆儒宿望、德甫師事、所蓄富矣、而自視闕然、復請益于我叔父、叔父屢稱之、嗚呼、師道之尊、其學者之司命歟。學而無師、猶不學也。漢儒雖不逮古、而師資之益、猶汲汲焉。故司馬談學天官于唐都、受易于楊何、習道論于黃子。夏侯勝既從始昌受尚書、又師事簡卿、又請業歐陽氏。蕭望之始事后蒼、復事白奇、又從夏侯勝問論語禮服。所學皆非一師、宜其講習之精、見聞之廣也。然則德甫之求師、至于再三、其亦篤于問學者歟。吾鄉之士、習經術者、惟書最衆、三年大比、無慮數百人、以名貢者、纔一而止。德甫得之、可謂難能矣。而試南宮、輒不利。德甫曰、吾豈可以小不售、怠吾遠業。益奮勵讀書、而努力爲善。德甫性寬平、不設防畛、遇人無貴賤老少、敬之如一。小有過差、痛



自懲艾、以觀過名其齋、蓋有意于切己之學。世居慶元之奉化。曾祖屋、祖蘊、父光世。蚤失所怙、奉母劉氏謹甚、該恩者再、始封太孺人、後賜冠帔、諸儒榮之。嘉定元年、以累舉特恩、受迪功郎、台州僊居縣主簿。官雖卑、平生所蘊、自是少伸矣。六年十二月四日、以疾終、享年七十有七。士之窮達、固有定分、而才德如德甫、良可惜也。配湯氏、有婦德、先十五年卒、葬于程嶼。九年閏七月壬寅、諸孤葬君于忠義鄉傅嶼之原、從先塋也。迺遷程嶼之藏以合焉。子三人、度、庶皆業進士、亮蚤亡。女四人、其婿曰舒鑄、蔣處厚、舒鉉、袁守。孫男二人、興祖、顯祖。孫女九人、適舒鉤、承節郎趙汝棟、舒鑑、湯叔全、戴義路、李灝、餘未行。德甫清儉而篤義、嫁親族孤女之貧者數人。鄉人有疾、饋之藥、有垂死而活者。掩骼埋胔、加惠既歿。舊廬頗宏敞、使令輩不戒于火、一夕灰燼、敝屋數間、居之自如。余嘗訪焉、不見其有慍

色、其德量又如此。度等請銘、不敢辭。銘曰、猗嗟良朋、如古三益。師我叔父、合堂同席。舊好之篤、迄今不忘。勒銘幽宮、厥德有光。

袁燮撰 《絜齋集》卷一九

### 余正叔墓碣

鉛山傅商弼一日來訪文蔚、蹙然而言曰、正叔余先生、予師也、歿幾三十年、嗣人湮微、不能發其先德、使有善弗彰、吾子合爲論著、予將以碣諸石、使來者有考焉。文蔚聞其言而悲曰、正叔、予同門友也、知其平生甚悉、顧力未足以振之、幸吾子欲發其有餘。既死、文蔚雖不文、其敢辭。因叙次如左、正叔諱大雅、余其姓也。世居上饒、曾祖大約、祖安節、父思永、皆應舉爲儒、而未有顯者。正叔自肄舉子業、已見許於鄉之儒先。未幾、預薦送、然志不在是、聞晦翁朱先生講道閩中、毅然登門。窮鄉晚出、外科舉、未省他有所謂學。正叔獨倡而先之、豈孟子

所謂豪傑之士也。與弟大猷從其所帥，相繼而往。文蔚亦因正叔拜先生於紫陽書堂。正叔志道懇惻，問難叩擊，亶亶不倦。揆諸心，一毫有未得，雖往返十數不置，期於釋然而後已。先生嘉其勤，竭兩端以告。嘗因書論敬義工夫，先生指示日用之親切者，謂提撕警策，通貫動靜。正叔得其語，表裏用功，非惟自勉不暇，見同志亦以相厲。常恐此心外用，日誦中庸，不願乎外之言，以自克，可知爲學之務本也。先生嘗從容與之言，而喜曰：「且爲君立得一基址，今當有着力處。」正叔將以是而終身焉，不幸天嗇之矣。於戲，正叔而止此夫！正叔力於爲善，初罹外難，以禮自繩，不御酒肉。後歲登師門，度閩嶺，或犯霜露，冒炎暑，不以爲憚。稟氣既薄，且多病，竟以不壽。己酉秋九月，予往省先生，值正叔將歸，語別武夷溪上，未兩月而訃聞矣。寔十一月乙丑也。年五十二。娶王氏，生四子：德深、德淵、德存、德晦。

德晦出繼弟大寧。德淵業儒，亦早世。正叔餘慶，其後必有能繼之者。平日與先生問答書非一，厄於煨燼，無一存者。人皆惜之。語錄一卷，刻於江東庾臺。死之年，葬所居之右裴原。後廿六歲，刻茲銘。有決其疑，將以得正。有闡其端，將以絃續。日焉不足，何斯人之不淑。

陳文蔚撰 《克齋集》卷一二



校記

①已：原作「己」，據清抄本《勉齋先生黃文肅公文集》改。按「責」同「債」，「已責」謂免除借予他人之債。

②末第：原作「末第」，據《袁正獻公遺文鈔》附錄校勘記改。



藏書

宋儒碑傳集卷一百四十五

黃度

龍圖閣學士通奉大夫尚書黃公行狀

公諱度、字文叔、系出建寧之浦城、後徙婺之金華、今家于紹興之新昌、六世墳墓在焉。曾大父諱巽、大父諱惠之、考諱仁靜、皆以賢德著稱于鄉黨。大父事母至孝。考純厚而曠達、晚益超悟、欣然有得。止齋陳舍人傳良聞其語而異之、曰、此非由師授而得也。公生七年而喪母、祖母太孺人俞氏親拊育之。始就學、聰警過人、長尤卓犖、慨然有傑出流輩、興起門戶之志。作科舉業、出語驚人、其師秘書郎張淵以爲似曾南豐。隆興之元、擢進士第、浸歷清貫、迄位常伯、累封親爲朝奉大夫、命服金紫、贈中奉大夫、妣沈氏、潘氏俱贈碩人。繇白屋起家、赫然震耀、爲東州右族。語人物堪重任者、僉言屬公。非志操逸羣、豈能成就如此之偉哉。公初以左迪

功郎爲溫州瑞安縣尉。邑瀕海、潮壞民田、築塘以捍之、河行其中、蓋永嘉瑞安大河之支別也。有勢力者、圍塘外塗地爲田、而穴塘引河以溉、民譁然不平。公攝邑事、命窒之。穴者復請增置斗門、以水平爲準、溢則啓、否則閉、均及塘內外田。參政王公之望爲郡、檄公相視。公言、惟石岡、月井二處依山、其下有石、置斗門便、他土皆浮虛、不可立斗門。斗門旣少、所洩幾何。圍田灌溉不足、將不顧水平而穴塘如故。塘日穿漏、則無以障海矣。窒之便。王公初疑其說、徐悟、乃從之。邑通絹三千疋、俾公督焉、期以三日。請竟一月、許之。乃閱版簿、責一最甚者、械之獄、得其交通黠吏、竄易簿書之姦、而告之曰、輸所負、釋汝。且許吏得自言、由是輸者日至、未半月、得十之五。請蠲其餘、毋竭澤。王公悅、又從之。歲大疫、挾醫巡問、人給之藥、而嚴巫覡誑惑之禁、全活者衆。海寇縱橫、朝旨督捕、親獲之、而歸其功于



一時共事掌土兵者。止齋聞其賢、欣慕之。一日來見、未及通謁、望其氣貌、迎謂曰、君非陳君舉耶。笑曰、然。于是定交。若素相友善者。侍郎蔡公幼學、止齋之高弟、而齒末也。少于公十有六歲。器重其人、不以輩行爲間。秩滿、延止齋家塾。侍郎從之、交情益厚焉。乾道六年、循左從政郎。張秘書官于朝、數爲虞丞相言公之賢、將用之、以議事不合而止。差充處州州學教授。未至、丁繼母憂。淳熙三年、差分教隆興、尋兩易平江府府學教授。吳地雖繁會、而教養疏略、士風不競。公首葺二齋、擇有志者居焉。弦誦有程、講說不倦、或延之坐上、或親至其肄業處、爲談經理、設疑叩之、各述所見、爲之折衷。日有開益。來者滋多、增葺而容之。比終任、所葺殆遍吳中。士子始深于義理之學。經公指授、皆爲善士。十二年、改宣教郎、知秀州嘉興縣。值歲亢旱、日視諸鄉高下、察其得雨早晚、博諮于衆、具得其詳。州縣

每以八月聽民訴旱、及按視之、刈穫已竟、不可復考。公請于郡、先一月受詞、不旬日即遣官巡行。又以素所聞者參驗之。于是蠲放皆實。時孝宗在御、留意民瘼。樞密羅公點爲常平使者、手書問公所。以爲早備。公言、救荒無出勸分。米價翔踊、誰不愛惜。中產力薄、何暇及人。所以皆不樂從。名勸而實彊之。今雖旱甚、而下鄉猶有熟者。願假常平錢五萬緡、糴米三萬石。自冬徂春、米貴已甚。糴價非甚勿糴、以充常平、無科擾之害。而有賑卹之實。民獲其利、而官無所虧。羅公難之。公乃悉召富人、酌其資力、動以誠意、勉其推己及人。至興發、則又量地遠近、爲糴先後。多寡勞逸、均平無頗。是歲、勸分所糴及獻助所給、凡爲米三萬二千石。給居三之一、減價于市亦三之一。公每病數十年來、州縣救災、類不滿人意。精思方略、至忘寢食。經畫精詳、綱目具舉、侵欺乞取之弊、革之殆盡。旱之始作也、亟使

人籍生齒以上、合濟糴之數。又擇鄉豪寄居及向來考覈之不實者、許釐正、既詳且密、而後縣官考焉、又不實、則罰之。其隄防曲盡如此、同僚猶有疑其僥倖者、公命取其籍、令受粟者自誦其家之丁壯老弱、男女歲數、無一不合、疑者乃服。患差役之多訟、因舊法而變通之。坊郭戶充役于某都、而別都增產者、不許輒改鄉村戶。自狹徙寬者、役于新處、則狹鄉常有役戶、不偏聚于寬鄉。又保正、保長以通差爲便、或都內無以充保長、則選于曾充保正者。及充保正、則理往日催科之勞、以足今役月日、務通人情。既以告羅公、遂自行之。爲政三年、大得邑人之心。十六年、光宗嗣位。九月、有旨令赴都堂審察。十月、監登聞鼓院。紹熙二年五月、除國子監主簿。面對言、自古人君、莫不因所遭之時、而觀天下之動。今以東南凋瘵之民、奉王業于一隅、事體日開、國力遂屈。宴安江沱、崇飾華靡、風俗日以

浮薄。士大夫日以偷惰。中原土宇、淪于強敵。祖宗陵寢、隔在異域、歲月既久、讎恥寢忘。此陛下所遭之時也。而爲治三年、未有端緒。朝夕所行、不過乎中外除目、州縣期會而已。豈大有爲之事業哉。臣願乘時赫然、昭明聖志、以示天下、使小大之臣、各展所長、以應陛下之所爲。其二言、生民之力弊于兵、天下之勢屈于兵、故本朝二百餘年、雖全盛如慶曆、嘉祐、有司猶患財力之不給。自駐蹕江南、版圖僅存天下三之一、而財賦之入過于熙豐、兵費居十之六。高宗偃兵息民、而無休養之功。孝宗恭儉節用、而無富庶之效。朝廷朝夕講求裕民之政、而無名科歛、不可蠲減、茶鹽榷酤、日求增羨、皆兵之爲也。必欲救天下之患、使稍循古制、莫若復唐府兵。府兵廢已數百年、固未易遽復。天下募兵幾五六十萬、亦豈易遽罷。莫若修復屯田、以漸圖之。自今募兵、有闕勿補、收其衣糧、稍給屯兵、授之田、



復其稅、教以耕戰。以二十年功力爲之、募兵老死且盡、而吾之府衛立矣。其三言、李燾續資治通鑑長編以廣記備言爲體、觀者每患其繁、乞選命諸儒、節錄以進。蓋藝祖入京師、市不易肆、平五彊國、盡收天下生殺予奪之權、其神謨聖略、至宏遠也。仁宗天覆地載、四十二年、其仁澤在人心、至深厚也。神宗厲精爲治、整齊法度、爲子孫萬世之業、其立綱陳紀、至精密也。自王師旣平河東、遂征燕薊、而邊疆始擾。自東封西祀、用度浸廣、而財計日屈。自紹聖至崇寧、小人傾君子、而國勢遂移。自宣和至靖康、金人乘中國、而國勢益弱。凡此皆繫治忽盛衰、當知其所以然者、深求列聖之迹、精察義理之會、則操縱取舍、皆有楷模矣。上深然之。公又乞令侍從講讀官反覆議論治忽所繫。上曰、讀書須與人激揚義理乃見。遂取長編于國子監、又取諸秘書省、令經筵節錄。上始聞養兵之費、嗟嘆良久、

令條具屯田、府兵之便、公申述十二篇上之。又言、國家向來彊盛、垂百五十六年、古所未有、一旦兵革之禍、亦古所無、皆非偶然者。惟陛下留神考察、明于祖宗立國之大意、體統旣正、庶事何患不理。三年七月、遷國子監丞。上久不朝重華宮、遇過宮日、輒報免。一日、將恭請兩宮置酒慈福、至日中而輟。又一日、將詣重華、有司奉車、宰執侍從扈蹕衛兵巡徼、日曛而竟不出。公上疏諫曰、陛下之事壽皇、猶嘉王之事陛下也。嘉王曰、當朝謁、忽無故歷時而不朝、陛下能不怪其然乎。不朝旣久、忽欲趁赴朝參、班定而不果入。又欲置酒宮中、席設而復不至、陛下能無怒乎。陛下勿謂事親盡情而止、何恤人言。人子晨昏定省、本不可一日離左右。獨以異宮之故、車駕不可數出、姑定爲一月四朝。其將朝也、固宜中宵而興、鷄鳴而出、幸于一睹慈顏、少侍飲膳。今乃至四五十日、闕焉不朝、愛敬之誠、于

何而見。而曰能盡其情可乎。其開導明切如此。四年八月、除鹽察御史。首論御史之官、天子之耳目也、自古爲重、至本朝尤重。危言鯁論、無日無之、直節英風、至今凜凜。所以二百年間、無內姦、無外亂。近者臺諫不得其職、乃至踰月而不見、連章累牘、入而不報者。祖宗本患中書之重、能壅天下之事情、故設臺諫之官、糾中書之闕失。今欲自行聖意、盡遏言官、有如姦臣以濟己私。彈擊不從、論列不聽、則謗議萃于陛下、而姦利歸于中書。主權浸移、私黨浸盛、而朝廷輕矣。履霜堅冰、漸不可長。臣之所甚憂也。故首爲陛下言之。會壽皇服藥、上闕于侍疾、公言、壽皇聖性嚴重、父子之間、未免責善、然本出于親愛。陛下自爲諸王時、恭敬祇恪、至今猶然。此乃孝敬之德。兩宮本無疑阻、直恐姦邪之流、不識事體、交亂其間、遂致太嚴而不相接。太憚而不敢親。陛下誠能入侍左右、嘗藥視膳、共爲子

職、則前日蘊蓄不通之情、不俟終日而盡解矣。時有旨、殿帥將兵三千人、教閱禁中。公奏、近者星變、其占爲兵、乞寢此舉、以應天戒。不報。公遂言、道有本末、事有先後、無非事也。而莫大于事親。莫嚴于事天。臣所以懇切言之、而迂愚無取、不足以感寤。遂使陛下有不用臺諫之名。臣不敢久居此職、求一外任。再疏不許。尋罷內教。公以會慶節甚近、慮上復不出、乃建調護之請。願先遣宰執至重華宮、具言陛下思慕之意。壽皇聖情渙然冰釋。然後躬率百官、奉觴上壽。則兩宮交歡、天下慶幸。上乃諭葛邲等、如公言。時諫官已有攻邲者矣。邲私謂其客曰、上調護之語、未必誠然。公遂劾奏。邲敢肆詆誣、謂陛下爲不誠。原其情狀、得非與羣小之交亂者相表裏乎。邲陰結此輩、事皆有迹。若不亟去、姦朋相應、聖心愈疑。則過宮未有日。又曰、今太白熒惑失次、黑祲亘天、衡嶽山摧、劍門峰墜、行都地震、



有聲如雷、皆變異之大者。推其日月、實當邨獨相之時、望速罷免、以答天意。時臺諫交疏論邨、無慮數十。邨雖屢乞罷政、而未能決去。公謂、本朝故事、大臣被劾、雖人主恩意隆盛、終不敢留。邨陰有附託、將要陛下以逐言者。紀綱所係、利害非輕、惟特發英斷、去之勿疑。邨由是罷。蜀吳氏世領興州、積威難制、屯兵皆在劍閣之外、歲自嘉、瀘諸州泝流漕粟以餉之、率用錢萬五千而致一斛、民力大困。是歲挺死、公奏乞合利州爲一路、置安撫使于興元、使盡護諸將、平居則兵權散主、緩急則專責統帥。成都梓潼相爲唇齒、謂之東西川。今宿兵劍北、東西川蕩然空虛、宜稍徙興州、興元之兵于劍南、以實之、使足制劍北。罷成都制置爲安撫、與潼川安撫皆兼節制之任。兵屯旣分、歲減餽運三之一、則蜀民稍蘇矣。五年正月、公又言、聞有旨趣吳曦赴闕、曦饒于財、來必大納賄、求襲挺位。挺之歿也、

朝廷可收數十年浸失之權、若又授曦、非二十年不可復取。乞下臣前疏、與大臣議之。如猝難盡行、則速置興州都統、漸分兵柄。上與公往復議論良久、乃從其言、以張詔爲之、而興、利置帥、無敢任責。後曦竟領興州、尋以蜀叛、于是咸伏公先見之明。公嘗因對、進仁皇從諫錄、且言、仁宗以朝政付中書、而公論在臺諫、故大臣不敢行其私、而政事罔或不理。陛下溫恭寬厚、兼覆天下、有仁宗之仁、事無鉅細、責成二府、而臺諫切直之言、靡不嘉納。仁宗致治之要、亦旣得之矣。然直雖不拒、而忠亦未能盡從、朝綱浸弛、主勢遂孤、宜防其漸。伏惟鑑觀此錄、體之于身、其如仁宗者益勉之、不如者務去之。參之于事、合于慶曆、嘉祐者增益之、不合者亟更之、則聖德日新、庶政日美矣。時監司守臣案發、賊吏、朝廷罕所施行。公奏、藝祖患賊吏侵漁百姓、故明法以禁之。世浸承平、尙恩用寬、始有貸死免



刺之比。然藝祖之法，未嘗一日廢。今跡狀著見，而典憲不施，遂使姦貪無所忌憚。甚者邪險相傾，劾祠交上。臣以爲皆當鞠治，究見其實。是歲江浙饑，詔給寧國府米五萬石，信州三萬石，充賑糶。公以爲兩郡歉甚，民間枵然，豈復有錢可糶？乞直作濟散。太平池饒衢州、廣德軍諸暨、嵊縣皆以饑告，而未聞興發。宜亟選朝士忠信可倚者，巡視江浙，考察官吏，奉行荒政，能否勤惰，具以名聞。如一郡中有一二縣旱甚，一縣中有一二鄉旱甚，皆許撥椿積米以朝命濟之。又言：一二年間，國勢搖動，今茲不雨，安危存亡繫焉。陛下既不自憂懼，而二三大臣又不爲陛下憂懼，不知誰當任此責者。昔周成王時，天大雷電以風，禾盡偃。成王悔悟，天雨反風，歲則大熟。乃知天人相與，止在目前。若陛下下詔罪己，大臣格王正事，必能感召和氣，盈尺之雨，可銷萬憂。旣而有詔禱雨，是夜風雨暴至，頃之而止。

公言：天道甚邇，本易感通，而所以未能滂霈者，由陛下未極憂畏之誠耳。夫隆父子之恩，正彝倫之叙，宴飲佚遊，務從稀簡，緇黃伶優，盡令止絕，節冗費以裕民力，惜名器以重天位，皆應天之實也。願陛下力行之。時內侍楊舜卿、陳源、林億年離間兩宮，臺諫同班奏事，論列其罪。上曰：公言羣小闇于義理，不獨逢迎陛下，意皆有所蓄藏。源、億年舊嘗不得志于壽皇，而舜卿爲之謀士，此三人者，今日之禍根也。臣聞天下有道，則庶人不議。今人人皆議聖德，惟陛下加察。因力陳本朝宦官之禍，覆轍在前，不可不戒。上曰：壽皇自有左右親信之人。公曰：豈非離間者耶？上曰：然。公言：所謂離間者，親見其事耶？抑得諸傳聞耶？若得于傳聞，豈可不審。是日，上意幾悟。後數日，公又言：唐肅宗謂李輔國曰：上皇慈仁，豈應有此。輔國曰：上皇固無此，其如羣小何。輔國不自以爲蔽惑肅宗，而反謂高力士



輩讒間明皇、肅宗不悟己之左右爲姦、而反疑明皇之左右離間。蓋爲舜卿輩發此論也。先是、公連疏乞歸養、不許。諫既不行、復言、以孝事君則忠、臣親年八十、菽水不親、動經歲月、事親如此、何以爲事君之忠。蓋借己爲諭、冀以感悟上心也。仍報不允、乃御筆也。時上于臺諫論事、少所省閱。公因辰州蠻獠之擾、劾奏守臣林洪、乞罷之、隨即報可、簡眷非不厚、而調護兩宮、不無扞格、公深愧焉。遂出修門、申省乞罪言職、諭使仍舊。奏本朝故事、有言責者、不得其言當去。臣惜道義過于寵祿、畏公論過于刑誅、理難復入。壽皇升遐、上久未執喪、公言、陛下與壽皇、生死永隔、孝養無及矣。宜即詣殯宮、擗踊哭泣、悔過念咎、猶足以盡送終之禮。不報。今天子受禪、始奉詔復入。時浙西、淮南苦旱、浙東被水、公言、淳熙丁未歲、江浙大饑、四方奏請、朝上夕報、發廩捐賦、無請不從。計朝廷所發、不過三四十

萬石、安能盡給。而所爲不至于流徙者、心知天子之憂軫下民、足以憑藉、故寧忍饑就死、不敢自棄分多均寡、以俟歲熟而已。今陛下初即大位、有仁聖之德、而未及著見、必將于是發之。乞下三省、檢照諸路所申全傷之處、下戶夏稅、並與倚閣、已輸者理爲來歲之數、秋苗亟爲檢放。令諸路常平司會計錢米、以待賑濟、出內帑數百萬緡、以行初政之仁。天下聞之、孰不鼓舞、與其他小小施惠、殊不侔矣。不然、四方習知壽皇故事、妄謂朝廷恤民之政、不逮乾道、淳熙間、爲聖德累大矣。八月、論鎮江守馬大同以苛刻著、平江守雷渌以縱弛聞、皆不可推行賑濟德意、劾奏罷之。丞相留公頗賢此二人、聞之不悅。樞密羅公舊嘗偕諸司、以公爲薦、旣執政、乞避之、上不許。丞相請許之、除兩浙漕、命旣出、覆奏更之、除公右正言。先是、憲聖因光宗御筆有倦勤之語、欲命上履帝位、大臣揣知其意、而不

能自達以知閣門事韓侂胄后族之姻也密令奏稟侂胄遂自以爲功邀求節鉞留丞相抑之丞相去國侂胄知公嘗因論奏不合意公必擠之公語同列曰留公已去擠之易耳長小人聲欲可乎侂胄自是亦不樂公矣出入宮禁弄權植黨有陵駕當世心公憂之九月具疏將乞對侂胄微聞之遽請御筆除公直顯謨閣知平江府公一再申省力辭其二云祖宗朝人主雖獨斷于上而天下事必由中書小事則進熟狀大事則議定稟旨而行未嘗直以御筆裁處崇觀間蔡京當國始挾主威以制天下凡所施行必請御筆可爲深戒近者臺諫給舍屢有更易中書無所參預御筆浸多事勢烜赫實駭觀聽因欲三兩日間求對清光論奏其事俄有平江之命復以御筆行之某雖有列于朝未嘗得望威顏而兩旬之間既驟用之忽遽捨之恐非明主待士大夫之體借曰繁劇之地不可闕守

亦宜謀諸大臣選擇以往遽輟諫官誰實使之止緣排故相者未快其心冀某爲助某方顧惜大體不欲推波助瀾遂忤其意以至于此大藩華職誰不欲之顧不由于中書而由于近習義所未安謹不敢受丞相趙公見之袖而入言于上曰黃某再辭平江乞垂睿覽置諸坐側而退公歸志已決固請養親許之詔以所除職主管沖佑觀十月起知婺州慶元元年五月知蘭溪縣張元弼以贓得罪言者以是咎公降直徽猷閣罷二年七月復領舊祠因任者三權臣素嚴憚之故終其身不復敢加詆公亦不爲所怵嘉泰二年復直顯謨閣知泉州以親老辭進寶文閣奉祠如故舊嘗買地于會稽之東郭本玄眞子故宅鑿池築堂榜曰遂初環以名花修竹深衣幅巾挾策吟嘯陶然自適故學者咸稱遂初先生又愛上虞之小江風景秀美前對東山多王謝遺迹康樂山居在焉買山其間歲自



故廬一再至東郭往來必憩焉累日而後反又自號小江釣侶海內人士仰公名節僉曰他日羣陰衰熄正人復用公其首也咸屬望焉開禧元年丁中奉公憂三年十一月韓侂胄誅嘉定元年正月有旨召公赴行在公以疾辭又以年過七十乞致仕皆不許入對首論天下之勢貴靜而惡動國家二十年間變故迭興災孽屢作兵革暴起旱蝗相繼權臣內訌驕將外叛皆非安靜之勢幾跌而遽起頻危而復安天心之孚佑至矣願益尊有德聽哲謀以定國論酌古今合內外以正大體止事端重名器以息人心賤貨賄斥奢淫以美風俗存名義察理勢以應敵情表循良去苛暴以固民志君懋其德臣務其業上下儆戒日謹一日庶幾羣動盡息俟天命之休復又言陛下即位之始首擢臣爲諫官未一月忤韓侂胄而罷今十五年矣臣實病不能朝念往者未嘗得望穆清之光故扶拽此

來上曰卿去國久得復至此相與扶持甚善公奏陛下居嘉邸時黃裳爲翊善彭龜年爲直講臣嘗言于先帝乞爲陛下置講讀記友等官左右前後不厭正人之多先帝未及施行今東宮旣建願考本朝典故精擇方正博聞之士自師傅至于中書舍人皆使備官臣聞陛下龍飛裳龜年翊贊之功爲多必能記憶上曰然皆賢人也可惜皆已致仕公曰二人若在今日復睹天日清明必朝夕在陛下左右上首肯公又言本朝給舍臺諫慶曆元祐時實賴其力始變于熙豐再變于崇觀三變于紹興至于侂胄假彈擊以惑主聽託繳駁以益邦誣則流風餘俗靡有遺者今更新大化扶植忠賢願知慶曆元祐之所以得熙豐崇觀之所以失上嘉納之除太常少卿尋兼國史院編修官實錄院檢討官初王師北伐取泗州旣而棄之拔其民南徙漣水人李全與其孥來歸賜名孝忠旣復議和敵

約歸濠梁三關求侂冑首且欲得李全與其家及泗人之在本朝者公言于廟堂謂今之議者動稱國勢方弱難與敵爭竊以爲天子無失德諸賢相維持轉弱爲彊夫豈無術誠使合義理順人心酬應無不當則氣勢恢張雖弱必彊遠義理逆人心酬應失其節則氣勢銷沮雖彊必弱甲申議和唐鄧海泗皆以還敵則今日關要濠梁自應歸我不足爲恩函侂冑首古無是事李全決不可殺泗人決不可還時廟議已定莫能用也自去歲之冬至今年春夏不雨間有之亦不通洽四月癸巳有旨幸太一宮明慶寺禱雨是日雨作越二日雷雨交作乘輿旣出雨傾如注公上奏稱述感格之美因以爲戒謂雨雖通濟已爲後時螟蝗翅長漸能飛動若天心孚祐國家則有反風起禾蟲蝗相食故事變化亦不爲難惟陛下常盡此心恭承天意而已不然當此大壞極弊之後旱憂過于敵國蝗患

深于寇攘雲漢之詩所謂大命近止非細故也六月除權吏部侍郎兼修玉牒官陞同修國史實錄院同修撰公入謝奏稱江南立國且八十年始以金人內侵兵挈不解故竭東南民力以應軍須至于今日民窮甚矣願因天子恭儉之美當敵國休息之際取八十年暴賦橫斂而寬減之異時淮甸屯兵常欲自耕患豪占者衆而無其地今因流民遺業檢檄得實斯可耕矣巴蜀餉軍常苦道遠今乘吳氏之敗而行臣前所陳分兵之策斯不遠矣此皆已至之機不可失也昔高宗渡江兵不滿二千今合吳蜀之兵三十萬而州縣廂禁土軍弓手又三十萬中產之戶十養一兵以六百萬戶養六十萬兵國安得不蹙若減兵五萬爲錢五百萬緡減兵十萬爲錢千萬緡則賦斂之重皆可漸省內帑之別供朝廷之封樁不靳而時出之則茶鹽酒稅取贏已甚者亦可漸減民寬則國富非府藏偏



聚之謂也。古者有戰兵、有守兵、戰兵之數甚少。藝祖選天下精兵、教于殿庭、張瓊將之、萬人而止。夫不務精而務多、不蒐不練、望敵輒奔、前日之事、可爲鑑矣。上隨語酬應、公遂論本朝專任宰輔得失之效。仁宗用呂夷簡、杜衍、韓琦、皆專任也。而此三人者、皆賢相、雖專任之、而不敢自專、必引天下之賢人君子、布之朝廷、各任以事。元祐之用司馬光也亦然。神宗之用王安石、徽宗之用蔡京、亦專任也。安石迂僻自用、故誤神宗。京姦諛蠹國、卒致金人之禍。高宗之任秦檜、專矣、而險毒害正、天下多故。高宗收還威柄、而後復安。陛下前日用韓侂胄、亦專矣、而敗壞天下、至于不可支持。今威柄復還、正與高廟同。高廟末年、宰執常兼任、欲其協和、同濟國事而已。願陛下更留聖意。又曰、給舍、臺諫、人主自用之、則威權在己。或臣下得而用之、則威權去矣。侂胄所以能奔走羣臣、無不附己者、由給舍

臺諫用舍之柄在其手耳。上皆然之。銓法、進納人年二十五以上、試中方許注闕。開禧用兵、誘豪民助邊、許與蔭補用、且免試。公奏、官自簿尉而上、爲治人而設、直以錢得之、有虧國體。乞遵用孝宗詔書、惟歉歲出粟賑濟者、聽補官、其銓法並從舊制。二年正月、公以疾連疏求去、除集英殿修撰、知福州、兼福建安撫使。上躬御寶墨、黃某頃居言路、首論權臣、直諫老成、朕方眷用、力求補外、宜有褒陞。可特除寶謨閣待制。七閩重鎮、在昔率用鉅人、罕親細務。公始至、訟牒千餘、吏請委官屬、不許、隨事裁決、旦及日中而畢。予奪輕重咸當、人情大悅。閩爲士區、公一切待以齊魯之俗、故士大夫益自重、而民亦恥犯法。論者稱舊帥陳正獻公正大有體、公實似之。是歲江淮游饑、金陵尤甚、盜發濠、楚、朝廷患之。以公威望夙著、十月、進龍圖閣待制、知建康府、兼江東安撫行宮留守、江淮制置使、辭不獲

命過闕請對、言盜賊固所當急、饑民尤不可緩。若饑民不能全活、則盜賊得以爲資。賑恤之令、所宜速行。興發之請、亦宜速應。國力固不可使屈、民心尤不可使離。與其後而無益于事、孰若早而能全其生。今事勢已亟、米運難待、積粟藏鎗、不可不發。安固民心、使知尊君親上之義、銷弭寇盜、使無扇搖結集之憂、此臣之至願也。又言、江淮命使、正欲表裏形勢。州郡奏請朝廷施行、務在關通、使血脈相應。若所部敢有狃習故態、苟簡輕蔑者、容臣奏劾。上並從之。錫帶以寵其行。二年正月、公至建康。僵殍相望、室廬半空。官司科糶、雖稍輸送、未免苛擾。公悉罷之。精思所以救民者、具有成式、面授郡縣官、俾躬其勞。又請于朝、選置官屬、以分董之。誠心惻怛、約束堅明、人皆樂爲盡力、無敢欺者。窮閭委巷、山巔澗曲、家至而人撫之、病者予藥、亡者瘞焉。異時抄錄不親、多所遺落、勺合小惠、僅活朝夕、

日日伺之、他業遂廢。公既盡得其實、仍併給之、得以自營、其利始溥。活饑民百六萬八千三百餘人、厥費錢以緡計四十六萬有奇、米以石計九萬五千有奇。流民仰哺于官、布滿僧舍、而來者不絕。又收養之、置場十九、被其惠者滋衆。時商販不通、米價甚貴、雖有主業之家、不免艱食。公命發廩平之、且以帥司招糶鹽鈔、下元估三之一、誘致米商。又念賑施催科、不應並行、錢十五萬九千八百餘緡、米四萬四千五百餘石、並停勿催、尋奏蠲之。比三歲、蠲閣緡錢凡七十萬。郡境西接當塗、橫山、鬱山、羣盜所聚、私立名字、剽掠行旅。公初至之日、有盜夜劫城東居民、列炬嘯呼。越二日、城南盜作、亦如之。發于倉猝、觀公設施、或不能制、將肆其毒。公賞厚而信、不日禽之、繼禽橫鬱之盜、誅止渠魁。奏援龔遂渤海故事、宥其黨與、俾復田里。數月之間、民氣和豫、境內清肅。田夫野老、相率拜庭下。既立公





祠且家繪其像尊事之。語留都之政者咸曰劉忠肅公之績今無愧焉。然公兼制三路安危休戚所關尤廣。往時淮甸救荒非緩不及事則微而無補。公檄任其責者面戒之以無蹈前失。推誠卹民乃克有濟。自是無敢不恪。初盜發鹽城郡守欲捕而帥欲招之議久不合。賊遂得志。及縣鎮被其虐帥司始出兵討之。遇賊輒潰。賊愈猖獗。有詔許其自新。惟兇渠不貸。公至即班布之。且推廣德意開諭首惡。能束身自歸當爲奏免誅。若怙終不服有能殺之者與推恩。時主將恃功驕恣偏校多故羣盜陰與賊通。賊雖約降實款我師欲乘官軍之懈四出爲暴。公乃督厲諸將以平蕩爲期。用命者厚賞連戰皆捷。遂分淮西兵戍定遠以扼其西。又令淮東鹽司募兵使以生力出戰。給之糧仗。賊氣浸奪。其酋卞整以千人降。而公所布赦令始達山陽守臣即遣四輩揭大旗入賊巢諭之。渠帥胡海將降。

別賊沈剛擁衆襲之。海死將校得其首以獻。餘黨饑疫官軍乘之。于是解散。公請于朝。凡良民之爲賊誘脅者並貸前罪。歸業之後敢讎殺者以殺人罪罪之。分遣官屬撫定揚楚泰高郵盱眙五郡。歸業者五十二萬八千餘人。給錢三十九萬三千餘緡。米二千七百餘石。瘞遺骸以二萬計。自中興加恩淮甸寬其租賦歲下展免之旨而州縣以財計不充履畝計粟謂之撮課。朝廷嘗蠲放矣或欲于不經殘破之地自行催理。公以爲師旅一興科敷抑配均出諸郡。兵氛旣解旱蝗相續饑民猶未蘇也。又可並緣征求乎。屢言于朝申明明主美意且移書屬郡告戒甚切以明其決不可復取者。濠楚再創于壑關未廣公尤加意安集貸以種糧旣復蠲之。比公去鎮又奏免撮課一年。始終保護惟恐吾民不安其業。初金陵遵奉朝旨通明淮甸鐵錢隱不復見商旅憚于折閱而不通。細民艱于經

營而坐困。公銳意罷之，乃密察廛市，默計多寡，昭然見其事情，遂發米以糴，而許糴者純用鐵錢，所收略盡。又出銅錢楮幣易之，未三旬，鐵錢屏迹，銅鐵流布，人以爲神。開禧之用兵也，流民奔迸，權臣令部使者厚貲招募，而與之約，不征行，不教閱，惟欲扞衛鄉井，事已即散。號雄淮軍，幾十萬人，和好旣通，其存者尙衆，改刺武定，分屯淮右者三萬人，又刺忠勇，別屯巢縣者三千人，歲費緡錢四百餘萬，米斛三十餘萬。朝廷憚于重費，深欲縱遣。其人本皆耕農，事定亦思歸，而士大夫疑畏不能決。惟公與廬帥李郎中大東、淮西憲傅郎中誠協謀定計，又遣官屬博采帥憲及主將之論，密察軍人願歸之情，皆審知之。乃奏請命其將佐以官，使不失職。願歸者，人給錢四萬，復役十年；有田者先歸，無田者繼遣。不願歸者，仍隸尺籍。滁陽三軍曰：督府敢勇，效用亦皆一時招募，其願歸者，併縱遣之。明

年，互遣郡丞撫存賑卹，田里生聚，無失業者。然公不自居其功，力薦帥憲于朝，曰：臣所以得效尺寸者，實惟大東之條畫明備，誠之議論簡切，臣所據依以從事者也。願賜褒擢，其推賢遜能如此。四年正月，詔以職事修舉，進寶謨閣直學士。公篤于仁政，增養濟兩院，以安窮民之無告；益南北義阡，以葬死者之無歸；大江津渡，薄其征稅，繕修舟楫，以利民涉；海舟剽劫，精選偏校，嚴于遏絕，以肅江面；秋苗之輸，無或淹留，乃得自潔，以防侵刻。此皆金陵之美政也。是冬，更定楮令，金陵得新會三百萬。公謂楮幣不通，至此極矣，不可以不變。若惟以新券一易舊券，二人皆能之，恐非朝廷軫念留都之意。乃遣官僚巡問閭里，諭以朝廷本旨，惟欲便民，使咸曉然無疑。且悉書所藏多寡，許易于官，而示之均。發銅錢，兌如朝旨優潤之數，而示之信。隨苗輸錢，聽以舊會一千五百當新會一千，以優農民。

期令新會散于細民、使得展轉相易、以便裨販。委曲周至、上尊君命、下爲民利者、如恐不及。金陵軍民雜處、舟車輻湊、米麥薪炭醴茗之屬、民間日用所須者、悉資客販。商賈逆知舊會將廢、人所不惜、驟增物價、以術籠之。米麥一旦絕市、舊會無所售。公急救之、發官米三萬石、下舊直之半、許民以舊會赴糴、招米商平其價、而糴于官場、所得舊券、易之以新、大略如前日所以收鐵錢、救饑民者。及其他物價、種種裁定、人莫敢增、視舊或反賤。至于今賴之、儀真商旅所萃、山陽屯兵、安豐互市、事關邊徼、敵國所覘、皆以新會給之。由是四境通行、自金陵始。民有訴交易違令者、公詰曰、汝何自知之。曰、吾與之爲契券、算陌折閱。公曰、鄉民何知、汝設此陷之。恐喝不從、則訴于官耳。詞屈、杖之。自是良民謹守新令、而姦猾無敢告訐。迄公之去、鞭背估籍之法、未嘗輒施。公當世儒英、而練達時務、尤詳邊

防利害。其論屯田、大略祖晁錯、何承天、李泌之說。平時藏富于民、緩急各自爲守、練卒務精、不貴其多、則國勢可安、而民力亦裕。非若世之計田斂粟、以求目前之效者。邊郡或以是叩公、公報之曰、人授田若干、免其租調、自食其力。暇日稍習蹶張、令足自衛。凡田率從官給、舊有私田者、增及其數而畀之。過其數者勿不減。丁壯數多、猶有餘力、別給之業、即古所謂餘夫也。擇高燥之地、爲營五六處、每處三百人以上、至于千人、室廬聯比、情意親睦。益以桑麻果蔬之區、溝洫布列、廣深如式、以資灌溉。以設險阻、使與城郭相應。營立于內、田周其外、環以大濠、塞下無復曠土、則田租之入、在官在民、皆足以實邊矣。時刑寺所下奏案、重囚當論決者十三人、公覆視之、則二人罪狀不著、當貸其死。于是停決、上奏、罪疑惟輕、前聖明訓。本朝著令、殺人無證佐者、皆許奏讞、多得原貸。蓋失不經、不過枉



有司之法而殺不辜則將爲盛德之累。願從仁聖、  
丐此二人。于是俱免。常以牧養之寄、守令爲先、安  
集之始、尤當注意。故凡有學行者、有材業者、有用  
違其材而當別任以職者、有績效已著而猶未見  
省錄者、悉以上聞、率如其請。公益以爲己任、人望  
所歸、推輓不休、每曰、無報、惟有此耳。雖識鑑高明、  
而卑謙自牧、廣咨博訪、擇善而從、以故大得賓僚  
之助。在金陵三年、日益整暇、則與其屬登覽江山、  
訪求六朝遺跡。即王逸少、謝安石悠然遐想之地、  
創治城樓。又以卞驃騎之藏于斯也、闢忠孝堂、棟  
宇宏傑、景物呈露、遂爲此邦偉觀。晉元帝故有廟、  
公復新之、以嵇侍中紹侑坐東房、王丞相導、謝太  
傅安配食西房、兩廡繪從祀劉司空琨至陶彭澤  
潛三十有二人。又葺卞祠、嚴像設、劉侍中超、鍾將  
軍雅並侑、以旌清溪三賢死事之節。作通史、倣春  
秋葬劉子例、書謝公卒葬、以表抗溫卻秦、再安晉

室之功、皆所以興起人心、扶助風教也。公雅意巖  
壑、加以上氣之疾、懷思故鄉、引年之請、至于十上、  
累詔不允。五年十月、以禮部尙書兼侍讀召、再辭、  
詔趨入覲。公論、藝祖垂子孫萬世之統、一曰純用  
書生、二曰務惜民力。列聖承之、以爲家法。乃自狂  
儒盜權、標立名號、斥逐忠良、于是儒生廢放、源流  
不竭。願以廣大并包爲心、以長養成就爲事。自古  
賢者在位、能者在職、其所謂賢道德之士是也、其  
所謂能材藝之士是也。故必以修身善行爲端本、  
以尊君愛民爲專務、以詩、書、易、春秋爲典法、以仁  
義禮樂爲實用。重廉退、崇節義、抑輕銳、禁利口。四  
五年間、庶幾後生小子日就作成、人材輩出。藝祖  
取民之制、僅使足用、餘散州縣、以蘇凋瘵。建炎用  
兵、江南川蜀、增取之數、無慮數十。兵旣息矣、合還  
之民、而有司反利之。其不能收拾、委之污吏姦人  
者、不可勝計。願專以休養民力爲本、以撙節冗費

爲急其增取甚者漸斥還民。上納其言仍獎之曰、江淮清晏卿之功也。公謂尊賢使能俊傑在位省刑罰薄稅歛孟子所言萬世不易之常道也。今日惟寬裕民力可以祈天永命此時務之最急者故數爲上言之。公之爲制帥也朝廷將城滁陽命公攷訂。公奏淮南自古號爲戰場其戍守有常處遼曠空荒之地不復經理得閒則使人耕作有急則棄捐而去不爲久居計。今爲郡十有七若皆築城郭則皆當固守。常時論將不能以一二數。今日安得如是之多乎。沉淞陽有古羅城西南與山寨接亦足守禦。附城聚落旣衆爲關城以域之吾守羅城關城雖虛賊安敢入。假令攻城吾引山寨之兵表裏夾射賊安得至。其或安坐不攻吾居山上視賊動息日攻而夜擾之彼亦吾虞豈能暫安乎。其言堅確故未果築。及是邊郡爭言築城之便功役繁興公言于廟堂曰天子有道守在四夷。舜咨十

二牧曰食哉惟時柔遠能邇。惇德允元而難任人蠻夷率服。此帝王制中外之上策也。今若增築江南珠聯棋布非十餘萬兵不可守。形勢易格事機難周一城失利百城皆聳。昔韓欲弊秦使鄭國獻鑿涇之策秦人覺之國曰渠成亦秦之利。乃卒鑿之。今日之築城安知不爲他國之利乎。慮之旣熟故持是說不變。上注意方深天下亦望公得政而數以病在告。九月七日入侍經帷讀明皇開元末用李林甫斥張九齡事奏曰此唐室治亂之所由分願陛下退朝之暇更反復之上曰朕方賴卿輔佐朝廷是晚疾復作固乞歸三請乃除煥章閣學士知隆興府辭改提舉玉隆萬壽宮。比歸會稽幾月而病益侵遂致其仕除龍圖閣學士。十月己酉公薨天下識與不識皆痛惜之。享年七十有六。積階自改秩九遷爲中奉大夫爵新昌縣開國子食邑六百戶。遺奏聞贈通奉大夫官其後如格。公體



貌魁碩、德宇凝粹、言動有矩矱。爲兒時、兪夫人命日事大父、或值假寐、則鞠躬端立以俟、久而益謹、人皆異之。兪夫人性嚴、罕當其意者、獨能順適、得其歡心。事中奉公、左右無違。奉繼母如實生己、雍睦無間言。中奉既飭家事、勿復關白、具圖籍、立規畫、井井有條、以授諸弟、有無出入、因不復問。公官中都、中奉時就養焉、性不喜紛華、率未久而去、公心慊焉。不知宦達之榮、而以不得朝夕親旁爲恨。直道不容、排斥而歸、杜門屏居、不以時不我用爲戚、而以得日侍庭闈爲歡。執杖履、奉尊罍、往來谿山間、愛敬交至。中奉天年考終、公亦年幾七十、執喪哀毀、一遵古制。嘗取士喪禮、設爲問荅、酌其可行者、以授子孫。郊恩、先奏弟廡、泊諸弟皆以場屋自進、始命長子以官。睦姻念舊、周卹難阨、始終不衰。事君如事親、造次不忘。雖家居、聞朝政之美、喜不能寐、否則憂形于色。平生澹泊、一室蕭然、無耳

目之娛、獨嗜書、至老不倦。時時誦習、且手抄之、曰有程、雖官事紛沓、不廢。自六經、百氏、天象、地理、禮樂、官名、井田、兵法、莫不研究。交友皆天下名士。講貫日新、停蓄充溢、義理所在、必極精微、毫髮有疑、昭晰乃已。蚤以經濟自負、當孝宗時、每曰、吾得一見足矣。光宗初政、一言契合、所請節錄通鑑長編、雖講官以爲繁重而止。帝終不忘、屢形聖訓。公感激圖報、耿耿此心、嘗稱古大臣之義、身與宗社同其休戚、不以倖倖取名。誠意日積、自然密移、有格天之功。偉哉言乎、其深于本原之論乎。世之知公者、惟曰奏疏鯁切爾、曰敢抗權要爾、而不知其又有進于此者。人不足與適、政不足與間、而惟以格心爲急、此大人之事也。而公有志焉、可謂深于本原矣。有書說二十卷、詩說二十卷、周禮說五卷、發明精切、有先儒所未及。止齋以周禮名家、聞公論鄉遂、所疑頓釋。司馬公通鑑、于漢紀呂后、新莽、于

三國進魏黜蜀于東晉用五胡僭號于唐末繫五代心疑焉更立書法名通史編年未絕筆也今止四卷又以三國南北攻守不同有歷代邊防六卷藝祖憲監三卷仁皇從諫錄三卷奏議及雜著若干卷屯田便宜一卷既寢疾自知不起手書建宗

立佐所以維持家法者告于祖禰而敬藏之娶高郵洪氏淑德令儀克配君子先公二十二年卒贈碩人子男四人邁登甲辰進士第授迪功郎鎮江府司戶參軍踰年卒章承奉郎新提領戶部犒酒庫所幹辦公事遵貢于鄉而卒準修職郎新鎮江府丹徒縣丞公之教子本于躬率不令而從皆修謹務學足世其家女二人秘書省正字周南知衢州王棐其婿也孫男四人元直承務郎元護元貺元真孫女七人初公葬洪碩人于上虞縣葛仙鄉之鳳凰山嘉定七年八月十日諸孫將奉公柩以合葬貽書于某以行述爲請某不才敢當此筆然

受知于公既三紀矣某亦知公最詳公之篤學精思胸中富有取之不窮發于事業煒然可紀立朝大節始終無玷固某之所心服也尙安敢辭乃詳著其實而敬授之以備太史氏之采擇謹狀

袁燮撰《繫齋集》卷一三

故禮部尙書龍圖閣學士黃公墓誌銘

公諱度字文叔越新昌人曾祖巽祖惠之父仁靜朝奉大夫致仕上爲光宗壽特賜大夫紫衣金魚公隆興元年中進士第任瑞安縣尉教授處州母潘夫人卒教授隆興府改平江府知嘉興縣召監登聞鼓院國子監主簿公志在經世而以學爲本學終其身不私己見爲足不名一家有詩書五十卷周禮五卷得義理所安爲多諸儒罕能過也史欲抑僭竊存大分別著編年不用前史法至於天文地理今人以爲不必講井田兵法今人講而不足行者公能使文與事會即近驗遠可以據依無





昔人迂陋牽合之病也。學既成，轉側州縣久，默默無所發。及是輪當面對，奏言：漢唐英主，遭時雖異，各競欲爲之心。歷歲不渝，終獲已成之效。陛下即位三年矣，羣臣猶未喻上志也，則豈能以事應陛下哉？臣熟觀世故，惟養兵爲大患。救患之策，幸使民屯田，陰復府衛，以銷今之募兵。陛下欲爲之初，無以過此。又言：經筵止讀通鑑寶訓，而李燾長編本朝六七大節目，本末所係，願加考詳。上欣然取長編付講讀官。天子既得聞兵數與費，唧唧歎息，亟下公具屯田、府衛十六篇上之。會服藥，不及進御，而經筵以爲長編文字多，亦止。然由是知公稍遷丞。紹熙四年九月，遷監察御史。蜀將吳挺死，公建論曰：國家徒倚世將扞虜，而不爲蜀慮，叛臣歲舉緡錢四千餘萬，遡流而運，名曰餽邊，實富吳氏，民力盡矣。成都非用武國，本賴梓潼號東，西川劍閣天險，漢中興勢蔽遮於外，昔人守蜀之常也。今

內無一兵，若吳氏南指，兩川豈朝廷有？區區制置使，何足抗哉？天幸挺忽死，子弟未有異望，急合興利爲一，稍徙其兵以實兩川。罷制置，令梓潼兼領，則餽運省而民力可少寬。於是上反復語蜀事至日，旰遂以張詔爲興州都統制，而合興、利、分、東西川執政莫敢任責。後挺子曦復歸興州，竟以蜀叛，宣撫制置失守棄地而去，皆如公言。紹熙二年，光宗始以疾不過重華宮，公爲監丞，上書切諫。四年，疾甚，既爲御史，連疏極諫，上將令右丞相葛邲調護孝宗而後朝，邲不以爲誠也。公因劾邲以諫。又言：太白晝見犯心，月犯天關，熒惑勾陳行入太微，其占爲亂兵入宮，以諫既不聽，累乞罷去。又言：臣有父年垂八十，不能親養，奈何以空言感悟陛下？且乞出國門待罪而諫，皆不聽。又與臺諫官合班對延和殿，彈中官陳源、楊舜卿等罪大於李輔國。公最後口陳數千言曰：孔子稱天下有道，則庶



人不議。夫不言公卿大夫不議而言庶人不議何也。人主有過、公卿大夫諫而改、則過不彰、庶人奚議焉。諫而不改、失不可蓋、使閭巷小人皆得妄議、紛然亂生、故勝、廣、黃巢之流議於下、國皆隨以亡。今天下無不議聖德、臣甚危之。上莊而不愠也、然猶不聽。孝宗崩、今上禪於重華宮、詔復爲御史如故。遷右正言。知閣韓侂冑驟竊柄、威福浸廣、意所好惡、盡以御筆行之。公具論其姦有日矣、而御筆出、公直顯謨閣、知平江府。公言、御筆、蔡京所以亂天下也。今太上猶未得見、表章不通、大駕空返、歲饑八九以上、盜賊已作、餒殍滿道。此爲何時、而容侂冑於其間、設御筆、逐諫官、使俛首去、不得效一言乎。固辭。或謂天下方患苦侂冑、儻遂因公請、與節度使放之外祠、禍幾可弭。中書知力不敵、聽以冲佑祿歸養。俄知婺州、坐不發蘭溪知縣贓罪降職罷。自是綱紀一變、大權皆侂冑有、而公爲冲佑

觀者六。然侂冑素敬公、不敢害也。起知泉州。公言、大夫年八十六矣、不當仕。直寶文閣、復爲冲佑觀。旣殺侂冑、召用舊人、除公太常少卿、吏部侍郎。公屢移疾、以脩撰知福州。又與待制、上親批授之。知建康府兼制置江淮。公言、兵甚致災、殍餘生盜、皆不安易動之形也。昔方臘反、雖即滅、而天下之勢遂動、中國由此不能立。今日之急、危當使安、動當使止。上然之、賜帶而行。公正月至金陵、盡四月錢米、所活百餘萬口、除見稅二十餘萬。夜、劫城東南、立就擒、而橫山、鬱山賊皆奔散。公奏赦之、境內奠枕。民畫像祠公、家爲香火焉。時盜起鹽城、官軍奔潰、踰射陽、攻海陵、越入天長、絕運道、將進之濠、壽公戍定遠、扼賊西路、給淮東鹽司糧仗、募士鑿擊、遂降卞整、得胡海首以獻、招其歸業九萬家。初、避虜之民聚於淮西、坐而仰食十萬人、及刺爲武定軍猶三萬、而巢縣忠勇、滁州敢勇、督府效用亦數

千人。公歎曰：「使爲總領，患未已而淮人終不安者，此軍也。」因其思歸，悉散遣之。公旣制置其大事，而數路中奏報緩急，雖小事亦應繩墨，薦材良，逐貪懦。比三年，江淮稱治。暇日，作治城樓，廟祀東晉君臣，存江左遺跡。夜引賓佐，質難經義，得新說，披衣排戶以告。爲寶謨閣直學士，入爲禮部尙書。天下意公嚮用矣。公自以年愈高，累數月乞告，不朝會，或一出，輒復謝病，請去不已。遂以煥章閣學士知隆興府。即日歸越，提舉萬壽宮。嘉定六年十月己酉薨，年七十六。始，公以府衛蜀兵說光宗不用，後爲上言：「今吳曦誅矣，若遂移關外戍於成都、潼川，和好成矣。若遂舉籍兵減三之一，皆已至之機，可爲之會也。紹興至今，三罷兵矣，所增之賦皆當斥以還民。」又言：「祖宗家法，純用儒生，更化之要在尊有德。其經世大指如此。」至言侂冑首縛送李全，而以泗州五千人還虜，皆與時論異。又時方爭言淮

之城郭可盡築，公獨謂役力繁重，雜支魚貫而守，一處失險，則連城震動。古人城有所不守，地有所不爭，蓋兵家常勢也。訃聞，上嗟悼，遷學士於龍圖閣，加秩中奉大夫，而後致仕。七年某月日，葬於上虞縣鳳凰山。碩人洪氏先卒。子曰邁，甲辰進士，迪功郎、鎮江府司戶，早卒。曰章，承奉郎、幹辦戶部提領酒庫公事，曰遵，鄉貢進士，早卒。曰準，修職郎、丹徒縣丞，女之婿曰秘書省正字周南，知衢州王棐。孫曰元真，承務郎。元護、元貺，公初入朝五十餘論。侂冑廢，比再召，七十餘矣。又南走閩，東北出金陵。數年復召，已七十五。故已言者不行，已行者不盡。然公晚猶纂易傳，未成書。前卒數月，念得士必三十人，乃可爲國用，今始五六爾。病革，但卻客危坐，與章論說終日。其不以老退情終始有立，增光前人，余所畏也。銘曰：

維天降材，人有常職。非其本原，行潦之溢。公毗於



儒藏

學、生死六籍。發舒中和、仁政義術。彼時燠寒、流金走石。公儼不動、內守沖密。彼物壯老、先銳後屈。公常自若、致虛用實。推其所爲、思始成卒。小猶管、晏大可召、畢中列三品、外倡九牧。揣本齊末、廢百舉一。較銖刀者、夫豈不足。我懷慨然、銘以貽則。

葉適撰 《水心文集》卷二〇

校記

①司：原作「可」，據武英殿聚珍版書本《梨齋集》改。

宋儒碑傳集卷一百四十六

京鏜 胡泳 劉玘 陳葵 傅修

宋故太保大觀文左丞相魏國公贈太師

諡文忠京公墓誌銘

孝宗皇帝宅憂、北虜遣使來弔、帝遣朝奉郎、中書門下省檢正諸房公事京公假朝奉大夫、試禮部尚書往報謝焉。至汴京、虜遣使郊勞、用夷禮。蓋我以哀往、彼以吉逆、彼必欲行彼之非禮、奪吾之有禮、至臨我以威、以張夷狄虎狼之強。我卒能執吾之有禮、折彼之非禮、使君臣訕服、以伸吾中國禮義之尊者、京公以必死抗之也。大抵自古及今夷狄之所恃以行其無道者、止以一死怖士大夫而已。不知夫死之爲說、施之畏死者則止者行、施之不畏死者則行者止。然畏死者未必不死、正使不死、其辱有甚於死。不畏死者未必死、正使必死、其榮有甚於不死。異時吾國之士、吾見有出使而移

疾憚行者矣。見有不憚行、旣行而不稱職者矣。見有不惟不稱職、而辱命者矣。見有虜人餒之、至於獻詩請降、以乞壺飧者矣。奚而然也。畏死故也。今京公執禮如執玉之堅、趨死如趨隅之安、毅然正色而不可奪、虜卒不敢加無禮、不惟不敢加無禮、又復委曲順從、惟吾之聽而莫之敢違。奚而然也。不畏死故也。昔魯哀公問孔子曰、敢問人道孰爲大。孔子曰、禮爲大。弟子問、何如斯可謂之士矣。孔子曰、使於四方、不辱君命、可謂士矣。偉哉、京公乎。惟得孔子論禮之意、是以見禮大而夷狄小。惟得孔子論士之意、是以見君命重而身輕。孰謂一死能動之乎。當是之時、天下忠臣義士聞其風而說之、咸曰、是可以相天子矣。至於今上、遂相之、天下尙遲之云。公諱鏜、字仲遠、豫章人。漢魏郡太守房之裔。曾祖皋、祖德用、父祖和、皆贈太師。祖封袁國公、父衛國公。母徐氏、繼母徐氏、皆封秦國夫人。建



炎三年、金寇據豫章、恐城中之人圖己、家質一壯男子、衛公同產四人莫敢往者。吏持父母甚急、衛公慨然請行。後盡戮質子、衛公逸水而免。寇退、訪父母、得諸野、奉以歸。兄弟俱全、州閭稱其孝感。公釋而翹秀、受孔安國尚書、通子史百氏、試郡學必前列。及大比、對典謨義、極陳禹臯贊舜深旨、考官驚異、謂有經綸業。明年紹興丁丑第進士、奉大對以直聞。時年二十。主撫州臨川縣簿、令陳鼎有能名。公一日旁觀其政、曰、吾得之矣。然陳以繁、吾以簡。再轉南康軍星子縣令、地瀕江、田病水、故多訟。公核簿正、程里胥、銛筭頓清、善良得職。郡計大半倚舟征、吏緣虐取、過者目爲虎穴。守屬公董之、薄征通商、民譽藹如。部使者王柎首薦之。及公造朝、改秩、柎爲小司寇、見公喜曰、公才宜在天子左右、毋庸詣曹受邑。公固請自試治民。柎曰、薄州縣、榮中都官、士夫皆然、公獨不然、可以泚孟晉之類矣。

知江州瑞昌縣、俗以終訟爲賢、大姓磐據、持吏短長、奪攘民業。忽有媼持牒庭下、公詰其由、莫知所對。公曰、必某大姓也。嗾此媼者、逮其人下之吏、盡服其辜、杖而屏之鄰境、盡取所攘以歸其主。始民樂公豈弟、至是一邑大驚、三年莫敢犯者。部使者薦之、章交公車。參知政事龔茂良薦公於孝宗、轉主管官告院。先是、茂良帥豫章、日得公牋奏之文、奇之、曰、此汪彥章輩代言手也。它職兩月、詔從臣舉良縣令爲執法官、給事中王希呂以公應書、即召見。時帝方英明果銳、有雪讎耻、復境土志、夸者乘之、遞進<sup>③</sup>。竊言、以規速化。公言於帝曰、天下固有落落難合之事、亦未有驟如意之事。帝曰、天地尙無全功、天下安有驟如意之事。蓋悟公之規也。因極言州縣俱困、民貧兵驕、士氣隕靡、媚賢憎直。帝曰、卿議論通明、有用材也。是日除監察御史。公言事務存大體、不爲苛刻。至有浮躁險怪之士、或已

拜官而潛入脩門造請者、或騁機巧以圖近次名城者、或事談說以營求儒林之官者、皆擊去之。帝謂大臣曰、察官廉察、非小補也。大朝會攝殿中監、帝顧左右曰、京某威儀雍容。又謂宰臣趙雄曰、京某有公輔器。時士大夫有倡爲從窄之議者、每事駁削、公言於帝曰、此說一行、日窄一日、將下失人心、上虧國體。帝曰、事不務寬大、氣象自不佳。公曰、繼今有進此說者、願必罰無赦。又言、求才不如儲才。今姑蘇武昌缺一守臣、久未得其人、萬一軍旅倉卒、當屬之誰。又言、非嘗任守臣者、勿除爲部使者。又言、天下有勇敢之才、不在軍旅則在盜賊。二者相耦、以爲消長。爲盜不死、或抵黥流。黥流而逋、還復爲盜。異時江湖大盜、亡卒半之。帝曰、朕慮此深矣、何策而可。公言、宜令諸路帥臣名爲募兵、實招亡卒、員數有額、月日有限、自首免罪、賜名效用之軍。不過旬月、可以坐得精兵、潛消盜賊。帝皆施

行。衛公薨、旣祥、除荆湖北路轉運判官、舉廉紬貪、不避勢人、逮鰥振乏、不遺幽遠。兼攝江陵帥、訓兵御衆、威望凜然。軍民之政、至今爲法。召爲郎、未行、繼母秦國夫人薨。旣祥、復召爲將作監、遷右司員外郎。北虜賀生辰使來、命公爲僎。值帝宅高宗之憂、公諗其使以帝方居廬、難以受禮、使人不可。旣不得見、又欲小留、公曰、信使之來、以誕節也、誕節且過、何名而留。明日遂行。帝勞公曰、朕不見虜使、卿卻之之堅之力也。除中書門下省檢正諸房公事。虜又遣使來弔。祭、遂以公爲報謝使。公行涉淮、故事、當於汴京受宴禮。前三日、公與虜中郊勞使介康元弼、瑤里仲通相見於寧陵、公請免宴、不從。至汴館、公請必不免宴、則請徹樂、宜如告哀、遺留二使近比。遺之書曰、蓋聞鄰喪者春不相、里殯者巷不歌、聖人禮經之明訓也。惟北朝之治國家、道之以仁孝、齊之以禮義者也。今某之來、繫北朝之





惠弔是荷、繫本朝之哀謝是爲。北朝勤其遠而閔其勞、遣郊勞之使、<sup>⑤</sup>式宴之儀、德莫厚焉、禮莫重焉。外臣受賜、敢不重拜。若曰而必聽樂、是於聖經爲悖禮、於臣節爲悖義也。豈惟詒本朝之差、<sup>⑥</sup>抑豈昭北朝之懿哉。敢請執事、將何以訓之。若不得請、有死無貳、<sup>⑦</sup>無所逃遁、惟執事圖之。一日之間、凡遣人以書辭者六七、口傳者數十。元弼等不從、公亦竟不訕。公慮其以衡命誣我也、至期夙興衣冠、往俟于位。元弼等遣人相踵趣公即席、又遣相禮者傳呼邀請、其<sup>⑧</sup>聲不絕于兩序之間。公不爲動。徐答曰、若不徹樂、死不敢即席。必欲即席、可取吾頭以往。聞者震駭。元弼等知不可、<sup>⑨</sup>奪乃遣人謂公曰、請先拜醪醴、果實之錫。徐議去樂。公乃帥其屬班于庭、北嚮拜受。未畢、忽北典籤者連呼曰、北朝宴南使、敢不即席。其聲厲甚。於是公即趨退復位。及門、甲士露刃閉關。公命吾典謁叱曰、南使執禮、何物

卒徒、乃敢無禮。遂排闥而出。元弼等乃以聞其主、留館七日、乃有免樂之命。後有宴亦如之。帝聞公還、謂輔臣曰、京某在汴死執不聽樂、其節可嘉。士夫平時孰不以節義自許、臨危乃見耳。公<sup>⑩</sup>見帝、帝勞曰、卿能執禮、爲朕增氣。禮固不易執、執禮亦未易、何以賞卿。公謝曰、虜畏陛下威德、非畏臣也。正使臣死於虜、亦臣子之常分、敢希賞乎。宰臣言使還應增秩。右丞相周公必大進曰、增秩常典、京某奇節、惟陛下之命。帝曰、京某今之毛遂也。即除權工部侍郎。初、公辭行、言於帝曰、此行禮物與前小異、虜貪而無耻、當有以應之。果以爲言。公答曰、禮物頒於朝廷、使臣止於將命、豐約非所知也。虜無以詰。至是、帝曰、果若卿言。成都謀帥、帝曰、京某人材磊落、可使也。除敷文閣待制、四川安撫制置使、知成都府。公至蜀、念地險且遠、天日萬里、當使斯民如在輦轂、首罷覘者以安疑情、躬閱訟辭以達

幽枉、賓接小官以求人才。肅整維綱、屏逐昏墨、撫字細民、輯睦將士。旬月之間、仁聲威譽洽于四蜀。又念蜀民之貧、節用薄歛以裕其力、請歲蠲成都米估之征緡錢七萬有奇、草估之征緡錢七萬有奇、四路醴酒折估之征緡錢九十餘萬有奇、通三歲凡二百七十餘萬云。後還朝、又請加數年蠲減之期從之。於是舉全蜀之民、被朝廷之澤、若更生焉。紹熙元年、夔利告旱、發粟三萬石以振夔之民、五萬石以振利之民。明年、東西蜀告旱、又以錢二萬緡、粟二千石、仍請度牒五十以振六郡之民。榮資二郡尤甚、公請除前一年未輸之秋租、又盡除是歲之兩稅、又請度牒一百、以爲水旱之先備。於是飢民免於捐瘠、大侵有如中熟、忘其水旱焉。先是威州之蠻、其俗相殺者、相償以錢、即解而去。至是蠻有與吾兵人鬪者、聲言將入郛、守臣請避之。公笑曰、我在此、蠻何敢爾。此必僇者教之、若竿僇

者之首於境、則彼不敢動。太守揭公之令以示之、蠻即退。黎州舊以西兵戍之、一日與州兵相攻、兵刃接矣、其將又縱與其下、蜀人疑駭。公視之若無事、紕其將而治其不咸者、夷漢按堵。瀘守張孝芳政嚴、兵殺孝芳及其家。公明遣佐屬撫諭以疑其黨、亟發綿、潼勁兵以踵其後、未幾瀘卒自斬元惡、禽其黨五十人以歸、戮於市。於是三邊綏靖、朝廷無西顧之憂。公請爲祠官。光宗曰、蜀人方安京某之政、進寶文閣待制、俾因任焉。在蜀四年、召爲刑部尙書。今上御極、公上疏獻四事、曰敬、曰公、曰勤、曰儉。上嘉納之。命兼侍讀、上前陳春秋一王賞誅大法、讀呂公著新法奏議、皆酌古明今、隨事寓諷。上喜、因語金華諸儒曰、京某進讀、義理坦明、使朕意冰釋、卿等說經、不當如是耶。於是大用公之意。萌於此矣。尋兼史部尙書。紹熙五年九月、除端明殿學士、簽書樞密院事。十二月、除參知政事。明年

改元慶元、四月、除知樞密院事。二年正月、拜右丞相。白麻出、在廷相慶。公與同列傾豁肝膽、不忌不克、議疑從可、介而毋我、事疑從是、通而不比、心本寬厚、政出公方、與士鈞禮、不爲崇峻、匿瑕用長、不遺纖末。然守典謹度、人綱人紀、外若曠然、中實截然。其所主<sup>①</sup>一遵孝宗成憲而已。有戚畹命從中出、員外置幕僚者、有屬籍近親特增秩三等者、有禁中藥者、超爲遙刺者、皆執不行。寺人王德謙除節度使、公與同列見上、力言不可。上曰、故事有之。公曰、祖宗故事遵用、有可有不可。在眞宗時、則有若劉承規將死求節鉞、以王旦之言而不與、止與之以觀察留後、今之承宣使也。此治世之令典、可遵用也。在大觀宣政時、則有若童貫假開邊之功<sup>②</sup>、出少府之節、自此楊戩、藍從熙又得之、譚稹、梁師成又得之。二聖北狩、中原塗炭、此之自出。此亂亡之覆轍、不可遵用也。高宗深創其禍、故初政之詔首

言繼自今不以內侍典兵。其時有張去爲者、及孝宗時有甘昇者、二人非不親近也、曷嘗有此。至於諫臣陳賈一言甘昇之罪、孝宗即遂去之。此又治世之令典、可遵用也。願陛下以令典爲法、以覆轍爲戒。上曰、除德謙一人而止、獨不可乎。公曰、此門必不可啓。當除童貫時、亦云一人而止也。節鉞不已、必及儀同、儀同不已、必及三孤、三孤不已、必及三公。公於是力請裂麻<sup>③</sup>。上又曰、不播告書贊而畀以告身、亦不可乎。公曰、是掩目捕雀<sup>④</sup>之喻也。上又遣中人以宸翰諭二三執政、公與同列上疏力爭者至于三、至于四、上乃絀德謙以外祠、尋謫廣德軍、仍絀謫詞臣吳宗旦、朝論以公比王文正公云。時太上聖體未安、上每憂形天顏。後浸康寧、上欲涓日上萬年之觴、而宮臣又以小倦辭焉。五年八月辛未、公乃呼宮臣楊端友等三人至中書面詰責之、泣而承命。癸酉、端友傳太上聖旨、令皇帝上



壽。辛巳、上詣壽康宮奉玉卮。禮成、輔臣於幄次賀。上大喜、宮臣及屬車豹尾中侍從僕御之臣皆賀、驩呼之聲震于中外。有司奏太廟太祖祐室生玉芝、上遂發德音、布告天下。太史嘗奏星緯失次、公勸上恐懼修省、以格天心。邊城每奏北虜事宜、公勸上不必問彼而有爲備。上喜年穀屢豐、因宴輔臣、公勸上勿恃小康而怠持守。燕閒密勿之頃、動容出辭、必獻敬戒。至與同列在上前首發大議、陳宗廟社稷萬世大計、有人所難言者。六年正月、公與同列奏事退、公獨留、力祈上丞相印綬。先是、同列知其意、言於上曰、京某公正無私、不可聽其去。上曰、丞相誠實、安得言去。及公有請、果不從。閏二月、拜少傅、左丞相。三月、公屬疾、遂力申前請、凡六表、詞皆哀痛。上竟不許、詔藥丞視之、且許肩輿入見。六月、慈懿皇后上仙、公力疾而出、發哀成服。八月庚寅、光宗升遐、公聞之不能出、因大慟、遂疾

革。至丁酉將逝、其子沆問以家事、不答、第長太息曰、國家多故、何以枝梧。言訖而薨、享年六十有三。先是、太史奏木星侵上相、遺表聞、上爲震悼、以太保觀文殿大學士致其仕。上以居廬、從有司之請、免臨奠及輟朝。有詔公薨于位、禮宜優異。於是賜之美櫬以爲櫬、又賜之貂蟬火龍以爲服、又賜之水銀龍腦以爲斂、又賜之白金三千兩、帛三千匹以爲賵、又贈之太師、諡之文忠以爲恩、又命有司祭之脩門、命從臣中人護喪歸葬以爲禮。哀榮典章、彌文備物、並用司馬光、薛居正故事。近世鮮儷也。其孤沆祈免門祭護葬甚力、從之。配盧氏、封令人。前十二年沒、累贈魏國夫人。一子、沆也、承議郎、主管佑神觀。三女、長卒。次適從政郎、前廣南西路經略安撫司準備差遣黃銖、太史後也。次適宣義郎、添差江南西路轉運司幹辦公事張忠純、忠獻孫也。兄弟四人、銓、鎡、皆以公補官。仲氏鎬、蚤世、官



其子沂。公之天資裏和表爽、喜怒不留、色粹氣平、可否無忤。策第最蚤、或者易之、特於稠廣詆以嫚語、公一笑、亦不孰何。其宰瑞昌、有毀公於太守者。後公攝帥江陵、毀者爲幕僚、反側求去、使人尉安之、且厚遇焉、其人感泣。公常曰、寧人負我、毋我負人。至於善善賢賢、不啻已出。其在政地、每挾一小方冊、以書才行氏名。上有問、必薦進。於文無所不工、尤長賤奏。仕雖至公台、獨未嘗掌制、談者爲恨。其爲詩源委山谷、而氣骨卓偉、無寒瘦態。有雜著三十卷、經學講義五卷。晚卜居、得宋齊丘宅、古松百章、岑蔚後先、因號松坡居士。堂曰眞趣、樓曰山浦。上爲書堂、名以賜焉。雲昭漢回、上貫翼軫。沆以嘉泰元年十一月壬申葬公于新建縣桃花鄉高坪德源山之原、走一介持書、以朝奉郎、國子司業李公大異所作行狀來請銘。銘曰、

彼鮮不失次。堂堂魏公、往謝彼戎、弔我閔凶。彼用夷禮、僣侏庭止、哀樂不類。公辭以哀、十反莫回。盛服往哉。彼樂不徹、吾首可折、吾節可奪。虎夫負牆、鎧爭日光、刃磨秋霜。公毅以叱、排闥以出、罔不辟易。彼諗彼酋、樂徹禮優、竣事不留。臣主相顧、嚚競遄沮、敢或予侮。公歸脩門、孝宗亟稱、皇威伸伸。人望有歸、竟塊厥位、頻斷大事。大閭其覲、節纛其除。公還贊書、太上違豫、闕以贊。御公達舜慕。二聖重歡、一言回天、茲不曰艱。疇不將命、公當其繁、彌險彌勁。疇不鴻鈞、公迎其焚、彌艱彌峣。維垣其貴、文忠其謚、哀榮寡二。西山西偏、德源之原、名相之阡。玉立之節、章水有竭、凜氣無歇。

楊萬里撰 《誠齋集》卷一三三

承務郎胡君泳墓誌銘

君諱泳、字季永、吉州廬陵人。曾祖愷。妣張氏、以百歲封孺人。祖載、贈朝議大夫。妣碩人陳氏、張氏。父

澹菴先生銓、以勁節危言爲國司直、雖小夫賤隸、椎髻卉服、無不知其姓名、今爲龍圖閣學士。妣碩人劉氏。紹興八年、先生自樞掾黜佐福州幕、道由姑蘇而君生、故小字蘇郎。六歲隨先生謫新州、已能背誦春秋、詩人陳元忠試之如流、曰爲春秋生。先生再貶朱崖、渡海道瓊、故參知政事李公光在焉、見君穎悟、許妻以孫。自瓊過儋耳、拜蘇文忠遺像於動鏡閣、喟然興歎、年方一星終、人皆異之。旣抵朱崖、先生聚徒受業、諸生人執一經求訓解。君甫弱冠、往往與討論。二十六年、秦丞相死、先生與李公皆內徙。初、秦氏揭二公及趙丞相姓名於格天閣、趙丞相前薨、至是先生賦詩有閣下大書三姓在、海南惟見兩翁還之句、君口不絕吟。先生曰、孺子可教。因授以句法。三十一年春、侍先生歸廬陵、講道家塾、兄弟怡怡如也。今上登極、先生自吏部郎不逾時、以左史入詞掖、遂爲兵部侍郎。君曰

從中朝名士游、聞見浸博。隆興初、郊奏補右承務郎。家居累年、或勉以仕、則曰、吾斯之未能信。乾道七年、先生固命君類試中之。虞丞相邀與相見、略不干以私。調監淮西江東總領所太平惠民局、兼監行宮雜買場。先是、先生得旨進所解易、春秋及二禮、君日夜編次、讐校、先生賴之。淳熙元年春、君當之官、而不忍去親。先生曰、吾固欲泛大江、游金陵、其亟具舟、吾與爾俱。君乃迎侍以行。留守劉公珙以二府重望、少許可、獨禮君厚、薦之公車。二年秋、得寒疾、逾月、病益侵、呻吟皆詩、間作樂府、詞旨超詣。十一月庚午、竟不起、得年纔三十八。配即李氏。其父孟堅、終淮東提舉茶鹽。生三子、槻、桀、棖、又有遺腹。君人物爽邁、天資孝友。幼居母喪、如禮、事所生母袁氏盡敬。學有家法、嘗讀橫渠易、至心化在熟、擊節歎曰、至言也。請終身誦之。雅好吟咏、慕陳後山而學焉。某蒙先生不鄙、間許唱酬、君輒用



韻見貽、語皆驚人、蓋天才有過人者。充其素蘊、必將發聞於世、一病而逝、可哀也已。弟泮、泮及孤奉先生之命、卜以三年夏四月壬辰葬君吉水縣中鵠鄉白蓮塘之原、使以妹壻葉昌嗣之狀來請銘。某按禮記、延陵季子適齊而長子死、葬於贏博之間、既葬而封。既封、三號遂行。孔子曰、季子、吳之習禮者也。蓋言其在吳爲習禮耳。既而曰、季子之於禮、其合矣乎。是又疑之之詞也。周禮以長子爲門子、謂將代父當門者也。其事重矣。昔就其養於所居之官、今返其柩於父母之邦、若先生者可謂知禮矣。銘曰、

木生荆山、既厚其培。雨露濡之、庶幾條枚。飄風振林、秀者先折。天乎奈何、尙茂來葉。

周必大撰 《省齋文稿》卷三二

從事郎監潭州南嶽廟劉君墓誌銘

淳熙十二年夏六月二十三日、從事郎監潭州南

嶽廟建安劉君平甫卒于家。予往哭之再三、其兄子學雅與諸孤學古等遂以墓銘爲請。予初嘗受學于平甫先君子之門、因得與平甫相長大。其後平甫諸兄遊宦四方、平甫多家居不從、以故予於平甫又獨得久相與、於今四十有餘年矣。然予長平甫八九歲、又以勞悴早衰、而平甫優游彊健、雖少年有不及。豈意今乃反哭平甫而遂銘其藏哉。顧與平甫遊最久而知之深莫如予者、不忍辭也。平甫名珙、建之崇安縣人。屏山先生諱子翬之子、而贈太師文安忠顯公之孫也。忠顯公以忠義死國、著名靖康、建炎之間、國史有傳。生三子、長曰寶文、閣直學士、贈少傅諱子羽、而屏山先生其季也。少嘗一仕、爲莆陽郡丞。秩滿、即稱疾奉祠以歸。樂道著書十有七年而卒、其書皆傳世。平甫以少傅公幼子爲之後、補官餘三十年、亦未嘗一日仕州縣。雖其邂逅不遭、事有適相似者、抑其家法之傳



亦有自也。蓋平甫自始仕即爲南嶽祠官、嘗調諸路提點坑冶鑄錢司幹辦公事、福建路安撫司準備差遣、皆未及赴而以省員罷。最後從兄忠肅公強使出爲注官、得邵武軍司戶參軍、則平甫山林之趣已成、不能俛首從吏役矣。亦會忠肅公薨、平甫遂決長往之計、力請諸公復得爲祠官、超然自放以歿其身。蓋其年少時氣甚豪、自再直廢省、即自知其不偶、而先廬屏山之下、前帶潭溪、館宇靚深、竹樹蒙密、顧而樂之、不忍去也。因以暇日廣其觀游、種木疏泉、上下澗谷、竟日不厭。自以爲退隱于家、兼農圃漁樵之役、而隨緣閱世、復善修身、又庶幾古人日損日益之意、則自名其室曰七者之寮、而刻文壁間以志其目。中葬其妻武夷東南十里許、即預卜壽藏其旁。因山田闢臺館以達于溪上、良辰勝日、往來兩山之間、弦琴觴酒、屬客賦詩、其樂雖與人同、而其習聞先君子之遺風餘韻與

夫當世之儒先長者之雅致、泯然有以會於其心而適於其身、至於不知爵祿之可懷、勢利之可悅、則人有所不能及也。天資孝友、事世母慶國夫人及忠肅公甚謹、服其喪皆過禮。嗣主家政、聚族衆多而法度修整、恩意均洽。少有逸才、而不肯事舉子業、賦詩甚敏而工、然亦未嘗深留意也。爲人簡易跌宕、衣冠食飲取具無所擇、而蒐輯先世遺文、軼事纖悉無遺。聚書教子、校讎課督皆有程品。爲州縣董社倉歛散、爲帥司賑貧民舉子者、詢究利病、鈎校簿書、其夙夜之勤、居官者有不及、鄉人德之。而論者於是乃知平甫非漠然無意於世者、於其死也、莫不哀之、以爲使得試用、所立當何如也。平甫娶同郡范氏、直秘閣如圭之女。無子、而撫愛諸子如己出。事慶國夫人孝愛尤篤、苟可以已其疾、雖體膚無所愛也。先平甫十六年卒。平甫有六男七女、學古、迪功郎、泉州同安縣主簿。學博、將仕

郎學圃、尙幼。而學正、學箕、學稼皆出爲諸兄後。其次女亦嫁而夭云。平甫卒時年四十八、葬以是歲十二月十二日、墓在范夫人塋東十有八步。其銘曰、  
嗚呼平甫。寧其材之不信、而不忍其志之詘也。寧其躬之不燕、而不忘其鄉之卹也。慢亭之南、其川瀟淪、岡嶠萃也。生樂其遊、死銘其丘、彌百世而不歿也。

朱熹撰 《晦庵先生朱文公文集》卷九二

### 陳叔向墓誌銘

叔向名葵、姓陳氏、處州青田人。父彥成、宜教郎致仕。君第進士、莆田主簿、攝尉、盜獲、法應改官、君歎曰、彼罪且死而吾利之耶。簿緣故例掌僧租、僧遺簿米有定數、囊山一寺至六十石。簿得之安、君一掃絕。教授婺州。教官歲取錢米於學、取職田於東陽縣數百千、君別藏之、爲諸生市書、略具焉。又教

南外睦宗院。趙丞相知福州、君謂趙公未知道、指告提耳、累千餘言、併以崇飲飾游爲戒。趙公矍然受規。薦審察、授淮南運幹。方議修石梁瓦梁堰、君言、今果行此、則真滁和涵浸失業、濠光安豐怨不保護。六郡體大、備圍當別求。事遂格。運司交幣將半而虜主卒、北人要君改服。君止不渡淮。或勸姑聽許、君曰、漕檄令輸銀絹耳、無預弔卹。必若改服、須奏聞也。虜不能奪、竟常服而畢。知平陽縣。號爲劇煩、君臨以至誠、適緩急之中、史民畏悅。紹熙五年正月五日卒官、年五十六。夫人洪氏、後十四年卒。子志仁、志義。五女、嫁者鄉貢進士洪緯、康伯起、太學生劉之海、之海死、迪功郎監海鹽買納場席葆。慶元四年十二月甲申、葬永嘉縣三洲臺湖山。乾道淳熙中、問學日盛、士梯山棧谷、自力於善。君仕不希舉、有輒推其僚。事父孝謹、宣教君病、不解衣數月。兄弟相愛友、門內諧樂、無疾聲遽色。祭廟



以主合族以宗行義修內外完彬彬乎一鄉之和也。有吉人良士之實矣。君既與魏益之游。每恨志慮昏而無所明。記憶煩而不足賴。益之因教以盡棄所懷。獨立於物之初。未久。忽大悟。洪纖大小高下曲直。皆髣髴若有見焉。自是以師道歸益之。且

疑呂伯恭誦書徒多。朱元晦修方不療。時呂公已下世矣。朱公雖論未合。然重其調直無隱。士有比君所者。必使往從之。曰。可以寡過也。昔孔子稱憤啓悱發。舉一而返三。而孟子亦言充其四端。至於能保四海。往往近於今之所謂悟者。然仁必有方。道必有等。未有一造而盡獲也。一造而盡獲。莊佛氏之妄也。叔向培包蒙之鑰。遊於廣大。而常自言用功益難。進道愈遠。古人今人皆未可輕議。其勵志勇猛。蓋不以悟自足也。而益之不然。獨守其悟。而百聖之戶庭虛矣。然則叔向之所以異於其師者。益之亦未暇詳也。二君死餘二十年。余復老病。

追念往事。悲慨無已。銘曰。

履卑而行尊。言約而義富。經術修明。表裏純茂。美玉精金。宜在清廟。此趙公薦叔向之美也。叔向之劇拂趙公如彼也。趙公之敬聽叔向如此也。嗚呼。能用功名顯。有以也。

葉適撰 《水心文集》卷一七

篤孝傳公墓誌銘

公諱脩。字子期。豫章進賢人也。曾祖俊。祖安民。建炎中以收逆賊補官進義校尉。父時中。從政郎。爲宣撫岳公賓客。母胡氏。生於紹興己未。以開禧丁卯六月丙午卒于正寢。將以嘉定元年十有二月癸酉葬于所居之南荷田源。是歲十月。公季子塘走臨川。謁公之友長樂黃榦。泣而言曰。塘嘗侍先人師晦菴先生而友吾子。今不幸棄諸孤。葬有日。生平之梗槩。託以不朽者。先生歿矣。子何說之辭。榦謝不敏。又泣曰。德與位。世所有也。先人之友莫



子若也。子何說之辭。發其書讀之。公剛方質直。孝友信義行於家庭。著於閭里。天資敏悟。不樂時學。少習輒棄去。端坐一室。左右圖史。持身斬斬無違行。接親族有恩。賙人之急常恐不及。凡公之性行皆可述如此。而於事親尤篤。飲食起居未嘗頃刻忘。嘗遊蕪湖。一夕有感而歎曰。吾親其有疾乎。旦即馳歸。千里不數日而至。從政公既葬。去家一舍。每一念至。即馳往。裴回信宿而後反。庚申之春。榦嘗侍坐於晦菴先生之側。有麻經菅履扶服而前者。貌不勝衣。言不能出諸其口。問其姓名。則公也。先生方與諸生習禮於武夷之下。愛其賢。書其所攜從政公之事狀曰。予觀其冠履應禮。而戚容與之稱。言詞懇懇。情旨酸辛。爲惻然動心焉。坐者無不加敬。未幾先生沒。明年。且葬。柩行。公悵悵而來。且號且拜。俯伏於道。若將隕焉。送葬者重爲之垂涕。方是時。僞學之禁嚴。縉紳耻言學。學者更名它

師。至有吊賻不及門者。公獨毅然不遠千里。哀號痛慕若此。公誠孝人也。以其愛親者施之師。由是充之。則凡子塘之所述。皆可信不疑也。嗚呼。道之不明久矣。諸老先生迭起力扶之。習俗日薄。學者不能盡通其師之意。小廉曲謹。不足以救大本之差。博聞多見。適足以爲實行之累。顧使阿世之徒。得以藉口。濟其爲姦之術。而斯文日以堙晦。今諸老先生既沒。如公之篤實躬行者。亦復相繼而逝。是豈不重哀也夫。公娶張氏。子三人。夢得。夢與。瑋。業進士。瑋嘗與鄉貢。皆篤信好學。有父之遺風焉。女四人。長適修職郎。前筠州主簿趙汝儔。次適待補太學生王大年。次適進士周士珍。孫男女十四人。男謙。巽。觀。咸。益。渙。女長適漕貢進士趙師櫓。次未行。榦既謝不獲。遂次公之行而爲之銘。銘曰。學之大。先人倫。行有實。豈其文。參也魯。以孝聞。一唯間。策奇勳。嗟後世。胡紛紜。毋他求。視茲墳。

黃榦撰《勉齋先生黃文肅公文集》卷三五

校記

①弔：原作「予」，據四庫本《誠齋集》改。

②公：原作「云」，據右引改。

③進：原作「遞」，據右引改。

④弔：原作「予」，據右引改。

⑤藏：原作「藏」，據右引改。

⑥差：原作「差」，據右引改。

⑦貳：原作「實」，據右引改。

⑧其：原作「甚」，據右引改。

⑨可：原脫，據右引補。

⑩「公」下原衍「公」字，據右引刪。

⑪亟：原作「丞」，據右引改。

⑫待：原作「侍」，據右引改。

⑬主：原作「十二」，據右引改。

⑭功：原脫，據右引補。

⑮麻：原作「府」，據右引改。



宋儒

⑯雀：原作「省」，據右引改。

⑰帥：原作「師」，據右引改。

⑱彼諗：原脫，據右引補。

⑲誓：原作「勢」，據右引改。

宋儒碑傳集卷一百四十七

陸九淵 沈煥 崔敦詩

象山先生行狀

先生姓陸、名九淵、字子靜。其先媯姓、至齊宣王少子元侯諱通、始封平原般縣陸鄉、因以爲氏。曾孫諱烈、爲吳令、子孫遂爲吳郡吳縣人。自吳令四十七世爲唐宰相文公諱希聲、是爲先生八世祖。七世祖諱崇。六世祖諱德遷、五代末避地於撫州金谿。高祖諱有程、曾祖諱演、並以學行重於鄉里。祖諱戩。父贈宣教郎諱賀、生有異稟、端重不伐、究心典籍、見於躬行。酌先儒冠昏喪祭之禮、行之家、家道之整、著聞州里。母孺人饒氏、生六子、先生其季也。先生幼不喜弄、靜重如成人。三四歲時、常侍宣教公行、遇事物必致問。一日忽問天地何所窮際、宣教公笑而不答、遂深思至忘寢食。角總經夕不脫衣履、有敝而無壞、屨至三接。手甲甚修、足跡未嘗

至庖廚。常自掃灑林下、宴坐終日。立於門、過者駐望稱歎、以其端莊雍容異常兒也。五歲讀書、紙隅無捲摺。六歲侍親、會嘉禮、衣以華好、卻不受。季兄復齋、年十三、舉禮經以告先生、廼受。與人粹然樂易、然惡無禮者。讀書不苟簡、外視雖若閒暇、而實勤於攷索。伯兄總家務、常夜分起、必見先生秉燭檢書。伊川近世大儒、言垂於後、至今學者尊敬講習之不替。先生獨謂某曰、卯角時聞人誦伊川語、自覺若傷我者。亦嘗謂人曰、伊川之言奚爲與孔子、孟子之言不類。初讀論語、即疑有子之言支離。先生生而清明、不可企及、有如此者。他日讀古書、至宇宙二字、解者曰四方上下曰宇、往古來今日宙、忽大省曰、宇宙內事乃己分內事、己分內事乃宇宙內事。又嘗曰、東海有聖人出焉、此心同也、此理同也。南海北海有聖人出焉、此心同也、此理同也。千百世





之上有聖人出焉、此心同也、此理同也。千百世之下有聖人出焉、此心同也、此理同也。乾道八年登進士第。時考官呂祖謙能識先生之文於數千人之中、他日謂先生曰、未嘗款承足下之教、僅得之傳聞。一見高文、心開目明、知其爲江西陸子靜也。其始至行都、一時俊傑咸從之遊。先生朝夕應酬答問、學者踵至、至不得寐者餘四十日。所以自奉甚薄、而精神益強。聽其言、興起者甚衆。還里、遠邇聞風而至、求親炙問道者益盛。先生既受徒、即去。今世所謂學規者、而諸生善心自興、容體自莊。雍雍于于、後至者相觀而化、猗歟盛哉。真三代時學校也。有一生飯次微交足、飯既、先生從容問之曰、汝適有過、知之乎。生略思曰、已省。先生曰、何過。對曰、中食覺交足、雖即改正、亦放逸也。其嚴如此。先生深知學者心術之微、言中其情、或至汗下。有懷於中而不能自曉者、爲之條析其故、悉如其心。亦

有相去千里、素無雅故、聞其大概而盡得其爲人。嘗有言曰、念慮之不正者、頃刻而知之、即可以正。念慮之正者、頃刻而失之、即爲不正。有可以形跡觀者、有不可以形跡觀者。必以形跡觀人、則不足以知人、必以形跡繩人、則不足以救人。又曰、今天下學者唯有兩途、一途朴實、一途議論。嗚呼、至哉。足以明人心之邪正、破學者之窟宅矣。嘗攻切問者之疵、問者不領、惡聲輒至。旁觀不能堪、而先生悠然從容、乃及他事。淳熙元年、授迪功郎、隆興府靖安縣主簿。未上、丁繼母太孺人鄧氏憂。服闋、調建寧府崇安縣主簿。八年、少師史公浩薦先生之辭曰、淵源之學、沈粹之行、輩行推之、而心悟理融、出於自得、得旨、都堂審察、陞擢、不赴。九年、侍從復上薦、除國子正。諸生叩請、孳孳啓諭、如家居教授、感發良多。十年冬、遷敕令所刪定官、同志之士相從講切不替。僚友多賢、相與問辨、大信服。先生自

少時聞長上道靖康間事慨然有感於復讎之義。至是遂訪求智勇之士與之商榷益知武事利病形勢要害人物短長。十一年當輪對期迫甚猶未入思慮所親屢請久乃下筆繕寫甫就厥明即對上。屢俞所奏。脩寬恤詔令書成有旨改承奉郎。十三年轉宣義郎。親朋謂先生久次宜求去。先生曰。往時面對粗陳大義明主不以爲非。然條貫靡竟統紀未終思欲再望清光少自竭盡以致臣子之義。距對五日除將作監丞。後省疏駁得旨主管台州崇道觀。先生既歸學者輻輳愈盛。雖鄉曲老長亦俯首聽誨言稱先生。先生悼時俗之通病啓人心之固有咸惕然以懲躍然以興。每詣城邑環坐率一二百人至不能容徙觀寺。縣大夫爲設講坐於學宮聽者貴賤老少溢塞塗巷從游之盛未見有此。貴溪有山實龍虎之本岡先生登而樂之結茅其上山高五里其形如象遂名之曰象山自號

象山翁。四方學徒復大集至數百人從容講道詠歌怡愉有終焉之意於是人號象山先生。十六年祠秩滿今上登極除知荆門軍。是年轉宣義郎又轉奉議郎。紹熙二年九月初領郡事吏以故例白內諸局務外諸縣必有揭示約束接賓受詞分日先生曰安用是。延見僚屬如朋友推心豁然論事惟理是從。先生家書有云每一同官稟事衆有所見皆得展其所懷辯爭利害於前。太守惟默聽俟其是非既明乃從贊歎以養其徇公之意。太守所判僚屬卻回者常有之。先生教民如子弟雖賤隸走卒亦諭以理義。接賓受詞無早暮下情盡達無壅。故郡境之內官吏之貪廉民俗之習尙忠良材武與猾吏暴強先生皆得之於無事之日。往時郡有追逮皆特遣人先生惟令訴者自執狀以追以地近遠立限皆如期即日處決輕罪多酌人情曉令解釋。至人倫之訟既明多使領原詞自毀之以



厚其俗。惟怙終不可誨化。乃始斷治。詳其文狀。以防後日反覆。久之民情益孚。兩造有不持狀。惟對辯求決。亦有證者不召自至。問其故曰。事久不白。其約求明。或既伏。俾各持其狀去。不復留案。嘗夜與僚屬坐。吏白有老者訴甚急。呼問之。體戰言不可解。俾吏狀之。謂其子爲羣卒所殺。先生判翌日呈。僚屬難之。先生曰。子安之。不至是。凌晨追究其子。蓋無恙也。人益服先生之明。有訴遭竊脫。而不知其人。先生自出二人姓名。使捕至。訊之。伏辜。盡得所竊物還訴者。且宥其罪。使自新。因語吏曰。某所某人尤暴。吏亦莫知。翌日有訴遭奪掠者。即其人也。乃加追治。吏大驚。郡人以爲神。初。保伍之制。州縣以非急務。多不檢覈。盜賊得匿藏其間。近邊尤以爲患。先生首申嚴之。姦無所蔽。有劫僧廬。鄰伍遽集擒獲。不逸一人。至是羣盜屏息。荆門素無城壁。先生以爲此自<sup>②</sup>古戰爭之場。今爲次邊。在江

漢之間。爲四集之地。南捍江陵。北援襄陽。東護隨。郢之脅。西當光化。夷陵之衝。荆門固。則四鄰有所恃。否則有背脅腹心之虞。由唐之湖陽以趨山。則其涉漢之徑。已在荆門之脅。由鄧之鄧城以涉漢。則其趨山之道。已在荆門之腹。餘有間途淺津。坡陀不能限馬。灘瀨不能以濡軌者。所在尙多。自我出奇制勝。徼敵兵之腹脅者。亦正在此。雖四山環合。易於備禦。義勇四千強壯可用。而倉廩藏庫之間。麋鹿可至。累政欲脩築子城。憚重費不敢輕舉。先生審度決計。召集義勇。優給傭直。躬自勸督。役者樂趨竭力。工倍二旬。訖築。初計者擬費緡錢二十萬。至是僅費緡五千而土工畢。後復議成砌三重。置角臺。增二小門。上置敵樓。衝天渠。荷葉渠。護險牆之制畢備。纔費緡錢三萬。又郡學貢院。客館。官舍。衆役並興。初俗習惰。人以執役爲恥。吏惟好衣閒觀。至是風一變。督役官吏布衣雜役夫佐力。

相勉以義、不專以威。盛役如此、而人情晏然、郡中恬若無事。荆門兩縣置壘、事力綿薄、連歲困於送迎、藏庫空竭、調度倚辦商稅。先是、日差使臣暨小吏伺商人於門、檢貨給引、然後至務、務惟據引入稅、出門又覆視。官收無幾、而出入其費已多。初、謂以嚴禁權杜姦弊、而門吏取賄、多所藏覆、禁物亦或通行。商苦重費、多由僻途、務入日縮。先生罷去之。或曰、關<sup>③</sup>譏所以防姦、列郡行之以爲常、一旦罷廢、商冒利、必有不至務者。先生曰、是非爾所知。即日揭示、俾徑至務、復減正稅、援例。是日稅入立增。有一巨商已遵僻途、忽聞新令、復出正路。巡尉卒於歧捕之、先生詰得其實、勞而釋之。巨商感涕、行旅聞者莫不以手加額、誓以毋欺。私相轉告、必由荆門。旁觀者詰其故、商曰、罷三門、引減援例、去我輩大害、不可不報德。稅收增倍、酒課亦如之。荆門故用銅錢、後以近邊、以鐵錢易之。銅錢有禁、而民

之輸於公者、尙容貼納。先生曰、旣禁之矣、又使之輸、不可。即蠲之。又減鈔錢、罷比較、不遣人詣縣。給吏札、置醫院。官吏民咸悅、而郡吏亦貧而樂。獄卒無以自給、多告罷。先生以僚屬訪察得其實、遂廩給之。朔望及暇、日詣學講誨諸生。郡有故事、上元設齋醮黃堂、其說曰爲民祈福。先生於是會吏民講洪範、斂福錫民一章、以代醮事。發明人心之善、所以自求多福者、莫不曉然。有感於中、或爲之泣。湖北諸郡軍士多逃徙、視官府如傳舍、不可禁止。緩急無可使者。先生病之、乃信捕獲之賞、重奔竄之刑。又數閱射、中者受賞。役之加傭值、無飢寒之憂。相與悉心弓矢、逸者絕少。他日兵官按閱、獨荆門整習、他郡所無。先生平時按射不止於兵伍、郡民皆得而與、中亦同賞。薦舉其屬不限流品、嘗曰、古者無流品之分、而賢不肖之辨嚴。後世有流品之分、而賢不肖之辨略。先生之家居也、鄉人苦旱、



羣禱莫應、有請於先生。乃除壇山巔、除已、雲交、及致禱、大雨隨至。荆門亦旱、先生每有所祈、必疏雨隨車、郡民異之。治化孚洽、久而益著。既踰年、笞箠不施、至於無訟。相保相愛、閭里熙熙、人心敬向、日以加厚。吏卒亦能相勉以義、視官事如其家事。識者知其爲郡有出於政刑號令之表者矣。諸司交章論薦、丞相周公必大嘗遺人書、有曰、荆門之政、於以驗躬行之效。三年冬十一月、語女兄曰、先教授兄有志天下、竟不得施以沒。女兄蠹然。又嘗謂家人曰、吾將死矣。或曰、安得此不祥語、骨肉將奈何。先生曰、亦自然。又告僚屬曰、某將告終。先生素有血疾、居旬日大作、實十二月丙午。越三日、疾良已、接見僚屬、與論政理如平時。晏息靜室、命掃灑焚香、家事一不掛齒。庚戌禱雪、辛亥雪驟降。命具浴、浴罷、盡易新衣、幅巾端坐。家人進藥、先生卻之。自是不復言。癸丑日中、奄然而卒。郡屬棺斂竭誠哭、

哀甚。吏民哭奠、充塞衢道、各有辭以叙陳痛戀之情。柩歸、門人奔哭會葬以千數。郡縣於其講學地爲立祠。先生遺文、諸生已次第編紀。先生生於紹興九年二月乙亥、享年五十有四。娶吳氏、封孺人。二子、持之、循之。女一。明年十有一月壬申葬於鄉之永興寺山、距妣饒氏孺人墓爲近。先生之道至矣大矣、某安得而知之。惟某主富陽簿時攝事臨安府中、始承教於先生。及反富陽、又獲從容侍誨。偶一夕、某發本心之問、先生舉是日扇訟是非以答。某忽省此心之清明、忽省此心之無始末、忽省此心之無所不通。某雖凡下、不足以識先生、而於是亦知先生之心非口說所能贊述。所略可得而言者、日月之明、先生之明也。四時之變化、先生之變化也。天地之廣大、先生之廣大也。鬼神之不可測、先生之不可測也。欲盡言之、雖窮萬古不可得而盡也。雖然、先生之心與萬古之人心一貫無二。

致學者不可自棄。紹熙五年二月十有六日、門人奉議郎知饒州樂平縣、主管勸農公事楊某狀。

楊簡撰 《慈湖先生遺書》卷五

通判沈公行狀

曾祖開、故不仕。妣趙氏。祖子霖、惠州博羅主簿。妣應氏。父銖、承務郎、簽書鎮東軍節度判官。母太孺人孫氏。君諱煥、字叔晦、四明沈氏也。世居定海、中徙鄞。自君之祖主簿公、經行修明、恬于仕進、鄉里高其節。考簽判府君嘗聞道于焦先生、授指伊洛、忠信孝友、克紹先德、後進皆師尊之、而沈氏之門益大。隆于教子、諸子皆修飭有聞、而君尤偉特、有大志。自始知學、潛心經籍、精神靜專、未嘗驚于末習。既冠成人、尤奮勵自強、慨然有追蹤古人、主盟當世之心。頎而美髯、偉儀觀、尊瞻視、音吐鴻暢、羣居鄉校、以嚴見憚。屬辭有典則、清遠雄麗、務以義理自勝、不類舉子語。年二十四、鄉舉第二。明年、監

補第一。又四年、遂以行藝優諸生。時師友道喪、雖首善之地、合席同筆硯、鮮有講磨之功。君勇于進、修不主先入。始與臨川陸公子壽爲友、一日盡舍所學、以師禮事焉。陸公極稱君志氣挺然、有任道之質。君益自信、晝夜鞭策、有進無退。求友如不及、潛觀密察、至有頽然衆中、不自矜衒、人莫之識、而推之爲不可及者。囊空無資、冬或不絮、忍窮勵志、惟講習爲急。既與諸賢定交、又以諗後來者。此天子學校、英俊所萃、吾曹生長偏方、見聞固陋、不以此時資明師畏友、郭然開之、何由自知不足。前無堅敵、短兵便爲長技、大可懼也。聞者悚惕、因君以交諸賢。五六年間、朋從日盛、相與講明立身之要、務本趨實、爲不朽計、皆自君唱之。乾道五年、試藝南宮、主文自汪公應辰以下、皆一時鉅儒、奏君名第二。君忠義天挺、勇不顧利害、危言切論、指陳闕政、無隱。居次甲、授迪功郎、紹興府上虞縣尉、待次



里中益講學不倦。自以資稟剛勁、非所以歡庭闈、痛自砭劑、大書祭義深愛和氣、愉色婉容、數語于寢室之壁、日省觀焉。嬰兒之慕、不忘其初、深以嚴威儼恪爲戒。簽判公每對賓客、君常拱立其旁、侍酒則竟席不敢去、小不合意、嚴誨飭之、不以年長故假借。父子自爲師友、講論道義、閨門肅雝。士益信而歸之、門人弟子決疑請益者、自遠而至。啓告簡嚴、渠燠端肅、初若不可親、已而昏者明、柔者立、鄙吝者意銷、中心悅服。師道益尊。尉曹三年、不卑其官、端居終日、雖隆冬酷暑不少懈、砥礪名節、無秋毫私。增葺學舍、訓導有法。馭下嚴紀律、毋得輒至鄉井、不得已而遣、期以某日某時反命、毋敢蹉跌。訪求版籍、得之胥史家、曰是政本也、而此曹私之、不謹隄防、何以經久。則鐫而藏諸榜、其庫曰經界、而歸權于其長、有所閱視、宰必關尉、尉必請于宰、始得啓封。約束堅明、吏姦莫措、邑人賴之。聲望

藹然、舉薦相屬、固辭不受。或稱之政府、諷使來見、卒無所詣。調揚州州學教授、未上、除太學錄、時淳熙八年春也。自成均造士、浸失古意、官其間者、率皆安靜養名、少所設施、賓接有時、物情頗隔。君始至、則延諸生、日與周旋、見者不以蚤暮、遂欲整齊宿弊、稍修教養法、士爭歸之、而長官始不樂矣。先是、舍法取士、行藝優劣、一決于試、撥其尤者、使職于學。君欲參以譽望、司業難之、君持議如初。會考試、殿廬唱第之日、有司俟命于廷、壽皇熟視偉君、遣中貴人詢名氏及官、有簡記意。丞相復稱君居官匪懈、以風切其餘。忌者滋多、君介然自若。或謂君姑安而職、何行道爲。君太息曰、道與職豈有二哉。因發策諸生、稱孟子之言曰、立乎人之本朝、而道不行、恥也。今赧然愧于中者、可無其人乎。詞旨頗切、不知者以爲訕己、相與媒孽、其言紛紛、御史惑焉、遂論君與長官爭議、非安靜者、宜少抑之。養



其器業異時拔用未晚。君方會食監中、聞命不驚、食罷夷然、叙別而出、謂其友曰、吾豈不知詭隨苟容、自取光寵哉。吾朝夕兢兢、淪胥是憂、故不爲也。不愧友朋、去無所恨。在職纔八十日、有旨補外、得高郵教官闕。明年、丁簽判公憂、服除、幹辦浙東安撫司公事。久之、始以年勞進秩、上距解褐十有八年。帥屬少事、同列頗以閒冷自逸、君曰、設官分職、安有閒冷者。翼贊其長、心所未安、懇懇忠告、省閱案牘、如處要職、下至場務宿弊、悉革去之。作永思陵、百司次舍、供帳酒肉之需、州縣奉承不暇。君以爲國有大戚、而臣子宴樂、飲食自如、安乎。亟言于帥、帥屬君條奏、且表薦爲修奉官。君復移書御史、修奉大事、宜先治喪紀、喪紀著明、人心曉然、知君上典禮之重、貪求自息、科擾自戢、可不煩彈治而肅。御史深然之。帥去官、君亦辭修奉。後帥至、復委以按察。君直道而行、械吏之並緣爲姦者、而還其

科率之不當者、人情按堵。是歲旱荒、領常平者以上虞、餘姚二邑隸君賑救、躬履阡陌、人人撫之、詢戶口、察顏色、飾貌者逡巡自退、而饑民皆遺之食、迄無流移。部使者才之、亟剡奏稱君治行、帥露章獨薦尤力、侍從亦舉君自代。章合上、壽皇猶憶其風度曰、是向爲學官、人物甚偉者乎。將召用之、媚嫉者復至、而左丞相旣家居矣、小人無計沮君。疇昔所與有欲自明其非黨、且因用君名、作爲黨論、復列其圖爲三、疏士大夫三十四人姓名于下、某已去、某猶在、己不與焉、而謂君爲之、欲激衆怒、合謀并力、以梗其入。謗語果喧、有一從班以百口保君、明其不然者、遂稍息、終不復召。秩滿、改宣教郎、知徽州婺源縣。君有高名、臺閣羽儀之選、善類素推之、而自學省下遷、及是累歲、顧滯于銓調、視往時同列、邈不可跂、公論以爲屈。由是丞相合前後薦君者數奏、力陳于上、始有陞擢之命、通判舒州。



該皇上登極恩、轉奉議郎、賜緋衣銀魚。家故清貧、敝廬數間、隘不可居、隨所寓止。性輕財、常誦李趙公之言曰、錢盡再來、幾事一失、不可復得。室無私蓄、辭受取舍、雖小必謹。嘗游中都、浙西帥雅聞君名、而知其貧、欲饋之豐、因所厚者言之。君曰、受則傷義、拒則違俗、以既歸告之、其可。即日出郊。官會稽時、故人典方面者、贈以白金、君反之曰、向也閒居、賜何敢辭。今祿矣、義無兼受。資用屢竭、廉約自守、意氣軒豁、未嘗有悴色、口不言貧、不知君者、雖謂之不貧可也。奉母謹甚、左右無違、日進甘脆、間爲宴集、以歡樂之。與弟友愛深篤、倡率妻孥、撫養孤侄、恩意隆洽、略無少間。故人孤女寡甚、聘以爲冢婦、富室欲聯姻、諸子請之勤勤、卒拒不許。鄉閭有喪不時舉、女孤不嫁者、念無以助、聞會稽有義田、惠浹窮乏、其稱甚美、乃請于鄉老、鄉大夫爲之表倡、二公欣然意合、果于集事。以君鄉評所推、屬

所以諷諭者、君不憚勞苦、告諭諄諄、誠意孚格、樂助者甚衆。未幾、得田數百畝、儲峙有所、職掌有人、出納有法、毋苟求、毋徇私、必核其實、品量多寡、用而不匱。有餘、益市膏腴、愈久愈多、其惠愈博。鄉人義之、咸曰、此無窮利也。規約甫立、而君則病矣。病日侵、猶自整厲、不改其度。與朋友別、惟以母老爲念、善類凋零爲嘆。嗚呼、可哀也已。得年五十三。紹熙二年四月戊寅、終于寓舍。十二月丁酉、葬于縣之翔鳳鄉象坎山龍尾之原。配楊氏、祔焉。楊氏有賢行、順于舅姑、和于娣姒、叔妹、而相夫子以禮、甚柔而正。時有規切語、君每謂之良友。卒于淳熙己亥之歲。君深悼之、擇可爲繼室者、難其人。吏部郎中豐公誼、清敏之孫、能世其家者、故與君相知深。曰、吾長女可配君子。遂以歸之。子男四、傳曾、魯曾、省曾、敏曾。女四、長適舒鉞、次許嫁呂喬年、餘幼。自君之沒、朋友親故哭之皆慟、四方賢士大夫識與

不識咸爲世惜之、此豈一日之積哉。考其平生大節、寧終身固窮獨善、而不肯苟同于衆。寧齟齬與時不合、而不肯少更其守。凜然清風、震聳頽俗、使時見用、必能振朝廷之綱、折姦回之萌、屹立中流、爲世砥柱、亦可謂難矣。然世之知君者、如此而已。至于日進其德、駸駸焉自期于純全博大者、鮮能知之。雖人品高明、而其中未安、不苟自恕、嗜學如飢渴、考察精密。其爲言曰、晝觀諸妻子、夜卜諸夢寐、兩者無愧、始可以言學矣。知非改過、踐履篤實。其始面目嚴冷、清不容物、久久寬平、可敬可親。面攻人之短、退揚人之善、切磋如爭、歡愛如媚、古所謂直而溫、毅而弘者、殆庶幾乎。篤愛其親、以曾子爲法、而復以名諸子、以孝謹爲家傳。沈氏其未艾矣。始居家塾、非聖哲書、未嘗誦習、及游太學亦然。嘗作詩箴其友曰、爲學未能識肩背、讀書萬卷空亡羊。每稱陶靖節讀書不求甚解、會意欣然忘食、

此真善讀書。史籍傳記、采取至約、後與東萊呂公伯仲極辨古今、始知周覽博考之益。凡世變之推移、治道之體統、明君賢臣之經綸事業、孳孳講求、日益廣深。君子以是知君胸中之蘊、有足以開物成務者矣。終身沈于下位、而聲名流于四方、抑之愈高、困之愈堅、死且不隕、是豈偶然。嗚呼、其可敬也夫。諸孤將求銘、以詒之無窮、故爲之叙述其本末、雖無能發明、要摭實、非溢美、貴其可信而已。惟當世篤論君子擇焉。謹狀。

袁燮撰 《繫齋集》卷一四

通判舒州沈君煥墓碣

紹熙三年正月戊寅、沈君叔晦卒、十二月丁酉葬慶元府鄞縣翔鳳鄉象<sup>⑤</sup>坎山龍尾之原、凡四方知名士皆來弔祭、而全州守楊<sup>⑥</sup>簡、太學正袁燮又<sup>⑦</sup>諏鄉評、誌壙狀行實、授其子來請銘。追思立朝不能推賢揚善、予愧叔晦。益者三友、叔晦不予愧也、



銘可已乎。按沈氏世家定海縣已而徙鄞。曾祖開祖子霖經明行修主惠州博羅縣簿。父銖力以道義教子終承務郎簽書鎮東軍節度判官廳公事。君諱煥叔晦字也。少而奇偉年二十四舉於鄉監補魁多士。乾道五年省試第二以右迪功郎尉紹興府上虞縣。鄉村不識胥徒境無犬吠警吏匿經界籍爭訟紛然令檄追證君拘籍鐫之操驗稽決積弊以革。淳熙四年調揚州州學教授未上八年春詔爲太學錄始君爲生員即語人曰天子學校當隆師親友循規蹈矩以倡郡國。知臨川陸九齡子壽之賢從而學焉見聞日廣朋從趨向悉歸於正。既列學官則以昔所躬行淑諸人早暮延見學者聲譽日章長貳同僚已懷媚嫉會充殿試考官唱名日序立廷下孝宗偉其儀觀遣內侍問姓名衆滋忌之而君益侃侃自將或勸其姑營職耳道未可行也。君曰道與職二乎適私試發策引孟子

立乎人之本朝而道不行耻也意似有所諷言路方以安靜爲大體疑其訕也摘君與長官爭議丐少折之在職纔八旬得高郵州教授而去茲可觀過矣。明年丁父憂服闋選充浙東安撫司幹辦公事用舉主升從政郎高宗山陵越帥鄭侍郎汝諧奏充修奉官君移書御史請明示喪紀本意使貴近哀戚之心生則芟舍菲食自安不煩彈劾須索絕矣。後司張尙書杓來復委之檢察君治並緣爲奸者追賞率斂者支費頓減歲旱常平使者分擇官屬拯恤君得上虞餘姚二縣無復流殍諸司交薦十五年用常格改宣教郎知徽州婺源縣三省類薦書以聞上猶簡記許申擢通判舒州將用之也。光宗覃恩轉奉議郎賜緋衣銀魚歸溪官期益篤爲己之學天性孝敬父在時每對客必拱侍燕集竟席乃退晚奉母尤至誠頗疑性過剛大書戴記深愛和氣愉色婉容於寢室以自警友愛其

弟撫養孤姪。家雖貧、一毫不敢假於人、甘旨之奉獨豐、人疑不貧也。聞會稽創義田、凡吉凶有力不給者、伙助有差、即白鄉貴效之、得田數百畝、月增歲益、遂爲無窮之利。既病、猶不廢書、孜孜以人才國事爲言。昔曾子論弘毅之士、仁爲己任、死而後

已。孟子謂明善以誠身、誠身以悅親、悅親以信友、信於友乃獲於上。若吾叔晦、所謂任重而道遠、誠其身以獲乎上者、非耶。自阨間言、其志既益堅、不幸五十三而沒。使天假之年、成就豈易量哉。雖然、芝蘭當戶、鋤之者人也。雷風振林、直木斯拔、茲豈人乎。天道難言、予復何咎。既序且銘、哀而不怨、亦叔晦之志也歟。君先娶楊氏、有賢行、前一紀卒。豐清敏公孫吏部郎中誼復、以長女配之。四男、傳曾、魯曾、省曾、敏曾、皆傳父業。魯曾今名杰、用宗蔭爲迪功郎。四女、長適舒鈺、次適呂喬年、胡籲、次許嫁李知至、俱名門也。孫男一、嗣隆。孫女一、尙幼。家藏

五卷、大率仁義之言。銘曰、

嗟我叔晦、行高才全。學富於海、道直如弦。秀出周行、頎而儼然。惟皇側席、伊誰忌前。可抑者進、胡奪斯年。命實使之、彼何誅焉。未嘗尤人、矧豈怨天。其事好還、後當邈綿。

周必大撰 《平園續稿》卷三八

### 定州沈先生傳

沈先生煥字叔晦。自定海徙鄞。偉儀觀、尊視瞻、音吐鴻暢。羣居鄉校、以嚴見憚。入太學、行藝優諸生。始與臨川陸先生九齡爲友、一日盡舍所學、以師禮事焉。晝夜鞭策、求友如不及、務本趨實、不自矜衒。每語人曰、當隆師親友、循規蹈矩、以倡郡國。第進士、講學不倦。自以資稟剛勁、非所以歡庭闈、大書深愛和氣、愉色婉容、數語於壁、日觀省焉。門人弟子決疑請益者、自遠而至、啓告簡嚴、昏者明、柔者立、鄙吝者意消、中心悅服。師道益尊。爲大學錄、

修教養法、士爭歸之。不肯詭隨苟容以取光寵、遂補外、終於舒州通守。先生非聖哲書未嘗誦習、與朱文公、呂成公問辨、凡世變之推移、治道之體統、明君賢臣之經綸事業、孳孳講求、日益深廣。追贈直華文閣、特諡端憲。

王應麟撰 《深寧先生文抄摭餘編》卷一

中書舍人兼侍講直學士院崔公墓誌銘

上乾道九年、思得文學之臣以視草、司詔令、惟翰林學士品秩甚崇、雖或假攝、亦必侍從、將擇庶僚之俊異者、寓職玉堂、以作古貽後世。于是詔左宣教郎、秘書省正字崔公敦詩、首爲翰林權直。公通州靖海人也、少年中進士科、早有文名。用薦者入館閣、所爲制詞、一出溫潤詳雅、明白有體要、衆以驚嘆。兼崇政殿說書、兼權給事中、而公以封駁之重、資望未稱辭焉。上益嘉重其名。明年十一月、以父憂去位。未除喪、復遭內艱。淳熙之五年、翰林學

士今知樞密院周公子充屢請補外、上以爲難其人。一日中批以問舊嘗薦公吏部尙書韓某曰、崔某今安在。然後知公之眷未忘、且復用矣。某因具言、公連有家難、適外除、陛下用之、此其時也。既召見、即言、國家治否、係公論廢興。公論者、衆心所在、理之當然、乃天道也。願明詔大臣、施舍廢置、務合于此。上稱善。除樞密院編修官、後爲權直。公既拜命、從容言曰、翰林院者、自唐以來、醫卜技術皆預直也。至開元別置學士院、則專待儒臣。今泛然以翰林權直爲名、固不能稱。所懼聖朝官名未正爾。上悟、即更爲學士院權直。遷著作郎、兼權吏部郎官、又兼崇政殿說書。公具辭曰、銓曹事劇、非文字講說所可兼也。未幾、進國子司業、改權直學士院。八年九月、拜中書舍人、加侍郎、直學士院。公賦性端厚、議論疏通、知大體。始以固人心、振士氣爲言、且謂監司、郡守以蠶厲之威爲強、以敏給辦事爲



儒藏

能詞訟不理而專事財利、教化不修而專用刑法、最爲知要。自直宿遞講、遇引對、所陳必剴切、然不務激訐以沽名聲、故睠予隆甚。嘗論儲蓄將帥韓范二公備邊之策、乞用通練持重從臣三四爲沿邊都轉運使、委以邊計。遇軍興、則正以宣撫之名、或用大臣宣撫、則俾爲判官參貳。又言宰執日見天下士、而偏裨將校未有登其門者、宜令欵納、以擇其才。執政從官在帥臣、方面于外、亦責其薦。凡侍從臺諫初除及三衙都統制、諸路總領、到任半年、各舉勇略之士、籍名禁中、以備選用。皆深契聖意。進選德殿六箴曰：政令聽察、財用審慎、極規正之義。且言用人之道、不輕于始、無忽于小。州縣長官、當以教化爲務而厚風俗。羣臣章奏、多應事故、誕謾無實、願依眞宗朝籍記其言、以考察是否、則忠言樂輸而虛言不敢進矣。及在經筵、嘗請遇免講日、則講讀官以所讀及講解之文并隨義口奏

之事、錄本進入、以廣聖德、而盡儒臣之蘊。在西省、尤多嚴執、正色無所顧避。先是臣下援例陳乞、既降特旨、雖其比類或不一、中書無敢審覆。公言：此非所以嚴朝廷也。宜令有司詳考而後施行。上皆嘉納。屬歲旱、議荒政、公引太宗皇帝救災之舊條五事以獻。其說則：擇監司、郡守、謹盜賊、嚴賞罰、逐鄉算傷、以定分數、而寬稅賦之期、量行倚閣、且乞減諸路丁錢米、出空名告身以誘募入粟、寬饑民強貸之黨、毋久繫囹圄、以召和氣、皆切于用者。又進嘉祐中置寬恤司故事、上顧問甚至、因條上其詳曰：此固根本、護元氣者也。願置一司于戶部、詔中外以民間利病來、付館職二人編排、而侍從二人看詳、陛下舉大臣審擇罷行之。歲計之有餘矣、復論和羅之擾、輸納籍沒科罰之弊、命令稽緩之由、求安靜之吏、以寬民力、獎正直之風、以作士氣。因及通判科抑賣鹽、以惠其鄉。時方議監司、郡守





將迎之費。公曰：此末也。獨資緣互送之饋可革爾。悉見聽。至造膝密陳。有家人不得覘其藁者。上深器許。衆謂公之柄用可期矣。九年大疫。遽以疾。五月幾日。以不起聞。天子悼嘆。士夫弔者皆失聲墮淚。詔贈四品。推恩其後。所以賻卹之特厚。始公遊行。愛溧陽縣山水。買田卜居。及父之喪。得邑之舉。福鄉泉山葬焉。至是以十年二月丁酉。祔于泉山。敕建康府爲辦葬事。公字大雅。其氏族自唐爲甲姓。五代末有師約者。仕南唐。因家靖海。曾祖珙。祖涇。皆隱德于鄉。累世習善行。以不殺爲勸。號崔放生家。至父邦哲。始業進士。而教子甚力。以子封承事郎。贈宣教郎。當紹興三十年。承事君以累舉奏名。而公與兄敦禮聯登第。父子三人同日解褐。鄉人榮之。敦禮爲諸王宮大小學教授。一病而卒。不數月。公又物故。人尤哀之。公初主揚州高郵縣簿。次兩浙轉運司。幹辦公事。遂正字于秘書省。逮還

朝。除擢皆出上選。三年四遷。而侍西掖。典內外制。執經勸講。可謂千載之遇。而不究其用。嗚呼。得非命耶。公博覽強記。爲文敏贍。嘗倣漢魏至唐。爲鐃歌鼓吹曲十二篇。以述祖宗功德之盛。見稱于時。又以司馬公資治通鑑于治亂得失。忠邪善惡。有所未論者。凡一君之後。爲總說。一代之末。爲統論。成六十卷。號通鑑要覽。皆以奏御。而上命公更定。呂祖謙所編文鑒中。羣臣奏議。其增損去留。率有意義。有文集若干卷。內外制稿若干卷。所類制海十編。鑑韻五編。藏于家。官自朝奉大夫。贈中大夫。年僅四十有四。母陶氏。贈安人。娶軍器少監錢俁之女。封安人。一男子。端學。幾歲。四女子。長及笄。餘尙幼。方公兄之沒也。公悼之甚。誓以己之恩。先與其侄。今錢夫人遂推遺澤。以成公之志。故其葬也。士友相率爲之請銘。是重可哀也。銘曰：惟文之修言。乃立學而能通濟。以識細焉。歌詩鉅

典冊、皇猷帝謨茲潤色。猗嗟崔公學允力、辰哉遇聖譽斯赫。玉堂增官首其直、溫然珪璋蘊其德。從橫詞林論皆益、帝眷之隆且承弼。年方剛強衆所惜、生淮之壩葬于溲。

韓元吉撰 《南澗甲乙稿》卷二一

校記

- ①脫：疑當作「斂〔奪〕」。
- ②自：原作「目」，據四庫本《慈湖遺書》改。
- ③關：原作「門」，據右引改。
- ④永思陵：原作「永元陵」，據《袁正獻公遺文鈔》卷下所載《沈叔晦言行編》改。永思陵，宋高宗陵名。
- ⑤象：原作「家」，據傳增湘校本《廬陵周益國文忠公集》改。
- ⑥楊：原缺，據右引補。
- ⑦又：原作「有」，據右引改。
- ⑧右：右引作「左」。
- ⑨衆滋：原缺，據右引補。
- ⑩私、發：原脫，據右引補。
- ⑪丐：原缺，據右引補。折：右引作「抑」。
- ⑫張：原脫，據右引補。杓：原作「枸」，據同上改。
- ⑬斂：原缺，據右引補。



儒藏

⑭費：原脫，據右引補。

⑮期：原缺，據右引補。

⑯天道難言：右引作「天實難諶」。

⑰復：原作「從」，據右引改。

⑱字：原作「子」，據武英殿聚珍本《南澗甲乙稿》改。

⑲宜：原作「宣」，據右引改。

⑳厚：原作「後」，據右引改。

㉑則：原作「州」，據右引改。

㉒傷：原作「場」，據右引改。

㉓和：原作「私」，據右引改。

㉔費：原作「賞」，據右引改。

㉕司：原作「使」，據右引改。

㉖瞻：原作「瞻」，據右引改。

㉗文集：原倒，據右引乙。

宋儒碑傳集卷一百四十八

周元卿 趙汝愚

太府寺主簿周君墓誌銘

君諱元卿字景仁別字聖予舊諱冬卿字成甫世爲處之遂昌人曾大父諱從諫不仕大父諱湯贈少傅父諱綰左大中大夫敷文閣待制致仕贈正奉大夫以君陞朝贈光祿大夫文學清裁有重名兩娶李氏尚書諱南公之女孫贈永嘉郡縉雲郡夫人君縉雲所出也年十三以郊恩補將仕郎既冠授右迪功郎池州建德縣尉光祿由祭酒遷吏部侍郎更今名奏承務郎監潭州南嶽廟充福建路安撫使準備差遣未赴丁縉雲憂尋監左藏西庫又丁光祿憂服除差充兩浙西路安撫司幹辦公事監左藏西庫提轄文思院提轄樵貨務都茶場行太府寺主簿淳熙十三年閏七月十三日以疾卒年四十有七積官至承議郎賜五品服娶樓

氏封孺人伯父淮東帥諱璫之次子諱鏜之女子男二人長大受從政郎監泰州鹽倉次未名而夭女三人長適葉相次適樓椅次蚤亡孫男三人文之前君半月卒遷之將受光祿遺澤次復之三女皆幼明年九月辛酉葬君于明之奉化縣松林鄉桃花西奧之原君性明悟過人光祿爲當世儒宗教子甚篤會伯仲俱歿于壯歲叔氏寢長晚乃得君愛之尤切常撫之曰吾不患汝不能學然亦不強汝之苦學受命之後見葉氏甥肄業慨然曰吾舅也反不若耶遂發憤進學不半載下筆成文衆皆驚嘆自爾手卷不釋博貫經史雅有父風尤精班左二書前賢詩文稗官雜說動輒成誦鼓琴善自度曲挽弓能左右射舞劍擊刺圍碁投壺無不精到釋氏教律禪宗之說道家符籙鍊養之法陰陽筮占推步之術一聞則心通類解記輒不忘發爲文詞筆不停綴飲酒餘斗不亂席間賦詩敏若



風雨、似不經意而語出驚人。後或十數年間、其故作歷舉、不遺一字。商榷古今、抵掌劇談、通暢磊落、四座傾歎。間出雅謔、應口如響、又莫不絕倒也。加以臨事能斷、有志于當世之務。張魏公當國、上書論十事、皆國家大計。魏公聳然異之、欲擢置朝行而未果。除左帑以旌其言。又嘗集漢唐事跡切于今日者、著要鑑三十篇、獻于朝。士友相期、功名不足爲君道、長養成就、當爲一世偉人。平時少病、精力兼數人。而小疾困之、挾日而逝、可痛也已。帥幕多不以事物自嬰。君曰、食焉而怠其事、可乎。帥知其才、試以滯訟、剖決如流。有旨降神勁弓、俾帥司製造、以頒諸州。君實董之、且持檄徧閱于外、工力精緻、至今爲用。西帑最爲浩穰、君處之裕如。又以其餘閒溫習故業、登名薦書。間有綱運稽程、調度偶闕、上下搏手無策。君臨時制變、動中事機。一日郊賚甫畢、而歲幣迫期、當市銀七萬餘兩。君威信

素著、老吏巨賄無不厭服。出錢纔數千緡、以次分授。約期償直、不日登足。版曹賴以無恐。尤器重之。任滿增秩、蓋朱出墨入二年、無纖毫註誤。乃始得此。同僚皆藉君以濟。文思雜用金玉寶貝綾錦之屬、尤難稽攷。君始創簿、物以號別之。至今遵用。北使之來、凡錫賚器皿、下至徒御衣衾等物、皆以職守次第按視、至勤御覽。君以爲此特分賜行人、不應過禮、以傷事體。起部以聞、上深然之。支用餘羨、歲久積腐。君請于部編估而鬻之、得錢數萬萬、以給工費。侍郎李公昌圖賞歎不已、力引于朝。又以邊郡薦之。榷筦歲額八十萬緡、類多虧數。君始就職、皆曰、君來則歲事無慮矣。既視事、密詢訪得數十條、皆名數期會所當先。吏輩匿之以爲奇貨、未始輕出。間因白事、君引類摘發、旁通無餘。愕眙相顧、莫知其所以然。後雖有不在條中者、亦不敢隱。以是未嘗汲汲趣辦。歲未終而額已溢矣。乙巳南

郊攝符寶郎。先郊三日、命宿八寶于奉常。君謂寶國重鎮也、今先兩夕置于外、非便。日者祀明堂、設寶于殿左、宜即其所俟、駕輿以從。會宰執取旨不及、遂已。然識者咸謂君知體焉。勾稽外府、方嚮于用、左右揆知君素深、自爲筦庫時、皆略去東閣苛禮、見不以時、君亦自喜有朝蹟、將因是以見天子、一吐胸中之奇。使見于用、當愈出而愈高、孰謂其止是耶。然上而受知于當世名公、往往期以國士、與人無高下賢愚、又悉與之歡。有以急難告、輒傾身赴之、匍匐救喪、尤爲周盡。見有陷于罪者、苟可以營護之、無不至。故位雖未甚顯而聲名已籍甚、才雖未盡用而恩之及人者多。歿之日、朝列皆爲之痛惜、親黨鄉曲、下至閭里、無不咨嗟相弔、蓋其得人心者如此。括蒼達官最盛、皆與君至厚、亦欲引而致之華途、未能也。光祿晚益清苦、君性至孝、奉承左右、常時誦書以娛悅之。父子兄弟自爲知

己、談經論文、侃侃如也。執喪哀毀過禮、叔兄已先喪、一力任門戶之責、襄奉勞苦、人所難能。自郡至蓮峰葬所、凡三百里、水陸險絕、又適大雪、君徒跣露拜以禱。喪行、日光粲然。道中灘水激舟、幾至傾覆。君號呼入水、負舟以出、人共哀之。初光祿與鑰伯父俱將漕湖南、始議締婚。伯父由淮甸丐閒以歸、光祿入蜀道還、使江東、君乃就成于四明。光祿自永嘉奉祠、寓于鄞、置田欲爲終焉計。後雖還鄉、治命俾叔氏之子守墳墓、而俾君來依外舍、然君未嘗忘鄉國也。君與人甚周、而待鑰尤厚、相從之日又久。兩仕于朝、復更爲鄰、無一日不奉周旋。頃鑰遭外艱、銜哀星奔、委家不暇顧、經紀其後、君之力爲多。思欲一致泣謝、未果、而以訃聞矣。間過君家、有慟而不知所從也。大受乞銘、銘曰、括蒼之周、文獻有傳。光祿大之、世推儒先。君濟其美、有志當世。天分最高、身兼數器。中都十年、始有

朝蹟。夷途發軔、何壽之嗇。千載之英、閱此一丘。尙爾後人、有發其幽。

樓鑰撰 《攻媿集》卷一〇一

宋丞相忠定趙公墓誌銘

自古有大勳勞於天下、如周之周公、而管、蔡親也、謂公將不利於孺子、誅管、蔡而周室始定。當是時、成王幼冲、周公居可疑之地、故不免四國之流言。蓋未有遭時不幸、大臣以同姓定大策、受命文母、舉神器而授之於春秋既富之君、而自引退、不敢居其功、力辭相位不得去、而小人讒之、謂將不利於社稷、使以貶死、如故相贈太師忠定趙公之事、爲可哀也。宋興二百有二載、孝宗皇帝踐祚越四年矣、始臨軒策進士、公策忠切、擢爲第一、蓋祖宗二百年所無有。由是入三館、司封駁、鎮全蜀、侍經幄、典貢舉、悉不用宗室故事。公方陛辭入蜀、孝宗面許歸日大用、故中外薦試之。及將內禪、亟召公。

光宗嗣位、頒趣旨至於再四、而小人交忌公、御史范處義以暫違詔命劾公、不果入。紹熙二年秋九月、乃召爲吏部尙書。公至、會聖躬服藥、凡三月不得對。先是、光宗素無疾、旦旦視朝、天容穆如也。冬十有一月始郊、有司已戒、而大風暴至、上殊虛懼、望祭禮成、還內、罷稱賀、肆赦不御樓。是晚疾作、內侍馳告壽皇、壽皇偕壽成皇后倉卒御小輿至南內視疾。上見壽皇來、大驚、壽皇深慰撫之、因問左右上所以致疾之由、頗有所戒責。光宗疾稍平。三年三月朔、公始獲對。是時、上五日一朝之禮、率多官至重華宮傳旨而免。至會慶節上壽、車駕不出。冬至朝賀、又不出、都人始憂。十一月十六日、公對便殿、謹復規諫切深、上意開悟。慮壽皇或不樂、曰、卿宜以此意奏稟重華。公對從官無詣重華故事、上曰、亦何嫌。卿可寓文字封入。公承命退、白大臣、大臣難之。公與嗣秀王伯圭雅厚、力請伯圭調護。





兩宮門、因曰、聞宮中婦姑之分素嚴、盍請諸壽成、少加附接。兩宮之情既通、後六日、光宗及中宮俱詣北內、從容竟日、都人大悅。上疾生於疑懼、公每曰、處常人父子之際、尙有不易言、故凡進對、所以開導彌縫之不遺餘力。四年正月、光宗宣引賜酒、款甚。明日、命知貢舉。未幾、同知樞密院事。公辭以高宗嘗有聖訓、宗室用至侍從止、不敢當二府。時監察御史汪義端與公貢院議不合、奏疏詆公曰、故事、宗室無位二府者。上徙御史爲他官。給事中黃裳封還詔旨曰、御史實忌賢、不可不黜。青天白日、人皆知其清明、御史獨不之知邪。上又爲出御史。公愈不自安、辭不拜者凡十有二疏、最後上請之壽皇、乃召學士答詔、諭以紹興聖訓用折秦檜陰謀、蓋有爲而言也。此除盡壽皇意。積二十有六日始拜。秋七月、遷知院事。時光宗疾雖平、疑未盡釋、辭曰、陛下久不詣北內、臣安敢遷官。且武興主

帥吳挺死、陛下每疑其不死、而久不除。人臣職當言、不得其職、臣安敢拜。自七月至於十有一月、不拜。會將以至日上太皇太后冊寶、左丞相留正因知閣姜特立復用、請辭機政、俟命於郊。久之不召。右丞相葛邲方被論亟去、上面命公爲禮儀使。公奏曰、太皇冊禮、故事當以宰臣爲使、陛下有左右相、不以命、而命臣、非所以嚴大典。上乃許差留正。公即乞降旨遣中使宣押正、且令宰屬往諭旨。於是左丞相復入。上於奉冊前五日詣重華宮、都人大悅。冊禮成、有旨趣公受告。公謝曰、臣久不奉詔、徒以朝廷數事、臣不敢安。今陛下已過重華、留正復相、獨餘一事。若武興朝除帥臣、夕拜命、不敢復辭。上欣然許。再過北內與壽皇議之、公乃受命。公惟不欲吳氏繼世掌兵權、以張詔代領武興之軍。公於大事以身任之、類此。然中心所甚憂者、上父子閒事也。光宗出門、於語輒悟、入輒復疑。群臣人

人言言或無不至、上悉容受、而疑終不釋。五年春、孝宗始不豫。夏五月、疾浸深。二府一日詣寢閣問疾。孝宗數目丞相及公、若欲有言、而不果發。翊日、光宗御後殿、丞相率同列請上詣重華侍疾、從臣隨入、諫臣、臺臣繼入。閣門吏以非故事止之、不退。丞相以下請之益激、上益疑。丞相退詣仙林寺待罪、節官共邀止之、乃齋宿都堂。明日致禱天地宗廟、壽皇疾未瘳故也。越二日、宰執俱請對、先以待罪劄子進入。上令知閣門事韓侂冑傳旨云、宰執並出、於是俱出於浙江亭俟命。丞相獨遠。孝宗聞之、憂甚。嗣秀王簡丞相傳孝宗意、令宰執復入、有始終扶持之語。或以誤傳旨交責侂冑、侂冑乃奏曰、昨日傳旨、令宰執出殿門、乃出都門、乞遣中使宣押。光宗不許、侂冑請自往、許之。公等乃復歸第。自是孝宗疾彌留。六月八日夜五鼓、重華大闔扣公私第曰、壽皇已升遐。有頃、中書以劄奏聞、公持

不上、恐上疑、或不出視朝。九日、上視朝、首以提舉重華宮關禮<sup>①</sup>狀進、許即過北內矣。日下昃、不出、憲聖御札令宰執邀請車駕、繳進久之、封出無處。宰執不得已、遂率百官詣重華宮發喪、內外不勝哀。十三日、將成服、公與中書議請憲聖垂簾、暫主喪事。密諭朝臣詹體仁、徐誼達意於少保吳玕、俾從中請之。憲聖素簡嚴、令中人傳旨云、太皇十歲入宮、今已八十、未嘗與宰執相見。所議喪禮須請皇帝主之。公等附奏曰、連日在南內請對、不蒙宣引、累入文字不報。今率百官赴南內恭請、若皇帝不出、百官必相與慟於宮門不退、人情騷動、恐爲社稷憂。今請太皇太后降一指揮、以皇帝有疾、權就宮中成服。然喪不可以無主、祝文稱孝子嗣皇帝、宰臣不敢代行。太皇太后、壽皇之母也、請代行祭奠之禮。良久質諸典故、議始定、乃成服。是日公請垂簾之意、蓋以國本繫嘉王、萬一不得已、該有宗



社大計、即可於簾前奏稟。命出簾幃之間、事行廟堂之上、體正言順、則無後艱。而吳琚素審謹、或曰：「太皇不欲令后家大議、此議竟格、他人不知公意也。」十八日、公與宰臣及參知政事陳騤、同知樞密院事余端禮、待對於和寧門外、不報。退、同入奏云：「皇子嘉王仁孝夙成、宜蚤正儲位、以安人心。」不報。時中外阻絕、都人洶洶、有言二十四日再以建儲請、批出但有甚好二字。明日同擬指揮以進、乞上親批、付學士院降詔。是日晚、御批乃云：「歷事歲久、念欲退閒、封題付丞相、丞相色懼、連二日、大臣乞奏、不報、復以所擬指揮進、批出云：『可只令施行。』又不送學士院。」二十九日、再乞面奏、不報。晚、付出封題獨異、丞相不啓封、付吏掌之。七月旦、公問丞相前奏如何、啓封、見牘尾御批十六字、丞相色憂。明日朝臨、仆於庭、因不出、密爲去計。方孝宗疾彌留、外言訕訕、無有不至、云：「京口三軍謂壽皇已崩、朝

廷密不發喪、欲相率縞素向闕。都人駭動、公因殿前指揮使郭杲來謁、問曰：「京口事亦聞之乎？」杲曰：「聞之。」公曰：「萬一有此、太尉何以處之？」公知所傳妄、特欲觀杲之對、以察其心。杲拱手曰：「兵家以直爲壯、使杲將若何？」公察杲可與共商國事。至是宗社之計益迫、丞相去之、公自度不得辭其責、而內禪之義決矣。獨患未有可使以腹心語杲者。會工部尙書趙彥逾按行山陵、別公私第。公與彥逾皆宗姓、是日語及國事、公泣、彥逾亦泣。公因微及與子意、彥逾乃喜。公知杲德彥逾深、因謬曰：「郭杲尙不謀、若何？」彥逾曰：「某當任之。」公曰：「正持棋不敢先發、此非尙書不可也。」彥逾約明日復命。公曰：「此大事、已發諸口、豈容俟來日乎？」某不敢入私室、退坐屏後、以待尙書之至。頃之、彥逾再至、議遂定。公折簡丞相、勉令少留。明日、孝宗大祥、丞相以五更入奏致仕、易肩輿出城去。公率同列兩入奏、乞宣押



留正、不報人心益搖、公處之如平日。自吳琚之議不諧、於是與徐誼、葉適謀可白事於慈福宮者而侂胄進矣。侂胄者、忠獻魏公之後、戚里也、素善慈福宮內侍張宗尹、宗尹知憲聖深以宗社爲憂、閒以語之。侂胄與蔡必勝同在閣門、必勝與誼等同里、侂胄因必勝以見誼等、誼等以白公。公乃遣侂胄以內禪之議請於憲聖、侂胄不敢前、第附宗尹以奏。宗尹不獲命、止令勞公而已。明日、公再遣侂胄、辭不往、公曰、可且謝太皇宣諭。因致前、請強侂胄、侂胄乃往、復於宗尹附奏、竟不得太皇意。侂胄逡巡退。關禮者事壽皇久、邀問侂胄之來何爲、不以實告。禮怒曰、自是一家、何必隱。指天誓不泄。侂胄乃具述公意。禮曰、知閣少俟。關禮入見憲聖而泣。憲聖曰、汝有何苦。禮對曰、小人無事、天下可憂。憲聖蹙額不言。禮曰、聖人讀書萬卷、洞曉古今、亦見有如此時節、而可保其無亂否。憲聖曰、此豈汝

所知。禮曰、此事人人知之、今獨大臣鎮壓耳。丞相已去、聖人知否。憲聖曰、丞相無謂。禮曰、丞相誠無謂、今所賴者趙知院、知院旦夕亦去、中外誰賴乎。言與淚俱。憲聖驚曰、趙知院如何去。禮曰、趙知院於官職何有、慮禪祭後亦去。憲聖曰、此非汝所知、同姓事體與他人異。禮曰、趙知院之未去、非但同姓、以有太皇太后可恃耳。今欲定國家大計、不得太皇太后旨、策無所出、亦不過去。趙知院去、天下將如何、願聖人三思。憲聖曰、所遣來韓侂胄安在。禮曰、臣已留之、今俟命。憲聖曰、可令諭知院、好爲之。關禮報侂胄來早、太皇太后於壽皇梓宮前垂簾、引執政、侂胄復命。日已過午、公始以其事語騃端禮及殿帥杲。關禮使其婢黨宣贊舍人傅昌朝密製黃袍。時兵部尙書羅點以光宗未執喪、群臣不當釋服、猶以衰服朝臨。是日、皇子嘉王謁告入臨、公簡宮僚彭龜年曰、王無他否。來日禪祭、重事

也、不可不出。甲子、禪祭、羣臣入、王亦入。公率百官詣大行素筵如常儀、因入劄子、請憲聖垂簾、令關禮以憲聖之命、請王入。頃之、垂簾、公與同列再拜詣簾前奏曰、皇帝以已疾、至今未能執喪、臣等六月十八日以後累入劄子、乞立皇子嘉王爲皇太子、以繫人心、皇帝批出有甚好二字。繼乞送學士院降詔、又批出有念欲退閑之語。乞太皇太后處分。憲聖曰、皇帝既有御筆、相公當奉行。公奏曰、茲事重大、播之天下、書之史冊、須議一指揮。憲聖曰、好。公袖出所擬太皇太后指揮以進、曰、皇帝以疾、至今未能執喪、曾有御筆、自欲退閑。皇子嘉王可即皇帝位、尊皇帝爲太上皇帝、皇后爲太上皇后。憲聖覽訖、曰、甚好。公同奏曰、新皇帝仁孝、必能敬事兩宮。自此太皇太后可以安享四海之奉、受萬年之福、臣等不勝慶幸。同再拜。又奏曰、自今臣等有合奏事、當取嗣君處分。獨恐兩宮父子閒或有

難處者、卻用臣等商量封入、須煩太皇太后主張。如無事、亦不敢上瀆天聽。憲聖許之。又奏曰、上皇疾未平、乞令都知楊舜卿提舉本官任其責。內侍奏曰、楊舜卿在此。公召至簾前、面付之、舜卿垂泣祈免。憲聖不許。於是憲聖勸上即位、上固辭、令關禮等扶掖出簾。上顧公曰、某無罪、恐負不孝之名。公奏曰、天子當以安社稷、定國家爲孝。今中外人憂亂、萬一變生、置太上於何地、尙得爲孝乎。衆扶上入素幄、披黃袍、猶立而未坐。公率同列再拜稱賀。又降、再拜、始引殿帥杲、步帥閻仲入賀。杲、仲先退。如祖宗故事、分兵宿衛南北內。上詣几筵殿、哭盡哀。公等退、須臾立仗訖、催百官班。上衰服出、就重華殿東廡素幄立。公等升幄、內侍扶掖上、親行禪祭禮。羣臣始得拜哭於几筵殿下如舊儀。內外俱慟。都人聞上即位、始奠枕矣。方公之未定大計也、樂禍者切切耦語。襄陽鄰敵境、有歸正人陳



應祥者誘聚亡命□黨連裔、號檄、辭指辟不可聞、謀以七月望爲亂。先一夕登極赦至、其徒去之而散。嗚呼、公之功大矣。古所謂社稷臣者、公足以當之矣。或謂上新即位、如韓侂胄者、公宜度時之宜、與郭杲並建節鉞、以收其用、公不聽、反裁抑之、釁由是生。侂胄既陰竊主權、凡不得志於公者、潛相附和。公在相位甫六月、諫官以危語撼公、指大忠爲大逆。公既去位、臺臣相繼誣公不已、竟責授寧遠軍節度副使、永州安置、道薨、天下冤之。侂胄用事久、欲稍釋中外意、復公資政殿學士、大中大夫、後又贈少保、而公之大功大謗卒未白於天下。上察侂胄誤國、竟以伏誅。嘉定元年二月、始盡復公元官職、謚曰忠定、且用其長子崇憲監進奏院。崇憲奏、乞檢照先朝陳瓘論司馬光復官故事、以先臣心迹下百官廷議之、大罪大冤宜使明白、則朝廷之大誅大賞乃可信於萬世。於是吏部尙書樓

鑰等奏、凡前姦言誣史、悉宜刪正。詔曰可。十有二月、內出親札、特贈太師、追封沂國公、而後四海之心始慰。公諱汝愚、字子直、太宗皇帝之元子、漢恭憲王元佐八世孫也。皇曾祖諱士慮、東頭供奉官。皇祖諱不求、成忠郎。皇考諱善應、修武郎。公既貴、累贈皇曾祖太師、妣龔氏陳國夫人。皇祖太師、申國公、妣晁氏吳國夫人。皇考太師、慶國公、妣李氏冀國夫人。慶公之葬數年、正獻福國陳公題其墓曰、皇宋篤行趙君之墓。其後侍講朱公熹爲之銘、又謂、漢恭憲王至德高行、爲宋太伯、心融迹泯、世莫予知、益期其後之必大也。至慶國復有至行、是實生公、爲國賢輔、拯時艱危、迓續我國家之永命。紹興十年二月丙申、公生於嘉興之崇德縣。申公晚監饒州餘干酒稅、卒於官。慶公葬申公於縣東郭、因家焉。家甚貧、而德則豐。公蚤有大志、每曰、大丈夫得汗青一幅紙、始爲不負此生。初以取應中

選益杜門讀書、年二十七遂冠多士。改左宣義郎、僉書寧國軍節度判官廳公事、未赴。遭冀國憂、免喪、召試館職。孝宗方銳意恢復、公始見上、即面奏曰、臣懼有大言無妄之人竊窺陛下意、迎合取寵、爭言違戰之利。願陛下含忿忍耻、力爲自治之計。虛懷納諫、以輔其德。任賢使能、以治其政。開布大信、以繫中原固結之心。務農訓兵、以隆本根不拔之勢。孝宗稱卿言甚是者再。公又曰、歸正人皆祖宗涵養之餘、不堪胡虜之暴、今如脫寇盜、得慈母、宜求所以慰安之。因陳三說、大略謂、不當以儉荒待之、當選用其豪傑、勤恤其有無。孝宗復大嗟賞。是時上病、士大夫苟媮虛誕、下詔戒百官、將必行賞罰。公適輪對、奏曰、省刑重賞、人主執此以御天下、顧亦何施而不可。然陛下深居九重、人臣功罪豈一人智力所能盡。願益選公正敢言之士、俾任耳目出納之寄。陛下虛懷而聽察之、則是非明而

賞罰行矣。朝廷方議遣汎使、有挑敵意、公曰、陛下銳於圖事、苟有道可以豐財、則利害未暇究也。苟得人出而任事、則賢否未暇擇也。願建宏遠之規、不以小利動其心、不以速成敗厥事。求賢爲上、立政次之。上察公盡忠。張說簽書樞密院、公時爲著作佐郎、不往見、率同列並請祠去、不報。會吳國夫人訃至、公不俟報、即日歸省、慶公因自劾、上不加罪。以公知信州、陛辭、爲上論漢初多循吏、至武帝好大喜功、而俗凋弊、吏治始無以德化稱者矣。人主苟清心省事、節用愛人、使民俗富厚、而政化可行、然後久任以責其成、雖使郡邑皆龔、黃、卓、魯可也。公至上饒、會安南貢馴象十六、所過騷然、公乞留之廣西、闕則取、不報。乃預爲條約、凡廣舍薪芻供給之物、悉有式程、比過郡境、民不知其返也。具舟出諸境、無一毫擾。上饒諸邑輸秋苗、取贏無藝、公請立爲定制、下二等悉罷之。城郭民每歲推較





物產厚薄、吏弄其閒、數日不能決、公下令使自以義相均、一日而軍民大感悅、於是興廟僧舍祠公。祠成、公故觴客其閒、書一杯亭三字、謂身後千載名、何如生前一杯酒、卒不使設像。公薨、迺像而祠之。天台守以嫌、留公兩易方入境、鹽之禁、公雖數月當代、不以暫而苟。台城多頽圯、山水數冒郭郭、且城門寬而大、其潮一夕抵其下、民不獨憂水而憂盜。公亟命板築、城堅而諸門樓高聳、雖有水大至、城不沒者三板。郡歲輸上供銀米之物、務在所納錢楮半、皆公力行、以見錢市銀米、貢歲者調矣、數年人無愁嘆。公之爲政大體如此。□□西過闕、奏事曰、陛下即位之初、天下皆以英才不世出、無不延頸以望太平。今將五年、而治不加進、豈所由而不得其道。詞語益深切。東南病月椿錢、爲民害、江西七十萬、率橫斂而創之名、公奏乞視其最甚者蠲之、朝廷重於施行。公察宜春□□諸邑爲

尤甚、除其力所可除者、公意殊不愜。是時有旨籍黥流卒之健者爲軍、名曰敢勇、江西、湖南各屯千人。公奏曰、今日聚之甚易、他日散之甚難。且江西帥司舊有親兵千人、今生一軍、必相疑忌、結隙有意外慮、非但徒費資糧而已。不果行。公每輕車、攜主案吏二、候兵一、馳原隰訪民疾苦、自帥閫而下、悉嚴憚之、而不敢肆。踰年、上思公、召赴行在。會慶公卒、公執喪如慶、公之所以葬申公、吳國、而於祭葬又酌司馬氏以行之。既祥、衛丞相□□公奏以吏部節東宮講官召。未幾、遷秘書少監、兼給事中、封駁無所避。內侍陳原有寵於德壽、添差浙西副總管、公因書其續增秩黃、上疏論之、謂建炎詔書初數、內侍與軍官交通、如僭役禁兵、具不可、今乃假以一路總戎之任、恐非太上意。王中正、李憲所以基童貫開邊禍、如陳源者、望今解去總管、以爲萬世子孫無窮之法。孝宗大喜、進呈德壽、高宗亦

喜。明日、上諭宰臣趙雄等、凡內侍宣職、悉改內祠。祖宗之制、密院文書、細大皆經門下省、至張說往西府、託言邊機、軍政不宜泄於外、由是密院事關送銀臺司者百無一二。公<sup>②</sup>上疏論、東西二府皆朝廷治亂所關、今中書庶務無一事不過東省、何獨密院而不然與。凡四上疏論之、西府大臣不悅。公徙天官、猶面諫之不已。孝宗感悟、遂如舊。於稍攝瑣闥、僅五閱月、所論駁甚多、如韓彥質□□陳勸講、陸游召爲定遠總戎、皆以公封還而寢。中外浸不以爲吏利。遷權吏部侍郎、太子庶子。公曰、論忠職也、首奏疏及上左右、其略曰、陛下以兼聽爲美、而或來膚受之言、以分任爲功、而適啓多門之弊。潛窺聖意、密預政機。大臣依違聽命、事有不可而莫敢與爭、否則締合往交。上雖不言、而實行其意。蓋指知閣門事樞密都承旨王<sup>③</sup>抃用事也。他日又奏曰、今夏六月、有客星出傳舍、守之三月。傳舍九

星在華蓋之上、賓客之館、即今掖門之外閣門、客省是其處也。臣聞閣門中有用事者、陛下委之招接北東人事、蹤蹟秘甚。又聞委以將帥之權、付之帷幄之任。上天垂象、端不虛發。公所言皆人臣所難言者、上意稍動。會北使魏正吉、蕭梅來賀正旦、要人主起受書如舊儀。孝宗難之、朝見改別日。亟具奏曰、使人奉書不虔、萬一處之稍失事宜、誠恐黠虜益驕、更貽後患。今莫若且令館伴臣僚委曲開諭、援之以公例、曉之以至誠。我直彼曲、彼將何辭。然後□□封進國書。徐降旨、攔朝見。若彼堅執倔強、則當致饋有司、稍如常禮。移文對境、告以事因。但當曲折其辭、不至遽生邊釁。若姑務曲從、別加厚賜、非惟有傷國體、亦恐更啓戎心。奏入、抃已先許使人明日用舊儀見矣。明日、公侍殿上、孝宗數目公、意極悔之。北使去、公亟請對、遂出抃外朝野稱慶。公因入奏、請罷諸軍承受、復還將帥之



權如祖宗故事、用文臣爲樞密都承旨、曰、今日之弊、其最大者無如諸軍<sup>④</sup>實承受。蓋將帥禍福輕重之權、陰制於其人、而貨賂之風、培尅之政行矣。將帥者、三軍之司命、其賞罰進退在人主、蒐選考察則宜責之大臣。昔漢之高光、唐之太宗、聰明英武、過羣臣何啻百倍、至於任使諸將、以來人物、亦必訪之蕭何、鄧禹、房玄齡數公。今大臣平居恬然不以人材爲意、一旦邊陲有警、陛下誰與謀者乎。至若承旨一事、權任尤重、改弦易轍、實在此時。孝宗悉如公請、盡罷諸軍承受、始以吏部侍郎蕭燧爲樞密都承旨。公又謂、古者命將率皆王之卿士、本朝不逮前古、正由選任之際、文武太分。今十萬之衆付一武將、不使一二士大夫參制其間、平居無事、莫可誰何、一旦多事、或恐爲腹心之憂也。於是奏乞於鎮江、建康、鄂渚、武興每軍置參謀官一員、江、池等處未有主管機宜文字者增置。且言曰、不

稍優其禮、則士不屑爲、雖精選其人、亦無益於事。孝宗曰、朕久有此意。春秋晉六軍皆卿士也、欲倣古制行之。公對曰、裴度淮西之役、判官、書記皆朝廷之選、晉亦有兵曹、騎曹之類。孝宗曰、記室亦古官名也。翼日以諭大臣、而兩府惡侵官、託宜以使東西二府掾屬議資序而退。他日又奏及之。孝宗與公反復論其事、會公補<sup>⑤</sup>外、議竟不行。公言、方今州郡兵冗不精、徒困民力。捕盜改官、非祖宗法、滋長姦僞、賊害無辜。上悉推行之。於閩謀帥、公以集賢<sup>⑥</sup>殿修撰出鎮、念當去國、孳孳以數千言進戒、惟恐人主始勤終怠。且及國事之大者凡四、而裁抑吳氏其一也。謂、自古天下之患常生於所忽、患生於所忽、則必有出於人意之所不料者。及其出於意所不料、雖有謀臣勇士、將無所用其力。今吳氏專蜀兵已久、一方之人皆習熟其姓字。及時無事、宜漸裁抑之、不然或爲後患。孝宗爲之動。公之精

忠遠慮多此類也。閩俗生子往往不舉，公創舉子倉，凡貧不能舉其子者，以書其孕之月而籍之，及期官給之米，而使舉其子，所全活甚衆。州有二湖，附郭田數萬畝，旱則湖可溉，澇則可泄，故無凶歲。或租其澇水之澤，各封域之，官利其入，不之禁，湖以塞。公奏罷之。浚西湖，使與南湖通，築長堤，植杉柳，創六閘堰，以時澇泄，遂爲一方永久之利。公薨，閩人即湖上祠公，以無忘公之德。臨汀之民喜兵好斗，官又調民運鹽，而強鬻之，民不堪，則起爲盜，與官敵。公請行鈔法，而禁官鬻，格於異議，乃力求其疾苦以寬之，民始稀爲盜。然公於治盜甚有方，嚴兵絕其抄掠之路，而約其許以自新，如約者，償之，不用命者，執而戮之，既平而厚撫之。嘗有海盜，遣舟師討捕，賞罰明信，悉禽之，盜不敢犯。公於大事如此，於細事亦委曲用意。郡治之幽處，得小室，公榜曰不欺心，令二老卒守之，以待訟之，無左驗

者，與骨肉之訟而不致其相傷者，使處其中，率感悔去。閩人至今訟其美。居閩三年，加雜學士，帥蜀。臨遣，勞勉諄悉。公首辟劉光祖，楊方入其幕，上命中使以香盒、象笏、金帶、酒器爲賜，公囊無所有，密於市肆鬻金一十兩贈中使。中使奏聞，孝宗戒曰：「趙學士素清貧，謹勿受。」中使宣上旨，納金而去。公感上深知，第薄勞其騶御，中使亦不敢受。公之清節素著，入四川境，關外三大將不敢以常帥待之。吳挺遣使於公所，賫持酒十罇、梨三百顆而已。青羌奴兒結擾黎邊，餘十年不去，公以計禽而戮之。其餘黨有以殺降必益啓邊患爲言者，公不搖於浮言，使嚴備以待之。奴兒結有弟曰三開，聲言入寇，公察其妄也，戒勿動。明年，三開三犯邊，邊有備，悉敗退。公恐羣蠻與之合，因聞之黎，三開勢益孤，竟以憂死。方公開藩甫浹日，馬湖蠻犯嘉州，籠鳩堡。公榜郡縣，毋襲故例，輒招徠，許之賞犒，第謹邊



備、絕歲賜、禁互市以困之。蠻悔過、盡歸所虜、具所當償以請命、乃許如故。餘蠻俱怙服。虛恨蠻。族最強善鬪、破小路蠻、併其地。地與黎接、每以朝廷不許其互市、數犯邊。至是將許之、公奏曰、黎州三面抵邊、西南有五部落、正南有彌羌、青羌、東南有邛部川、若更開此一放與之互市、必大爲憂患。與其許之而重貽他日之深憂、不若拒之而寧受目前之害擾。上謂公有文武威風而知大體、益無西顧憂。公創招西上五百人省屯、咸近歲出死力冒白刃以扞雅邊者、猶公所招鬪士也。公治蜀、事細大悉究心焉。每與蜀士大夫以文藝相尙、而爲職業文法、爲疏勉之。事以成法要其歸。愛士卹民若饑渴、節用度、有餘以寬民賦。其於蜀物、一毫不買於市。民當輸倉、使自概量、各挈羨米去。道路之說尹者如出一口。成都大火、晝焚室千八百有奇、不遺其一、則已俟罪、撫暴露、給食貸緡有差、大門衢巷

經理比屋、民忘其災。先是府東千金堰溉民田十七萬畝、歲調民錢以畝計、役夫十一萬六千有奇、編氓籠利、爲之歲輒一易。公規欲易以石、使水不可齧、官預貸民五年爲之、歲使償之、五歲之後無復科歛矣。而掌執堰事者與郡縣吏歲利其後、使人使騰說於輦下。前茶馬使王渥時爲大理卿、惡公嘗奏其以老弱馬希賞、鼓以火事、奏不以實。又星變來言、或指爲成都之火焚萬家、或有謂石堤勞民不可爲、以應詔。臺臣陳賈因投隙搖公、請下部刺史核實。孝宗曰、焚萬室、此必王渥之言也。朝廷乃下公同監司條具、公不敢預、悉付漕、憲躬閱火所、不可誣、獨謂石堰役大難成而已。公因力請祠、孝宗以金字牌遣、批奏牘還之曰、朕已察其浮言、卿可安職。然忌公者衆矣。公猶不爲少貶、如二部刺史、怨益多。孝宗召公入、光宗趣召、不果入、除長沙、因改太平州。公量其無事、表謝曰、閒問

讀書、還視於千古廢興之際、益復有憂國之意存焉。太平爲州、歲入秋苗以斛計者十五萬七千有奇、而上供凡十四萬斛、留州者一萬七千斛耳、漕司歲又盡取之。郡計歲五萬斛、例悉贏於輸入之際、公與潛議、不復取留州米、於是概量減十七、且□用以代民賦之偏重者。甫半歲、復鎮七閩。時光祖<sup>①</sup>以御史論事去國、謁公當塗之境、公酌之酒、酬公位下<sup>②</sup>。慨然有死宗社意、蓋公<sup>③</sup>之中抱未嘗一日而忘吾君也。三山卒從都下、聞公當再往三山、歸、未入城、語傳驩趨而隨以問者無數。公既至、益務崇教化、愛民如子、民益孚信、而治不勞。會諸邑與爲約、除舊逋、定常賦、戒曰、瀕海之民非鹽無以生、每一切繩以法、使人每爲盜。三山民衆而食寡、公每期招米商、民食常足、而人不知也。損五代因時之制、悉有深意。公三歷帥、入爲天官長、是羣臣爭言安便和平、足以爲治、公見光宗、即奏曰、臣歷

數郡、首尾十年。自蜀至閩、身行萬里、所見閭閻之內、民實困窮、郡縣之間、吏多貪濁、風俗媮玩、邊備空虛、將帥培克、士卒嗟怨。願陛下慨然發憤、志於有爲。光宗寬仁盡下、公又慮邪說入之、曰、君子今日論某人、明日論某事、積違忤以取人主之厭、不可不察。凡所定必其有益於主德、以誠心感悟。其掌銓曹、每病勿守資格、無所進退、奏乞別賢不肖、擇其可薦進者以聞。俄擢貳西府、責益重、憂益深矣。踰年、會國哀多故、旣身歷大策、而宰席虛、即從其次奏召留正長百僚、遣兩中使趣之。又以朱熹有重名、俾以待制侍經幄。於是無日不收召士君子之在外者、以光初政、慰海內望。初公之亟<sup>④</sup>留公也、欲與之同心輔政、布賢者於要路、一二月間、事可略定、公乃引去。侍御史張叔椿奏彈留正棄國去、不當召、公遷御史爲吏部侍郎。上以東省虛員、命公兼參知政事、公奏留正至、乞免兼。公解省事



甫三日、除特進、右丞相。公懼曰、同姓之卿、不幸處君臣之變、敢言功乎。力辭不拜、以特進爲樞密使、而知院事已命聯矣。公拜樞密、而辭特進。公平生善論事、所帥福唐、遇地震之變、上疏於孝宗、宜罪己求言、以答天戒。朱熹聞之、嘆曰、是得藩臣告君之義矣。及鎮蜀、奉高宗遺誥對家人僚吏大慟、退具手札慰孝宗、且爲三說以獻、其一謂、會稽殯宮、規制淺薄、舜都蒲坂、葬蒼梧、禹都平陽、葬會稽、當復祖宗山陵之制。其二以皇太后春秋高、太上既葬、請皇太后不南內、以便侍養。其三、修奉山陵、宜遵遺誥儉約之訓。至是孝宗大行、公反覆論殯宮非是、日往歲深、阜陵其深不盈九尺、聞者寒心、欲改卜山陵、與宰臣議不合。趙彥逾爲按行使、迎宰臣意、爲之屬者和而助之、與覆按使悉不主公說、而黨始分矣。小人因二公之議、山陵不合也而間之。會留公裁抑經筵、更易臺察、士浸不悅。韓侂胄

欲自用事、得其便、從中出留公於建康、復命公右丞相。公本倚留公共政、怒侂胄不以告、侂胄謁公、公故不見、侂胄慚而忿。簽書樞密院羅公點曰、公誤矣。召侂胄與語、力釋之、公亦悟、復見侂胄、侂胄意終不懌。公辭不拜右相、至於再三、不許。覆按使時爲中司、與彥逾等謀共挽其黨爲察官、而言路始與公敵矣。會羅點、黃裳卒、公益孤、對客輒泣下。羅點死、侂胄拔其素所與、亟用之。黃裳死、上益無所倚信。彥逾覬欲與同升、恨公使之帥對、疏廷臣姓名於其上、皆指爲公黨、傾公。且曰、老奴今去、不惜爲陛下言之。而上始疑矣。時諫官黃度欲深論侂胄而謀泄、出之於外、公歷言之、不聽。朱熹從經筵進說、權倖益側目、中批與外祠。公獨袖御筆還上、且諫且拜、無慮十數。上愠、必欲出之。公退求去、不許。於是吏部侍郎彭龜年力抗侂胄竊弄威福、爲中外所附、不去必招患。上難之、公白上、乞留龜



年龜年竟出。又力求去、不從。連數日、中書舍人陳傅良、監察御史吳獵、起居郎劉光祖各先後而去、公之勢危矣。時正旦使將至、公不果去。慶元元年正月八日、北使朝辭、小人知公必去、亟命學士草麻、去祔廟賞。趣家人治裝、曰、朝廷自宣麻、吾自以私義求退。而公之客或曰、大臣進退、不宜匆匆如此。公翻然顧國家大體、復不忍遽去、力免特進之命。凡十有三日、始聽遷一官。公念居大位、志不得盡展。於議典禮、僅能正太祖東向之位、而山陵奪於羣言、於士風奔競未能革、於民力凋瘵未能蘇、軍制未復祖宗之舊、邊臣未得久任之人、江淮未盡經理之宜。經術造士、十科薦人、欲如元祐司馬公。重惜名器、甄別流品、選擇監司、欲如慶曆富韓范。凡公著所聞於師友、如汪公應辰、李公燾、王公十朋、胡公銓、林公光朝、張公栻、尤公袤、朱公熹、呂公祖謙、皆欲力行、以見於事業、而未能也。且時事

雜出而多端、人才暫聚而復散、公自知孤立、不可以久、猶汲汲勉主以大有爲。是月二十有五、日、率二府大臣面奏曰、陛下但欲爲尋常之主、今臣等朝夕進呈尋常之事、亦或可以偷安目前。陛下欲建子孫萬世之計、必先自立志始。若聖志先定、臣等亦深願爲陛下條當今弊政、次第施行。公不知小人之計已成。是日用李沐爲右正言、沐與侂冑合謀、首論公將危社稷。公罷相、朝臣連日奏疏、謂公不應以忠得罪、悉斥逐之。太學之士坐理公羈竄者五六輩。公名益高、小人益忌、謂不重貶公、人言不已。八月、以御史中丞何澹疏、落大觀文。十二月、又以監察御史胡紘疏、責授寧遠軍節度副使、永州安置。公怡然就道。舊病渴、醫以爲熱也、投寒劑。舟行瀟湘間、雪大作、愛而玩之、外寒內侵。抵衡陽、寢疾。甫四日、正月壬午、○乘舟、薨、年五十有七。薨之夕、天晦陰、公問子婿、今夕星象何爛然也。且一



大星胡爲獨照我舟。將逝、微笑曰、一無可報、一無可恨。公學務有用、侍講□□□太祖<sup>⑧</sup>實錄舉要上之。其後又取本朝諸臣奏議類成三百卷、擇其尤切治道者爲百五十卷以進。孝宗謂可與資治通鑑並行。其他平居格言善行、有不可勝書者。及其薨也、雖遐鄉僻聚、稚兒寡婦、莫不憤嘆泣下、道路望見其喪舟、焚香而遙哭者、皆是公德及之。公娶徐氏、先公十九年卒、累贈秦國夫人。公凡七男子、長曰崇憲、今爲朝議郎、秘書監。崇範、宣義郎、監隆興府苗米倉、蚤世。崇楷、奉義郎、通判郴州。崇模、從政郎、荆湖北路提點刑獄幹辦公事。崇度、宣義郎、權發遣<sup>⑨</sup>桂陽軍事。崇實、承事郎、監建康府糧料院。崇斌、承事郎、監隆興府苗米倉、悉有家法。女子六人、嫁承奉郎、監泉州市舶務汪德輔、承務郎、監興化軍莆田縣涵頭鹽倉汪光、宣教郎、知南劍州將樂縣劉填、承務郎劉廣、其二未適人而死。男子孫

十五人、一人已仕、二人未名。女子孫十有三人、一人已嫁、一人許嫁。曾孫一人、曾孫女二人。嗚呼盛矣。天之所以報公者、其在斯乎。聚族三千、皆無閒言。藏書五萬卷、終身不失儒素。公在相位、客有聞公言、欲以吳曦爲文臣帥、問之故、則曰、武帥他日又嗣掌蜀兵、非國之利。客嘆而退。是時、曦已深交於侂冑、議弗果成。公罷相、侂冑專國十年、曦益得其欲、竟與侂冑表裏興師、而曦首叛。如公素憂、嗟夫、使公而尙在、國家之所恃何如也。公薨之年五月壬午、葬餘干之雕峰。百歲之後、墓道之碑傳信、或有補於太史氏。其銘曰、烈烈趙公、社稷之臣。維天篤生、維國之珍。扶國於傾、拯時於屯。天旣成之、乃敗於人。曷忍敗之、彼賢且親。天造則艱、人胡不仁。匪敗我公、實戚我民。在民旣戚、公功以伸。公雖伸矣、孰救瀕呻。已喪孰補、未補孰陳。嗟公志遠、任重以身。帝鑑其忠、其語諄

諄。人忌其正、其讒谗信。後不我知、猶有鬼神。公沒  
不恨、光燦斗辰。公即幽宮、今幾秋春。卓矣偉績、勒  
之堅珉。百世之下、以告縉紳。豈必百世、懷公如新。

劉光祖撰 道光《餘干縣志》卷二二

校記

①關禮：原作「闕禮」，據《宋史》卷三九二《趙汝愚傳》  
改。後文同。

②「公」字原無，據文意補。

③「王」下一字原缺，按以下數事均是指斥王抃，可參見  
《宋史》卷四七〇《佞幸傳·王抃傳》，據補。

④「軍」字原脫，據上下文意補。

⑤補：原作「稱」，據文意改。

⑥「賢」字原脫，徑補。

⑦貲，疑當作「償」。

⑧已：原作「以」，據文意改。

⑨虛恨蠻：原作「虛根蠻」，據《宋史》卷四九六《黎州  
諸蠻傳》改。

⑩此二句疑有誤。

⑪光祖：原作「光宗」，據文意改。

⑫酒酬公位下：似當作「酒酣公泣下」。

⑬「蓋公」句：原作「益公之中抱未嘗日而□吾君也」，據文意改。

⑭「亟」下疑脫「召」字。

⑮阜陵：原作「息陵」，據文意改。阜陵，孝宗陵名。

⑯帥對：當誤。據《宋史》卷二四七《趙彥逾傳》，疑當作「外除」。

⑰壬午：原無，據右引補。

⑱「太祖」二字原缺，據《宋史》卷三九二《趙汝愚傳》補。

⑲「遣」字原脫，據宋官制補。



儒藏

宋儒碑傳集卷一百四十九

陸煥之 袁說友 吳漢英

山堂陸先生墓誌銘

陸氏之遺譜曰、漢太中大夫賈、生仕、爲豫章都尉、葬于吳胥屏亭、始爲吳人、至晉侍中贈太尉玩、生始、始生萬載、萬載生子真、子真生惠澈、惠澈生閑、閑生貌、貌生丘公、丘公生探、探生山仁、山仁生玄之、玄之生元生、元生生景融、景融後四世曰文公希聲、仕唐、爲戶部侍郎、同中書門下平章事、文公生崇、崇生德遷、猶居吳、遭唐季之亂、始徙家撫州之金溪、德遷生有程、有程生演、演生處士諱戩、配曰周氏、處士生贈宣教郎諱賀、配曰孺人饒氏、宣教生從政郎諱九思、配曰孺人賜冠帔彭氏、從政生山堂先生諱煥之、字伯章、一字伯政、生而穎異、端重、五歲入家塾、坐立語默、悉有常度、讀書自能質問、出長者意表、與季父象山先生九淵、生同年

學同時、先生不敢以年均狎季父、象山則朋友視之、磨礱浸灌甚至、十三學爲進士、即有聲、十六諸父開以大學、先生一聞、輒窮深造微、極其指趣、而文章機杼、自成一家、宿士見之、多自貶以爲不可及、屢貢禮部、皆不合、學益成、文章益奇、閱世學多淪于異端、尤務自拔出、以張吾道、意所不可、雖名儒顯人爲時所宗者、必力斥之、恨力之不足也、諸父雖繼以進士起家、亦不用於時、象山晚爲朝士、陸陸百寮底、旋復斥死、先生滋信其道之窮、蓋將退耕于野、著書傳世、而未及也、以嘉泰三年十月戊子卒、年六十有四、諸孤以是年十二月乙酉、葬先生于某鄉之福林、娶陳氏、鄱陽人、有賢行、先十八年卒、子男三、洽、浚、浹、洽篤于養、先生出游、賴以經理家事、無後憂、浚游太學、有雋才、而器度淵粹、可喜、浹方就學、女五、項點、朱曰邁、鄧文子、其婿也、皆良士、餘二尙處、先生葬日迫、幽隧之銘未刻、旣

葬二年、浚以先生之友晁君百談之狀來請銘、某以既嘗序先生文章、所謂山堂集者、而先生多朋游、不應并以銘見屬、因辭焉。連三年、請益勤、乃叙而銘之。銘曰、

陸姓入漢、祖好時兮。迨及豫章、始南徙兮。吳晉至唐、世見史兮。斷自文公、三百祀兮。傳世八九、皆可紀兮。雖不公卿、世爲士兮。後乃浸大、名實偉兮。培養既久、產杞梓兮。維時伯章、繼以起兮。白首篤學、未見止兮。攘斥異端、正而不詭兮。天不少留、使耄齒兮。伯章之志、在其子兮。我銘于隧、亦以誄兮。

陸游撰 《渭南文集》卷三八

### 袁說友家傳

公諱說友、字起巖、建安人。生於紹興庚申歲。治周易。年二十有四、登隆興進士丙科。調建康府溧陽縣主簿、主管刑工部架閣文字、國子正、宗正寺主簿、改太常寺主簿、樞密院編修官、秘書丞、兼權尙

左郎官。以疾添差浙西安撫司參議官、知池州。以私計主管建寧府武夷山冲佑觀、知衢州、提舉浙東路常平茶鹽、提點浙西路刑獄、直秘閣、知平江府、節制御前許浦水軍。侍左郎中、兼右司郎官、假顯謨閣學士、萬壽觀使、兼侍讀、充接送伴金國賀生辰使。右司郎中、直顯謨閣、知臨安府。太府少卿、兼知臨安府。假顯謨閣學士、萬壽觀使、兼侍讀、充館伴金國賀正旦使。權尙書戶部侍郎、兼修玉牒館、過歲爲眞兼侍講。權戶部尙書、華文閣學士、四川置制使、兼知成都府。加徽猷閣學士、因任吏部尙書、兼侍讀、充崇陵覆按使。復以寶文閣學士提舉江州太平興國宮、知紹興府、浙東路安撫使。吏部尙書、兼侍讀、兼實錄院修撰、兼修國史。同知樞密院事、參知政事、提舉詳定一司勅令。資政殿學士、知鎮江府。控辭提舉臨安府洞霄宮、知潭州、改知隆興府。力辭、提舉臨安府洞霄宮、加大學士致



仕。嘉泰甲子歲薨於德清寓第。享年六十有五。官至宣奉大夫、爵至郡公、食邑至三千二百戶、眞食至六百戶。贈少傅、卹典如儀。累贈太師、魏國公。初公寓居湖城、號東塘居士。

《家傳》《東塘集》卷二〇

故兵部吳郎中墓誌銘

吳季札封延陵而墓在江陰之申浦、其後以國爲姓。今吳氏世居江陰、意其傳爲嫡。曾祖某、祖持、皆嘉遜不仕。父觀、以樂施聞于鄉、後以公貴、贈朝議大夫。公諱漢英、字長卿、少孤、力學、出從先生長者游、得毋自欺一語、服之無斃。登乾道己丑進士第、主婺之金華簿、以憂不赴。主無爲之廬江簿、邑近邊、學校廢、不貢士、且十年、公謂不興學、且無以厲士、而以令率人不若身先、乃輟俸以倡。旣學興而士集、復親程其能。明年大比、與貢者四、令爲吏所枉、不能明、公申而直之。令繼以疾逝、不能歸、公賙

而遣之。常平積負且三千緡、比公攝邑、悉爲補還。部使者由是知公。旁八郡疑獄滯訟、與關隘坑冶、事之大者悉屬公。先是淮民饑、有旨募民入粟、舒之舒城、得粟多、使者檄公往視。公欲遂散之、郡守謂必覆奏。公曰、民命在朝夕、比奏必不及。守不能奪、民以更生。用薦者、關陞主管湖南運司帳司。會故中書舍人陳公傅良將漕、時率諸生與同僚之好學者講道嶽麓。一日扣公所學、以毋自欺對。陳公歎曰、公所謂非苟知之、亦允蹈之、吾得友矣。光宗御極、有旨裁湖南月椿之太重者。陳以咨公。公以爲月椿誠不可不減、亦不可概減。不減無以寬民力、概減則無以贍軍賦。厥今惟衡、永、道三州自來未經蠲賦、而諸縣之版帳尤重。盍以爲先。陳公喜、起執公手曰、便煩以此意草奏。公即爲條上。凡三州月椿之當減者計一萬四千五百緡、報下如章。旣乃議減帳、以三州去臺治遠、不但費文移、而





事體亦有難踰度者、檄公親往。公冒暑疾馳、所至郡與守貳裁處其宜、所減者又七萬七千緡有奇、民以大寬、咸刻石紀上德。陳不俟公請薦之朝、謂奮自儒科、期爲有用之學。見之吏事、本自不欺之心。蓋以實言。既又屬之諸臺、舉員以足、改秩知太平之繁昌。紹熙癸丑歲大饑、荒政行、公先料簡饑民爲二、甚者計口日給、次者減半月給之地、遠則委官親授。閱明年三月結局、公前期請於常平使者、民未食新、恐爲德不竟、請展一月。使者下其事于一路、所全活不可計。縣惟銅官、靈巖二鄉、洊饑而統縣旱不及五分、法不應救荒。公請于州、準故歲行之、二鄉之民以濟。通判滁州、復漏澤園久侵之地、以廣上恩、而死有歸。貸常平久貯之麥、以修水利、而生者有養。尋攝郡事、聿新城樓、重建泉水、白塔二寨、內足以壯觀瞻、外足以制衝要。轉運司起椿積錢萬緡、失舟于瓜步、使者牒州拘勘官吏、

公察其非辜、且死無以償、即揭榜聽民投稅出限田契、未幾得鎗償之如其數、繫者以釋。攝郡僅期月、興廢舉弊、日新又新、而郡計視昔亦加倍。士民日走詣諸臺、願借之留。既審知其不可、則泣送越境。初、公之在繁昌、諸臺咸上其政、而前後二千石亦陸續以聞。朝廷已深知其治行。至是、部使者復摭實露奏、當國者恨見之晚。到闕、復陳安邊十策、如戍守之實、禁卒之選、審儲蓄、謹關隘、皆見施行。人服其知務。得旨與六院差遣。時安豐軍密奏、准北流民四十萬、且扣淮、有旨近臣集議。方公謁謝政府、有示以密奏、問計所出。公言、今邊臣不善用間、言未必實、宜靜以待之、而果妄。執政益知其可用。開禧改元、除監都進奏院。院吏容姦、章奏不時達、獄案闕狀、亦有蔽匿者。吏故分八保、公令各保置冊、日書所受郵置。次日取所屬批收銷注。弊以是革。院隸門下後省、一日以院事謁給事中鄧友

龍鄧時除兩淮宣諭使、方銳以開邊、問何以助我。公不答、退爲書上之、大意以爲今日之舉、評以孫子始計之書、無一可者。鄧大以爲忤。既兵潰而歸、始愧其言。二年五月、主國子監簿。未幾遷大理寺丞。有內醫藥童進狀訴有司、不爲直其地屋之訟、得旨下刑寺、擬定其詞、乃欲起遣錢塘門外賃戶自營居止。公謂藥童職當內宿、豈應出居關外、端以僦直稽違、故設爲自營居止之說以遣逐之耳。宜下臨安府理還僦值而仍其故。藥童意不愜、挾貴求改且百方、竟莫能奪。三年十一月、權臣既誅、即寘堂吏史達祖、耿樾、董如璧于理寺。三人用事久、士大夫多由其門、是獄之起、懼者甚衆、同列亦畏避不前。公慮獄久不決、將爲縉紳禍、乃親自詰問。既具得其姦賊之狀、即白之朝、黥隸嶺南。籍其家、得士大夫所與往還書尺、悉焚之、通衢由是中外以安。嘉定改元、除大宗正丞。傑閣以嚴屬籍之

儲歲久弊甚、整葺如新。時方更化、海內引領望治、公條三劄以獻。曰順祖宗之法、曰清中書之務、曰減四川之賦。丞相錢公、參政衛公謹遵行之。遷公太常丞。時卿少虛位、實專禮文之事、頌臺所掌大小祀服器皆弊、粢盛牢醴取具臨時、壇壝亦有圯者。公次第更新之、而申攸司、各恭乃事。未幾、祫祭儀物粲然。中貴人有創園亭于郊丘前者、莫敢問。公見之、謂是可忍、孰不可忍。中貴人聞之懼、不崇朝撤去。權兵部郎官。兵興之後、邊將上功多濫、公考覈有方、曹務爲清。輔郡有請增禁卒數百人者、長貳從公問可否。公謂增禁卒以嚴守備、誠輔郡之宜、然費將安出。惟不加賦、不虧上供則可、不然不可行也。議以是格。其年七月、面對陳三劄、一論沿邊形勢、二論銅錙漏洩、三論宗室有罪久閉非宜。上皆嘉納、付外施行。對畢、遂上更迭之請。自是凡八九上。錢丞相以公篤實、欲留以自助、皆卻弗



報。會言者欲有所撼動、疑公爲黨、論罷、主管台州明道觀。閒居六年、凡四書明道之考、未嘗以書干廟堂。幅巾芒屨、日與親朋徜徉田里間、以觴詠自遣。慕陶淵明賦歸來辭、忘懷得失、故自號歸去老人。七年四月、官簿之年將及、遂上疏告老。命下、越月疾作、因與弟姪訣、以篋中所有盡散之。又月餘、當六月既望、卒、享年實七十有四。當暑大雨驟作、凜如清秋。官自陞改凡七轉至朝請大夫。娶故禮部侍郎金華陳公巖肖之姪女、封宜人。後公十年卒。四子、長曰渥、迪功郎、監通州石港鹽場、其卒也先夫人五年。曰沐、今官修職郎、監池州戶部贍軍酒庫。曰藻、今官修職郎、安吉州德清縣丞。曰淡、舉進士。孫曰十能、百朋、千遇、十翼、萬雋、皆未官。公性姿嚴重、操尚清平、平居無媒語、無慢容、無聲色、耳目之玩、縑素之衣、有十年不易者。卒之日、猶起坐燕室、疾加革、始就枕而逝。自其初在廬江攝邑經

年、第支本俸、沿檄所過、不批驛券。在滁陽攝郡、乃悉廢互送、有餽者易元封酬之。凡俸皆計日截支、官所市物必倍給其直。回翔班著、唯遷轉及節朔修公謁、晚歲頗經涉清華、皆由序進、不自意得、蓋其不自欺之學終始貫徹如此。宗族親黨、稱力周給。女有未嫁、已俸嫁之。姪未奠居、遜屋居之。追孝祖考、恨不及養、自高曾以下皆買田冢旁以給守者。性嗜書、於國朝典故考計尤詳。平生喜爲詩、自謂非工、率棄去。退休方稍稍編錄、有歸休集十九卷、藏於家。卒之明年三月十有五日、葬縣之昭德鄉綺山之原。其後諸子將奉陳夫人之喪合葬、屬某爲銘。某嘗與德清丞會于茅山之陽、辱與之交、遂不復辭。某年德清復與昆弟合辭、以今奉議郎新知建康府句容縣事丁君宗魏疇昔所狀公行來請。某以公之行也著、丁之言也信、皆足以詔後、故爲序次之不疑、而繫以銘。銘曰、

言必顧行、行必顧理。終始惟一、視表如裏。曰毋自欺、展也君子。吾歸孔時、吾樂孔真。摩挲松菊、左右親賓。是以似之、歸去老人。若堂其封、綺山之麓。申浦相望、有永其續。

劉辛撰 《漫塘集》卷二八

校記

①三：原作「二」，據文意改。

宋儒碑傳集卷一百五十

楊簡

寶謨閣學士正奉大夫慈湖先生行狀

先生諱簡、字敬仲、姓楊氏、家世天台、十世祖自寧海徙明之奉化、後又徙鄞。紹興末、虜突淮右、考避地慈溪、因占籍焉。曾大父諱宗輔、大父諱演、皆不仕。考諱庭顯、臞臞然儒、而果毅有識量、義所不可、萬夫莫回。屹砥柱頽波中、奮自植立起門戶、繩己甚度。飭弟子齊家有紀律、書訓累牘、字字可佩。然與物極平恕、一言之善、樵牧吾師。自少志學、弗得弗措、省過嚴密、毫髮不少宥、至泣下、至自拳。象山陸文安公碣其墓、謂年在耄耄、而學日進、當今所識、四明楊公一人而已。故任承奉郎、累贈通奉大夫。妣臧氏、碩人。先生生有異稟、清夷古澹、淵乎受道之器。誕降之夕、猶居鄞、祥光外燭、亘天而上、四相望之、以爲火也。輒集衆環向、入小學、便儼立若

成人、書堂去巷陌、隔牖間一紙、凡遨戲事、呼譟過門、聽若無有。朔望例得假、羣兒數日以俟、走散相徵逐。先生凝靜几門、如常日課、未嘗投足戶外。既長、任幹蠱、主出入家用外、終日侍通奉公旁。二親寢、已弇燈、默坐候熟寐、始揭弇、佔畢、或漏盡五鼓、爲文清潤峻整、務明聖經、不肯規時、好作俗下語。踰弱冠、入上庠、每試輒魁。聞耆舊言、先生入院時、但面壁坐、日將西、衆闐闐競寸晷、乃方舒徐展卷、寫筆若波注、無一字誤。寫竟復袖卷、舒徐俟衆出、不以己長先人。乾道五年、以一經冠南宮選、登乙料、授迪功郎、主富陽簿。簿於邑號閒冷、先生誠以接物、衆畏信之、相戒奉約束、惟謹。走吏持片紙入市、可質數千。日諷詠魯論、孝經堂上、不動聲色、民自化孚。初先生在循理齋、嘗入夜燈未上、憶通奉公訓、默自反觀、已覺天地萬物通爲一體、非吾心外事。至是文安公新第歸來富陽、長先生二歲、素



相呼以字爲交友、留半月、將別去、則念天地間無疑者。平時願一見莫可得、遽語離乎。復留之、夜集雙明閣上、數提本心二字、因從容問曰、何謂本心。適平旦嘗聽扇訟、公即揚聲答曰、且彼訟扇者、必有一是、有一非。若見得孰是孰非、即決定謂某甲是、某乙非矣。非本心而何。先生聞之、忽覺此心澄然清明、亟問曰、止如斯邪。公竦然端厲、復揚聲曰、更何有也。先生不暇他語、即揖而歸、拱坐。達旦、質明、正北面而拜、終身師事焉。每謂某感陸先生、尤是再答一語、更云云、便支離去。八年秋七月也。已而、沿檄宿山谷間、觀故書猶疑、終夜坐不能寐、天瞳瞳欲曉、忽灑然如物脫去、乃益明。淳熙元年春、喪妣氏、去官居堊室、哀毀盡禮、後營壙車廄、更覺日用酬應、未能無礙。沈思屢日、偶一事相提觸、亟起旋草廬中、始大悟變化云爲之旨、縱橫交錯、萬變虛明、不動如鑑中象矣。學不疑不進、既屢空屢

疑、於是乎大進。先生之至富陽也、閱兩月、無一士來見、怪問之、左右對曰、是邑多商人肥家、不利爲士、故相觀望、莫之習也。先生惻然、即日詣白宰、謂茲壯邑、於今爲赤縣、而土俗茶陋、學道愛人、宰其職矣。且僚佐繫銜、例主學事、無以風動教化之絃歌。吾邑子坐靡稟稍、效尤俗吏束濕、程賦役、事笞箠、吾食且不得下咽、柰何。宰唯唯、遂破食補生徒、文理稍順、即收之。先生日詣學相講習、又約宰凡稱進士、優以示勸。秀民自是欣奮、恨讀書晚。有自山出者、尤朴茂、來問學。先生曰、子姑習拱。既數月、曰、可矣。與之語、孜孜窮日夜不厭。先生憂去、輒提篋以隨、願卒學。後擢第爲名儒、邑人爭相慕效。文風遂益振。故老至今德之。服除、以通奉公畏浙江濤、受紹興府理掾、便就養。犴狴必躬臨之、端默以聽、使自吐露囚情、炯燭罔失毫末。猾吏僅行文、案手膠拳、莫敢舞越。陪都臺府鼎立、大抵承媚風旨、



不暇問可否。先生公平無頗、惟理之從。一府史觸帥、怒送獄勘之。先生白無罪可勘、命勘平曰。先生曰、吏過詎能免、若今日則實無罪也。必摘掬往事置之法、某不敢奉命。帥大怒、先生歎曰、是尙可爲乎。歸取告身納之、爭愈力、帥知不可屈、遂已。一憲使嘗舉職官、一日緣兩造是非、壓先生就己意。先生趨庭抗辯、捧還削、憲莫能奪、改容謝之。每白事上官、必從容陳述、有不合即退思、思之而審、堅守無所撓。或大礙不見聽、則決去而已。朱文公持庾節、薦先生學能治己、材可及人。居無何、關陞。先是太師史越王薦引諸賢、而先生居第二、謂性學通明、辭華條達、孝友之行、閩內化之、施於有政、其民心敬而愛之。得旨、任滿都堂審察。僅一考、即移注。先生不欲、文安公書來勉之、不可。親庭有命、乃不敢違。差浙西撫幹。大尹張公杓雅敬先生、先生亦渠渠與之盡。幕中本無事、及是多所委賴。吏牘曰

相銜在庭、天府濫穰、類多戾契、齟齬、不易可辦。先生雍容立決、的中腴會、莫不服爲神明。畿甸災、意忪忪叵測、白尹宜戒不虞、遂委督三將兵。接以恩信、得其心腹、出諸葛武侯正兵法調肄習之、軍政大修、衆大和悅。先生於是益信人心至靈、至易感動、億萬衆之心、一人之心也。徒恃詐力相籠絡、若虎豹然、日憂其將噬、大不可。故每論元帥、當以四海爲一家、撫士卒如室中人、習正兵不可敗、先生之規模也。自入仕固未嘗祈人舉、亦不效尤稱門生。求腳色狀、例遜謝不敢答、而諸公爭推擁、若恐後。輒從部中得去、剡章輻集、溢數、削返之。改宣教郎、知紹興嵊縣、以外艱不往。宰饒之樂平。故學宮逼陋甚危朽、相支柱、苟旦暮。先生曰、教化之原也、可一日緩乎。撤新之、首登講席、邑之大夫士咸會、誨之曰、國家設科目、欲求真賢實能、共理天下。設學校亦欲教養真賢實能、使進於科目、非具文而



已。然士之應科目、處學校、往往謂取經義詩賦論策耳、善爲是、雖士行掃盡、無害於高科、他何以爲。持此心讀聖人書、不惟大失聖人開明學者之意、亦大失國家教養之意。人性至善、人性至靈、人性至廣至大、至高至明。人所自有、不待外求、人所自有、不待外學。孩提之童、無不知愛其親、及其長也、無不知敬其兄。見牛穀鯁、誰無不忍之心。見孺子匍匐將入井、誰無往救之心。是謂仁義之心。是謂良心。即堯舜禹湯文武周公孔子之心。即天地日月鬼神之心。人人皆有此心、而顧爲庸庸逐逐、貪利祿、患得失者所熏灼。某竊惜之、敢先以告。每謂教養茲邑、猶欲使舉吾邑人皆爲君子、況學者乎。誨之諄諄不倦、剷除氣習、脫落意蔽、本心本自無恙。其言坦易明白、聽之者人人可曉。異時汨於凡陋、視道爲高深幽遠、一旦得聞聖賢與我同心、日用平常無非大道、而我自暴自棄自顛、冥而不知、

有泣下者。入齋舍、晝夜忘寢食、遠近爲之風動。初入境、訪求民瘼、則聞楊石二惡少以嚙健虛喝官府、姦人無賴、淵藪歸之、起事端、賊我良善。或不才長吏反利之爲鷹犬、挾借聲燄、生其爪角、莫可誰何。交事未久、果狺狺然來搖牙庭下。先生灼見姦狀、趣提圈中、加責罰、諭以禍福利害、咸感悟、願終自贖。由是足不及公門、邑人銜化、以訟爲恥、夜無盜警、路不拾遺。未三考、以國子博士召。紹熙五年、寧宗皇帝即位之初年也。二人者大率衆相隨出境、外呼先生楊父、泣拜戀戀不忍離。既赴監講、乾繇反覆數千百言、發人心固有之妙。欣欣然人自慶幸、謂先聖贊易後未之聞也。時御筆遵孝宗成規、復三年之制、先生奏、陛下此舉、堯舜三代之舉。此心、堯舜三代之心。順此心以往、則堯舜三代之盛復見於今日。但臣深恨上行而下未效、羣臣衰服之餘、常服則紫緋綠、大非禮。虜人曩日嘗歎孝



宗復古、且謂金主亦欲依倣而行。今陛下順聖心行之、破羣臣非禮、久利亦當溥及四夷、心悅誠服、豈不益光明偉特、爲萬世法歟。趙忠定公汝遇定策宗英、實贊初政、推崇道學、茅拔茹連、公論翕然奮張、謂我本朝統承二帝三王之脈、非漢唐所可及者、正在斯道昌明、人知禮義、是故國有元氣、三綱九法賴以司命、此皆累聖培植及二三大臣相與主張之、天下引頸朝夕望太平。時主議者害公山立、扼我其上、造無端罪狀垢染公、斥之去。祭酒李公祥抗章辯之、先生按學館舊事請列劄、不許。告同列、人人相顧語難、先生曰、拚一死耳。遂上書言、臣與汝愚義合者也、汝愚豈每事盡善。至被不韙以出、則舉天下皆能亮其忠也。昨者危急變駭、不可具道、軍民將潰亂、社稷將傾、陛下所親見、汝愚冒萬死、轉危爲安、人情安定、汝愚之忠、陛下所心知、不必深辯。臣爲祭酒、屬日以義訓諸生、若見

利忘義、畏害忘義、臣恥之。汝愚往矣、不當復來、今日之言、不爲汝愚發、爲義而發。未幾亦遭斥。諸生復激於義、爲先生辯、又斥之。一時端士正人、例誣以僞、若先生則見爲僞之尤者、痛黜逐、掃地不留根株、而其禍滔滔矣。主管台州崇道觀、再任、轉朝奉郎。嘉泰四年、賜緋魚袋、朝散郎、權發遣全州。將陛辭、擬二劄、其一言、天下惟有此道而已、天以此羣覆地、以此載、日月以此明、四時以此行、人以此羣居乎天地之間而不亂、是故得此道則治、失此道則亂。得此道則安、失此道則危。得此道則利、失此道則害。此萬古斷斷不可易之理。自漢而下、雜之以霸、故治日少、亂日多。此心即道、惟起乎意則失之。孔子曰、毋意、意不可微起、況大起乎。起利心焉則差、起私心焉則差、起權術心焉則差、作好焉、作惡焉、凡有所不安於心焉皆差。臣願陛下即此虛明不起意之心以行、勿損勿益、自然無所不照、賢

否自辨、庶政自理、民自安自化、四夷自服。此即三王之道、即堯舜之道、願陛下無安於漢唐規模。其二言、國家舉大事、必上當天心。上帝以爲可戰則戰、上帝以爲未可則勿戰。易曰、天地之大德曰生。上帝視南北之民一也、惟無道甚則誅之、未至於甚、人心猶未盡離。苟亟戰、使南北無罪之民肝腦塗地、豈上帝之心也哉。必民心盡離、如獨夫紂、帝乃震怒、前徒倒戈矣。是爲湯武之師。故志曰、行一不義、殺一不辜、而得天下、有所不爲。公羊九世復讎之論、非春秋本旨。臣願陛下成湯武事業。又、軍帥剋剝諸軍、怨讟溢於聽聞。陛下亟罷剋剝之帥、擇用不以官職爲意、不受私謁之人、則三軍之鼓舞、士氣百倍、更得元帥大賢大智、習知將略者、訓治諸軍、數年後庶其可用。廷議方易爾搖邊瑣口、語籍籍、莫敢遏其端萌。故先生願懇陳之。刀筆小吏狐鼠弄威福、冒節鉞、張甚。先生趨修門間、慙

修尺牘、答曰、我無是也。未及對、論罷。自後兵連禍結、肝腦塗地、語若合符。識者恨先生扼不上聞、爲之痛惜。主管建昌軍仙都觀嘉定元年上厲精更化、首訪耆德、除秘書郎、轉朝請郎、遷秘書省著作佐郎兼權兵部郎官。先生平時、日夜長慮、無路以告於上。輪當面對、遂極言時弊、陳經國之要、首奏陛下亦知都城之內外有餓奪市食者乎。有勢不能俱生、沈子若女於江者乎。都城之東有婦閔舅姑之窘、請鬻身助給、姑聞之自經死、舅知姑死又自經死。子歸、知父母死、又自死。婦以舅姑及夫俱死、又經死。又有取小兒烹食者。嗚呼痛哉。近在輦轂之下、而致此極。又況淮民相食、妻食夫屍、弟食兄屍、以至父子相食其屍。陛下爲民父母而有此羣臣之罪也。望陛下急詔大臣、集羣臣詳議、內外多少財賦、陷沒於賊吏之手、多少財賦徒費於送迎、而不思擇賢久任。多少財賦費壞於科舉、取浮

薄昏妄背理傷道之時文。諸軍虛籍、不知其幾、以虛籍之費濟饑民、何爲不可。聞淮民之饑者、欲度江、郡守遏之、結怨饑民、是激之使爲亂。又聞賑濟官以嘯聚申上司、累累查不報、昏繆若此、而朝廷未聞黜陟、臣大懼養寇危社稷也。又奏、今之守令多昏而聽吏、多懷私而徇利、詞訟反是爲非、反非爲是、飲恨含怨、無所告訴。二稅已納者復追伏、則囚則絀訊、或舉債、或鬻產、甚者鬻妻賣子。陛下試思民情至是、其怨當何如。重以今歲旱蝗、郡守不肯蠲稅、害民弊政不可勝紀、此不擇賢之故也。在外官司以汙爲常、公取竊取、對送互送、一會至送千緡、彼此本庫自支。生辰有送、子生若孫有送、子弟又有送。今國家患無財、束手無策、得賢則官庫無公取竊取之盜、財不可勝用矣。此又不擇賢之故也。元凶妄肆、小人道長、風俗大壞、今雖誅殛而餘風未殄。陛下宜汲汲爲計、勿從士大夫庸庸苟

且之論。臣自知學以來、熟思治務、惟有一策、每路擇一賢監司、使監司各辟本路郡守、守辟縣令。守令各辟其屬、先於本貫人、本貫無人乃及外邑。旣得賢、必久任。擇賢久任、則百事成。不擇賢久任、則百事廢。擇賢久任、則社稷安。不擇賢久任、則社稷危。宰執臺諫知社稷安危在此、共堅守此、不以親故私情敗國家公義。辟非其人、并罪舉主。此令一下、人知仕進之路、悉本實行、不用虛文、則舍惡從善、舍僞從實、吏姦頓掃、民悅財豐矣。自此因保甲漸修比閭族黨之制、書其孝友睦婣、書其敬敏任恤、書其德行道藝、與其賢者能者、肆成人有德、小子有造、舉明主三代之隆矣。又奏、古者六軍軍將皆命卿、今諸將率從事武勇、未熟復乎古先聖王之訓典、未踐修乎詩書禮樂之實德、則整齊諸軍、不過射刺擊戰耳。今陛下宜精擇文武俱通之儒、法古司馬以尹正之、訓導之、賞諸卒之孝者、忠者



善者、則惡者潛化。祈天永命、鞏國祚於泰山、在此而已。殿司十三軍大盛、宜析小半益以司馬、餘卒以備三司、則其勢均、可以防後患。三劄恫切、上數俯首諦視、至讀饑民相食處、蹙額久之。人爭傳誦、流入北境、見者輒雪涕。舉兩手曰、此江南楊夫子也。二年旱蝗、詔求直言。先生復上封事。臣聞旱者、災厲之氣。三才一氣、如人一身、腹臟作楚、則四體頭目亦爲之不安。人事乖厲、則天地之氣亦感應而爲乖厲。孔子曰、聖人有國、日月不食、星辰不孛、海不運、河不滿溢、川澤不竭。連年旱蝗、雖或由軍興殺人及流移死者多、而其餘人事亦大有乖厲。郡縣官所至贓污、怨讟充塞、豈不感動天地而爲旱蝗。近者凶人謀爲大逆、天佑宗社、幸即敗獲。乃官司多非其人而無德教、時文取士不考實行、故放僻姦邪之風盛、豈不感動天地而爲乖厲、爲旱蝗。旱蝗根本、近在人心。陛下雖請禱於宮中、又分

命備於羣神、略降雨澤、未至宏濟者、旱蝗之根本未除也。臣臘月三劄所陳、皆弭災厲、消禍變之道。願陛下與二三大臣熟計之。天官汪公達、小宗伯章公穎咸相敬禮、願親接聞誨言。汪牒兼考功郎官。江西隱士吳姓者、漕司申請謚、先生按、吳有云、安社稷而以庭幃在念、不知爲臣之道也。孔子曰、以孝事君則忠。既違先聖訓、且啓誘人使不念親。又其子觀先儒語亂臣十人、問大姒爲誰。吳曰、武王母。曰、何故母亦爲臣。答曰、率土之濱、莫非王臣。其子曰、是尊無二上之意乎。吳以是奇之。竊惟有婦人焉、當是武王后、使臣母之說行、是驅天下人子不母其母、不孝則不忠、不忠不孝、天下大亂、胥而爲夷狄、爲禽獸、難議謚。章亦牒兼本部郎官。先生舉賢不可梯級取、實知其人、即自舉之。剡章既上、然後取部示牒照所舉者。嘗曰、爲國薦賢、吾其職也。而先私照牒於人、且又剡章付之、使自上、此



何理乎。西府爲親故問京狀先生難之。至再三終不許。後欲舉某氏。某未審。囑當路原善先生者。問果否。當路笑曰。此老欲舉宜自舉。吾有言即敗乃事矣。除著作郎。遷將作少監。並兼職如舊。三年面對。有左曹郎官者爲前班。上眷記先生。特格下左曹。先生首奏。陛下已自信有大道乎。舜曰。道心明。心即道。孔子曰。心之精神是謂聖。孟子曰。仁。人心也。此心虛明無體。廣大無際。日用云爲。無非變化。故易曰。變化。云爲。虛明。汎應。如日月之光。無思無爲。而萬物畢照。陛下已自有此大道。又聖性澹然。無所好嗜。宜清明舉無失策。而猶有禍變云云者。臣恐意或微動。如雲氣之興。故日月之光有不照之處。舜禹相告。猶以精一爲難。願陛下兢兢業業。無起意。不起意。則自然知柔知剛。知賢知不肖。洞見治亂之機。常清常明。可以消天災。弭禍亂。次言。今江淮湖湘之寇並作。由賢不肖溷淆。監司守令

而下多非其人。是非顛倒。尅虐不恤。故下民怨咨。聚爲羣盜。陛下當精擇衆所推服。正直不撓之人。巡行天下。黜陟監司守令。昔先臣范仲淹。富弼。亦言。委路自擇知州。委州自擇知縣。仍久其官守。異政者就與陞擢。臣深念時務。莫先於擇賢久任。所任既賢。則餘不肖乃害民敗國之人。不足深恤。又次言。改過。聖賢之大德。近世士大夫多以改過爲恥。故人亦不敢忠告。王安石本有非常之譽。諸賢競議新法。決於去位。安石豈不動心致疑。而決策不回者。重於改過也。故其末流。小人類進。禍及國家。陛下取羣臣之改過服義者表章陞擢。使凡建議。不遂非飾辭。則集衆智歸於一是。國家何事不辦。而堯舜禹湯之大道。復大明於今日矣。先生曩嘗口奏。陛下自信此心即大道乎。上曰。心即是道。略無疑貳之色。問。日用如何。上曰。止學定耳。先生謂。定無用學。但不起意。自然靜定澄明。上曰。日用

但勿起意而已。先生贊至善至善，不起意則是非賢否自明。此日復奏，陛下意念不起，已覺如太虛乎。上曰：是如此。問：賢否是非已歷歷明照否。上言：朕已照破。先生曰：如此，則天下幸甚。問答往復，漏過八刻。先生出，上目送久之。兼國史院編修官兼實錄院檢討官，請改史法，從編年之舊，謂孔子作春秋，書某年某月某日某事，人讀之以爲是者道也，以爲非者非道也。如此而書，大道自明。自司馬遷改編年爲紀，爲世家、列傳，使後世見事見人而不見道。遷不知道，故敢頓廢先聖法度，後人又靡然從之，故道不明於天下。某等不敢苟從，以壞聖朝大典。後不果上。先生凡兩章引年一丐祠，皆不允。已而面對，所陳久未施行，遂力求去，得溫州。先生每歎風俗之壞，自上啓，周禁羣飲，至執至殺。後世雖甚不善，尙賜酺有時，不縱爲羣飲事。倡優下賤，人道所不齒，顧貨視之，以媒飲者，治容列肆，導

淫釣利，傷風敗俗，莫此爲甚。到郡之明日，妓羣賀，即戒之，具狀來，衆亦未諭也。至則皆判從良去。異時督賦之吏，星馳火駕，上下相束，皇皇不能以朝暮。至是寂無一跡，歷縣庭，獨首移文罷妓籍，首訪賢者禮致之，示標表，首崇孝養，明宗族相恤之令，首行鄉紀，效周官書敬敏任恤之類，書善不書惡，願與士夫軍民共由斯道。上下呼舞載路，如脫湯鼎，濯清波，如從寒谷中生春矣。詞訴類局於日分，難遽達，先生架大鑼戟門外，令訴者自鳴，鳴即引問，立剖決無待。每受詞，采訪縣官賢否，以至不一問之，言人人同，乃行黜陟。文移僚屬例書名不押字。據案方書判，有喏於庭者，無問誰何，即釋筆拱答揖人。言苟是，雖賤隸必敬聽。於理未安，雖至親不爲撓。有私讎者，五百爲羣過境內，分司幹官檄永嘉尉及水寨兵捕之。巡尉僂佻易事，不白郡，先生驚曰：是可輕動乎。賊徒五百，合家族何翅二千





口拒捕相殺傷變在頃刻耳。萬一召亂貽朝廷憂、百爾其死奚贖也。且兵之節制在郡將、違節制是不嚴天子命、違節制應斬。建旗立巡尉庭下、召劊手兩行夾立、羣官盛服立西序、數其罪命斬之。羣官堵進、爲懇致悔罪意、良久乃得釋。奏罷分司、其紀律如此。或訟售產寓公、負其直若干、先生曰、是固名流、有文且長、上位尊顯、何得爾。對曰、今所訴行也、文何以爲語。對曰、益苦、受其狀。旣而麤至者十八人、同所訴。即命吏籌計官帑、人給之。袖衆詞即其家、語曰、某知公必無是也、是在幹者。精誠所感、寓公爲動、則不得已吐實。先生曰、某知公必無是也、幸出幹者屬吏。寓公斬之、竟追斷償所負。瀕海膠禁甚嚴、商人庾稅闌出海、時副端方以威福奴視官府、二子新喪母、歸輒衰衣造庭、挺身自冒。先生從容書狀尾曰、楊某老繆、不堪爲郡、預乞一章、放歸田里。竟坐犯者如法。府第障官河立僦屋、

扼舟人喉衿、巷居者苦漑濯、而官失虞火之備、累致氣咽咽不得吐。有言者、先生命廂官立毀之、廂官懾怯莫敢前、曰、汝不食天子粟、不爲吾用耶。科首械之往、遂即日撤去、滿城歡踊、勒石名楊公河。楮券之秤提也、所至嚴酷、以柱後惠文從事、告訐成風、破家者相踵。先生寬平、不迫市價。自登天子下、使者郡、譏察使於先生爲先世契、出郊迎、不敢當、從間道走州入客位。先生聞之、不敢入、往傳道數四、乃驅車反。將降車、使者趨出、立戟門外。先生亦趨出、立使者外、頓首言曰、天使也、某不敢不肅。使者曰、契家子、禮有常尊。先生曰、某守臣、使者銜天子命、辱臨敝邑、天使也。某不敢不肅。遂從西翼偕進、禮北面東上。先生行則常西、步常後。及階莫敢升、已乃同升自西階、足趑趑莫敢就主席。使者曰、邦君之庭也、禮有常尊。先生曰、春秋主人雖微、例書大國之上、尊天子也、況今天使也。持之益堅、

使者辭益力。如是數刻。使知先生終守正不渝。乃曰。某不敏。敢不敬承執事。尊天子之義。即揖而出。既就館。先生乃以賓禮見。儀典曠絕。邦人創見之。莫不瞿然竦觀屏息。使者反告於朝曰。稱提若永嘉可爲法矣。後憲臺亦以譏察奉朝旨行郡。先生禮遜之如初。然事體異。天使升阼階西向坐。不終辭。故事。歲擷朱欒蒸馨木而化之。曰柑香。分遍朝路。號土物名品。又蠲楮真柑介饋。費大苛擾。悉削去。食用甚菲。設廚生埃。語家人曰。吾儒素爲天子任。撫字敢以郡爲樂。羞赤子膏血自肥乎。雖不督賦。而財未嘗匱。不設法。不立額。而課未嘗虧。蓋由廉儉自將。不費於無藝。中孚感物。而人自化服。不忍欺也。士咸向方。知務己學。有冒同姓登科者。既數年矣。忽大感悟。詣先生繳納出身。聞貴游狙聲樂事敖放。踣然難畏。相戒曰。老子無乃聞乎。悉度置之。一名卿治第甚華。中有堂尤偉麗。固常日交

賓之所。先生往謁。特委蛇延之別館。猶愧發顏間。豪侈頓消。兼并衰止。閭巷雍睦。無忿爭聲。諸色訟者。雖遠涉。甘心到郡庭受賭。是杖。杖之終無怨。軍民懷戀。有父母慈。家家肖像祀之。願阿翁壽。五年。除駕部員外郎。去之日。老穉纍纍爭扶擁。緣道曰。我阿翁去矣。將奈何。傾城出盡哭。有機戶嘗遭徒。亦手織錦字爲大帷。頌德政。葉侍郎適書別先生云。執事二年勤治。公私交慶。專利所及。戴白老人以爲前此未有。載於竹帛。形於圖繪。雲聚山積。歡沸井里。此實錄也。後十餘歲。上庠知名士猶極談邦人去思未艾。且謂當時真有三代之風。更久任。則一乘好矣。改除工部。上殿言。臣有當今第一急務。告於陛下。世俗常情。喜順惡逆。故其相與率多奉承。雖於同官。明知其過。而不敢言。恐拂其意。終將害己。習以成俗。牢不可破。故雖明知吏部注授不問賢不肖。而不敢革。恐拂不肖者之情也。雖明

知擇賢久任爲上策而不敢行、以員多缺少、恐不賢者不任、而拂其情也。以至中外獄吏箠楚取賂、以直爲曲、冤苦無告、當職憚煩、受成吏手、同官拱默、不復審聽囚辭。州縣承帖、吏卒困苦小民萬狀、同官雖知、不敢告長官、亦視爲常、恐拂其屬、姑容之。上官剛德始或案奏、其漏網者多矣、民怨吏、卒怨官、遂怨及朝廷。臣大懼中外積怨之久、一夫呌呼、從之者如歸市。今聖朝雖有善政、猶以一盃水救一車薪之火、節節盜起、皆乘民怨。願陛下明諭大臣、有長官能受逆耳之言、小官喜於聞過、或知過能改、特表章之。布告天下、切勿以爲小善而忽之也。堯舜舍己從人、成湯改過不吝。改過之善、惟孔子知之、後世罕知。非表章布告、使天下改觀、則衆以改過爲恥。此誠治亂安危所繫。人性本善、朝廷重賞導之於前、御史監司繩之於後、庶幾願聞過求忠告者多、盡掃喜順惡逆之私情、善政盡舉、

弊政盡除、民怨自消、禍亂不作。上嘉納之。除工部員外郎。六年、輪將對、先生謂、五十年深思熟慮、無出擇賢久任之上策。既累告於上矣、他何言。即此說行天下、事自無不治。此而未竟、又將旁舉細務、姑嘗試具奏牘、某不能是也。君子於其言無所苟而已。況告君乎。復詳劄申斯旨。除軍器監兼工部郎官、轉朝奉大夫。先生不樂用、磨勘初員郎時、遲數歲不轉、一故舊自爾相料理。此日亦部長貳白堂轉之。先生猶申省乞寢免。除將作監兼國史院編修官兼實錄院檢討官。七年、以兩院進御集、實錄、轉朝散大夫。虜大饑、北民襁屬歸我、蜂聚蟻壅、日數千萬計。邊吏間不知大體、列弓弩臨淮水射之。退。先生戚然曰、得土地易、得人心難。三代之得天下也、得其民也。況薄海內外皆吾赤子。不幸中土人落腥羶、一旦饑驅、故民出塗炭、投慈父母、顧與之靳斗升粟、而迎殺之、斬脫死、乃速得死、豈相



上帝綏四方之道也哉。即日上奏哀痛言之，不報。後十日，當面對，復謂：「方今上策無過擇賢久任，累白廟堂，亦已寢知擇賢久任之味，云且有驗矣。但朝廷承襲久例，科舉取士，專尚虛文，大壞士子心術。吏部注授專以資格，不考才德。郡守例二年爲任，知縣三年，餘京官選人各有定例，不肖者前後踵接，故妄作害民，致怨招禍，大盜累起。朝廷又憚改作，甚非祖宗所望聖子神孫之意。今兵帥多非其人，軍人懷怨，有語謂用命者無恩澤，不戰而走者擢用將帥。全才固難得，其有智勇，不刻剝，得士卒心者，不可謂無。楮券大失信，民對泣痛怨。後雖稍寬而有秤提，州郡過嚴，民甚冤苦。又鹽法累改失信，舊以年月日次第支鹽，今定舊鈔二分，新鈔八分，故舊鈔幾於無用。客子怨深至骨，軍器物料尙欠客子若干萬緡，不知已未支還。又放散軍人失所深怨，不知已未根刷收拾。最有一大利害，習

俗常談，以大公至正之論爲迂闊，以趨時苟且權譎之術爲通才。權術苟且暫遣目前，而人心不服，上帝不與，禍其在後。此國家治亂安危所繫。孔子曰：「一物失理，亂亡之端。」苟違此道，民畔如歸。惟陛下明察靜思，大臣亦虛己求言，聞過願改，君臣同心，則天下被如天莫大之恩。已乃歎曰：「吾益老當去矣，猶未已耶。」會有疾，遂連乞假。先生自永嘉後，告老丐祠之章又十餘上，每切切乎道義，謂有國者由乎道義，則上當天心，下合人心，有家者由乎道義，則上可以事君親，下可以臨民。某踰七十又幾年，三入修門，四經陛對，言無可采，澤不被於天下，徒綴班列，不去，義乎？不義乎？至此又極言當去之義，愈明愈確，而請愈力，遂除直寶謨閣，主管成都府玉局觀。十二年，除直寶文閣，亳州明道宮，再任。十四年，除秘閣修撰，紹興千秋鴻禧觀。十五年，特授朝請大夫，右文殿修撰，南京鴻慶宮，賜紫衣。



金魚。十六年、除寶謨閣待制、提舉鴻慶宮、賜金帶。十七年、皇上御極、除寶謨閣直學士、提舉仍舊、游賜帶。寶慶元年、授朝議大夫、慈谿縣開國男、食邑三百戶。尋授華文閣直學士、提舉佑神觀、奉朝請、親灑宸翰、屢頒詔旨、謂先朝耆德、朕心素所簡記、令所在軍州以禮津發赴行在。先生卧病控辭、至於五六。二年、授敷文閣直學士、累加中大夫、仍提舉鴻慶宮、尋陞寶謨閣學士、太中大夫致仕。三月二十三日薨於正寢、享年八十有六。先生清明純一、無生死異、屬纊之夕、怡然如平常時。遺奏聞、特贈正奉大夫、官其後如格、賻銀絹二百。訃告詞有云、作覲來歸、胡不愈疾。土歎明師之失、國奚黃髮之詢。學者觀之、爲之悲慟、鄉閭孺慕、走哭者交道。公卿大夫士無遐邇弔奠者交踵。四朝耆舊、百世宗師、生榮死哀、不愧不作。娶林氏、封令人。二子、恪承務郎沿海制置司準備差遣。克承家學、勉進未

艾。噉早亡。女三、嫁進士孫誼、宣教郎知湖州德清縣童居善、宜倅舒公諱璘之子銑。孫男五、埜、頊、基、在堂。孫女二、長嫁將仕郎韓燮、曾孫金。以三年四月乙酉葬邑之五峰。嗚呼、三代衰、聖教熄、異端邪說爭鞭駕於天下。其後傳註以爲經、章句以爲學、洙泗家法、徒存紙上之空言。穿裂剝蝕、舛於稊莠、學者信之愈篤、即所以遺害者愈深。求其真得我心之同然、洞照古聖於千載之上、無是理也。於赫我宋、篤生賢哲、而先生又挺出諸儒後。伏羲肇畫、初無文義可傳。孔氏遺書、不從言語上得。本心本聖、無體無方。虛明變化、無非妙用。斯道也、堯以之安安、舜以之無爲、禹以之行其所無事、湯以之懋昭、文王以之順帝則、武王以之訪洪範、周公以之師保萬民、孔子以之爲刪、爲定、爲繫、爲筆、削褒貶。是之謂中、是之謂極、是之謂秉彝之則。茫茫千古、智探巧索、如瞶商律、如膜指杓、而先生得之、斯道

於是大明開後學之夷塗、掃羣迷之浮論、有功聖門大矣。蓋由天資醇實、渾然不雜、是故立志也剛、進學也勇、而行之也有力。既大省發、終身以之勉、兢無須與微懈、且又克永厥壽、習久益熟、遂造純明之盛。若先生真所謂天民先覺者歟。其歸自胄監也、家食者十四載、築室德潤湖上、更名慈湖、館四方學子於熙光詠春之間而啓迪之、於是始傳詩、易、春秋、傳曾子、始取先聖大訓、間見諸雜說中者、刊訛剔誣、萃六卷而爲之解。謂人皆以易爲書、不以易爲己、以易爲天地變化、不以易爲己之變化、故面牆者比比、天地我之天地、變化我之變化、非他物也。私者裂之、私者自小也、先生是以有己易、人皆徇目爲見、徇耳爲聞、而不明夫哀樂相生、不可見聞之妙、不明夫禮樂無體無聲之妙、先生是以有閒居解、人心自明、人心自靈、夫人皆有至明至靈、廣大聖智之性、微生意焉故蔽之、有必焉

故蔽之、有固焉故蔽之、有我焉故蔽之。聖人不能以道與人、能去人之蔽耳。如太虛未始不清明、去其雲氣則清明。是性人所自有、不求而獲、不取而得、先生是以有絕四記。學者不反其所自有、而或陷溺於諸子百家之意說、紛呶簫鼓、疑似支離、坐崇其中、卒莫見道、先生是以有啓蔽。謂治天下其最急者五、一曰謹擇左右大臣、近臣小臣。二曰擇賢久任中外之官。三曰罷科舉而鄉舉里選賢者能者。四曰罷設法導淫。五曰教習正兵法、以備不虞。其次急者八、一曰募兵屯田、以省養兵之費。二曰限民田、以漸復井田。三曰罷妓籍、俾從良。四曰漸罷和買折帛、暨諸續增之賦及榷酤而禁群飲。五曰擇賢士教之大學、教成使分掌諸州之學、又使各擇井里之士聚而教之、教成使各掌其邑里之學。六曰取周禮及古書、會議熟講其可行於今者、三公定議而奏行之。七曰禁淫樂。八曰修書以



儒藏

宋儒碑傳集 卷一五〇

削邪說。先生是以有治務論。蓋先生之學以古聖

爲的、嘗言非大聖人終未全明、故於子思孟子猶若有所未滿。論治則三代之規模、苟爲漢唐事業、雖隆貴所弗願焉。其領玉局而歸也、門人益親、遐方僻嶠、婦人孺子、亦知有所謂慈湖先生、巋然天地間、爲斯文宗主。泰山喬嶽、秋月獨明也。始傳古文孝經、傳魯論、而釐正其篇次。平生多所著述、片言隻字、無非發明大道。散落海內、未易遽集。方哀之、其已成編者甲稿、乙稿。又冠記、昏記、喪禮、家記、家祭記、釋菜禮記、石魚家記、皆成書。時受恩師門至深至厚、自顧庸淺、何能發揮。然先生德業建諸天地而不悖、質諸鬼神而無疑、百世以俟聖人而不惑、初不以人言而輕重可否也。既葬有日、乃弗獲已、奉同志之命、姑誦其所聞。謹狀。寶慶三年正月十五日、門人嚴陵錢時狀。

錢時撰 《慈湖遺書》卷一八

### 慈湖楊先生傳

楊先生簡、字敬仲、慈谿人。清明純一、非禮不動、燕私儼恪、如臨君師。學以古聖爲的。入太學、第進士、主富陽簿。日諷詠魯論、孝經、堂上不動聲色、而民自化。陸文安公來富陽、長先生二歲、指以心學之要、遂北面師事焉。調紹興府理掾、朱文公持庾節、首薦之、每稱先生學有爲己功夫。宰饒之樂平、謂教養茲邑、欲使邑人皆爲君子、況學者乎、誨之諄諄不倦。爲講堂訓、曰、學者孝而已矣。時有古今、道無古今。時有古今、性無古今。聞者興起。以國子博士召、講易乾卦、發人心固有之妙。趙忠定公汝愚免相、祭酒李祥抗辨之、先生上書、亦以學黨斥、閒居十三年。以祕書召、遷著作、將作少監、守溫州。訪賢者禮致之、崇孝養、明宗族相卹之令、首行鄉、效周官敬敏任卹之類、書善不書惡。除工部郎、將作監、告老奉祠。召不起、終於敷文閣直學士。以寶



謨閣學士致仕、壽八十有六、諡曰文元。有詩、易、春秋、論語、古文孝經傳、孔子閒居解、又著己易、輯先聖大訓。先生至誠篤敬、期功之戚、下洎總麻服制、喪期一以經禮爲則、而容色稱之。平居接物、從容和樂、未始苟異於人、而高遠自不可及。北境傳誦其文、曰、此江南楊夫子也。

王應麟撰 《深寧先生文抄撫餘編》卷一

校記

①坐：原脫，據《宋元學案補遺》卷七四補。

②「經」上疑脫「自」字。

宋儒碑傳集卷一百五十一

周謨 高元之 孫椿年 曾炎 林居實

周舜弼墓誌銘

君諱謨字舜弼姓周氏。其先會稽人。八世祖勅仕南唐李氏。有軍功。官至御史中丞。徙居江州瑞昌縣。今爲南康軍建昌縣人。君資強毅。果於爲善。有不善立改。其接物溫然。少警敏嗜學。兩預鄉薦。文公朱晦菴先生守南康。君樞衣登門。盡棄其學而學焉。晝抄夜誦。精思篤行。南康抵武夷且千里。有重岡複嶺之阻。君嘗往就學。先生守臨漳。去武夷又千餘里。其地爲閩廣之交。瘴癘之鄉。君又往求卒業。旣歸。溫繹所聞。以書請益。先生答曰。講學持守。不懈益勤。深慰所望。當此歲寒。不易其操。尤不易得也。居家孝友。母喪。蔬食三年。治喪悉用古禮。斥去浮屠老子法。鄉人多效之。先生又以書勞之。曰。居喪盡誠。不徇流俗。此人所難。其見稱重如此。

先生沒。僞禁方嚴。君冒隆寒。戴星徒走。偕鄉人受業者往會葬。年逾六十矣。家故貧。事孀嫂。撫兄之子。極其敬愛。交朋友。處鄉閭。無間言。君生於紹興辛酉。其卒以嘉泰壬戌。葬於甘泉鄉箬坑之原。祖妣彭氏墓左。嘉定戊辰七月也。娶李氏。有涉德。盡婦道。後君三年卒。其葬以君之祔穴。子三人。晔。晫。昭。皆業進士。晫亦預鄉薦。女適進士蔡樞。崔若訥。黃萬英。先生以孔孟周程之學。誨後進。海內之士從之者。郡有人焉。先生沒。學徒解散。靳靳守舊聞。漫無講習。蓋微言不絕如綫。獨康廬間有李敬子燔。余國秀宋傑。蔡元思念成。胡伯量泳兄弟。帥其徒數十人。惟先生書是讀。季一集。迭主之。至期集主者之家。往復問難。相告以善。有過規正之。歲月浸久。不少怠。榦始仕江湖間。因得交於其徒。心忻然慕之。願卜居五老三峽間。從諸君後。未能也。嘉定丙子。自漢陽道過其里。集中來會者十七八。皆



佳士也。何其盛哉。於是君之子曄述其父之行。拜且泣曰。吾父入閩。與子交最厚。墓木拱矣。銘未立。將有待也。子辱與吾黨之士游。又辱過其里。敢請。又泣曰。自先生守南康。吾鄉之士始知學。自吾父入閩。士始不遠千里從學。吾鄉之爲季集。亦吾父發之。今沒而無傳焉。敢固以請。嗚呼。舜弼之學。行脩諸身。行於家。又取信於鄉人。使吾師之道講習不輟。今吾病且老。不能遂卜居之志。將以季集之約。歸語其鄉人。使行之。斯文之不至湮晦。非舜弼之力歟。遂不辭而爲之銘曰。

廬阜兮蒼蒼。彭蠡兮湯湯。地靈兮鍾秀。物產兮多良。諸儒兮勵志。吾道兮有光。夫君兮始倡。沒世兮不忘。

黃幹撰 《勉齋先生黃文肅公文集》卷三五

高端叔墓誌銘

余與端叔游舊矣。宦游契闊而情好愈篤。蓋其清

苦勤敏。皆余所畏。而與人薰然。又不得而疏也。投閒來歸。攜變離騷一軸遺余。曰。試讀之。當相與論其當。余退而讀之。擊歎其精深而悲其志。方將與之痛飲而極論之。而端叔已病。病久而不可爲。精爽猶前日也。一日遣女奴來。手札炳然。以所藏歐陽公爲進士時白欄及其史藁詩章見遺。且曰。吾將亡。以此爲永好。辭之。又至。未幾而亡矣。寔慶元三年九月癸丑也。往而哭之哀。將葬。其門人來告曰。先生葬有日。願得銘其墓。余爲之泣曰。嚮固嘗狀其先君之行。今又忍銘端叔耶。卒叙而銘之。君姓高氏。諱元之。端叔其字也。韓國武烈王曾孫曰士曄。朝議大夫。是爲君之曾祖。祖公仔。右宣教郎。燕山府路宣撫使司主管機宜文字。考世埴。修職郎致仕。母洪氏。封孺人。高氏家薊門。五代之亂。徙濠梁。又徙亳。是爲蒙城高氏。後居京師。建炎衣冠南渡。修職始寓明州。今日慶元府。著籍于鄞。安貧



而喜教子。君性穎悟絕人，勤篤亦絕人。居近市，獨處緒山蕭寺，顧無書，得易一編，晝夜誦不輟，遂曉大旨，鄰士異焉。稍借以書，君下意質疑，謹聽強記，執禮甚恭，人亦樂告之。飢寒寥落，辛苦萬狀，人或厭且怒，至排擯不容，瀕死者屢矣。而志愈厲，夜依佛燈，寒擁敗楮，或數月不盥櫛，由是博通經史諸子百家之書。少未知名，屯田郎三山鄭公鏐一見奇之，俾訓其子。鄭公爲鄞士師表，人以此加敬。始浸得束脩以奉親，且力于學。今漳州使君傅公伯成爲教授，折節定交，不以諸生遇之。由是門人益衆，殆數百人。少讀襄陵許公翰書及從沙隨程公迴，故尤邃于春秋。博采諸儒所長，搜抉無遺。聞人有書，曾不憚遠，裹糧徒步而求之。前後凡三百餘家，訂其指歸，刪其不合者，會粹爲一書，間出己意。號義宗，蓋十餘年而後成。晚多所更定，專務明經。自三傳而下，不盡以爲可。吾鄉及旁郡之爲春秋

者，多出君之門，或其門人之弟子也。嘗病學者不務下學上達，驟而求之太高，故自天文地理、稗官小說、陰陽方技、種藝之書，靡不究極。雖庸人一技可取，亦盡禮問焉。佛氏大藏經五千卷，讀之再過，他可知也。含英咀華，以昌其文。困阨多，故其思苦。憤悱極，故其得深。真有剴目鉅心，穿天出月之工。旣乃日造平淡，以幾于古。作詩數萬，存不能什一。自謂樂府不媿前作。嘗謂離騷之學幾亡矣，爲之九篇，曰愍畸志，曰臣薄才，曰惜來日，曰感回波，曰力隲，曰危衷，曰悲嬋娟，曰古誦，曰繹思，深得三閭大夫旨意。且曰：變離騷者，沿流于千載之後，而探端于千載之前，非變而求異于騷，所以極其志之所歸，引而達于理義之衷，以障隄于隕波之不反者也。又曰：班固揚雄、王逸、劉勰、顏之推揚之者，或過其實，抑之者多損其真。宋玉、賈誼、東方朔、嚴忌、淮南小山、王褒、劉向之徒，皆悲原意，各有纂著。大

抵紬續緒言、相與詹詠而已。原之微旨、不能有所建明。噫、君以爲騷人之本意將亡、君之意又將誰明之耶。性嗜書、家藏數千卷、手自點勘、寶之如珠玉。遇所未見、解衣輟餐、不計其直。又好周人之急、有古人內溝之心。田不滿半頃、或割十畝以遺親黨。事父母盡孝、浣濯炊爨、必身親之。初入郡庠、一羹裁必以奉甘旨、而食淡自如。人設異饌、不敢嘗、必歸以遺親。平居無疾言遽色、彊力而忍詢、薄之以患難而不可奪。教導生徒、勤慤盡誠、如訓己子。貧者致貨財則卻之、而訓愈力。有念其孤苦、衣食教誨、卒名于鄉。君無德色也。婺士柳義老于逆旅、君哀其窮、率鄉人供給之。死爲之棺斂、至殯于家、皆人所難。乾道四年薦于鄉。淳熙改元又爲第一、凡五上春官、卒不第、僅得因慶霈以榮其親。去年當受特恩、不就。年纔五十有六而卒。疾旣革、不食者月餘、自分必死、卻藥屏醫、而處之怡然。區處身

後事、纖悉無遺、獨以不得終養母氏爲痛。修職葬奉化之察廉岡、力疾作書、以母氏他日事屬其門人屠君槐、以其居近察廉也。且爲書以別親舊。君子曰終、豈不信哉。豈不哀哉。娶朱氏、里士友聞之女、先三年卒。子男三人、子高、子淳、子文。一女、淑、尙幼。家貧無以葬、門人相與經紀其家。以十二月甲申、葬君于桃源鄉蔣山新盛隩之原。始修職生名門、實爲殿撰睢陽劉公棐之甥。君學問固有自來、蚤受知于殿撰從子侍郎孝題、周公侍郎綰、周公年八十有二、爲君記謙齋、稱君之刻苦。雖聚螢積雪、和膽刺股、不能過也。屬文贍蔚、咄咄逼人。學益富、文益進、行益修。此其志欲立于萬人以上、而以謙名齋、可謂有志之士矣。客游括蒼、吏部何公僊風裁最高、愛君之才、教以詩律。其子參政公遇君尤厚、至今不衰也。禮部會稽陸公游文章少所許可、以詩人稱君。君又好前輩遺墨故物、對之則起



敬如見其人、得之則喜而不寐、以遺余者一二也。老校退卒與之語中原及兵家事、抵掌忼慨、有封狼居胥之志、故論兵法尤精。或得其一策以干時

宰、諸公爲之驚歎。使得少分自見、且將著于事業。而坎壈終身、不得一官以死、豈非命耶。義宗百五十卷、又有易論、詩說、論語傳、後漢曆志解各一卷、揚子發揮三卷、詩三千、雜著五百、號茶甘甲乙藁、藏于家。嘗結廬察廉、在大小萬竹之間、著萬竹先生傳、自言爲人達生任性、不拘拘儒者之節、好學而未至于道、好文而不中繩墨、好閒而剗心于古澹、苦吟而不能自己。鄉評亦謂君有不可曉者三、貧而疏財、貌古氣嚴而樂易已甚、衣冠垢敝、望之如木雞、而胸次灑落、綽有晉韻。知君者以爲然。銘曰、

君之生兮何爲、君之往兮何之。學窮百氏兮五上而空歸、蓄書萬卷兮竟死而何裨。天不可問兮吾

將誰訴。君視如歸兮吾又何悲。志在乎魯史之義、宗、文存乎楚人之騷詞。噫、後有欲知萬竹先生者、其視諸斯。

樓鑰撰 《攻媿集》卷一〇三

孫永叔墓誌銘

餘姚孫君椿年、字永叔、生五十九年、卒於慶元己未。六年十二月甲申、葬龍泉鄉澄溪原。君子之宏來索銘、值余得眩疾、文理顛倒、不自省錄、乃請山陰陸公表於墓以待。余疾更十年不愈、之宏索銘不置、間爲苦詞以撼余曰、澄溪木中琴瑟矣、奈壤下何。余愧不能答也。初、君五世伯祖樞密副使沔、號名臣、而君之曾祖璣、祖繹、無仕者。父修職郎述、始挈君於學、東南師友多聚其家。君剛特博達、精力過絕夷等。寒抄暑講、寢食失期會。凡書籍義類深淺、古今事物變通、采章錯綜、機神融液、往往心悟所以然、越之稠儒廣士、爭傾下君。君負其能、踏

省門五六、然終不得第、名於進士、髮謝齒落、遂至槁死、知者皆爲君歎惜。故陸公歷叙君學能、抽先民之微、智能發當世之慮、而恨其不及在人主前、口論手畫、見於用而成功名也。君旣不遇、行之家、推之鄉、寡嫂孤姪、待君而後立、衣食其族人、歲有常廩、親戚故人鄰里、賴以不凍餒、露居者甚衆。又出私錢築堤捍海、縣無凶年、繫君力也。所以著君之賢、哀君之困、開闔宛轉、句字抑揚、月逝年徂、讀者爽然尙親見君子之爲人也。所貴於生、謂吾不苟生也。所不憾於死、謂吾不遂死也。一字之稱、一善之目、古之名卿材大夫、良史記之、不過是爾。累行以尊名、而君能有之備、懿文以壽遠、而君能得之多、是固榮於生而耀於死矣。人之欲富、將以明予也。欲貴、將以明奪也。予奪之當否、賢不肖之所以異、而名稱之所爲有無也。世蓋有窮富極貴、而予奪之當否、名稱之有無、無得預焉、則賢不肖之

實、豈不前定也哉。君之前定者旣如此、陸公之文又如此、然則之宏之索、余銘速之勤、遲之久、余之答之宏、慢於疾、荒於言、宜亦必出於此也。君娶吳氏、四子、之宏爲長、與之亮皆繼君席鄉貢之裏、之穎女嫁某官史彌忠。銘曰、昔虞仲翔對王景興、朱育繼之、炳其丹青、越之多賢、有屈有伸、嗟乎孫君、我懷古人。

葉適撰 《水心文集》卷一六

### 孫君墓表

會稽餘姚縣有士曰孫君、名椿年、字永叔。其先山陰人。當仁宗皇帝時、有諱沔者、仕至樞密副使、有忠直名、謚威敏。威敏之弟曰洞、洞生儼、始東徙餘姚。儼生璣、璣生繹、繹生述、君之考也。以君貢南省、遇慶壽恩、補修職郎、實始聚書館士人、以善其子弟。子弟多自奮于學、而君尤知名、間游四方、從老師宿儒受學、尤好左氏春秋、班氏漢書、司馬氏通





鑑、平居至忘寢食、遇其得意、時時著說、以發明三家奧指、多世儒所不及。又從長老及有識者、講國家兵興以來、理亂得失之故、某事可法、某事可戒、至于淮江以北、極于司、并、幽、薊、山川險要、及前代用師饋糧道路所出、言之莫不詳盡、聽者忘倦。使君得至人主前、口論手畫、極利害是非之實、以感悟上聽、安知不見拔用而成功名哉。士固有幸不幸、未易以成敗論也。晚預特奏名、人皆謂公且遇合、乃復以不合有司意入下第。時有詔例補嶽祠、君辭焉。然君年未六十、識者以爲學識如此、安知終不合、而君不幸死矣。君雖終不合以死、然君家可紀者多、尤篤于孝友。兄早死、諸孤猶襁負、父母哀之。君曰、某在、兄不亡也。父母爲損哭泣。君于是奉嫠嫂、撫孤侄、盡敬盡愛。父母既終、視平日加篤。立義居、法度寬裕而密察、可久不廢。兩院子弟、分授諸經、擇名師、遣從學、朋游亦謹擇、以故皆有學

行可稱。姊適里中胡氏、夫婦皆早卒、君撫孤、恩意甚備。不幸其孤又早夭、君益哀憐之、復爲立後。胡氏之祭、繫君力得不絕。晚仿范文正公義莊之制、贍其族、長幼親疏、咸有倫序、歲以爲常。有餘、又以姻戚故舊、無遺力。紹熙中、歲旱、米價日翔、君悉發廩貸里人。明年、稼登糶賤、來償者止受其米如初貸之數。有鬻屋廬、將散而之四方者、君必貸之以錢如鬻屋之數、曰、所得幾何、奈何舍鄉里而去。以此旁近無流徙者。縣並海、堤防數決、在仕者欲泆湖、募人耕其中、積粟爲築堤費。君爭不可、曰、捍海固利矣、泆湖則無以灌漑、歲且饑、利不補害。請出私金、率鄉里共營之、堤可成。卒如君言、而湖利亦得不廢。君之所爲、大概類此、觀者可知其磊落不凡矣。君享年五十有九。以慶元五年二月壬申卒。卜以明年十二月甲申、葬于龍泉鄉澄清之原。娶吳氏。子四人、之宏、之亮、之望、之穎、皆有學行之

宏之亮嘗同試禮部。女一人，歸迪功郎衢州州學教授史彌忠，亦知名士。既納銘竈中，又來請文以表墓上。嗚呼，義修而命室，施豐而報裔，維報不忒，亦不在亟。尙其後人，克肖君德。慶元六年十月，中大夫、直華文閣致仕陸某表。

陸游撰 《渭南文集》卷三九

集英殿修撰致仕贈光祿大夫曾公神道碑

宋興，崇尙儒術，振起一代之治。直史館，贈太師，密國公南豐曾公致堯，以文鳴當世，直道正言，事太宗、真宗爲名臣。是生博士、贈太師、魯國公易占，有文章政事材，而仕不合，爲文十餘萬言，又著時議十卷。荆國王文公志其墓，蓋首稱之。六子皆登進士第。達者三人，曰鞏，爲中書舍人，以道德文章名世；學者宗之，號南豐先生。曰布，位宰相，謚文肅。曰肇，終翰林學士，謚文昭。當元祐盛際，徽皇初政，再

爲詞臣，氣節論議尤挺特卓偉。名儒如上蔡、龜山，俱謂端嚴有大臣之風。其後亦最盛。後六十餘年，曾孫刑部侍郎炎與從弟吏部尙書喚相繼取世科，同爲天子從臣，故家文獻表表一時。而南豐之曾益重于天下矣。侍郎字南仲，祖纁，明春秋擢第，奉使數道，歷知高郵軍、舒州。甫強仕，終承議郎，贈左中奉大夫。父協，年十九以詞賦魁胄監，一上不第，則攷古著書，有雲莊集行于世。終朝奉大夫知永州，贈正奉大夫。自文昭三世，皆娶強氏。文憲公家永州，始居湖之德清。公幼警悟，能言即知讀書。正奉語公曰：「吾家由密，魯二公至而祖，雖皆取科第，然師友淵源非止利祿而已。汝當志其遠且大者。」因銘其書室曰：「求己以勉之。」公服膺義方，益自刻勵，從名儒授毛、鄭詩。紹興三十年入太學，端明汪公應辰爲司業，深器之。隆興元年，賜進士出身，授左迪功郎、泰州海陵縣尉，兼主簿。時敵騎驚擾，



所在寇攘官吏多解散。公曰：巡徼職也，吾其可去乎。乃廣爲榜諭，以安集之。親捕劇盜數十輩，不以賞格介意，而言于理官：兵燬之後，宜從矜貸，類得末減。臺郡爭論薦，將羅致幕下，竟守職不就。秩滿，以關陞及酬獎循左儒林郎，調徽州教授。篤意教養，更新學宮，課試精審，有自旁郡執經席下者。奉二親就養，與其季燮俱，公立三樂齋以見志。丞相周文忠公必大參政李忠文公彥穎繼爲禮部侍郎，與當路交上京削垂滿，丁正奉憂服除，再爲溫州教授，如所以治徼學者。凡經指授，皆爲時名人。淳熙八年，改通直郎，知建康府江寧縣事。轉奉議承議郎。江寧軍民雜處，治訟多牽制，公不以利害回撓，一意字民，獄犴屢空。催科無擾，民感其惠，皆先期樂輸。推排陞降，悉得其實，至役有不俟差而願充者。公先于暇時，摭前輩賢令嘉言善行與法令之所當守者，爲邑政總類一書，講畫既詳，故施

于臨民，迎刃而解。父老詣臺府借留，參政錢文惠公良臣帥江東，偕監司上治最。吏部侍郎沈公揆繼將漕，又請亟加獎拔，以爲天下治邑者勸。任滿，命赴都堂審察。十五年，以明堂恩賜緋衣銀魚。十一月，幹辦行在諸司糧料院。光宗覃恩暨年勞，轉朝奉、朝散郎。紹熙元年八月，遷大理寺主簿，以新制兼左評事。究心詳讞，稱爲平允。輪對，請選劇縣歲命近臣舉歷任二人以授之，無拘資格，隨事旌賞，治有殊績，則待以不次。又請申飭權酷征稅之禁，利害詳明，時論韙之。二年八月，除司農寺丞。被旨，和糴米石五十萬，選屬吏之才者授以成算，戒以苛取，不趣而辦。三年，轉朝請郎。九月，丁母碩人憂。五年十二月，擢知溫州。慶元元年三月，陞辭復申劇邑薦舉爲令之議。又請稽版籍，聯保伍，汰巡尉之罷輒者。永嘉號多士，素服公化，故教令所下，不誠用勸。闢良田以贍學，養濟院以醫，廩其廢疾

無告者。民產子棄而弗字。月以公錢給乳哺者費。全活甚衆。二年秋未穫。颶風淫雨海溢爲菑。樂清尤酷。具舟筏畚耜以濟捍之。極意賑卹。奏蠲丁錢數千緡。水退。修築瑞安石岡及平陽三斗門。爲東塘以殺其衝。皆使可久。至今人賴其利。公正身帥下。細大畢舉。戢吏拊民。以循良稱。里社生爲立祠。且碑以紀其德。丞相葛文定公邨鎮越。及諸使者皆以最列。二年。轉朝奉大夫。三年。召赴行在所。四月入對。勸上垂意經術。恪守祖訓。嘉納忠諫。斥遠私昵。杜絕用例之弊。申嚴贓墨之科。遴選邊將。久任帥守。停印造以重楮券。禁銷泄以羨銅錢。廣和糴以厚邦儲。蠲逋負以寬民力。皆當世急務。除尙書戶部郎中。治左曹事。躬理文案。滯訟頓清。九月。充金國正旦國信使。將行。值憲聖慈烈之喪。旣越境。諭使去樂。接伴納噶厚之。以他辭解。抵故京地。前導奏胡伎。公叱止之。比押宴者至。猶然。公避席。

不拜。引義詰責。往復論難。竟去。口宣賜樂等語。始就位。授館燕山。凡命宴。皆請去樂。及罷燕射。悉勉從。使還。未嘗道其事。惟以講求內治諄諄爲上言之。始。文昭嘗使朔方。增重國體。及是有問公家世。以南豐對。稱歎名家者。再知典刑之所存也。四年。以竣事轉朝散大夫。六月。復除戶部郎中。總領淮西江東軍馬錢糧。諸郡賦不時入。侵欺移用。其目實繁。綱運弊蠹特甚。緡錢失期者三百萬餘。他物稱是。師不宿飽。公奏請下諸路期以兩月起發。且議賞罰。上可之。公復手疏屬部。約以不多爲文書。不遣吏卒。要束旣定。輸送以時。凡部運當進秩者。面以奏剡授之。競知趨勸。軍給以饒。五年。轉朝請大夫。七月。除直敷文閣。福建路計度轉運副使。首廉所部疾苦。民有被訟久繫而訟者反匿不出。乃戒郡縣必兩造俱集。始得予決。自是良愿無擾。姦無容欺。奉詔上便民事。公奏。請委部使者以翻訴。



之多寡當否爲縣令殿最詳列賦稅于契券之首、以革產去稅存之患。二稅不許高價折估、獄案以時奏報。定物力、選獄官。多見施行。又奏倚閣上四州積負鹽本、併免州縣所負正稅及虧收錢合十有六萬緡。累歲困于郡邑囚繫者、呼舞散去、而漕計視始至增鑹百萬、悉付來者、以寬氓征。嘉泰元年三月、詔入奏計、因論屬縣培克之弊、謂縣有內外、內縣于州取給、故苗稅征商悉歸于州。若外縣則俸給衣糧與凡支費不一而足。今爲郡者苗稅或概輪于州倉、征商或使他官吏侵擾爲縣者反藉以旁征巧取、肆行無忌。小民赴訴、郡不敢詰、宜戒其交相規奪。上嘉納之。除樞密院檢詳諸房文字、歷右司左司郎中、兼刪修勅令官。二年三月、遷中書門下省檢正諸房公事。歲中徧居宰掾、裨贊爲多。四月、除起居舍人。因直前奏事、請搜舉遺逸長吏、禮遣詣闕、以備咨訪。九月、敕令所修進慶元

條法事類、轉朝議大夫。十一月、除起居郎兼權刑部侍郎、同詳定敕令。十二月、轉中奉大夫、尋改兼國史院編修官、實錄院檢討官。三年四月、除權侍郎、賜服金紫。經筵讀兩朝寶訓終篇、轉中大夫。公持心忠恕、臨事明審、每謂刑獄爲生民之命、必使姦豪畏法、吏不舞文、乃可言政。廣右鉅商虐死其弟、流竄逃歸、輒從外臺改正、復有訴者、下棘寺閱實。權門諸用事者表裏、寺吏曲爲道地、綴補文書、肆爲誕嫚。公察其姦、執付京兆。獄吏求解萬端、公持不少貸。且併劾商人罪、卒以是去。六月、提舉江州太平興國宮。史院進孝宗、光宗實錄、轉大中大。夫郊祀恩、封曲阜縣開國男、食邑三百戶。開禧三年、轉通議大夫。嘉定改元、皇上更化、盡起故老、二月、公被命守婺、未幾改姑孰。暑行抵郡、適師旅饑饉之後、勞來流徙、寬逋節費、政聲徹聞。至秋、感暈眩疾。會合肥擇帥、詔以集英殿修撰移鎮。公曰、臣

子事君、東西惟命。今既屬疾、焉可冒爲。丐免之章數上、有旨輟行、治姑孰如故。雖整軍息民、爲國遠慮、而疾日以侵、求去益堅。二年二月、竟遂祠請、復提舉隆興府玉隆萬壽宮。宗祀禮成、進封開國子、加食邑二百戶。四年、自爲奏述出處大槩、乞骸骨、詔以通奉大夫仍本職致仕。越數日薨矣。寔正月二十日甲辰也。享年七十有一。遺奏聞、以光祿大夫告第、官其後如格。八月丙午、葬于臨安府錢塘縣欽賢鄉西谿山先塋之次、從所自卜也。娶九江王氏、封碩人。克有令德、善相夫子。先十年卒。子掄、承務郎、前監嘉興府都稅務。女適承事郎、新知婺州東陽縣陳貴誠。孫仲良、登仕郎。公資稟純明、器識凝遠、事親盡禮、謹守家法。妙年決科、安于平進。自海陵赴調、有同姓爲聘使者、金人問其氏族、自言蜀人、又問南豐後孰在班列。既歸以告、于是朝廷始加搜訪。時相意屬公、而公方欲從校官卒故

業、遂爲新安之行、不復以姓名通。未受代三十六日、遭外艱。既免喪、或以銓制方嚴、欲爲圖賞典以補餘日。公亦不顧、竟遲次六年、而前舉者皆無恙。恬于勢利、乃如是。先世資產推與其季、又以正奉遺澤及公郊、恩任二從子。內外族姻以至鄉黨鄰里婚葬急難、必賑而助焉。待人接物、謙抑有加、而律己持正、不可迴奪。敷歷中外、徊翔久之、始登禁從。既不得其職而去、杜門卻掃。谿園數畝、杖履徜徉、自號覺翁、因以名菴。晚年意象簡默、所造益深。出少至老、好學不倦。六經子史、手自校定。且以諸史傳記攷釋資治通鑑、續于攷異後。短章大篇、凡所述作、率皆溫潤典雅。而楷法行草、見謂精詣。尺牘書判、好事者藏弄爲榮。有覺菴集與邑政總類藏于家。公既葬、掄以校書郎陳君貴謙之狀來曰、先君子于法當得諡、將有請矣。願先爲銘詩、表于隧道。慨念在昔、先太師岐公初掌奏邸、正奉接武

周行、一時列院有子若弟多爲新進士。鑰于公事契既深、襟期莫逆、攝事西垣、公丞大農、俱奉親輿、陞堂展敬。兩仕永嘉、載筆左螭、皆有在前之媿。及鑰起于挂冠、公方奏最藩部。同年生落落如晨星、日溪公歸、以慰遲暮、而公薨矣。鑰長于公四歲、亦豈久于世者。死生契闊、撫事興悲、哀頓何足言文。惟公不負文獻之傳、故立本朝、使鄰壤挺挺有祖風烈。詩云、惟其有之、是以似之。非公之謂歟。銘其可辭。銘曰、

惟曾受氏、曲列始封。舞雩之傳、望于南豐。有戶部郎事我二宗。博士繼之、顯不在躬。六子聯芳、弟上攷功。德望彰徹、曰文昭公。本厚源深、寔生覺翁。學以求己、中積外充。早挹世科、奏最一同。翱翔周行、敷歷西東。仗節殊鄰、氣讐夷戎。外庸既訖、從上法宮。進難退易、先哲之風。聖化更新、起于閒中。申畀鉅藩、疾已內攻。施弗盡才、奄其令終。西谿之原、父

祖是從。後來方興、銘詔無窮。

樓鑰撰 《攻媿集》卷九七

### 林安之墓誌銘

自予與永嘉陳君舉傳良游、每道其學者林安之居實不去口。歲在壬辰、安之始來婺、相與共學。其冬以病歸、間二年復自溫來會、甚瘠且憊、形貌非復昔人、而志愈強、識愈明、其學亦非復昔人也。予憂喜參半。別去餘月、君舉以書赴曰、噫、安之死矣。哀甚、不能執筆、其爲我銘之。蓋安之之爲人、隆於師友、一日不見則惘然若有所亡。至其合堂同席、心融意浹、身之休戚、年之蚤莫、鄉閭之遠若近、皆不暇知。病益侵、尙講貫繹繹不休、獻疑者、納忠者、代之憂者、動之以危語悲辭者、日交於前。安之蓋自如也。士而有志於學者、蓋鮮亦既有其意矣。恍焉輒移、撓焉輒止、莫大於死生、莫切於疾疢、疴痛之賊其體膚。及是而猶不舍業、使充其志、庸可限



儒藏



其所至耶。安之以淳熙二年十月十九日卒。是歲十二月二十日。其父母兄葬之于其鄉。年實三十有四。銘曰、

若是而不可謂之成耶。彼挑達者竟何成也。若是而可謂之成耶。夫豈自以爲成也。哀哉。

呂祖謙撰 《東萊呂太史文集》卷一二

林安之壙誌

安之姓林氏諱居實。溫瑞安邑人。父堯賓。母王氏。安之以淳熙二年十月丙申卒。以其卒後之六十有二日丁酉。葬于邑西偏三里之橫山。八旣爲圖。銘於東萊呂伯恭氏。而壙不可無識也。蓋安之從余游最久。余在城南時。羣居累數百。及屏仙巖之陽。至者蓋十一。而安之實先。越數年。寓會稽之石氏藏書房。至者蓋百一。而安之又先。明年繇太學還。過越。安之猶棲然凍餒逆旅。以俟將行。天台。則安之束書僦僕矣。余察安之勤甚矣。而趣好雜。因

辭卻不與偕。比至天台。安之已蹙容俛立戶外。以請。由是不以涉事物毫秒。分志而趨於學。余師友雖在數百里外。必往依事。諸公見安之。咸曰。佳士。佳士。年止三十四。其葬也。同舍生爲之惇。悲夫。

陳傅良撰 《止齋先生文集》卷四七

校記

①且：原作「旦」，據四庫本《攻媿集》改。

②秒：原作「抄」，據文意改。



藏 儒

宋儒碑傳集卷一百五十二

彭龜年 劉光祖

寶謨閣待制致仕特贈龍圖閣學士忠肅

彭公神道碑

皇上踐阼之十有四年十有一月乙亥、詔樓鑰、林大中赴行在。大中先至、首言故吏部侍郎彭龜年之忠、乞賜褒贈。嘉定改元、鑰求對、又以爲請、且錄其諫草以進。皇帝爲之愴悼、詔贈寶謨閣直學士、仍與一子陞擢。既又御批、彭龜年係朕潛藩舊學、當權臣用事之始、首能抗疏折其姦萌、褒卹之典、理宜優異。雖已追贈、未稱朕懷。可特加贈龍圖閣學士、其子欽與寺監簿差遣。三年、禮部尙書章穎、侍御史劉渠、起居郎黃中就講筵、同進公家所被賜御書御製正邪論、且言公之盡忠、知無不言、首論侂冑之姦、爲其沮抑、抱恨以歿、乞賜美諡。上賜諡忠肅。又云、是肅敬之意。恐有司行之遲緩、當爲

批出。八月、三人又因晚講奏謝、上云、彭龜年忠鯁可嘉、宜得此諡。使人人如此、必能實人主于無過之地。先是、紹熙五年七月甲子、上受內禪。公時以右史兼嘉王府直講、上在重華宮、一時舊寮惟公最承眷眷、宣召幾無虛日。未幾、由西掖遷貳卿。方趙公汝愚決大策之初、曾遣韓侂冑奏憲聖慈烈皇后、有一日之勞、至是寢以出入兩宮、始有竊弄威權之漸。公極論之、且乞去。公除職與郡、侂冑罷知閣門等職事、轉一官內祠。時鑰爲給事中、大中爲中書舍人、同狀繳奏。上批、彭龜年除職與郡、已爲優異、韓侂冑無罪、辭劇就閒、可與書行。鑰與大中再奏、龜年以貳卿得此、若以爲優異、侂冑無故轉承宣使、非優異乎。若以侂冑爲無罪、龜年以盡忠陛下、直言無隱、何罪之有。龜年一去、必不復來。侂冑內祠、日在左右、若併使出外、則人言自息矣。鑰遂爲吏部尙書、大中竟由給事中爲吏部侍郎、



尋皆補外郡。鑰得婺不赴而奉祠。公在荆南、亦以疾丐閒。林公在慶元罷歸。三人者鑄職罷祠。至于一再、惟公之謫尤重。侂冑擅權之久、罪惡貫盈、妄開兵端、舉世震動。主上奮發威斷、加以誅殛、中外稱快。故翌日而二人趣還。獨公不幸、已成千古、不及見更化之盛。士大夫莫不痛惜之。公字子壽、世爲臨江軍清江縣人。曾祖廣、祖愈、考文通、俱不仕。考以公貴、贈朝奉大夫。妣楊氏、累贈碩人。公七歲而孤、奉母盡孝如成人。幼穎異、讀書能曉大義。比長、得程氏易讀之、至忘寢食。年十八薦于鄉。三預計偕。登乾道五年進士第、授左迪功郎、袁州宜春縣尉。時丞相趙忠定公將漕、公以書言月椿錢病民。趙公因計爲緡錢七十萬、而無名者強半、皆出于苛斂。趙公首取最甚者、如宜春麴引之類、先罷之、乃以聞。獲盜八人、自以爲非親捕、不就賞。公方初筮、而利民自立已如此。關陞從政郎、調吉州安

福縣丞。縣有寅陂、灌田萬三千餘畝。彊宗錮其利、歲以旱告。按圖疏治、陂成而歲稔。郡委檢察保甲、而無其籍、憮然曰、是縣之根本、不務可乎。乃以法聯合統紀、又戶別其老病強弱之丁、士農工賈之業、租稅有無多寡之數。調夫既均、後有賑貸、按籍立辦。他日檢旱、賴此尤得要。蠲放不及二分、而民間歡服、以爲前此未有得實如此者。請藏此牘、以爲後法。育嬰兒、救疫疾、雖不禁巫覡之禳禳、而各使勉病者以服藥、全活尤衆。淳熙十二年、用舉主改宣教郎。以母碩人年高、丐祠便養。主管建昌軍仙都觀。自初第而歸、益篤于學。以母自欺名齋、以書問南軒張公中庸語、孟大義、至是義理愈明。開發後進、摠衣北面者日衆。復與劉子澄清之往復問辯、時相與折衷于晦菴朱公、而學愈成矣。再請祠、未滿而丁內艱。執喪盡禮、誠信備極。葬之日、觀者歎其可法。以致敬、致樂、致憂、致哀、致嚴、哀集格

言類爲一書名五致錄。晚又定祭儀行于家。服除。吏部尙書鄭公僑、兵部尙書張公杓同薦之。得旨引見。時光宗初即位、內降頗多。公首論正始之道。願以仁宗杜權要請屬爲法、以崇寧御筆爲戒。公又言嘉王傅相少而侍御多、請用司馬光令伴讀。官提舉左右之議、使府寮之勢重于侍御、道義之訓密于宴游。光宗首肯久之、且曰、當世急務也。又以開樂之初、進逸豫之戒、謂國家大讎未復、而內外宴安、猶襲宣和之舊、淫侈成習。光宗曰、風俗驕侈太甚、至此極矣。朕日夜思所以革之。因奏陛下爲之不難、風俗之變、未有不自上始也。二月、除太學博士。時殿中侍御史劉公光祖因論帶御器械吳端改太府少卿、公上疏乞復其位。又貽書宰相云、祖宗嘗改易差除、以伸臺諫之氣。不聞改易臺諫、以伸倖臣之私。有諫大夫同知貢舉、欲大變文格、下太學選經義詩賦論策各二百篇爲式、長以

督課學官。公獨不可曰、使士明經術、熟古文、則文格自正。校文已爲下策、又使之習時文、此非所謂教也。雖忤諫官意、然遂不復選。二年、兼魏王府敎授。六月、除國子監丞。郊禮遇雨、祠于望祭。光宗意鬱鬱不豫、至展恭謝之日。公具嘉祐中文潞公因設醺宿殿中故事。白廟堂。又言、重華命押醫官下都堂、亦欲大臣共此憂責。次日乃聞內引宰執。三年、許國公始朝參。公爲言保富貴之道、無過恭儉。又集禮記論、孟子史中朝見之禮、爲朝參須知。且言、雖與嘉王同行、在禮、世子不可與同名。非惟名不可同、色色不當相似。至生日、又以恭儉惟德爲韻、作四詩壽之。六月、侍御史林公大中辟公充御史臺主簿。謂公操行堅正、不爲詭隨、遇事通明、不事沽激。八月、以舊班對、乞復經筵典故。謂、勸講之臣、當用明經之士。人各有長、經須素業、不應不問所學、例以序遷。又謂、宣召講官多用晝接、不知夜



直之有益也。光宗云、親儒生最有益。十二月、林公以論事除吏部侍郎、公乞去。張公叔樞代林再奏乞留、卒不就。四年正月、除司農寺丞。三月、除秘書郎。先是、外傳召姜特立、公白丞相留公、恐非虛傳。至是果然。留公引李絳事乞退、公率同館論奏、又勉樞廷爭之、遂寢。五月、兼嘉王府直講、論說經理精切明白、裨益爲多。不勝書、書其大者。嘗論梁燾辨邪正之奏、公曰、此正是元祐末年小人將進、君子將退之時、不可不詳覽。王曰、君子小不可參用、參用則小人勝。公因具述元祐紹聖君子小進退之大略。王一日親製邪正辨以賜公、正指燾奏而發。又嘗賜所書瑤山詩、乃光宗在東宮時作。有雪詩云、閭閻多凍餒、廣廈媿膏粱。公言、人主當如是用心。嘗因講詩、王曰、下以風刺上、已是人臣委曲。要知爲君者、須使人臣直言其事方是。公曰、願大王無忘此意而推廣之、則善言至矣。讀曾肇奏議、

因言、用人須先識邪正。王親題其說于奏議上。贊讀沈公有開講三風十愆、謂十不可有一。王曰、要是病根全在比頑童、一比頑童、何事不有。公稱贊不已、亦請王題講義上。聞王宴居、書知人難三字于坐右。公質之于王、王曰、然。畢竟人如何知。君子以小人爲小人、小人亦以君子爲小人、正恐錯看爾。公曰、堯舜亦以爲難也。光宗久不詣重華宮、公與同館入疏、又以會慶節未舉進香之禮、自上封事力請、俱不報。十二月、除起居舍人。明年正月、直前奏事。光宗曰、久欲見卿說話、此官待有學識人方除。公謝、且進內治聖鑑、奏以祖宗家法集爲此書。光宗曰、祖宗家法最善、漢唐所不及。待外戚尤嚴、不可容易壞了。公對曰、聖論及此、天下之福。祖宗不委以權、乃是愛親戚之道。此書宦官、女子之防尤嚴、恐不得進御。光宗云、不至是。三月、直前奏起居注、乃繫日之書、言動無不記者。今一月四次

書免到宮、陛下半年不出、如此已書三十餘次、以貽後世、實累聖德。四月、駕幸玉津園。公言于宰相、謂近捨聚景而遠幸玉津、不奉三宮而獨出宴遊、宰執以公言乞恭請、公亦入奏。會被命禱雨、因言、兩宮不和、則天下不和。天下不和、則天地不和。蓋天地和則雨、未有不和而雨者。自是屢許過宮。或仗集而不出、侍從奏陳不效、皆居家待罪。公又獨奏、誤以臣充嘉王府講讀之官、正欲臣等教以父子君臣之道。臣聞身教者從、言教者訟。陛下以身教、臣以言教者也。言豈若身之切哉。五月、重華不豫、已奏告、公與侍從、臺諫請對、不果。八日戊辰、公繳納告敕、乞竄逐、待命江滸。戊寅、壽皇服藥赦下、始入城。癸未、公念屢乞對及求去、至今日不可不極諫、拜訖、獨不離班位、伏地敏額、久不已、血漬顰蹙。搢笏取劄子置龍墀上、再拜欲辭出、始傳旨上殿。光宗云、知卿忠直、理會何事。公奏、今日無大于

不過宮事。光宗云、須用去。公又極言、陛下屢許羣臣、一入則又不然。內外不通、禍亂不聞、臣實痛心。光宗爲之慘然曰、終當去。六月戊戌、壽皇升遐。七月甲子、主上受內禪、是晚召公對于大堂、聖容蹙額云、前但聞建儲之議、亦自可息浮言。豈知遽踐大位。泣辭不許、至今怔忡。公奏、此乃宗廟社稷所繫、陛下亦不得而辭。首乞奏知太上皇、因擬劄本、上即寫入、又問初政及人物。明日再見、猶云、朕一日不曾食。因泣下。又言、昨太匆匆、參決可爾。公奏、今只得盡人子事親之誠心。再擬起居劄子、乞日進一通。又與翊善黃公裳同奏往朝南內、因定過宮之禮、乞先一日入奏、率百官恭謝。壬申、擢中書舍人。庚辰、上朝泰安宮、至則寢門閉矣、拜表牋而退。上嘗問、恐太上皇未肯過泰安、如何。公奏、陛下本出于不得已、必不以位爲樂、況宮室乎。壽皇梓宮在殯、且居喪次、于禮爲正。旬日間三降旨經營



泰安紛紛不定。太上微疾未瘳，不若且居南內以休息聖躬。陛下少留重華，以居喪聽政。從之。代言之初，李孝純、孝友、轉右武大夫，帶行遙刺，公封還詞頭，謂固當推恩母黨。然上事三宮，禮有隆殺，恩有後先，乞候三宮戚屬次第推恩。內侍符滌得罪于太上，而差幹辦泰安宮，劉慶祖已帶遙郡承宣使，而以太上隨龍人落階官，公皆繳奏。上于劉慶祖事批可與書行，公又奏曰：「慶祖無官可轉，止有建節。若念其忠勤，不若任之以事，不必優之以官。臣非爲慶祖惜此一官，蓋爲朝廷惜此一門。」陛下自登大寶，聽言如流，忽于此事，首降可與書行指揮。夫可與書行乃近世敝令也，使其可行，臣即書矣。何待再令？使不可行，豈敢因再令而書哉？上嘗言中宮未建，聖節未立，隨龍人恩例之類，直俟祔廟後施行。公即極口稱贊聖德，後隨龍命下，封還再四，且言祖宗隨龍人止轉一官，元符中方轉兩

官。如徐勣，何執中除待制侍講，亦止轉一官。靖康以後，方有四官之例，誠是太優。今于己分正當過爲裁損，酌中推恩，命遂寢。因對上語，公曰：「朕尙未見父母，如何敢恩及下人？孰重孰輕？且稱繳章爲是。然公亦以此等故，不久而遷矣。」上問講筵所奏諒闇罷講舊例，公奏：「多故以來，兩三月不與儒生講矣，不可不以爲急務。」上袖出二紙，一具太上講筵書目，一具潛邸講堂書目，謂講筵講書太少。公奏：「今有機務，不比講堂專一讀書。」上云：「朝退亦無事，恐自怠惰。況酬應萬務，非多讀書不可。」又奏：「人君之學與書生不同，惟能虛心受諫，遷善改過，乃聖學第一事，不在多也。」他日又出二紙，一御書經史十件，春秋、禮記、詩書、孟子、通鑑、唐書、三朝寶訓、奏議、長編節本。一書臣寮十人：黃裳、陳傅良、彭龜年、黃由、沈有開、朱熹、李嶽、京鎰、黃艾、鄧駟。公請聖意，上云：「朕欠讀書。」太上讀許多書，養德東宮垂二



十年。今欲添講官至十員、各專講一件、兩日一次。五人上講、早二件、晚三件。早依舊講殿上、晚只用小衫、依講堂例坐講。公曰、講學愈切、此帝王之舉也。若少讀而精、庶幾有益。又曰、十人充講官否。陛下若招徠一世之傑、如朱熹輩、方厭人望、不可專以潛邸學官爲之。尋除侍講、而待制朱公中書舍人陳公俱以召至。公引傅堯俞、乞班蘇頌之下、以請繼除侍讀。三辭而後受。御筆舉御史有不植黨與之言、公奏、但當察君子小人、不可問黨與。元祐黨籍第一人是司馬光、小人陷君子、變白爲黑、何所不有。又言、近差除多自中出、此不足爲威斷、適爲小人所賣耳。九月、除吏部侍郎。公知事勢漸變、乃陳四大之說、其略曰、用臣太驟、處臣太高、臣跡太危、臣分太滿。因震雷暴雨言、近日好出不測之號令、故天應以不測之風雷。因極陳、今日小人竊弄權柄、皆起于號令之不測。借吏部尙書、充金國

弔祭接送伴使。至平江、奏、漢元帝時日青無光、恭顯指爲堪、猛用事之咎。及斥堪、猛復有日變、始切責言者。小人機心、古今一轍。楚州應詔一疏、尤極剴切、謂信任君子之意未孚于人、而暱比小人之跡已見于外。君子告陛下之言、小人或得預聞、而小人誤陛下之事、君子或不能知。送伴至楚、聞朱公奉祠、又奏、君子小人消長甚詳、皆不得報。及歸、屢乞對、不許、自知不能久矣。明堂禮成、封清江縣開國男、食邑三百戶。公見廟堂之權日輕、侂冑之勢愈重、言官又多出其門、于是歷數其姦。大要云、進退大臣、更易言路、皆初政最關大體者。大臣或不能知、而侂冑知之、假託聲勢、竊弄威福。陛下總攬之權、恐爲此人所盜矣。時十二月九日也。上聞奏甚駭、且曰、只爲親戚、故信之、不謂如此。奏事退、已聞下之中書、晚又聞復取以入、知必不濟。再入一奏、丞相以聞、上云、侂冑是親戚、龜年是舊學。講



堂五人、一死一憂去、二人俱罷、只有龜年在、又性直肯言、今當如何。丞相陳兩留之說、已而侂冑雖罷職、而予內祠、公除職與郡、給舍繳駁、不能回也。除煥章閣待制、知江陵府、荆湖北路安撫使。公既去、丞相竟論罷矣。公至荆、罷和糴以平米價、罷沙市官買之敝、治牙僧以寬商旅、擲浮費以除魚湖之輸。復奏修長隄、教民兵、乞支還備邊庫錢、俱不報。公遂以疾丐祠、一請而提舉江州太平興國宮。慶元二年六月、以論列落職罷祠。五年、言者以蔡璉誣告公與趙丞相言政和中嘉王事、乞加貶竄。于是追三官、勒停。嘉泰三年秋、復元官、再奉興國祠。開禧二年起知贛州、以疾力辭。除集英殿修撰、提舉建寧府武夷山冲佑觀。俄以疾甚致其事、除寶謨閣待制。三月二十三日終于家、享年六十有五。遺奏聞、特贈中奉大夫。娶敖氏、先三十年卒、贈碩人。生二子、欽、承事郎、守司農寺主簿。鉅、迪功郎。

新特差充荆湖北路提點刑獄司幹辦公事。女四人、長適進士陳復之、次適鄉貢進士胡夢得、次適從政郎揚州江都縣丞章瑤、次適進士敖清之。再娶燕王宮宣州位宗室潭州益陽縣丞、贈中大夫伯攄之女、封碩人。後二年卒。生一子、鉉、承務郎。新監江州在城稅務。孫男二人、滋、沄。孫女四人、俱幼。七月壬午、諸孤奉公之柩窆于縣之建安鄉金家井之原、從治命也。公性資剛方、學識正大、而議論尤爲簡嚴勁直、善惡是非務盡道理、義所當爲、白刃可蹈。正色立朝、其愛君憂世之誠、先見之識、敢言之氣、皆人所難及。故公議浩然歸重。晚既投閒、專以養性讀書爲事。扁所居曰止堂、悠然自得、幾微不見于顏面。賓客非親與賢不妄交。郡縣吏乘時羅織公之親黨、文致之罪、潛窺陰伺、欲捃摭細微、以媚權倖。公視之如無、彼亦不得毫毛之隙。自僞學之說興、鮮不變者。公于關洛之書益加涵詠、

著止堂訓蒙一書、蓋終始不變者也。聞蘇師旦爲節度使、曰、此韓氏之陽虎也、其禍韓氏必矣。及聞用兵、曰、禍其在此乎。皆如公言。著內治聖鑑二十卷、訓蒙經解、奏議、外制、并表牋雜著、合爲若干卷、藏于家塾。鑰幸同朝、一見如故、相與日厚。公之三子求銘、謂知公之深者莫如鑰。偶然未死、尙何辭。銘曰、

矯矯彭公、天予剛介。學問淵邃、言議正大。自其筮仕、憂國愛民。登朝屢奏、心乎愛君。嘉邸簡寮、極天下選。遇事獻規、務納于善。重華違豫、問寢有愆。朝夕思慮、不已于言。螭陛直前、龍墀敏額。言雖不用、忠節愈白。聖主龍飛、風雲是依。無日不召、擢居綸闈。開口論事、略無顧避。志欲回天、側目多忌。權姦槩牙、惟公先知。抗疏逆折、鳴鼓攻之。上色爲動、公言益切。聞者縮頸、驚歎膽決。一去一留、消長遂分。言者雖力、無救絲棼。聲生勢長、附炎日盛。太阿倒

持、竊弄威柄。橫挑強敵、塗炭斯民。赫然天誅、公論復伸。改弦之初、與世更始。曲突徙薪、如公有幾。嗚呼、天乎。不假之年。身不及見、徒爲知言。恩光優渥、施及其子。公凜如生、誰賴有泚。九京可作、非公誰歸。金井之原、過者式之。

樓鑰撰 《玫瑰集》卷九六

劉閣學墓誌銘

孝宗皇帝踐天位二十有八載、寤寐食息、不忘求賢。當是時、魁壘奇傑之士布在朝廷、旣足以棟明堂、梁清廟、而深培厚養、彬彬相續、又足以爲數世百年之儲。故雖光廟享國日淺、委政廟堂、而群賢夾維、迄以無事。今皇帝初嗣服、耆俊畢集、有慶曆、元祐之風。歷數其人、無一非乾、淳間舊物者。詩曰、豐水有芑、武王豈不仕。詒厥孫謀、以燕翼子。蘇文忠軾亦云、仁宗在位四十二年、畦而種之、有得皆賢。蓋周之武王與我仁宗、孝宗、皆以儲蓄人材爲



保固基業之本、是以國家賴其利、天下誦其功。若故華文閣學士、通奉大夫致仕、陽安侯劉公、其孝宗所擢以遺後人者歟。公以乾道五年對策庭中、天子親擢爲第四。其後以簽書樞密院事趙公推薦、召實班列。明年再對便殿、議論偉然、有契聖心。謂輔臣曰、光祖人材端重、全類楊輔。蓋自是以人主爲知己。今皇帝毓德潛藩、方議擇傳、孝宗首命輔、而以公繼之、屬任之意、蓋有在矣。既而諫官闕、將用公爲右正言、不幸適以憂去。終淳熙世、雖弗果再用、然留遺兩朝、出入中外、清芬矯節、耆德碩聞、巍然爲當世名臣。雖鄙夫嚚童、亦知有所謂劉左史也。嗚呼、此豈一日之積哉。公名光祖、字德脩。其先潤州句容人、鄴爲唐宰相、一子從僖宗狩蜀、爲雙流令、生三子。仲子誨爲平泉令、今劉氏居簡者皆祖平泉。侍御史、贈正議大夫諱孝孫者、公之高王父也。朝奉郎、通判漢州諱漢者、大王父也。諱

松材者、王父也。父諱寔、宣義郎、贈銀青光祿大夫。母賈氏、贈和政郡夫人。公幼出爲外大父左中奉大夫賈公暉之孫、後官於朝、乃乞歸姓。以賈公致仕恩補登仕郎、主內江簿。居和政喪、哀毀盡禮、鄉黨儀之。服除、調什邡尉、遂登進士第。時孝宗銳意於治、發策數十條、公對大略以爲陛下睿察太精、宸斷太嚴、求治太速、喜功太甚。又言、陛下躬擐甲胄、間御毬馬、一旦有警、豈將親董六師以督戰乎。夫人主自將、危道也。臣恐介冑毬馬之事、適以貽笑黠虜、而不足示武於敵人。授劍南東川節度推官、辟潼川提刑司檢法。淳熙五年、召對、論恢復事、請一以太祖用人爲法。且曰、人臣獻言、不可不察。其一不量可否、勸陛下輕出驟進、則是即日誤國。其一不思振立、苟且偷安、則是久遠誤國。孝宗然之。除太學正、輪對、舉司馬公光奏疏八事以獻。未幾、召試、除正字、兼吳益王府教授、遷校書郎。面對、

取太祖、太宗治要彙爲十節、名曰兩朝聖範、上之。公在王邸、嘗摭前代宗室賢否媿惡、隨事開陳、以爲鑒戒。至是、孝宗益知其賢、命兼皇太子宫小學教授。上時爲明州觀察使、英國公、年十有四矣。公白東宮、此又一重國本也。時光宗在宮中無他嗜好、暇則親爲國公講說、上亦孜孜向學、雖日昃不倦。公請論孟、史記之外、益以本朝典故、庶知祖宗家法。迨上加元服、旣爲頌以獻、又乞當講之日、從容數刻乃罷。公謂經史可以知義理、鑒興亡、凡涉名數者亦不可略、請以國朝儀制官名之屬彙次成書、講畢開說。又謂國公年寢長、正謹習之時、願因宮僚勸講、俾侍坐隅、必有裨益。光宗皆然之。蓋是時孝宗臨御久、明於羣臣邪正、所用以傳聖子神孫者、皆天下第一流。而公在英邸三年、所以講明誘掖者甚至。其後諸賢相踵輔導、聖德日益顯融、然其闡端正、用力早、則公之功爲多。以誦書終

篇進秩、時銀青年七十、公以貤恩請、從之。遷秘書郎。諫議大夫張公大經乞增置諫員、且薦公代己。命下而銀青歿、服除、知果州。趙忠定公帥蜀、請公參謀議以自助。時同幙皆一時選、相與上下議論、知無不言、羈制諸蠻、弭耳安伏。其他建明甚衆、成都之政遂爲天下最。俄以忠定荐召、至則光宗踐阼矣。進對、謂陛下承堯舜之統、當以堯舜之道爲師。任大禹之責、當以益、皋陶之言爲法。又言、陛下新服厥命、必先明君人之大體、達天下之大勢、深國家之大慮。又謂、自古禍亂之萌有四、彊臣擅兵、外戚預政、中常侍用事、朋黨交爭是也。宗社之本有一、謹選左右、嚴立師傅是也。願陛下留神於其大者、勿以小事常度因循歲月。又論蜀鹽酒增科之害、大臣是其議、遂詔四川合發湖廣錢物百三十六萬存留三年、對減民賦。除軍器少監。面對言、四川鹽酒之額近蒙蠲減、此皆壽皇聖帝躬行節



儉、不妄賜予、內藏封樁皆有餘積、故陛下初政、得捐賦以予民。竊聞壽皇退御重華、貶損方甚、壽成皇后亦極省約。願陛下仰法兩宮、內廷用度、損之又損。虜使來賀重明節、詔公接送伴。時有獻議、改築楚州城者、光宗命公因行視之。公還、具言不可。由是賦工之省者過半。兼權侍左郎官、又兼禮部、遂除殿中侍御史。時臺臣以失職被絀、光宗方嚴其選、諭宰相留正曰、卿監郎官中有其人。正沈思久之、曰、得非欲用劉某乎。其人剛正有守、願出聖斷。光宗曰、然。久在朕心矣。公既就職、光宗面諭曰、以卿剛介不回、故付以言責。是時道學朋黨之論浸興、凡媚疾善類者、槩加以此名、前後絀逐相繼。公極言其弊、曰、是非不明、則邪正互攻、公論不立、則私情交起。此固道之消長、時之否泰、而實爲國家之禍福、社稷之存亡、甚可畏也、不可忽也。臣本疎庸、陛下過聽、使待罪言責、凡賞罰僭濫、號令乖

違、民病未瘳、官箴不戒、皆可因人而舉劾、隨事以奏陳。既顯然而易知、曾未足以深慮。若夫是非方殺而邪得以害正、清議方晦而私得以勝公、往鑒昭然、危機所伏、方今之憂、孰大於此。明是非以別邪正、立公論以抑私情、方今之事、孰先於此。臣觀本朝士大夫學術議論最爲近古。其端本也、以居仁由義爲道、以正心誠意爲學。其交際也、以同學爲朋、而實非朋、以同道爲黨、而實非黨。窮達知其有命、進退知其有義。是以進之不見其泰、退之不見其戚。窮而在下、則以探性命之奧爲勳名、享至道之味爲鍾鼎。達而在上、以責難爲尊主、忠諫爲愛君。本朝盛時、初非有強國之術、而國勢奠安、根本深厚。蓋其學術議論皆由於此故也。咸平、景德之間、渾然不見其際。當斯時也、道臻皇極、而治保太和、至於慶曆、嘉祐盛矣。不幸而壞於熙豐之邪說、疎棄正士、招徠小人、幸而元祐君子起而救之。



末流太分、事故反覆。紹聖、元符之際、群凶得志、絕滅綱常、其論既勝、其勢既成、崇觀而下、嗟乎、尙復何言也。臣從遠方來、誤玷班列、去來之間、今已一紀、見聞所慮、悉可指陳。臣始至時、雖間有議貶道學之說、而實未睹朋黨之分。中更外艱、去國六載、已憂兩議之各甚、每恐一旦之交攻、迨臣復來、其事果見。因惡道學、力去朋黨。因去朋黨、乃罪忠諫。嗟乎、至於以忠諫爲罪、則其去紹聖幾何。臣竊爲人言、豈可因疾其學而併棄其言、得無甚也。陛下至聖至明、初無彼此、而衆論既已交興、聖意豈無所惑。臣本蜀人、爲學自有源本、介在朝序、與人亦無親疎、但以終歲之私憂、首爲明主而別白。凡今道學、伊洛爲宗、然非程氏之私言、出於大學之記載。大學之教、明德爲先、其間舉詩人之言、於是有道學之目、曰如切如磋、道學也。如琢如磨、自修也。然則臣所謂以居仁由義爲道、正心誠意爲學者、

又在於切磋而琢磨之。今之道學、其得之有淺深、其行之有誠僞。得之深者、固合於大學之明德矣。得之淺者、又可不切磋而琢磨之、使益深。而遽自矜以召禍、則無乃亦非歟。行之誠者、斯爲君子矣。行之僞者、人將見其肺肝。然是固其師友之所不予也、而又何爲乎。臣每因論學之間、必有至平之論、往往僞者色愧、淺者心服。又安敢槩輕譏而痛疾之也。何況其間率多善士、善士所至、人必喜稱、因其喜稱、又以爲黨。若俱擯絕、安得更有好人。必取凡才、充塞朝路。陛下履位之初、端拱而治、凡所進退、率用人言、初無好惡之私。豈以黨偏爲主。而一歲之內、逐者紛紛、中間好人、固亦不少。反以人臣之私意、微累天日之清明、所以至斯、良皆有故。今之君子、不明大道、自視太高而責人太苛。自視太高、則實將有所不副。責人太苛、則衆將忿且怨。或者又唱爲薦士之舉、區別而封域之。凡有所取、



豈無所遺。凡有所揚、豈無所抑。品題既衆、則疑怨叢興。心雖主於至公、迹已涉於朋黨。議論先喧於羣口、用否豈必於一言。是以一時之虛名、而賈後日之實禍。彼既得志、決不我容。況我於窮達進退之間、亦未有充實涵養之素。彼加詆誚以修往怨、必致過甚而快私情。往往推忠之言、謂爲沽名之舉。至於潔身以退、亦曰憤懣而然。欲激怒於至尊、必加之以訐訕。事勢至此、循嘿乃宜。循嘿成風、國家安賴。臣欲熄將來之禍、故不憚反復以陳。伏<sup>①</sup>幾聖心豁然、永爲皇極之主、使是非由此而定、邪正由此而別、公論由此而明、私情由此而熄、道學之譏由此而消、朋黨之迹由此而泯、和平之福由此而集、國家之事由此而理、則生靈之幸、社稷之福也。如其不然、使相激相勝、展轉報復、爲禍無窮。臣實未知稅駕之所。章旣下、士大夫傳誦、有至流涕者。戶部尙書葉翥、太府卿兼中書舍人沈揆、結近

習、圖進用、公皆劾去之。旣又言、比年以來、士大夫不慕廉靖而慕奔競、不尊名節而尊爵位、不樂公正而樂軟美、不敬君子而敬庸人。旣安習以成風、謂苟得爲至計。良由前輩長老零落殆盡、今之負物望、協公論者、不聚於朝廷、後生晚進、議論無所據依、學術無所宗主、正論益衰、士風不競。幸詔大臣、妙搜人物、必朝野所共屬、賢愚所同敬者、一二十人、參錯立朝、國勢自壯。臣雖終歲無所奏糾、固亦未至曠官。臣於去年蓋嘗面奏、今日之患在於不務封殖人材、臺諫但有摧殘、廟堂初無長養。臣今處當言之地、豈以排擊爲能而頓忘前意。先是公以戎監對、力陳人材衰少之弊、及是復懇懇言之。大臣以公奏進呈、而無所議。公對、又爲上言、人才者、國家之基本、乏則養之、有則用之。慶曆之以盛者、豈一日之積乎。惟其非一日之積、是以非一日之用。蓋公素志、嘗欲聚忠賢於朝、以壯根本、

而時論多相違者、故諄復不置如此。又論前諫議大夫陳賈、今右正言黃掄、皆得罪清議、爲聖世罪人、詔賈予祠、掄補外。已而宋之瑞召、張徹提點坑冶、公復言其不可、二人遂改命。會吳端除帶御器械、諫官三論奏、不從。孫璫轉行觀察使、給事中封還詔旨、復命書讀。公極論之、不報。又言、陛下旣重於改命、給諫亦不復申執、臣恐攀附使令之輩、自以人主恩我、外廷其如何、隄防自此蕩矣。光宗命大臣諭公、不爲止、遂奪言職、改太府少卿。公求去不已、遂以直秘閣漕潼川路。中書舍人羅公點拜疏乞留、秘書監楊公萬里與館學之士亦上書力請、不報。公至部、首戒屬州削互餽、省虛文、誡民瘼、講寬恤。叙資二州守暴闇亡善狀、公亟奏黜、而薦游仲鴻、李協於朝、詔報施行如章。仲鴻等亦以次召用。除江西提點刑獄、改知夔州。居數月、召。先是翊善黃公裳論王府僚友、因及公、翼日光宗諭大

臣令召劉、大臣擬除侍從、光宗又曰、待劉來。及公辭召命、則有尼之者、詔復予監司矣。公次公安、聞孝宗疾日浸篤、而車駕省謁不以時、則致書於左相留公、知樞密院趙公、勉以三事。其一、宜與羣賢并心一力、損文而務實。若上未過宮、宰相以下皆不可歸安於私第。其二、謂林、陳二寺、自以獲罪重、華、日夜交譟其間、宜用韓魏公去任守忠故事、以釋兩宮疑謗。其三、謂今國家阽危、爲大臣者不當徒憂悶自沮、或爲明哲保身之計、所當收總兵柄、密布腹心、使緩急有可倚仗。繼聞孝宗崩、又詒書趙公、勉以安國家、定社稷之事。趙公迄定大策如公言。上受禪六日、即以爲司農少卿。入對、獻謹始五箴曰、陛下新服厥命、人皆望謹始於庶政、臣獨願謹始於五事。讀至思箴、上曰、要當從原頭用功。公對曰、微臣千百言、不如陛下原頭一語。陛下誠致力於此、則貌言、視聽俱治矣。又論、人主有六易、



天命易恃、天位易樂、無事易安、意欲易奢、政令易怠、歲時易玩。又有六難、君子難進、小人難退、苦言難入、巧佞難遠、是非難明、取舍難決、闇主之所易、明主之所難、闇主之所易、思與不思故也。六難者常生於六易。又言、陛下以隆慈之命、踐阼於素幄、蓋有甚不得已者。宜躬自貶損、盡禮於上皇、使聖意懽然、知釋位之樂、然後足以昭陛下之大孝。上竦然嘉納。除起居舍人。時樞密羅公點、禮部尙書黃公裳相繼淪喪、上痛惜之、而思黃公尤深。公言、思其人未若思其言、思其言未若思其所以言。臣每問裳疾、裳之憂未嘗不在國也、以爲政令無細大、皆當出於中書、陛下但審其可否而行之、人主操柄、無要於此。時知閣門事韓侂胄出禁中、侵盜權、爲威福、故公首及之。旣又以冬雷淫雨、命近臣指陳闕失、公言、號令不常、群陰用事、災異所爲作也。大臣進退太輕、臺諫用舍無定、非

號令不常之大者乎。進退大臣、用舍臺諫、事從中出、非群陰用事之大者乎。然所以致號令不常者、繇群陰用事故也。而陛下猶爲之隱諱、以爲大權當自己出、威柄不可下移。然則小人之意、將以陰制相臣而動搖之也。陛下所宜蚤悟、毋使大臣懷疑畏之心。大臣懷疑畏之心、則四體不展、羣議易搖、朝綱日隳、政令錯出、而國不可爲矣。今陛下有獨斷之意、乃是小人陰竊主柄之謀、而陛下未之思也。俄兼侍講、遷起居郎。時應詔言事者甚衆、命公擇其善者條奏之。公以所論多同、懼上意易厭、則以告於上曰、夫雷同者、乃古今同然之理、天下同然之心、願陛下取其有益而毋病其同、察其效忠而毋嫌其直。及議孝宗攢宮、衆相顧未發、公意獨與侍講朱公熹同、遂奏會稽之陵、土薄水淺、恐貽方來悔、乞議改卜。又請遵紹興、淳熙故事、命有司集議。上皇太后尊號、俟阜陵升祔行之。又謂、自

今壽康宮之事。陛下宜一一深留聖心。必須過自貶損。以厚其親。先其親而後其身。然後足以慰羣情。而召和氣。未幾。朱公以中旨與祠。公言。漢武帝之於汲黯。唐太宗之於魏徵。仁宗之於唐介。皆慚怒即悔。熹明先聖之道。爲今宿儒。又非三臣比。陛下初膺大寶。招來耆儒。此政之最善者。今一旦無故去之。可乎。且曰。臣非助熹。乃助陛下者也。旣而朱公除職。與郡公又極言。卒不聽。車駕還南內。公言。陛下憂畏之心。當如初踐大位時。始終惟一。則不得已之意。始暴白於天下。先是吏部侍郎彭公龜年與公素善。每相接。必慨然竊歎。上新即位。豈宜使外戚閭門用事。欲深論之。小人覘知其意。使出護使客。又斥朱公。以孤其黨。彭公使還。密語公曰。不拔禍根。無以爲國。公曰。公爭不勝。必去。朱公旣去。公又去。國空無人。亦非所以爲國。彭公憮然曰。吾志決矣。旣見上。果力言。侂冑已陰爲計。遂擠

彭公於外。未幾。臺省之善士。繼坐絀。羣小益以得志。御史遂併劾公。吏部侍郎孫公逢吉面詰言者曰。君任私意。害忠良如此。不畏天乎。趙丞相遺金以贖。公辭焉。且曰。爲我謝相君。宜深念國事。毋恤行人。除湖南運判。不就。主管成都玉局觀。無何而丞相罷政矣。侂冑旣擅朝權。羣小爭先附和。逐諸賢。爲姦僞。禁錮之。公偶記涪陵縣學記。盛傳天下。又明年。許自便。主管玉局觀。知眉州。復直秘閣。利路運判。時侂冑將啓兵端。公以不習邊事。辭進直寶謨閣。主管冲佑觀。開禧三年春。吳曦挾虜以叛。公諭郡守。焚其榜。通衢。且馳告帥。守監司之素所知者。仗大義。率諸道連衡。以抗賊。俄聞曦誅。則以書勉宣撫使楊公輔。講行營田。凡前日利歸吳氏者。悉收之。公上以省餉軍費。獎名節。褒死事。以激忠義之心。除潼州路提刑。權瀘州。是年十一月。侂冑誅。盡起天下名士。而公與焉。嘉定二年二月。至

都門、會襄陽闕守、言者請擇有德望者鎮臨之、乃除公右文殿脩撰以行。至鎮、適大旱蝗、禱於社、即雨、蝗亦死。凡流民之欲復業者、貸其貲、潰兵散卒、許自陳、除其罪、使還隸軍伍、於是盜賊衰熄。兵籍多濫、公核其虛實、合爲威勝軍三千人、擇將佐肄習之。經理營田、繕治城壘、邊備乃益完實。虜謀遷於汴矣、奏謂、遠料敵情、不憂其強盛、而反慮其衰弱。萬一中原赤子相攜而來、卻之不忍、納之無策。豪傑崛起、欲與我爲連、何以應之。虜果徙都、卑詞求助、助之則招敵、不助則失利於彼、取償於我、凡此皆當有以待之。必先事而謀、則事至無患。進集英殿脩撰。明年、除寶謨閣待制、知遂寧府。未行、改荆襄制置使。江陵城久圯、請於朝、一新之。復上中海以限戎馬、下海非敵衝、則以爲陂田七千頃、收其租實邊、有警復瀦水爲海。詔從之。諸軍部分不一、公請併忠勇、親效兩軍於神勁、合三千人、頗聽

帥臣節制。取馬於川秦、買馬於荆門、軍政遂以修立。而民兵之在湖北曰義勇、畿西曰保捷、合凡八萬人、公命諸州以農隙教閱一月、而請緡於朝贍給之。公以疆事可虞、請令內而三衙、外而戎帥、各條上方略、以觀其能否、并飭諸邊帥臣爲先事備。明年、復條上邊備之當急者、請命荆鄂兩軍各湮五千人、兩軍故有營田、宜委漕臣覈實措置、及令諸郡括曠土爲官田、以助增兵費。唐、鄧流民聲言歸我、公乞較利害輕重、先爲區處。朝論察公有拊納意、遂因其請、除寶謨閣直學士、知潼川府。因其民俗、治以無事。八年四月、上以閔雨求言、公奏、陛下知所以獲譴之由乎。女眞廼吾不共戴天之讎、天亡此虜、送死汴都。陛下爲天之子、不思所以圖之、天與不取、是謂棄天、未有棄天而天不我怒者也。青、鄆、蘭、會、求通勿納、陛下爲中國衣冠之主、人歸我而我絕之、是謂棄人、未有棄人而人不我怨



者也。且列聖在天之靈，豈不眷其故都。二帝蒙塵之耻，豈不懷其曩憤。今虜舍其巢穴，污我汴都，尙復與之通使，使吾臣子拜虜於昔日朝會之廷，可乎。又請改正憲皇后忌辰，從之。在潼二年，六告老，進顯謨閣直學士，提舉玉隆萬壽宮。潼人繪像牛頭山，命之曰全德堂。翊之守果州，遷眉州，皆奉公以行。眉蓋公舊治，翊之作會老堂，招蜀耆英，仿洛社故事，時人欽慕焉。改提舉崇福宮。景獻太子薨，公奏舉漢迎立代王曾孫，及太宗與寇準議立眞宗事，謂聖主賢臣嚴重國本如此，今陛下未有諸子可擇，然親王近屬中，豈無秉德端亮，親師好學，可主大器者乎。又言宣司根括之害甚悉，謂當罷無名之取，以收民心，散已畜之財，以結軍心。且詒書安公丙，語尤切。丙雖不樂，然趣迫之令自是爲少紓云。明年，復上章告老。時皇嗣猶未立也，公謂當今秀王之子孫，則孝宗之天屬，莊文惠憲王則

光宗之天倫，陛下於其子孫，擇長且賢者而立之，孰不以爲當乎。若過於謹重而不決，或生覬心，則四海疑貳失望，非國之福。是冬，翊之移守綿州，竝之知龍安縣，相距不百里，公往來二子間，意甚樂。俄以疾薨於竝之官舍，年八十有一。寔嘉定十五年五月某日，贈光祿大夫，夫人謝氏，贈碩人。李氏，封碩人。四子：端之、靖之，皆第進士；端之終宣教郎，知蒲江縣；靖之出爲伯父後，終承議郎、軍器監，兼樞密院檢詳。翊之，今朝請郎。竝之，今宣議郎。七女，已嫁而卒者二人：華陽縣主簿李南，進士謝汝能，其壻也。餘蚤夭。孫男四人：仲言、不及仕；仲房，今修職郎，嘉定府司戶參軍。仲襄，當以致仕恩入官。仲文，將仕郎。孫女四人：曾孫男女三人。初，公以孤生起西蜀，朝廷之士共知其賢，而四方或未之知也。及居言責，正色直辭，摧姦擊強，不少顧避，於是海內想聞其風，曰：此鐵面御史矣。至覲其容，接其詞，





則溫乎惠風之飈、藹乎時雨之潤、四時之氣雖備、而生物之意尤多。蓋公天資渾然、充養有素、故聞之者謂其風節之可畏、即之者樂其道義之可親、蓋信乎其爲全德矣。少從族父兄東溪先生伯熊學、已志乎古人之大方。及長、博參諸老而融會其異同、旁綜百家而蒐攬其精粹。嘗謂蘇、程二氏之學、其源則一、而用之不同、皆有得於經術者也。又道學之論方譁、人謂公師友眉山、非爲伊洛地者、公獨反復懇叩、爲上言之、蓋將協和朝廷、調一議論、培宗社之脈、厚薦紳之風。推公此心、使當元祐時、必能銷洛蜀之爭、使獲用於慶元、必無黨論排軋之禍。故具著本文、以視後世、其亦公之志也歟。公於文章不事雕績、而渾厚正大之氣實似其爲人。詩尤清婉、南軒先生張公栻一見所賦、大奇之。有後溪集百餘卷、在襄有峴山集、潼曰鶴林集、果曰金泉集、眉曰眉山集、合若干卷、諸經講義若干

卷。公在房、謫居無事、取東溪所傳易續之。蓋東溪傳止睽、公續之始蹇、嘆曰、睽、離也、蹇、難也、非數也耶。閒與諸子講論、輯爲一編、曰山堂疑問。手抄通鑑、評之。士大夫相勞苦、則答曰、予平生於處事則疎、處禍福則勇、每見東坡胸中、未嘗依倚一物、心竊慕之。自謂平日於父君師事之如一、故其歷事三朝、始以忠直、卒以忠直。入臺之初、即慨然自許、曰、惟初念純直、可以對上帝、事君父。是以遇事無難易、不苟止而妄隨。趙忠定嘗稱其諫激烈似蘇文忠、懇惻似范太史、人謂忠定爲知言。然以直道自持、與世多忤、故在臺端財六十九日而罷。同記注凡十有三旬而罷。公方安然不爲變也。及大耋之年、身在闕廷萬里之外、國有大利害、猶驛奏盡言。其乞建皇嗣、尤懇篤深至、視君實、景仁尤有光焉。蓋二公言之於居位之時、而公言之於退休之日、所處不同而其心一也。公於東溪執弟子禮終

其身存也買宅以居歿也爲之製服始自賈歸劉既立嗣宗爲之後凡所以經紀其家者雖老而不衰嗣宗死撫其子培之猶己子也視族婣黨友戚欣如己責其居房歲適大侵爲糜粥以食餓者所活不勝計張福叛聲言引兵破簡趣成都公出家資助軍餉移書大將趣其師簡賴以全兩駕使輶六任守牧其爲政純用詩書不雜他術所至修學校葺社稷以爲常在眉封張文紀李令伯之墓新孟拾遺之祠爲老泉先生請謚在襄修孔明故廬表羊杜遺蹟凡可以興化正俗者無不爲至蠲租稅救饑羸建長利弭鉅患殆不可稱數建昌陳君剛常紀其蹟謂未嘗用不測之賞正容以悟之而自知所趨未嘗用已甚之罰修令以示之而自知所避器人以其所長而僚屬得職察人以其所安而鰥寡效情溫陵儲君用亦爲某言惟有德者能以寬服民劉公有焉然其帥荆之日盜起合榕則

捕而收之。而不少貸。昔公之辭潼川也。某適視草援趙清獻以比公。今觀公行事。非所謂學道清心。遇物而應者耶。好樂人材。獎拔善類。西州名彥鮮不出公門。東南之士賴公通顯者亦衆。學者稱公不以爵氏。而曰後溪先生云。某自兒時即願爲公用。後與靖之同年。又仕同朝。居同巷。至相好也。故於公道德風節知之尤詳。今翊之等將以癸未三月辛酉葬公於清溪之艮山。使來屬某誌其墓。曰是先公之志也。顧今海內名能文詞者不知其幾。某何人斯。而敢銘公。書來萬里。義不得辭。謹纂次其事如右。而繫以詩曰。

君臣之誼。首乎三綱。維忠與直。臣節之常。維節之常。而罕自竭。義以利踰。志以氣奪。有偉劉公。金石厥心。弗貳弗疑。上帝實臨。蚤遇阜陵。靡言弗既。踐更三朝。始終一致。事君如父。憂國如私。朝夕皇皇。忘其渴饑。誰歟不仁。目士以黨。孔鸞離離。罩以一



藏書

網。謂忠曰訕斥正爲邪。往轍旣顛、弗懲奈何。鳳閣鸞臺、寔司出令。曾是僕臣、可寯斯枋。辨姦於早救、禍於微。臣身可竄、臣守弗移。晚卧坤維、繫念王<sup>④</sup>室。臣髮雖華、臣心逾赤。巍巍宗祏、寄在元良。可使前星、久闕其光。國本未安、臣死猶憾。百世相望、維司馬范。忠不忘君、直不徇時。允蹈其常、匪羸靡虧。阜陵知公、以遺後聖。道弗盡行、則有義命。惟其大節、焯若日星。揚芬亡窮、不在斯銘。

真德秀撰 《西山文集》卷四三

校記

①伏：原作「伐」，據四庫本《西山文集》改。

②遺：原作「遣」，據右引改。

③捕而收之：原作「補而侵之」，據右引改。

④王：原作「三」，據右引改。

⑤猶：原作「相」，據右引改。

宋儒碑傳集卷一百五十三

孫逢辰 吳獵

朝奉郎袁州孫使君逢辰墓誌銘

吉統八邑、龍泉號山水縣、故多名人、孫氏又其名  
家也。初諱文者、仁厚有家法、諸子皆力學。曰元量、  
擢大觀三年進士第、終賀州教授。曰叔通、從贛上  
李<sup>①</sup>朴先之學、徽宗朝貢京師、投匭論星變、請開黨  
禁、忤蔡京、斥歸郡庠、自訟齋。政和二年登第、終清  
海軍節度推官。曰叔遇、倜儻喜周急、博通群書、不  
樂王氏學、日與王元明、徐德饒歌詩唱酬、後贈承  
務郎。生宜、再舉禮部、早世、累贈奉直大夫。娶羅氏、  
封太令人。三子鼎立、見謂三傑、長吏部侍郎逢吉、  
號賢侍從。次逢年、筆力高古、仕止南安軍上猶令。  
使君其季也、諱逢辰、字會之、豐裕秀發、人推遠器。  
年十八鄉舉首薦、登乾道二年進士第、以左迪功  
郎尉潭之衡山。邑宰趙汝誼、連帥沈介皆通明嚴

重、遇盤錯輒屬君。辛卯歲儉、湘陰爲最、帥陳彌作  
檄君行縣事、戢姦賑荒、流逋四歸、特循兩資。君乞  
貶恩封母太孺人。用舉主升從事郎、移贛州贛縣<sup>②</sup>  
丞。歷事三守、監司六七人、皆咨其清、稱其文、倚其  
能、劇邑幕屬闕、爭委攝承、議事制刑、率歸忠恕。淳  
熙二年、茶寇轉剽江西、君請精擇上軍、參以贛卒、  
郴桂弓手、別募敢死軍、分委偏將、或扼賊要衝、或  
馳逐山谷間、而命荆鄂之師、養威持重、乘賊憊尾  
於後。帥不能用。已而上命辛棄疾繡衣持斧、乘傳  
來、竟如君策。師旅方興、屬君調軍食。君持金幣、即  
所至易米於民、省饋運十七八。漕長李燾、錢佃以  
名聞、詔任滿赴堂審察。守施元之面授京狀、君遜  
同僚之垂成者。元之大喜、上章薦。又詔中書籍記、  
終更改宣敕郎、審察特添差、簽書秀州軍事判官  
廳公事。乞便親、改鎮南軍。死、囚詳覆、君察可、閱、請  
奏、讞、一月中全活者三。街吏告行有死人、馳視之、



餘息尙存、療治稍蘇、始知夜行、吏奪其幣而害之、捕治伏辜。其明察類此。兵鈴<sup>⑤</sup>役禁軍興力役以媚守帥、許援<sup>④</sup>親兵及水軍例增食錢、吏摘牒尾如熟事請君書押、君執不可。守怒曰、此例也。君曰、親兵乃岳飛舊人、有糧無衣、故乘除如此。水軍則以隆祐太后避地於茲、驟聞虜至、賴其力得上贛、特許優給。自是闕者勿補、今僅存二十輩耳。若無故創支、禁卒歲十萬緡、力固不足、且非州家所可擅也。守不能奪、兵官嗾諸卒訴庭下。君徐以理曉之、拜謝而去。吉贛舊各置船塢、須油麻枋木、民病科折、君言於漕、裁減萬計。鄉邦解試、士逾萬人、考官止七員、君請用福州例增二人。苟利公家、率勇爲之。七年、江西旱、九江尤甚、君將代、諸司請留賑濟。君籍下戶及商販技術與無以自營者爲三等、計戶口給歷、十戶一甲、甲給一牌、五日輪一戶、齎錢牌場市粟、周而復始。置安養院處老弱孤獨、給以錢

米、負郭選邑佐、鄉村擇土官分董之。事有未安、不憚立改。文書紛至、手披口占、略無凝滯。凡用米八百餘石、他郡取撥亦稱是。又勸上戶平價以補不足。起正月盡六月、訖無流殍。監司乞優賞、君固辭。是時、予遷吏部尙書、兼翰林學士承旨、即奏君自代、磨勘轉奉議郎。九年五月、入提轄行在樞貨務都茶場、將試用也。賞轉承議郎、以太令人年高、求知澧州。命下、丁內艱。參知政事蕭正肅公燧嘗薦君守邊、中書舍人崔興詩復以職事官薦。服除、選知袁州。未上、轉朝奉郎。十五年正月二十三日、以疾卒於家、享年四十七。明年十二月乙酉、葬本縣南鄉瓜陂之原。妻安人李氏、同邑椿之女、前卒。子男三人、鑑、早亡。鑰、今爲從事郎、靖州軍事判官、與其季鉉俱能世其家。女適進士康晉之。孫男四人。君資性高朗、博觀載籍、善爲文辭。待交游誠信、輕財重義、遇歲歉出粟爲之倡。嘗慕范文正公置義

莊瞻宗族買田北鄉以歲入給貧者伏臘吉凶費市藥療病買棺送死衣寒食飢傍及鄉黨君既沒二子繼其志且存規約君幼師李栖梧司法李沒子瞽女未有歸極力濟之縣東三里蜆子陂久廢君捐金穀募民復脩導水數百丈溉田不貲。今號孫公陂。平居處事有條理喜論大利害援古證今如指諸掌。律身廉謹在官兼職雖衆卻其添給士大夫多以功業期君君頗自許也使天假之年推愛人利物之心豈止復一陂仁一鄉而已。平生著述有養晦類稿三十卷。予久與君兄弟游鑰以文林郎全州湘清令李迨狀來請銘爲之銘曰、孫氏三龍季惟邦君才氣之高謂凌青雲府幕王官以明濟勤仁蘇野苧惠周鄉粉群賢交薦符竹僅分。未子干旗遽瞻丘墳宜壽而否胡戾前聞流慶來裔尙考斯文。

周必大撰 《平園續稿》卷三四

敷文閣直學士贈通議大夫吳公行狀

曾祖象奇故不仕。妣李氏。祖子民故不仕。妣易氏。父唐年累贈太中大夫。妣劉氏贈碩人。

公諱獵字德夫潭醴陵人自太中公徙名數于善化。公年十五補郡博士弟子員受業于里人陳仲思符王明遠公明尋受易于陳善長元會魏忠獻張公寓長沙太中公以易受知因得交張宣公於是年二十有三遂從宣公卒業宣公見公弘裕疏暢喜曰吾道其不孤矣兩以鄉舉試于禮部皆黜。嶽麓書院成以選爲諸生。乾道三年冬朱文公來會宣公又獲親炙焉。公每惟聖賢教人無先於求仁自秦漢以來學者失其傳乃以孔門問答及周子程子以來諸儒凡言仁者粹類疏析以求正于宣公宣公嘉之授以大義勉以體察尋與郡博士異論辭歸。七年即城北僧舍受徒太中公交遊道廣公力貧養志不概有矣宣公嘗與其弟定叟杓



及吳伯承銓、吳晦叔翌，皆一時聞人，過之，張安國、孝祥時爲守，爲賦四公子詩。夏六月甲子，太中公卒，執喪一循古制，不用浮屠。踰月，葬東郭門外。湘中士大夫喪禮黜浮屠自公始。淳熙元年，公又與賓貢劉樞密珙再以郡守舉送，譽不釋口。明年春，試南宮，遂之婺，謁呂成公，與語奇之。且行，拊而勉之曰：「小小得失，亦足以驗學力也。」尋以選射策廷中，賜同進士出身。五月，銓試授迪功郎，潯州平南縣主簿。冬十一月，視事，宣公方經略廣西，檄公攝令，尋又攝靜江府教授，兼節度推官。郡建學，屬役于公，公一倣長沙校官，宏敞過之。宣公移使湖北，司業劉公焯代爲帥，問士於宣公，以公對。六年春，以舉主關陞從事郎，劉公辟公經略司準備差遣。夏五月，陸川妖寇李接殺九州巡檢以叛。癸酉夜，聞變，劉公戒僚吏趣發兵，公請以沙世堅將效用軍，自梧藤趨容，效用粟全五人爲之導，陳立國以

高州戍兵自化與世堅會，調雷化州水軍截海道，趣漕司轉餉，募白霞土丁，調巡尉吏士，以至增郵兵，明間諜，攜賊黨招叛亡，貸脅從，纖悉畢陳，劉公悉如其請。賊勢益急，陷容、雷、嫩、高、化，破貴、鬱，掠陸川、博白等凡八縣。秋七月，劉公被命以節制軍馬督捕，以公輔行。露潦熏蒸，渴死相望，公扶持拯療，士感激思舊，遂請分軍薄賊營，爲連珠砦十三，以斷賊往來，聲勢聯屬，賊氣浸索。將抵貴，太守馳騎報賊二千來自興業，謀襲靜江，上下愕眙。公叱之曰：「第流移者返，不聞有賊也。」劉公以詰貴守，旣聞果流移者復鬱林，劉公往撫之。公夜請曰：「師久不功，主知故乎？有勞不賞，有罪不誅，逗遛者獲全，偃蹇者幸免，人奚憚而不全且免也？」劉公於是大會將士，錄鬱林之功而誅南流縣尉，鬱林巡檢與其州胥黃益、龍翼，人人警厲爭死寇。寇窮之海，以有備不得前，生縛接及賊將彭四十，諸人二百六十。



有五、與接之妻孥以獻。六州八縣平、建留屯以守。冬十月丁未師還、十一月辛酉至自鬱林、壬戌磔接等于靜江市、膾其肝心以哭死事者。七年三月、以功遷文林郎、爲轉運、刑獄使者所劾、改主管廣東路轉運帳司。初、盜起、劉公詰刑獄司、佚捕、轉運司之興、二司懼且怨。事平、有希賞不得與者、遂棄間抵巇。劉聞公之得譴也、曰、是將何以勸功。上疏力爭。七月丙寅、丁母憂。九月、跣護還里。服除、赴選注辰州溆浦令。先是、公以憂乞身、劉公亦移鎮湖北、刑漕司遂劾公、公坐降授修職郎。劉公亦坐褫職罷鎮、尋卒。公至是受命、慨然嘆曰、平南之役、帥屬惟龔總、楊炤與僕三人。炤任督捕、總任居守、而始終同患、則劉公與我耳。吾而不言、將爲死公乎。遂上書闕下、盛陳六州之功、謂犯不測者四、居甚難者六、且曰、臣今不負劉焞、乃是不負陛下。辭義慷慨、以忤時相不報。當上溆浦、念劉公誣謗未白、

不往。郡守林公栗方館致之、故相衛文定趙公雄守荊州、移書趣行。林亦贊其決。縣介于五谿之間、蠻徭歲抄邊、公拊而誨之、相戒毋敢犯。士不知學、公命歐陽誠之爲師、儒術浸明。其後郭褒、張達相繼舉進士、風流文獻至今有存焉。十二年春、有王涇者、以公之官違年、持吏部符代公。公去、其秋叙復從事郎。明年赴選、叙文林郎、調監桂陽軍贍軍酒庫。歲餘之官、刑獄使者宋公若水以公攝常寧宰丞、尋又以湖南路安撫潘公時致之幕下、且命兼嶽麓書院堂長。陳公傅良來爲守、願得公助。潘公弗許。會郴、桂大饑、潘公命還郡賑給。公取南豐曾公法、率五日計口授泉、惠洽而民不勞。又請發常平金貸下農。陳公從之、全活甚衆。趙文定公舉公之詞曰、才資有用、氣節甚高、使在要塗、必不負國。此知公之深者。十六年、以光宗即位、遷儒林郎。尋又以年勞循承直郎。紹熙元年、以舉將及格、改

奉議郎、知常州無錫縣。縣爲浙右劇、前令鮮以善去。公使五家爲甲、甲有長。二十五家爲保、保有大長。凡一百二十五家、則揭其黨里姓名于都亭、其有不孝不友、不嫺不恤、凡以泯彝敗俗、合衆而撻罰之。若顛連婢獨、則以告于縣、縣稱給之。比及旬歲、教行訟清。明年、陳公以公聞于上、謂公與平李接之亂、未嘗言功而屢訟帥臣劉焞之冤、逮及桂陽酒官、助講荒政、甚於飢渴、詔赴都堂審察。三年冬十二月、召試館職。四年春正月、差禮部貢院點檢試卷官。二月、以年勞轉承議郎。三月丙子、給筆札于學士院、問以兵財之策、公對略曰、大義不明而委兵民於交病之地、此今日所患也。靖康之禍、天地之大變、而古今之所無。使南渡以來、君臣上下朝思夕勉、如勾踐之報吳、田單之復齊、則將必其將、兵必其兵、上無賄取倖得之門、下無虛籍冗費之敝、民之力庶其有瘳。而紹興以來、厄於權臣

之和議。乾道以來、格於機會之未集。馴至于今、又非前比。以偷安爲和平、久不事事爲安靜、天經地義陷溺而不自知、竭州縣之力以養不耕不戰之軍、不惟不可用於外、亦未保其能恬然於內也。策入、戊寅除秘書省正字。夏六月、召姜特立、公率同列上封事、命隨寢。上以疾久不朝、重華宮、秋九月、公又率三館之士上封、不報。退以書責宰相。冬十月、與同列三上封、不報。公又自爲疏以諫。會慶節、公又奏略曰、今慈福宮有八十之太母、重華殿有垂白之二親、陛下宜於此時問安上壽、恪共子職、否則無以慰兩宮之望。詞甚切至也。五年春、遂白宰臣、乞召朱公熹、楊公萬里。且曰、使朱公端委以立於殿陛之間、聲容氣色必有以感發人主、風指意向必有以作興人心。時相納用焉。夏四月、又率同列上封事、亦自上疏極言之。陳公爲中書舍人、以不用去、公爲書留之、且曰、今天下安危之機已



判然可見而未聞有叩頭流血、牽裾折檻之士。方且曰是不宜激、激則已甚。公不於此時有所奮發、爲士大夫倡、第潔身而去、不欲歸過君父、然則身雖退而奚益。陳公爲改容謝。七月丙寅、以寧考登極恩、轉朝奉郎、賜緋衣銀魚。八月辛卯、遷秘書省校書郎。九月丁卯、除監察御史。其冬、以災異求言、公疏五事以諫。一曰服喪次以答神人之心。二曰審敢殿以徼宗社之福。三曰寢御札以專廟堂之責。四曰體乾剛以強主德。五曰建皇極以正人心。是時上趣修大內、韓侂胄已從中用事、黜陟賞刑、率託之御筆。君子小人之勢將不兩立、故公縷縷及之。尋又詔侍從臺諫言事。公上疏謂求言未廣、願更令百執事悉許盡言。上將移御大內、公又上疏略曰、壽皇破漢魏以來之薄俗、爲高宗服三年之喪、壽康屬疾、以是付之陛下。萬一輕棄喪次、將無以慰在天之靈。況太母春秋高、壽成又當大變

之後、皆悲切不自聊。今陛下在行宮、瞻前顧後、猶有所馮恃。一旦舍之以去、不知兩宮何以爲懷。陛下即位以來、未見上皇、其間必有幾微曲折、非外庭小臣所能盡言者。陛下固宜篤厲精神、少紓歲月、以俟上皇和豫。徐爲祗見之謀、何苦爲是趣迫之舉。而況行殿之次、三年之喪、所以祈天永命之意、實肇基立本於此乎。自後御札日盛、公復上疏略曰、陛下臨御未數月、今日出一紙去一宰相、明日出一紙去一諫臣、其他令由中出、不知其幾。昨日又聞侍講朱熹遽以御札畀之祠祿、中外相顧皇駭、謂事不出於中書、是謂亂政。熹當世老儒、善類攸歸、清議所出、陛下毋謂天下爲一人私有、而用捨之間爲是輕易快意之舉。疏上、權倖側目。閏十月、被命監掩攢宮。十二月、集議孝廟配享、公謂艱難以來、首倡大義、不與賊俱生、不以成敗利鈍異其心、精忠茂烈、貫日月、動天地、未有過於張浚



也。孝宗皇帝規恢之志、一飯不忘、歷考相臣始終此念、足以上配孝宗在天之意、亦惟浚一人。議不合、求去、除江南西路轉運判官。慶元元年春至部、下令曰、其有下陵上、卑踰尊、賤犯貴、不孝不友、若當官貪殘、居鄉武斷、在役受賕、苟以事至、必罰無貸。其後歷官、率以此爲首。公在江西僅半載、爲言者所劾、降奉議郎罷歸。五年夏、始盡復元官。其冬、主管畢州雲臺觀。嘉泰三年春、除廣西路轉運判官。廣右十六郡、漕司歲借鹽本錢有差、郡率不能盡償、故比歲靳不與。公曰、是趣使歛民也。即給借緡錢十餘萬。尋宣公舊規修校官、闢漕司酒庫以爲桂林精舍、與同志共學焉。嘗請蠲靜江府昭州折布之錢九萬餘緡、及廣西攝官悉從漕司注擬、未報。三月、改知鄂州。有父祖死于瘴、子孫落南不能歸者數百人遮道、公命給其歸貲。夏五月丁卯至鄂州、諭民以義利之辨。凡家人族姻之訟悉以

分義爲斷。嘗奏沿江郡縣征商之弊、乞下諸道總餉之臣、考覈歲入而裁其出、以惠商旅。又請募胡南北茶商以助大師、江湖水手以濟水軍。僅及期歲、除戶部員外郎、總領湖廣江西京西財賦。湖北京西軍馬錢糧、蓋開禧元年夏四月也。時柄臣議開邊、虜謀知增戍。公移書當路、請號召沿邊忠義人以保邊場、刺軍中子弟以補軍實、增棗陽、信陽之戍以備衝突、分屯陽羅五關以捍武昌、杜越境誘竊以謹邊隙、選試良家子以衛府庫。且謂虜懲紹興末年之敗、今其來必出荆襄、軍宜有儲峙、乃併輸湖南米於襄陽、凡積米五十萬石、馬料一百三十餘萬石、又以湖北漕司和糴米三十萬石分輸荆、郢、安、信四郡、又蓄銀一百萬兩、爲萬一進討之備。其後董達守郢、孟宗政守隨、柴發守南漳、克有成績、皆公所拔、而襄陽、安、郢之圍亦賴儲峙、人心不搖。閏八月丙寅、被命赴行在奏事。冬十一月

癸未、除秘書少監。初對、首言、臣所聞於師友者、惟大義是究。嘗奏疏先朝、及叨召試、未嘗舍是而言他。今縱未能一舉以大快神人之憤、謂宜簡拔人才、蒐練軍實、使一日有一日之積、一歲有一歲之功。其次招勇敢、葺險要、廣招募、明間諜、大抵皆申述前在鄂州所請、而論光、鄂當經理、江、黃當增戍、於良家子中增爵賞、以募間探、擇近臣授之節制、視前請加贍。公峨冠大衣、儀狀開偉、至是造朝、疏暢明亮、朝論歸重焉。然倡議者方指期克復、而公所陳二疏、大抵必欲先內後外、日積月累、使規摹先全、異論不搖、故往往不快於心。會上流告饑、十二月辛未、除秘閣修撰、知江陵府、主管荆湖北路安撫司公事、出大農十萬緡賑貸。陛辭、又申前說、辟黃榦準備差遣、陳椅營田司幹辦公事、弟猶書寫機宜文字。明年春二月至武昌、即馳遣岳璠、董道隆招商分糴。三月視事、發米二萬石、糴給各有

差、米價爲平。又念虜萬一窺襄陽、則荊州爲天下劇、方高氏有國、嘗注水爲防、號三海、先是守荊者雖嘗經理而未有緒。公用五十餘萬夫、緡錢半之、築金鑾、內湖、通濟、保安四櫃、以達于上海而注之中海。拱辰、長林、藥山、棗林四櫃、以達于下海。分高沙、東獎之流、由寸金堤外、歷南紀、楚望諸門、東匯于沙市爲南海。又於赤湖城西南、遏走馬湖、尉斗陂之水、西北實李公櫃。水勢四合、高可注而下、卑可限戎馬、深可舟、淺不可揭、隄上有路、路端有隘、而穴隄以相灌注。公嘗招某方方而履之。其後虜騎東至竟陵、北窺荆門、而不敢睨荊州者、以此。公嘗數請募茶商、水手、至是行之。又刺親效五百人、調荆、岳、鼎、澧義勇防城。冬、虜犯棗陽、公謂棗失則郢重、郢重則荆危、請調沿江及關西兵。未報、虜圍襄陽、德安亦遣二千人由建陽、荆門屯百頃、援郢一千三百人由基城、馬梁會百頃、義勇千赴襄陽。



十一月丙午、被命節制軍馬。十二月庚戌、虜遊騎至官陂、迫竟陵。辛亥、守臣林管亡、公劾之、請于朝、得夔州路鈐轄張榮、以八百人援竟陵、統領李橫提軍五百護送京西參議官魏良忠繼往。時神馬陂潰軍所至剽掠、下令招集、前後共得萬餘<sup>⑨</sup>。以三千人援襄、八百援安。癸亥、除寶謨閣待制、辟王觀之主管機宜文字、胡庚幹辦公事、薦豐忠簡趙公之孫綸于朝。三年春正月壬午、即拜湖北京西宣撫使、仍治荊州、辟吳竽、于革爲參議官、張忠恕、張岷爲機宜文字、弟猶書寫、王觀之幹辦公事、陳椅、李壽朋、陳之經、董道隆、周郁、趙師蒼準備差遣、胡庚、羅穎、李儒用、王垌準備差使、康彥明、吳必達、王灝、黃輜準備使喚。魏友諒乞濟師、予之千五百。又分命章彥珍將義勇軍、金安世忠勇軍、皆五百、駐龍沔、灘市、馬瑾以義勇千、官軍四百再援竟陵、應城、董達、郝恩各將兵援郢、陳椅以義勇四千守荆

門。丙戌、虜犯竟陵、張榮死之。癸巳、虜圍郢。戊戌、夔路漕司以吳曦反書至、內阻外制、公爲寢食俱廢。某自春正月道荆西歸、公謂其可與語、嘗挈與分視守備、至是馳書至峽中挽回、俾攝參議官、且曰、其爲我任西事之責。公方以襄陽、德安之圍未解、勤勞夙夜、募士入郢、責王宗廉以死守、而數調大軍及忠義、便捷分道夾擊。郢圍旣解、尙有襄、安二圍、乃督董達、李謙亨、嚴江、彭國自京山援德安、而趣董世雄、孟思齊會黃陂、李橫、雍政、馬旺仍隸魏友諒、約山砦馬伸、柴發及忠義統領孟宗政、咎世雄解襄陽之圍。部分旣定、惟西事方殷、會彭輅避亂至自金州、秦世輔以失津謫荆、公以二將爲問、某因請分授民兵、付以襄、安之圍、又贊公請以王大才爲池州都統、將萬人戍江陵、爲討叛計。公遂移書當路、請降御札付大才、輅咸任西事。尋又募水軍捍江、令鈐轄趙翰以禁軍三百、陳寶吉仲以

御前軍六百扼枳歸巫山、立柵石門、王舜舉亦以三百人控均、房、轉歸、峽、粟以待王師。俾余求一人往說僞夔帥祿禧、得衢士趙師濟請行。會安公丙矯制誅曦、三月戊子、露布至荆、公率吏士拜表賀、遣人勞安公、復馳書當路、乞厚平蜀之賞。壬辰、除刑部侍郎。戊戌、上手書付公、略曰云云。書至荆、則西事既平、公執書感泣知遇。又念江北、漢南之地、創殘未復、發緡錢十三萬八千賑湖北、六萬三千賑京西。新潼川僉書判官趙彥呐與夔州判官希混、進士胥世忠、朱元之等誅祿禧、公爲上其功、尋又請城荆門、應城、請以歸、峽、二州專隸湖北、未報。除四川宣諭使、賫詔諭蜀、而自以御札付公、有曰、比以逆曦負國、付卿西討、賴宗社之靈、賊不旋踵已誅。然遠方亂定之初、猶軫憂顧、必得信實之臣、單車所至、往宣德音。惟卿素知體國、就輟以行、其遂疾驅、爲朕訪求民瘼、鎮安群情。如武興一軍兵

數偏重、今欲分半屯於益昌、別命一帥統之、卿可與宣司商略、條具來上。諸有經畫、併悉以聞。且令至沔州、興元府、金州都統司犒軍。五月己丑、發江陵、吳竽爲參議官、自黃往金、宣布詔旨、王觀之幹辦公事、李儒用、董道隆準備差遣、岳璠準備差使。秋七月丙子、至夔、吏民扶杖聽詔、以蔣介當黜、揭諸行司、以丁煇名聞。尋分遣觀之、儒用往成都、潼川布詔、公由果、閬至利、區畫分屯。道大安、爲文以吊楊節毅公震仲、即學宮祠焉。九月己卯、至沔、與安公定議、分兵駐利。十月還至利、首奏楊公死節及李好義有大功、皆請賜諡立祠、且乞以官田給賜好義之家、劾蔣介不忠。遂以十二月戊辰至夔、將以淑慝功罪歸報天子、會除敷文閣直學士、即授四川安撫制置使、兼知成都府。公惟受任若此、無以上報、遂列上倡義之士十有五人、守節二十有九人、去官二十有三人、受僞命九人、猶以爲未





足也。復上人才五十有二人。以李僑爲首。且援王文正公之說曰。臣所薦之士。非欲陛下一一召用也。士大夫既爲近臣所薦。必知愛重。若加養成。可爲異日用。公之心蓋若此。而人不及盡知也。又請蠲賦役以幸蜀民。其略曰。竊惟蜀之利病莫甚於賦歛。姑以養兵言之。歲有二千萬之供。取民百端。未易毛舉。鹽課之在建炎。總爲緡八十萬。後改行引法。遞增至四百萬。今雖數數寬減。尙存三百餘萬緡。酒課之在建炎。總爲緡一百四十萬。後改場店法。遞增至六百九十餘萬緡。今寬減之餘。尙存四百餘萬。產茶之郡。初亦無幾。自熙寧始行榷法。至元豐而倍增。及建炎改收引緡。至紹興而倍取。今爲緡二百餘萬矣。布估不過六州。自薛田創於天聖。每疋給以本錢三百。至建炎不給本錢而匹二千。今爲緡一百三十七萬矣。以至二百萬緡畸零之錢。與三十萬緡激嘗之絹。當時固曰軍興暫

科事已即罷。其後取之自如。展轉滋甚。異時養兵費二千萬緡。今又倍增至五千萬矣。不知何以爲繼。兩界錢引已五千萬緡。今又添印五百萬。且增一界。又二千四百萬緡矣。不知子母何以相權。重以逆曦之變。總所之積耗於妄賞。關外轉輸焚毀略盡。今平賊之後。諸軍累資俱高。每歲俸給增添。何啻二百萬緡。軍興之際。起夫運糧。固不可免。地遠者出大庸。是亦權時之宜。然有令人寒心者。臣始至巫山。士民遮道。謂巫山科夫五百。夫爲錢八十緡。以鄙小縣。刀耕火種。裁自給。而輸緡四萬餘。可類推矣。方軍事之殷。非財莫濟。顧以蠲減之議爲獻。似亦不知時義者。願廟堂之上。明詔侍從省之臣。有懇惻愛民之心。備諮蜀事者。相與討論來上。然後行下。宣制總司。研窮節目。條列利病。凡無名之供。煩重之賦。一切蠲減。庶幾與民更始。咸被實德。祈天永命。無越於斯。其言雖不果用。人以爲

知本。嘉定元年夏四月至成都。蜀士學于成都者春秋試率數千人。弟子員五百餘。公揭朱文公白鹿書院學規誨之。既又祠周程三先生于學。朱張氏配焉。俾某記其事。多士聞風胥勸。學者益勉。公念成都爲西南都會。師少堞壞。不足以控制諸道。乃與宣撫司列上。移興元中右軍二千分屯。罷潼綿歲戍五百人。又念蜀之楮幣舊號交子。隨閏更易。曰兌界。近歲以二千五六百萬爲界。惟兩界並行。今乃增印至八千萬緡。漸不可繼。與宣撫司總領所共請。以帑金三萬兩。銀一百五十萬兩。更自朝廷賣僧牒。收回增數。未報。而總領所忽下令於利州收兌。人情皇駭。公截留九十三界新引五百萬。就成都置局。且諭民以收兌不盡之數行用如故。浮議遂止。然自是與總餉者異嚮矣。趙衛公有子曰昱。聞曦變。號慟不食而死。劉公之子曰璽。時亦去官而卒。偶皆公所嘗事者。遂併上其事。趙公

賜諡文定。制置使滿歲得薦士。遂以李嗣文、何惠彥、度正、劉靖之、何應龍、李鳴鳳上之。秋八月乙丑。公被命赴行在。候黃疇若到日起發。九月。安公除制置大使。會彌羌結連青羌寇邊。尋即竄伏。請降。公欲增戍防捍。而安公欲擊之。卒以取敗。二司由是不咸。明年四月癸亥。解印去。七月至荊州。吏民迎拜聚觀。象而祠之。公俯江嘆曰。吾昔守此。正兩圍未解。西事方殷。嘗指天誓心。事幸而濟。即幅巾還里。今因循累歲。遂力上歸田之請。徑還長沙。八月。以臺疏落職。罷召命。五年春三月。差提舉隆興府玉隆萬壽宮。公以行年七十。請致其仕。優詔不允。明年十有一月乙亥。以疾卒。卒之日。楮無餘貲。帥守衛公涇與漕使曾工部繫爲給喪事。詔以前請特復敷文閣直學士致仕。尋覽遺表。特贈四官致仕。遺表恩澤如令云。公襟度恢弘。色莊而氣怡。人之有善。不翅己有。過焉曰。此必非其本心。當徐



儒藏

察之。與公久處者。咸曰未嘗見公有盛氣矜色。藏怒廋怨。而聞言必復。見義必爲。則勇不可奪。從張忠獻公。聞復讎二字。及從宣公。又聞求仁之要。終身誦而行之。以故士心豫附。所至林立。幕府往往不下三十人。館士亦數十計。自爲吏凡四十年。奉賜緣手盡。或咎公施予太濫。公曰。通有無者理之常。余少苦貧。資人以活。今幸有祿。可以及人。而閉戶獨享乎。迨其乏絕。亦處之夷然。無一豪追咎也。於諸弟尤極友愛。均財共產。廉遜之風被于國人。嗚呼。自師友道缺。後生未至。不及師事前輩。儕類渙散。典刑云亡。公以湖湘之英。歷款諸老先生之門。得張公父子爲之依歸。碩大寬深。山嶽鎮而江河流也。使不幸而不及事前輩。其亦幸而親炙如公者。猶有以考言行而察世變焉。而暫起復僵。多忤少逢。方欲引年謝事。聚友求志。以私淑後學。而天亟奪之。志士仁人聚泣交吊。嗚呼。是惟哭其私

也歟哉。奏議□卷。經解□□卷。雜著□卷。藏于家。元配李氏。故湖南路提舉常平茆之女。歸公五年而卒。繼室王氏。故廣東路經略趙之女。皆贈碩人。子彌昭。宣義郎。前僉書歸州軍事判官。彌慶。承務郎。孫男女二十人。余以受知之久。彌昭屬叙公閱閏年行。以求銘于立言者。乃不果辭。謹狀。

魏了翁撰 《重校鶴山先生大全文集》卷八九

校記

①李：原作「季」，據明祁氏澹生堂抄本《周益公文集》改。

②贛縣：原脫「贛」字，據右引補。

③兵鈴：原脫，據右引補。

④援：原作「授」，據右引改。

⑤朗：原脫，據四庫本《文忠集》補。明抄本作「明」。

⑥不貲：原脫，據右引補。

⑦上：原作「且」，據四庫本《鶴山集》改。

⑧辨：原作「便」，據右引改。

⑨餘：原作「分」，據右引改。

宋儒碑傳集卷一百五十四

詹體仁 趙蕃 譙春 陳亮

司農卿湖廣總領詹公行狀

公諱體仁、字元善、姓詹氏。其先光州固始人、十八世祖遷於建之武夷、自公之父授室浦城張氏、遂占數焉。曾祖澤民、祖僊、不仕。父慥、弱冠有異材、鄉舉第一、與五峰胡先生、屏山劉先生游相好也。晚始得官、爲贛州信豐尉。金人窺邊、丞相張忠獻公開幕府、辟以從、論兵事多開納、以公贈朝奉大夫。公幼出爲伯舅後、年二十一中進士乙科。大夫沒於京師、護柩旋葬、過時而哀不忘。又持張氏祖喪三年、經紀其家、教仲舅以學、鄉閭浩然歸重。調饒州浮梁尉、屢獲盜如律、郡欲上功、非其志、弗就也。爲湖州歸安丞、摧姦抑強、貧弱得職。又持張氏祖母喪、服除、爲泉州晉江丞。程尙書大昌、司馬侍郎伋相繼爲守、尤賞異、待以賓客禮、郡有疑獄必諮焉。

公氣和色溫、持論根本忠恕、二公常敬聽。梁丞相其郡人也、雅知公、會入相、薦公於上前、召除太學錄、再歲遷博士。時學官皆天下選、公周旋其間最久、而成作人材亦最多。除太常博士、時方定高宗廟諡、或執堯宗之議堅甚。公言中興之德莫盛於商高宗、今以堯宗諡、非惟於古經傳亡據、且使大行不得以中興之功自顯於萬世、此禮官罪也。議遂決。遷丞、攝郎金部。光宗初、輪對百官、公具考覈財賦源流以對、請詔大臣以省濫員、裁冗食、節浮費等事、始於朝廷、達於州縣、具爲綱條品目、使可舉行而勿爲浮議所沮。要在本之以至誠惻怛、行之以公平簡易、守之以堅確悠久、使弊去而物論不駭、事定而人心不搖。庶幾制度既立、財用日豐。有詔令戶部稽考以聞。提舉浙西常平、公謂浙右之有漕渠、非止通餽運、資國信往來而已。蘇秀常潤田之高仰者實賴之、於是開漕渠、濬練湖、置



儒藏

斗門爲旱澇備。又以餘力立舉子倉、創安濟院、所活不可勝紀。散鹽本錢數萬、以紓亭戶之力。歲終鹺利倍增。除左曹郎、湖廣總領。始至、激勵將帥、使知朝廷恩意。湖廣楮幣視京券爲輕、軍民患之。日久、公捐貨泉百萬以權其直、輕重始均。明年、就除司農少卿。江上諸屯多貧匱、公擇其累衆者增給餐錢、不請益於朝而用度足。藏粟歲久、至陳陳相因不可食、公命簸其腐投之江、且廣糴以補其乏。異時諸郡之隸總所者、賦輸或不以時、符移督償、銖髮不貸。公曰：郡亡從出、必取諸民、今幸蓄積有餘、不至乏興、弛以予民可也。爲條奏蠲其負凡百餘萬、而諸郡財力始寬。武昌瀕江多水災、公與諸司同築萬金堤以防其溢。人謂公儒者、爲政知濯夷飢饉而已。逃卒千人入大冶、因鐵鑄錢亂幣法、剽掠爲變。公語戎帥宜速討、曰：此去京師千餘里、上請須報、賊勢張矣。於是群黨亟壞、人始服公制。

變爲不可及。越歲召歸班、至則除太常少卿。陛對、首陳父子至恩之說、以感動上意。其略謂：易於家人之後、次之以睽、睽之上九曰：見豕負塗、載鬼一車、先張之弧、後說之弧、匪寇婚媾、往遇雨則吉。夫疑極而惑、凡所見者皆以爲寇而不知實其親也。孔子釋之曰：遇雨則吉、群疑亡也。蓋人倫天理、有間隔而無斷絕。方其未通也、堙鬱煩憤、若不可以終日。及其醒然而悟、泮然而釋、如遇雨焉、何其和悅而條暢也。伏惟陛下神心昭融、聖度恢豁、凡厥疑情、一朝渙然、若揭日月而開雲霧、茂見皇極、不叙彝倫、以承兩宮之歡、以塞兆民之望、天下幸甚。孝宗旣上仙、公帥同列抗疏請警蹕過重華、親臨大祥之祭、辭意尤懇懇。時有欲以正宗爲大行諡者、公言：壽皇聖帝以旁枝入繼、事德壽二十餘年、極天下之養、諒陰三年、不御常服、漢唐以來未有、宜諡曰孝。公深於禮、故前後定兩朝廟諡、異論

莫能奪議者韙之。阜陵將覆土、公爭、以爲地勢卑不足以妥神靈。時宰故知公、及是議不合、除太府卿、尋直龍圖閣知福州、擁節旄過家、人艷其寵。長樂地大物繁而俗本易治、前二千石用刑過差、民慘不樂。公至、盡解苛憊、物情便安。浮圖之宮、甲於東南、命僧率有常直、公曰是賄賂公行也、乃命各從公舉、而境內始亡債僧。推廣社倉法、以振業窮民、以掄溺子之弊、條約甚備。後莫能易。居亡何、言者及前山陵事、罷郡屏居者八年、時論紛紜、處之澹如也。徙居雪川、酣飫圖史、人莫窺其際。時有起胥史爲大官、氣燄熏燎、掃門祈福者踵相接。公使浙右時、實常爲公役、至是多方鉤致公。公曰、小人乘君子之器、禍敗亡日矣。胡得以汙我。其後果如公言。復龍圖知靜江府、春行視農、見田器薄小、不足以盡地力、乃爲詢訪簡易之法、物別爲圖授之、又爲浚井導泉、以便行旅。嶺外民貧財匱、公撙節

浮蠹、爲閣十縣稅錢一萬四千、蠲雜賦朱膠等錢八千。昭、桂折布、自建炎以來爲民患、公建請蠲免、而二州民力始蘇。占城、眞臘相攻、餘兵亦入瓊管、公調兵且招而海道寧。移守鄂州、州兵民雜居、多強梗不奉法、公治尙寬、至是易之以嚴、曰此變通之術也。除司農卿、復總餉事、士懷舊恩、鼓舞迎拜。歲比弗登、民艱食、公曰、民病若此、可以非職而弗恤乎。乃先便宜賑而後以聞。邊警日急、小夫憊人爭承間抵掌言用兵、希用事者意、公奏記廟堂、具言兵不可輕動、請遵養以俟時。皇甫斌自以世將家、好大言、公間語同列、謂其事必敗。時移屯襄陽、軍行亡紀律、公指謂人、此何異綠林下江之流。已而果敗。公之先識類如此。俄屬疾、以開禧二年二月二十二日終、年六十四。公天姿超邁、志守卓然。自擢第歸、即從故侍講朱先生游、講質疑義。其學以存誠謹獨爲主、造次弗渝。嘗患世儒論經多失





本指曰、惟皇上帝、降衷於下民、若有常性、克綏厥猷、惟后、此即天命之謂性、率性之爲道、修道之謂教也。人能知此、則知觀書之要、而無穿鑿之患矣。博覽群書、自天文地理、卜筮醫藥、百氏雜說、靡不通於渾儀、漏刻、俱嘗親製、以測驗、皆合趙渙造新歷、以獻、公爲作序。中書舍人黃公裳一見、嗟異、因以定交。著象數總義一卷、歷學啓蒙一卷、莊子解五卷。爲文若不經意、而明白鬯達、根於理致、雕鏤剗之語、一不出諸口。神識恬暢、喜論說古今、遇佳士良友、窮日夜語、不厭聽者忘疲。居朝廷、好盡言、或議論盤錯、衆相視莫敢先、公輒爲辯析、是非成敗、無所諱、亦以是賈憎於人。惟一時賢俊、氣合道同者、常推敬。周丞相當國、公疏納知名士三十人、周丞相不能用、已而多所收擢、公之力也。紹熙甲寅、趙丞相將定大策、外廷無預議者、獨諉公與左司郎中徐誼達意。少保吳琚請憲聖垂簾、爲

援立聖明之地。其爲諸賢倚重如此。然公立朝、自信所學、於辭受出處之際、尤不苟、故雖仕再登朝、而位不過卿列、所韞未究、卒抱其志以終、可勝惜哉。公旣歿而召至、或謂公而不死、必嚮用矣。嗚呼、考公平生出處大致、當衆賢用事時、猶不能少貶以求合、其能自詘於權門翕赫之日乎。事無巨細、有不合於義必爭、其能無言於弄兵首禍之日乎。使公而不死、即召至、而能不辭也哉。

真德秀撰 《西山文集》卷四七

司農卿湖廣總領詹公墓誌銘

公姓詹氏、諱體仁、字元善、初後其舅張氏、旣復爲詹氏。詹氏之先、有自光州固始家于建武夷者、其後別居江浙、皆本武夷、而公爲浦城人。曾祖某、祖某、父某、少有異材、鄉舉第一、授贛州信豐縣尉。見張忠獻公、論滅虜秘計、忠獻壯之、辟爲屬。以公贈朝奉大夫。公始冠、第進士、大夫死錢塘、與柩俱返、



哀動行路。未幾、張氏祖亦死、仲舅童孺不勝喪、公服重治家事、教舅有立人無異言。調饒州浮梁尉。郡以公屢獲盜、欲奏其賞、謝不就。爲湖州歸安丞。會張氏祖母死、終喪、爲泉州晉江丞。公穎邁特立、在下僚、氣順言正、喜因事開說、以便民。上官不以氣類離合、常敬聽。梁丞相薦於朝、召授太學錄、遷博士。于時學官號天下選、講學得人之盛、後以爲不可及。公居間前後四年、功最多。遷太常博士。高宗方定諡、或謂宜稱堯宗。公言於古無據、謂比殷高宗諡改高。後爲少卿、諡孝宗、亦公所定。議者皆厭服從之。遷丞、攝郎金部、提舉浙西常平。除左曹郎、湖廣總領、逃卒千人入大冶、因鐵鑄錢亂幣法、劫掠爲變。公謂諸司宜速討、曰、此去京師千餘里、上請須報、賊計行也。於是羣黨亟壞、人不知警。就遷司農少卿、召爲太常少卿。光宗疾、省重華不以時、中外駭懼、或瘖不出語。公深陳父子至恩、激發

廷臣、使交疏迭諫、用意尤苦。永阜陵當復土、公言、本營思陵非高爽地、自思而西、勢益卑下、非所以安神靈也。宰相不聽。公爭之力。遷太府卿、既請外、除直龍圖閣、知福州。歲餘、時論浸異、言者遂以爭山陵事爲公罪、罷。凡八年、徙屋茗雪、翫惕水石、誦讀悠然。復龍圖、知靜江府。始至、勞農觀田器。公曰、是薄而小、不足盡地力。且無溝畎、何以行水。乃更造農具、取水法、物別爲圖授之。移知鄂州、除司農卿、再爲湖廣總領。公恩在鄂師、戍卒遲公來、合兩手曰、復得吾父矣。蓋儒者之政、歸於正己厚下而已。世吏所以便文自用者、雖善弗錄也。爲民利無不舉、爲民害無不去、以其下爲當捐、無不與、以其上爲不當取、無不革也。故公於浙西、開漕渠、浚練湖、置斗門、以備水旱。特散鹽本錢數萬、以業亭民。湖廣幣輕、出百萬權其價、而放諸州積欠亦百餘萬。諸屯累重者、增券給之。黻腐糴新、士食好米。又

與鄂州運司同築武昌萬金隄。福州之僧坊以賂易主者差其直有常數、公一徹去。其在桂、則十縣之稅錢爲閣一萬四千、雜稅朱膠爲除八千。大凡州縣之以用乏告、以賦重請、皆立應無留也。人或疑公且空有司之藏爲百姓地矣、而公之財常源源暴暴、如泉湧山聚、此又世吏所難測也。公立朝、察消長、觀會通、勸發善意、助達陽德、於人材治道、開闔明晦、密扶顯相、功效十數、顯難以言傳也。自趙丞相去、士久失職、公率同志請於周丞相、反覆極論、責以變通之理、因疏納知名者三十餘人、周丞相不能用、然其後亦多所收擢、公之力也。時邊事方旦暮急、而公已病、猶懇懇調護兵民、杜塞希意迎和者。朝廷既召公歸、遂以開禧二年二月二日卒、年六十四矣。武昌之人、如喪所親、號泣送之。夫人吳氏、聶氏、先公卒、復娶沈氏、皆封恭人。五子、端愿、從事郎、端慤、迪功郎、端直、將仕郎、端方、端靖、

四年某月某日、葬于某縣某鄉某所。公少從建安朱公學、得其指要。已而徧觀諸書、博求百家、融會通浹。天文、地理、象數、異書、無不該極。每陋巷棐几、茗飲冷落、或窮游縱觀、觴行淋漓、輒爲人講說、本末條暢、眉疎目明、照坐奕奕、夜闌燭盡、聽者忘疲。著象數總義若干卷、某集若干卷。始、公之後張氏、詹氏諸兄蚤世而貧、公養視弟、鼎買田宅、具婚嫁、女爲官人妻。既還詹氏、經營二家如一日。至於弔死卹孤、無疎戚貴賤、有無共之、信矣其篤厚君子也。余觀公在朝、有可以致高位之時屢矣、而義不苟取。嘗與同僚燕語、顧余而歎曰、吾等善自立、須子一好墓銘而已。悲夫。余之卒銘公也耶。銘曰、約步則履、殆無奇行。恢疎偉人、難中準繩。莫求廣居、陋者則然。大德不踰、公其有焉。相彼豪雄、竭海摧嶽。又粹以慤、金鍊玉琢。匪質偶成、以學故能。既超旣騰、靡公靡卿。噫嘻古人、用豈必盡。我銘此詩、

哀而勿慍。

葉適撰 《水心文集》卷一五

### 詹體仁傳

詹體仁、字元善、建寧人。初後舅張氏、既爲之立嗣、乃復歸。始冠、第進士、調饒州浮梁尉。屢獲強盜、郡欲奏其功、謝止之。再爲湖州歸安丞。張氏祖母死、終喪、爲泉州晉江丞。梁丞相克家薦于朝、召爲太學錄、遷博士、尋遷太常博士。時高宗定諡、或謂宜稱堯宗、體仁言、諡法雖有之、於古無據。且功莫盛於中興、沒而不彰、何以示後。請比殷武丁、諡爲高。力爭之、議始決。遷丞、攝郎金部、提舉浙西常平。繼除左曹郎、湖廣總領、就遷司農少卿。剋革舊弊、軍餉饒足。諸郡積逋百餘萬、奏上、悉蠲之。時有逃卒千人入大冶、鑄鐵錢、亂幣法。體仁言於諸司、宜速討。曰、此去京師千餘里、若遲報、賊計行矣。於是群黨亟壞、人不知警。召爲太常少卿。時光宗疾、省重

華不以時、中外駭懼。體仁深陳父子至恩、激廷臣交疏迭諫、用意尤苦。永阜陵當復土、禮臣言本營思陵、自思陵而西、地勢益卑下、非所以妥靈也。宰相不聽、爭之不已。遷太府卿、即請外。除直龍圖閣、知福州。歲餘、時論浸異、言者遂罪以爭山陵事、罷歸。凡八年。徙雪川、諷詩讀書、悠然自得。復龍圖閣、知靜江府。始至、勞農、觀田器、曰、是薄而小、不足以盡地力。更造農具、爲圖授之、民以爲便。移知鄂州、除司農卿、再爲湖廣總領。戍卒聞其來、歡然相告曰、復得吾父矣。尋以病卒。召命適至、時論惜之。幼學于建安朱熹、沉潛經訓、徧考群書、百家朝夕、誦說、本末條暢。其居官、以盡職利民爲心。在浙西、開渠浚湖、以備水旱。散鹽本錢數萬、以業亭民。在湖廣、出百萬緡、以權楮幣、鋌腐糴新、以美軍餉。在鄂、築武昌萬金堤。在桂、閣稅錢一萬四千、除雜稅朱膠八千。而所至未嘗以匱告。其立朝、密扶善類、進



達人才。請於周丞相必大疏納知名士三十餘人，後亦多顯擢云。

杜範撰 《清獻集》卷一九

章泉趙先生墓表

粵自炎祚中興，文物萃於東南。厥初諸老先生，師友淵源，有以繫學者之望。天下學者翕然而景從之。閩、湘、江、浙，師道並建。凡異時孔孟之所傳，周、程、張、邵之所講，思之益精，語之益詳，炳然斯文，萬世攸賴。比年天不憖遺，諸老淪謝，文獻之家，典刑之彥，巋然獨存，猶有以繫學者之望者，章泉先生一人而已。故先生雖退然不敢以師道自任，而天下學者凡有一介之善，片文隻字之長，皆裹糧負笈，就正函丈。其限以地，屈於力而不能至者，詩筒書函，左右旁午，往往以一酬酢爲榮。及先生之歿，而文獻典刑盡矣。後生晚進，欲求師友之益，而俛俛然無所之矣，可不爲大哀乎？先生姓趙氏，諱蕃，字

昌父。其先自杭徙汴，由汴而鄭，南渡居信之玉山。曾祖暘，朝散大夫、直龍圖閣、提舉江州太平觀、祖澤、迪功郎、海州朐山縣主簿、贈承議郎。父渙，奉議郎、通判沅州、贈朝奉郎。龍圖歿，葬玉山，之章泉先生因家焉。故世號章泉先生。用龍圖致仕，恩入仕，饒之浮梁尉。福之連江簿，皆不赴，爲吉之太和簿。辰之司理參軍，最後監衡之安仁贍軍酒庫。已至未上而歸，遂奉祠家居，積祠庭之考至三十有三。今天子御極之元年，歲在乙酉，宰相以先生名聞，有旨除大社令，三辭不拜。特改奉議郎、直秘閣，主管建昌軍仙都觀。又三辭不允。越三年，差主管華州雲臺觀。蓋先生自乙酉至是歲，辭官不獲，屢上休致之請，皆不允。而先生請不已。明年夏四月，始得旨轉承議郎，依前直秘閣致仕。又閱月而先生逝矣。實紹定某年某月某日，壽八十有七。方先生之在太和，便坐有齋，榜曰思隱。蓋當筮仕之初，已



有山林之思。在官清苦，惟以賦詠自娛，以是受知於吉之鄉先生楊公萬里，贈詩有云：西昌主簿如禪僧，日食秋菊嚼春冰。又云：勸渠未要思舊隱，且與西昌作好春。其所以行之身加乎民者，略可想見。又爲理掾，辨獄之誣，不爲二千石屈。卒見是於當路，權訕位下，特以少嘗從靜春先生劉公清之受學，公時守衡，故欲從之卒業。甫至，而劉以非罪去，即從之歸。其謹於所職而篤於所事如此。賦性寬平，與人樂易，而剛介亦不可奪。故相周公必大與先生有州里之舊，先生亦有不可寄詩有公如在廊廟，我亦遂簞瓢之句。其後公在相位，屢加薦引，先生竟不受。自少喜作詩，答書亦或以詩代，援筆立成，不經意而平淡有趣，讀者以爲有陶靖節之風。歲時賓友聚會，尊酒從容，浩歌長吟，心融意適，見者又以爲有浴沂詠歸氣象。至於年垂知命，自視欲然，更往受學於文公朱先生。既耄矣，猶虞

末路之難，命所居曰難齋，則視昔賢啓足啓手而戰戰兢兢，年踰九十而求箴儆於其國無異心也。其能續諸老先生之後，爲學者所歸，豈偶然哉？娶俞氏、繼邢氏，子五人，遂遠、遙、邇、遺、遙，邇先卒。女四，其壻俞椅、周杲、徐耘老、徐禧。孫男七人，曾孫男六人，皆好學。葬用卒之年九月甲申，地實永豐縣富城鄉之葉塢，距章泉五里。前葬，學者爲詩爲文以誦歎先生之美者不可勝計，其爲誄、其爲銘，又有名公巨卿在。某寒鄉晚出，於先生無能爲役，而遂以七十翁不遠二千里來致先生垂沒之贈，且謂某昔叨誤恩，實玷先生後，不應泊然忘言，無以昭令德。某義不得辭，則姑取門人鄭夢協所狀先生行，益以己所聞，使歸表於先生墓上。

劉宰撰 《漫塘集》卷三二

譙府君春墓誌

嘉定六年春正月丙寅，處士譙君卒于成都之雙

流尉廩年七十有一。厥二月辛巳其孤仲午反匱于邛蒲江之里居。厥九月庚申葬于鹽泉鄉兌山。先事以書抵余曰昔者吾父孤苦自力爾居吾鄰爾寔稔之爾之同產弟兄則我之所自出也爾也視余父猶舅也父之竊未有識也以惟爾也屬余弗敢辭叙而銘之君諱春<sup>②</sup>字子辰姓譙氏世居邛之大邑以儒名家後<sup>③</sup>徙居蒲江曾大父祖道大父景陽父詢再貢禮部妣陳氏文林郎壽祺之女君在母七月而生十有七年而孤又三年而喪所恃煢然一身備嘗險艱有人所不堪者自幼期立門戶祇禮法弗敢踰越方是時大母王孺人年踰八十諸父異居公委曲承順內外無間言從父蓬州府君孝迪心善之每勞之以書期屬甚厚甫冠所從游皆父行初明毛鄭詩繼爲詞賦邑宰有士名者率賓禮之自貢士云亡所藏圖籍散逸殆盡公雅嗜書多所儲蓄自六經子史至星經地乘虞初

稗官道釋鑿卜之書靡不究閱或假諸人廣所未見有意者隨即傳抄今手澤尙數十編歲始生之日子孫上壽首陳考妣像而泣拜之居負山望見生隴作顧雲亭其上凝竚輒移晷其篤於孝愛若此資簡重與人交怡然以和有不可未嘗假以詞色教子齊家率本以忠孝又以扁其室其趣尙可概見開禧三年仲午以詞賦舉于鄉嘉定三年再舉乃登明年進士第試吏爲迪功郎雙流縣尉公過其子僅旬歲獲終養吁是可悲也君之妃曰陳氏諱符臨邛人進士仲魯之女昂之孫承事郎熙之曾孫不逮事尊章獨能謹祭祀睦宗族有足稱者某年某月某日以疾終于正寢年若干歲生三男子焯仲午熾焯先二年而卒熾爲叔父後蚤卒四女子長適鄉貢進士費之午次鄭存中費德遠適存中者先亡孫男三人埏址增孫女四人曾孫男一人外孫男女十人銘曰



蘭既種而刈之、胡委珮而亟去之。葉萬子孫勿替引之。

魏了翁撰 《重校鶴山先生大全文集》卷七〇

### 陳同甫王道甫墓誌銘

志復君之讎、大義也。欲挈諸夏合南北、大慮也。必行其所知、不以得喪壯老二其守、大節也。春秋戰國之材無是也。吾得二人焉、永康陳亮、平陽王自中。亮字同甫、童幼時、周參政葵請爲上客。朝士白事、參政必指令揖同甫、因得交。一時豪俊、盡其論議。隆興再約和、天下欣然幸復蘇息、獨同甫持不可。婺州方以解頭薦、著中興五論、奏入、不報。後十年、同甫在太學、睨場屋士餘十萬、用文墨少異雄其間、非人傑也、棄去之。更名同。復上書至再、天子始欲召見、倖臣耻不詣己、執政尤不樂、復不報。又十年、親至金陵視形勢、復上書、陛下試一聽臣、用其喜怒哀樂之權、鼓動天下。上顧內禪決矣、終不

報。由是在庭交怒、以爲怪狂。前此鄉人爲讌會、末胡椒、特置同甫羹、截中、蓋村俚敬待異禮也。同坐者歸而暴死、疑食異味有毒、已入大理獄矣。民呂興、何廿四、毆呂天濟、且死、恨曰、陳上舍使殺我。縣令王恬實其事。臺官諭監司選酷吏訊問、數歲無所得、復取入大理、衆意必死。少卿鄭汝諧直其冤、得免。未幾、光宗策進士、擢第一、既知爲同甫、則大喜曰、朕親覽、果不謬。授建康軍簽判。同甫雖據高第、憂患困折、精澤內耗、形體外離、未至官、病一夕卒。哀哉。葬家側龍窟馬鋪山、世所謂陳龍川也。自中字道甫、岸谷深厚、山止時行。所歷雖知名勝人、或官序高重、逆占其無憂當世意、直嬉笑視、不與爲賓主禮。一日、赴丞相坐、有餽鹿至、請賦之、韻得方字。搖膝朗唱曰、世間此物多謂馬、寶匣還宜出上方。相慘慍、亟入復出、出入數四。客皇恐不自得、道甫神色不異、飲啖自若、以此甚不悅於流俗。乾



儒藏

道四年、議遣歸正人、伏麗正門爭論、且言、今內空無賢、外虛無兵、當網羅英俊、廣募忠力、爲中原率。坐斥徽州。每應試、皆陳實策、無一語類時文、或笑曰、此劄子也。然竟亦得乙第。中書舍人王藺薦於上、藺上所厚、得召對。上壯其貌、親其言、改官爲籍田令、又使舉其所知、將用矣、以諫官蔣繼周疏罷。上徐悔、差通判郢州道、知光化軍。還朝、光宗曰、壽皇以卿屬朕、姑爲郎相伴乎。公謝、臣已累壽皇、不敢復累陛下。固請、知信州。復召、以王恬疏罷。知邵州、以謝原明罷。知興化軍、以高文虎罷。是其人之於二公、非有睚眦激發之憤、膚奏嚙螫之苦也、相傳以嫉、望風而忌爾。然二公自料、苟其人志不復君之讎、慮不足挈諸夏合南北、固不與並立矣、則進退離合之不相容、亦其勢也。然黨偏而方隅亂、說勝而白黑混、至使旁觀不敢平論、後世不能分別、又足悲夫。道甫旣罷興化而死、始道甫樂仙壇

山北之原、即其葬焉。外戚擅事累世、必其危漢者、劉向耳。宦官擅事累世、必其亡唐者、劉蕡耳。以窮鄉素士、任百年復讎之責、余固謂止於二公而已。彼舅犯、先軫識略、猶不到公子勝、新垣衍奚由知之。余固謂春秋戰國之材、無是也。雖然、上求而用之者也、我待求而後用者也。不我用、則聲藏景匿、而人不能窺。必我用、則智運術展、而衆不能間。若夫疾呼而後求、納說而後用者、固常多逆而少順、易忤而難合也。二公之自處、余則有憾矣。同甫稱信州韓筋柳骨、筆研當獨步、自謂不能及、又歎今日人材衆多、求如道甫髣髴、邈不可得、蓋亦指文墨少異者言之、猶前意也。今同甫書具在、芒彩爛然、透出紙外、學士爭誦、惟恐後、則旣傳而信矣。道甫乃獨無有、是信而不傳也。鮑叔管仲友也、鮑卑而管貴、美在叔也。王猛薛強友也、王顯而薛晦、過在強也。同甫得無以死後餘力、引而齊之、使道甫



亦傳而信乎。是以併誌二公、使兩家子弟刻於墓。

若世出、則碑陰叙焉。銘曰、

哦彼黍離、孰知我憂。竭命殫力、其爲宗周。

嘉定十四年正月□日。

葉適撰 《水心文集》卷二四

校記

①「不死」至文末十一字原脫，據康熙初年家祠重刻本

《西山先生真文忠公文集》補。

②春：原作「椿」，據標題及四庫本《鶴山集》改。

③後：原作「從」，據四庫本《鶴山集》改。

宋儒碑傳集卷一百五十五

趙善譽 馮誠之 袁垌 彭仲剛

朝奉郎主管雲臺觀趙公墓誌銘

公諱善譽字靜之、一字德廣、系出太宗皇帝後。曾大父仲暹、夔州觀察使、贈開府儀同三司、少傅、嘉國公。大父士迨、武翼郎。考不晦、忠翊郎、四舉進士、以節行稱、贈通直郎。公弱不好弄、年十二三誦詩書、屬文如老成人。未冠失怙恃、固窮自立、手不釋卷、足不越戶、不知飢渴寒暑之變。兩試胄監、乾道五年試禮部、俱爲第一。登進士第、調明州昌國縣主簿。昌國邈在海嶼、公介然有守、不鄙夷其人、爲辨曲直、皆明達平允。邑人相與愛服之、或訴于郡、多願決于主簿。今太師嗣秀王時爲守、俾攝邑事、對易定海、慈溪、三年簿領而無撫字之寄。踰二期、三邑父老猶能道其惠政。海盜竊發、捕得全黨、郡欲奏以上賞、公言攝令捕盜、不足爲功、誠不欲以

人命希賞典。嗣秀王爲奏、貸羣盜殊死、力薦之朝、公未始聞也。授兩浙轉運司幹官、忽報改秩、知撫州臨川縣。縣在江西最爲繁劇、公始視事、即爲文徧諭鄉井、出于愛利之誠心。告教既孚、乃具爲條目、日限量地之遠近、以定期約、里長月不過一再至。訟事皆躬自予奪、頃刻即釋去、牒訴日省。縣久困于豫借、吏以歲例來白、且謂不爾、必不繼。公命取稅籍閱之、逋負實繁、蓋上下蒙蔽、無有發此者。按籍征催、不擾而辦。有無額官地、歲入頗多、以資妄用、公白罷之。復請併罷諸邑類是者。或議虛市比之私創稅場、請撤屋罷市、公力沮之、以從民便。太守趙公燁、葛公郊列治績十數條奏之、有旨中書籍記。去邑五年、人相與立生祠于縣治。邑宰陸侃之記可攷也。添差通判常州、浙右饑饉、躬行賑濟、一郡賴以全活。倉使以荒政論薦、太師丞相史公上章舉士、備言文學政事之美、召審察、差監都



進奏院、遷大理寺主簿。秋旱，下詔求言。公草封事上之，凡萬餘言。其略曰：陛下兼收衆善，而言者志在投合，搜抉隱微，條目益廣，而姦僞益生。甚者唱爲任怨之說，竊徇公不阿之名，一切付之不恤，下情安得不壅，習俗安得不薄，和氣安得不虧乎？天下之習，日趨于褊狹機巧之域，而無有優游舒泰氣象。士不畏義，民不畏刑，則是二十年來攘臂建議，爭以爲功者，果何補歟？壽皇嘉納，爲大理丞，有以左帑宿蠹告者，逮繫天獄，官吏重足以俟譴。公察其無辜，謂將自其作俑者罪之，則不可勝誅。若斷以一二年來，且有刑罰不均之歎。上覽奏開悟，得未減。平江民唐贊之獄，皆以爲凶惡，無可矜之理。公條可疑狀十六，謂賊證無實，情款抵牾，卒釋之。十一年，充省試攷官。六月，除提舉荊湖北路常平茶鹽。陛辭，壽皇曰：朕精擇得卿。公論士大夫爲己之心重，則愛民之誠必虧。營私之念切，則奉公

之志必怠。得失之慮深，則伏節死義之風必泯。上深然之。先嘗進南北攻守類攷，上曰：卿向所進書，可謂有志。至是又進易說，謂聖人以斯道寓之書。上又曰：聖人以此寓之于書，天何言哉？易學要須兼通天人。卿史學如此，經學又如此。及臨遣，又曰：卿向來學優則仕，今乃仕優則學，朕得人矣。數日，有請薦擢宗室人才。上復言：公經學文章，雖士林中亦罕有之。湖北大旱，鼎澧尤甚。入境一日，躬走村落，撫慰飢羸，得戶四萬餘，口二十萬，通融諸郡常平之儲，盡以爲用。賑糶貸濟，三者並行，動得其實。疫者藥餌兼之，奏閣貧弱夏稅。是歲粟麥倍收，禾稼豐盈，民至扶老攜幼來謝。初行賑貸，或謂游饑將無所取。至是民爭負以償，諸郡充足。嘗奏買撲稅場十餘，河渡四十五，歲入甚微，而豪民大爲民害，盡罷之。十三年，除潼川府路提點刑獄。重囚讞議，州縣鬭訟，稽攷平反，細大不遺。纔三閱朔，漕

使闕上稱公儒者、可使治財、就除轉運判官。公嘗論國朝置轉運使、本以收藩鎮之權、絕妄用之蠹、脫斯民于暴征苛斂之苦。近時司漕計者、特以賦斂爲事、號爲材能者、務趣辦而事督迫、州縣之困弊、民力之寬乏、未始問也。故其視州縣如一體、有無緩急、皆得上達、悉力以應之。諸郡所貸緡錢、至十餘萬、俾守貳置籍、約以期年、優裕乃償。自是蜀東諸郡、舉無憂熬窘缺之狀。十四年、詔諸路監司條陳民瘼、公言賦役不均、獄訟不平、征斂繁急、酒稅苛暴四事。且曰、陛下延見牧守、固將以觀人才也。而計臣請以奏劄之一陳上供之數、郡守垂滿者、莫不督責舊逋宿負、征商榷酤、肆行苛虐、以藉手求進。近議者有刑輕之疑、帥臣治盜輒先斬、以自効、而求彈壓之名、使其皆當、不過能速殺之而已。倘歸之有司、按鞫亦不免于死。萬一愚誠不能自明、冤恨之氣、豈不上干陰陽之和平。兼遂寧郡

事、闔郡熙熙、民有爭競。且曰、公未始擾我、其忍負之。公措置常平、深察宿弊、擇官就倉和糴、石增百金、市有增損、亦隨低昂、聽民隨所有求售、亦不限日糴之數。實惠及民、官儲充積、公私便之。所至就郡庠立學、以教宗子、率知嚮學。持節東蜀、凡三年、士民愛之如父母、遂寧尤所歸心。寢疾二旬、上章力丐歸、主管華州雲臺觀。百姓始則朝夕偵問、相率禱祈。及歸、耄稚奔送、涕泣不肯去。既達寓里、屏絕家事、獨處一室、圖史自娛。一日忽謂家人、將歸正寢、且欲自爲志。翌日天將明、燕坐榻上、瞑然而逝。十六年八月癸卯也。娶錢氏、僅再歲而亡、贈孺人。再娶杜氏、祁國正獻公之後、封孺人。子男五人、汝傳、修職郎、新監舒州山口鎮。次汝伋、以公遺澤補將仕郎。次汝儼。次汝何、國子進士。次汝仲。一女、許適承奉郎楊棗。孫男一人、崇揆。孫女二人。以是年十一月甲申葬于紹興府餘姚縣緒山之原。通

直墓左。公天資高明、識見超詣。研精性命之說、發爲議論。及所著易說、明白簡易。晦菴朱先生一見歎賞、以爲擴先儒之未明。頤正郭先生嘗序易書、謂貫三才之理于其中、一諸儒之說于其外。二公師表一世、于公特厚。晦菴屢以書來、相期甚至。頤正出一編書、公以奏之上。孜孜好學、公退不少懈。率夜分乃寐。嘗即國史所載深求藝祖開創之微意、爲書十四卷、曰皇朝開基要覽。又爲皇朝聖政類編。不幸寢疾、僅成數十卷。其他如南北攻守類考、晉載記年表、皆行于時。又有論語說、饒歌鼓吹曲、祝堯文等。詩文六十卷、號恕齋類藁、藏于家。公孝行根于天性、自以祿養不及、祭祀務極豐潔、悲慕不少衰。弱弟稚妹備殫鞠育、教之有成。仲弟善與同登科、季善譽亦以取應得官。女弟再適人、皆竭力資遣。遇母家桂氏特厚、舅氏既卒、訪其遺腹子爲之嗣、且厚給之。其他篤故舊、撫姻族、恩意稱

是。廉靖自將、一介不妄取。行郡例冊、皆擯不使前、按例饋遺者悉歸公帑。刺舉尤所盡心、苟賢矣、不待其請、舉奏牘面授之。其在他州、則郵置以達。人知其不可以有挾、無敢以浼公者。間有按劾、不以強有力爲憚、所部肅然。楚蜀之士夫、類能稱道之。公抗志不羣、砥節礪行、不泥紙上之空言、必欲施所學而見之行事。尙友古人、思與之齊、人或疑其好異、公不顧行愈力、久而益安、人益信之。攷求世故、貫穿今古、直欲立事業以傳不腐。少名齋以宗迂、以勵其操。後名以恕、其志將以及物也。出而從宦、苟有利于民、圖之甚于飢渴。救荒施舍之外、又所在爲經久之計。在昌國已能勸勉富室買田與山、專爲編氓嫁娶喪葬之資。在湖外、則率十四郡買田、各界郡文學司之、每三歲則以給士之預計偕者。在潼川、則以漕計之餘使州縣置舉子莊、孕者產者俱給之米、皆至于今賴之。使天假之年、處





以大位、益據所蘊、膏澤必將下于民。而官止于員郎、壽止于四十七、識者痛惜之。嗚呼、豈以多記損心、憤世疾邪而至是。抑果有數不可逃耶。鑰與公相見之日可數、而相與特厚。汝傳妙年躋世科、大似其父、率諸弟力學以守素業。汝偁入太學、蓋前所未有、義方之訓可知。汝傳會粹公行事來求銘、採其可銘者書之、餘弗著。銘曰、

熙陵諸孫、嘉國好文。流傳至公、遂爲儒門。公起孤藐、立志堅正。尙友古人、期與之並。學貫經史、仕更麾符。學仕俱優、形于帝俞。平心濟民、一變齊魯。志勤道遠、中道而阻。齎志何言、勒銘山阿。有子繼之、尙其不磨。

樓鑰撰 《玫瑰集》卷一〇二

江油縣尉馮君墓誌銘

予守潼川日、錄事參軍馮君田有士行、予知之未及舉、會君命召、則以屬諸後至者。久而未有聞、或

曰、以疾去矣、予未之信也。後數年遷靖、甲以書來曰、我先君以開禧二年四月乙卯卒、以嘉定八年十月丁酉葬于魏城縣清泉鄉艮山卯穴、令墓木拱矣、而未有以銘其竈。昔歲幸備僚吏、將以請而弗之敢、旣而疾病連年、幾不能生。今幸少間、敢以吾友李茂龍之狀控于執事。予執書慨然曰、昔負蔽賢之過、未有以贖也、乃弗果。馮氏之始、以畢萬支子食采馮亭、爲氏。至唐有禮部尙書伋、四世孫存、官長史、隨僖駕入蜀、徙名數于綿。長史之孫光傳、以行誼刑于鄉、生承奉郎因、因生堂。堂生汝舟、以太學上舍生同陳伯陽東上書論時政、請斬六賊、後勸進應天府、庭叱王時雍、一時想聞風采。與張忠獻公爲至交。一子鈇、以奉議郎致仕、贈朝議大夫。娶文氏、生四子、長適之、舉紹興三十年進士、終朝奉大夫、知普州、次宜之、舉淳熙十四年進士、終通直郎、次即府君、諱誠之、字明仲、次思復、舉



紹熙元年進士、終通直郎、爲苑氏姑後。蓋同產兄弟皆以儒科奮、維君屢試有司不利而著書、從遊者數百人。僅以乾道四年鄉舉、該累舉恩授迪功郎。則君蓋倦遊矣。親郇勉之仕、調龍州江油縣尉。吾外舅楊公熹爲守、首加論薦。主管茶事彭輅辟宕昌茶帛庫、不敢吏也、留之莫府而師事之。改帥安康、又辟爲屬。會以檄歸至漢中之屬邑而卒。年六十有四。取章氏、直菴居士梁之子。三男子、沆先卒。次顯臣、季甲、舉嘉定四年進士。七女、長適文寅之、次章夔一、次箕疇、次段鎮、次樊巽、次某某。孫男□人、外孫□人。君性端願、事大父母、父母以孝著。方父母俱存、兄弟無故、諸子環侍、東西兩廡、篝鐙相望、書聲率至夜分。朝議即世、君之兄弟髮星星矣、哀毀過制。終喪、兄弟持泣、義不析爨、三世聚指、無一間言。始楊伯昌子謨爲校官、虞仲易剛簡爲通守、皆願交焉。士有越足繩檢者、或責之、則悵

然曰、幸勿使馮公知。前言往行、後生不及聞者、必縷數之。後進有片長、動色推獎。間有言人過者、正色不顧。成都同舍生以竊衣被執、君自外至、曰非吾衣也、釋之。其人媿悔、卒爲善士。有亡友之女失身貴人家、君袖金叩門請贖、以妻名家子。其它藥疾調貧、殆不可悉數。雖以是貲用日乏、居之晏如也。方待戍江油、饒所召君攝大安軍倉官、隱陷凡千石有奇、樽浮濫、精出納、踰年償舊逋之半。又白饒使以實數聞、前官吏咸賴以免、而軍饒無闕、將士感悅。尋又被檄市縑于潼之屬邑、吏以惡縑呈白、君愀然曰、民供軍以自安也、今以高直易沽濫、是負民負國也。盡澄宿蠹、仍得善縑。在江油、不遣吏卒入鄉、異時官取魚鹿動千計、守貳以次皆有餽。君曰、廢例請自我始。姿敏悟、書過目成誦。未弱冠、謁李知幾石於成都學官、一見改容、延之學職。嗜周、程子書、學禁方嚴、不肯撓屈、寧文之不售也。

黎明正衣冠危坐、與諸生共講、退又反覆涵泳。每謂爲學自一念始、一念欲萌、天地鬼神實臨之、故事親必孝、事兄必悌、交友必信、臨民翼翼、惟恐傷之。進趨有度、鄉黨會聚、君在則譁者寂、諱者莊、識與不識望而知其爲復菴先生也。不事造請、張季長續守郡、欲一見不可。後以鄉飲之禮踵門訪君、且以文爲贄、廼強起焉。李公石、史公楠、李公叔獻、君所師也。劉公儀鳳、黃公鈞、陳公損之、章公森、李公崧、君所友也。而李之情分尤厚。君前後著書有復菴讀論語十卷、詩解二十卷、書傳二十卷、易英十卷、誌銘贊記詩文五十卷、藏于家。茂龍之狀曰、先生之學足以用世、而私淑諸生、先生之行足以厚俗、而官止九品。愚謂士大夫出則師保萬民、居則父師鄉里、其爲成己成物一也。大學曰、一家仁、一國興仁、一家遜、一國興遜、一人貪戾、一國作亂、且貪止一人而害貽一國也、然則不出家而成教

於國、其功用不已大乎。況居官則小大相維、未必盡如己志、固不若淑黨類、厚風俗、則善人蕃殖、所及滋廣也。是宜銘。銘曰、

遇不遇有命、行不加居、不損有性。而況國人被其忠信、子孫世其篤敬、其爲遇則已多、雖九品其奚恨。

魏了翁撰 《重校鶴山先生大全文集》卷七九

### 先祖墓表

公諱珂、字卿遠、明之鄞人也。曾大父諱揆、贈太中大夫、妣施氏、旌德縣君。大父諱轂、左朝奉大夫、知處州、贈光祿大夫、妣葉氏、永嘉郡夫人。考諱灼、左朝議大夫、尙書倉部郎中、妣石氏、恭人。光祿公以儒學辭藻擅名當世、倉部公亦篤志遵業、無忝前人、而袁氏一門於是始大。公在母纔七月、足跌而生、氣稟甚弱、而爲善之志、則不可禦、蚤夜孳孳、思所以不墜家聲者。服膺儒業、充養德性。家再世二



千石、而恂恂退遜、甚於寒素、軫念窮乏、施予不倦。侍倉部守嫠及隨、寒士有來謁者、必訪其所寓、以私錢給之。時時造可食物、散於城外、以惠貧民、或捐錢與之、前後所濟、不知其幾矣。母夫人一臂甚痛、殆不能舉。公遍觀隨之城中佛廬像設、有支體不具者、皆補足之、費無所靳。母夫人中夜而寤、謂倉部曰、臂不復痛、伸縮自如矣。人皆以爲誠感。倉部澤及一子、埴始受命而卒。法當公補授、弟增欲之、推遜無難色。太守梁公汝嘉惡厥弟之攘也、弗爲保奏、弟不敢違。公亦終不自取。老於韋布、無纖微不滿意。一惡少年無端肆罵、衆不能平、請訴於有司、撻之以懲後。公不許、曰、罵我如罵風、然撻之亦如撻風、然罵我於我無損、撻彼於我復何益。不如已之。每事舒緩、獨於教子甚急。隆於師範、禮敬甚備、日餽之珍膳、而伺其顏色、欣喜則以自慰、或有不怡、必研究所以然者。其受室也、聘幣酒肴之

屬、一取辦焉。師感其誠、爲之盡力。二子亦不敢怠、爲學日進。見稱宗族鄉黨。夫人林氏和柔靜專、無妬忌之行、欲爲公買侍兒一二輩、以奉巾盥、再三言之、不從。清虛寡慾、惟以觀書賦詩鼓琴自娛。詩律精嚴、詠物得物外意、若不迫切、而咀嚼有味、工莫甚焉。夫人先卒、鰥居晏如、五夜不能復寐、披衣暗坐、琴聲清越、發於衽席、翛然有出塵絕俗之趣。不治產業、不營室廬、矮屋數間、人情悶悶、而公雍容自若、身世兩忘。負販者入門、問價若干、如其言畀之、不減一錢。其黨類相戒、俱以實告、無增價者。誠心貫於金石、美名溢於閭巷、皆曰今之古人也。享年五十有九、與夫人合葬於縣之清道鄉榆村港戴岡之原。長子文、以子恩贈通議大夫。次章、登進士第、終於承議郎、通判常德府。於是榮及其親、贈公朝奉郎、林氏安人。女適鄉貢進士林穎。孫覺、鄉貢進士。燮、煥、章、閣學士。太中大夫、提舉南京鴻

慶宮藻、熹、樞、宣、教郎、饒州樂平縣丞、孫女適宣  
教郎、紹興府諸暨縣丞戴樟、進士吳适、曾孫喬、宣  
義郎、新知紹興府新昌縣、肅、丞議郎、監登聞鼓院。  
符、國子監進士、甫、朝奉郎、權知徽州、商、承奉郎、監  
臨安府新城縣稅、貢、丙、向、曾孫女、適進士戴廩、吳  
埜、陳定、從事郎、監鎮江府寄椿庫、林、鵠、進士樓槃、  
國學進士鄭景淵、忠訓郎、監慶元府小溪鎮、曹、慤、  
進士舒鑣、紹興府鄉貢進士李師說、江西轉運司  
進士邊應時、玄孫衡、國學生、衍、復、從、徽、衛、女五人。  
嗚呼、古人貴世家、所謂故家者、非喬木之謂、而世  
臣之謂。欒、卻、胥、原、狐、續、慶、伯、降在皂隸、叔向所以  
傷晉之衰也。然所貴乎世家者、非必七葉珥貂、如  
漢之金、張、八葉宰相、如唐之蕭氏也。名位雖崇、而  
不皆賢、亦何世之有。如東京之袁、楊二氏、氣脈聯  
屬、名德俱隆、斯可謂世家矣。吾家之先世、雖或出  
或處、迹若不侔、然皆忠信正直、蔚有賢譽、其得不

謂之世家乎。後嗣子孫、努力奮發、不自菲薄、必欲  
追前人而及之、亦足以爲世家矣。於傳有之、世濟  
其美、不隕其名、此唐虞之賢臣所以獨隆於古也。  
士之模楷、於是乎在、故併及之。

袁燮撰 《繫齋集》卷一七

彭子復墓誌銘

士多以意爲善、鮮以力爲善也。誠得其意、聖賢何  
遠。如意之而未至焉、遂又以意爲力也、則善非其  
善、窒其材、枉其德矣。今夫意之者、如望遠焉、目之  
所至、身可至乎。天下之理備矣、尺度按之、規矩占  
之、若稱物然、斤石之差、必以其力、不可誣也。以力  
從意、不以意爲力、力所不及、聖賢猶捨諸。力之所  
及、則材爲實材、德爲實德矣。初子復能勝冠、東南  
之學起。昔之宿聞腐見、皆已遞散剝剝、奇論新說  
忽焉交列橫布。士之研聰滌明、澄氣養質、精意所  
獲、自爲深微、奚翅家堯舜而身孔顏也哉。其一時



師友盛矣。而子復又最先周旋其間。其聞之早矣。然而子復知爲善之難。非同聲趨和之所能至也。故不敢以意之爲是。而獨以力之能者試之。常左經而右律。目驗而耳覈。考實以任重。先難以致遠。非其心之所通。雖誠聞之。不苟從也。非其行之所至。雖審知之。猶愍置之。其修身。使奢者嗇。其治民。使煩者理。朝廷不養交。鄉黨不合譽。侃然求其是而已。嗟夫。不同其所趨。而不異其所合。寧少於其意。而致多於其事。徒辛苦於所難。而不敢安樂於所易也。何子復之用心勤行之篤哉。昔孔子謂無能。一日用其力於仁。而又曰。未見力不足者。然則以力而不以意。豈古人亦以爲難也。子復姓彭氏。名仲剛。溫州平陽人。曾祖迴。祖宗盛。父汝礪。贈承議郎。初任婺州金華縣主簿。曰。古人先正名。主簿者。主其簿籍云爾。今簿籍多廢絕。何以名官。乃求得四牋帳。校其差謬。類爲數百冊藏焉。衢州大水。

上司令子復覆視而後賑。子復請曰。衢水高者出屋危。殺稼溺人。行道共知。既再檢實矣。猶往覆視者。防吏之欺。將使民實得食也。然恐待覆視而民不食死矣。上司感其言。即出米。恣子復所爲。民賴以活。移台州臨海縣令。均其民之力役。圖縣鄉之地。幾都幾保。合爲大圖。地之所有。皆物數之。有獻鄉圖者。子復曰。善。猶有遺。其人曰。無。子復指曰。某處嶺也。嶺邊某乙居之。某地有松林水步。今忘之矣。其人大驚。不知子復何以能知之也。由是扶羸整壤以就堅新。盡爲他令所不能爲者。立縣廨且百楹。子復聽民訟甚察。然不自以爲明。每諭之曰。雖訟而直。所屈多矣。民愛信之。忿鬪衰止。至今言治臨海者。推子復云。提點鑄錢。將薦子復使之買鉛。冀以職事相涉。子復辭曰。鉛非所產也。提點刑獄薦得審察。子復徑參吏部。授兩浙運司物斛官而去。近臣累言落州縣可惜。始召爲詳定一司勅。

令所刪定官。遷國子監丞。子復終日坐局治其細碎多所更定。後皆爲故實。貴人弗善也。遂坐考進士與知舉力爭而罷。久乃知全州。時詹元善、陳君舉任總漕事。首爲減月椿錢十三四。子復又自減郡之凡費。然後戢預借。寬省限。商稅止取正錢。帶納者蠲其大半。輸租得自槩量。無斛面。吏之一切聚斂。略皆不用。乃擇其耆老學行。俾師長其子弟。而親執經講說其中。曰。此古人所以富庶而教之也。未幾。承議卒。民哭扶其柩至境外數十里。曰。何時復此太守乎。服除。知濠州。未行。紹熙五年。明。越大飢。特令提舉浙東常平。蓋於是將用子復矣。命下。八月庚戌。以病不起。聞。年五十二。官至朝請郎。娶王氏。封安人。子曰涵。將仕郎。曰湮。曰濂。女嫁從事郎。新徽州歙縣丞林士裕。進士林居易。其二尚幼。慶元二年四月丙辰。葬金舟鄉將軍陳灣。嗚呼。以子復行事考之。豈所謂力不及歟。然則不得盡

其材而死者。非力也。銘曰。

孰爲任重。累銖而稱。孰爲道遠。積步而行。始士終聖。級舉階升。古人之學。遠矣難明。子復之志。匪騰匪騫。力其所難。不以意言。彼用者天。彼成者年。撫其已然。斲銘此篇。

慶元三年□月□□日撰。

葉適撰 《水心文集》卷一五





藏 儒

校記

①宜：原作「則」，據右引改。

宋儒碑傳集卷一百五十六

傅伯成 程端蒙 趙彥真 袁方 林鼎

龍學竹隱傅公行狀

曾祖裕之、故朝議大夫、贈太子太保、妣廬陵郡夫人錢氏。祖察、故朝散郎、吏部員外郎、贈徽猷閣待制、累贈太師、諡忠肅、妣齊國夫人趙氏。考自得、故朝奉大夫、直秘閣、累贈太傅、妣秦國夫人李氏。公諱伯成、字景初。其先自大名徙鄆、高伯祖獻簡公再徙孟之濟原。至忠肅公死、節宣和、中原離隔、傅氏流寓泉之晉江家焉。公幼凝重、不妄嬉笑。方秦丞相擅國、太傅與客擁爐語及時事、公忽指爐灰曰、是非嘗炎炎者耶。客皆驚異。年十二、秦國疾革、然臂祈哀、居喪摧毀、齊國拊而教之。公發憤自厲、與兄樞密同卧起、課書至夜半未休。齊國常扣窗語之、曰宿火于某所、有煨芋或餅餌在焉。太傅守莆、參政龔公茂良年尚少、太傅令諸子從游。既而

龔公仕于泉、每訪公兄弟蕭寺、視其寢處、憮然曰、人不堪其憂、及觀其文、則又欣然、曰咄咄逼人矣。尤爲鄉先生寺丞黃公某所稱。隆興初元、與樞密聯名擢第、調福州連江尉。試中教官、教授明州。以年未壯、不欲以師自居、日與諸生論質往復、後多成材、魁多士、登朝著、居館閣者相望也。秩滿入都、梁丞相謂公曰、君盍爲祭酒屬、適某拘鄉嫌、聞史太師欲薦君、此可以進擬矣。公遜謝、乞教授內外宗學。首以語孟中庸大學、次以他經子史、立爲次序、俾士誦習、其尤秀異者、別創大雅齋居之。以薦者改宣教郎、知福州閩清縣。丁太傅憂、服闋、知連江縣。東湖聚九谿之水、溉田餘二千頃、歲久隄壞、公即下流南港、伐石爲新隄三百尺、迄今蒙其利。罷海錯之饋、禁官買之價、以身爲準、寓公宗姓莫敢異者。連帥、監司相繼上公治行、有旨赴堂審、尋令待院轄闕。於是名在公上者十餘人、留丞相將

越次出命、公固辭。踰年始主管官告院、建言遠方陳乞磨勘<sup>③</sup>、爲吏邀留、中間歲月棄不可用、被受少緩、或妨奏薦、請以馬遞法計程書于告背、俾爲被受日月。士大夫便之至今。除司農寺簿、兩拜疏請光宗過重華宮。除將作監丞。韓侂胄擠趙丞相去國。呂祖儉以上書貶、黨論漸起。公諫寧宗曰、陛下踐祚之初、忠讜者未褒、狂妄者或譴、小大之臣震惕恐懼。臣願兼聽遠覽、毋使下竊直諫之名、上有罪言之謗。又奏、淳熙之末<sup>④</sup>、並任兩相、引用人材、各有向背、至於今日、彼此相攻、不極不已。夫天下之勢猶操舟、平則行、偏則側。前日之勢有所偏、今日之勢有所激。激而已甚、臣恐前日之舟偏于左而今日之舟又偏于右也。前對一日、有<sup>⑤</sup>折柬諭公行進用矣、冀於奏篇少婉其辭。公曰、此言胡爲至於我哉。迄上前疏、以親嫌改太府寺丞。出知漳州、治以律己愛民爲本。推朱文公遺意而遵行之、始創

惠民局以革襪鬼之俗。由郡南門至漳浦、爲橋三十五、治道千二百丈、郡人磨崖、甘棠道傍以紀其惠。工費一出於所卻例卷。知撫州、未至、除湖北提舉常平茶鹽事。舊以義倉錢佐用度、公曰、此豈使者公帑邪、一無所取。梁興者、故隸岳侯軍、官至橫行遙刺、死無子、鄂州以戶絕法沒入之。公爲立後、以其貲分給諸女。軍中感悅。辰守慕容繪以<sup>⑥</sup>韓侂胄姻援貪恣不法、公將按治、有洩其事者、改成都路提點刑獄公事。華容饑、公旣易節、猶發廩委寓士董君道隆亟往賑贍、民免流徙。憲治寓于嘉定、地接蠻夷、虛恨部族在蛾眉縣羊山大江之南、並江省地尙多土丁耕種、時遭剽掠、而控扼之寨乃在江北、不能援。一日土丁追殺蠻之犯境者七人、制司逮捕甚急、公乃移書曰、是爲蠻報仇也。制司就以諉公、于是相要害創寨柵三所以護江南之耕者、蠻不復爲患。雅州不以時支軍士糧、幾爲變、



公攝漕事、發本司錢檄鄰郡倖支散、且戮爲首人、然後劾其守臣、因考見郡計匱乏之因、爲請於朝焉。召對、言、國家中興、僅有天下之半、而養兵數十萬、民力弊矣、山東、西將相所出之地、皆非我有、人才不如昔也。謂宜勤而撫之、養而用之、以備緩急、而牧養之吏聚斂干進、貪黷營私者、有以傷陛下之民力、議論之臣好惡不公、是非不明者、有以壞陛下之人才。臣願選擇良吏以培固根本、擢用端人以保全士類。又言、蜀自行錢引、貫收頭錢三十、紹興初增至三十八、今增至六十四矣、莫若減損其數。或謂所贏二百萬、贍軍之費出焉、非可遽減。臣嘗會一界兌引二千三百餘萬、實收頭錢一百五十三萬、銷折不計者又六七萬。今若減半、再歲一兌、總所歲折纔三十四萬。若總計之、臣能節浮費、歲認若干、朝廷給度牒以補若干、則當兌之年、引價必不至於甚低矣。上嘉納。除工部郎。時權臣

將開邊、語尙秘密、公輪對首言、天下之勢、譬如乘舟。中興且八十年、外而望之、舟若堅好、歲月既久、罅漏寢多、苟安朝夕、猶懼覆敗、乃欲徼倖圖古人之所難、臣則未之知也。行都大火、延及相府、同舍郎相率唁相君、有以爲偶然者、公正色曰、天意如此、官師相與規警之時也、乃以爲偶然耶。貪相色動、詔求直言、公陳三事、一曰失民心、火災之餘、商賈已困、官市民物、乃不與直、前尹曰姑俟有餘、後尹曰非我所市、版曹所當給者、亦復展轉歲月、非禦人于國門而奪其貨者乎。二曰隳軍政、方今諸將非由材進、例以賄取。臣在蜀道、則聞關外之軍以培<sup>⑧</sup>尅而幾變、道建康則聞御前屯駐之兵以培尅而多死、何以責士卒用命乎。三曰啓邊釁、分命重臣、大發錢粟、人情洶洶。臣固知朝廷無輕舉之議、然恐邀功者有包藏之心、恃才者起迎合之意、陛下與大臣不察而遂聽之、則天下岌岌乎殆矣。



於時應詔者鮮、從臣亦未有請對者、公極言朝廷無骨鯁之老、班列習掄炯之俗、一時從臣咸愧其言。除右司郎官。初、公受李文簡公燾之薦、與其仲子參政壁<sup>⑨</sup>游素厚。李方直舍人院、公謂李、邊事至重、外傳將出、元樞宣威江淮、有諸。李曰、有之。公曰、用兵之法、當審彼己、內治不立、何暇外圖。若預<sup>⑩</sup>此謀、非獨一身一家利害、舍人宜深思所以爲家國計者。李感悟。既而元樞不果行、兵議亦暫止。一日、貪相爲僧緘訟牒求擬判、公堂白其不可。蘇師旦方承密旨、公屢抑其私請、貴近皆不悅。除司農卿、湖廣總領。始至、密院咨曰、具宣上旨、以曹、徐盜發、虜境騷動、令預爲備。襄、鄂戎<sup>⑪</sup>帥往往遣忠義人出境奪戰馬、殺吏民。公爲廟堂言、探報未必皆然、爲天下者惟信與義、大義苟未能伸、莫若守信待時。今兵財俱困、而妄動以<sup>⑫</sup>疑敵、某實憂之。有刑餘董達者聚黨跳河、爲虜襲逐、公抗言、國家既未能滅

虜、不宜輕敗盟約、盜由我境、彼則有詞、乞戒將帥毋生事。繼與江陵帥侍郎劉公甲聯名論之、不報。復爲長書、反覆諫止、而鄧友龍以搖動國是劾公罷矣。後籍權臣家、公書尙存、權臣題異議二字於其首。起家除浙東提點刑獄公事。越多富賈<sup>⑬</sup>、賄交權要、公犯法。前帥嘗發一鹽商之姦、遽除邊郡。公既攝帥、不爲動、遂竟其獄。時調兵戍邊、所至剽剗、餘姚令至闔戶不敢出。公部適至、捕鯨其倡亂者、餘批驛券遣之、自是往來帖然。又鑱手投募、幕府誤涅其手背、其徒譁譟。公呼官吏詰責、叱吏下曰、鯨汝以謝。譁者少止。猶以誤涅爲言、公笑謂曰、當改爲方勝取勝之義。皆欣然。列拜于庭。朝廷方憂海道、命公與制閩協力備禦。公條上便宜數事。除直龍圖閣知慶元府、兼沿海制置。先是團聚民兵以教、海舟無巨細皆拘集、戶然一燈以戒夜。公曰、此徒煩擾、何益。散民兵還保伍、縱海舟之不及丈

尺者、罷然燈、民情大悅。諜告虜抽鄧州兵至賓州、與高麗相犄角、堂帖令遣間探。公言、鄧州近襄陽、賓州在黃龍府東北、相去遼絕、必虜揚此虛聲、欲使襄陽弛備。况高麗隔巨海萬里之外、虛實難知、但當謹固封守。或言群臣有異圖、公曰、彼首興兵、端、兵敗方謀身不暇、安有此。同官有請繕壁壘、寓公有乞統民兵當要害者、公一鎮之以靜、後果如所料。嘉定改元、召對、一論、前日失于戰、今日失于和、小使雖返、邀求尙多、陛下不<sup>④</sup>獲已、悉從之矣。使和議成、猶可以紓一時之急、否則虛帑<sup>⑤</sup>藏以資敵人、驅降附以絕來者、非計也。爲今之策、雖以和爲主、宜惜日爲戰守之備。二論、權臣之初、畏人議己、意所欲爲、天下雖知其非、而舉朝莫不以爲是。及其久也、是非顛倒而不自知、竟以此敗。臣願陛下與二三大臣以前事爲師、以至公爲心、則是非明而利害審矣。三論、本朝治效之盛、夔絕前古、非獨

帝道之隆、亦有內助焉。惟是彤史旣廢、罕有紀述、乞命儒學之臣于本傳之外、博采文書所載先后懿美、以爲后範。上皆首肯。除太府卿、充殿試詳定官、尋除權戶部侍郎。貪相貶曲江、詔沒其貲、有司併錄其行橐。公聞之、曰、已甚矣、請給還之。版曹比較之法、率用新錢填舊欠、歲額旣紊、殿最非實。又經總制錢額有重輕、催有難易、建越、鄞常負殿、台秀常居最、乞會諸郡實發之額、紐計分數增虧而行賞罰焉。朝廷從之。四川總領所乞以金銀收回九十界錢引六百萬、仍令起赴封樁庫、公言蜀白兵興財竭、宜椿留以備緩急。經筵進故事、引夏侯勝燕見宣帝、乞用儒臣出入禁中、應對顧問。初、公自鄞召、鄞人或來見曰、諫坡之命將出矣。公曰、昔聞之梁丞相、臺諫若與廟堂異議、則天下事無一可爲。若使某居言路、事求其是、固不敢立異、倘欲如近世言官穿鼻之爲者、某有去爾。冀其以此語

達<sup>①</sup>廟堂、而其人<sup>②</sup>不果達也。除左諫議大夫。公謂諫官以拾遺補過爲職、今彈摘細碎、官失其守、莫此爲甚。首論更化期年、前弊皆在、此猶大病方瘳、所以致病之由不能盡去、它症或生、莫之能療矣。又言禁中賜予、間或過差、儉於身而侈于人、與不儉一也。願愛惜內帑以佐邊用。史丞相彌遠初拜麻詞有昆命元龜之語、倪尙書思方帥閩、以爲不當用、乞貼麻、御史劾倪公罷之。公因對及其事、上曰：倪思過當者再。公曰：思固過當、但恐摧抑太過、遂塞言路、乞明詔臺諫侍從竭盡底蘊、勿以思爲戒。高似孫嘗獻侂冑九詩、皆有錫字、公論其有無君之心。丁常任以嘗諫用兵、率復公言、常任始結曾覲、後結蘇師旦、前日之議非真知兵之不可用、特受教于師旦耳。李參政謫居撫州、公言：侂冑之誅、壁與有力、不酬近功、乃追前罪。他日負釁之臣、不容以功贖過矣。公之未爲諫官也、嘗言：方史公謀

韓、若事不遂、其家先破、韓誅而史代之、勢也。諸公要相叶和、共濟國事、若立黨相擠、必有勝負、非國之福。又勸錢丞相象祖安危大事、當以死爭、小小差除、何必乖異。及拜大坡、朝士有善公者來曰：宜先搖<sup>③</sup>左揆之客。公答以不敢。章公良能爲中司、以二相不咸、有所左右、公不樂其如此。益堅壁。或致右揆之意、云旦夕除執政矣。公嘆曰：吾豈傾人以爲利、且可以官職餌者哉。遂力論朋黨之弊曰：此以此爲善類、孰肯甘于姦黨。彼以彼爲君子、孰肯安于小人。今在朝之士與四方宣力之臣、其進用固非一轍。臣願陛下公聽並觀、不以某人所薦爲賢、某人所引爲不肖、略所從于既往、責實效于方來可也。又乞催修后範。黃侍郎度出知福州、上疏留之。閩人吳回坐與侂冑分盜壽慈宮寶物貶、貲產入安邊所、俄有旨給還其孫俊卿。公爭曰：漢斥石顯、實并妻子徙<sup>④</sup>歸故鄉。俊卿罪人之子孫、不宜





侍禁中、貲產宜勿復給。疏入、改權吏部侍郎、辭不拜。以集英殿修撰知建寧府、邊民之流徙者、軍伍之逃亡者、賑恤區畫、各得其所。錢楮中半之令、既行、復令以三七分支遣。公曰：「它費猶可，如兵何？」乞以一色見鏹給諸軍。又請綱運全解會子，至今行之。蔡聘君元定謫死道州，歸葬建陽，公雪其冤於朝，贈以初品官。陞寶謨閣待制知鎮江府，全活饑民、瘞藏野殍，不可勝數。制司欲移焦山防江軍于圖山石牌，公謂虛此實彼，利害等耳。包港居焦圖之中，不若以兩寨之兵迭戍焉。制司不能奪。圖山寨兵素與海道爲地，公廉知姓名，會郡都試，捕而鞠之，無一逸去者。獄具，請貸其死，黥隸諸軍。提刑劉公燠護客至郡，密語公曰：「待制趙公希惲薦公于東宮矣。」公曩在連江，趙公爲郡戶掾，雅敬公。旣別，不相見者數十年，至是莫知所以相薦者。因慨然曰：「吾平生出處有本末，今老矣，越明年當致其

事，何以薦爲哉？」請祠至再三，進煥章閣待制，提舉太平興國宮。嘉定四年也。八年，召赴行在，再辭不獲。行至莆，拜疏曰：「臣病不能進矣。」除寶謨閣直學士，提舉玉隆萬壽宮。十年，告老不獲，提舉鴻慶宮。十二年，復請老，進顯謨閣直學士，通奉大夫致仕。今上御極，陞直學士，落致仕，予祠錫帶。公因辭免。力進昭明天常，扶持人極之說曰：「陛下思大舜事親之心，常若于不及，推帝堯睦族之仁，益求其未盡。天下將靡然從之，豈待加惠一二耄耄之臣而後知所勸哉？」疏累上，最後獨拜進職之命，詔進一官。允所請。寶慶改元，御筆傳。某楊簡皆先朝耆舊，朕所簡記，召赴行在，令所在州軍以禮津遣。尋除寶文閣學士，提舉佑神觀，奉朝請。雖力以老病辭，而愛君憂國之念不少衰。聞評事胡夢昱坐論事貶，蹙然語所親曰：「慶元初，呂祖儉之謫，吾爲小臣，猶嘗抗論。今蒙國恩，叨竊至此，吾而不言，誰當言



者。遂封上曰、陛下比詔內外大小之臣、有所見聞、極陳毋隱。且命之曰、言或過直、毋悼後害。臣欲條世務、少裨萬一、而耄及智昏、莫知所言。忽聞小臣有以上疏、削籍投荒者、詔墨方新、遽返初意、孰不驚駭。夫論事而加之竄逐、求言而繼以威怒、傳播天下、豈能人人知所言事、但以謂應詔上封之故、轉相告語、箝口結舌、臣恐陛下不復聞天下事矣。方今內無良吏、田里怨咨、外無名將、邊陲危急、而又廉耻道喪、風俗益偷、賄賂流行、公私俱困、謂宜君臣上下憂邊恤民、以弭禍亂。奈何今日某人言事未幾而斥之、明日某人言事未幾而又斥之、甚則如上疏者以共工、驩兜之刑加之矣。昔韓愈論後世人主奉佛運祚短促、憲宗大怒、將抵以死、自崔羣、裴度以至戚里諸貴皆爲愈言、止貶潮州、尋復內徙。今上疏者公麼、非可愈比、然在列之臣無一爲言者、萬一死於瘴癘、陛下與大臣有殺諫者

之謗、垂之史冊、有累聖治。臣垂盡之年、與斯人相去若風馬牛之不相及、獨以受恩優異、效其瞽言。不報。累辭新命、至二年六月、除龍圖閣學士、轉一官、提舉鴻慶宮、復辭。公年雖高、飲食起居皆無異、獨耳聽差重爾。每稱人之善不啻如己出、語及姦人誤國、小人害君子、詞色俱厲、不少假借。聞朝廷行一善事則喜且悅、寢食有味。或不如意、則憂憤默坐、竟日達旦、卒以此致疾。屬纊、索紙筆自草遺表、始述遭遇、末陳時事、略曰、在廷鮮骨鯁之士、持論乏忠厚之人、雷霆多震驚之威、雨露少沾濡之澤、殷勤惻怛之意未孚於中外、安靜和平之福未集於邦家。遂使既退者雖佚而多憂、苟容者貪榮而競驚。爲此不已、究將若何。伏願陛下深思王業之至難、不以天位而爲樂、獨觀萬化、博謀羣臣、上言者明辨其是非、獻計者先審其趨向。退諛旌直、進善斥姦。淑慝彰而人知勸懲、上下孚而事無壅

蔽。必羣心之聳動、隨上意以作。興。內治既修、外虞可弭。臣形神久瘁、藥石罔功、將即夜臺、猶慕尸諫。草畢、亟命繕寫。時答詔下、盥櫛更衣、將力疾祇拜、因發免櫝、遺表既衣朝服、覺瞑眩不支、就寢猶口授別親舊書藁、遂不起。八月十二日也。年八十四。詔依前龍圖閣學士、光祿大夫致仕、贈開府儀同三司。傅氏自獻簡以論諫顯、忠肅以節義著、太傅以高材稱、公襲忠厚之嫡傳、備家庭之全美、而又受學于朱文公、常以君親爲重、利祿爲輕。策名三十年、始登朝列、富貴在前、未嘗少貶以求合。爲都司、總餉、以沮邊議去、爲諫議、又以忤貴近去。自嘉定辛未至寶慶丙戌、杜門卻掃者十有五年。晚被聘召、正張禹、孔光顧惜子孫不敢斥言王氏之日也。公方歷疏時宰弊政、極論綱常倫紀、毅然以不貲之軀犯不測之禍、欲以救遷客炎荒之厄、非獨不爲身計、亦不爲子孫計矣。至於遺表詞氣慷慨、

神明不亂、豈非洪毅忠壯、鞠躬盡力、而死生禍福之變皆不以入其心歟。公有至性、言及先夫人輒流涕。太傅贈官台司、公捧告墓下、號慟幾絕。歲時薦享、如臨其上、筋力既衰、拜跪猶自力。奏薦先從子、後諸孫、族有零丁孤苦者、皆收字而經紀之。常謂世俗多厚妻黨、若父族之中知親睦者尙有一二、至於母族則不復顧矣。故公於趙、李二家恩意彌篤。平生廉儉、歷官五紀、始營數椽於祖居之右、自爲上梁文曰、田里交懽、尺地倍買鄰之費、子孫可守、一椽皆賦祿之餘。人以爲實錄。小圃植竹千箇、雜以花卉、扁曰竹隱、池可泛舟、堂可讀書。幅巾筇杖、與鄰曲親舊徜徉其間、晏如也。公博極羣書、爲文師外大父雲龕李公、溫潤條鬯、晚筆尤健。有文集若干卷、奏議若干卷、手記朝家故實、前輩事迹、曰耄志若干卷、藏于家。所薦多知名士、朝廷或未拔擢、有屢薦而不可已者。娶某國夫人、某國夫人、

皆王氏、禮部尙書大寶之女。子男三人、某某官、次某故某官、次某某官。女二人、知潯州王彥廣、故通判紹興府連三益、其婿也。孫男六人、某某、孫女三人、某某官、其婿也。某年月日、諸孤葬公于南安縣金鷄鄉崇順里蘇嶺之原。門人陳宓已誌其壙、某復摭其言行之大者以告太史氏。謹狀。

劉克莊撰 《後村先生大全集》卷一六七

### 程君正思墓表

士患不知學、知學矣、而知所擇之爲難、能擇矣、而勇足以行之、內不顧於己私、外不牽於俗習、此又難也。嗚呼、若番陽程君端蒙正思者、其所謂知所擇而能行之者歟。乃不及一試、而又無年以死、使人不得見其德業之所成就、是可哀已。正思天資端慤、自幼已知自好。稍長、即能博求師友、以自開益、遂以詞藝名薦書。既乃見予於婺源、聞諸老先生、所以教人之大指、退即慨然發憤、以求道修身

爲己任。討論探索、功力兼人。雖其精微或未究極、而其固守力行之功、則已過人遠矣。始時名下之字同於周程、至是亟請其父而更焉。其居家事親、能開義理於幾微之際、多所感悟而不失其驩心。喪母、葬祭推本古經、以正流俗之謬。鄉人多以爲法。其在太學、儕輩類趨時好、不復知有聖賢之學。正思擇其可告語者、因事推誠、誨誘不倦、從而化者亦頗衆。然其爲人剛介、不苟合。聞人講學議政、有所未安、輒造門辨質、或移書譬曉、必極其是非、可否之分而後已。會大臣有樂豪縱而賤名檢者、見修士即以邪氣目之、而又言於上曰、是屬且能亡人之國。於是學官承其風旨、因課試發策、直以王程、蘇氏之學爲問、蓋將以其向背爲取舍、對者靡然、無敢正言其失。正思獨奮筆抗論、無所依違、而所以分別邪正之間、輕重淺深、又皆中理。雖竟以是無所合而歸、然其抑邪與正之助亦多矣。既



歸即以病不起。紹熙二年十一月一日也。享年四十有九。聞者莫不哀之。方疾革時、手書來曰、端蒙死不恨、恨不克終養而卒業於門耳。然已無可言。願先生自愛、蚤就羣書以俟來哲。世不我知、天豈亦不我知也哉。予雅意正思任道勇而用志專、必能卒究精微之蘊、以廣斯道之傳者。遽讀其書、不覺失聲流涕。既而視其筆跡、謹好如常日。又知其間於死生之際如此、爲之痛惜、久而不能平也。明年正思之父將葬、正思於其鄉之某處、使其二弟端臨、端本狀其事以來、請所以表其墓者。予按其言、正思曾祖宏、祖汝能、皆有鄉行。父易、今以修職郎致仕。母俞氏、妻王氏。生一男、師聖、一女、適同縣董濬。而它則與予所聞者皆不異。又觀其言、正思自少謹信、異常兒。大父將沒、知其可託、以一老婢諉焉。正思時年十四五、涕泣受命、護視勤懇、十有六年、始終無少懈。至是屬疾、雖病、尊親臨之、必冠

巾乃敢見。將卒、悉屏婦女戶外、戒治喪無用浮屠法。所以告二弟朋友、皆人倫大法所繫、不雜它語。是皆宜書。因并前所論者書之、使碣墓上、後之君子庶有考焉。紹熙三年秋九月乙亥、新安朱熹述。

朱熹撰 《晦庵先生朱文公文集》卷九〇

知興化軍趙公墓誌銘

慶元二年八月辛亥、朝請郎、新知興化軍事趙公以疾卒于第。越十月庚午、葬于會稽五雲鄉湯家畝之原。明年九月乙卯、諸孤鏊夫等墨其哀、見予于郡西南澤中、泣且言曰、先君之葬、將請銘于執事。以大事之日迫、方伏苦塊間、不能自通。今幸逾年、未即死、敢以承事郎簽書平江軍節度判官廳公事莫君子純之狀來告、惟公幸許之。某等即死無憾。予以老疾辭、請益牢。維公文學治行、皆應銘法。而鏊夫實娶予從孫女、與其弟同時中進士科、爲鄉里後來之秀、乃卒與銘。謹按公諱彥真、一名

彥能以淳熙新制改今名。胄出宣祖昭武皇帝之後。曾大父諱叔澹。贈武康軍節度使。洋川郡公。大父諱賈之。武經大夫。浙東路兵馬鈐轄。贈右朝請大夫。考諱公懋。左朝請大夫。知臨江軍。贈太中大夫。公少純篤。從故侍御史王公十朋學。王公嘗得中書舍人張公孝祥書。不欺室榜。持以遺公。所以期公者甚遠。公益自奮。雖舉進士。蓋不止爲科舉而已。然同時爲進士。亦皆推之。遂中其科。調撫州錄事參軍。以太中公喪解官歸。除喪。起爲信州弋陽縣丞。終更調建寧府觀察推官。薦者如格。改宣教郎。知寧國府宣城縣。未赴。以內艱罷。除喪。知平江府吳縣。通判袁州。知興化軍。朝廷知公者浸多。謂且用矣。而得郡未及赴。遽至大故。公之將赴撫州錄事參軍也。太中公戒之曰。汝任治獄。人死生所繫也。可不勉乎。公再拜受教。既就職。束吏甚嚴。視囚之寒暑饑渴。慘然不啻在己。囚以故皆輸其

情。曰。不忍欺吾父也。會部使者以事付獄。有冤狀。而使者方怒。風指甚厲。人皆謂乖其意。且得譴。吏尤惶恐。即欲捶掠成之。公叱吏去。具列其冤。使者爲屈。因欲薦公。公亦終不就也。太中聞之。太息曰。吾有子矣。及在建寧幕。南劍州將樂沙縣諸寨。軍食不時給。群卒空壘來訴于轉運司。趙公公碩。謝公師稷爲使。乃檄公行。公馳至沙縣。與其令調財得三千緡。明日召卒于庭。閱籍。自下給之。軍吏及卒長。皆不得一搖手。衆乃大服。比至將樂。給之如沙縣。亦皆大服。于是議者謂公所試者小。然猶能表表如此。他日功名事業。詎可測哉。郡守鄭公伯熊知公最深。有疾。不以郡事屬其貳。而言于使者。請檄公攝守。疾革。獨延公到卧內。屬以草乞致仕。奏其知之如此。高宗皇帝永思陵櫬宮事興。公適爲吳縣轉運司。調取洞庭青石。期會迫。不可遽辦。公即日涉湖至其地。召石工泣諭之曰。先皇帝櫬



風沐雨、惡衣菲食、爲天下攘強虜、除大盜、輕賦薄役。汝曹數十年安居樂業、亦知所自乎。今官取此石欲何用、而汝曹尙可顧望不竭力哉。于是民趣役、不待督責、先期告畢。使者欲上其勞于朝、公力辭曰、此臣子職也。袁州積凋弊、公佐其守、窮利病根源、一切罷行之、郡爲一振。民困于坊場、官弊于護運、綿久不能革。公奮曰、小民知目前之利、不知後日之害、一陷于坊場、則富者貧、貧者大壞、非死徙不得免。乃取尤者白守、請于戶部、蠲除之。挺繫收檄、一旦幾空、郡人歡呼、以爲昔所未有。護運異時多以所遣官非其人、故多蠹害、公一切精擇才吏、其以權貴請托來者、皆力拒絕之。抵公去、所發漕運四十萬緡、不費一錢。造朝、得知興化軍、未及到郡而卒、享年五十有四。公篤學、工文辭、有集五卷、易集解五卷。他所著未成編者尙多。初、太中通判饒州、有江州統軍官王益者、坐事下吏、更江州、

鄂州鞠治、獄成、而家以冤聞。由是復命、太中鞠之、得冤狀明白、益賴以不死。而太中以決疑獄進秩、除郡。未幾、捐館舍、益之家人懷太中之德無已、乃厚載金帛、以助葬爲請。公固辭不受曰、非吾先人之志也。益家人泣而去。蓋公之清德類此。然常畏人知、故予亦不得而悉書也。公娶李氏、馮氏、皆早世、贈安人。今皆從葬。徐氏、封安人。四子二女、皆李出。康夫、迪功郎、隆興府武寧縣主簿、先公十一年卒。案夫、從政郎、隆興府南昌縣丞。寯夫、從政郎、臨安府於潛縣尉。忌夫、未仕。女長嫁從事郎新平江府常熟縣尉劉祖邁、次未行。一孫時敏、時哲。銘曰、以公之才、何適不宜。晚始專城、政弗克施。天嗇其報、子孫是貽。匪筮匪龜、視我銘詩。

陸游撰 《渭南文集》卷三四

叔父迪功郎監潭州南嶽廟行狀

君諱方、字誠之、慶元鄞人。曾祖諱轂、左朝奉大夫。



祖諱輝、文林郎。考諱圻。自光祿以博學高識顯名。袁氏始大。至於皇考。端慤靖深。一毫不妄取。杜門隱約。人罕識其面。至今鄉評推之。君朝夕親旁。耳目所接。無非善道。雖年少時。意氣頗豪逸。及長。克自磨揉。卒爲善士。師事鄉先生宮講屯田鄭公。浙東簽判沈公。又從從兄常德通守講學。服膺經訓。尤精於詩。以鄉薦舉。送試禮部。不得志。刻勵奮發。益取三百五篇研覃奧旨。鄉人爲子弟擇賢師者。爭館致之。東涉大海。雪浪浩渺。南踰粵嶺。風木淒吼。飄然往來其間。安於所遇。顏狀自若。敝廬纔蔽風雨。薄田不足於食。婚嫁頻仍。生理日窄。戰藝又輒左次。人所難堪。亦不慘戚焉。每曰。吾不能自奮其身。獨不能教子乎。夫學殖也。長之養之。今雖未獲。獨不在桑榆時乎。家教既嚴。復受業於鄉曲之望。故諸子皆篤志。而仲子洽遂擢儒科。人皆榮之。君曰。是進身之階爾。丈夫植立於世。一第而已乎。

及洽官會稽。以廉勤聞。受知於帥。期以遠大。君始差自慰焉。年寢高。倦游場屋。慶元五年。以特科補雍州文學。踰年。調迪功郎。鎮江府丹陽縣主簿。舊得末疾。沈綿歲月。及瓜。幸小愈。親故勉使之官。君曰。竊祿養疴。非朝家設官意。亟以祠請。監潭州南嶽廟。俸入無幾。闔門仰給。重以醫藥之費。節約自持。取不凍餒而止。護衣篝一獠婢。不憎疾之。苟可役使而止。病體支離。猶能自力。接親舊無倦容。嘉定二年六月庚午卒。年六十有七。娶范氏。男三人。浹洽。漸洽。今爲文林郎。前南安軍大庾令。二女。適顧應龍。貝自明。孫男女七人。明年九月丙午。葬於縣之陽堂鄉南嶼之原。君內無城府。外蔑巧令。神安氣清。履道平坦。人有過。忠告之。或面折之。不恤善則亟稱揚之。直己而發。無容心焉。舍後小圃。花竹秀野。時游息其間。命酒引滿。百慮冰釋。不知宇宙之寬。此身之微也。尤喜賓客。投轄共飲。非盡歡



不得去。胸中渾融如古達者。不慕貴勢。不諂上交。不責人以所不足。其心休休。無所怨恨。與夫執德不固。僥倖苟求。不得則熱中忿恚者。不其大相遠乎。參知政事樓公篤於雅故。念其病且貧也。存問不輟。遺之良藥。以扶其衰。日覬其愈。而君則死矣。窀穸有日。諸孤貽書屬狀其行。將請銘於樓公。雖我叔父之賢。可考不誣。而辭之不達。懼無以發揮也。猶豫久之。既而釋然曰。茲不過紀實爾。不假諸此。銘不可得。將無以爲不朽之託。是沒叔父之美也。而可乎。乃述其平生大概。而謹授之。謹狀。

袁燮撰 《絜齋集》卷一六

林伯和墓誌銘

伯和林氏。名鼎。一字元秀。台州黃巖人。曾祖實。祖灝。父興祥。贈宣義郎。妣戴氏。宜人。宣義少貧。業行賈。同賈分獲籌錢。竟。懽飲乃去。宣義徐覆之。誤多若干。追還於塗。同賈殊惘然曰。我媿君矣。復懽飲

而別。宜人亦重義。不吝。夫婦義合。鄰女將字而孤。養視如己子。擇對嫁之。其人父母事終身。蓋宣義年八十四。宜人年八十二而卒。伯和以進士起。主明州奉化縣簿。定海縣丞。知福州侯官縣。通判筠州。未行。紹熙三年七月庚午卒。年四十九。在定海。郡令受租輸。伯和縱民自槩量。吏爭曰。數不足。當俱坐。伯和故行之。卒無欠。在侯官。方視印。吏言無以解板帳。請逮逋戶。伯和曰。吾未曉也。榜盡三日。約民量自欠輸十之二。過是當考實均限。民爭輸不失期。因盡閱邑目。得其要。戒吏旁立待命而已。無得預理欠。迄伯和去。無以逋稅受笞者。石門鄉田頃五十七畝。受米二斗六升。太平興國中。民田在外鄉者。輸其鄉。紹興經界曰。此本鄉稅也。由是比他鄉倍六七。民不堪重。伯和白帥。特免和糴折變及餘科配。鄉賴以蘇。侯官之俗淳。伯和靜撫之。民服教令。木陰滿庭。終日寂寂。無復訟者。然不以



聲色徇上官。奉化時、有中貴人過境上、令使攝尉、以雜戲迓之百里外、伯和笑曰、吾性不好戲。且略吾地、無以迓爲也。竟不迓。定海時、富人用本路常平使籍、傲不受役、伯和役之如令。常平檄使改役、伯和曰、私產可公檄乎。不許。常平捕其曹吏幾盡、將爲名以劾、會其罷而止。侯官時、刑獄使武吏、素不相得、擒縣胥移問、怒拍案、聲出廳屋。伯和徐答報、不能屈、滋怒。一日、突入縣慮囚、值其獄空而去。既復以告帥、使加罪、帥疑之、以物色訪求。民譽伯和不容口、乃已。初、余年未冠、識伯和兄弟、勇不自抑、數爲言古人之道、或顯或晦、當世之學、有是有非。伯和喜、游日以親。因又識宣義、質實老人、厚而不踰、披心語口、可背面察也。宜人尤淑善、聽夫子所爲、家事貧而理、賓友往來、門內和樂。余每歎其父母兄弟能如是、足尙矣。其後伯和出仕、行其所知、敢決不回。一家皆自戢、助伯和爲善、聲實充滿。

人謂伯和於官無不宜也。既而宜人卒、長子仲履夭、伯和與宣義仍相繼卒、棺槨復縈、門戶更仆起、垂二十年。次子仲謙、始用伯和遺恩、補迪功郎、授隆興府司戶。長女嫁修職郎、新添差吉州司戶趙崇賢、次許嫁通仕郎木浩、次未嫁、幼先死。然則以伯和之行事觀林氏之盛衰、所以蹶而復振者、其諸安命而恃義之驗耶。始伯和之夫人杜氏、以紹熙四年九月甲申葬伯和于善化鄉樟槿山、而銘未立、叔和及仲謙屢以請。余病且老、念昔語伯和、今退墮幾何矣。而仲謙文詞奔放橫逸、學進而未已、其還以余之語伯和者、教戒余也。顧余老、可捨也已。嗚呼、可以悼余之衰、而伯和不死矣。故併叙而銘。銘曰、

既爲鼎、沒何所。濯纓之歌、悲復苦。不爲棟、摧焉之。伐木之音、哀以思。

校記

- |                       |                   |                           |
|-----------------------|-------------------|---------------------------|
| ①以上三代名氏原無，據四庫本《後村集》補。 | ⑩若預：原作「君賴」，據右引改。  | ⑲傳：原作「傳」，據右引改。            |
| ②原：原作「元」，據右引改。        | ⑪「戎」上原有「戒」字，據右引刪。 | ⑳味：原作「咏」，據右引改。            |
| ③勘：原重「一」字，據右引刪。       | ⑫「以」下原有「爲」字，據右引刪。 | ㉑「作」下原有「新」字，據右引刪。         |
| ④未：原作「未」，據右引改。        | ⑬賈：原作「貴」，據右引改。    | ㉒歟：原無，據右引補。               |
| ⑤有：原無，據右引補。           | ⑭「不」上原有「若」字，據右引刪。 | ㉓曲：原作「典」，據右引改。            |
| ⑥以：原作「像」，據右引改。        | ⑮帑：原作「幣」，據右引改。    | ㉔紹：原作「淳」，據宋浙江刊本《晦庵先生文集》改。 |
| ⑦計：原作「至」，據右引改。        |                   |                           |
| ⑧培：原作「梧」，據右引改。下同。     |                   |                           |
| ⑨壁：原作「璧」，據右引改。        |                   |                           |

宋儒碑傳集卷一百五十七

袁燮

顯謨閣學士致仕贈龍圖閣學士開府袁

公行狀

本貫慶元府鄞縣。曾祖灼、左朝議大夫、尚書倉部郎中。妣石氏、封恭人。祖惇、贈朝奉郎。妣林氏、贈安人。父文、贈通議大夫。妣戴氏、贈淑人。公諱燮，字和叔，姓袁氏。其先出有虞嬭姓，春秋時，陳大夫濤塗始見於經。兩漢之世，最稱賢者曰博士固、司徒安。晉、宋迄唐，人物相望。至我朝而四明袁氏浸顯，其譜錄可考者，府君謚生、本州助教志、志生、贈大中大夫斐、斐生、左朝奉大夫、知處州、贈光祿大夫、穀博極羣書、登嘉祐第、嘗通判杭州、蘇文忠公爲守、譚論賡酌、相得歡甚、公之高大父也。袁氏世學源流於此。倉部登元祐第、嘗守婺。時蔡氏顓國，其黨曹宗者橫於一州，倉部以法誅之。入對徽皇，以清

心省事，安不忘危爲獻。至朝奉、通議，皆以篤厚醇實稱於鄉。戴淑人亦博覽圖史，如古烈女，生四子，公其仲也。公端粹專靜，得之於天。生數月，乳媪寘槃水其前，玩視終晷，夜卧常醒然達旦。五六歲讀書，數過輒成誦。少長，讀東漢黨錮傳，拊編太息，以名節自期。乾道初，入太學，陸先生九齡爲學錄，公望其德容，晬盎肅然起敬，亟親炙之。而同里之賢如沈公煥、楊公簡、舒公璘，亦皆聚於學，朝夕以道義相切磨，器業日益充大。平居莊敬自持，爲同舍所嚴憚。暨升前廊，範物以躬，處事有法，士益推服。淳熙辛丑，第進士。孝宗在御久，責治切，有勸公對策，宜謂大體已正，當堅忍以俟其成，公不謂然，直以意對，具言大體未正，與所當更張者，以是僅得丙科。而言堅忍者，竟爲舉首。公以合選當得教官，丞相史忠定公勉以姑爲一尉，遂注江陰。是歲，忠定薦士十有五人，公在選中，有旨審察。公曰：始仕



藏

而召可乎、遲次累年、授生徒以供菽水。江陰故兩尉、弓兵合二百人、後獨置一尉、弓兵亦多虛額。公至盡補之、葺亭教射、躬自按閱、其勇銳善緝盜者、遇之加優、盜輒立獲。初、弓兵散處閭巷、至是始爲營、紀律肅整如軍伍。尉舍旁有黃田港、民居素稠密、公以保伍法部分之、因寓兵政。浙西大饑、提舉常平羅公點妙選僚吏分任振卹事、而就以江陰屬公。公謂經理田野之政自一保始、每保畫一圖、凡田疇、山水、道路、橋梁、寺觀之屬、靡不登載、而以民居分布其間、某治某業、丁口老幼凡幾、悉附見之。合諸保爲一都之圖、合諸都爲一鄉之圖、又合諸鄉爲一縣之圖、可以正疆界、可以稽戶口、可以起徒役、可以備姦偷、凡按征發爭訟追胥之事、披圖一見可決。在田野爲保社、在軍旅爲伍法、韓信多多益辦、用是故也。公首以此爲荒政之要、由是民被實惠、而欺僞者無所容。訖事、羅公薦於朝、有

旨陞擢、旣又循兩資、終更入都、周丞相謂當處公班列、少須三月、其可。公曰、遲遲以待內除、非吾志也、且親老得便養足矣。即就沿海制屬以歸。紹熙初、衆正在廷、而公連遭內外艱、未及用。寧宗嗣位、始以太學正召、然侍講朱公及諸名儒已次第去國矣。未幾、趙丞相罷、公知必不爲時所容、然猶晨入學、延見生徒、商確理道。或謂諸生多上書議斥時事、不當誘進、公不爲變、迄以此論罷。自是僞學之禁興、而正人無容足地矣。公貧甚、退處泰然、久之得浙東帥屬、再爲福建常平屬官。嘗言職分無大小、皆當自竭、非求人知。滯訟如山、窮日夜繙閱、凡所予奪、無再愬者。改秩通判贛州、未上、會開禧邊事作、兩淮大震擾。公謂海道通山東、宜謹備、而內地盜賊尤不可不務防。趙尙書善堅帥沿海、請公攝參議官、後帥傅公伯成因之。公爲言備禦大略及團結鄉兵事宜、傅公壹以相屬。公周砥屬邑、



所至按閱、井井有倫。嘉定初元、天子既誅權臣、盡起當世鴻碩、召公爲宗正簿、樞密院編修官、權考功郎、遷丞奉常。時諸賢雖收召而鯁直者罕見親。二年春、因對言曰、陛下履位之初、委任賢相、正士鱗集於朝、人情翕然、以爲太平可致、而欲竊威權者從旁睨之。彭龜年逆知其必亂天下、因對顯言其姦、陛下竦然開納。然龜年繼以罪去、而權臣根據自若、群邪和之、排斥善類、積而至於無故興師、幾危社稷。嚮若陛下篤信龜年、折於萌蘖之初、豈至是哉。正人端士、今不爲乏、惟陛下所用耳。書曰、有言逆於汝心、必求諸道、往者龜年所進、合於道之言也。今日復有指陳闕失、盡心無隱者、即龜年之言也。陛下追思龜年、蓋嘗臨朝太息曰、斯人猶在、必大用之、固已深知龜年之忠矣。陛下此時之心、即二帝三王敬賢納諫之心也。常存此心、急聞剴切之言、崇獎朴直之士、若龜年之效忠者、接踵

而至矣。一龜年雖沒、衆龜年繼進、何憂天下之不治哉。是歲都民艱食、公又言、古者制國用、量入爲出、今當饑饉艱危之時、惟有裁節冗費、自乘輿服御至百司庶府、無所不節、以爲施惠之具、或可以濟。又論軍兵虛籍、宜用孝宗獎邵宏淵故事、凡軍帥有能以姦蠹來上者、褒寵之、不然者擯絀之。軍費省則民食寬矣。因言用度當節、或恐有傷國體、然民者邦之本、以邦本之故、少虧國體、未害也。上皆嘉納之、而公請外甚力。知江州、屬歲不登、公請於朝、貸椿管錢九萬緡爲糴本、告糴旁郡、計口以糴、循環相因、市直頓平。郡仰征稅以給、公謂薄征所以來商旅、益損稅額、擇僚吏以董之、舳艫相銜、無苛取、無濡留、至者大悅。又謂周官幣餘居九賦之末、亦足用一端也。於是窒滲漏、稽餘羨、用賴無乏。郡治有亭、扁以節愛。凡非奉稟之正者皆不取。簡燕游、削交餽、至事關風教惠養則汲汲爲之、大



學官、創福田院。居再歲、略計經用之餘緡錢猶二十七萬、郡當大江之衝而城堞不治、因請悉舉爲版築費、報可。朝廷患楮多錢少、令淞江八郡通用鐵錢。勅榜下九江、公曰、此令一出、銅錢將益閉藏、姑緩揭榜、將力言之。俄聞金陵以鐵錢二當銅錢一、咸謂不便、而朝廷亦弗果行、人服公之先見。公每謂牧守兼兵民之寄、訓習師旅、所不可後。种世衡教射法可行、始至大閱、以銀爲的中者給之、竟日無一焉。乃合卒伍、時按試、第其能以賞、自是中者如櫛、破的常數十。峒寇鴟張、上命副都統劉元鼎提兵討捕。公問何以平賊、元鼎銳欲殄滅、而實無必勝策。公告之曰、諸峒崖谷峻險、若輕入其阻、未易得志、不如以重兵壓之、勿與爭鋒而待其弊。元鼎從公言、按兵南安、不與賊角、來則禦之、而賊果降。提舉江西常平、權隆興府事、會朝廷新易楮幣、分遣中都官出使諸道、察不如詔者。帥守奉承

過當、稍損厥直者即寘於辟。公知上意本以掇弊而非欲毒民、因王君棐銜命至、爲請言之。後兩月至臨川、則聞官吏競爲發擿、鯨流之罪日報。公歎曰、吾可不爲明主一言乎。即上章具論官吏以刻核之心、行苛暴之政、刑罰不中、民無所措手足、邦本朘削、深爲國家憂。願詔監司郡守奉行寬大。俄以都官郎召。時更化六年、而頽綱未舉、宿弊猶在。上方恭己仰成、公言、古者大有爲之君、所以根源治道者、一言以蔽之、曰此心之精神而已。心之精神洞徹無間、九州四海靡所不燭。故書曰光被四表格於上下、又曰帝光天之下、二帝之精神也。曰明明我祖、萬邦之君、德日新、宣重光、三王之精神也。二帝三王、終日乾乾、自強不息、故能全此精神、照臨天下、至於今仰之。陛下雖有仁心仁聞、而大有爲之效未著、願毋以寬裕溫柔自必、以發強剛毅相濟。朝夕警策、不敢荒寧、以磨勵其精神。監觀



古昔延訪英髦、以發揮其精神。日進而不止、常明而不昏、則流行發見、莫非精神矣。昔我藝祖當寓縣分裂之際、整頓乾坤、如再開闢。詩曰、周雖舊邦、其命維新、新者精神之謂也。願陛下以藝祖爲法、則我宋之惟新、亦當常如創業之初。又言帝王不可不勤於訪問、上首肯再三、且言問則明。遷司封郎官、因對言曰、臣昨勸陛下勤於好問、而聖訓有曰、問則明。退與朝士言、莫不稱歎。而側聽十旬、陛下之端拱淵默、猶昔也。臣竊惑焉。夫既知如是而明、則當知反是而闇。明則輝光旁燭、無所不通。闇則是非得失、懵然不辨。或以爲人主一言之失、史官書之、天下議之、問而不當、不如勿問。臣謂不然。自古帝王之言、豈能無失、惟得賢臣、開陳正救、歸於至善而已。豈可畏人之譏議而終於不問哉。兼國史編修、實錄檢討官。明年春、遷秘書少監、兼司業。及秋、進祭酒。冬、除秘書監、仍兼祭酒。公謂邇年

士氣不振、皆由本心無所興起、而尸教養者有摧沮無開導、以故日就頽靡。每延見諸生、必迪以反躬切己之學。常病世之學者、徒知襲先儒緒言、通遺經訓釋、而未能自得於心、不足以爲學。吾心即道、不假外求、忠信篤實、是爲道本。聞者竦然有得。士氣日以激昂。上焉者可與語斯道之本源、次亦不失爲謹勅士。至國有大議、叩闥投匭、爭獻所聞。始無負於天子之教育矣。禁中銀器失、上不忍坐主者、命以錫易之。公言、陛下聖德如此、而治效未著、以臣管見、或者君人之大節、猶有可議者歟。易曰、大哉乾元、萬物資始。語曰、大哉堯之爲君、是故君子大之爲貴。孟子曰、古之人所以大過人者、無他焉、善推其所爲而已。惟陛下恢洪志氣、毋自菲薄、以成大功。時韃虜<sup>①</sup>甚強、金勢日蹙、我朝屢遣使不得通、公言、戰守無二道、威聲雄略、可以決戰而後可以固守。謝安相晉、未嘗輕用兵也。秦師垂至、

桓冲以根本爲憂、遣兵入衛、安卻之曰、朝廷處分已定、甲兵無闕、味已定無闕之語、則知講之有素、備之非一日矣。願陛下亟圖之。九年春正月、兼崇政殿說書、因對條陳四事、其一曰、在易之乾<sup>②</sup>、天行健、君子以自強不息。宜健而弱、非天德也。故君德弱則不進、紀綱弱則不張、法度弱則不修、號令弱則不行、治內而弱則中國不尊、治外而弱則夷狄<sup>③</sup>不懾。女眞將亡、無愚智皆知之、陛下愛惜生靈、遵養時晦、似未失也、而揣摩迎合之徒、遂欲苟於無事、有言不可者、則詆之曰、是欲用兵耳。加以是名、時所甚諱、則不敢復言。而不知我能自奮則不戰而屈人兵、我不自強而示人以弱、則適以召兵、安能息兵。韃靼<sup>④</sup>、夏人、自昔雄盛、新興諸豪、兵力亦強、皆知中國之弱、日夜垂涎、伺隙而作、竊恐兵端浸起而禍患未易平也。陛下可不法天行健、磨勵精神、破庸人之論、以強中國之勢。其二謂、賞刑二柄、

不原乎天、則朝綱弛而國勢陵、願大明公道、以救其弊。其三謂、旱蝗相仍、民大饑困、而長民之吏慮蠲放太多、罕以實告、故饑民不可勝計、而惠施不能徧及。晉之李雄、李特、初起不過流民、浸盛乃能據蜀。監觀往事、可爲寒心。我朝內帑之儲本爲凶荒備、所宜止絕它費、專以賑饑爲急。其四謂、廣謀從衆則合天心。今侍從之臣、所以資獻納之益也、日近清光而不聞有所咨訪、通進一司、所以達庶僚之言也、虛名僅存而不聞有所規箴、則是朝廷之舉事實未嘗與天下共之也。自今事關利病、皆當廣咨博訪、是爲至公、是爲天心。行此四者、易於轉圜、而臣猶慮未能盡行者、諂諛之風未息而蒙蔽之患方深。孔子曰、遠佞人、佞人殆、而孟軻亦曰、與讒諂面諛之人居、國欲治得乎。崇觀政宣之際、此徒寔繁、所以靖康之禍、至大至酷、今日所當深戒。又言、向者女眞甚強、中國不逮、所以受禍。今之

韃靼<sup>⑤</sup>猶女真初興時。上曰、亦聞韃靼<sup>⑥</sup>強盛。公遂言、今日未皇他務、且須咨訪臣下、但能行此一事、其效立見。陛下即位之初、群臣多聞玉音、自爲韓侂胄所誤、惟恐有錯、所以咨訪甚少。上曰、錯不妨乎。對曰、古人稱獻可替否、若皆無錯、則惟有獻可、無否之可替矣。上曰、予違汝弼、汝無面從、專賴臣下正救。十一月、權禮部侍郎、陞同修國史、實錄院修撰、進侍講、猶兼祭酒。公謂人臣以經誼輔導人主、非徒誦說而已、因講詩二南、於先王正始之本、后妃輔佐之道、所以自身而家、自家而天下者、旣敷演厥旨、深寓規儆之意、至列國變風、有關於君德治道者、亦委曲開陳、託其義以諷。十年夏四月、霖雨不已、公言善爲天下者、當使陽制陰、不當使陰干陽。今淫雨爲災、兼旬未止、此陰盛陽微之證也。一二年來、正論漸微、正塗漸梗、賢者潔身而去、諂諛緘默以順爲正者、尙多有之、豈天意哉。蠹爾

殘虜敢犯王略<sup>⑦</sup>、皆由君子道消、所以召侮如此。陛下必欲國勢恢張、亦惟擇夫剛毅正直、不肯詭隨、公論之所屬而沈伏於下僚、棲遲於遠外者、拔舉而尊禮之、則精神立變、誰敢侮之。虜<sup>⑧</sup>失燕、徙居於汴、來索歲幣、未予輒舉兵寇邊。或欲以攢年歲幣輸之、公謂果出此、不可以爲國矣。請對、具言所以不可與狀。又謂、用兵一事、雖治世不能免、以言兵爲諱、以安居爲樂、變生不虞、無以禦之、爲計疎矣。自北方擾攘、流民欲歸附者甚衆、皆拒絕之、有至於殺戮多者、流民之怨深入骨髓、安知虜<sup>⑨</sup>不能激怒之、使讎我乎。自古善用兵者、攻其所必救、彼擾吾邊疆、而吾舉兵北向、欲擣其虛、必解而去、從而躡之、腹背受敵、此制勝之奇策也。不知出此、而戰於境內、兵氣不揚矣。又安能決勝乎。上曰、開禧我先用兵、彼直而我曲、今日虜人叛盟<sup>⑩</sup>、我直而彼曲。公對曰、今日之事、要在陛下剛明果斷、振作士氣。



上然之。公復言歲幣不可與。上曰。卻可以此賞有功。七月。請對。論今之刑政未明者四事。國不自重。以人而重。忠良布列。重於九鼎。姦諛並進。輕於鴻毛。今自更化以來。非才不用。而國勢浸弱。戎心遂啓者。則以所用之才非真才耳。似奮發而實怯懦也。似多能而實寡陋也。不皇皇於仁義而汲汲於榮祿也。己不自重。又豈能爲國重乎。國人不服。又豈能服夷狄乎。今之儒帥固有德望巍然。舉世推重者。分閩瀘南。未爲不用。而地非切要。不足以觀其施設。今之忠賢亦有慷慨論事。名聞夷狄者。宜還天朝。增重國勢。而遠守支郡。未究所長。舍莫邪而用鉛刀。棄周鼎而寶康瓠。是非顛倒。何以立國。今日民困甚矣。重以貪吏。政以賄成。監司牧守。更相餽遺。習以成風。於是昔之優裕者。今凋弊矣。昔之歡樂者。今愁歎矣。行都之建垂九十年。生齒雖蕃。衣食未裕。蓋自楮幣更新。而蓄財之多者。頓耗。

鹽筴屢變。而藏鈔之久者。遽貧。頻年水旱。民無餘貲。物貨積滯。商旅不行。故大家困竭。而小民焦熬。市井蕭條。而官府匱乏。勢所必至。京輦之下。人心不寧。殆孔子所謂吾恐季孫之憂不在顓臾。而在蕭牆之內也。朝廷舉措。人所觀瞻。罪當重而輒輕之。禁當嚴而輒弛之。皆非至公無私之道。開禧用兵。一時將帥扞患守城者。不爲無勞。事平之後。乃以廉謹責之。豈漢家有李廣利。赦陳湯之意。夫政刑苟明。強大之鄰不足畏。刑政不明。微弱之虜不可忽。又謂當今之計。當以漸圖之。因舉伍員圖以敝楚者。與李泌困賊之謀。王抃開邊之策。爲上言。謂三人者。皆欲先困之。而後取其功。雖若少緩。而十全無失。乃所以爲速。十一月。又請對。言小大之臣。咸懷忠良。則朝廷之勢尊。邪正雜揉。忠讒並進。則人主之勢孤。今在廷之臣。惟靡曼是娛。惟珍奇是好。淫侈相高。燕樂無節。同堂合席。不聞箴規。赤



心謀國者果如是乎。賢才之於國、猶禦寒之衣裘、養生之穀粟、汲引善類、無間親疏、所以報國也。今推賢揚善、固不爲乏、而挾私害正者、乃或有之。合於己則掩覆其大過、異於己則指摘其小疵、毀譽發於私情、而眞才不得展布、赤心謀國者豈其然乎。星象屢變、其占爲兵、甚可畏也、而不以爲憂。帝城之近、剽掠公行、非小故也、而不以爲怪。旱蝗之後、征科如故、殘民之大者、而不以爲非。導諛貢佞、媮合苟容、以梯寵祿、又豈赤心謀國者乎。植私者衆、赤心者寡、人主少所憑仗、其何以重朝廷乎。又言王辛光州之勝、可謂奇功、而行賞差薄。上曰、賞豈可薄、薄則無以激勵後人。公又言、自昔備禦夷狄、不過防秋、今則無時不至、如四月犯光州是也。上曰、春夏亦不可不防。公言、陛下但能選用赤心謀國之臣、布滿朝列、日聞忠言、朝無闕政、夷狄自然率服。上曰、卿言甚當。又言、陛下垂意宰屬、精選

才士以充之、然政事不勝其多、而宰屬至於數人、耳目不能徧察、思慮不能周知、急則鹵莽、緩則壅滯、甚非所以彌縫宰輔也。願詔大臣增置掾屬、廣求賢俊、秉心公正者爲之、則所補多矣。十一年正月、天大雷電、繼以飛雪。公言、雷乃發聲、蟄蟲啓戶、著於月令之仲春、今先期而發、已非其時矣。雷陽也、中國亦陽也。雪陰也、夷狄亦陰也。當春而雪、未爲害也、而作於雷震之餘、陽已發舒而陰忽用事、有夷狄<sup>①</sup>侵侮中國之象、豈小故哉。蓋自夷狄殘虜竄伏<sup>②</sup>汴都、陛下不忍遽絕、仍與通好、遺黎歸附者拒而不納、故此曹惟我是怨、而殘虜<sup>③</sup>亦以我爲怯、糾合群怨、致死於我。陛下履至尊之位、而見輕於垂亡之虜<sup>④</sup>、辱莫大焉、其可以不奮發乎。書曰、元首起哉、起也者、奮發之謂也。元首奮發、則國人莫不奮發矣。深懲既往之失、圖維日新之功、恢張綱紀、振起頽惰、以伸中國之威、破夷狄<sup>⑤</sup>之膽、此所謂奮

發也。雷雪之變，人皆以爲陰盛陽衰所致。此皇天啓佑上聖，欲以剛濟柔，而成以陽濟陰之功也。陛下可不仰體天意乎？二月，眞除禮侍、兼侍讀。金虜侵軼西陲，公進對，言蜀利害甚悉。大略欲開示大信，以結並邊忠義之人，俾爲吾用，則敵不能支。又謂曩時戎虜去中國遠，糧運難繼，故和可以久。今假息之地，密邇於我，利苟在焉，豈其顧盟汴地四平，難以立國，欲奪我險要爲駐足之地。昔侵浮光、襄漢，駸駸至蜀，觀其志非專爲歲賜也。且所以欲和者，圖省費爾。往年四月，聘使之還，甫入吾境，而犯順之虜亦以是日入，難信如此。和可恃乎？戍可撤乎？忠義之人既與虜爲仇，彼方仇之，我則和之，大拂其情，倒戈反噬，誰與禦之？堂堂中國，卑詞厚幣，謹奉垂亡之虜，自示削弱，誰不侮之？自古立國，固有終不與虜和者。石勒來聘，晉焚其幣，何獨今日必欲通好乎？財用未足，兵力未強，以通和爲戒，

若非體國者，究其實而言，求和自我，不保其往，將有無窮之悔。絕不通和，事雖難辦，是乃久安之策。上曰：卿可謂忠直矣。十二年冬，時雪雖應，俄頃即止。公謂此洪範庶徵所謂豫常燠若者也。陛下蚤朝宴罷，不殉貨色，不盤遊田，無逸豫之失，而有逸豫之災，其故何歟？以臣觀之，有所逸豫者，非必貨色遊畋之謂，邊烽未息，戎事方殷，而優游恬愉，若四方無虞之日，眞才未用，宿弊未革，浸浸焉入於頽弊之域，即所謂逸豫也。因言時雪未降，惟陛下竭誠感假，庶幾亟回天意。上曰：朕日在禁中致禱。公言：古人應天以實，須要修明政事，登進忠良，屏去邪佞，此乃應天之實。又請以內帑付外庭，俾任鈎考之責。未幾，復對論蜀關外事，宜曰：今春虜犯興元，歷金洋，以至大安，我師剿之，威聲震矣。然大羊巧於窺覷，萬一乘我少懈，奪我江源，順流而下，不可不慮也。夫藩籬嚴密，彼安得以窺我。根本堅





壯彼安得以搖我。因言蜀之急務六、欲復階、成、和、鳳之保障、搜揚巴蜀之人才、優大安戰功之賞、與夫教民兵、防蠻患、紓民力、條數甚悉。且謂、藝祖得蜀甚難、今可不思所以保蜀之策。人謂國事之可憂者莫如蜀、外障之難防者亦莫如蜀、何者、其地至遠也。有才而無識者不可以爲蜀帥、有勇而無謀者亦不可以爲蜀帥、何者、其任至重也。奏畢、反復再三。上曰、可見卿忠誠愛君。公進讀高宗寶訓、推演甚詳、而上亦玉音屢發。其尤大者、則因論進退人才之公、上曰、天大地大、道大、王亦大、惟其至公、所以爲大。論賞罰適中、上曰、柔而不中、則爲姑息。剛而不中、則爲霸道。剛柔皆得其中、則爲王道。論趙鼎言呂頤浩過失、而上則曰、此所謂言及乘輿則天子改容、事關廊廟則宰相待罪。又云、上下之情交通則爲泰、不交通則爲否、若臺諫不言、何由得知。論擇宰相、而上則曰、人主擇宰相、宰相擇

百官、爲治之要道也。主好要則百事詳、主好詳則百事荒。其後讀續帝學、至司馬康講洪範三德、哲宗問只此三德、爲更有德。起居舍人王巖叟請書於冊、以示萬世。公言、哲宗發問、不過兩言、而當時賢臣其喜如此、以此知帝王之學要在發問。上曰、問則明、不問徒然無益於事。又讀至上官均言好學好問、公言、人主豈可不好問。不好問則群臣之邪正、政事之得失、必不能盡知。說書柴中行亦奏、須觀所問之人邪正。公言、但觀其所言爲己乎、爲國乎、則邪正辨矣。上曰、若爲一身計、便是小人。又讀至講讀官舊皆有講義、中間侍讀獨廢。程瑀隨事著明其說、公言、臣所以每遇進讀必從而敷陳之、此乃法程瑀所以事高宗者。上曰、若只讀一遍、何益。公之意以爲儒臣進讀、當兼之以陳說、人主務學、當參之以好問、故懇懇言之、而上亦應答如響、啓沃之助、於是爲多。公德量恢洪、充以涵養、嘗

言伊川程公稱明道先生、視其色接物如春陽之溫、聽其言入人如時雨之潤、爲善形容有德者氣象。平居待物、粹和之氣可挹。至立朝論事、則義形於色、凜不可回。一時正論、賴以宗主、而同列始有側目者矣。讐虜垂亡、聘使屢返、非我絕好、彼自內訌。公謂歲幣不必與、議者以爲當與。困獸跳梁、屢蹂邊鄙、彼自爲寇。非我興戎、公謂戰守不可弛、而議者以爲當和。孜孜獻納、有言必盡、近臣之職、所當爾也。而目曰多事。侃侃守正、不阿時好、平生之節、不可屈也。而指爲好名。公勾歸至八九上、迄不之許。會三學諸生伏闕上疏、斥主和者之非、旣而全臺論列、乃併公以罷。十二年六月也。太學諸生三百餘人祖餞都門外、且賦詩以別。公曰、乾道變化、各正性命、雷雨作解、草木甲拆、此吾志也。以直得名、豈其心哉。明年除寶謨閣待制、提舉鴻慶宮、起知溫州、辭、陞直學士、皆奉祠如初。明年春疾大

作、而神觀精明、著述弗倦。或勸公宜少休者、公曰、吾以此爲笙鏞箎磬、不知其勞也。八月庚寅、猶竄足近作。疾革矣、醫來必正衣冠以見。癸巳、薨於正寢。公受知寧皇、終始簡記、旣薨之三日、寧皇亦棄天下、嗚呼痛哉。公官自改秩十二遷爲太中大夫、爵自鄞縣男再進爲伯、食邑自三百戶至九百戶。今上御極、陞顯謨閣學士、加秩二等致仕。遺奏聞、贈龍圖閣學士、光祿大夫、官其後如格、賻銀絹皆再百。自諸老淪謝、天下之士視公出處以爲輕重、及是聞者莫不傷靈。太學諸生相率爲位於西湖之昭慶寺以哭、四方之來奠者其辭皆哀。學者稱公不以爵氏、而曰絜齋先生云。寶慶三年、上有事南郊、以二子登朝、贈金紫光祿大夫。紹定三年、明堂恩、贈開府儀同三司。自象山先生闡明大道、揭以示人、曰學問之要、得其本心而已、心之本真、未嘗不善、有不善者、非其初然也。公始遇之都城、一



見即指本心洞徹通貫、警策之言、字字切己、公神悟心服、遂師事焉。研精覃思、有所未合、不敢自信。居一日、豁然大明、因筆於書曰、以心求道、萬別千差。通體吾道、道不在他。此公自得之實也。慈湖楊公與公同師、造道亦同、而每稱公之覺爲不可及。其見諸言論、則曰人生天地間、所以超然獨貴於物者、以是心爾。心者人之大本也、此心存則雖賤而可貴、不存則雖貴而可賤。又曰、大哉心乎。與天地一本、精思以得之、兢業以守之、則與天地相似。又曰、直者天德、人所以生也、本心之良、未嘗不直、回曲繚繞、不勝其多端者、非本然也。其告君以此、其教學者亦以此。某之漕江左也、公贈以言、謂中庸曰天地之道、可一言而盡也、其爲物不貳、則其生物不測。大雅曰上帝臨汝、無貳爾心。惟此大本、不必他求、卓然不貳、萬善咸具、古人所以兢兢業業、不敢少懈者、懼其貳也。至爲作忠宣堂記、則曰、

心本不偏、制行而原於心、斯不偏矣。凡此皆所以推明本心之善也。又嘗言、道不遠人、本心即道。知其道之如是、循而行之、可謂不差矣。然未能爲一、則猶有間也。執柯伐柯、睨而視之、猶以爲遠、謂其未能無間、則雖近猶遠爾。惟夫全體渾融、了無間隔、則善之至也。又曰、吾道一以貫之、非吾以一貫之也。舜由仁義行、非行仁義、若致力以行之、則猶與仁義爲二也。其言益精切矣。雖然、公非苟知而已也、少而任道、晚益自力。其致遠也、萬里之途、跬步未至、不敢以遂休也。其任重也、萬鈞之負、銖兩弗逮、不肯以遽已也。閱其量必欲如滄海之涵浸、粹其行必欲如璠璣之光潔。嘗言人心至神、翳之以欲則不神矣。故其修身以寡欲爲主、勇猛奮勵、痛自懲窒。又謂人之欲無窮、必求所以滿其欲、非道而取、何所不至、養小喪大、淪胥不仁不義之域、豈不哀哉。晚於所居爲樓、名以是亦曰、直不高大

爾是亦樓也。以至山石、花木、衣服、飲食、貨財、隸役、亦莫不然。至於宦情亦薄。曰：直不高顯爾，是亦仕也。凡身外之物，皆可以寡求而易足，惟此身與天地並，廣大高明，我固有之，朝夕磨勵，必欲追古人而與俱。若徒儕於凡庸，而曰是亦人爾，則吾所不敢也。以此自警，且以誨子孫云。公自少有志經濟之業，每謂爲學當以聖賢自期，仕宦當以將相自任，故其所講明者，由體而用，莫不兼綜，謂學不足以開物成務，則於儒者之職分爲有闕。自六藝百家與史氏所記，莫不反復紬繹，而又求師取友，以切磋講究之。東萊呂成公接中原文獻之正傳，公從之遊，所得益富。永嘉陳公傅良明舊章，達世變，公與從容考訂，細大靡遺。其志以扶持世道爲己責，然自始學於義利，取捨之辨甚嚴。嘗讀論語，至不義而富且貴，於我如浮雲，慨然歎曰：士之知所輕重當如是矣。辭受進退，惟義所在，金石弗渝。方

孽臣顓柄，天地閉塞，徊翔卑冗，不以爲辱。公道開明，群臣拔茹，致位禁近，不以爲榮。惓惓一心，惟王室生民是念。事有不可，陳義固爭，蓋將尊君重朝而措天下於大寧也。道不果行，齎志以歿，然其所立固已偉然爲萬夫之特矣。曾子所謂仁以爲己，任死而後已，孟子居廣居，立正位，行大道者，於公見之。公之事親如天，事君亦如天，由其本心昭明，隨事著見，有一無二。親雖沒，敬奉遺體，舉足不忘無適而非親也。身雖退，心在闕庭，一飯不置，無適而非君也。於昆弟友愛尤篤，弟標亦事公如嚴師。從兄濤嗜學固窮，其亡也，爲斂葬，嫁其孤女之未嫁者。於宗族賙貧拯厄，備極其至。於朋友忠而盡，自爲幕府，事其長敬以誠。及在朝廷，每言君相同體，愛吾相者所以愛吾君也，故勤勤納忠，寧有違拂而不忍蔽欺。嘗告之曰：導諛雖可喜，未必非賣我者。鯁言雖難聽，異日乃真能不負者也。公賞鑒



絕人、李正節誠之始見於鄞、傾蓋如舊友。嘉定初、李與丹陽劉君宰偕命召、公謂某曰、此二人者、皆所謂有所不爲者也。其後二公果皆如所許云。少而嗜書、白首弗厭。凡聖賢大訓切於己者、味之終身、夜則默誦、病亦吟諷。講道於家、以諸經論、孟、大義、警策學者。於書、禮記論說尤詳、其所成就後學甚衆。博觀群籍、取其切用者會粹成編。謂法度之言自秦以前乃可矜式、故有先秦古書若干卷。謂學士大夫不知兵、則武夫悍將得矜所長、而緩急無以應變、故有兵略若干卷。謂祖宗成憲爲人臣者所當講究、故有皇朝要錄若干卷。其辭章根本至理、一言一句皆胸襟流出。謂語、孟中無難通之辭、難曉之字、故凡所著不爲奇嶮刻峭語、而溫純條鬯、自不可及。晚而好詩、嘗賦進德堂諸篇、趣味幽遠。而於一卉木之芬馨、一羽毛之皜潔、輒寄興焉。曰、吾之自修、當如是也。此豈苟爲賦咏者邪。奏

議藹然忠誠、讀者感動。銘志叙事有史法。諸子哀其集若干卷、藏於家。公之在宗正也、修寧宗玉牒、在樞庭修經武要略。先時修書官類不經意、將進則取具臨時。公蒞職即悉力編摩、後數歲乃進呈、大要多出公筆。史院修高宗寶訓、紀錄過詳、公刪繁剪浮、見謂得體。後修孝宗寶訓、遂專以屬公。退自儀曹、坐史館輒終日、書垂成而公去。議者又欲用司馬溫國公編通鑑故事、俾以書局自隨、或言國史出外有禁、乃止。公娶邊氏、進士友益之女、先公二十有一年卒。屢贈申國夫人。至性淑行、公所爲墓志。墓在鄞縣某里某山之原、公薨遂合葬焉。某年某月某日也。子男四、喬、某官、後若干年卒。肅、某官。甫、某官。商、某官。女四、云云。孫男五、云云。始公嘗言、所貴乎世家者、非必七葉珥貂如漢金、張、八葉宰相如唐蕭氏、名位雖崇而不能皆賢、何世之有。若東都之袁、楊二氏、氣脈聯屬、名德俱隆、則可謂

世家矣。吾之先世雖出處之不侔，然皆忠信正直，蔚有賢譽，其不謂之世家乎？後嗣子孫努力奮發，不自菲薄，必欲追前人而及之，亦足以爲世家矣。平居訓勵諸子，率本此意。肅首躡世科甫冠多士，公不以自喜，至其德業有進與當有可紀，則爲加飯。故士大夫言家法者，必袁氏爲稱首云。某之與肅同年進士也，眡公寔丈人行，而於其德學則願師焉。嘉定中，再同朝，不鄙其愚，以爲可教，故於嘉言善行多所親覲。歲在甲戌，持節去朝，辱公訪別於南山佛舍，語及國事，幾於流涕。公之盛心昭揭天日，至今猶赫赫也。公之葬慈湖楊公寔爲之銘，於公大節摩寫盡矣。顧其纖微委折有未備者。維公粹學偉行，爲時儒宗，忠言至計，有補宗社，而爵命品秩又已應易銘之典，肅等將有請焉，謂某盍爲之狀。慨念疇昔，誼不得辭，雖筆研蕪廢，猥瑣是慚，然不溢美，不失實，尙庶幾公平昔之志。謹狀。

真德秀撰 《西山文集》卷四七

故龍圖閣學士袁公墓誌銘

故龍圖閣學士袁公諱燮，字和叔，明州鄞縣人。明今爲慶元府。曾祖諱灼，故左朝議大夫、尙書倉部郎中。妣恭人石氏。祖諱垌，贈朝奉郎。妣安人林氏。考諱文，贈通議大夫。妣淑人戴氏。和叔以乾道二年入太學，淳熙七年中上舍選，八年登進士第。歷仕外，則尉江陰，爲浙東、福建帥倉兩屬官，辟權沿海制司議幕，守九江，攝豫章，持江西庾節。內除太學正，去國，再召爲宗正簿，遷樞密院編修，奉常丞，俱權考功郎，補外。入爲都官，遷司封。歷學官長貳，俱兼史館。又兼崇政殿說書，權禮部侍郎。自權爲正，兼侍講，又兼修國史實錄院同修撰，兼侍讀。去國，爲南京鴻慶祠官。積階自迪功郎，轉凡十七，至通奉大夫。職自寶謨閣侍講，陞至顯謨閣學士。爵自鄞縣開國男，三陞至伯，食邑自三百戶至九百。



戶。嘉定十有七年八月癸巳薨於正寢享年八十有一。遺表聞特贈龍圖閣學士、光祿大夫、官其後如格、賻銀絹皆二百。娶邊氏、嘉泰三年卒、贈淑人。男四、喬、宣議郎、新知紹興府新昌縣、肅、秉義郎、新除太學博士、甫、朝奉郎、權知徽州、商、承奉郎、新監臨安府新城縣稅、女四、長適從事郎、監鎮江寄椿庫林鵠、次適國子進士鄭景淵、次適舒鑣、次適江西漕司進士邊應時、孫男四、衡、國學進士、復、循、徽、和、叔生有異質、凝粹端慤、髻鬣不好戲弄、惟喜觀水、乳母置盆水其前、則端坐熟視、移時不動、夜臥常醒然達旦、至老猶如此、篤實不欺、嗜慾淡泊、心無偏倚、行無瑕玷、久之益明、親師取友、急於道義、志氣恢宏、博覽羣書、自六經諸子百家及前代治亂興亡之迹、暨國朝故事、靡不該貫、於先聖格言大訓、玩索尤精、有契於心、則終日諷詠、師尊象山先生之學、訓諸子、期卓然植立、諸子登科、甫冠多

士、亦無甚喜色、齊家躬率以正、涖官修舉職業、聞望可紀、在外臺未嘗輕劾官僚、曰、有不善姑教之、奚以按劾爲立朝大節、能爲人所難、初爲學官、獲罪權臣、一斥十餘年、操守愈礪、及登班列、擢侍從、赤心事上、始終如一、其在經筵也、勤啓沃、謂陛下不邇聲色、祇畏天戒、此時之心、即諒陰三年之心、先帝改容敬聽、他講官或有陳奏、先帝必顧曰、果如是否、往復問辨、玉音琅琅、今起居注可考、其在成均、節宣約束以爲常、時春秋七十有三、四矣、師弟子更相叩擊、由是學者皆知勇於遷善、居論思獻納之地、奏疏無虛月、事關國體、正色敢言、略無忌諱、舉朝悚然、金人衰弱、假息於汴、來索歲幣、和叔抗疏力爭、謂與幣乃偷安之計、適以召兵山東、流民襁負來歸、邊境遇之甚嚴、和叔又力爭、以爲阻中原向化之心、不可之大者、同列議不合、屢上章丐去、未得請、而論罷去之日、大學生歌詩餞送



者三百餘人。和叔曰：以致仕爲名，以去位爲高，豈余心哉。乾道變化，各正性命，保合太和。雷雨作解，而百果草木皆甲坼。吾道固如是，吾心亦如是。退居閭里，可逸豫而偶得淋疾。既久，起居有常度，未嘗少變。容貌雖瘠，而神明不衰。有來問者，必整冠襟見之。病中有朋友未報之書，索紙筆悉答。作府學記，上虞縣橋記。易簣之前三日，取二稿再加審訂，一字不苟。神氣益精明，起居猶如常。伏枕纔一日，翛然而往。子女在前，弗顧也。處存沒之變，怡然不亂如此。和叔以絜名齋，學者稱之曰絜齋先生。薨之日，四方聞者悲悼，太學生相率爲位而哭。及他郡士友致奠者，其詞甚哀。生平著述多，諸孤將哀次成帙。其他嘉言善行，見於太史氏，茲不殫紀。是歲十有二月丙午，諸孤奉帷荒葬於鄞縣陽堂鄉穆公嶺之原，合淑人墓。且密邇通議公兆域。諸孤泣請簡銘。簡與和叔同講學，和叔立朝光明，臨

終不亂，簡不勝興敬。

和叔之覺，人所未知。非木非石，無思無爲。

楊簡撰 《慈湖先生遺書》補編

絜齋袁先生傳

袁先生燮，字和叔，鄞人。少以名節自期，入太學，見陸先生九齡，德容晬盎，親炙之。同里沈、楊、舒三公皆聚於學，朝夕以道義切磨。第進士，爲太學正。時朱文公諸名儒已去，先生知不爲時所容，尋以學黨更歷外服。入朝，至太常丞，兼考功郎，知江州，提舉江西常平。以都官郎召，遷司封，又遷國子司業，祭酒。延見諸生，迪以切己之學。常病世學者襲先儒緒言，未能自得於心，不足以爲學。吾心即道，不假外求，忠信篤實，是爲道本。聞者竦然自得，以秘書監兼崇政殿說書，遷禮部侍郎，侍講，猶兼祭酒。講詩二南於先王正始之本，自身而家，自家而天下者，深寓規倣之意。列國變風，有關君德治道者，



儒藏

宋儒碑傳集 卷一五七

亦託其義以諷。立朝守正不阿、時好議者指爲好名、遂奉祠以歸。著述弗倦、或勸宜少休、曰、吾以此爲笙鏞管磬、不知其勞也。終於顯謨閣學士、諡曰正獻。先生嘗曰、此心存則雖賤而可貴、不存則雖貴而可賤。大哉心乎、與天地一本、精思以得之、兢業以守之、則與天地相似。每謂爲學當以聖賢自期、仕官當以將相自任、其所講明、體用兼綜、於書、禮記、論說尤詳、成就後學甚衆。子甫、進士第一、爲兵部尙書、國子祭酒、亦稱名儒。

王應麟撰 《深寧先生文抄撫餘編》卷一

# 校記

- ①虜：原作「兵」，據正德本《西山先生真文忠公文集》改。
- ②乾：原脫，據右引補。
- ③⑪夷狄：原作「遠人」，據右引改。
- ④⑤⑥韃靼：原作「蒙古」，據右引改。
- ⑦「蠢爾」二句：原作「逃矣遠塞、敢侵王略」，據右引改。
- ⑧⑨⑫⑭虜：原作「敵」，據右引改。
- ⑩虜人叛盟：原作「敵人渝盟」，據右引改。
- ⑫夷狄：原作「敵國」，據右引改。
- ⑬若：原作「欲」，據右引改。
- ⑭夷狄：原作「外國」，據右引改。下「夷狄侵侮」同。
- ⑮殘虜竄伏：原作「敵人逼遷」，據右引改。
- ⑯殘虜：原作「敵」，據右引改。
- ⑰⑳虜：原作「國」，據右引改。

⑮夷狄：原作「敵人」，據右引改。

⑯金虜侵軼：原作「金人侵我」，據右引改。

⑰戎虜：原作「敵之」，據右引改。

⑱犯順之虜：原作「敵人之師」，據右引改。

⑲虜犯：原作「敵侵」，據右引改。

⑳剿：原作「敗」，據右引改。

㉑犬羊：原作「敵人」，據右引改。

㉒困獸跳梁：原作「敵人覬覦」，據右引改。

㉓寇：原作「難」，據右引改。

㉔絜：原作「潔」，據右引改。

㉕本此：原作「此本」，據右引乙。

㉖此題爲墓誌銘，然有誌而無銘；《鶴林玉露》錄其銘僅四句，恐亦不全。

㉗「職」前原有「之」字，據四明叢書本《絜齋集》附錄刪。

宋儒碑傳集卷一百五十八

陳謙 陳希點 劉燭

朝請大夫提舉江州太平興國宮陳公墓

誌銘

公永嘉陳氏名謙字益之曾祖璿祖敏昭父敦化贈太中大夫幼專苦迅捷初得通鑑錄本坐敗敖晝夜讀數日略已盡又論著其要衆咸駭異入太學時尙踵秦檜故禁文氣卑弱公理勝而筆豪其體一變中乾道八年甲科授福州司戶陳丞相俊卿推誠聽公輸苗許自槩量民以爲公賜也教授寧國府未行史丞相浩薦主管刑工部架閣遷國子錄勅令所刪定官樞密院編修官爲孝宗陳中興五事至李綱議建鎮范宗尹趙鼎置鎮撫上遽曰綱何足道公曰然陛下用大臣審出綱上綱何足道宜如聖諭今顧出綱下遠甚奈何上蹙然遂極論踰數刻因以公語詰責執政孝宗尋內禪公

即求補外與軍壘不就通判江州慕白氏之游自號後司馬留二年知常州地迫蘇潤望輕爲守未嘗得舉職俚俗謂此監司出氣處也公以義勝姦扶善抑惡據正而行監司俛首遜公所爲州人至今言陳編修神明也不再見矣移提舉湖北辰州猺蒲闕口掠辰沅邵武岡以叛公偶攝憲事親行邊稍經略之會除夔路運判而帥司荆鄂軍討捕久無功兩路恟恐安撫使王藺奏留公就遷提刑率正兵丁兵三千直擣賊穴降誅八十餘峒凡七十五日猺人自是不復反進直煥章閣於是紹熙五年也慶元二年以戶部爲湖廣總領總司先造會子價益賤減省百纔直五十命曰短錢相承莫能革更規以自利公集卓子鋪日付錢爲千者五百使以七十兌焉抑損燕餽器用崇侈者還之金銀以市軍儲分遣官屬士卒逃死者求其隱占以正軍籍皆昔所未有統制不悅過客多缺望然黨



論方大起、貶斥不勝計、而公亦隨去矣。後四年、知袁州、高文虎、程松持不可。又四年、黨論漸止、提點成都路刑獄、造李冰石堰、嘉州繩橋、皆施便巧、堅久耐實。褒禮耆彥、待以師友。翰墨許與、流布岷峨間、蜀人加敬愛。移京西轉判、復煥章閣。開禧元年、襄陽前帥李奕、後帥皇甫斌、密受韓侂冑意、謀先事擾虜、縱亡命劫界外。斌建令獻馬者補官、得馬三千匹、總豪皆破家。先騎士浮客無所仰耕、又糴米隨郢州、歲惡、至攔米搜糴、民食頓竭。由是七州民無強弱相扇爲盜、縱橫入虜地、復歸自寇。商賈路絕、沿漢近山之木皆盡、而鄧城鎮屯田、莊府東門、處處殺掠、城扉晝掩。侂冑不知其情、將遂出師、公謂侂冑復讎大義、伐國重事也。豐儲實邊、教而後戰、古人成算、既不講、添大軍、給綱馬、射鐵簾、蓋寨屋、今日常文又不用、乃倚羣盜剽奪行之、豈得以敗亡爲戲乎。旣屢論斌、奕罪、力陳四不宜動、且

求罷。侂冑患之、彌年不決。二年、薛侍郎叔似以往諭指協和帥漕、留宣撫京湖、公復以戶部郎遷司農少卿、總領湖廣、遂去襄陽。斌師大出、不用宣撫令。初敗支池河、再敗方城、而郭倬至宿、李爽至壽、皆大潰。金州秦世輔、未及行而潰。蓋開禧所謂用兵如此。在襄陽也、度虜必至、至則襄爲兵衝。襄人汲於漢、冬涸、掬泥而飲。公陂北城爲地道、溝江貯之三百尺、茭藭藁稗皆備、綱舟被係千餘、盡釋之。旣至鄂、凡米悉運赴襄。又曰安陸亦兵衝也、併發所部、自夏迄秋、襄得斛百餘萬、安陸七十萬。又分光、黃土兵效用戍五關、募守安州三關。三關者、魏將元英所攻、韋叡救之者也。及兩州被圍、卒賴三關兵救安陸、而五關不可攻。虜旣解去、襄城米未食者十五萬、薪水不乏、竟完二城、皆如公策。除宣撫司參謀辭。虜兵深入、陷應城、盜焚漢川、漢陽空城走。或言虜已拆鳳棲寺趙太尉宅爲棧渡江矣。

武昌震懼。公方待制寶謨閣。副薛公宣撫。即日置司北岸。虜絕南河。亟命土豪趙觀覆之中流。人馬溺死甚衆。餘兵皆反走。而孝感屯兵亦夜斫賊營。軍勢欲振矣。會德安教授陳之經見侂冑。言州無援師。僞爲慟哭可憐者。侂冑不知其詐也。怒。襄陽都統趙淳忌宣撫司統制呂渭孫。誣其殺副統制魏友諒。輒殺之。薛公不敢効。遂奪職俱罷。然虜卒不窺漢陽。收兵北遁。公力也。虜實困弊。然外示不和之形。侂冑懼。復以公知江州。備警益嚴。又以餘力完署舍。浚溝洫。中流晏然。侂冑死。嘉定元年五月。虜已決和不樂者。乘時毀公。復罷。自是不復用。八年。始提舉興國宮。九年八月朔。無疾卒。年七十三。十年正月丁酉。葬建牙鄉鵬飛里。令人胡氏。先公十年卒。子曰臨。早夭。曰觀。宣教郎。知益陽縣。女曰緝。嫁建康府戶部贍軍中庫薛師董。孫曰起宗。郊祀皆任兄弟之子。貴州錄參頤。彭澤簿巽。新漢

陽簿履。將仕郎損。而女之嫁者六人矣。公軒邁朗豁。純識獨到。人情共畏。不知其難。荒蹊絕徑。匹馬先至。洪波駭浪。扁舟夜涉。惟意所向。若或助之。故動必有成。而人亦莫能測也。初隆興。乾道中。浙東儒學特盛。以名字擅海內數十人。惟公才最高。其在易菴集文最勝。然公未常自異於輩流。輩流亦不知異公也。開禧之役。四十年大事。而公獨先見李奕。皇甫斌敗證。告於朝。及襄城。安陸獲全。功又最著。然無分銖之賞。方以爲罪。公亦不自明也。夫挾三最。世不異。復不賞。已置不論矣。至庸人之謗公。則有甚可哀者。公之使湖北也。岳復二州人。愬曰。總所歲糴我米。不與我錢。我非官戶也。非士人也。非義勇也。三者幸而免。使我併受。總取我一縣。又倍之。傳子至孫。不能脫也。公移書總領張抑。再三抑盛怒不許。既而公爲抑代。遽奏罷之。抑慙恨。誣公。所以去者用此。至今吳琚檢校公在時錢物。



然反多抑七十餘萬。後人以抑昉爲讒。因佐佑其說。比罷副宣撫。復令項安世校公後總時錢物。然一錢一粟不謬。二籍至今藏其家。嗚呼。世言讒人能以白爲黑。止於所讒而已。不讒者固素定也。人素定故也。免岳復永世之糴。二州祭祠。至今不絕。人不素定乎。琚安世不相謀也。檢校若合符。人不素定乎。今讒者往矣。不讒者可以定矣。古人謂舜與跖之分。嗟夫。不定則無分。而舜爲跖矣。銘曰。

選軟遲魯。儒之常患。質少文多。流俗所訕。天門開闔。孰知公賢。千里獨行。振袂無前。蠡爾闕口。覆波若電。開禧挑敵。最爲先見。輦粟萬倉。卒全兩邦。虜不至江。又公之庸。凡可陳力。奮無易劇。零功碎績。所存歷歷。汲綆千尋。不盡其深。以淺疑我。讒夫之淫。或棲連崗。或汎長流。霞友雲朋。造物與游。建牙之鄉。鵬飛之里。公游遠矣。公譽方起。

葉適撰 《水心文集》卷二五

中書舍人贈光祿大夫陳公神道碑

公諱希點。字子與。處州青田人。陳姓出于有媯。其來遠矣。九世祖名師訥。吳越王時爲銀青光祿大夫。積勳上柱國。曾祖圭。贈宣奉大夫。祖汝錫。擢紹聖四年進士第。仕至左朝請大夫。秘閣修撰。知紹興府。兩浙東路安撫。贈中奉大夫。高宗駐蹕會稽。朝廷草創。賴彈壓辦護之力爲多。威名甚聳。直道自將。不能與時高下。一斥不復。士論惜之。父棣。篤學有賢行。奉議郎。通判潭州。贈中大夫。妣葉氏。馮氏。俱封孺人。贈碩人。公葉出。碩人石林先生從兄之女也。公承家訓。少有場屋聲。入太學。再預薦。連丁內外艱。淳熙八年。以南省第六人登甲科。授從事郎。平江府觀察推官。樞密丘公密爲守。屢以職事爭辯。丘公或憑怒折之。公退立屏息。俟其少霽。執論如初。至于再三。竟不能奪。自爾公所書擬望而許之。樞密羅公點以浙西提舉兼府事。舉兩司





事無大小悉以屬公。行荒政、修水利、決積訟、皆公左右之。除主管尚書吏部架閣文字、再歲遷國子正、日進諸生問難經史而嚴私謁、所拔多宿學、有行誼之士。時重華寢疾、光宗亦不豫、省觀闊疏、或夙戒而中止、物論紛然。公謂上實被疾、而間其心者得以肆其邪說、因疑成畏、遂至猜阻、上疏備言之。讀者以爲辯而不激、直而有禮、深體父子之至情。又嘗代從班兩疏、反覆至數千言、皆剴切出于衷誠、言及則悲傷感泣、不能自己、愛君憂國其深切類此。尋遷太學博士。上即位之初、輪對、首陳三事、曰畏天命、曰法祖宗、曰結人心。敷叙詳明、用故事不納副封。時宰以公嘗出其門、不以間見、固已不樂。至是以爲輕我、且曰、是不尊廟堂也。奏令赴吏部銓。上獨喜公所奏、遷大理寺主簿。人爲之憤。公曰、上知我矣。欣然就職。素不讀律、而原情引經、法家自以爲不及。丞將作監。又幾年、丞司農。大農

除江浙十一州運米外、餘仰和糴中糴以助歲計。淳熙初、州郡歲額糴降本緡錢計一百六十八萬、是時年豐楮重、未至迫蹙。後又議寬減、加以虛額及收馬料等、凡減去二十餘萬有奇。中熟僅可支吾、一或不登、則廩廩有乏興之懼。公與同列究弊源、權輕重、爲之少裕。時權倖方張、公不少屈、遲回久之。丐外、知泰州。陛辭、陳農寺四弊三策、且曰、此其在有司者耳。弊在朝家、有大于此者。乾道二年、一歲除馬軍一司二十二萬石之外、實支一百三十八萬餘石。馬司旣已移屯、而紹熙以來不下支一百六十萬、此臣所未解也。願究昔之所以省、今之所以多、力圖而痛革之、然後採三策而去四弊、庶幾國計稍可爲、官吏亦得以任責。上從公言、方議施行、而不樂者益衆。言者有未作縣不當守邊爲辭。公上祠請、改知衢州。州當舟車之衝、訟繁事夥、將迎無虛日。公謂財裕則可以行志、首閱歲入

之籍、痛節浮費、力裁廚傳。用既不闕、時有蠲減、得以裕民。寓公服其風裁、軍士犒給無闕而憚其嚴。愛民如子、惜官錢不啻己私。或用至數十緡、拊心歎息曰、此皆民之膏血、箠楚所取、安可輕用耶。秩滿、視帑藏元額餘十四萬緡、吏請上聞、公曰、吾豈以羨餘取世資者。止以少過舊數申發、留其贏、以寬征取。召赴行在、首奏農寺和糴歲歉價增、富商大賈反操其權、以邀厚利。不若乘此粒米狼戾之時、廣行收貯、積及三百萬、則可以備凶年之急矣。又言、役法之弊、欲以限田、視品秩爲等、限以止法。三品以上自依舊法、四品至六品止于曾孫、七品至正八品止于孫從、八品止于子、八品而未嘗歷任與九品止于本身。一依宣和舊法、子孫自致通顯者別計、庶官戶既有限節、下戶可以少寬、詭寄之弊、亦可漸革。除戶部右曹郎官。嘉泰四年、都市大火、延燔省部、家人進饌、公輟匕箸曰、主上無失

德、皆姦邪致此。言畢流涕。會求直言、遂極論弊事。大略謂、西漢之末、人主無甚過行、徒以上下偷安、風俗脂韋、浸成衰弱。併論、賊吏債帥及士風日偷、州郡數易、皆闕政之大者。又言、晉之南渡、未嘗主和、故不弛備、而戰亦不憊。今上下恃和爲安、將驕卒怨、敵勢雖衰、未易乘也。遷右司郎官。時權臣專制政柄、貪相濁亂朝綱、公與今知樞密院雷公彌縫其間、一裁以法。雖盡所職、而念去已深。遷軍器監。平章之初、方觀衆情向背。公一見、首求外補。旁觀者爲公危之。公曰、去意已久、非容心于矯也。遂以直寶謨閣爲福建路提點刑獄。訟訴萃于憲司、明恕而行、處決不倦。人以不冤。時方用兵、征求益繁、建有飢民鈔略、逮繫百數。公謂皆迫于乏食、不足深治、取爲首數人、寘之輕典、餘悉縱遣之。召還、論邊事皆深長之思、切中時務。復歸舊著、不數日、元惡就誅、遂除中書門下省檢正諸房公事。未幾、



擢起居舍人兼太子侍講進兼侍讀兼左諭德公講讀之際至人道大綱治亂大端祖宗立國之本意必反覆陳述太子爲之起敬聽者聳然立螭之初首陳西蜀兵事謂重兵駐漢沔東南禁旅不能爲之輕重成都者漢沔之根柢也今漢中三大軍無慮十萬而成都之兵不滿百何以制未大之患逆曦之變至無敢抗者謂宜如揚盧帥司增置親兵仍增募屬縣之卒庶足以鎮一方緩急可以倚仗策無便于此嘉定初元當兵荒之餘久旱飛蝗人情惶惑或謂成肅喪制未終主上不應親出禱雨公直前奏謂出而于逸于觀則不可若循仁皇禱西太乙故事親屈萬乘爲民一出則人人皆知陛下閔雨之切人心悅而天意解孚應必矣上爲之感動越三日車駕禱于太乙宮甘雨隨車都人歡呼歲亦中熟進起居郎未踰月兼權中書舍人尋爲眞公既代言詞尙體要隨職戒諭不爲

虛美遇有繳奏身任其責奏或未下不憚繼入事關大體漸不可長者必痛抑一二以警其餘末節細故亦不屑屑也詔求時政闕失公言太上知天其次畏天其下慢天知天者興畏天者存慢天者亡請以周事明之文王知天故以之興成王宣王以畏天而存厲王幽王以慢天而亡累聖繼承祈天永命中更變亂而天命人心彌久彌固者在此也陛下即位十有六年恭儉之心敬畏之誠上通于天下信于民是陛下有其心矣夫有其心者必有其政有其政者必有其事苟德意未宣政事多闕是殆未知推其所爲而已公前後論奏于天命人心之際必反覆開說指切事情雖不盡見于施行而立論率可稱述公素多疾至是以久次方擬進擢而公之病病矣二年十二月壬午卒于位享年六十有六積階至通議大夫遺奏聞贈宣奉大夫以皇太子冊寶恩贈光祿大夫爵青田縣開國

男食邑三百戶。先三日、設榻正堂、至是斂襟危坐而逝。問以家事、一無所答。識與不識、莫不傷正人之云亡。上深惜之、賻贈加禮。贈官之制、首引唐文皇之言曰、收也若在、當以中書令處之。亦足以見眷遇之深矣。皇太子尤爲惻然。三年二月、諸孤奉公之柩以歸。十二月甲申、葬于鳴鶴鄉慈明之原。公娶同邑朱氏、封碩人。子仲堪、迪功郎、福州羅源縣主簿。仲埴、承務郎。仲埳、國學生。先公九年卒。仲垓、仲坊、將以公致仕遺表恩、補承務、通仕郎。女二人、文林郎、新汀州州學教授孔夢符、迪功郎、鎮江府延陵鎮稅兼煙火公事盛立禮、其壻也。孫男女五人、尙幼。公性素剛、交際簡淡。其不爲阿附、人以爲難。公蓋優爲之。慕王陵、汲長孺爲人、少作見剛錄以寓意。其哭知樞密院胡公晉臣文曰、朝有正臣、其國乃重。漢曰汲蕭、唐稱魏宋。誼形于色、賁育其勇。或招麾之、亢立不動。其抱負如此。三登朝著、

二十餘年、終以落落不爲當路所知。自博士左遷、遠迹清要。更化以來、始遂向用。以世道爲己任、嘗曰、世之不治、非謂無法、法亂之弊也。救時之相、固不易得。苟得平心守法者、其庶幾乎。蓋自許也。孝友勤儉、得于家傳。碩人能承公意、謹奉甘旨。旣畢葬送、弟妹婚嫁、謹奉先志。事兄如事父。春冬賜帛、必先奉其兄。而後入私室。旣又推所遺田宅、悉以予兄弟。自奉如未遇時。所居纔蔽風雨。作詩雖多、錄其得意者。文尤簡古、字畫端方。如其爲人。公靜默嚴重、出于天資。兒時已如成人。及長、左右規矩、風標益峻。起居飲食之處、終始如一。喜慍不見于辭色。雖家人莫窺其際。笑語有度、使人意消。讀書觀大略。苟有會心處、則涵泳充廣。必使心通意解。達于踐履。執喪哀慕之餘、一意探討。免喪始登東萊呂太史之門、一見契合、相與質疑辨惑。由是聞見益明、而所守愈定矣。有淡齋筆談、淇淥遺興、璧

水雜著、西掖類彙、經筵講解及奏議、各藏于家。此皆右史王公介狀公行之詞也。仲堪等求銘于鑰、自念及識潭州、已服其賢厚。與公同朝、相好非一日。掛冠復來、恩及三世、一歲間封贈至三四、訓詞皆出公手。知鑰家世之詳、叙述委折、使自爲之、亦不過是也。殄瘁之歎、倍于他人、故不敢以固陋辭。銘曰、

誦詩讀書、孰非儒雅。悠悠千載、未見剛者。我重彼輕、惡圓喜方。禍福度外、乃全吾剛。惟公不羣、尙友陵黯。持志養氣、明目張膽。天分既高、學力尤深。閱世多變、秉吾一心。進退以義、落落難合。更化始用、論思獻納。西掖代言、訓詞溫淳。東宮橫經、輔道諄諄。折而不撓、人望公輔。一疾困之、遂隔千古。鶴溪之原、父祖相從。孰有如公、一節始終。

樓鑰撰 《攻媿集》卷九八

### 劉文簡公神道碑

上更化改元之九年二月、工部尙書劉公薨、詔以光祿大夫告其第。十四年六月、有司按諡法、博聞多見曰文、正直無邪曰簡、請諡公曰文簡、詔從之。其孤瑋以前尙書郎三山陳公孔碩之狀來謁銘。德秀從公游有年、凡其修身立己、正君端朝之本末、實具知之。顧常竊論、公平生大節、雖未易以一善名、然溯其學問之源流、與夫見諸謀謨事業、則惟正之一言足以蔽之。蓋公皇考銀青府君蚤受學於屏山劉先生、籍谿胡先生、盡得理義精微之蘊。公幼在家庭、耳濡目染。少長、府君授以河南程氏書、曰觀此可以爲學矣。晦庵先生朱文公以道德爲學者師、公出入其門、切磨講貫者數十年、眊他從游之士爲最久、而所造爲特深、則其學固已粹然一出於正矣。公之天資厚重而不浮、純一而弗雜、又嘗用工於致知力行之地、故其言必正言、行必正行、確然自守、以終其身。晚登朝廷、致位侍



儒藏

從雖未及盡行其志、而奮忠陳謀、察微慮遠、汲汲於扶持天下之正論、而詭隨迎合以售其私者一亡有焉。故德秀以爲正之一言足以槩公之平生者、詎不信夫。今明詔用有司之議、以正直無邪諡公、其可謂不虛美矣。蓋正者直之所自出、直者正之所自形、二字之褒、傳信百世、奚復以銘爲哉。皇曰、古者有誄有銘、銘不可以誄廢也、君其弗辭。廼即陳公之狀、剝取其要而書之。公諱煥、字晦伯、蓋漢之胄、出於諱幽者。遭五季之亂、自光州固始遷焉、遂爲建陽后山人。十世至銀青府君、以累舉恩入官、終於朝奉大夫致仕。公其長子也。以乾道八年進士主紹興府山陰簿、再調饒州錄事參軍、於郡政裨贊最力。同僚有忌公者、械公之吏以求其私、卒毫髮無所得。後其人以他故抵罪、遭按問、惶駭失措、公攝其官、反營護之使免、人謂公爲長者。調連城令、邑居臨汀窮僻處、民力困而上供煩。公

首捐令添給與凡例所當取者、歲爲錢幾千緡、撙節他費尤多、由是得以稍蠲民間無名之斂、汀人至今德之。新其縣之學、而教諸生以入德之方、士爲翕然知鄉。改宣教郎、知福州閩縣事、清靜平易、有古循吏風。邑有洲田、因潮耗息、有寓公素貴、欲奪數十下戶田、公援前帥奏請折其妄、民得安業、帥守諸臺聯章論薦、秩滿至都、時朝多君子、皆知公欲留之。且諸臺之薦、固嘗有旨陞擢矣。公自謂與丞相趙公有連、當避、乞通判潭州以歸。上新受內禪、公寓書丞相曰、前日之事、如病寒熱、一旦解散、即無所苦。至於蠱毒中人、初不自覺、觸物而發、必死矣。孔子曰、抑亦先覺者、是賢乎。蓋指韓侂胄也。其後迄如公言。丁外艱、服除、主管都大坑冶司文字。知德慶府、至郡葺學宮、練軍實。蜚戶舟船有禁、爲亟除之、且罷兩邑科敷之不正者。受代、入對言、前者北伐之役、執事者不度事勢、貽陛下憂。今



雖從和議、可無虞乎。願益恐懼修政、以強國本、開言路以廣忠益、闡公道以進人才、飭邊備以防虜詐。時執政議欲留公、宰臣陳自強曰、斯人閩縣之政、吾知之、然真是偽學。侂冑誅、自強逐、遂以公提舉廣東常平茶鹽事。既至、首覈諸郡儲侍之實、復白於朝、欲令守臣歲以新陳相易、常存其半、以備緩急。監司積弊久、逋亭戶緡錢十萬、漕司五萬、公痛加裁約、以身先之、未幾悉償所負十五萬者。奏請廣南諸州、凡夏秋之賦、即郡以輸者、雖外縣官奉廩亦當從州給。又言、仕乎南者多自爲裨販、奪州縣征商之利。請凡仕廣而商者、轉販所經、許州郡沒入其貨。嘉定二年召入對、曰、人君代天理物、聖人憲天聰明、故典禮討命、皆歸之天、示不以私意參焉。所以不言而信、不怒而威、天下定于一。苟有私意、形于朝廷、則朝廷各有心、形于天下、則天下各有心矣。人各有心、以事其上、亦曰殆哉。此古

聖人所懼而不敢肆也。方今承凋敝之餘、履艱難之運、天下之勢不可謂安、所恃者人心。天下之心固未易一、所恃者公道。公道明則人心自一、朝廷自尊、雖危可安也。公道廢則人心自貳、朝廷自輕、雖安易危也。願陛下主此公道、不用一毫私心、不聽左右私言、大臣奉行公道、進一人、退一人、皆采天下公議而無作好惡、至於一號一令、莫不皆然。陛下主張公道而大臣有不欽承、則天下之惡皆歸之矣。大臣奉行公道而小臣猶不精白、亦明時所不容也。如是則言而民信、動而民從、盜賊不作、水旱饑饉之憂可消矣。時江湖峒寇方警、公言、弭盜之策、當精擇帥臣而重其責、俾視守臣之不勝任者易之、兵官之非其才者汰之、許以辟置選補、使帥臣重于一路、耳目不蔽、姦宄具知、必能潛消隱伏、剪除萌芽、不至上煩宵旰。除吏部郎中。時詔中外各陳錢帑利害、特命公與劉彌正詳擇其當



以聞。既共條五說上之、而公之意以爲終非久計、獨上言、救天下極弊、不可守天下常規。凡內庭冗費、願委信臣、特加裁削、爲外庭倡。外庭冗費、責之大臣、更加裁削、爲天下倡。取裁削之數、專置一司、隨月椿收。然後詔天下監司郡邑各具常費、若交承迎送、增添俸給、賓客饋遺之屬、委漕臣裁損椿管、專爲收椿之用。行之三年、必有成效。後因登對、又取淳熙故事以進、其略謂、孝宗於椿幣流通之時、常出內帑金銀收之、爲今日計、亦不過漸收之而已。若歲收三百萬、十年亦三千萬。時朝廷以椿幣日輕爲憂、獻議者爭以新奇自售、公之持論獨如此。識者以爲不可易。轉對言、陛下即位之初、首重講讀、十有六年、未嘗厭倦、不知聖躬內省、亦有日新之益乎、觀理道亦有日新之效乎。羣臣兩對清光、陛下臨朝淵默、法天無言。今蒙收召、復望清光、而淵默無言猶昔。陛下臨朝不與羣臣言、退而

與言者何人邪。臣願開張聖聽、於經筵講讀、大臣奏對、反復問難、以求義理之當否、與政事之得失、則聖學進而治道隆矣。既又言、廟堂之上、每一官闕、躊躇四顧、有乏才之歎、其患在於取人之道未廣、用人之意未洪。願詔大臣體蕩蕩平平之義、惟賢是任、惟能是使、去好惡之私、絕黨偏之弊、則野無遺賢而庶績熙矣。旬外除提點浙西刑獄。大暑隆寒、巡按靡倦。歲薦惟才是予、至所舉劾、雖權要弗避也。有殺人而匿貴勢家者、吏不敢捕、公移文以索、曰、不出當聞諸朝、於是罪人斯得。其行部不以吏卒自隨、吏受民錢五百、亦付獄治罪。嚴陵有重囚久不決、公察其故、乃本司吏首受賕、俾緩其事、公立鯨之。夏出慮囚、往來臺治下、家以小喪聞、不一入視、聞者歎曰、眞監司矣。杭嚴水災、朝廷獨闕桐廬稅、而建德、淳安、富陽未被恩卹、公力言之、且乞量蠲夏賦。又論平江和羅之擾、常州諸縣科



買馬草之弊、勾蠲除之。召爲國子司業。始見諸生、首誨以立身行己爲先、毋顓意程試、汲汲利祿。進對言、治道原於士風、士風本於學術。古者司徒之職、典樂之官、今學官<sup>③</sup>之任也。周衰、孔子取先王之大經大法、與其徒誦而傳之、雜見於六經。自漢以來、雖曰崇儒、然漢儒之陋、訓詁益詳而義理益晦。故韓愈原道曰、軻之死、不得其傳、謂其精微之旨不傳也。藝祖皇帝於干戈甫定之餘、召處士王昭素講易禁中、累聖相承、以爲先務、治教休明、儒宗間出、然後六經遺旨、孔孟微言、復明於千載之後。天下學者誦而習之、以論語、孟子爲門、大學、中庸爲準、故其事父則孝、事君則忠、世之所謂道學者也。慶元以來、權佞當國、惡人議己、指道爲僞、屏其人、禁其書。十餘年間、學者無所依向、義利不明、趨向汙下、人欲橫流、廉恥日喪、望其既仕之後、職業修名節立、不可得也。乞降明詔、慶元以來名以僞

學而禁其書、指揮更不施行、息邪說、正人心、使學知本原、士風歸厚、實宗社之福。又言、舍法兼取行藝、今但考其藝而略其行、致學者自放於規繩之外。故侍講朱熹守南康日、於白鹿洞書院揭示學規、皆聖賢教人大旨、學者立身之要。謹錄以進、請頒下兩學、爲諸生齋規、與舊學規並行。齋規示以進修之方、學規正其不修之罪。從之。時有司檢會慶元章奏、將議施行、而執政有任言責時亦嘗論列者、事雖寢而太學諸生稍務以道義相勉、而知窮理居敬之說。初、公在廣東、嘗寓書今丞相史公言、昔先正魏王再相日、語呂郎中、石編修曰、某老矣、勉強再來、蓋事有未竟者、第一欲起朱元晦、次薦引諸賢。令二公先以書抵朱文公道此意、未幾除文公守南康、後又盡薦諸賢。今文公往矣、然其所著書天下誦之。願丞相更承先志、言於上、取其著大學、中庸、論、孟之說、以備勸講、正君定國、慰

天下學士大夫之心。蓋公在山陰時、聞其說於沈公煥如此、後在成均、遂以數書餞於胄監、俾學者誦習焉。兼國史院編修官、實錄院檢討官、充接伴金國賀正使。歸對言、淮東地博而腴、有陂澤水泉之利、而荒蕪者多。其民習於戰鬪、而安集者少。誠委州縣招誘散亡、立頃畝之限而授之田、濬溝洫以儲水、因可防戎馬驅突之患。給田器、貸種糧、爲室廬、使相保聚、什伍而教之。此管仲內政、宇文泰府兵遺法也。又條李泌復府兵、張全義在河南事上之。進國子祭酒、兼侍立修注官。數月、兼權兵部侍郎、改刑部。進對言、陛下臨朝、淵默無言、必謂大臣進呈不待咨度、群臣獻言當經中書。然講讀之際、則又不同、當款接以求多聞、問辯以求當理。今經筵所見、無異臨朝、講讀進退、姑備故事。雖聖性自得、默而識之、然臣願益廣聖心、少加咨訪。孝宗每對群臣、多所訪問、講讀之臣、多得聖語。間因內

宿、賜以面對、此陛下家法也。權刑部侍郎、兼祭酒。時朝廷用人、多以才選、公言、臯陶九德、乃知人之法而不及才、蓋才即德也。魯史克所謂八才、即臯陶所謂德者。後世離德而言才、以才取人、故名奉法者或至於殘民、善理財者不免於聚斂、能治獄者不免於深文。古今治少亂多、皆用才之弊也。兼太子左諭德、同修國史、實錄院同修撰。上疏曰、舜九官濟濟、和之至也。然孔子曰、君子和而不同、晏嬰曰、和與同異、蓋和者可否相濟、同者隨聲是非。近歲士大夫隨聲是非之患多、可否相濟之義少。其平居苟且、依違患失、則其言事必無犯顏逆耳之忠、臨難必無仗節死義之操。願詔大臣、獎忠讜以作士氣、戒諛佞以肅具僚。宗社幸甚。時廷臣爭務容默、有論事稍切者、衆輒指以爲異。故公言及之。十月、雷公請遴選監司、以察貪吏、求民瘼。又言、虜運已衰、我之邊鄙宜過慮者三、盜賊乘間、姦雄



崛起外夷猖獗是也。備之之策惟在得人。既選沿邊守臣、佐之者亦不可不擇。臣謂文臣如職曹官、武臣如兵馬都監之屬、宜使守臣察其不足仗者、易之。帥臣制司、寄任尤重、參佐謀議、或非其材、亦許辟改。庶謀慮有人、足支緩急。又乞申徹諸帥、各舉將才、帥守監司、亦得論薦、其說甚備。既又取歐陽修軍中求將之法上之、又言、中原雲擾、使命不通、或敗兵奔突、或流民來附、皆不容亡備。若民兵措置有法、則邊境守禦自安。蓋沿邊之民習不畏虜、少少結約、皆足自固。臣昨接伴虜使、至盱眙、見龜山二三百家獨不經兵火、問其父老、自言長於劫寨、虜兵畏之。因思彼纔二三百家、協力已足自固、況衆於龜山、又有官兵爲之援乎。願下邊郡條其事宜以聞。又取歐陽修論西北虜事以獻。曰、契丹爲元昊所敗、人皆以二虜拏兵爲喜、修獨憂其爲將來之患。蓋爲國者習安則人材難見、有事則

將帥自出、變驕心爲憤志、化惰卒爲精兵、則二虜交兵、乃虜之利、非我之福也。今夷虜相攻、戰爭方始、拏兵不解、強者爲雄、鄰有強國、非我憂乎。華亂未定、盜賊將起、姦雄乘之、我能獨安乎。戰敗之兵、衝突而南、兩淮單弱、何以待之。中原遺民、流徙而南、拒之不忍、容之又難、可無慮乎。然則固藩籬、選諸將、擇元帥、今日尤不可緩。同知七年貢舉、始公以文弊爲請、朝廷既施行之、至是多得老成重厚之士、物議稱允。集英策士、公援淳熙故事、請令後省或館學取進士、所陳切於利害者、類聚以聞、俾人知陛下不以空言取士。時虜酋以弑殞、韃師乘之、燕城被圍久、我之使人留境上、不得報。中原遺民日相帥南向。公言、高宗當夷虜方盛之時、勉從和議、後虜敗盟、欲增築邊城、竟牽和議而止。今虜運旣衰、信使不通、七八十年來僅得此機會。臣謂凡今極邊州郡之未城者、當城之、至於邊邑之可

控扼應援者、亦宜以時修築。又言、臣所謂未城之郡、盱眙是也。或曰、盱眙不必城、有急以天長、六合爲固、審爾是棄淮也。又濠梁、安豐雖頗有城、然可以禦盜而不可禦敵、謂宜增築、且創置樓櫓、大略如楚州、然後守備可固。既又取姚襄歸晉、侯景附梁、事以進、其略謂、金虜危亡爭立、或以款塞爲名、或遣使索幣、皆當有以應之。或其勢既分、各來索幣、亦當思所以答。或邊塵有警、將孰可用、財孰可取、城孰可守、守孰可固、凡此皆當豫圖、毋謂虜方多事、我得以自安也。未幾虜果移文對境、邀我正旦、生辰使者。公言、東晉至陳三百年間、雖經略區區、僅全吳楚、然未嘗求和於北、皆足自立。今地兼吳蜀、當虜滅亡之時、正我立國之日、竭民膏血以奉垂亡之虜、固不可、彼方據吾故都、尙遣使以賀、可乎。願移屯以壯邊勢、且責帥守預爲之防、使疆場有備、彼欲以虛言恐喝、不可得也。時中原旱饑、

遺民歸附日衆、邊臣處置失宜。公言、紹興間、僞豫遣兵犯漣水、韓世忠迎擊殪之、得脫者什一二。高宗諭之曰、淮北之民、皆吾赤子、可令埋瘞。御史周秘請還虜俘、復諭曰、朕痛念西北人民、進爲主帥所戮、退爲劉麟所殘、不幸至此、所獲餘虜、當給錢米遣之。高宗兼愛南北之民如此、烏乎仁哉。則彼之饑荒流離而無告者、固宜一視而同仁也。願詔邊臣、以祖逖、羊祜、陸遜爲法、使仁聲仁聞播於華夷。民心既歸、恢復在其中矣。除刑部侍郎、進言、河北方張之虜、山東崛起之盜、乘女真衰微、各謀吞併、我若復通女真、輸之歲幣、既失大國之體、彌啓取侮之端。彼二寇將曰、女真將亡、我猶事以幣帛、設若先以嫚書、因而求釁、邀我金幣、何以待之。況河朔創殘、河南饑饉、彼知淮甸豐稔、江浙殷富、垂涎妄動、其將若何。爲今之計、必得聲實兼全、使莫敢侮予而後可。所謂實者、建制司于淮上、移兵屯



於要地是也。所謂聲者、罷通賀女真之使是也。或謂遣使予幣、可使爲吾扞禦、此乃迎合之論。彼方奔竄不暇、何扞禦之足言。或謂使華不遣、恐啓兵端、此亦未之思耳。彼其肘腋之盜、尙不敢圖、尙敢爲我敵乎。使吾固守之計、不足以扞殘虜、異時方張之敵、崛起之盜、何以禦之。今縱不能如晉人焚幣、斬使、亦可誘以道路未通、幽都未返、遷延其詞以答之。況我已嘗遣使而彼不受、又嘗遣迓而彼不來、足以有辭矣。遷延年歲、我於其間亟修固守之實、則非惟示威於女真、又可以伐二寇之謀。尋又上疏、其略以爲、今虜酋奔竄、河北山東盜賊縱橫、韃人夏人攻擊未已。使遂滅亡、則中原雲擾、姦雄乘之、必若苻堅之時。萬一稍能自立、則狼子野心、必未可保。將若逆亮之時、皆可深慮。願深味孔子遠慮之言、力行仲舒勉強之說、與大臣圖之。又言、臣前建議置制司於兩淮之中、移屯兵於要害

之地、近聞使虜而歸者、亦獻此策。臣敢復詳言之。蓋今擇守繕城、募兵選將、雖皆備邊良畫、然窮邊之守、責其持久、全賴應援。置制司於兩淮之中、所以爲邊城之援也。議者必曰、兩淮重鎮、各有帥臣、復建一司、責任不專。臣謂合肥雖淮西重鎮、然地在極邊、可以自守而不能援他郡。維揚雖淮東重鎮、然地在江北、可蔽南徐而不能援邊陲。無援而責以死守、此巡、遠之所以敗也。議者謂金陵已建制司、江北不可復建。臣謂金陵所以制沿江、兩淮所以制沿淮、責各有歸、則緩急可恃。且兩淮之地、歷陽居中、內蔽采石、外接淮堧。若頗建一司、惟此地爲宜。使兼轉輓、則兩漕可省。併領和州、則兵民可一。置營寨、立倉儲、徙沿江諸軍三萬人以隸之、無事則按閱如都統之法、有事則調發以援邊城之急。兩淮利害、一切使之商榷廢置、朝廷委任而責成之、可無北顧憂矣。時江上諸將多以微文細

故坐黜。雖嘗有功邊鄙者、或不免吏議。公取曾鞏政論、言藝祖置將皆富之以財、其說曰、待武吏與待文吏不同、文吏取以廉恥、責以廉恥。武吏取以材能、責以材能。文吏任州縣、以節用愛人爲先。武吏任將帥、以醲賞得士爲先。我藝祖任將之道、可爲法。將帥在邊、欲其間諜精明、士卒用命、非財不可、顧可使之嗇於財乎。臣願一以太祖爲法。四月旱、有詔求言、公上疏曰、臣聞知之非艱、行之惟艱。陛下更化之初、嘗下求言之詔、而深慮遠謀、忠言鯁論、未嘗施行。所行者目前之細故。近歲以來、星變日蝕、冬雷、皆可畏之變也。今農事方殷、旱旣太甚、天變見於上、人情動於下、雖因邇臣之請降詔求言、臣不知陛下誠意在於聞闕失而正厥事、抑用人言以應故事乎。若徇人言、應故事、則天固不可欺也。不正厥事、人可欺乎。天下之事、當與天下共之、不可以一人私之、事之是非、至於義理而

止。臣願陛下與二三大臣、至公無我、躬攬中外書疏、付之給舍、俾條上所當行者、講究而施行之、則人心悅而天意解矣。已而不雨、至于八月、公言、禮記年不順成、天子素服素車、食無樂。又曰、至于八月不雨、君不舉。謂宜下詔、罷今年瑞慶節、賜宴、示懼災憂民之意、且以爲謝絕虜使之名。事雖不行、時論譴之。權工部尙書、兼太子右庶子、仍兼左諭德。初、公旣與宮僚、即勾免祭酒、請專意輔導。嘗取文公所釋論、孟等書以獻曰、此講學之要也。苟明乎此、則他可迎刃而解矣。公於講說、不爲文采、至其切於修身、正家、治國、平天下之道、必反復開陳之。嘗進哲宗避蟻故事曰、避蟻宮中事也、而外庭無不知。詩曰、鼓鐘于宮、聲聞于外。聖人修德、不以隱顯二其心。後世人君、謂宮庭燕私之間、舉動不謹、人不得見、言語不擇、人不得聞、而不知無隱不彰、載之信史者、雖床第之言、無不書也。故中庸曰



莫見乎隱、莫顯乎微。君子謹其獨。講易天行健章。則曰：天之所以健者，其體陽，其德剛也。君子觀其象，則當自強不息。然一屈於物欲，則不能剛。故孔子曰：「振也慾，焉得剛。」蓋剛能進德，慾能喪德。二者相爲消長，而況富有四海，聲色貨利易動其心，便辟側媚求中其慾，一屈於慾，則私意橫生，理爲慾奪，又焉得剛。所貴於自強不息者，蓋有一息閒斷，則物欲乘隙而投之，雖有志氣不能自爲主宰，安能法天之健乎。講孟子養心章，則曰：「心者神明之舍，所以酬酢庶事，經緯萬方者也。常操而存之，然後定而能應。」易曰：「寂然不動，感而遂通天下之故，是也。」操而存之，何所用其力哉。去其爲心害者而已。雖物欲爲害之時，亦豈無仁義之心，特牽於欲而不自覺。故曰：「養心莫善於寡欲。」多欲則欲爲主，寡欲則心爲主。然人有形色，即有欲，非可絕也。口之於味，目之於色，耳之於聲，鼻之於臭，四肢之於

安佚，無非欲也。惟君子之欲，有則而不過，則心常爲之主。此舜禹所以有天下而不與焉也。至仁宗講損卦懲忿窒慾，則曰：「人之接物，易以忿害物。人之處身，易以慾害身。七情之中，其難制者，忿慾爲甚。人能於忿怒之時，稍息其怒而觀理之是非，則不至於害物矣。人能於嗜慾動時，靜而止之，思害身之可畏，則不至於害身矣。」仁宗曰：「人之情欲皆出於陰陽，而損之在人，是正得損之道也。」至講詩終篇，則又進說曰：「詩三百篇，周南后妃之德，先王修身正家之效也。召南夫人之德，諸侯修身正家之效也。先王之身修，故后妃化之而無險詖私謁之心。諸侯之身修，故夫人化之而能循法度。推之國而國治，推之天下而天下平。下逮國風之變，在衛則綠衣、燕燕之詩，作凱風、谷風之刺，興至于牆茨、桑中之醜，則其亂也，未嘗不起於閨門衽席間。詩所以首二南者，豈非求諸己而後求諸人，治其



內而後治其外哉。故周之興也以太妣其衰也以  
豔妻。讀詩者可以鑑矣。孔子曰。詩三百。一言以蔽  
之。曰思無邪。此又讀詩之要也。先正其心而無邪  
思。則以之讀詩。古人是非得失了然目前。知所以  
爲法戒矣。公每講讀。至經史所陳聲色嗜慾之戒。  
輒懇切再三。及是敷陳尤切。嗚呼。倘天假之年。使  
終任輔翊之責。其所以成就儲德者。顧可量也哉。  
公既遷宮庶。不復與講。東宮特請于上。俾公仍兼  
講。公以年過七十。屢請謝不獲。自是章凡二十上。  
而拜不允之詔七。至引趙抃留歐陽修等事以諭。  
公比疾。又懇祈。卒不獲命。公雖疾。猶勉輔導不  
怠。故疾間復作。遂不起。享年七十有三。積階太中  
大夫。爵建陽縣開國子。食邑五百戶。以通奉大夫  
致仕。遺表聞。贈賻如式。公爲人簡質端重。而天性  
孝友尤篤。少習家訓。長得明師。又見四方前修鉅  
儒。如南軒張宣公。東萊呂成公。皆與往復講論。其

學以不欺爲主。其接物夷易。溫然可親。然欲干以  
私者。皆莫敢出口。與人言。心平氣和。語簡而當。聽  
者心服。稱人之善。無溢美。其惡惡亦無深疾。每病  
學者空談無實。嘗爲天台學四先生祠記。曰。學者  
當窮理以致其知。反躬以踐其實。若趨其名以爲  
高。入耳而出乎口。皆四先生之罪人也。蓋其平生  
所素戒在此。故時方歆慕道學。公欲然無所喜。及  
以僞學而禁。公亦泰然無所懼。居家儉約。雖已貴  
如初仕。每曰。先人家法。不敢過也。仲氏炳。擢戊戌  
第。與公接武登朝。叔季子姪。相繼收儒科。或聯貢  
于鄉。建人語家學之盛。必曰劉氏云。公調內外屬  
人之貧。終始不少倦。幼而孤者。男則教之學。女則  
擇所歸。歲饑。輒發粟平價以濟鄉里。其接引後進。  
所以勸諭開譬者。備至。當官取予。一介不妄。安於  
義命。未嘗輕求人知。爲政以風化爲重。尤惡異教  
害俗。在番陽日。泉使憫遺骸不揜。議欲葬之水火。

公言人死魂升魄降、形氣各返其初、西方法非是、使死者有知、禍亦酷矣。每夜斂衽默坐、虛心省察、常曰不於定靜時體察、則應事接物或至有差。嘗取節孝徐先生帖教子弟、其言曰、日入之後、至於夜中、事物俱靜、志氣俱定、是君子思慮經綸之時、晝之所行、夜之所思也。其事君以不欺爲忠、至爲侍從、知無不言、言無不盡。薦賢舉善、不進不止。然其人皆莫之知。平生論著、有奏議、史藁、經筵故事、東宮詩解、禮記解、講堂故事若干卷、雲莊外藁若干卷、藏于家。夫人李氏、武節郎晉明之女、奉議郎宗思之妹、先公八年卒、贈碩人。子瑩、今爲奉議郎、知建康府江寧縣事。女三人、陳擇、詹樞、袁宜中其壻也。孫男一人、欽、宣義郎、監福州嶺口監倉。孫女一人、適太學生江淵、先六年卒。曾孫男一人、尙幼。其孤以十年十月庚戌葬公於邵武軍邵武縣仁澤鄉桂林之原。銘曰、

聖學失傳、天啓濂洛。有開斯人、如寢之覺。吾道之南、世有宗工。集厥大成、則惟文公。公生同時、而又同里。少登師門、以迄莫齒。孰疑弗剖、孰蔽弗祛。晝講夜思、歲充月餘。發而施之、或言或事。惟正是繇、毋或有二。曰此文公、實以教予。厥臨孔威、其忍畔諸。遂登禁途、遂傳儲極。惟一其心、以輔以翼。直辭婉賦、杜漸防微。思公之忠、可爲涕洟。蠹茲孽曾、逃奔如鼠。狃于虛僞、猶索我賂。衆謂可與、公曰不然。願輟金縢、移以實邊。新狄鴟張、群雄蠭起。擾擾中原、如鼎斯沸。衆謂無虞、公獨深憂。願飭邊臣、固圉是謀。必重制垣、必徙<sup>⑤</sup>兵戍。必絕虜交、聲實乃副。公沒幾時、羽檄四馳。疇昔之言、亶猶著龜。天子念公、嘉名是錫。其義維何、曰正曰直。文公之門、今存者誰。不負所學、如公其幾。瞻彼桂林、有苑其麓。我銘匪誣、千載可復。

真德秀撰 正德本《西山先生真文忠公文集》卷四一



校記

①而：原缺，據四庫本《水心集》補。

②辭：原作「詞」，據四庫本《西山文集》改。

③學官：原作「樂官」，據右引改。

④財：原作「才」，據右引改。

⑤徙：原作「徒」，據《雲莊集》附錄此文改。

宋儒碑傳集卷一百五十九

林淵叔 徐誼 彭欽 吳葵 袁標

張宗說 陳峴 喬拱 林鼎

林懿仲墓誌銘

昔者吾黨欲相與言、於郡則之鄭景元氏、於邑則之林懿仲氏。今亡矣、余故哭景元不勝哀、銘懿仲亦不知哀涕之出也。懿仲諱淵叔、承事郎文質之子、起家致貲累鉅萬、而急教子。長頤叔、字正仲、登乾道二年進士第。懿仲登淳熙十一年進士第、而林氏遂爲儒門。懿仲自城南書社從余學、或之他、則亦憮旁舍不去。後二十餘年、非余宦游時不可相就、必其有故不能相就也。間嘗虛所居室東偏江月樓之下、集其疇人、以待余卒業。吾州俗尊重師友、前一輩盡學緒幾墜。比懿仲二三子修故事、後一輩趨和之、而復知有師。待星子主簿闕、即不專習舉子一經、日自爲程、以若干晷課某經、又若

干晷課某史、而後誦楚詞、晉宋間人詩、於詩、禮、周官家掇取其說、間出己意、往往與經意合。蓋晚而後詩浸工。懿仲才辨治能處事、但以其才自見、宜宦達有聲譽。況務學善、不矜衒、善褒諱人短長、與之者衆、宜益顯。況其學未止乎。而以慶元元年九月壬辰卒於揚州司戶、年五十有二。嗟乎、於是銘余不特爲邑人惜也。娶陳氏、子四人、子習、子着、子潛、子簡。一女、適陳益崇。孫男一人。子習以二十一年十月癸丑葬于林岱山、來乞銘。余嘗爲其母夫人朱氏得銘於今煥章閣待制廬陵楊公萬里、叙其世已詳。銘曰、

合也者離也、成也者虧也。必嘗以爲慊、則必嘗以爲悲也。孰全以歸、蘊而弗施也。於吾子何嗟、嗟哉時也。

陳傅良撰 《止齋先生文集》卷四九

寶謨閣待制知隆興府徐公墓誌銘



公諱誼字子宜一字宏父溫州人有徐寅者相王審知寅之孫薄其官遜於平陽自號處士寅以上無世次而處士廟於沙岡爲別祖公二大父仲熙世充考迪哲皆以惠愛稱今江南石馬頭百間其所爲也公貴贈迪哲奉直大夫公登乾道八年進士第教授池州江浙後進負擔來學宰相曰當爲太學得師除博士遷樞密院編修官太常丞天子親政久威柄積上臣下多皇恐顧望事惟奉旨而行公諫曰若是則人主曰聖人臣曰愚陛下誰與共功上色莊改論樂制公對宮亂則荒其君驕商亂則陂其官壞上遽和容受規徐曰卿可謂不以官自惰矣丁奉直憂知徽州光宗內禪公奏三代聖王有至誠而無權術至誠不息則可以達天德矣願陛下守而勿失宰相邀公留公謝曰某方欲勸公去奈何歙縣上妻殺夫以五歲女爲證公疑曰婦人能以一搥致人死乎緩之未覆也旣而實

稅於庭死民母及弟在焉乃言我子欠租繫久不勝飢大叫役者批之墮水亶耳宿昔死矣然後保正伏罪併劾受賕吏闔州感動所謂實稅者婺源戶餘三萬而逃絕六千其新安還朱鄉戶稅役十無二三公始令民以干照造簿自實其稅應者蟻集婺源諸大豪不喜謗於朝移提舉浙西公請訖籍而行不聽公在徽常單行入村落除其賦萬緡山谷叟老具鼓笛侑酒送公泣而別過朝疏兵民十二事持不下留丞相請付外上悉鉤摘要語多施行者時方拜右丞相將引公自助延納甚密公曰上聖質寬平相公宜匪躬協贊若意向有偏禍不旋踵揖而起浙西水利尤重公論其切於時者曰昔下流不疏而水上溢故鑿直曲港還三江故道開宜興百瀆所以順導下流也惟高亢田徑乃瀦堰之爾昔之言水如單鍰邾亶皆是也今開吳松江下流與宜興瀆屬之海者無慮數十百所異

時浦港磬折以趨海、今近浦之民、多取徑直決。蘇湖常秀、舊爲澤國、比年雨或後至、種且不入、蓋圍田衆而疏導多也。小人見利、不畏其害。圍於淺水、旣爲高田、圍於茭蕩、旣爲稻田。二俱不已、復有下腳。始之重陂、大半爲土。始之良田、背水自曬。十日不雨、農廢作業。然且承用舊說、又將疏之、失利害之實矣。故舊田溝澮當濬治、圍田下腳無輒開、已開未填當捺合。今之言水者、能行是三說、則高原舊田還爲衍沃、而農不病矣。入爲吏部郎、遷右司左司。今上即位、遷檢正中書門下公事、兼權刑部侍郎。歲不熟、半天下、宰相以命公。吏或夜半攜乞米奏至、歛起擁被、燭其重輕量分數應之。報下、未嘗失時刻。進權工部侍郎、知臨安府。公歎曰、京師彈壓如傳餐耳、況應辦手掬食也、首善何所仰。請於上曰、今鰥寡孤獨、夜宿煖堂、寒苦而餽錢無所得。臣欲度都門外爲入居養院、費大不給。內帑皆

三朝恭儉之積、陛下幸圖之。上蹙然曰、卿言是也。賜貫餘四萬。即相地市木。會有御史劉德秀疏、罷慶元元年三月也。胡紘再疏、責副團置南安軍、移袁婺州。嘉泰元年六月、始聽自便。久之、復朝散大夫、提舉崇道觀。二年、王師北出、以公知江州。辭不獲、與子渾杖策赴郡。虜數道迎拒、兵壓江漢。姦民乘隙謀亂、訛言相恐。公捕誅首惡、字其餓羸、恩接賓旅。募人於浙東、部分練習。燒壑築城、創輕舫船、往來捷疾。由夏口而下、依公爲強。虜旣去、朝廷是公所爲、除集英殿修撰。尋待制寶謨閣、知建康府、兼制置江淮。初、虜圍廬、楚不下而歸、猶綴濠州以待和。時抄劫、與我師遇、殺傷相當。淮人大驚、復迸流江南。在建康者數十萬、皆曰虜再至矣。公晝夜拊循、益備禦、請專扞敵、勿從中御。朝廷疑於和戎弗利、亟移知隆興府。黑風猺羅孟傳與其叔羅時忿爭讎殺、湖南抑孟傳而右時。孟傳怒、殺飛虎





親兵以叛、禍連江西、吉、贛四州勞於戍守。孟傳因土豪以情懇公、且乞降、公爲列上曰、受降非臣事也、顧大計宜聽。詔許從江西降、而公已病。旣而賞及兩路、公不預也。嘉定元年、有星隕州之南、明日七月朔而公卒、年六十五。二年十一月朔葬於鳴山。夫人宋氏、先公卒。二子、冲迪、功郎。渾、將仕郎。長女嫁西外宗教林士遜、次進士章學禮、幼未行也。公少而異質、自然合道。天下雖爭爲性命之學、然而滯痼於語言、播流於偏末、多茫昧影響而已。及公以悟爲宗、縣解昭徹、近取日用之內、爲學者開示。修證所緣、至於形廢心死、神視氣聽、如靜中震霆、冥外朗日、無不洗然自以爲有得也。前後執政以國事訪公者、告之必盡。初、光宗疾、免到重華、而日視朝、毋改、中外交章論切。公旣入諫、退見宰相、淚落曰、上慰納從容、然目瞪不瞬、而意恍惚、眞病也已。盍爲詔四方禱祠郊廟、進皇子嘉王參決、留

丞相未及用、跳之徐村、上使公諭還浙江亭、復其位。疾終不愈。孝宗崩、又不能喪、公與少保吳玕議、請太皇太后臨朝、扶嘉王代祭、答羣臣禮、幕士取簾幃俟命、后自祭奠、乃止。於是將禪、上臨喪未可知也。公憂憤嘔泄卧、責趙丞相曰、自古人臣爲忠則忠、爲姦則姦。忠姦雜而能濟者、未之有也。公內雖心惕、外欲坐觀、非雜之類歟。國家存亡、在茲一舉。趙公問策安在、公以知閣門事蔡必勝授之、使同爲知閣。韓侂胄固請於太皇太后。禪之旦、嘉王竟立。嗚呼、當是時、謗讟橫流、而天下之口不可遏矣。微公定計、將使一夫攘袂而趨、然則社稷永安而宗廟常尊、澤施於今者、公之大節不可掩也。余觀公忠利慘怛、能任大事、視人如己、本無以取嫉於世、而世亦無忌公者。獨侂胄旣得志、則驕肆、公面誨之、慚恨、故得禍最酷、流落十年不復用。銘曰、古之聞道、以身爲言。開乾闥坤、圓方各旋。後之聞

道以言爲身。因其已行、筆舌之陳。人實不弘、狹而易安。公胡早悟、嬰此百難。紹熙訢訢、天作閔凶。舉世驚哀、莫敢弭鋒。公初何營、裂肝碎腦。公後何成。宗國是保。彼譖人者、不祀忽譖。昇爾枕席、詒我泥塗。生不求榮、死不求諡。人臣之義、惟以自致。鳴山高高、終風續濤。爰居時來、助其永號。

嘉定八年三月□日。

葉適撰 《水心文集》卷二一

朝散郎主管華州雲臺觀彭侯墓誌銘

共惟乾、淳之盛、封殖士氣、積而至于紹熙之季、異材輩出。時惟吏部侍郎忠肅彭公、以正學直道羽儀禁列。孽韓柄國、趨和者立致通顯、公見上辯遏堅懇、既又拜疏極言其姦。雖繇是挫摑不復信、而風烈言言、垂芳簡冊。清江彭氏遂爲江右名家。忠肅之祖愈、不仕。父文通、贈朝奉大夫。忠肅之元配敖氏、贈信安郡夫人。繼趙氏、贈新安。生三子男、其

冢子即侯也、名欽、字仲恭、一字仲敬。以父任爲承務郎、監興化軍莆田縣涵頭鹽倉。忠肅作初筮箴勉之、其目曰處事必公、舉職必勤、御史以正、撫民以仁、誠以事大、和以接人、唯儉與廉、治家及身。公受命如將、弗勝、凡職所當問、如覈登耗、時出納、檢姦盜、戢譟辭、訪求宿敝、敬恭夙夜。先是以稅戶運鹽、歲十三運、運獻白金十二兩、凡鹽丁出入、謾不敢孰何、侯立罷之、而憲禁于衢。又移書轉運司、極陳收耗鹽、減腳費及上官敷配亭戶、強市海物之弊、使者皆行其言、且以廉謹是褒。前執政鄭公僑亦聞而舉之、知武陵縣、以新制改差僉書荆門軍判官。未上而忠肅薨。嘉定元年四月、翰林學士樓公鑰上忠肅奏藁、乞加命襚、錄用子孫、詔與侯陞擢差遣。十一月、差主管湖北安撫司機宜文字。十二月、詔與寺監簿差遣、尋除太府寺主簿、改大理寺、以新安卒皆不及拜。四年三月、除軍器監主簿。



儒藏

五年八月輪對、其略曰、人才者治功之本、學術者人才之本。今貪冒奔競、欺罔苟且、爲害極矣。古人幼學壯行、本諸仁義忠信。後世專以科目取士、所學非所行、所行非所學。宜明示好惡、風厲四方、時於科舉之外、表顯實行以激昂之。其次論兵器不中度、宜程工時材、勒年名以詔賞罰。遂上忠肅事潛邸事初政日所得上語、參以事實、名聖德記、詔付史館。初、忠肅輯祖宗家法爲書、名內治聖監、紹熙四年上之。至是東宮官欲得之、疑有觸忌諱、摘數條謂公削之。公持不可而歸諸策府。請外、添差通判嘉興府。滿二歲、移通判潭州。所至方伯監司表其廉平。歲孟夏、上降祝冊、遣吏祠衡岳、侯爲定祭式、勒石齋廬。今用之十三年。京西制置使趙公方白時宰、謂侯有實才。十月、差知峽州、節縮浮費、廣糴豐儲爲緩急備。又以州控上游、練軍實、葺寨柵、閱鄉卒、寨置甲乙曆往來、因以譏伺間諜。戮強

盜五人、境內肅清。社稷壇久圯、寓祝亭驛。侯命樹封如儀。且謂社不宜僅視小祀、建乞下禮官議崇祀典。州臨大江、使客上下、賈人馮依避征。侯曰、是郡計所賴、吐剛茹柔、非吾志也。繇是有以飛語中傷者。長陽令久闕、前後辟置者不旬月輒以計去。侯嘗言上、請善去者得命秩、或減舉員、以勸願仕。會又有挾印出境者、公白諸臺正其罪、而帥閹劾侯罷去。侯居郡秋毫無妄費、去之日視始至增緡錢萬、廩給未入者千。帑人白郡貳、以廩給歸公、公以爲校官養才與貢士續食之助。侯旣去、部使者冤之、乃與劾郡僚以直前謾。侯亦未嘗幾微見詞色也。十七年、差主管華州雲臺觀。紹定元年再任。五月己卯以疾卒、年六十有五。嗚呼、祖宗豐芑之積、山川神氣之會、是生忠肅、而權燄所扼、弗盡用以遺侯。侯以生長見聞、修身刑家、使推其所挾得施於時、必有以異乎人、而僅行於職業之間、又不



合以退。士不遇則亦已矣。所惜者非才也。時也。侯

嘗采前言往行。目曰澹齋自鏡。又取切於宦學者。

曰愛蓮堂官箴。又書坐右曰。懲忿如摧山。窒慾如

填壑。遷善如風之速。改過如雷之烈。其自律之嚴

如此。至於忠肅遺文。奏藁家訓。聖德記。訓蒙。哀梓

刊。殽靡所失墜。友愛二弟。官其從子之孤者。字而

教之。凡皆人道之當然。而侯油然而發衷。華皓不渝。

元配同郡強氏。先十八年卒。繼室豐城孫氏。先一

年卒。贈封皆安人。男子一<sup>②</sup>人。滋以祖任爲將仕郎。

女子二人。長適文林郎。黃州軍事判官趙括夫。次

適從事郎。新威武軍節度推官李義山。先是孫安

人葬郡之西山。前直三橋。襟抱平衍。公嘗有樂哉

斯丘之嘆。卒後數月得之。滋乃卜十二月庚申。奉

侯之喪窆焉。以義山之狀求銘。銘曰。

烈烈名卿。蹈義秉方。責名揭日。帝用不臧。謂帝不

臧。而世其良。于何其臧。亦罔克長。皓皓易污。物理

之常。莫榮無愧。不遇奚傷。

魏了翁撰 《重校鶴山先生大全文集》卷七四

修職郎監和劑局吳君墓誌銘

郭氏父子興於學。余記述已詳。同時吳君文炳學  
尤壯。給費廣。蘭溪徐畸字叔範。弓兩斛。力射命中。  
文得歐。曾筆外法。莫有知者。吳君獨備禮。請主學。  
趣諸子敬事。畸由此顯名。金華唐仲友。字與正。博  
學宏詞。著作郎。知台州。江西提刑。吳君亦盡禮請。  
一旦挈生員百餘。應聘至。遠近驚愕。不意其爲吳  
君屈也。悲夫。士亦何常哉。易曰。虎視眈眈。其欲逐  
逐。無咎。世有能操養士之柄。而恣其衣食之求。則  
威望自尊。而士靡靡從之。何咎之有。君名葵。字景  
陽。文炳長子。自曾祖臻。祖杲。雄於東陽。君旣以學  
佐其父。所講必儒術。所行必善意。儔經彙史。豪俗  
痛改。外弟傅寅。字同叔。博通古書。特有隱趣。君嚴  
事如師。遜愛如兄。多出資用。紀理其家。相與終身。

不失尺寸。淳熙大荒札，匝其居數十里，養生喪死，廩無留陳。補歙縣西尉，通山簿尉。建炎後，尉無公署，訪遺址，發私錢更造，益募兵，教軍律如素熟。民逋負，縲於縣廡，復以私錢貸輸，曰：「後勿爾。」皆驩呼聽命。攝大冶縣，慕其德聲，不言而化。差監和劑局，歎曰：「吾本無進心，前十年僅免盜亡匿，今又十年，當嘉定丁丑，七十三矣，方欲辦藥良苦，奈何！」其長亦陰爲所親地，故使食祠廟祿，買地孤山下，將遂留止，有寒疾而歸。九月某日，族人並集，扶牀徧視，曰：「珍重。」乃瞑。初，君愛水白潭之原，曰：「以是葬我。」後四年正月某日，竟掩棺焉。娶陸氏、宗氏。子敬子、魯子。婿陳猷、陳桂、曹弼、湯康年。鄂州教授胡似、孫興慶、嘉慶。君之父，智能知徐，力能致唐，宜銘也。君能厚於傳，樂成其名，宜銘也。君好善而喜遊，意有不適，短棹獨往，一覽數州。余仕江淮間，君輒來握手，匆匆飯數匕徑去，問其所爲，笑而不答。然則非游

也。其中有所存，不偶於世而寄焉爾。銘曰：

以財活人，以儒活身。謂仁不富，虎也。妄云：山樵水漁，耕道獵德。視余此銘，仁者之獲。

嘉定十五年正月□日。

葉適撰 《水心文集》卷二五

### 亡弟木叔墓誌銘

嘉定六年九月丙午，余弟木叔卒于樂平之官舍。將終，謂其子向曰：「吾無他憾，獨恨不及見吾兄爾。」哀哉！余尙忍聞之。亟遣子肅往，偕向護喪歸葬。向求銘，余痛傷不能爲，又念不可無述，乃叙而銘之。木叔名樛，慶元鄞人。自高大父光祿公以儒學起家，袁氏始大。曾祖諱某，左朝議大夫、尙書倉部郎中。祖諱某，考諱某，俱朝奉郎，妣令人戴氏。木叔天資穎悟，年十四五時，已知景慕前修。清敏豐公嘗有詩云：「日來月往無成期，好把心源蚤夜思。」木叔大書之壁，以自規警。長益奮發，究心羣書，不專治



舉子業。持身惟謹、事親愉色婉容。與余處、怡怡無間、而切偲兼之。嘗作論語說、有所未合、余告之曰、儒者能解釋此經、始見學問功夫。木叔自是研求奧旨、日有新益、味虞夏商周書、有所感發、曰、吾道固如是。讀莊子曰、是有傲心、非所敢知也。余尉江陰、秩滿、有旨陞擢、而遲之數月、木叔曰、是豈可復俟。力贊之決、余感其言、亟求制屬、木叔之識高矣。兩上禮部、退而授徒里中、桀黠端嚴、私淑者衆、門人相繼決科、而師猶未第、晏如也。敝廬倚脩竹、因以爲名、求古人草廬之趣、以累舉特恩、授迪功郎、蘄州黃梅縣尉。將之官、會邊隙漸開、退儒者多易闕內地、木叔勇不顧、挈其婦子以往、時開禧二年冬也。莅職纔月餘、旁郡被兵、邑人驚擾、木叔以身任之、曰、朝廷張官置吏、正爲今日。閱弓兵、治器械、無日不修守禦之備。或曰、事急矣、寄孥彭澤、儻可以逃難。木叔又不許。厥婦亦曰、即有緩急、共死于

此。聞者俱壯之。先是、尉廨將壓、鄰有宗子森夫者、請易以他地、宰許之矣。木叔至、毅然曰、是官舍也、若他屬、奈公論何。不果易。于是葺治之、而又創營房、置軍器庫。舍北有鳳臺、築亭其上、名曰覽輝、宣獻樓公爲賦詩焉。歲大祲、捐俸爲粥、以活饑民、郡委之賑濟。異時、官吏足跡不到處、皆計口給食。羅田有疑獄、久不決、被郡檄鞠之、專精致思、默與理會、具得其實、吏民神之。守大喜、亟移爲錄參、以自近。每事咨焉。再調饒州樂平縣丞、郡以前任人曠職、留不遣、而督其逋負甚急。木叔請代之償、許之。嚴于束吏、而寬其民、旣償宿負、復有餘財、不假鞭箠而辦。邑長不幸卒、木叔攝焉。未幾亦病、切于爲民、強起從事、遂不可爲。卒之前一日、生辰也、整冠對客、酬酢無倦容。將易簀、猶正身危坐、招同僚與之訣、語琅琅不亂。壽六十有四、累以恩賞進承直郎。病益侵、致其仕、轉宣教郎。明年二月丙申、葬于

縣之翔鳳鄉滄門里鍾保嶼之原。娶林氏。子三人。今惟向在。四女。長適進士陳定。次適保義郎新監信州在城酒稅曹慙。次適進士李師說。次幼亡。木叔才器不羣。而強于爲善。執親喪。寢處不離服舍。丘壠之念。終身不暫忘。奉己儉。居官廉。未嘗敢妄取。見人有侈費而苟求者。每曰。吾寧以儉嗇貽譏。不欲以輕財邀譽。潔白自將。始終不變。而于義甚急。故交有貧病而死者。爲辦其喪葬。而經紀其家。斯心豈獨爲一身計哉。屬辭勁健。有筆力。年踰五十不衰。策名之後。復偕漕計。詩語尤工新。字畫亦清道可愛。喜交賢士大夫。游君誠之。呂君子約官于吾鄉。木叔時請益焉。講切精當。共圖不朽。其中未可量也。而止于此。交游且深惜之。況同氣之親乎。誠可痛也。銘曰。是爲吾弟之藏。匪爲吾弟抑友之良。失此三益。我心悲傷。曷其可忘。

袁燮撰 《絜齋集》卷二〇

歸州推官承奉郎致仕張君墓誌銘

君諱宗說。字巖夫。系出東漢平子。其後南徙。居廣信郡。子孫散入閩嶺。五代初。唐州長史。父追贈補闕。生五子。長保寅。次靄。官至左司員外郎。今居于崇安縣之白石山前者。皆保寅之裔。曾大父德運。行成名立。學者稱爲白石先生。語在建安郡乘。大父稟。不仕。父璋。以累舉恩得官。初尉池之石埭。轉丞邵武之建寧。循從事郎。即所居官。致其事。改承奉郎。母高氏。同縣將村人。故武經大夫某之女。繼母江氏。建陽北樂人。故通判某州杞之女。君刻志勵行。尤善事繼母。未冠舉于鄉。遊朱文公先生之門。得爲學之要。聳善扶誼。厚親睦鄰。邦人愛重之。紹熙五年。有盜焚掠里閭。由西而東。盡君之鄉境而返。後五年復作。自東而西。亦及境而返。咸曰。此善人也。謹毋犯。鄉鄰旣賴以免。乃因人情倡爲義。





甲一家有警則甲衆畢集盜以屏息。光宗踐祚君以累舉恩授官。時朱文公以忤權貴人免官君率僚友逆諸武夷會于精舍君語及時事感憤激烈。文公喟然曰巖夫真可與語。爲張飲盡歡書樂府一闕命同志歌之且題名以識歲月今石刻猶存。初調江州湖口尉屬開禧北征縣當孔道師費百出君董餉役檢吏姦民以不擾授歸州推官當上即追惟考志亦致其事改承務郎後二十年今上嗣位以恩轉承奉郎自號玉峰逸老恬於寵利無聲色之奉家事授之二子唯詩書自娛樂道人之善而略其過建豐爲富沙之名鄉君刑善于里人尊哲艾禮名勝振貧乏字幼孤而一門之內父慈子孝兄友弟恭故仁遜之風興焉以寶慶三年四月壬辰卒十月己酉葬于崇安縣仁義鄉嵐頭蘆山之下其子壻江叔文狀其行求文以識諸竊余惟士之進退去就亦惟反諸心而慊考諸義而協

所謂七十而致仕者特約爲之制耳。若樂行憂違翔集色舉固不是之計也。夫使載高位食厚祿則大將行其道次將行其言非容容爲祿仕計也。猶未免乎祿仕也則辭尊而居卑辭富而居貧免死而已矣。若上焉不能以有行也下焉不出於爲貧也禮際未善也陳力不能也有一于是而託尊富以爲祿仕假民社以自豐殖其於義也何居。有如張君老不待年令德表裏純名始終吾故喜聞而樂書之。取同縣胡氏文定公之族也。生二男子椿年南劍州將樂縣主簿。椿年與鄉舉女二人江叔文即長壻也。今爲承議郎知靖州永平縣擢通判靖州。次適昭武黃順之故儒林郎總領湖廣京西財賦所幹辦公事。孫男五人時燁時輝時焯時燾時燿。孫女四人長適江維寧次適江鏐舉寶慶二年進士第調撫州宜黃縣尉即叔文之冢子也。餘未嫁外孫男子六人曾孫男女二人。銘曰

物競而獨止、人涉而卬不。精蘊而神內守、志彊而氣亦至。二十年閒退之味、八十三康寧之歲。與其徇物以喪己、嘆老而嗟卑也。

魏了翁撰 《重校鶴山先生大全文集》卷八〇

顯謨閣待制致仕贈宣奉大夫陳公墓誌

銘

開禧改元之初年、韓侂冑將啓兵端、則欲用其親吏蘇師旦者爲節度使、密諭詞臣使草制。時中書舍人陳公峴兼直學士院、語人曰、節鉞以待將臣之功高者、師旦何人、可辱斯授。必以此見命、吾有去而已。未幾、中貴人有以特旨躡遷遙郡者、公復論之。中貴人者、侂冑之所主也。御史探權臣意、遂假駁死獄事、劾公、以免。方是時、侂冑權震中外、鼻息所嚮、誰敢違者、而公秉持直道不少顧、卒以去國。士論高之。或問公與熙寧三舍人之事孰難、曰、李定之除、公朝顯行之令也。師旦之命、權臣密諭

之指也。方熙寧初、王安石雖用事、然詔令猶付之有司、故三舍人得以職爭之、其爲力也易。至侂冑有所欲爲、則陰使人諭以意指、一有違忤、則假他罪逐之、不使得以守職言事去也。故在公拒之爲難。公字壽南、世家溫之平陽、後徙於郡城。曾大考懿、通直郎致事。大考桷、事高宗爲禮部侍郎、終秘閣修撰、再世皆贈銀青光祿大夫。考汝賢、朝請大夫、知達州、贈通奉大夫。公以大考遺澤補官、調邵武南尉、獲彊盜如格、不受賞。再調潮州判官。劇寇沈師蹂州境、覆官軍、乘<sup>③</sup>勝抵城下。公方行倅事、佐其長集民兵、布旗幟、日夜徼警甚嚴、賊知有備、引去。公又伏兵津渡、伺其宵濟遮擊之、禽賊將及其徒數十人、戮於市。帥憲以白於朝、幹辦京西安撫司公事。淳熙十四年、以博學宏詞科賜第。丞相王公准奏事、孝宗謂曰、陳某之文甚古。夜直官對、上語亦然。用舉者改秩、爲浙東安撫司幹官。帥王公



希呂奏減和買四萬餘匹、其議自公發。丁內外艱、除喪、擢太社令、太學博士。召試學士院、公對策言、帝王號令、不可輕出、儻不經三省施行、從中徑下、外示獨斷、內啓倖門、禍患將伏於中而不自知。時侂冑已居中用事、假御筆以竊朝權、故公論及之。除秘書省正字、進對言、陛下降詔求言、三時於茲、未聞以忠讜被勸賞、顧有獲罪而編竄者、中外駭愕、以言爲諱、將恐上下相蒙、非國之福。兼國史院編修、實錄院檢討官、遷校書郎、秘書郎、後省封還除書、指公爲故相趙公黨、黜知全州。至則增學廩、給官書、延見諸生、勉以問學、撙節浮費、糴米三千斛立倉、爲儉歲備、蠲民逋租凡二萬餘緡。郡城故椎酤爲民患、公聽十里外釀酒入城、收其稅、民便之。在郡二年、田野闢、道路修、城堞壯、又捐河渡之、入跨江爲橋、以免病涉、湘人目曰陳公橋。最聞、以秘書郎召、遷駕部員外郎、改禮部、尋陞郎中、兼史

職。嘉泰四年、遷秘書少監。都城災、詔百官條時政闕失、公言、節鉞濫予、職名躐授、名器大褻、僥倖益滋、貪墨肆行、生民日困、而大吏贓狀暴白、僅從罷免。中外之臣、佞諛成風、雖居可言之地、且蓄縮不敢盡、皆非盛世事。明年、進秘書監、兼學士院權直。未幾、以掖垣兼內制、坐前事絀。明年、提舉太平興國宮。又明年、授集英殿脩撰、知廣州。公之治廣、即所以治全者推而大之、新黌舍、浚泮水、奏增流寓解額以收寒士、蠲八縣送州錢六萬餘緡、禁其預借以病民、重修延恩館、處士族之落南者、增置義冢、給貧民之無所葬者。時峒寇嘯聚、爲江湖間患、公命繕城浚隍、築鷹翅城、作敵樓、置經略司、敢勇軍以壯帥府之勢、諭連韶諸州爲戰守備、分遣將卒、控搃險要、寇聞風不敢犯。上嘉之、命待制寶謨閣、再任。寇浸平、公請納祿、久之、進顯謨閣待制、知泉州。未上、以兵部侍郎兼直院召。公方懇辭、嘉定

五年正月辛酉、以疾卒於家、年六十有八、積階大中大夫、爵永嘉伯、進通議大夫、守元職致仕。遺奏聞、增宣奉大夫。是年十月辛酉、葬護國寺甸洋山、妣碩人許氏之墓左。公性孝友而仁、仲弟蚤夭、教其子、任之以官。待嫗族盡恩意、不可撓以私。與人交若簡澹、久而益親。酬應事物、從容有常度、未嘗見疾聲遽色。篤學不懈、博通羣書、而涵泳義理、歸之於約。其文典雅、有旨趣。有東齋集三十卷。公前後論事、必審酌利害、期於可行。嘗言解額不均、士不安鄉舉、欺冒日衆、宜會諸郡終場人數、各以二百解一。大辟之獄、奏裁多濫、而讞報煩壅、不若令悉申提刑司詳覆、實有疑慮可憫、乃以上聞。東南將兵猥冗不可用、當分隸御前諸軍、稟給簡閱、一如大軍法。論者多是之而未果行。其在清湘、蠲虛市之征、在番禺省八稅場、皆奏白於朝、請推之他郡。其建明大抵類此。顧在公特爲細事。至其立朝

出處之節、則自官中秘至爲近臣、皆坐忤權臣以紕。其在詞掖、不能一月也。故公辭小司馬之命、上賜詔嘉其能安義命於權門、翕赫之日、至以儀鳳之翔、砥柱之立比公。嗚呼、欲觀公之大節者、其考諸此而已矣。然公沈嘿靖厚、不自表襮、故世之深知者鮮。獨賴明詔發揚、遂得以昭示來世。夫人林氏、朝奉郎、知建昌軍、思誠之女、封碩人。子男三、長昕、迪功郎、臨安府鹽官縣主簿、季暎、通仕郎、皆先公卒。仲昉、今通直郎、知建寧府浦城縣。女二、長適從事郎、潭州善化丞劉方慶、次未行、皆早卒。孫均、宣教郎、前知婺州東陽縣。德秀之試詞學科也、賴公品題、俾玷首選、因獲出入公門。今老矣、懼無以報塞、而昉以銘墓爲請、誼不得辭。銘曰、士貴實踐、不貴空言。言之孔易、守之維艱。平居乞乞、眞若有立。得喪恍之、鮮不蠖屈。方其無事、論說瀾翻。有事而言、若鍵若銜。展也陳公、沈潛靜默。見

義必爲孔武且力。大姦盜權寵其僮奴。寄以腹心。若馮子都。奕奕節麾。將舉以畀。在廷嬖阿。孰敢訾議。公曰此官實獎勵勞。彼何人斯。異數是饗。豈以綸言而飾隸皂。吾腕可斷。制不可草。瑣瑣貂璫。怙寵躐遷。抗章還之。連觸勢權。紫微玉堂。密勿清切。浩然而歸。如屣斯脫。鳳翔千仞。砥柱中流。知臣者君。褒詔優優。番禺之政。如古良牧。式遏寇攘。以奠南服。天子曰嘉。亟其來思。簪筆代言。匪卿孰宜。驛騎方馳。文星遽隕。天寶奪之。莫究其韞。有丘崇崇。闕此德人。勒銘山阿。千載不泯。

真德秀撰 《西山文集》卷四四

喬德瞻墓誌銘

吾友喬拱德瞻。質甚茂。貌甚和。志鄉甚正。從前輩游。深繹默味。蓋非易其言者。其事親油油然。若不足也。其奉兄惓惓然。左右之欲不違也。其處宗族鄉黨惕惕然。恐恩意之或不孚也。其講習將求盡

乎此。其踐行亦既深知其難矣。方用力於是也。乾道九年十一月一日。以疾卒。年二十有九。妻樓氏。後百二十日亦卒。以淳熙元年十月五日。葬於東陽之西山岡裏原。曾祖應祖。考松。母杜氏。二子。豫臨。銘曰。

莫之爲而爲者。其天乎。苗而不秀者。有矣夫。嗚呼。

呂祖謙撰 《東萊呂太史文集》卷一一

草廬先生墓誌銘

草廬先生。姓林氏。名轟。字叔和。黃巖縣人。事父母兄無違志。朋友不倍其言。妻子裕如也。鄰里懽如也。其行既修矣。少而廣問博請。長而探幽索微。老而愈勤。窮而益信。其學既明矣。面於方山。木或春彫。草或冬蕃。并不先汲。炊不蚤熟。蹣行株坐。自若也。邑後生聚而謀曰。得無從草廬游乎。先生得無思見我乎。邑大夫作而顧曰。某獄疑。先生決之乎。某政謬。草廬知之乎。年七十一。一日。筆數牘。緘題



竟就床若將寐者、視之已卒。其爲士者無不弔而哀、如不欲生也。卒之日、十月丙戌。明年嘉定十年正月丁酉、葬於樟槿山。其爲士者無不送而號、如不欲歸也。或肖其像、恍乎草廬之容也。或玩其書、泠乎先生之音也。嗚呼、世謂文華之俗薄、雖躬行樸厚不能化、曷不視此乎。自孟子爲論世尙友之說、始輕視一鄉之善。蓋天下所同善者猶未足也。況一鄉哉。按周官、鄉即國也。黃巖古伯男國也。二鄉公也。公旦、君奭預焉。一鄉卿也。閔、散、南宮适參焉。王國之善、即天下之善也。豈孟子未見周禮、而以戰國近事言之乎。然則一鄉之所謂君子者、固無往而不爲君子矣。夫疑天下之善不足於一鄉、而又以一鄉之善不足於天下者、惑也。先生之子季復、幼常除喪來告、余旣竊有感於孟子、遂以記其墓。兩夫人皆陳氏、女嫁胡惠連。銘曰、噫昔追隨五十年、近離遠合交傾宣。一札不至奄

重泉、矢詞如忘徒泫然。

葉適撰 《水心文集》卷一九

校記

①二：原作「一」，據四庫本《止齋集》改。

②一：原脫，據四庫本《鶴山集》補。

③乘：原作「盛」，據正德本《西山先生真文忠公文集》改。



儒藏



宋儒碑傳集卷一百六十

黃裳 彭蠡 曾興宗 胡仲舒

端明殿學士致仕贈資政殿學士黃公墓

誌銘

公諱裳字文叔其先出江夏唐晚徙梓之安泰六世祖曰文友者寶元康定間發粟賑梓劍閬三州饑民所活萬計朝廷特官之文友生阜阜生登登生棟是爲公祖壻何氏始籍隆慶之普成考安中居縣東郊顧公齒長恐無所見聞悉捐舊產居邑中不治他事篤于教子母鄭氏繩之加嚴公未冠刻勵激昂登乾道五年進士第調閬州新井尉未赴罹外艱邑子從授業公語以經義又爲之講解其後學益詣悉焚其稿服闋授巴州通江尉三年杜門潛究經傳出入古今默而精思或達旦不寐人與語若無聞然于是剖微析幽宏深四達文詞明暢動中律度始時人傳其詩不知其學已成非

復前日文叔矣。總領趙公公說聞其名俾諸子從之游賴其束脩葬父祖及其諸父兩世九喪已而奉太夫人遊青城無爲諸山率賦詩以寄意其純孝幽尙有古風于世澹如也。後總領李公繁復招以往時邊民苦和糴實不得一錢吏且督輸旁午漢中尤以爲病公作漢中行以諷與李公意合力奏罷之民大悅公又作罷糴行至今歌之公將之官經紀其昆弟親族之家而後行攷滿用舉主關陞爲興元府錄事參軍能以情求獄脫冤死伸無告甚衆終不訊一囚用舉主當改秩制帥留公正薦五士公爲之首召對論蜀兵民大計曰蜀中民貧兵困極矣臣思其故有二恨焉關外四州邊于敵境勢便地饒兵火之餘田萊多荒不用屯田積穀之策乃權民以養兵歲月既深兵民俱困此一恨也邊民仰給外府米運率指沿江若稍分邊屯使就食諸郡外計費省今千里漕粟商因爲利幾



以三石而致一石、名爲養兵十萬、實養三十萬人。兵困民窮、職此之由、此二恨也。今屯田積穀、勢已難行、分兵就糧、事猶可及。孝宗下其說、卒不果行。次論常平賑濟、其略曰、古人救荒良法、不過常平義倉。見今官司豈無椿積。以一州言之則少、以一路計之則多。水旱之災、決不常有、不幸而有、決不同時。苟甲乙相推、遞相賑救、則豐凶迭用、可以無窮。以此救荒、似爲良策。又論關外義士、人材驍勁、緩急可使。往年師出秦州、鼓譟先登、官軍坐視不救、遂皆陷沒。自今苟遇調發、宜令主將自作一軍、專攻守之謀、任成敗之責。明日、除國子錄。未幾太夫人不幸、宰相以闕官進擬。孝宗怪、問黃裳何在。因奏其故、特賜錢七十萬。甫除喪而趣召。既至、太上已登極。公謂守成之主、要在恢張志度爲先。因論大利害凡數千言、大略以爲、古人論創業守成、中興謂之三難、今陛下雖當守成之時、而責任中

興之責。守成之道、必有能爲陛下言之者。若夫中興規模、則與守成不同。出攻入守、當據利便之勢、不可不定行都。富國強兵、當求功利之實、不可不課吏治。捍內禦外、當有緩急之備、不可不立重鎮。因論都建康有五利、天下大勢、終在建康。及言、方今官雖具而職實不修。一當立品式以課其功、二當計資攷以久其任。既建都邑、課官吏根本固矣、則又據要地、立名城、環大兵以守之、分大臣以鎮之。今吳蜀綿亘萬里、雖號爲重鎮、宿師之地、受兵之處、率三年一易、僅同列郡。所謂國之藩籬、門戶者、固當若是耶。陛下即位之始、所與共濟中興者、宰相也。陛下主其謀、宰相任其責、用之則勿疑、疑之則勿用。苟輕用之于始、必輕棄之于終。別奏、國方有大讎、大恥、大害、大憂、而爲人臣子、乃狃于無事、忽然忘之。此風之成、已非一日、其要在陛下篤于躬行、以感愧之而已矣。又上奏曰、今日之最弊

兵多而食少、一也。吏多而官少、二也。變而通之、惟當省兵省吏。臣以爲守備不闕、則戰兵可省。竊謂沿邊郡守宜悉除用武臣、付以民兵、責以軍政、無事則耕、有事則守。如此則藩籬固而邊備實、省兵之說始可言矣。以民兵守、雖多而無養兵之費。以官軍戰、雖少而有可用之實。官軍之食可以少增、吾民之賦可以漸減、豈非至計乎。若夫省官之說、則當以理論之、縱有怨咨、寧無曲直。夫實邊備則可以省兵、執事理則可以省吏。使即日行之、其效猶將在十年之後。苟又不然、兵日以衆、吏日以多、他時雖欲逃怨于目前、嫁禍于後日、不可得矣。公在憂中、益熟觀天下大勢、至陞對、其言條達明切、太上異之。于是始被簡記、除太學博士。不數月、改秘書郎。又旬日、親擢公爲嘉王府翊善。曰、黃裳善論事、必能開益皇子。公感主知、遂以輔導爲己任。前後凡五年、規切諷諫之語無虛日。前朝號爲能

直言、如姚坦輩皆所不及。後來諸賢、講貫切劘、亦皆自公發之。公講春秋初及王正月、曰、周之王、即今之帝也。王不能號令諸侯、則王不足以爲王。帝不能統御郡鎮、則帝不足以爲帝。今之郡鎮、即古之諸侯也。周之王、惟其不能號令諸侯、故春秋必書王正月、所以一諸侯之正朔也。今天下境土比祖宗時不能十之四、然猶連跨吳、蜀、荆、廣、閩、越、二百州、兵與民分任。任吾民者、二百州也。任吾兵者、九都統也。中興以來、三聖相授、苟惟不能統御、則何以服之。上曰、何謂九都統。公曰、唐太宗年十八起義兵、平禍亂。今大王年旣過之、而國家九都統之設豈容不知。然則是可不汲汲于學乎。公性真率而語疏達、上大感悟、恨得公晚。及講鄭伯克段于鄆、公曰、段驕而有過、鄭伯乃以兵取勝。使大王如鄭伯之有段、宜如何處之。上思良久、公曰、大王獨不見孟子載舜之事乎。象、舜弟也、舜封之有庠、

不及以政。凡親親之道、但當富貴之、不可使之預政事、此舜與鄭伯之得失也。上曰、善。公因事啓發、大率類此。他日、有東宮舊人除帶御器械、詣王府謁謝。上接之、重輕中節、左右咸大驚、退以告公。公翌日講左氏禮有等衰、因問上曰、昨日聞大王待某人、正得等衰之說、有之乎。上曰、有之。人不可無學、前日臨事、胸中即有區處、如有人在心腹間商度也。公大喜曰、大王之學、正當見之處事。今日等衰之說、即是意也。公大抵即某事、則以某書言、舉某書、則以某事合、雖所汎論、亦必曰前日某書云云。或上所未喻、又曰某日某書云云。上意益嚮、因作八圖以獻。曰太極、曰三才正性、曰天文、曰地理、曰王霸學術、曰九流學術、曰帝王紹運、而終之以百官文武、各述其大旨陳之、可謂該盡而宏遠矣。公每曰、爲學之道、要當體之于身、本之于心。大王宜以心爲嚴師。于王心有一毫不安者、皆所不可

爲也。凡上所行有一善、必誘掖稱贊、俾日進不已、否則盡言無所諱。上謂人曰、黃翊善言語亦難堪、惟我則能受之。每至喪敗危亡之事、無不爲上精言之、上必傾聽。上嘗侍宴宮中、從容誦酒誥語、太上喜曰、翊善之功也。一日輪對、勸太上曰、陛下有五美三戒。何謂五美。曰仁、曰誠、曰明、曰公、曰斷。公各指事如此。如此曰、此陛下之五美也。何謂三戒。曰立規模、崇儉德、受忠言。時太上意主安靜之說、因循浸怠、而用度賜予過多。忠鯁之士相踵去國、故以諷焉。後命接伴金使、因通兩國名諱、而高宗猶稱帝名。公曰、高宗祔廟已久、乃不稱廟諱。前實失之、安可不改乎。令典儀通意、使者難之。公曰、前乎此、在二十七朔之內、故未遑及。今已即吉、當互傳廟諱。往返數四、來使語塞。然卒以前例、不果從。公還奏曰、臣以理詰之、其辭已順。事關國體、後遣使人、當力議改正。太上納其說。紹熙二年二月、雷



雪交作、公具封事、其略曰、謹按易、帝出乎震、震爲雷、君像也。震本坤體、陽自外來交之、有動乎情慾之象。是以聖人于六十四卦之中、凡涉震體者、取義尤嚴。在復則曰雷在地中、先王以至日閉關、欲其復之靜也。在隨則曰澤中有雷、君子以嚮晦入宴息、欲其居之安也。在頤則曰山下有雷、君子以慎言語、節飲食、欲其養之正也。復之靜、晝不可以鄭聲撓之。居之安、夜不可以慾心蕩之。養之正、食不可以旨酒亂之。夫人主起居動息、人雖不知、而天則知之、變異之來、豈容掩覆。震之象曰洊雷震、君子以恐懼修省。修省云者、謂省己之私也。豈時政之謂哉。公疏特切深、皆人所難言者。時求言之詔及館職郎省而不及公、不果上。四月、擢起居舍人。未幾、瘡發于背、告滿百日、甫出、即直前奏事曰、唐太宗最重魏徵、一旦至欲殺之。凡人主私心、非必如好色好貨之類、然後謂之私也。事苟不出于

公而執以己見、皆私也。私心既生、則以諫者爲病、必求有以勝之。勝心既生、則以諫者爲仇、必求有以逐之。因私心而生勝心、因勝心而生忿心。是三物者爲之蔽。雖以太宗之于徵、猶不免、況其他乎。陛下即位以來、臺諫之臣不得其職而去者、幾七八輩。陛下亦知三蔽之所以然乎。且如陛下之待某人、本不甚厚、徒以臺諫攻之愈甚、故陛下庇之愈力。陛下之本心亦忽不自知其如此也。望陛下靜察吾心、勿使有秋毫之私。此心既公、無所偏係、則聞臺諫之言必從、何由以勝心臨之。待臺諫之情必厚、何由以忿心加之乎。公久侍王邸、一再遷官、兼翊善如故。見上爲學日益、因誕日作渾天儀、輿地圖以獻、皆以木爲之、因爲歌詩、勉上進學、如天之運行而不息。及念祖宗郡國大半陷爲賊區、乃王心所宜感憤者。觀公之志、凡可以動悟王意者、無不爲也。居數月、除中書舍人、制詞坦明、人多



傳誦。公既擢禁從、念國家日忘武備、勢浸削弱、復勸太上以右武爲事、曰、壽皇在位三十年、待遇武臣、拊循士卒、恩意深厚、三軍之士、至今言者無不感激、恨天下無事、不得效死以報君父、願陛下勿替此意、又請權撥鄂渚兵一二萬人、分屯襄漢、張形勢以備敵、公心之素所存者然也、天下方恬于宴安、公策無所施用、都人比歲日夜望車駕之出、譁言紛紛、公奏疏極論、自今宜五日一朝、以解中外之謗、一疏之中、凡六七致意焉、尋除給事中、同知貢舉、未幾除侍講、公在瑣闥甫一月、封駁之章、無慮數十上、貴戚宦寺一限以法、最後指侍臣進用不當、繳論甚切、翌日遷公兵部侍郎、公不受命、堅乞去、久之、王邸奏乞留公、遂除顯謨閣待制、專爲翊善、公始就職、未幾、瘡復作、轉甚、連丐去、不許、病稍差、又上封事、請車駕即日過兩宮、言極苦、尋復除公侍講、引對便坐、又爲太上力言、父子天性、

陛下于重華不應有他疑、太上徐勞公曰、近見嘉王學問殊進、慶對議論益非前日比、皆卿力也、公曰、臣伎止此、朱熹四十年學問、陛下宜收召、使備僚屬、且言、王初就傅、蜀士楊輔、劉光祖相繼在選、可復充學官、以廣王之聞見、太上悉嘉納、時太上久不過宮、中外莫喻其故、侍從同班抗論不已、孝宗不豫、中外憂危、事勢益急、輔臣交口諫、不聽、公復抗聲切諫、至號泣隨之、宮門閉、掩涕而出、公自是瘡復作、連章請外、又請歸田里、書再上、不報、即移疾關外、待命兼旬、聞孝宗遺詔、亟入臨、瘡遂大作、上即位、公病不能朝、再除給事中、上語輔臣、此黃裳舊官、宜改擬他職、明日、以權禮部尙書進、上曰、獨不可真尙書乎、且令兼侍讀、上意即欲大用、數問公疾如何、公力疾入謝、出一奏、諄諄數千言、備極忠愛、大略謂、書傳所載、前古人君如堯、舜、禹、湯、文武、壽皆百餘歲、在位之日多至五六十年、而

其所爲之事自少至老只如一日。至于後世之主、享國之日率多不久、其間如漢武帝、梁武帝、唐明皇、此三君者、得年稍高、在位稍久、而其平生所爲、是非美惡如出兩人、治亂安危亦全相反。此非他故、由其持心之一與不一也。持心一則始終如一、否則有始而無終。陛下今日正如涉大川、行萬里、固未知登岸稅駕之期、臣請略舉已行之事論之。且陛下新即大位、初臨萬幾、虛心忘我、委任大臣、政出中書、萬事坐理、此正得人君好要之道。使大臣得人常如今日、則陛下雖終身守之可也。臣恐數年之後、陛下應酬日熟、聰明日新、亦欲出意作爲、躬親聽斷。左右迎合之徒竊窺聖意、因而獻說、謂陛下委任大臣意非不善、然事皆決于外庭、權不歸于人主、日積月累、恐成亂階。陛下聞之、能介然于心乎。臣恐是時委任大臣不能如今日矣。若不委任大臣、必須借助左右。小人得志、何所不

爲。陰竊主權、潛移上意、引用邪黨、殘害忠良、其爲禍患、何所不至乎。臣之所憂者、此也。陛下深鑑近弊、獎用臺諫。每有彈劾、無不聽從。善惡區分、綱紀振立、此正得祖宗設官之意。使臺諫得人常如今日、則陛下雖終身守之可也。然臣恐自今以往、臺諫之言日關聖聽、或斥小人之過、使陛下欲用之而不能。或暴近習之罪、使陛下欲親之而不可。所言滋多、不能無厭。厭心既生、不能無怒。左右迎合之徒竊窺聖意、因而獻說、謂陛下獎用臺諫、本以革弊、然臺諫得志、遂使人主不能自由。陛下聞之、能不怫然于心乎。臣恐是時獎用臺諫亦不能如今日矣。夫朝廷所恃以分別善惡、使君子小人不相侵亂者、專在臺諫。陛下苟厭其多言、不復聽用、則爲臺諫者咋舌閉口、無所論列。君子日退、小人日進、而天下亂矣。臣之所憂者、此也。此二事者、朝政之大者也。若自其切于陛下之身者言之、又有





大者焉。因條舉曰：陛下篤于孝愛如是，勤于學問如是，薄于嗜好如是，然臣亦恐陛下自不能保其常如今日也。又曰：天下之事不可勝言也。人君之憂不可勝計也。姑自臣所言數事思之，其可憂者已如此其衆，而臣安得不以爲憂乎？昔唐太宗老于世故，在位日久，魏徵猶以十漸戒之。一謂其漸不寡欲，二謂其漸不愛民，三謂其漸不利物，四謂其漸疏君子，五謂其漸貴異物，六謂其漸疑大臣，七謂其漸好畋獵，八謂其漸輕臣下，九謂其漸倦朝政，十謂其漸忽水旱。使徵生于今時，其所以爲陛下憂者又當如何？夫心者動物，易縱難收，人主之心又與常人不同。溺于富貴，放于安逸，朝善暮惡，固不可保。陛下欲求所以持心之說，臣請終言之。自古及今，有治則有亂，有安則有危，有存則有亡。使人主之心常知亂知危知亡，則又豈肯須臾自放于安逸之地？書曰：予臨兆民，凜乎若朽索之

馭六馬。又曰：慄慄危懼，若將隕于深淵。又曰：心之憂危，若蹈虎尾。此聖人持心之法也。世豈有馭六馬、臨深淵、蹈虎尾、而安危存亡之念不關於心者乎？凡首末皆主此意，公絕筆之作也。明日上復召公，移坐與語，從容良久。後數日，有旨充明堂禮頓使。公疾浸羸，不復可出，時時獨語曰：五年之功，無使一日壞之，度吾必不可爲矣。後之君子，必有能任其責者。蓋憂之深也。公連三歲病瘡，至是以積憂，故瘡雖損而他疾乘之。九月二十四日，卒不起。方疾亟，命子弟秉筆，口占遺表，大抵不異前奏，意曰：陛下好爲之。上大驚，詫傷悼。即日批出，除公端明殿學士致仕。他恩禮悉依執政。朝廷上下聞公死，皆撫手相弔，以爲國之不幸也。丞相爲上言：至泣下不能已。遂贈公資政殿學士，所以賻卹之加厚。公寬簡樂易，不爲拘拘。平時于利害是非若未經意，至忠義所激，奮然忘身。每論事人主前，其氣

平其辭切、其事核、其理盡。人但見其發于造次、若天機之自然、不知其燕居深念、索之精而見之切也。爲人喜思慮、樂辛勤、而對客輒懽然言笑、終日飲酒無算。其爲學恥一物之不知。苟一家言、無不與之交而究其說。推賢獎善、憫孤恤貧、蓋出天性。外內僅書一十攷、積官至朝請郎。公娶蘇氏、繼王氏。王氏既喪、又連失二孫。每語人曰、富貴眞博禍之具也。既病、客視公、公嘻笑曰、僕甚愛田間、與耕夫爲伍。此時稻芋蓊然、豆飫藜羹、山中之樂、眞無央也。倘得乞骸骨以歸、足矣。嗚呼、公之立朝終始大節如此、朝野望公即預大政、而天遽奪之、壽止四十有九。惜哉。皇考贈承議郎、母妻皆贈碩人。一子瑾、承務郎。女二人、許適進士何鏜、前進士何伯巽。鑰與公同在後省年餘、相與甚厚、抵掌談世、故言議多合、各誦所聞、終日不倦。地相去萬里、而肝膽相照、傾倒無不盡。嘗笑謂鑰曰、前後得制詞數

篇、皆出君手、思有以報未能也。尙忍言之。左史劉公光祖狀公之行、瑾以請銘于鑰。因盡得誦公遺文、高處殆不可及、平處亦自有一種風氣。至論事之書、明白洞達、夫人而能知之。若其剴切精忠、憂深而思遠、撫卷三歎、使人流涕而不自已也。惟左史之作、文實事覈、敬俾載于石、而系之以銘。銘曰、井絡之區、爲東西川。鍾秀在人、名士出焉。有卿有雲、有武有淵。三蘇諸范、踵登英躋。巖巖劍門、山險地偏。勢連關隴、秀氣弗宣。涉歷千載、扶輿蜿蜒。萬山之中、乃生斯賢。英特雄邁、高視八埏。輔以學力、窮探本源。移孝爲忠、立朝卓然。大放厥辭、亶亶百篇。惟我慈皇、識之最先。俾侍嗣聖、設職惟專。官雖屢進、職終不遷。公能盡忠、左右累年。引經據古、指事陳前。義所當爲、執之彌堅。死生禍福、咸委于天。神會氣合、奉以周旋。夾日以飛、入侍細旃。將降大任、忽焉登仙。上心震悼、恩賁九泉。炳炳八圖、今寘



經筵。殄瘁之悲、心折涕漣。嗚呼、余嘗評之、先見如呂中丞、勇決如范蜀公、敢言如蘇文忠、蓋司馬公自以爲不及者、公或過之、而皆得其全。嗚呼、尙何言哉。惟知公之深者、然後以余爲知言。

樓鑰撰 《玫瑰集》卷九九

### 梅坡先生彭公墓誌銘

梅坡先生之喪、當有銘以納諸壙。其子方會粹行實、乃以屬諸某、謹論次其事。先生諱蠡、字師範、避大川名、改諱鳳、以小字行、姓彭氏。世爲宜春望族、自大中祥符以後、三徙而居都昌、遂爲南康都昌人。曰雷州戶曹諱壽、是爲先生皇曾祖。曰淮寧府教授諱圖、是爲先生皇祖。曰三十三居士諱時中、是爲先生皇考。曰太安人秦氏、是爲先生皇妣。當元豐、元祐間、士大夫以師道爲重、儒風文物所至彬彬。都昌在江左之底、尤著見於上國。推所從來、多出戶曹講學。戶曹君文行粹醇、經學淹貫、旣以

授其徒、又以誨其子。三舍法行、而淮寧君每冠多士、旣首選上舍、賜政和二年第。戶曹君以積閥場屋、亦授初品官。彭氏父子始表表于天下矣。居士倜儻不羈、不以世事介意。會靖康之亂、淮寧君旣即世、與太安人居里中、陶然自得。雖生事漸廢、日用且不給、嬉笑自若、不失常度。有子五人、嶄然頭角。先生位在次。與伯兄自致學問、不誘而好、不習而憤、不師資而明辨。年十六七、而戶外之履滿矣。又以聲律試有司、未嘗專技、諸經傳疏、無不通徹。又讀諸子百氏、得其膏馥、評議古今治亂、如指諸掌。然後習朝廷典故、商略時事、胸中勃勃無所發越。故國子祭酒蕭公之敏、戶曹君之外孫也、立朝爲御史。當庚寅、辛卯之旱、而時相持祿、以四方災異爲諱。先生知其然、賦辛卯歎以告蕭公、又爲書論漢魏相事。其言慷慨、與蕭公意合。會時相有疑、禁六察不得言事、而常平使者張公郊持節視旱、先

生以十事說之。自戢吏姦以至除盜賊。凡八千餘言。張公一見。以爲此魏元忠也。以其書造朝。不報。先生以爲此不足以盡吾志。必以告君而後可。草萬言成書。且將就道矣。會蕭公爲言事御史。不十日而彈時相。勢不兩立。仗斧按江左臬事。先生貧不能自往。乃止。才大志廣。頻不利於鄉舉。刑部侍郎鄭公湜爲貴溪主簿。校丁酉秋賦。乃以草茅言天下事命題。先生一見。自許以爲吾志也。論草茅言事處。詞意激切。鄭公奇其能。以首選得隨計吏。及己亥。庚子。時晦庵朱公熹爲南康守。入學講說。自中庸、大學章句之外。又出太極講義一編。以示學者。學者了章句未暇。無論太極。先生一見釋然。不煩審訂。明日抽出疑義。問難往復。晦庵稱善甚久。方修白鹿洞書院。以先生爲經諭。晦庵旣去。而鄉之後生子弟。聞晦庵之學者。往往於先生求之。先生築室梅坡。授徒肄業。江淮之士。來者雲集。規

矩森立。屹不可犯。去家數十步。日問太安人安否。蓋自皇考早世。太安人得疾。先生養得其志。疾病自禱。至欲損壽以益母。太安人始遇慶典。以先生與伯兄嘗試禮部。封太孺人。及登仕版。乃益今封。先生喜甚。以吾子之官足以及吾母。與伯兄戮力門戶。訓三弟與子姪。皆有成立。數楹之下。內外半千指。人無間言。有子二人。曰文。曰方。文早卒。方妙齡秀發。以經學魁癸丑省闈。賜進士第。調池州教授。先生奉太安人就養。至慶元庚申。方上二考矣。先生一旦感疾。治命不亂。獨以太安人不終養爲之流涕。四月癸丑卒。于教授官舍。享年五十有五。越四月。而太安人卒于里居。娶陳氏。生文與方。及一女而卒。及見方試禮部。與其女適進士周景南。再娶曹氏。則某從父信豐丞女也。方有二子。曰炳。曰焯。旣卒。哭奉遺命。立克爲文後。凡孫男三人。孫女一人。先生弱冠策勵。爲有用之學。於簡編得雋。



自信甚篤。廣座議論。旁若無人。其後益更斂藏。不自表襮。爲文平易詳復。不見斧鑿。及別白利害。馳騁貫穿。屈其座人。無不披靡。爲詩雖祖少陵。雅不好依倣。自出機軸。與古人相上下。對客飲酒。立成篇詠。又好作大字。揮染捷疾。好事者常以酒闌候之。磨墨按紙。出其不意。旋搜奇句。未嘗停筆。資政殿大學士趙公彥逾。太常少卿曾公喚爲縣宰。以客禮延見。訪以境內之政。先生劇談終日。未嘗略及外事。至縣人利害。有益於衣食。有助於名教者。未嘗不纒纒言之。都昌地無秔稻。民病於輸。二公知其事。未有以發也。趙公帥金陵。始言於餽餉者。倣和糴之例。代以他米。曾公爲常平使者。則又具奏得請。時先生兄弟往來金陵。池陽間。爲二公力陳其事。縣人得不強所無。爲利甚博。邑居人食貧且死。往往多用火葬。相率成風。不以爲異。先生爲曾公道其事。作興孝園於負郭不毛之地。人以爲

便。某年十二歲。學春秋。從先生讀三傳。由屬對以至識音韻。自講論語以至舉子業。在先生左右。終始五年。先生嚴毅明達。諸生不敢仰視。獨於某侍側。乃復假借言色。其後萍梗渙散。不頻奉先生書策。遇歲時拜師席。與親戚相會聚。先生每賦詩。必令屬和。或酒間分韻。或馬上聯句。不以其不能而廢。歲在丙午。某爲廣德建平尉。入郡。迓長官。夜宿旅舍。大雪且止。有剝啄扣門。出問姓名。則先生徒步而來。喜謂某曰。吾子方當隨計吏。吾懼其幼不更事。與之俱入都城。過建平。不相值。留賦二詩矣。某拜且賀。因問近所作。先生歷歷舉似。驚動鄰屋。有同寮在傍舍。爲之不寐。明日更相誇說。以爲盛事。及先生在池陽。某適當班見。過池陽。留且數日。諄諄與語。夜出就外次。使某與方連榻而卧。稍寤。即說賦詩。或起坐待旦。臨行不忍別。徘徊九華樓上。篙師以風便請。不許。至關吏告合鑰乃罷。調官

來歸、復如前日。不及二年、訃已至矣。昊天不弔、山頽梁壞。方卜以明年辛酉八月丙申合葬陳氏于南山之原、來樂平告期、既不得辭、乃爲之銘曰、

吁嗟先生、隱隱欲欲、早以道鳴。匪繫匪羈、侯騁侯馳、百不一施。滿中紛綸、子虛過秦、駭汗延紳。露刃先登、人疾其能、鬼神所憎。力穡逢年、人衆勝天、天定亦然。允也蒼蒼、蓋棺不亡、克肖有方。職思負任、居官有箴、銘藏諸深。

曹彥約撰 《昌谷集》卷二〇

肇慶府節度推官曾君行狀

本貫贛州寧都縣。曾祖京、妣林氏。祖通、妣嚴氏。父□□、從事郎、靜江府司理參軍。妣謝氏、楊氏。君諱興宗、字光祖。其先廬陵人。唐末、始祖土方爲虔化令、遭五季之亂、因家焉。紹興間、改虔化爲寧都。家世業儒、饒於財、喜施予、閭里稱之。司理公性嚴重、不妄言笑。監金陵稅院、奉職廉勤、大爲建安忠肅

劉公珙所知。年踰強仕、即倦遊、以致其事。君其嫡長子也。資稟純厚、襟懷坦夷、外雖溫然可親、遇事則剛毅有立。自爲兒童、不好嬉戲、儼然如成人。年十六七時、已厭科舉之習、一意於聖賢爲己之學。嘗言、吾讀舉子業如嚼蠟。觀諸理學、則心快目明、終日忘倦。人皆笑其與世背馳、君處之怡然。兩預鄉薦不第、即棄去。慶元五年、該恩廷對入等、調主隆興府南昌簿。南昌劇邑、簿書繁冗、吏緣爲姦。君勾稽不倦、戶籍升降、稅租登耗、毫髮無遺漏、牘而藏之、官民俱便。歲適大侵、趙公希懌持倉臺節、選可囑以荒政者、莫踰君。君出入阡陌、檢視虛實、務均其惠。富民有蓋藏者、勸以出粟、平其價。斲而牟利者、發廩而償其直。飢民賴以全活。趙公賢之、凡民訟歷年不決者、雖旁郡外邑、悉以委君。有袁州分宜董氏者、園池爲近鄰所占、改易途徑、人莫能辨。君廣諏博訪、親詣其地、索文券、考步畝、積年之



訟一日而伸。南昌伍氏欺妻黨孤弱、徙其母外邑、指爲逃絕、給據而佃其業、經四十年。其孤訟之、數載不獲伸。漕帥二司交以委君。索據辨證、考其業之所自出、旁引鄰至及元賣業之子孫供證得實、一府稱其神明。邑有豪民窩聚逋逃、流毒一鄉、無敢誰何。人以冤訟里正驗實、復遭其捶、反自焚其居而訟之、無以自明。君造其里、鄰近畏之、莫敢言、得十歲小兒、訪問得實、解府黥之、鄉民以安。君嘗誦程子有言、一命之士、苟存心愛物於人、必有所濟。故其在南昌、簿職雖微、不敢自怠、理冤雪滯、無慮百十數。其欲去也、士民合數百、列狀于部使者、述其政績、挽而留之。既不獲命、則送別者塞填街巷、餞于江臯者屢滿焉。見者以爲先此簿職所未有也。秩滿、注肇慶府節度推官。君於是浩然不復有從宦之意矣。君生未閱月、失所恃、事祖母至孝。嚴氏歿、獨予田數百畝、以助遊學。君不以自私、悉

以供歲時祭祀之用。司理公晚年以舊居近市、闢室于金精谷口之陽、以適餘年。君以晨昏不可遠、離、遂闢其旁以居。司理公得疾、不遠數百里、躬自請醫、朝夕扶持湯藥、衣不解帶。事繼母楊氏、尤得其歡心。居家動遵古禮、冠婚喪祭、不肯雜以世俗之儀。子孫環立、必誨以聖賢躬行踐履之學。其於鄉黨、無賢愚貴賤、接之以禮。見人有善、稱獎不容口。聞人之過、及以急難告者、如己隱憂。凡鄰里有紛爭、必先于君。君以理折衷、俱得其平。至或輟己物以息訟。人或犯、未嘗忿嫉、從容訓責、終歸於恕、使自愧服。禮賢好士、出於誠心。往來寧都者、以不見君爲慊。過從者館穀無虛日。故田園雖豐、而囊無餘貲、處之無悔也。歸自南昌、闢所居之南山、創精舍、取後凋之意、扁曰歲寒、儲書聚糧、以待四方士友。爲暮年講切之益。自號唯菴鈍叟。日處其中。學者至、必以所學告語之。所謂孝弟忠信之說



未始脫諸口、來者亦莫不拱手竦聽而去。君晚年方欲休致、以卒所業、不幸遭長子之戚、未半載而君遽得氣脅之疾。雖卧疾、手不釋卷。故舊見之、勉以少事調息。君曰、吾於病中靜觀此理、愈熟愈深、政自無害也。未易簣十日、猶與學者論中庸、語孟。臨終之夕、談論至五鼓、至次日中、忽謂諸子孫曰、吾病必不起矣。我死、勿用浮屠氏、陷我於不知道之域。喪事宜遵古、參用儀禮。非禮勿爲、非道勿學。乃吾子孫言終奄然而逝。卒之日、里之人莫不咨嗟歎息、以爲善人君子之云亡、後進之失所也。斯道不明千有餘年、二程子出、孔孟不傳之緒得以復續、然諸儒迭興、講論不精、易以訛舛。晦菴文公朱先生講道於武夷之下、然後邪說詭論無復肆、而後學有所宗師。君自知學以來、既有意於聖賢之事、聞旁郡有以知道自名者、君往從之遊。視其說茫洋恂恍、無所依據、不遠千里、授業於文公之

門。堅守其說、孜孜力行、必求有得於心而後已。文公嘗以純茂篤實、切己致思、用功正當稱之。僞學之禁興、一時學者諱名其師、君執禮益勤、厲志益苦、未嘗少懈。文公沒、君星馳而弔、心喪三年。嗚呼、若君者、豈非天資之厚、志學之專、而又能就正於有道、故其居官治家、應事接物、處之終身、無所悔怍如此、則君之云亡、豈不深可痛恨也哉。君年六十有七、以嘉定五年六月十日卒于家。娶謝氏、有賢德、先十一年卒。子五人、長浚之、先一年卒。次夢吉、與鄉舉。次頤之、益之、良之。益之繼弟興邦後、良之亦早夭。女二人、長適劉昌時、次黎宗海。孫四人、樸、楨、椿、榴。女孫七人。有文集十卷、號唯菴斐藁、藏于家。榦於君有同門之契、交遊非一日、宦於江之西、尤相親且相好也。因其從子益之之請、述其行事之梗槩、俾求於當世立言之君子而請銘焉。謹狀。

黃幹撰 《勉齋先生黃文肅公文集》卷三三

承事郎胡君仲舒墓誌銘

故朝請大夫、利州東路安撫司參議官晉原胡君以乾道九年通判邛州、嘉定十一年夏、其孫台符承嗣厥官。始至、即治寺之東偏、肖參議君之象而奉祠之。既屬郡人魏了翁爲之記。其年天子敷祭澤于羣臣、台符以陞朝、贈考承事郎、封母□氏太孺人。因以密章告于禰廟、於邑不自持、入白其母曰：我先君以淳熙之元易簪於斯、今四十有五年矣、而居處笑語、厥其如存。昔者之葬也、台符尚幼、弗克謁銘于聞人、以光昭先君之令德。今年迫始衰、大懼即沒于地、賫恨罔極。我將復請于魏公。母曰：汝其往哉。台符以告、則爲跡其行事。蓋參議之元妃曰高氏、無子。繼室以劉紹興監察御史長源之女也。生一女二男、而承事君爲幼。資明晤、居以孝謹稱。凡經史百氏之書、過目成誦。至於纂言粹

事、往往充牣篋牘。一時知名之士如碧山盧衷甫、眉山宋君興、皆聞風願交。成都呂周輔爲郡校官、君往從之、與同郡閻廣道、樊子南、宋正仲爲研席交、講切問辯、率至夜分。尤工爲詩。參議如邛之明年、而君年二十有八以卒。未瞑、參議撫之曰：期汝大吾門、今止此、命也。晚遇恩霈、則爵爾子。是時台符方五歲。後七年、參議守太寧、遇宗祀恩、乃誄前言、且戒台符曰：汝其勉諸。嗚呼、韓文公所謂吾時雖能記憶、亦未知其言之悲也。非台符所聞於是言者邪。余既拜興受之、弗敢辭。無何、台符又以書來曰：昔者之請、公忘之乎。嘗閱王父手澤、有祭吾父之文、其略曰：汝生紹興丁卯、兩歲失母劉。乳哺未絕口、氣質已自不凡。父再取楊氏、汝方六歲、奉親色難如成人。子孝母慈、人無間言。既長、刻意問學。乾道戊子、父調官夔門、留汝居守。五月六日、汝喪母楊、不茹葷飲酒、哭甚哀、見者憐之。未幾父歸、



則又官無留賦、庾有積糧、可了伏臘、時汝之能。郡校官亦奇汝進脩、汝能忘寒暑從之。乾道癸巳、汝忽染疾、無何疾間、待我于邛。明年而汝疾作、三月汝乃棄我而長逝。長者如此、幼者果可保其成人乎。台符每讀至此、則搏膺而踴、殆無以生也。公其爲我併識之。了翁竊惟先正歐陽崇公之卒、文忠才四歲、徒恃母太夫人以立、故瀧岡阡<sup>①</sup>之表、凡六十年而後作、且曰脩非敢緩也、蓋有待也。今承事君之葬三十有四年矣、台符獨非有待者與。而屬之了翁、則非其人。然竊惟承事君生平馴行孝謹、自誠身順親以行乎州里、信乎朋友、亶亶乎如川之方至而未有已也。蓋胡氏之楨榦也、而亟奪之、故其祖孫之詞、肫切慨慷如此。矧老而哭子、少而喪父、凡皆鉅痛窮罰、人情之所甚不可制者、莫爲之銘於人心、獨無忉乎。然則敢不敬諾。承事諱仲舒、字漢卿。曾王考贊、不仕。王考輪、以子貴、贈奉直

大夫。考參議君諱彬。子男一人、即台符、今以奉議郎通判邛州。孫男□人、孫女□人。葬以淳熙十二年□月某甲子、墓在晉康之善化鄉□山、祔參議君之兆。銘曰、

吁嗟胡君、美具美并。扶木之東、而夷其明。父兮疇畀、傷烏哭鯉。兒兮疇依、孀機嫠緯。卅有四年、草廡栢丸、旣固旣安、後人其蕃。

魏了翁撰 《重校鶴山先生大全文集》卷七二

### 胡崇禮墓誌銘

崇禮胡氏、名樽、會稽餘姚人。自承務郎監臨安府樓店務、西京中嶽廟、兩浙轉運使、浙西茶鹽司幹官。慶元元年五月某日、卒於吳、年四十九。二年十二月某日、葬翁湖山。夫人周氏。二子、衛、衍。二女、長嫁歙縣主簿石孝淳。崇禮本末單厚、終始信實、啓發穎銳而守以凝固、激厲勇敢而行以和順。俗所溺情戲鄙詐、未嘗留色。衆所競儇巧黠慧、未嘗接



心。父禮部尙書沂、乾道名卿、衣冠推其表則。兄監回易庫拱、淳熙名士、朋友載其言行。崇禮步趨顧省、無一事不以父兄爲法。夢想跂及、無一念不以家門爲重。先世故書、緹囊珍篋、重封之。屏几遺字、籠玩往復、或移日。尙書階不及諡、崇禮頓首麗正門、請曰、先臣幸以詹事侍陛下東宮。光宗惻然、特賜諡。既定章簡、又曰、此非所以諡臣父也。卒易獻簡、乃已。回易不幸棄盛年、崇禮悲哀思慕、自罷官乞岳祠、曰、不得是、無以葬吾兄。餘姚之胡、岡連壘接者八世矣。族人貧富相通、親疏相卹、墮枝脫葉、亦使自存。越人言松檟壽鬱、能無毀傷者、或羨胡氏、蓋崇禮營護其間也。在運司、覈諸縣板帳、一日、條無名重賦、白於長、請盡除之。長憚其直、遜爲謝曰、當議而行、不敢迂也。甲寅乙卯歲、浙西先旱後水、湖常州死無虛室、縣梁河堤積屍千數、崇禮泣懇於朝。適會所知爲丞相、急轉米、多賣僧、去長興

安吉山谷中、緣門糜飲之、民賴以少蘇。旣而崇禮良苦、被疾、遂不起。此皆其親戚所記、鄉里所傳、而余識崇禮、且見且聞、不忘者也。初、朱元晦、呂伯恭、以道學教閩、浙士。有陸子靜後出、號稱徑要簡捷、諸生或立語已感動悟入矣。以故越人爲其學尤衆、雨併笠、夜續燈、聚崇禮之家、皆澄坐內觀。周氏賢明、身治鮭菜、供飯羹、歷歲閱閏、無改其度。士旣成名、無不向重崇禮、謂宜世用、然竟不遇、不壽死。死後十五日、周氏死。又八日、幼女亦死。衛衍尙少、浮樞縱橫而歸。吳、越人皆咨嗟痛惜、以爲天之於吉人善士、何其不少、假易至此。而崇禮執義秉德、旣乏爲善之報、而死亡摧折之慘、反加甚耶。然其後未久、衛登進士第、登朝、今爲朝奉郎、通判明州。衍後其兄、通直郎、知黃巖縣。贈崇禮官五品。周氏安人。胡氏其復起、起必崇禮子孫、而天之於吉人善士、其終不虛其應、特有久近淺深而已。嘉定六

年冬、衛偶來永嘉、見余言舊事、相對歎息。余觀衛  
懇懇於學術衰廢之餘、補綴張設、若欲繼其先者。  
嗚呼、是胡氏義理德性之傳、而崇禮之靈所以相  
之也、影響遲速、何足計哉。銘曰、

生而知方、學而蹈道。職當成身、豈限常報。淺耕先  
穫、深種後收。靜而自至、福焉待求。露楸亭亭、雲塚  
冪冪。崇禮之銘、於以尙德。

葉適撰 《水心文集》卷一七

校記

①阡：原作「仟」，據四庫本《鶴山集》改。

宋儒碑傳集卷一百六十一

方壬 林憲卿 鞏豐 方士繇 石範

汪伋 陳用庚 王蘭

方寧鄉壬墓誌銘

余友方巖仲十年來以其王父寧鄉大夫君宰上之銘屬余、余思鈍、久不克就。巖仲見輒面命、別去、隔江湖嶺海、書督趣無虛歲。余晚蒙恩放還故山、巖仲又來責諾、余矍然起。謝寧鄉仁人志士也、巖仲孝子順孫也、余雖眊荒、其敢辭。按君家譜、始居陳巖山、至其烏山府君堯遷白杜、傳三世至二金紫公、白杜之方益蕃。長金紫諱峻、生威武軍節度推官元案、字道輔。節推生隱君金、隱君生南海尉畛、尉生迪功郎應君皇考也。君諱壬、字若水、擢淳熙丁未第、爲漳州長泰縣主簿。秩滿、關陞從事郎、知潭州寧鄉縣。未上、慶元丙辰正月某日卒、年五十。嘉定壬申五月某日、葬黃垞山。配徐氏、後十有

六年卒、祔焉。一子、伯佑。二女、適進士李雄、吳立義。伯祐、二女、李壻皆已卒。一孫、巖仲也。曾孫、建。君在長泰、太守朱文公請主學、君條上講說、課試、差補等十事、文公令諸邑皆倣此。舊取錢穀於陂。塘以廩士、君革去、以廢寺田代之。邑有補足鹽、始沿兵興、敷借、後以爲常賦、它邑取諸牙儉。君言長泰契錢僅當鹽額三之一、餘均之主客丁、民力可哀、文公爲等第寬減。又蠲僧寺子斗錢、罷科茶錢、皆君發之。龍巖鸞卒殺人、獄吏抑同行者、誣伏。漳浦有僧斃於佃人、鞠驗皆曰服毒。太守司諫鄧公委君閱實、卒、佃伏誅、二冤獲伸。初筮、薄俸散施姻舊、至無以具歸裝。與弟申友愛、家人議析先世田廬、既具草、君流涕不忍視而止。以君之行誼志業而僅得中壽、卑秩以死、前輩風流就盡、後生耳目不接、日遠日忘、非後死者之責乎。初、道輔幼與伊川同學、至老情好不衰。君亦受業於文公。夫師友之誼



大矣。孟喜以改師法見擯，叔孫以不薦弟子獲怨。方程朱盛時，噓生吹枯，及其門者多致通顯。獨君祖孫終老常調，以程朱窮不以程朱達也。中更黨論，學禁生徒，掃影滅迹，諱稱門人，而君家寶藏程朱翰墨，以二師傳不以<sup>⑧</sup>他師名也。至於以隱遁疑伊川，以民瘼責文公，有切磋無和隨，其與儻夫子之尙左，慕林宗之墊角巾<sup>⑨</sup>者異矣。烏虜此固巖仲之家學歟。余文成于淳祐丁未，距君卒五十有二年，葬三十有六年矣。巖仲名之泰，踵世<sup>⑩</sup>科方以薦者改秩。銘曰：

吾家麟臺，交不諂瀆，其狀君行，字字實錄。曰君訃傳，深溪窮谷，士有設位，民皆野哭。彼饕殘者，慘於蠶蝮，生歛怨詛，沒孰尸祝。君位甚卑，君齡尤促，儒效迂遠，天道還復。白楊欲枯，丹桂載馥，勉哉後人，培之勿覆。

劉克莊撰 《後村先生大全集》卷一五一

林存齋墓誌銘

存齋先生林君公度，諱憲卿，福州懷安縣栗山人。天資莊重，篤實淵粹，自少已爲佳子弟，處學校，輩行推其賢。喜從當世知名之士遊，聞濂洛治心脩身之學，欣然慕之。受業朱文公，與所嘗從學者友，日以孔孟六籍、周程之書磨礪浸灌，充養其德性。色溫氣仁，言必擇而後發，舉動造次，不失繩墨。與人交，先自下，聞人善，若出諸己，表裏洞徹，人無間言。少孤，事兄如父，撫兄子如己子，飲食居處，不忍一日離。事瑣細，以身任之，相戒飭必曰勤儉。家人有所爲，小大必咨而後行。視親族鄉黨如其家，有無患難，相調恤，惟恐後。誨鄉之子弟，必以理義從容談論終日。人交感其誠，樂其和，相勉以善，故雖山谷窮處，儒風之盛不減都邑。循循雅飭，不問可知其爲存齋徒也。生平交遊皆已致身貴顯，君獨翛然大山長谷中，坐幽亭，俯清池，吟風弄月，不知





窮通榮辱之變也。文公晚得君、稱其忠信、勉以學、及屬纊、猶惓惓與君訣。文公沒、君痛甚、嗜學益苦。其徒吳宗萬、林士蒙皆志篤行堅、可與進道。二子相繼沒、君益悲、望後輩日益切、而君亦老矣。年七十、嘉定丁丑六月壬戌、以疾終於家。君之曾祖菁、祖茂、父齡、皆世積賢厚、迨君學行始著。君不娶、兄守卿之子蕃主君喪、哭之也猶父子。鄉人哀之也、皆曰、吾師逝矣、吾誰與歸。相與即存齋祠而祀之。所謂鄉先生沒、祭於社者、則君雖不娶、不爲無後也。越二年己卯九月辛酉、葬君南山之麓。蕃以君之治命來請銘。予與君交最久、不敢辭。嗚呼、若君者、古之所謂躬行君子也夫。銘曰、

學有本、修諸身。行於家、及鄉人。施不遐、道則伸。琢斯珉、示無垠。

黃幹撰 《勉齋先生黃文肅公文集》卷三五

鞏仲至墓誌銘

予友仲至、鞏氏、名豐。時新迪義理之學、草茅士震於見聞、多矜露忤、至他文史言論、儒之藝業、又昧陋顛倒、莫知幅程。獨仲至抑縱開闔、條流品彙、應變不迫、富若素有。余本拙疎、不能自達、而仲至廣導曲引、出幽入眇、蓋爲之黽勉、追逐於荒原斷澗之側數年。仲至日益有名、不幸不得用、然有以自負、命雲侶月、跨越汗漫、浩乎不可挽。而余畏懼怯劣、常痼留一榻、不敢越戶限、然後知人之稟分高下絕殊、固非切磋誘掖所能增長矣。異日、仲至謂余、吾登芙蓉上峰、因以過子、將又發藥也。而不遂、竟死。悲夫。初、仲至以太學上舍對策高第、教授漢陽軍、代還。舊例皆自學入館、有不喜者、纔授廣東提刑司幹辦公事、母喪免。人曰、不復外補矣。又授浙東。會改法、本路人不許爲監司屬官、人又曰、再易地而不果、其當徑來也。然卒令幹辦福建帥司公事。以格知臨安縣、政尙寬簡、吏民信化、刑罰

衰息。人謂仲至極不應在州縣。今蹉跎滿秩矣。尙何諉。會其所善爲學官。仲至勸使拔滯淹士。反坐此食宮觀祿。久之。始提轄左藏庫。於是衆意益不厭。遂妄稱旦夕居要職矣。不知語何所從。仲至亦不自知也。竟復以宮觀罷。士皆失氣。悒悒曰。窮至此耶。今當何爲。其員外通判乎。或曰。不能。然則正任而待其闕乎。猶不與。復授宮觀。而仲至死矣。嘉定十年正月晦也。其家鄆州須城。渡江。即所寓土斷。爲婺州武義人。曾祖燾。祖庭芝。皆左承議郎。庭芝。所謂山堂先生者也。父法。鄉貢進士。前此科目。相傳七世矣。仲至學敏而早成。自童丱時。前輩源緒。古今音節。事之因革。總統如注水千丈之壑。迎前隨後。宿艾駭服。以爲積數十年燈火勤力。聚數十家師友講明。猶不能到也。其文無險怪華巧。而以理屈人。片詞半牘。皆清朗得言外趣。尤工爲詩。多至三千餘首。自舉賢尙德之義廢。而進人一出

於課試之虛文。苟有其一。則清資顯轍。執契而取。仲至不多有乎。剛者折而不行。柔者流而不止。惟正己不傷物。於用世爲宜。仲至不宜乎。又曰。顏淵賈誼短命。惜哉。非時不予。子不時待也。仲至壽不七十乎。自上世有金匱石室之藏。或達書命。諭意指。皆選文學博雅之士。下至鴻都翰林。詞賦篆刻。猶各專其官。出內之吝。非不欲參其間。技不兩能也。故蒼槐翠竹。必植於庭宇。仲至可爲帑吏乎。凡此皆疑誤之難通者也。性質易。無岸谷。暇日。載一瓢獨行田野。不問岐路。抵暮而返。去家二里。有龍門峽。登眺徘徊。慨然曰。此可以止矣。初。阮夫人卒。殯於大慈寺東塢。是年十一月壬寅。二子積。耕迎而合葬焉。五女子。壻曰右監門衛大將軍善輜。進士高槐。上饒知縣張友。常山縣尉周維新。幼未嫁也。孫男曰左。曰弼。孫女二。余旣爲銘。而季氏仲同自溫州移使江西。遂持以歸。曰。讀於墓而哀吾

兄然十句必九慟不成聲也。銘曰、

聞於程子、天地之生材、甚愛甚惜、必有恻固之心。蔽賢者違天地所恻固、使之氣沮志奪、怫然而怒、聚爲陰陽之罰。則其人雖大必折、雖炎必撲、荒落而類、圯敗而族。激哉是言也。天地雖甚愛於賢材、君子初何心於用舍。仲至之靈、果上愬於天耶。吾謂必且爲祥風慶雲、醴泉甘露、以瑞斯人、使其富貴壽考、蕃永而無極也。何荒類圯族之有。嗚呼、

葉適撰 《水心文集》卷二二

### 方伯謨墓誌銘

伯謨甫、姓方氏、名士繇、一名伯休、莆陽人。曾大父會、事徽宗皇帝、出入榮顯、顯謨閣待制、贈少師。大父昭、左朝請大夫、嘗入尙書省、爲駕部郎中。父豐之、右迪功郎、監建州豐國監、中書舍人呂公居仁、著作郎何公晉之、皆屈年輩與之游。紹興間有名士方德亨者是也。予嘗序其文、今行于世。伯謨甫

所自出、曰兵部尙書呂公安老、尙書以臨大節、不撓死淮西之難、載在國史。伯謨甫遭父憂、時才十二歲、從太夫人依外家、居邵武軍。執喪、已能無違禮、而事太夫人及庶祖母以孝謹稱。入小學、與他童子從師授經、既退、意不滿、爲朋儕剖析義理。師聞之、悚然自失。既冠、游鄉校、試屢在高等。聞侍講朱公元晦倡道學于建安、往從之。朱公之徒數百千人、伯謨甫年尙少、而學甚敏、不數年、稱高弟。因徙家從之于崇安五夫籍溪之上。所以熏陶器質、涵養德業、磨礱浸漬、以至于廣大高明者、蓋朱公作成之妙、而伯謨甫有以受之也。伯謨甫既見朱公、即厭科舉之習、久之、遂自廢、不爲進士、專以傳道爲後學師。六經皆通、尤長于易、亦頗好老子、嘗嘆曰、老子之言、蓋有所激者、生于衰周、不得不然。世或黜之、以爲申韓慘刻、原于道德、亦過矣。又曰、釋氏固夷也、至于立志堅決、吾亦有取焉。其博學



兼取不以百家之駁掩所長如此亦足見其資之寬裕忠厚與世俗異也。伯謨甫晚得脾弱之疾春夏之交輒作不能食者彌月乃已。慶元五年夏病如常歲至五月庚申忽命家人爲之總髮既畢取鏡自照正冠危坐而歿得年五十有二。娶黃氏曹氏。男女各三男曰丕曰立曰平。女嫁張峯劉學稼。幼未行明年卜葬于武夷山石門寺之原。六月丕書來請銘其辭指甚哀。予雖老病昏眊亦重違孝子之意。且伯謨甫之賢固願有所述遂不敢辭。初德亨之文豪邁警絕人莫能追及。而伯謨甫之作則閑澹簡遠有一唱三嘆之音世莫能優劣之也。工于書自篆籀分隸行草諸體皆極其妙。又能講其時世之變與圓方腴瘠之法聽之終日忘倦。遺稿數百篇與它著書甚衆。丕等方輯之未成。好方技治疾有奇驗能逆決生死著傷寒括要亦未成。嘗謂予曰士貧惟賣藥可爲。然子孫繼爲之有怠

且欺則不免害人。不若不爲之愈也。大抵伯謨甫多才藝所能輒過人其思慮精詣又若此。然在伯謨甫皆不足言故不詳著。銘曰

方氏三徙而不出閩君從朱公始爲建人。武夷山麓鬱有封樹車過必式曰是爲伯謨甫之墓。

陸游撰 《渭南文集》卷三六

### 通判泉州石君墓誌銘

淳熙中余游太學得直諒多聞之友曰石君諱範字宗卿婺州浦江人也。其先占籍青社國初徙焉。君天資俊茂志氣超卓師事東萊呂公有所啓告服膺無斂。而羣居共學又多一時佳士薰炙涵浸氣質增美。肄業膠庠能道其師之賢德學問甚悉。余竦然異之遂與定交。後君仕日有名嘗調官中都。權臣氣焰方烈其黨有依勢用事能軒輊一時士大夫者與君有舊諷以一登權門美官可立得。君曰吾儒者改秩爲邑義固當爾奚以僥倖爲。卒

不詣。余以是服君自待甚厚而守正不撓如此。嗚呼。茲其師訓之所自來耶。曾祖諱沔。儒學起家。宰明之慈溪。年纔六十。念母年高。隨牒遠適。非所以養。致其仕而歸。時論高之。祖諱棗。考諱知言。君既歷官。贈考爲承事郎。妣于氏。繼母喻氏。俱爲孺人。初。君以紹熙元年擢進士科。爲奉化尉。歲饑。民貧。相率貸糧。境內騷動。君曰。是之不戢。乃吾失職也。單車疾驅。開諭而儆戒之。利害明白。聽者冰釋。又爲白官長。亟請于牧守監司。多方賑貸。其黨遂散。不戮一夫。海寇有逞其威虐。大爲民害。延及鄰境者。君設方略。一日就禽。改承奉郎。知處州麗水縣。大修版籍。嚴詭挾之禁。申自首之法。姦民猾吏。毋得表裏交蠹。條畫既井井矣。會以繼母憂去。徽之婺源。素號難治。令以罪罷者踵相接。無敢向邇者。君獨奮曰。心誠求之。何事不集。核吏姦。節冗費。裕財之源。不事科罰。月椿緡錢。歲以二萬計。鑿空取

辦民力大屈。君深念之。建請蠲什之二。其言懇切。感動人心。將漕者亟從之。由是大得民譽。賦輸如期。財用自足。通判袁州。峒寇陸梁。衡、潭、贛、吉被禍尤酷。袁當四郡之衝。人情慄慄。君攝郡事。練禁旅。閱民兵。廣儲蓄。博訪守禦之策。爭效所長。威聲甚震。盜無敢向者。通守泉南。兼南外宗正丞。又佐舶司。而左翼養軍之費。復隸焉。事亦叢矣。剖析隨宜。莫不中節。余益信君才力敏裕。非若腐儒之膠固不通。而俗吏之所爲。君亦不屑也。可不謂賢乎哉。嘉定六年九月二十三日。終于官舍。享年六十有六。官承議郎。既納祿。轉朝奉郎。八年十月乙酉。葬于邑之松塘原。娶陳氏。封孺人。子武。戡戡。女適永嘉進士宋纓。次未行。孫男一人。仰。孫女三人。君敬奉庭闈。得繼母歡心。拊教幼弟。恩意深篤。喜道人善。亦嫉惡。居官廉潔。俸入外一不敢妄取。奏院劉君狀其善行詳矣。將葬。武持以請銘。余曰。子之先



君、吾同堂合席、金蘭之契也。子不我屬、猶將稱述之、況請之勤耶。乃作銘曰、

才之裕、莫邪銛兮。行之潔、冰霜嚴兮。老于一倅、取之廉兮。茲爲幽宮、懔兮瞻兮。

袁燮撰 《繫齋集》卷一八

從仕郎汪君墓誌銘

君諱伋、字及甫、其先自歙徙明、明陞府、遂爲慶元奉化人。家于雙溪之上、非通都也。持家謹恪、不自表暴、非干譽之士也。而名聲日出、藹然芬芳、取重于士大夫、下至閭里細民、亦稱之曰君子人也。迨其歿、皆痛傷之。人心愛敬如此、豈易得哉。培其根、浚其源、所由來者遠矣。曾祖諱康世、妣徐氏。祖諱邦式、高州助教。妣孺人陳氏。父諱汝賢、常州錄事參軍。妣安人張氏。君自爲兒時、識趣已不凡。長益嚴重、有植立之志。宜州通守舒公之未第也、已有盛名、錄參公器之、妻以女。君與之款密、薰染浸灌、

新益有加、美質增長、遂因舒公而熟聞四方師友學問操履之詳。故太學錄沈公嚴毅不苟合、君勤勤請益、以得親炙爲幸。又從將作監楊公講立身之要、一話一言、服膺無斂。夫以君之志操、而周旋于明師畏友之間、進而不止、誰能禦之。故雖生長巨室、而食飲被服、與寒素無異。遵規矩、履繩約、不溺于驕侈之習、而非嗇于財者、義所當爲、勇決不靳。其于族屬也、高年者敬餽之、匱乏者周恤之、可教者獎拔之、或資以脩脯、勉使從學、或畢其嫁娶、或助其喪葬。里有重費、則以爲己任。更新縣學、材良工堅、有助風教。建石梁于雙溪、新旣壞于南江、續惠政于歸湖。建炎十年中興、興大役、費緡錢殆數百萬、歲租減價而糶、凶年損廩賑饑、代輸口賦、關征、以寬民旅。仁心孚洽、聞風起敬、士之過其里者、必求見焉。大學曰、仁者以財發身。其斯之謂歟。淳熙中、鄉士大夫列其行義于朝、補迪功郎、該思

陵慶壽恩、循修職郎、調漢陽尉、不赴。紹熙四年、郡太守表薦其材、超轉從事郎、請祠、監南嶽廟、自是不復調矣。雖恬于仕進、居官之美、不克著見、行乎閨門者、是亦爲政也。事親惟謹、年垂六十、愉色養母、慕若嬰孺、承其志意而敬行之、凡輕財樂施、皆庭闈意也。不尙峻急、而家人憚之、如侍嚴師。不事苛細、而家政有條、疾徐得所。尤急于教子、以身率之、雞鳴而起、盥頰誦書有程。點勘訛舛、手自親之、心所未安、質之同志。筆其格言大訓、朝夕對之、勉自警策、至老而不倦、以故諸子皆知務學。又嘗遣其長子受業于永嘉、其志念深矣。雅意林壑、幅巾藜杖、逍遙自適、時以棋酒自隨。款故人隱士之廬、譚論竟日、精神不衰。既屬疾、知不可爲、語人曰、吾將逝矣。胸中了無一事、正巾整冠、有問者必拱而對、至屬纊亦拱、臨死生之變、而泰定如此。寔嘉定十一年十月七日也。享年七十一。娶王氏、先三年

卒、葬于邑之松林鄉安住山。子男三人、龍友、嘗偕漕計、龍紀、龍允、女四人、長適甥袁邦度、次適迪功郎景陵尉鄭次申、次適承事郎長興丞謝奕修、次適迪功郎前於潛尉陳祖開。孫男一、介。孫女一。君歿之次年、諸孤來見、泣且言曰、龍友等將以十有二月壬午、奉先君之喪、啓先妣之窆、以合葬焉。敢以德銘爲請。余雖老且鈍、然四十年交游之久、知之深矣、奚可以辭、于是勉從之。銘曰、

汪氏一門、鄉評所宗。都漕種德、久而愈豐。偉歟及甫、前規是蹈。造次不忘、可謂克孝。猗歟渥歟、及甫之澤。咨爾後人、續次血脈。

袁燮撰 《繫齋集》卷一九

涪州教授陳敞由墓誌銘

正年十六七時、聞南峰羅堅甫、巴岳陳敞由遊郡庠、皆以妙年明經、屢冠諸生、聲譽赫然、意甚慕之。已而束書入郡城、首求交於堅甫、敞由。堅甫、敞由



儒藏



一見相好、如手足兄弟、相與爲古文、用力於古學、而不爲世俗之學。堅甫少正一歲、散由少正二歲。堅甫治春秋、時散由治易、而正治周禮。散由曰、吾於易亦頗窺見三聖門戶、然吾世經周禮、今若捨吾父之業而不修、則人其謂我何。於是復治周禮。吾鄉之爲周禮數十人、其間老於經者亦多、正一無所畏而獨畏散由也。淳熙己酉、正薦於鄉、堅甫薦於漕司、而散由偶失之。其年秋、正奏名外省、而堅甫偶失之。其後堅甫、散由年益長、所學益該貫、其爲文汪洋浩博、矯出流俗萬萬、而爲吾鄉有司者輒棄之不錄、正每爲之慨歎。嘉泰辛酉、散由始薦於鄉、遂爲外省第二人。嘉定癸酉、堅甫亦爲外省第二人、而散由已不及見之矣。正每見堅甫、語及散由、正未嘗不爲之出涕也。散由諱用庚、散由其字也。其先出於潤州、潤州之祖仕於隋、相傳揚子江有神馬、時出爲苗害、潤州之祖設方略獲之、

乘以赴闕、尋得罪二子、竄蜀、占籍巴川之石磴。六世祖彥疊以經學教授于壁山、因徙家焉。疊生承祐、祐生文進。進二子、次曰繼習、是爲散由之曾祖。大觀間、復居巴岳之下、生同超、是爲散由之祖。超生子震、是爲散由之父。散由英邁不羣、讀書必求其指歸、然後發之論議。故引筆數千言不休、粲然皆有條理、見者驚歎。其父亦曰、吾家屢遷、興陳氏者其此子乎。吾當大吾門閭以俟之。先是、舊居庫陋弗稱、於是改作。散由年尙少、見其父期之遠、益感激奮勵、誓力學致身、以承其父之志。即大書於門以記云。嘗讀書巴岳山中、山有全石一峰、高出雲際。四面望之、如人置香爐於几案上者、名曰香爐峰。散由愛之、因自號香爐峰子。暇則益取濂溪太極通書及兩程子、張子遺書讀之、沉思玩味、以窮究夫事物性命之原。惟其涵養之久、停蓄之深、氣剛而和、言直而婉、故自其成進士赴闕釋褐、公



卿大夫皆翕然推重。授昌州教授以歸。四方士子從講學者甚衆。學舍不能容。則請於州。開貢院以館之。其食於官者。兩倍其舊。廩粟不足。臺府各捐公帑以助。乾道間。昌元士人楊甲爲六經圖。頗便觀覽。好事者版行之。徧天下。啟由曰。此鄉先生之作。四方宜於此取正。而吾學無其書可乎。遂搜訪善本。重加校正。仍命工筆札。善圖畫者寫之。刻之石。以示學者。吳曦叛。書至。啟由獨託疾不出。曰。璘父子好殺人。功小而報大。天厭其侈。將滅之矣。尋命賦題曰。蜀莊隋和。何以加。春秋題曰。盜竊寶玉大弓。欲以忠義感動人心。同官皆危之。已而果有告其不稱元年者。會逆黨伏誅。乃免。嘗上大帥楊公輔書。責其避賊不討。又責其畏避形迹。不能引拔天下之士。楊公大喜。謂人曰。是能攻吾之短者。他人莫能也。用舉者陞從政郎。再調涪州教授。或曰。峽中士風寡陋。奈何。啟由笑曰。異時伊川先生

讀易於此。譙侍講從之。尹侍講避地於此。而馮貫道從之。今吾得以訪求諸老先生之嘉言善行。而自勉焉。吾之幸也。夫何陋之有。既至。升堂講易。探蹟索隱。明天地陰陽消息盈虛之理。以見君子小人進退往來之機。士之自遠來者。復如昌州之盛焉。知州事謝侯。良好善不倦。每聞其講說。深用歎賞。舉之曰。學有源流。行無瑕玷。人謂此語。惟啟由可以當之。無愧。嘗攝郡倅。會歲旱。被臺檄。慮囚屬邑。冒大暑。往來漲江。感疾。遂不起。實嘉定二年六月十九日也。啟由家素貧。爲人廉介恬淡。不肯隨世俯仰。急義如飢渴。不盡力不已。食客常滿門。所得俸。隨手輒盡。嘗謂廣田宅。乃所以愚子孫。惟喜收書。書滿家。囊無一錢。死之日。無新衣以斂。客其喪于涪陵。不能歸。謝侯周之。乃能歸。啟由事後母有至孝之行。事有人之所甚難者。而啟由所以處之。如古卓行孝子之爲。而未嘗自言於人。大帥吳

公獵瀘帥李公寅仲、漕使費公幾皆深知之而稱其難。李公尤所愛重，嘗以顧問科薦之。啟由既沒而堂察之命始下，使啟由壽考，得以其平生所學少見於用，其施設必有過人者。悲夫！啟由兩娶張氏，皆邑人燁之女。前室既入門，相繼遭內外四喪，茹苦含辛，送死養生，不以累啟由。鄉人賢之。子七人，男曰孜，曰薦老，早卒。曰應老，出爲人後。曰愍。女長適羅仲禮，次在室。季早夭。內外孫男二人。啟由天才既高，其爲文探幽發微，斬落陳言，有追古作者之志。其卒也，得古賦、詩、書、簡、啓、序、記、跋、誌、銘、講義、雜著等凡三十卷，爲爐峰集，藏於家。孜等將以十一年十一月丁酉併舉，前夫人之喪合葬于其鄉震山之原，書來請銘。正惟啟由之父字君德，經明行修，鄉里推爲前輩，亦與正爲忘年友，正嘗過其家拜之。今三十年，啟由既不幸，其父亦已考終。正也偶後死，忍不爲之銘。銘曰：

嗚呼啟由，篤於典墳，自其少時，超然不羣。事親以孝，斯可事君。正少愚賤，於道也勤。賴此良友，共興斯文。天實奪之，不大顯聞。彼其之子，何爲紛紛。慨念及此，心焉如焚。作此銘詩，永播清芬。

度正撰 《性善堂稿》卷一三

王藺傳

藺字謙仲，淮之廬江人。擢進士第，爲信州上饒簿。鄂州教授，四川宣撫司幹辦公事，所至能於其職。除武學諭。孝宗皇帝幸兩學，藺迎法駕，立道周，帝目而異之，命小黃門問之姓名，自是簡在。遷樞密院編修官，輪對奏五事，其一言絕左右之毀譽，而來衆正之言。杜權幸之請求，而行大公之道。勿使如牢梁、五鹿充宗、貢禹、匡衡之結交石顯，勿使柳宗元、劉禹錫、韓泰、呂溫之附麗王叔文。其二言今之從官，他時執政，豈容任非其人，進不以道，脂韋患失，尸位獻諛。知人主之愆違，而未嘗有正救之

言。睹朝廷之闕失、而不聞有論列之疏。專求瑣細、以備對揚。唯恐一事之背時、一言之忤意。蘇軾有言、爲國者、平居必有忘軀犯顏之士、則臨難庶幾有徇義守死之臣。願明示德意、訓飭從臣、革偷諛之風、作忠直之氣。其三言、貪暴之吏、權剝侵漁、以羨餘悅朝廷、以賄賂結權要。托名獻助、而恣貪饕。征利斂財、以釣官職。或超居侍從、或擢爲監司。雖執政典藩、亦且效尤市寵。至於中外兵將、沿邊帥守、權要販鬻、皆有主名。狐鼠依託、氣焰赫然。羣小爭趨、其門如市。請求必獲、如探諸囊。縱使彈擊、不過罷免。經營擢用、旋即如故。儻去貪暴、如比者斥胡仰、許子中之徒而不用、追周極、韓梈之命而不行、允合人心、聞者稱快。庶幾齊威王烹阿大夫、與左右嘗譽者之爲也。其四言、淮爲江浙藩籬、民爲藩籬根本。豈宜興無益之役、而自搖根本。無益之役、今有三焉。和州、泰州開河填河、一也。定山創建

牧馬寨、二也。沿江州郡燒六合城磚、三也。書曰、怨豈在明、不見是圖。孔子曰、吾恐季孫之憂不在顓臾、而在蕭牆之內。願圖不見之怨、思蕭牆之憂。其五言、近年貴戚、特旨除授、頻撓朝綱、專徇私欲。昔王旦不許其兄子舉進士、與寒賤爭。至其終、子素猶未官。陳執中爲相、其女爲壻、求官、執中以爲非房奩中物、而不與。豈可壞公道、而不恤人言。讀未竟、帝喜見顏色。明日諭大臣曰、王某敢言、宜加獎擢。遂有宗正丞之命。尋出守舒州。陛辭、奏疏言、陛下任賢去邪、而臣下猶有附麗之行。聽言納諫、而臣下猶有諂諛之風。循名責實、而臣下猶有苟且之習。清心寡欲、而臣下猶有聚斂之政。愛惜名器、而不能止予奪之偏私。總攬權綱、而不能絕左右之毀譽。大綱不舉、而詳法是備。誠意不孚、而虛文是崇。吏治苛而民勞、軍政乖而士怨。諸路置承受、而開士夫交結之路。諸軍置承受、而爲監司遙領



之名。如此之類、皆今日事之未得其正者。欲事之得其正、莫若來切直之言、以通下情。今有爲切直之言、則欲壅蔽陛下之聰明者、皆指以爲求名、求名之說一聞、而陛下不復知天下之事、姦邪之跡矣。夫士不使之趨名、而使之趨利乎。名者、聖人所以綱維萬世、而奔走天下者也。聖人知夫區區爵祿刑誅、有不足恃、而後爲之名、曰名教、曰名分、曰名節、曰名義、曰名器。凡加之以名者、天下視之以爲防範、雖姦雄睨之、而不敢有輕心焉。上之人乃欲自輕之乎。又言、立國大務、在民與兵。民者國之根本、兵者國之爪牙。欲得實惠及民、莫如寬卹州縣、使戶部勿急迫於內、轉運勿急迫於外。欲結士心、以張國勢、當使主將恤偏裨、偏裨恤行伍。庶兵民不致俱困、而根本爪牙兩得之也。又言、舒州鑄鐵錢、歲以二十五萬緡爲額。城中置監、去江百里、灘磧淺澀、鐵岸不通、悉市於民、不堪其擾。乞與減

額、無使重困。帝曰、卿議論峭直。尋降御筆、王某鯁亮敢言、除監察御史。時相趙雄除帥成都、即上疏言、蜀去朝廷甚遠、祖宗未嘗用蜀人守之。今雄在相位累年、水旱相仍、公私交病、災變屢見、乃全身而去、復捐全蜀、以便其私、無乃不可乎。帝從之。旣而搏擊屢上、人所難言、奮不顧身、任怨無忌。兼崇政殿說書。一日、帝袖出幅紙賜之、曰、比覽陸贄奏議、所陳深切。今日之政、恐有<sub>⑥</sub>如德宗之弊者、可思朕之闕失。條陳來上。藺卽對曰、德宗之失在於自用、遂非、盡疑天下之士。退上疏言、陛下聖學日益盛、德日新、乃以德宗自警、旣往之悔、想所欲聞。有以宮僚攀附而登輔佐者、貳陛下精一之心、汨陛下清明之德、而外戚始用、而武臣繼之。武臣用、而財利小人、誕妄附麗者、又繼之。引類援朋、非貪卽鄙。蓋群臣誤陛下、非陛下本心。何必自疑、而恐有德宗之弊也。德宗之弊有三、一曰姑息藩鎮、二曰



委任宦者、三曰聚斂財貨。今朝廷再置宣撫而軍帥再逐之。武臣無攻戰之勞、而以節鉞寵之。自曾懷以財用交結而取宰相、吳淵、陳峴、蓋涇之徒以聚斂而取侍從、近又有以聚斂而廁版曹者。至於委任之弊、害政尤大。秦二世偏信趙高、梁武偏信朱异、隋煬帝偏信虞世基、唐憲宗偏信吐突承璀、可不監乎。帝嘉納之。遷起居舍人、奏疏言、二三大臣當同心協謀國事。某事可行、某人可用、則相與請而行之。某事宜罷、某人宜黜、則亦如之。若面不相規、背輒互毀、蓄縮首鼠、非所望於大臣。又奏疏言、連歲星變、災惑太白、多爲兵占。頃者湖南之郴寇、江西之茶盜、二廣之妖賊、沉黎之小醜、丹陽之饑剽、寧國之凶謀、幸而勦殄、宜豫備禦。又三陽用事之時、日中有黑子蔽明之異、殆踰兩旬。二月三月之交、風雨霰雪、踰旬不解。變不虛生、當知警懼。君之用人、善則爵之、惡則棄之、今不問其才不才、

因緣私恩、寵以公器。如錄用舊學之臣之家、而某人某人一時同命、衆論駭然。貪汙已著、畀以郡寄、臺諫論列、反令監司體究、監司又畀之。由是州縣貪沓尙多、朝廷除授失當、臺諫不悉舉職、給舍殆廢、繳駁。內侍鄧從義死、賜予直萬數千緡、而步軍司兵人貧乏、至於爲盜。內官、醫官、樂官、賜予之多、服用之侈、遷轉之易、聞諸市里、簇談竊議、謂今最樂莫如三官。其憤怨也深矣。可不思警懼、而有以正之乎。又面奏言、崇觀間章蔡之徒變國事、馴至犬羊亂華<sup>①</sup>之害。帝聳然曰、非卿言、朕皆不聞。磊磊落落、惟卿一人。除中書舍人兼侍讀。入謝、奏疏言、臣向者將命使虜<sup>②</sup>、往來中原、有黍離麥秀之感、因思中原之亂、蓋其始也、兆於法度之紛更、而其終也、成於忠賢之放逐。由是朋黨之論日堅、邪枉之類日熾、是非之眞日亂、威福之柄日移。國家之亂、於此乎成。自是而後、賢人君子不復可以容身於

朝姦佞得時、闔寺壞政。聰明壅蔽於上、而下不敢言。億兆怨譴於下、而上不得知。天下之勢、一旦潰決。至于今日。陛下聖略神謨、昭灼理亂、而外攘之效未若周之宣王。今日內修者猶有恨也。帝覽疏、批問內修之道。再奏云。今日急務、天下大計、在於教化未孚、人才未得、民力未寬、兵勢未強、財用未裕、有僭侈之習、無廉耻之節、守宰之貪蠹、征斂之苛刻、州縣之困匱、官吏之煩冗、失將士之心、忘戰守之具。陛下雖欲爲宣王之功業、而未修宣王之政事。雖有宣王欲爲之志、而未見有如申、甫、方、召能爲之臣。願廣求人、之方、盡用人之道、使才各當職、人各自竭、政事修飭、紀律赫張、然後惟陛下所志。時旱暵求言、詔中外條上闕失。藺奏言、今巨貪大猾、爲民蠹、爲軍蠹者、安意肆志、坐享爵祿、彼其始何自來哉。前者獲焉、後者效焉、風俗波蕩、漫不可收。故尋躡他蹊、依附餘熱、以假借竊取者、今猶

紛紛。人言不平、則其心之不悅可知矣。人心不悅、則必傷害和氣、故上天譴告、災異重仍、星辰失行、旱暵爲虐、閭里疾疫、人民流徙。此豈可歸之於數、蓋必有召之者也。除禮部侍郎兼吏部侍郎。因講周易徹章。帝言其難。藺奏言、陛下即位二十有二年、而易方終帙。蓋經筵進講、月不過二十餘日、或視朝對班、多不及御講殿、則又僅半其數。臣謂不御講殿日、宜令進入講義、清燕覽觀。如此、庶幾講官皆不廢職。帝喜曰、慮不及此。卿言是也。又上疏言、風俗靡靡、激昂奮厲之氣、不能勝軟熟偷惰之習。廟堂之上、不過酬酢節日、而皆非大務。監司郡守聚斂無藝、國家之元氣、政事之大本、民生之司命、皆不及講。武爵超越、人皆輕易、當謹名器、以爲激勸。御筆謀選監司、欲得剛正如卿者、可舉數人。即奏舉潘時、鄭僑、林大中等八人、乞賜擢用。又奏言、人才之趨向、視一時所用如何。今朝之職事官、





號爲收才養望之地、而齷齪循默、衰病昏聩者居之。六院四轄、本以擢縣最、備臺察、而多舉情故、專收培克。六院架閣、率是庸懦、至於剛毅特立、不屈於人者、則往往憚其見用而屏廢之。用舍之勢、必有以鼓動天下、然後可以得人、爲邦家之光。又奏言、貪刻之政、尙多於州縣、愁歎之聲、未銷於田里。廊廟私意、未能一除、授之論臺省要任、未能罄繩駁之公。朋比將成、蒙蔽有漸。苟賤之行、士人不羞。贓墨之風、大吏不革。人思僥倖、網復闊疏。昔康澄爲後唐明宗言、國不足懼者五、深可畏者六。願陛下思康澄言、六畏漸去、而五懼以銷、人之意也。天之意也。帝爲之改容聽納、明諭以大用意。會以母憂去國、服闋、除帥江西。不期年、召還、除禮部尙書。甫踰月、除參知政事。未幾、孝宗內禪、光宗即位、除知樞密使。光宗厲精初政、而公亦不存形迹、除日或從中出、有未愜人心者、公輒留之、納諸御坐。或

議建皇后家廟、力爭之、以爲不可。因應詔、奏言、天下之治無他、其要在君志之先定、願陛下先定聖志。國之所恃者、曰民、曰兵、曰財、曰紀綱、曰版圖。今民窮、兵冗、財乏、紀綱廢也、版圖未復、甚可畏也。儻聖志先定、則事事一新。志不先定、則日復一日、天下事去矣。條列八事上之、一曰擇邊帥以責久成、二曰越繩墨以收奇傑、三曰懲姑息之弊、四曰儲三衙將帥、五曰止絕內降、六曰貴重武爵、七曰罷額外軍官、八曰去御前祇應名色、皆當世務要。援引祖宗成憲、請遵而行之。疏入不報。諫臣論之以罷去。起帥閩、改祠官。易鎮蜀、不就、復領祠、除帥江陵。寧宗嗣位、易鎮湖南。久之、臺臣論罷歸里、奉祠者七年、微疾而薨。藺氣貌魁岸、才量軒闢。初受知孝宗、感激殊遇、每有論奏、輒盡言無隱。凡將相近臣、大帥巨閹、不協于法、悉抗疏極論。旁觀懾氣股栗、而藺山立不移。事無大小、造膝密啓、莫知何語、

至有罷行、人始知之。一時聲望赫奕、雖庸人孺子、聞其名亦竦立起敬。嘗使金虜、謂接伴曰、兩朝歲遣使、南北通驩、北朝使者即南朝臣子、胡爲弗虔。請白諸北朝、凡遣使者、勿用儉人、無使如魏正吉、烏林答、天錫、張九思之頡頏不恭。色正詞厲、接伴拱聽。公歸以奏、孝宗曰、卿如此諭彼、耶。後北使來、問公起居、曰、王尙書尙無恙否。蓋其直諒剛正、雖夷狄亦敬畏之。一時君臣相得之盛、世所罕儔。其後卒以言者排詆去國、亦所遭之時然也。平生所爲文、奏議最多、傳于世。

杜範撰 《清獻集》卷一九

校記

- ①起：原無，據四庫本《後村集》補。
- ②請：原作「諸」，據右引改。
- ③陂：原作「彼」，據右引改。
- ④儉：原作「兒」，據右引改。
- ⑤斃：原作「弊」，據右引改。
- ⑥閱：原作「閤」，據右引改。
- ⑦卑：原作「畢」，據文意改。
- ⑧以：原作「已」，據右引改。
- ⑨巾：原無，據右引補。
- ⑩世：原作「也」，據右引改。
- ⑪此句文字疑誤。墓主生於紹興十八年，不得云「建炎」，且建炎亦無十年。
- ⑫紹熙：原作「紹興」，按文所叙年代，應是「紹熙」之誤，因改。
- ⑬匡衡：原作「康衡」，此是宋人避諱改，今回改。



儒藏

宋儒碑傳集 卷一六一

⑭「寒」上原衍「韓」字，據同治本刪。

⑮承受：當作「承受」，即走馬承受，受皇帝命偵伺各地情況之官。

⑯有：原作「不」，據同治九年吳縣孫氏刻本《杜清獻公集》改。

⑰犬羊亂華：原作「中外紛擾」，據右引改。

⑱使虜：原作「北朝」，據右引改。

⑲「盡」上原衍「方」字，據右引刪。

⑳又：原作「及」，據右引改。

㉑虜：原作「人」，據右引改。

㉒烏林答：原作「烏凌阿」，據右引改。

㉓彼：原作「此」，據右引改。

㉔夷狄：原作「敵人」，據右引改。

宋儒碑傳集卷一百六十二

羅點

端明殿學士通議大夫簽書樞密院事崇

仁縣開國伯食邑七百戶食實封一百

戶累贈太保羅公行狀

曾祖諱起、贈太子太保。妣陳氏、贈文安郡夫人。祖諱琢、贈太子太傅。妣鄧氏、贈蘄春郡夫人。考諱朝俊、贈太子太師。母繆氏、封永寧郡夫人。公諱點、字春伯、姓羅氏。羅本熊姓、顓帝之裔也。春秋時爲小國、能抗彊楚、左氏傳紀之。立國之地、即今襄陽之宜城、後徙南郡之枝江、子孫不忘厥初、因以國爲氏。自秦、漢至唐、雖時見于史策、然罕有功業宏大、名位顯榮者、故莫詳其世系。五季時、公之先世實居江西之豫章。我宋之興、徙于撫之崇仁、厥居高垵、族黨浸繁。大父太傅又徙于高垵之五星源、遂占籍焉。公天資穎悟、八九歲時、能援筆屬辭。及長、

志向卓犖、念其家世修儒業、而門戶未振、思所以大興起之、擺脫凡陋、刻意講學、結交英俊、每以追躡前修自勵。兩貢于鄉。淳熙二<sup>①</sup>年進士甲科。時孝宗皇帝以俗儒少實、頗有厭薄、公對策曰、臣聞儒者之道、與天地相爲始終、與古今相爲表里、與風俗相爲盛衰、與治亂相爲升降。昔者天地之始、民生其間、混然無別。聖人者、爲之正君臣以相接、爲之篤父子以相愛、夫婦則相賓、貴賤則相資、上下則相維、儒者之道已默行于其間矣。至今賴之以安、以佚、以生、以息、而不爲匪僻邪暴者、誰實使之。故曰與天地相爲終始。聖人猶慮後世之無傳也、書之簡編、示之標準、如是而安治、如是而危亂、可以爲師、可以爲戒。後人得以按籍而求、隨索而獲、故曰與古今相爲表裏。夫風俗之美、非自美也、常自仁義始。風俗之惡、非自惡也、常自功利始。儒者之道、必尙仁義、必緩功利。仁義之效遲、功利之



效速、人情厭遲而喜速、所以舍彼而取此。然久而後成者、又不可以遽壞、旦暮可獲者、不足以久安。故曰與風俗相爲盛衰。夫儒者之道、非必廣學校、增生徒也。畏天修己、任賢愛民、恭儉樂諫、不自用、不變古、此用儒之實也。如是者必治。儒道之不用、非必擯斥士類、毀廢經籍也。忽天自怠、棄賢虐民、恣玩好、惡諫臣、自恃其聰明、輕變其成法、此不用儒之實也。如是者必亂。故曰與治亂相爲升降。昔漢高帝不喜詩書、輕毀儒生、而遇子房、四皓也良厚、惟恐赤松之志一動、而採芝藥不改、此所謂務實也。患莫甚于名是而實非、人主當求其真、不可惑于似。如穀粟之必可以養生、如藥之必可以伐病、是真賢也。言之若可聽、而用之則罔功、是腐儒也。惟真賢是用、而毋以腐儒參之、則治具畢張矣。其大指如此。天子覽而嘉之、擢爲第二。時年二十六、調定江軍節度推官。趙忠定公將漕江西、公往

見之、相與語、因及獄事云、部內有訴貪殘者、令某官鞫之、而屬之曰、得其情、則與剡薦。公曰、斯人之罪、已知之否。曰、未也。公曰、真僞未可知、而以利誘之、是示之己意、而欲鍛鍊其罪也。無乃不可乎。趙公悚然曰、微君言、吾慮不及此。建安游君、九江魁傑士也、時爲九江錄參、一見契合、相與爲莫逆之友。丁太師公憂、服除、除太學博士。十年二月、召試館職。其鯁切之語有曰、國無盡心瘁力之臣、則事不濟。今皆悅夫背公營私者矣。國無危言極論之臣、則德不進。今皆悅夫偷合苟容者矣。國無仗節死義之臣、則勢不彊。今皆悅夫全身遠害者矣。夫用人之患有七、授之非宜、進之太拘、責之太備、待之太輕、任之不專、辨之不明、保之不力、皆非用人之道。善用人者、必反諸身。溺晏安、欲速成、任喜怒、疏忠良、私好樂、有一于此、皆爲害政。爲人主者、戒之謹之。奏御、天子不以爲忤、甚稱獎焉。拜秘書省

正字。六月、遷校書郎、尋兼國史院編修官。天旱、詔求直言、公上封事曰、臣聞天下將治、必有萌象、將亂亦然。聽其議論、則正直是與、柔佞是惡、觀其朝廷、則大臣任責而不自疑、小臣盡情而無所隱、治之象也。聽其議論、則訕侮正言、仇讎正士、觀其朝廷、則大臣持祿而不敢極諫、小臣畏罪而不敢盡言、亂之象也。祖宗立國以來、言兵不如前代之彊、言財不如前代之富、惟有開廣言路、涵養士氣、人物議論、足以折姦枉于未萌、建基本于不拔、則非前代所及。崇觀而後、此道浸衰。假紹述之名、而賢人盡逐。設朋邪之禁、而諫者有刑。創豐亨豫大享上之說、而姦諛日甚。馴致靖康禍、不勝酷。今陛下訪天下之事、非不至、求天下之言、非不切、曩之竊弄威福者、既赫然逐之矣。而羣下猶畏縮苟且、以言爲戒。或者今時議論凡陋、驅之使然。無所可否、則曰得體。與世浮沉、則曰有量。衆皆默己、獨言、則

曰沽名。衆皆濁、己獨清、則曰立異。此豈陛下所望于臣子者哉。今欲大有爲于天下、破此凡陋而後可。夫天理人事、感應甚明。自旱暵爲虐、陛下禱羣祠、赦有罪、曾不足以感動。及朝求讜言、則夕得甘雨。天心所示、昭然不誣。獨不知陛下之求言、果欲用之否乎。誠欲用之、則願以所上封事置籍禁中、時時省閱、當者審而後行、疑者咨而後決。宏謀偉論、從容召見、以質其言、以觀其才、而揣意迎合者必斥。治之萌象日長、亂之萌象日消矣。十一年五月、面對言、臣聞虛誕之風勝、則紛擾而生事。偷惰之習成、則頽靡而廢事。陛下初載、急于事功、小人乘時、以才自進。久之皆以虛誕、紛然擾敗。聖意厭之、由是韜晦斂縮、日趨偷惰頽靡之域、其失等爾。臣願陛下復振起之、大而達于國家之大體、當世之急務、小而熟一方之利害、精一事之本末、莫不簡記選擇、以備任使。始之議論、必如趙充國之陳



邊事往復再三、叩竭其蘊、終之施行、必如劉晏之  
主邦計、遲久以須其成、假借以重其任、則無不詳  
之事理、亦無不盡之材力矣。十二年二月、遷秘書  
郎、兼皇太子宮小學教授。凡所開陳、必以正理、講  
論經義、日昃始退。蓋嘗未午而國公欲入、公止之、  
乃觀書不輟。至晡時、可以入矣、故不入。左右以爲  
請、公曰、國公務學、正爾得趣、奈何促之。顧使令輩  
取被以入、吾將宿此。左右曰、是間豈託宿之地耶。  
國公遜辭懇之、公然後退。五月、皇孫進封平陽郡  
王、仍以公兼教授。采摭古人行事、明白易曉、可爲  
勸戒者、合爲一書、名鑑古錄、蓋以古爲鑑、可知興  
替之義。日講一事、恭淑之始作配也、公以爲道之  
造端、于是乎在。而自古論修身齊家者、惟大易家  
人一卦最爲彰明較著、乃取先正司馬公所書、發  
揮其義、以爲端本正始之助。六月、除著作郎。上知  
公既深、將不次用之、然欲觀其民庸、乃以爲提舉

浙西常平茶鹽事。時十有三年正月也。陛辭之日、  
進言、自古大有爲之君、必有同心同德之臣。陛下  
宵旰求治、二紀于茲、未有攸濟。向者喁喁跂須機  
會之念、顧計本根之慮矣。人人上決于淵衷、物物  
取裁于睿斷、君勞而臣逸、雖有大志、不得達于天  
下、甚可惜也。臣願陛下于股肱心膂之地、更留聖  
慮、精考察于先、篤倚信于後、明白洞達、毋存形迹、  
而後與之進退人才、圖畫治道。爲之一日、則有一  
日之效、爲之一歲、則有一歲之效矣。先是崑山、華  
亭之間、有澱山湖、洩諸水道、戚里豪強之家、占以  
爲田、水由是壅。公既領庾司、有訴其事者、察得其  
實、奏請開之、且爲圖以進。天子親覽、亟從公言。貴  
勢無敢沮撓、百姓勇于赴功、不日而畢、乃刻石具  
述其事、以防他日築塞之患。民甚便之。常州無錫  
縣財賦舊額五萬九百貫、而每歲所入、止三萬九  
千貫、以耗剩補之、僅能充數。而群將意未足也、別



委一官受輸于縣令無得與。知縣事陳世修之之官也。謁公吳門。訪以爲邑規模。對曰。財用誠今日之急務。要以恩信爲本。恩信既洽。不憂不辦。必欲如今歲之俗吏所爲。有去而已。公察其持心之近厚也。意甚嘉之。世修既至毗陵。固請催科。仍舊貫。守不許。度不可爲。不就職而遽去。公與提刑王尙之奏稱其賢。乞復以一邑畀之。平江守王公希呂罷酒官。程師禮怨希呂之嘗督過也。當官吏餞別之日。攘臂詬之。公奏陛下進退羣臣。自有典章。師禮敢然。殆非所以令衆見也。陵夷之風。漸不可長。乞黜之。以正名分。從之。安定胡先生講道吳興。一時賢俊學焉者甚衆。既歿。人尊敬之不衰。郡太守每以季春設祭其墓。久而浸廢。公以事關風教。檄舉行之。十四年四月。兼權平江府。久旱祈雨。惟祀典所載加敬。天慶觀有何蓑衣者。挾妖術以誑俗。異時爲郡者神之。每祈雨罷。必就見焉。公獨不往。

何慍其不已謁也。以杖擊僚吏之車。厲聲辱之。公亦不顧。俄隨車驟雨。邦人大悅。時浙右諸郡多闕雨。公豫爲之備。奏所領八州。略計常平米不過三十四萬石。宜及今米價未至騰踊。廣糴以益之。幸而歲豐。不妨爲他日用。若其饑饉。貧民知官司有備。可無轉徙。七月。詔給度牒六十。鹽官、海鹽二縣。被旱尤酷。乞住催三等以下夏稅。和買役錢。及往年宿負。從之。華亭河流斷絕。邑宰劉璧相視青龍江。可通潮。而堙廢已久。集丁夫。給官米。不越五日。濬七十餘里。潮達縣市。又濬河東六十里。水及州城。當旱涸之時。有浸灌之益。表薦于朝。公誠心救菑。凡可以活民命者。知無不爲。而其大要。則以寬賦得人爲急。其言曰。水旱之來。緣事而應。民和則爲豐年。不和則爲凶歲。今之旱。民氣不和之所致也。州縣有無所從出之虛額。斯民有不勝其擾之誅求。往時歲額。本非若是多也。惟言利之臣不恤。

國體、陰自增益、或獻羨餘、遂爲定數。民力愈困、逋欠愈多、徒挂簿書、實難催理。乞詔帥守監司、公心參考、蠲減所增、立爲中制。又言、六月間、海鹽流移甚衆、自聞住催官物、漸還故里。蓋民之流移、未必盡因闕食、亦緣所收微薄、舉目荒涼、又慮刈穫之後、官私逋負、交相催逼、所以輕去鄉井。檢放之令、誠不可緩。時平江旣除郡守而未上、公言、救荒一事、州縣多不介意、奉行滅裂。臣不躬親巡歷、督責官吏、無以上寬憂顧。請以府事委提刑兼領、而臣得以驅馳原隰。許之。故禮部黃尙書度時宰嘉興中書陳舍人希點爲平江觀察推官、杜君申、劉君允濟、諸葛君千能皆一時僚吏、有志于民者、咸委用之。且薦達焉。海鹽宰鄭偉心不在民、崇德宰王迪簡勸分無術、皆奏罷之。聞海鹽丞陳祖永、長興丞黃庸之賢、則請以祖永攝海鹽、庸攝崇德。淑慝區分、以故人爭自奮。公以忠誠自結、主知拯救艱

阨、繫公是賴。而將漕者從旁撓之、公欲裕民、漕欲裕財、趨向殊塗、鑿枘不相入。久之、漕護使客歸言于上、臣舟行運渠、兩岸禾稼雲委、不可謂荒。此特常平司所委官屬張大其事、以希賞爾。獨不思渠能載舟、灌溉所及、稼安得不茂、稍遠則苗稿矣。賴天子仁聖、不信其言、而信公愈篤。故公益得以盡其力。慮遠鄉之恩惠不及也、分列諸場、或近或遠、雖窮僻之處、無不受賜。慮民力之不可過勞也、勸分所得、糴不出鄉、毋使運于他處。慮官司之耳目不能盡察也、選用鄉豪能任事者、理爲充役。歲月以酬其勞。富人不恤窮民、增價閉糴者、必懲其罪。姦民名爲貸糧、重擾巨室者、亦寘諸法。異時輶車巡歷、吏卒紛然、所至爲患。公則不然、從行不過數人、筆吏輿夫假諸所詣。或徒步十餘里、訪求民瘼、人不知其爲部使者也。有請于朝、勤勤懇懇、足以感動、故所欲無不從。分委官屬、置歷議事、筆而緘



之故其情無不達。事且竣矣，餘米尙多，普濟者三，明主不疑其濫，而公亦自信不疑，宜其德澤洋溢，入人之深。十五年二月，召赴行在。天子見公，喜甚，勞之曰：「一路饑民並無流移，米價不長，皆卿力也。」公惶恐稱謝，歸美于上，且言：「陛下矜憫黎庶，從臣所請，住催官物，臣即躬行隴畝，布宣德意，無不感泣，甚大惠也。而臣竊慮有司一旦督三年之賦，如久病新起，遽使負重，何以堪之？欲望聖慈，捐此微利，不然均諸三年，以漸隨納，亦足以少寬。」臣承攝吳門之曰：「交割王希呂任內緡錢四十六萬，而臣增爲五十二萬，以是知住催官物，無損公家之利，而足以繫斯民之心。」上皆然之。除戶部員外郎。五月，兼太子侍講。公之使浙右也，聞上以高宗升遐，服喪三年，而委皇太子參決庶務，內而寺監丞外，而郡守以下，皆得專決。奏疏云：「臣聞教子以事，當以其漸，凡除授許專決者，欲皇太子具名密奏，陛

下亦密加可否，審定而後行。俟其進退人才，熟悉愜當，則盡委之。至是又言：「陛下明燭四海，慮周萬務，高出羣臣之表。今而啓佑後人，則制行當不以己。堯舜禹授受之際，曰：『允執厥中而已。』此聖人理天下之常道也。陛下相傳之要，其在茲乎？」十月，遷起居舍人，避祖諱，改太常少卿，兼侍立官。直前奏事曰：「臣聞君子小人相爲消長，衆正進而後羣枉消，羣枉消而後國是定，國是定而後太平之基立。自古聖明之君，廣儲人才，扶植善類，使陰邪小人無間可入，豈直爲一時計哉？今惡直醜正之徒，私立名字，陰阻善良，稍相汲引者，指爲朋黨，稍欲立事者，曰爲邀功，而獨以循默謹畏者爲時才。此陛下好賢之美意，所以猶未白于天下也。願明詔大臣，公心求才，毋惑于邪說。」十六年正月，又言：「臣聞石虎之歿，晉朝咸謂中原可復，褚裒進營北方，蔡謨獨爲朝廷憂之。旣而果有伐陂之困，苻堅南牧，

衆心危懼、桓冲深以根本爲憂、謝安夷然鎮之以靜、旣而果有淝水之捷。此二臣者、可謂深于謀國矣。使吾德政修明、將相得人、足兵足食、根深本固、敵雖盛強、其若我何。如若不然、敵雖衰微、未可喜也。今金主已歿、士大夫之論、或謂後嗣誕逸、嘗侮厥祖、謂之不武。自今以往、疆場之事多、或曰敵啓爭端、必將有釁、鄰國多難、本朝之福也。臣以爲不然。夫因敵盛衰爲我喜懼、國勢亦可闕矣。先爲不可勝以待敵之可勝、事會之來、豈有終極。臣懼在廷之臣、勇怯不得其當、故願以古人之精識遠慮、爲公朝誦言之。二月、光宗即位、遷中書舍人。進言、臣聞鄭子產曰、政如農功、日夜以思之、思其始而成其終、朝夕而行之、行無越思、如農之有畔。自古人君未有不定規模于始、而能成事功于其後也。陛下有願治之誠、有克勤之德、立志無慮不堅、行之無慮不力、所慮者始基或未審爾。願詔大臣、悉

心講畫、今日天下之事、其綱要如何、其凡目如何、其施行之次第又如何、條列以上。陛下先隱之聖心、而以其章下之侍從臺諫、天下之百執事、反復其說、裁之至當、按爲國論、守而行之。始雖太詳、終不愆素、遲之五年、而明效可睹矣。上嘗訪公可爲臺諫者、公稱葉適、吳鑑、孫逢吉、張體仁、馮震武、鄭湜、劉崇之、沈清臣、此八人者、皆有學識氣節、通世務、知國體、不肯阿附苟合、當今之選也。被命使金、夙有脾疾、春夏間每作輒甚。太夫人及子弟皆憂之。公曰、君命至重、豈可爲身謀哉。先是、遣使非有大故、止以卿監爲之。上初登位、故重其選。公知金主喪服未除、必阻我使副所服金帶、豫以告掌儀者、使答之曰、此行也、告登寶位、宜以吉服將事。旣及境、逆勞者果以爲言、如公所教折之、不可、公使謂之曰、兩國通和已久、豈可因此小節傷大體乎。必欲易帶、有死而已、不敢從也。持之甚堅、金不能



奪。伴使有犯御嫌名者、公以交際不便申諭之、俟其更名、始聽傳銜焉。至河北、金以告登位、使不應加寶字、屢以語相恐、官屬失色。公怡然曰、我輩銜命而來、以義爲主、頭可斷、君命不可辱也。及廷見、授以國書、金無語。既辭、復所寓館、俄有宣徽使李盤者傳言、信使此來、國書稱寶字、有傷國體、回曰、宜奏。言訖亟去。公厲聲答曰、聖人之大寶曰位、不加寶字、何以別至尊。斷不敢奏。聞者皆悚。蓋彼所遣止云報諭、而此稱寶位、恥不我若、不欲深較、又不可不言、故略及之。翼日啓行、公豫戒馬卒、我與館伴語訖、即可分馬。及並轡而行、正色謂之曰、此來將禮、爲報皇帝登寶位、自初達名銜、以至見辭、曾不我疑。乃于臨別、忽以寶字爲嫌、不知何物臣僚、輒發此論。豈不知聖人之大寶曰位、凡一官一職、皆可以言位、至尊豈得無別。事理甚明、不敢歸奏。遂分馬、伴使愕然、不知所對。人皆服公彊毅有

守如此、天子深器重之、嘗謂公、舊爲宮僚、非他人比。有所欲言、毋憚啓告。公遂上疏曰、自古君子得志常少、小人得志常多。臣嘗疑之、深思其故。蓋君子之志在天下國家、而不在一己、行必直道、言必正論、不忤人主、則忤貴近、不忤當路、則忤時俗、小人之志在一己、而不在天下國家、所行所言、皆取悅之道也。用其所以取忤者、其得志鮮矣。用其所以取悅者、其不得志亦鮮矣。若昔明主、念君子之難進、則極所以主張而覆護之、念小人之難退、則盡所以照臨而隄防之。又言、皇子嘉王春秋浸長、已踰弱冠、此乃親近師友、進德修業、不可稍緩之時。而官屬未備、止于贊讀、直講二員、進見有時、未有藏修游息之益。皇支國本、所繫非輕、宜擇端良忠直之士、參侍燕閒、常在左右。又曰、兩淮荆襄、昔號多士、楚漢之起、一時共功、多淮、楚之人。光武奮于南陽、二十八將、大抵出于襄鄧宛葉。至今風俗



勁悍不能俯首程度、以科舉進、往往隱于屠沽、伏于田野。不錄用之、其肯甘心與草木俱腐乎。宜詔監司帥守、多爲搜訪、擇其尤者、猝然召見、驟加褒進、必將振勵奮發、而人才愈出矣。又曰、人主憂勤、則臣下協心、人主偷安、則臣下解體。今道塗之人、皆言陛下每旦視朝、勉強聽斷、意不在事。宰執奏陳、備禮應答、侍從庶僚、備禮登對。而宮中燕游之樂、錫賚奢侈之費、已籍籍于衆多之口矣。疆讎對境、窺伺間隙、百姓嗟怨、姦回生心。此聲豈可出哉。國家財賦、無承平所入之半、而用度無節、過政宣奢汰之曰、民力至此、其困極矣。若復悠悠、悔將無及。惟陛下深慮之。紹熙元年三月、公力求去、上不許。殿中侍御史劉光祖改太府少卿、公言、光祖天資剛介、謀身之計雖疏、報國之心甚切。未聞他過、忽此改除、中外相傳、皆所未喻。乞俾居舊職、以昭陛下之德。七月、拜吏部侍郎。極言、內降之弊、救其

流、不若窒其源。今有司雖許執奏、而干求未有明禁、則已求而復卻、既卻而復求、求者多則言者有時而瀆、言者瀆則聽者有時而厭、下瀆而上厭、則名器有時而輕、紀綱有時而紊矣。昔仁宗皇帝有詔、約束並許執奏、推劾干請之人、明正其罪。夫仁宗聖德恢洪、與天同大、然于內降之弊、杜其本原如此。此陛下之家法也。兼修玉牒官。十二月、兼權刑部侍郎。二年二月、大雨震電、繼以大雪。公言、天之道、各以類應。天道有陰有陽、人道有邪有正。爲君子、爲公朝、凡出于正者、皆陽類也、爲小人、爲後宮、凡出于邪者、皆陰類也。邪不可使勝正、陰不可使勝陽。今陽春方動、雷始發聲、而陰邪乘之、大雪繼作、陽欲發而不遂、陰宜伏而反縱。求之天道、則爲陰勝陽。驗之人事、無乃邪勝正乎。臣願陛下講切古道、勵精爲治、常使邪不得干正、陰不得勝陽、則戾氣日消而聖德日起。奏、仁宗嘗命楊惟德

等撰集景祐乾象新書、凡有災異、推其所自、以類相從、記晉建興元年十一月己巳、大雨震電、庚午大雪、後來之應、亦甚明白。仁宗爲之製序、藏諸秘閣、願陛下取而閱之。上從公言、亟索此書以進。翼日、遂詔侍從以下極言闕失。公奏陳五事、一曰務學問、二曰肅宮禁、三曰明黜陟、四曰察左右、五曰除國諱。臣聞義理不先盡、則多聽而易惑。志意不先定、則守善而易移。人主雖有自然之聖質、未有不資學問而能識治亂之原、明善惡之歸、辨邪正之分者。陛下盛德至行、天稟甚厚、而猶有宴游嗜好、便嬖聲色之娛、蓋未得所謂真樂者、以勝之爾。自古賢君、閒暇之時、未嘗廢學、講求古今得失之理、所以杜絕淫佚匪僻之好。陛下誠能于退朝之隙、日御經史、以蓄其德、日接賢俊、以究其義、造次不忘、精一不雜、運天下于掌中、將無難者、豈非天下之真樂哉。雖然、此人主之利、而非左右之利也。

惟剛健力行、乃克有濟。仇士良告老之言、情態具見、可不深念乎。臣聞鉤陳九重、華蓋萬乘、垣直太紫、庭儼雲龍、闌入則有罪、誤至則伏誅、所以防未然、限中外也。今宮庭之間、出入無度、竊弄威福、並緣爲姦。陛下用一人、則指爲某人之功、去一人、則指爲某人之力。帷箔游宴、外無不傳、譏謗之語、籍籍于道、豈可不求其故哉。禦寒莫如重裘、止謗莫如自修。臣願陛下沖虛澹泊、勤勞恭儉、謹宮闈之禁、嚴中外之別、政事悉謀之外庭、咨訪不及于左右、則謗議不作矣。易曰、閑有家、悔亡。可不深念乎。臣聞進人而不明其所以進、則開請託之門。退人而不著其所以退、則來讒賊之口。近者大小之臣、紛紜去國、遠近疑駭、不知其罪。而宰執不敢問、臺諫不敢言。至于節鉞之除、出于御前直降、雖臺諫攻之而不勝、卒至于宣諭而後止。夫人主所恃以共天下之事者、宰執也。宰執有所不及、所恃以維



持紀綱者、給舍、臺諫也。御筆處分、祖宗所無、今紛焉四出。不由進擬、則宰執之職可廢矣。不經鸞臺鳳閣、何名爲敕。今而直降、則給舍之職可廢矣。陳善閉邪、獻可替否者、臺諫之任也。事有未審、可以宣諭而勿言、則臺諫之職可廢矣。孤立無援者、去之如卷席。交通附麗者、攻之如拔山。自此言路之臣、不過規喜慍以自結、順風旨以納交、賢者日退、小人日進、而陛下之勢孤矣。傳曰、無善人則國從之。可不深念乎。臣聞自古興隸小臣、未有久任事而不壞其國、亦未有壞其國而不及其家與身者。費無極、趙高、江充、息夫躬、劉隗、刁協、朱异、趙嚴之流、家國俱禍、覆轍可鑒。彼其初豈故欲至此耶。人主以情褻易親、與之謀謨帷幄、而此曹以輿隸小智、居之不疑。君有問焉、則曰安于泰山。而懼君子之繩己、則盡力擠之。君子去矣、國將危亂。又懼其得罪且死、于是乎續君之耳、使之無聞、此禍之所

由作也。今左右近習、雖不敢撓政、而簪履微臣、猶出入宮掖。道途之語、至謂宰執之拜罷、臺諫之進退、將帥之廢置、章疏之可否、非其人不決。往來之間、蹤蹟秘密、使人主受謗、中外切齒、亦豈門戶之福哉。昔英宗一召見王廣淵、周孟陽、賈黯極諫、以爲示天下不廣、可不深念乎。臣聞古者帝王無所諱忌、即位之始、卿授之策、曰慶者在堂、弔者在閭。拂心之論、日陳于前、而天下治安。享國長久、後世忌諱之多、無若秦、隋、而所諱之事、卒皆自蹈之。今天下之所恃者、陛下虛懷聽納、下情得達爾。然自一二小官、以言語斥逐、而忠讜路塞、循默成風。至于近者、求言之詔朝下、而上書之士夕斥、傳之四方、誰不駭異。祖宗崇獎忠直、惟恐不聞、草茅危言、未嘗加罪。惟崇寧之末、以星變求言、旣而消伏、則以應詔直言之士、附于黨籍、而治亂自此分矣。可不深念乎。臣愚不識忌諱、僭言乘輿、以及宮禁、抵



排貴要、觸冒危機、不得罪于今、必得罪于後、迫于愛君、萬死不悔、惟陛下察之。四月、兼侍講。三年四月、對于選德殿、論兩淮、荆襄爲國保障、而今日經理、曾無一事成就。民兵未免于騷動、城壁未免于難守、財用未免于虛乏。朝廷平時選置牧守、盡如內郡、按格計資、以補其闕、此固不足以得人矣。而又禁令太苛、操切之者急、采聽太輕、牽制之者衆、縱得其人、亦豈能盡其用哉。夫將委之以足食、彊兵、聚民、固險之事、固非苟簡倉猝之所能營。十羊九牧之所能辦也。審觀要害、州郡備御、未周者凡幾處、謹擇端重練達之人、分土授民、專意綏撫。官屬能否、得自行黜陟、財賦盈虧、得自爲輕重。內之議臣、毋責其細故、外之監司、毋拘以苛法。寬以歲月、假以權制、結以恩信、勵以賞罰。三年而考民庸、五年而覈邊實、則與今日不侔矣。昔藝祖懲五季蕃鎮之亂、盡收事權、歸于朝廷、君臣分嚴、臂指勢

順。然所以備西北者、規模與內郡不同、所謂因事而制宜也。爲今之計、不少寬其轡勒、未見其可。小雅曰、皇皇者華、廢則忠信闕矣。忠信旣衰、禁防雖密、終不足以制變。其人忠信、委任而責成功、蔑不濟矣。惟陛下圖之。權兵部尙書、兼權刑部。七月、面對言、恭惟仁宗在位四十餘年、致治固非一端、而要不出于愛惜人才一事。人主之心、常嚮善人、天下之論、常與善人、公道常伸、公議常勝。雖與當路異趣、時事背馳、勢不兩立者、然諒其本心、終不擯棄。范仲淹之攻呂夷簡、歐陽修、尹洙、余靖之助仲淹、雖皆補外、屬有西事、則起仲淹帥邊、餘亦收用。及仲淹參大政、修、靖遂列諫垣、蔡襄亦牽聯同升。其後石介作慶曆聖德詩、褒貶太切。夏竦中以奇禍、善類幾殆、而富弼賴聖主保持、迄登宰輔、修亦執政、襄、靖俱爲侍臣。慶曆清明之治、嘉祐隆平之福、皆本諸此。今天下人才固無他慮、然或已經選



用未究所長、或因外遷、遂不復入。臣願陛下恢廣聖心、稽參成憲、博采而亟用之、則野無遺賢、朝不乏使、而先朝致治之美可冀矣。是歲日長至、車駕將朝賀重華、既而中止。公奏曰、自天子以至于庶人、節序拜親、無有闕者。三綱五常、所繫甚大、治亂安危、于此可卜、不當以爲常事而忽之。既往之事、悔之無及、惟願于一二日間、起愛起敬、講家人之禮、以安壽皇之心。尋兼給事中。時上過宮之意未決、公與侍從合奏云、陛下既涓日以告北宮、壽皇必引領以俟陛下。常人于朋友且不可無信、況人主之事親乎。唐肅宗之事上皇也、時自夾城起居、上皇亦時至大明宮。其後少失歡心、雖四方珍異、莫不先薦、而上皇日以不怡、辟穀不食、屏輦不如、浸以成疾。肅宗于是負不孝之名、萬世不磨。今陛下久闕溫清、壽皇欲見不可得、萬一憂思感疾、陛下將何以自解于天下哉。四年三月、對于清燕、又

言、中外所傳、或謂陛下內有所制、不能遽出、或云溺于酒色、不恤政事。以臣觀之、恐未爲然。上曰、安有是事。公曰、臣固知之。竊意宮禁間或有撓拂之事、姑以酒自遣爾。上領之。公曰、今閭閻匹夫、處閭門、遇逆境、容有縱酒自放者。人主宰制天下、此心當如青天白日、湛然清明、風雨雷電、晴霽之後、不停留一點、有所拂逆、便當釋然。上確許以出。公請上先期齋戒、飲食起居、皆當有節、庶可感動父子之情、上以爲然。八月、轉對言、吳蜀之相資、輔車唇齒之勢也。高宗、壽皇軫念全蜀、寢食不忘、寬民練兵、選將擇守、惟恐一事失當。邇來水旱頻仍、民力困悴、識微之士、懍懍于是久矣。瀘南之變、幾至滋蔓、賴國威靈、俄復殄滅。吳氏世有威名、軍情所附、挺沒既久、卹典不加、能不快快。重兵所屯、不可一日闕帥。制司差辟、資望俱輕、何以威服萬衆。惟陛下深念而亟圖之。九月、上猶未詣重華、公與侍從

兩省同上封事云、近者重陽聖節、陛下既受羣臣萬年之觴、恭上兩宮之壽、忽報前所降旨、不復施行、中外震駭、不知所自。向來猶是壽皇聖意、今乃如此、必傳旨者一時鹵莽、有此差誤、宜顯黜之、趣駕而行、庶乎不遠而復、羣疑消釋。十月、又奏、竊聞嘉王生朝、稱壽禁中、以報劬勞之德、父子歡洽、寧不動心。上念兩宮延望之意、又奏、重華宮曰、半年以來、車駕數遇過宮、每蒙慈眷、有旨姑免。因循日久、遂至疑惑。皇帝兢業過甚、懷不自安、幾若嚴憚。若非壽皇聖帝加意慰安、竊恐漸成間隔。今茲會慶聖節、欲望先期諭旨、勉以必來、愈加慈愛。皇帝仁孝素篤、必無遲回。十一月、公等以累請過宮、上不能用。再求罷黜、不許、並令仍舊供職。復奏、臣等誤蒙陛下拔擢、實諸從列、正欲因事獻忠、有所裨益、豈止爲臣等爵祿之計。若翠華未出、而彊顏就列、厥罪大矣。伏惟聖心思宗社安危大計、俯從愚言、臣等扈從而退、便當供職。上意猶疑。及會慶節、羣臣拜表稱賀、黃幄設而不御。十一月、有旨同班宣引、遂奏、陛下臨御萬方、以信爲本。父子之道、天性也。陛下朔望不出、許以進香、進香不出、許以上壽、而上壽復不出、反汗如此。臣恐朝廷之令、自是不行于四方矣。十二月、拜兵部尙書。五年四月、上將幸玉津園、公與侍從同奏、陛下即位于今六年、未嘗輕事遊燕。今者日俟鳴蹕、起居兩宮、猶未有聞、而忽聞遊幸、物論沸騰、實玷聖德。欲望車駕先過重華、慈福、然後徐爲此行、亦未爲晚。又曰、陛下爲壽皇之子、四十餘年、一無間言。內禪以來、孝慈彌篤。止緣初郊之後、聖躬違豫、壽皇嘗至南內、督過左右之人、自此讒間遂興。竊度聖懷必大有疑、而自以闕于奉親、可以無慮。以臣觀之、陛下所疑必無是理、而所謂無慮、則甚可憂。何者、壽皇與天下相忘久矣。今大臣同心輔政、百執事奉法循理、



宗室戚里、三軍萬姓、皆無貳志。設有離間、將共誅之、何疑之有。若深居不出、久虧于道、羣情解體、衆口謗讟。近日通衢之中、固有持此指罵大臣、無所避忌、禍患將作、可無慮乎。上曰、卿等可擇一腹心之人、爲朕調護壽皇。黃裳對曰、父子至親、何俟調護。公曰、陛下一出、便當無事。上首肯。公又于經筵率講讀官言之。上曰、朕未嘗不思壽皇。對曰、陛下闕定省之禮、今已數月。雖有此心、何以見之。五月、壽皇不豫。公與侍從臺諫隨宰執班入殿門、閣門吏以無班止之。公厲聲曰、有職事欲上殿。遂入。宰執奏事畢、伏上前。公等遂升殿。上拂衣起。宰臣引上裾。公等亟前環繞。泣曰、壽皇疾勢已危。陛下不在于生前一見、後悔無及矣。上遂入延和殿。衆又隨之。至福寧殿。上甫入門、內侍闔之。衆皆慟哭而退。越三日、公隨宰執班起居。詔獨引公奏事。公言、臣前日迫切獻忠、舉措失禮、蒙陛下赦而不誅。然引

裾亦故事也。上曰、引裾無妨、何得輒入宮禁。對曰、辛毗引裾以諫、不聽、亦隨而入。清明之朝、乃有是事、昏亂之世、何敢爾乎。昔汲黯在朝、淮南寢謀。夫以一人之切直、姦謀遂息。今外議紛紛如此、而在位羣臣曾無一言、三軍萬姓必以爲蒙蔽陛下、一旦發怒無禮、則禍亂之原也。此臣所以不得不諫。上曰、往而見卻、如何。公曰、壽皇止有一子、旣付以神器、惟恐見之不速、萬無卻理。上退語左右、美公之明。五月、公復進言、人情積憂則生疑、積疑則生疾。古人因事致疑、如竊鈇之類、因疑致疾、如蛇影之類。臣竊料陛下疑一旦過宮、則禍變難測。陛下試熟思之、過宮則有禍、不過獨無禍乎。天子之勢、至安至危。其安也、生殺予奪、惟意所欲、誰敢違之。其危也、雖欲爲匹夫而不可得。陛下以爲不過宮可以免禍、而不知乃所以速禍爾。今君子見幾、常有懼亂之心、小人無知、皆有幸亂之意。陛下所行、

多失人心。一旦禍生不測，誰爲陛下盡力者。六月，壽皇疾勢增劇。公與侍從奏言，竊聞慈皇以未見陛下，故不肯服藥。既見，必大喜，不藥而自愈矣。上竟難之。壽皇升遐，公勸上奔喪，許而不出。合奏不報。拜遺詔于重華宮，退欲宿部，有以爲不必然者。公曰：鄰里有喪，猶相與奔走，不忍即安于家，況至尊乎。乃皆宿部。翼日，遂同奏云：陛下爲壽皇之子，當袒括辟踊之時，猶不肯一出以就喪位。壽皇爲天子父，乃無主喪之人，自有天地以來，豈有此事。時大斂將成服，宰執欲率百官恭請于上，公言：此議甚善。若不聽從，則斷不可成服。須得皇帝執喪服衰，方見壽皇有子，中國有君爾。宰執又欲拜表請上御殿，公言：大行皇帝創行三年之喪，雖敵人聞之，至今加敬。當事事舉行，不可使苟簡之意出於臣下之請。凡公所言，時雖不能盡用，然公論建之。又上奏曰：祖宗以來，外廷雖用易月之制，宮中

實行三年之喪。至我壽皇聖帝，久曠之典，一朝而復，垂示萬世，永爲成訓。而臣下之禮未及講求，人主衰服于上，人臣吉服于下，識者猶以爲憾。夫衰裳不可服勤，易月之後，羣臣雖權宜易服，然以紅紫爲飾，無異于平時，亦太薄矣。臣以爲羣臣燕居，皆當去紅紫而服素衣，則猶有哀戚之意。詔令臺諫議之，皆稱公所建請，雖未純于古，亦足以扶持衰俗，補助名教。于是施行之。時上自稱疾眩，朝野洶洶，咸憂變故不測。及皇上嗣位，國喪有主，而後人心始定。六月，拜端明殿學士，簽書樞密院事。公謂上初臨御，宜講其所先入，歷陳持心守正等凡十事，請退朝之暇，時與大臣坐而論道，或召侍從，臺諫從容論說，日輪講官二員，便殿賜對。上有事于明堂，公扈從齋宮，俄得氣疾，遂還私第。三日而薨。實九月十有四日也。享年四十有五，積官至通議大夫、爵崇仁縣伯、食邑七百戶、食實封百戶。遺

奏聞、輟視朝一日、賜賻以銀絹、贈資政殿學士、金紫光祿大夫、仍令江西轉運司措辦喪葬。遂以慶元元年九月己酉、葬公于臨川縣長壽鄉梅坑之原。娶黃氏、贈秦國夫人。繼室陳氏、贈齊國夫人。子端立、朝奉郎、通判福州。思、奉議郎、通判潭州。愈、奉議郎、監隆興府苗米倉。先公卒。愚承務郎、監鎮江府丹陽縣延陵鎮稅。女適朝請郎直寶文閣知贛州留元剛。孫揚祖、通仕郎。嗣祖、承務郎。次象祖、次未名。孫女一人。公德性寬平、不爲矯激崖異之行、和氣藹如也。而端介有守、義利之辨、明燭毫末。事親篤孝、周旋無違、而務在養志。擢第而歸、待其親故加厚、欲有請于州縣者、則堅卻之。攷論古今、竟日忘倦。或勉以偶儷詩歌之作、則曰、吾方篤志于致君澤民事業、奚以是瑣瑣者爲哉。九江守潘侯慈明以公高科、不欲煩公吏事、公曰、食其食、怠其事、可乎。職所當親、恪共不懈。或謂天下事非才不

辦公曰、亦當先論其心、學術正而才不足、所謂心誠求之、雖不中不遠矣。心則不正、才雖過人、非真才也。平居講貫、博取諸人、至于進退出處之大義、則心自決之。免喪之後、遲遲其行。旣入都、未嘗干進、止欲從吏部選。尙書鄭公丙力以館學薦之。趙忠定公時爲天官貳卿、語公曰、前任旣再考矣、自陳可改秩。公謝不敢。始登班列、薦紳歸重、期以公輔、京畿聲望益偉。太學院沈君煥勁正不阿、聞風欣慕、嘗稱公虛己中立、以受一路之善士。洎登禁林、直道讜言、氣壓羣枉。其攝事省闈也、直暫焉耳。陳源之與內祠姜特立之趣召、皆駁奏其姦、命寢而後止。其領憲部也、常良孫以貪墨敗、念其祖安民之忠、獨申救之、止竄遠地。君子以是知公之論事、悉由中出、去惡如去草、善善及子孫、皆當于心者如此。皇上履位之初、尊禮舊學、延登樞府、固將倚之爲腹心也。是非邪正之辨、必能歷歷爲上





陳之上信公語、凡所升黜、允協公論、豈後來若是之紛紛者哉。昊天不弔、人傑淪喪、國勢岌岌者十有二年、然則公之存沒、固安危理亂之所關也。公之居家、嚴而不猛、和而不流、中外井井、悉有條理。爵尊祿厚、而自奉甚約。先太師之薨也、諸弟猶未立、延師教之、迄于有成。又擇賢士、以歸其妹。始以明堂恩、官介弟默、公薨之後、復以遺恩奏勲、壘二弟、從公之治命也。戒諸子曰、我奮身白屋、自致于此。受知三朝、捐糜難報、可無愧于俯仰、惟盡言無隱爾。爾曹勉之、益謹趨向、益勤問學。居官當廉、居家當儉、臨大事當仗節死義。以是立身、以是報國、則人皆謂我有子矣。平生論著有奏議若干卷、書春秋孟子講義合若干卷、制詞若干卷、鑑古錄若干卷、雜著若干卷、聞見錄若干卷。開禧二年、以子陞朝、加贈特進。嘉定三年、贈開府儀同三司。六年、贈少傅。八年、贈太保。公之相祀明堂也、實爲禮儀

頓遞二使所賜金器、可兼得之。病革矣、家人陳列于前、公顧見之、命辭其一。臨死生之變、凝然不亂、可敬也夫。始某尉江陰、公爲常平使者、推輓于朝、遂爲知己。公薨既久、易名之請、因循至今。諸子以知公本末、莫詳于某、俾狀其行、庸以求諡焉。力辭不獲、敬書以授之。謹狀。

袁燮撰 《挈齋集》卷二二

校記

①二：原作「三」，據《袁正獻公遺文鈔》附錄校勘記改。



藏 儒

宋儒碑傳集卷一百六十三

黃子耕 姚穎 潘植 葉文炳 滕璘

沈體仁

黃子耕墓誌銘

子耕名螢。黃氏自金華遷分寧。至本朝爲豫章聞家矣。給事中廉曾祖也。戶部尙書叔敖祖也。朝散大夫埜父也。太史庭堅字魯直者。從祖也。天下盡宗太史詩。外夷殊域皆稱江西。而黃氏由此不獨爲豫章聞家也。子耕澄潤明澈。雅服縑籍。纖塵點俗。揮絕限域。人謂喚起魯直矣。讀其詩詞。如逗幽薄。超高丘。宇宙奇曠。風露綽約。人又謂非子耕所能。魯直遺墨散落。收拾未盡爾。子耕不自是家學。挈從郭子和。朱元晦甚久。取友雖魁傑士。而皆行篤言信。步步著繩墨。未嘗放達而好恣。潏蕩而無程也。故子耕蚤歲名重江西。調瑞昌主簿。監文思院。天子郊見上公貂蟬久遠暗淡。大禮事務惶恐。

以咎子耕。子耕出祇候庫牒。指曰。此未嘗許重鍍也。且安所取金。事務怒曰。監官不材。吏輩自飾之。子耕笑曰。大臣莊其首。所以敬天也。若專知陪備。豈勝任耶。事務以爲玩己。益怒。盛氣將劾子耕。或曰。彼事大臣以禮。子事大臣以諂。可乎。事務慚而止。先是湖北安撫使章森薦可職事官。前宰相趙雄知洪州。又與轉運判官林湜薦。至是給舍侍從又交薦。要人使所親招之。不往。因其知廬陽縣。遂以爲堂除。五溪故獠獠族種逼迫。雜耕省地上。氣勢自由。縣官不能主令。子耕陳詩勸曉。有公事立期。信使之。緊慢應手。如一家人。監司又爭薦。朝廷第其語。子耕亟授處州通判。經總制有額無錢。十收六七。每歲三月。右曹按籍校之。有展減磨勘之文。俗號爲殿最綱。其法必行。通判卑辭借係省。預斂牙契。常爲殿矣。子耕會一郡成賦。法應隸經總者。以十年中酌取之。閣免其逋負。錢額均等。故態



盡革、更爲最矣。兩浙薦士、又以子耕爲首。主管官告院、大理寺簿、軍器監丞、歲爲三遷、善類皆喜曰、嚮用矣。然子耕意不樂、間行西湖、戴蓮葉、榜擊汰、慨然歎曰、我昔在南北山、一水一石無不自題品、今無有清味、何耶。豈耄耶。抑市朝山林故相違耶。遂以貧請去、知台州。又年餘、以從弟死、請歸哭之、論者頗疑其迂。子耕請不已、知袁州、過撫州、哭弟哀甚、得疾、即謝事。諸子進藥、不肯飲、示以喪禮而已。嘉定五年九月二十二日、拍牀呼曰、可行矣。夜漏上十刻、手書起字、挂掖之坐、良久卒。年六十三。六年二月丙申、葬分寧縣雙井。夫人吳氏。子曰炆、國子進士。整、子耕卒後二十日亦卒。曰在。女嫁承事郎、監隆興府苗米倉趙崇斌、先卒。孫曰鏐。初、子耕得台州、知其家世者謂晚暮、以唁子耕。子耕曰、某書生、蒙此過矣。既至、則勤苦夙夜、先勸後禁、訟牒奮千計、銷縮纔百餘。悍頑易節、囂險改行、而郡

稱平治。自頃吏道薰習、所師用往往暴民之事也、有欲行惠利者、共嗤笑之。而州素簡陋、禮文所當施而有闕者、輒曰吾未暇也。子耕於酒稅不用最高比、私賣偷瞞陰縱之、減則例、添升方、人感其寬、既而課入皆多於舊。虛籍坊場錢百餘萬、非本界也、壹償不自列。而在民者猶太半、貸不復取。縣當輸錢七千萬、子耕曰、前後相承至此爾、不能爲鞭撻費也。盡除之。爲濟糶倉貯穀、青黃時、下其價使不踴。爲抵當庫儲錢、雨雪時、量民急與之。置叢冢二、葬棺千五百。置養濟院、左爲安老、右爲慈幼。又別造安濟坊、以居病囚。凡此皆自有子本、使後不廢、不徒爲之名也。廟學隘、首增修、創櫺星門、益諸生食。有詞訴稱小學生者、建小學、擇學諭教之、製釋奠器服。而儀門之兩廡、僦爲賈區久矣、徙而新之。更作麗譙、完城益壘、班春閱武皆具。亭觀坊巷、表揭悉可別識、其費各數十百萬。然後畿內之公

侯秦、漢之郡國、稱其制矣。余觀子耕了外物成壞、猶影像空寂、然而毫末愛惜於贏虧有無之間、急迫備預於歲月倏忽之頃、常食糟羹、鮓敗、家人不知從太守爲樂也。特重教義、興滅繼絕、任爲己責。方纂郡志、或言謝顯道家焉。訪之、有謝官人者、當代院長送符帖、蓋親孫也。子耕對之泣、與冠帶、買田宅、祀顯道於二程之次、曰、自今其爲士人。不知竟能如子耕志否。昔人稱顧愷之晝日垂簾、門堦閑寂、彼將不以名蹟銜其志歟。雖然、使用世者皆若子耕之爲、則治不勝舉、而古人之功效可冀矣。銘曰、

其文也驚、其清也鶴。雖競於善、而實無作。魯直之宗、百年再振。雙井有名、爲子復新。

葉適撰 《水心文集》卷一七

通判平江府校書姚君行狀

君諱穎、字洪卿、其先吳興人、後徙明、明今爲慶元

府。曾祖諱阜、故迪功郎、容州戶曹參軍。祖諱孚、故左奉議郎。父孝全、累封朝奉大夫、致仕、賜紫金魚袋。先是、君之曾伯祖希始以儒學決科起家、時則有若戶曹公、實繼其後。戶曹勇於爲義、喜周人急、尤篤於宗族、創必慶堂於城南、延碩師、聚族子弟就學、涵濡薰炙、彬彬可觀。時則有若奉議公及其從兄持、持之從弟大任、相先後擢進士科、而姚氏遂爲鄞著姓。奉議篤學力行、以古人爲的、嘗與秦丞相之弟俱游成均、有合堂同席之好。秦公當國、緣是以進、高爵立可得、退然安分、不登其門。再調和州錄事參軍、即致其事、官止通籍、時人高之。大父公克遵家教、培養益深、時則有若校書君、對策大廷、獨冠多士、而姚氏益著。沿流溯源、殆非偶然者。君資性警敏、十歲屬辭已工、試於鄉校、郡博士疑非己作、更題以驗之、操筆立成。師事屯田鄭公鏐、苦心刻意、種積累年、詞采絢發、且有典則矣。校

官相繼皆名流、復親炙焉。又求同志之士、相與講磨。參考古今、詳於興亡理亂、是非得失之迹、下至曲藝小說、多所采獲。又思馳驚不止、安所歸宿、大書論語一編、朝夕誦味之。且取伊洛諸儒言論之精要者、叢爲巨帙、探索其旨、理融心通、德與藝俱日進。淳熙四年秋、浙漕高選、明年春、南宮奏名。范公成大領貢舉、見君筆力雄豪、亟稱之。奉大對集英殿、於是孝宗皇帝臨御十有七年矣。渴聞嘉言、以臻極治、君首言、中庸大學治道根柢、爲天下國家之要、在於九經。正心修身之效、見於治國平天下。本末內外、相爲貫通。世固有好事書者、乃謂緒餘土苴、不足以盡道。舉而歸諸希夷曠蕩、不可容聲之境。言不適用、人主疑焉。故功利權術之說得出而乘之。又言、秦王衡石程書、天下病其苛。漢宣帝用刑餘任法律、而政治淪於雜。光武奪三公之權、事歸臺閣、而東漢之規模淺狹。唐太宗兼行將

相事、而有好大喜功之病。德宗強明自任、而韋渠牟、李齊運、裴延齡之流得肆其姦。臣願陛下握其道揆、毋以多事自弊、操執綱領、俾羣臣莫不精白以承休德。又曰、力一則強、分則弱。聖人治天下、惟於先務用其力、而末節俱不暇講。藝祖皇帝肇造之初、一統之號、卻而不受、惟諸國是圖。始得蜀而黜王全斌、所以爲江南計也。始下江南而惜使相於曹彬、所以爲太原計也。澤潞之役、趙逢扈從、憚太行之險、止於懷州、以墜馬辭、則貶逐加焉、所以懲避事也。自奉極於儉約、而用兵之費、獨無所靳。惜諸國之帑藏、哀歲用之贏餘、將以收山後諸郡、易敵人之首也。藝祖惟用力不分、是以征伐四出、莫不如意。今天下最大患者、金人未殄、中原未復爾。惟陛下通藝祖創業之法而經營之、則必有道矣。又曰、中國有以自立、而後外域可圖。今士大夫安於苟簡、和議一成、則以言爲諱。烽火不接於江、



淮、羽檄不馳於荆、蜀，則甲兵之問不至於廟堂，怠惰之風成而勤恪寡，畏懦之習勝而勇氣消，無能奮身爲國家當大事者。臣以爲當今之務，必內有以作士大夫之氣，而外有以伺敵人之隙。蓋金人之悍，不可以力勝，而可以計取。漢高帝之取項籍，不在於垓下之合圍，而在於陳平之反間。彼其權臣擅政，骨肉相殘，一動於蕭牆之變，吾投其機而間之，則攻取易爲力。武帝百戰而不能滅匈奴，不乘其隙也。其後匈奴擾，五單于爭立，宣帝推亡固存，一投其隙而呼韓款塞。元帝亦因以斬郅支，皆乘其隙也。臣願陛下爲先定之計，以待敵人之隙。又曰：樊噲欲以十萬衆橫行匈奴，其氣非不壯，而見誚於季布。晁錯爲景帝削七國之地，其志非不銳，而見愚於揚雄。高后不用噲言，而天下免于瘡痍之禍。景帝惟用錯計，而七國之變幾至于不支。凡此皆深謀遠慮，切于當時，非獨書生無用之語。

故表而出之。對者四百餘人，有司奏君策第三，天子覽而異之，擢爲第一。年二十有九，君進詩以謝。後四句云：六典未新，周禮樂，三河正想漢官儀。平生作計非溫飽，可但區區託郅枝。蓋用王沂公語也。聞者壯之。時遠人有獻馴象者，上因思不寶遠物之戒，書旅獒一篇賜君等。故事，例給墨本，今奎畫獨藏君家，實無前比。授承事郎，簽書寧國軍節度判官廳公事。上以君策論北人事宜，戒毋鏤版，而亟欲試以民事，詔與添差。君言：員外置官，朝廷所以優朝士，厚宗戚，吾不可以冒此寵。力辭，上嘉歎許之。魏惠憲王方鎮四明，以是邦未有魁天下者，欲榮其歸，使以盛禮逆之。君不事表暴，扁舟抵故廬，人無知者。祖妣孺人史氏，太師魏公之姑也。君始唱第，魏公再相，以親故，頓首稱謝。王魯公信知其然，曰：是足爲吾婿矣。明年，魯公拜樞密使，竟因魏公以其女妻君。他日因奏事及之，上曰：姚某



策中用趙逢事極當。其簡記如此。七年、奉二親之官。太守龍圖鄭公伯熊、當世鉅儒也、一見契合、遇之良厚。秩滿去、語君曰、親老思鄉、滿則罷、罷則歸。雖丐祠之請、亦不至廟堂。君聽其言、亟以書白魯公、具道之。且曰、是當力言於上、使以達宦榮其親、甚於里居之樂其親也。鄭公既去、繼之者治尚嚴切、催科峻甚。君言、郡之嚴切什一、縣且什五、吏胥並緣、輾轉滋甚、民何所措手足。懇切規諷。守感其誠、不以爲忤。歲大旱、勸之疏決。寬其期會、蠲其無所從出者、歡聲載路。甘雨響應、邦人深德之。八年五月、召對、論治道體要。其略曰、舉其偏則弊自除、反其本則利自興。出於彼必入於此、如翻覆手爾。是故獻諛者斥、則忠讜至。利口者擯、則眞賢出。議興大獄、請用嚴刑者抑、則寬政可舉。巧於聚斂、以羨餘求媚者黜、則民力可蘇。嚴侵牟之禁、則兵力強。杜債帥之門、則將材奮。俗吏不爲公卿、則詩書

道顯。近習不預國議、則恩威柄專。苟且者不容、則任職者厲。恬退者褒擢、則奔競者消。欺罔是懲、孰不務實。黨偏是戒、孰不趨中。若此類合十八條、皆抑揚取舍、判然黑白、彰明較著之論、而歸諸人主心術。讀未竟、玉音琅然曰、道理當如是。論常平之儲、久且紅腐、請嚴以新易陳之令。義倉賑濟、遠者難及、欲復鄉爲義廩之法。又論守令不可數易、盍委監司舉郡守、郡守舉縣令、有公平通敏、慈惠廉潔者、遷其官而久任之、則進取無滯、才志獲伸矣。上悉嘉納。除秘書省校書郎。吏襲故迹、雌黃數字、請復書之、以是爲供職。君不可曰、吾當自親之。或有舛訛、無不是正。時方重館閣之選、階以居要地者甚衆、四方承風致饋、啓緘易銜以反之、時論服其清德。會魯公當軸、引親嫌求外補。參政周益公欲以郡處之、固辭。添差通判平江府。又辭釐務。曰、宰執子弟所爲、不得官州縣者、慮他人觀望、道不



行也、媚其可乎。強之而後受。館中諸賢惜是別也、相與祖餞於西山園亭、用風流半刺史、清絕校書郎分識賦詩。九年、轉宣教郎。君騷以儒英、萬言正對、結知明主、中秘校讎、最爲清切、簪筆持橐之列、要不難致。顧丞藩郡、塗轍稍迂、若心所不快、有不屑爲者。既至官、夙夜恪共、職業所關、纖芥不苟、有所剖析、明見毫末、而不自矜衒、密啓郡將、惟所施行。吳江二豪、訟久不決、部使者知君通明、以是委之。君揣其情、必持縣短長、有掣其肘之故、檄令逮之、不報。趣之、果以豪強未易追逮爲言。君詰之曰、張官置吏、非以治貧弱也、正欲制此曹爾。此而不懲、焉用州縣。卒窮竟其事、闔郡悚服。張公杓之、領常平也、嘗護使客、夜分抵館舍、君偶在告、攝事官不集。張公怒、將劾之、懼而求救。君不許、恚恨而去。徐爲申理、事竟得釋、而斯人不知也。十年秋、旱甚、齋戒祈禱、心形俱疲、由是得疾。疾且革、語家人以

二親之養不伸、君父之恩未報、爲終身恨。十月甲戌、卒於官舍、享年三十有四。二子、元特纔四歲、元哲二歲。一女三歲。家貧、喪不能歸、魯公自遣其子護之還鄉。其年十二月壬申、葬於陽堂鄉延壽山之原。始君處庠序、莊肅自持、寡笑與言、一飲一食、亦無所苟。非意相干、未嘗輕愠。人皆樂其可親。有戲狎者、正色以裁之、又可敬也。識者知其爲遠大器。事大父母、父母皆謹甚。大父母終、過於哀戚。大父公性剛、委曲周旋、求所以悅之、或有慍怒、屏氣以立、不敢輒退、引咎刻責。至於自撻。母宜人楊氏病疽、焚香敬禱、願以身代。俄而疾瘳。友愛亦甚篤。旣媚王氏、其季資緣補官、又捐奩資以嫁其妹。凡所以順適親意者、無不用其極。該郊祀恩、以君曾任館職、二親俱封、人皆榮之、而君志未足也。每謂立身行道、無忝古人、始足以顯其親焉。才華之富、傾動流輩、而榮進之念、曾不汲汲。其言曰、退後一



步其味愈長。乘流則逝、遇坎則止。安於所遇而已。間服深衣、以迂名齋。此豈隨俗苟求、皇皇於利欲者哉。跂慕前修、必取其中正不偏者。於當世人物、心焉惓惓、疏三十餘人、勸魯公急用之、宰相無他職業、進賢而已矣。以天下人才爲天下用、君子衆多、則小人不能勝、此前輩規模也。君之賜第也、今建康留守葉公實爲第二、後復同官吳門、契好日深。時士大夫各從其類、有黨同伐異之風、君深病之、調和其間、不立畛域。既與葉公定交、又併葉公之友爲魯公言之、所以消融植黨之私、恢張吾道之公也。天假之年、此志獲伸、天下異同之論、將泯然不見其迹、豈復有後來若是之紛紛哉。此君子所以爲斯世惜也。孺人用魯公恩封、其寡也、年二十三爾、守柏舟之節、搖者萬端、確不可奪、不惟天資之美、亦足以驗君操行篤實、刑於家人者如此。生理蕭條、清苦已甚、依倚外氏、撫教孤幼、至於成

立。元特以魯公遺恩爲迪功郎、新饒州安仁縣主簿。近例、掄魁澤不及後者、特旨官之、元哲由此受命爲迪功郎、新福州連江縣主簿。兄弟修謹嗜學、振起門戶、將有望焉、皆娶舅氏女。女適承奉郎、新監臨安府糧料院王儼、又魯公長孫也。孫男女各二人。君雙親垂白、見其後裔如此、寧不自慰。而君垂沒之言、不及終養、銜恨無窮者、亦足以釋然於泉下矣。君沒二十年、二子將求銘於當世鉅公、而屬某狀其行、其請勤勤。懷我亡友、見其後昆、心焉悲惻、其敢有愛於言乎。雖然、某老矣、學殖既落、無能發明、實德懿行將晦而不彰、是則有罪。躊躇久之、而二子之請不已、遂強爲之、詞雖不工、要非溢美。嗚呼、其撫實也夫。其可信也夫。謹狀。

袁燮撰 《絮齋集》卷一五

宋故宣教郎通判平江府姚君墓誌銘

余友四明姚君洪卿、淳熙十年十一月十三日、終

於蘇州官舍、余哭送其柩出盤門。十二月十二日、葬鄞縣陽堂鄉延壽寺山、孤善長以狀來請銘。於是善長七歲、而洪卿之死、涉四年矣。洪卿諱穎、曾祖阜、左迪功郎。祖孚、左奉議郎。父孝全、以承事郎致仕。洪卿淳熙五年策進士第一、授簽書寧國軍節度判官廳公事。召爲秘書省校書郎、出添差通判平江府、遂卒。年三十四。洪卿冲澹謹重、特有雅量。賜第時、余與之同謝、又同期集事甚久、余察洪卿不以喜累志也。洪卿之學、勤苦兼治、其文精俊詳實、然退藏抑損、常願出人後。既得盛名、尤務審緩、不急暴所長。所歷之官、皆人立欲以其材能自振迅者、而洪卿摧斂鋒銳、若不敢有所爲、其有所爲、惟恐人以爲能也。蓋余復與之同官於吳、而見其志益明、業益習、論天下事無不盡、而最倦倦於當世所謂善人君子。余然後竊歎國家以科目求士、其偶然得之、而前輩巨人皆由此出、而洪卿器

端識遠、益進而未已、是其得人矣。士之一身與其父母兄弟妻子、皆繫命於舉選之得失、何也。以其榮悴異焉。故得者莫不自以爲天與之、而又自以爲一與者不復奪也。今天與洪卿之榮如此、而又奪之之峻如此、且併其父母兄弟妻子之望皆失之、何耶。豈天固愛之而固忍之耶。是殆有不可得曉者也。士之飭身厲行、不顯於其時、則傳於後而已。洪卿既首進士、爲館職矣、徒以得年之夭、故不大見、然猶當文有次、官有業、行有述、而善長皆不能言也。豈天之暫顯之而終蔽之耶。是又特難曉也。嗚呼、此余所以記其所知之大意、而不使洪卿之遂無傳也。洪卿二男、曰善長、曰某。一女、曰某。夫人王氏、今丞相冀國公之子也。銘曰、不以既與爲通、不以復奪爲窮。衆人之榮、如埃隨風。有孚其躬、長短必終。昭哉洪卿、安矣幽宮。

通判姚君墓誌銘

四明自國初以來、端拱二年至乾道末登進士科者幾二百人矣。淳熙五年、姚君穎始以第一人及第、實爲吾鄉之光。又其才業足以稱褒然之選、意必遠到、而竟以不顯可哀也已。君字洪卿、世家吳興、後徙于明。明今爲慶元府。曾大父阜、迪功郎、容州司戶。輕財好施、創必慶堂于城南、延師以教宗族之子弟。于是姚氏後又有曰大任、曰持、曰孚者、相踵擢第、遂爲聞族。孚即君之大父也。尤號博洽。三預計偕、入太學。宦情素薄、再調和州錄事參軍、遂致其事、終左奉議郎。父孝全、封朝奉大夫致仕、賜紫金魚袋。母宜人楊氏。君在髫髻、嶷然已有成人風。五歲讀書、過目不忘。十歲能屬文。試鄉校、占前列。郡博士疑之、別命題使試于前、應手成章。時號神童。師事屯田鄭先生鏐。累年能自刻苦、洛誦多至徹旦、幾忘寒暑飢渴。經史百氏、傳記注疏、下

至稗官小說、多所貫穿。大書論語、置几案間。又取二程、上蔡、龜山之書、仁義禮樂道德性命之說、決擇是非、類聚成帙、以便講習。文體簡嚴、自出機杼、有以爲後時者。曰、是有命焉。由漕臺試南宮、參知政事范文穆公成大以宗伯知貢舉、得公文奇之。及發策集英、推明中庸大學之旨、幾數千言、末論敵國事宜尤備。孝宗皇帝以其議論正大剴切、親擢首選、而戒勿版行、蓋不欲傳于外也。聞喜宴御書旅獒篇以賜。授承事郎、簽書寧國軍節度判官廳公事、特命員外置。力祈寢免、上嘉歎而許之。皇子魏惠憲王鎮吾邦、欲侈其盛、命以騶哄鼓吹、迓君、而扁舟已歸郊居矣。祖妣史氏、蓋太師文惠王之姑。時文惠再相、侍立上前、一聞臚傳、再拜謝恩。丞相王魯公方知樞密院、問與公何物。文惠道所以、且盛稱其賢。魯公鍾愛一女、託文惠以締婚焉。魯公後因對及之、孝宗曰、策中用趙逢墜馬事甚



佳。乃知簡眷之深也。七年之官、龍圖鄭公伯熊爲守、相得歡甚。繼之者治尙嚴、君能濟之以寬、乘間語之曰、催科之急、郡有十之一、則邑十之五、吏曹以爲利、懼民之不堪也。守感其言、爲之霽威。適大旱、權酷之課不登、逮治苛峻。君緩其期、而蠲其無所從出者、人心歡然、甘澍隨應。邦人尤德之。八年、被召、有旨引見、以未經審察、辭不敢當。次日遂對便殿。君首以數被異恩叙謝、繼論治體切于時者、凡十有八條。進讀未終、玉音琅然云、道理當如是。又論義倉等利病及守令久任、上皆嘉納。除秘書省校書郎。供職之日、胥吏例以雌黃塗數字、請書其上、以應故事。君不欲循襲、非手校真有譌舛、不下筆也。時言路多選于館中、頗有饋遺、君不啓書、加以緘封而還之。魯公當國、引嫌丐外。周益公欲處以一郡、君力辭、添差通判平江府。又辭釐務不果。館閣皆一時名勝、惜君之去、相與餞飲道山、用

風流半刺史、清絕校書郎、分韻賦詩以送之。仲冬奉二親以行、會郊祀、以曾任館職恩封及親。吳門一都會、地大事夥、關決無壅。吳江民交訟久不決、部使者以屬君。邑以其人素不可追、君曰、張官置吏、非以治貧弱、正以制豪強耳。窮竟黨與、卒究其獄、一郡竦服。君自念蚤以大魁丞輔藩、斂藏淵覲、若無所能爲者。間有所爲、亦不欲人之指目爲能也。不要名、不混俗、無所阿附、名齋曰迂。嗚呼、可謂深藏若虛者矣。十年、禱旱勞悴、感疾以終。年纔三十有四。官止宣教郎。屬續之際、語不及他、惟以君恩未報、親養不終爲恨。寔十有一月十三日也。二子、元特、四歲。元哲、二歲。一女、在二子之間。君未第時、欲卜築于鄞之陽堂鄉、延壽山、至是遂以其年十二月壬申歸葬。妻以丞相恩封孺人。于時年二十有三。泣告父母、誓不背姚氏。卻鉛華不御、賦柏舟之詩、撫教其子女。大夫公夫婦至今壽且康。歲

時供婦禮無敢慢。嗚呼、賢哉。魯公家訓清肅、孺人處昆弟無間言。後諸昆弟遵秦國夫人之命、以遺奏恩予元特。未幾朝家用故事、命元哲以官、今俱爲迪功郎、調饒州安仁、福州連江縣主簿、皆壻于外家。女適承奉郎、新監臨安府糧料院王儼、又魯公之孫、新吉州通判、檇之子也。孫男女今各二人。君性孝謹、少居大父母之喪、已能悲慕盡禮。大夫素嚴重、先意承志、未嘗少忤。遇有慍色、至閉戶自撾、屏息不敢喘。母病疽、衣不解帶、藥非親嘗不進。所以身代。友愛弟妹、惟力之盡。平日動以古人自期、文詞之作、尤爲精敏。他人汲汲不能發舒者、下筆輒過之。掩抑覆護、不欲銜耀、而自不可掩、真如其爲人也。哀爲家集十卷。方在甥館時、諄諄言宰相之職、惟進賢退不肖。昔王文正在位、僉壬豈能悉去。不以爲憂也。惟多引諸賢、使不爲小人所勝耳。因密疏賢才三十餘人、雖不及盡用、終多爲知

名士、君之志豈小哉。體瘠神清、人以爲似文惠而與魯公、真有冰玉之譽。出門軸折、此識不識所共嘆也。開禧三年、君之二子踵門泣曰、先君之葬時、兄弟穉幼、未及銘墓、念不可以無傳。又以通判贛州袁君燮所作行狀爲請。余尤哀其意、爲之銘。銘曰、

人之生子、惟恐不敏。敏而好學、乃善之盡。旣敏而學、又或恃才。浮躁銜露、爲身之災。猗歟洪卿、實具才美。蚤冠儒科、一日千里。抗志遠古、力行在躬。文惠是似、清如魯公。天胡不仁、蘭摧玉折。二親俱存、共姜守節。有子競爽、志于家傳。不在其身、天其舍旃。

樓鑰撰 《攻媿集》卷一〇七

處士潘君立之行狀

君諱植、字立之、姓潘氏。九世祖諱□、事王氏爲銀青光祿大夫、自光州固始入閩、家于福州懷安縣



儒藏



之水南。世業儒。至君之考諱滋。始貢名禮部。紹興初。習淳質。中原衣冠多南徙。吾鄉之儒學彬彬焉。其以文詞行義爲學者宗師。則若李若林。其傑然者也。二先生之學以孝弟忠信。窮經博古爲主。及門之士亦往往渾厚質實。志尙脩潔。若貢士。則又其徒之傑然者也。貢士於學。至老不倦。聞鄉閭之善士。輒折輩行。率其子從之游。後聞晦菴朱先生講道武夷。有非他師所能及者。遂慨然屬其子往師事之。君遂與其弟柄不遠千里而往拜焉。君少穎悟。讀書不數過輒成誦。衆皆謂宜以童子應試者。貢士曰。躁進速成。非教也。少長爲文。操筆立就。然未嘗效世俗剽剝綴緝。曰。韓與蘇。吾所法也。於二氏之文。關鍵脈絡。沉潛諷味。故其爲文。語意雄健。遊鄉校。流輩推先焉。尤嗜史學。自載籍以來。上下數千年。反復耽玩。其於興亡治亂。是非得失之故。貫穿出入。如指諸掌。談論亹亹。率嘗屈其坐。人

方以世交馳於射策決科之習。君之天資學識於科目可俯拾。乃與其弟皆以弱冠摳衣有道。厲志前脩。回視故習。若將浼己。儕輩至有高談性理。下視程文之誚。不顧也。智識日進。聞見日廣。尤以務實爲己爲本。由是師友交稱之。退而家居。日以濂洛諸書磨礪浸灌。暇則徜徉林壑。間以觴詠自娛。閨庭之間。怡怡如也。生平慷慨有大志。不能規規較錐刀。事生產。襟度坦夷。無畦畛。於親友之誼尤篤。每見必連留竟日。情意懇款。殫饌之費。不計家之有無。喜施予。賙人之急。雖斥家人簪珥以振之。略無秋毫顧惜意。鄉閭有事訟者。輒詣君求決。君爲之平曲直。以義理開譬。各釋其所爭而去。親戚急難。奮身以援之。利害有所不計。雖罹困辱。不以爲悔。急於救世。亦有知其不可而爲之者。雖未免賢智之過。然以世俗滔滔。橫目自營者視之。是可謂之賢乎。使君而見用於世。其事業當有卓然

可觀者。而困頓疾病、卒賁其志以歿、所以施於家、信於友、行於鄉閭者、僅若此、豈非命夫。君疾病累年、至其屬纊之夕、與其弟訣、若未嘗病者、亦可謂達於死生之變矣。死之日、親朋閭里無不爲之洒涕、亦君之誼有以感於人也夫。君享年五十有九、以缺七字終于正寢。娶□氏、先卒、子一人、大圭、業進士。女一人、適進士倪泳孫。孫女一人、以踰月之制□□□□葬于□□之原、禮也。榦兄弟嘗受教於貢士公、於君之兄弟交遊者、非一日也。生同里、學同師、今又締姻於君家、則述君之行、其何辭。謹摭其梗槩、以諗來者。

黃榦撰 《勉齋先生黃文肅公文集》卷三三

通判和州葉氏墓誌銘

公姓葉氏、諱文炳、字晦叔。世家河南、後有以客省使刺泉州者、過浦城、睹山川秀異、因居焉。曾大父仲通、大父顯仁、當范汝爲俶擾、募鄉丁保里社、人

高其義。父夢齡、贈宣義郎。公少刻意問學、再舉于鄉、登淳熙甲辰第、調晉江簿。遲次家居、數致書請益於文公朱先生。及至官、文公自漳浦還、以居官臨民之法告語甚悉。顏公師魯爲守、事多舛之決。汀、漳境上豪民相爲敵讎、帥趙忠定公選官撫諭、衆皆憚行、公獨毅然請往。既至、折之以理、諸豪弭伏、遂以無事。嘗攝獄官、有商胡坐重辟、寅緣納賂以求免、又攝舶、屬有海商坐罪、亦以白金因公。人以求贖、公一拒絕、且斥里人不復通。泉多公卿貴人、州縣例承迎不敢忤、公遇事問理如何、不以勢故有所遷就。會詔內外從臣舉可爲職事官者、顏公以徐誼、陳傅良等應詔、而公與焉。秩滿、調劍浦令、改閩縣丞。未上、服母孺人鄭氏喪、哀毀如禮。服闋、調筠州錄參。獄舍故湫隘、遇暑溽、囚多疫、公白郡一新之、由是無病死者。嘗言獄事至重、當顧理是非、不敢以上官喜怒爲輕重。前後兩太守寬



嚴不同、公視其所偏、依助之、郡政賴以平允。漳浦吏謀奪民楊氏家貲、械置獄、累歲弗決、公一閱得其情、坐吏以罪而還其貲楊氏。宗子有橫取僧財、俾殞非命者、憑藉巨援、祈苟免、公毅然力爭、卒正其罪。郡失公用器、下掌吏于獄、推鞠吏覘守意、欲鍛成之、公以迹狀未明、請緩其事、久之盜者得、守愧謝。邊事作、調兵于州、營卒憚行、頗洶洶、公諭之曰、國家參養汝曹久、宜奮前戮力、國有厚賞、何闕爲。今當白州、優爾賞給。遂聽命、無敢譁。改秩、知仙遊縣。初至、決累年滯訟於旬月間、既又括廢寺田、增廩以養士、像故相葉正簡公于學、與蔡忠惠並祠。富室有據官地及寺田、築堤植榕、立屋于上、妨民水利者、累政不能奪、公以聞于部使者、窮治之、撤堤伐木、以復灌溉、爲農人利至今。民有陳姓者、與工匠飲博致爭、匠醉夜歸、踣死于道、縣檄官驗其屍、皆謂陳實毆之死。公疑之、研問數四、得其情、

請聚官覆驗、果因跌以死。差役久爲平民害、公勸立義役、均產通差、有爭于庭者、一裁以法。故例將迎工役、責之僧刹、公在官秋毫無所剪配、其潔己愛民、初終一意不易。與同官語、每曰、貪汙自多、欲尙侈始、小官俸廩幾何、百爾皆欲如意、不受賂安從得。清心寡欲、正本澄源、乃吾儒功用。秩滿造朝、會有旨許曾作縣人言事、公條人才臧否、戰艦姦弊、楮券便宜三事以獻。通判和州、將之官、宣義公卒。居喪之明年、亦以疾終。實嘉定九年十二月二十日。年六十有七。官至奉議郎、賜緋魚袋。娶張氏、封孺人。子男三、惟寅、惟清、惟允。孫男六、回孫、桂孫、榮孫、蒲孫、穎孫、啓孫、皆待補太學生。孫女三、長適中大夫致仕楊公圭之孫繼祖、次適漕貢進士趙宗楨、次未行。予之生後公二十有九年。嘉泰甲子、同試士三山、相與厚甚、每心敬其爲人。及公歿、惟寅請銘、時方之官泉。南未及作。後十有六年、公始

葬于登雲里下沙驛之側、惟寅又請銘、適予再守  
泉、行有日、念今不作無時作矣、乃系其事而銘之。  
銘曰、  
斷斷乎其誠且直也、凜凜乎其廉且白也、退嘿以  
自將、樸乎其不外飾也、仕雖不逢、有可尚之德也、  
後將考公視此石也。

真德秀撰 《西山文集》卷四六

朝奉大夫賜紫金魚袋致仕滕公墓誌銘

乾道淳熙間、子朱子倡道南方、海內學士至者雲  
集。新安滕公德粹時甚少、與弟德章奉其尊君之  
命、以書自通而謁教焉。子朱子復之曰、夫學者患  
不知其歸趣、與其所以蔽害之者、是以徘徊岐路  
而不知所從入。今足下既知程氏之學、不異於孔  
孟之傳、而讀其書矣、又知科舉之奪志、佛氏之殊  
歸、皆不足事、則亦循是而定取舍焉耳、復何疑而  
問於僕邪。意者於其所欲去者、未能脫然於胸中、

所欲就者、又雜焉並進、不無貪多欲速之意、是以  
雖知其然而未免有茫然無得之歎耳。足下誠若  
有志、則願暫置於彼、而致精於此、取其一書、自首  
至尾、日之所玩、不使過一二章、心念躬行、若不知  
復有他書、如是終篇而更受業焉。漸涵之久、心定  
理明、將有以自得之矣。論語一書、聖門親切之訓、  
程氏之教、尤以是爲先、足下不以愚言爲不信、則  
願自此書始。後數年、子朱子自寓里來歸、始以弟  
子禮見、於是得大學、中庸章句而熟復焉。既而往  
仕四明、又教之以親仁擇善、爲講學修身之助。且  
曰、楊敬仲、呂子約、沈叔晦、袁和叔、此四人者、皆子  
所宜從游者也。居數年、子朱子於潭溪之上、留止  
四旬、問辨彌篤。蓋公於師友淵源所漸如此、故終  
身踐行不離名教之域。至其用之而弗究、則君子  
以爲有命焉。公名璘、德粹字也。世家徽之婺源。考  
諱洙、贈中奉大夫、其德善族系見於子朱子之銘。



公少篤學、誦書至丁夜弗倦。游舉于鄉、入太學。淳熙八年中南宮第四人、對策又中乙科、以恩陞首甲、調鄞縣尉、教授鄂州。居中奉及母、令人胡氏憂外除、調四川制置司幹官。用舉主更選、知紹興府嵊縣、簽書慶元府節度判官、主管官告院、奉仙都祠、通判隆興府、浙東福建帥司參議官、尋得請致仕。公蚤親有道、明於義利取舍之分。自其初第、當得教官、顧俯就一尉、人謂塗轍差失、公獨以近次便養爲喜。雖簞楚塵埃間、弗卹也。余丞相將以掌故處公、議未決、時韓侂胄陰操國柄、或勸公一見、宜可得。公曰、彼以僞學誣一世、儒宗以邪黨錮天下、善士恨位卑不能爲萬言書疏其罪、顧可謁之以干進乎。卒請入蜀。及自蜀還、有欲引之班列者、君終不爲侂胄詘、復固辭。故事、禮部殿廬有一高選、鮮復作縣、旣作縣、鮮不爲職事官。公獨從吏部選、取郡從事以去。其後倅二大府矣、不求爲州而

求佐帥幕。其在三山也、帥雅知公、將奏俾因任。公曰、吾年至宜去、可復戀斗粟貽俗子譏。至其蒞官行事、則又有足稱者。爲尉時、嘗奉檄覈富室之訟、賂遺交至、卒不能毫髮汙。有強盜剽海濱、密院下其名、俾迹捕。公旣獲其六矣、或謂賞格不滿一、益諸。公顰蹙曰、陷人大僇而以微賞安乎。至獲造僞券者、應格當賞、亦不請也。在制府、以誠實不欺事其長、議多見從。後帥嚴且急、公與同僚約、每白事、逢帥之怒則姑斂退、以待威少霽。復白、事多施行。在剡、適歲饑、民告病甚、常平使者發粟振廩之。公極意奉行、多所全活。使者薦于朝、有曰慈祥之政、惠及田里、廉潔之操、推重縉紳、邑人以爲實錄。及參議閩中、有以利啖守帥而更鬻鹽舊法者、亭戶舟人皆失業、怨聲嘈嘈。公白帥、弗盡從。後帥至、復力言、卒還其舊乃已。公旣從子朱子得爲學大方、異時至東嘉、又從故中書舍人陳公傅良問左



氏要義。陳公告語甚悉。大略謂左氏本依經爲傳。縱橫上下。旁行溢出。皆所以解駁經義。非自爲書。且告以六經之義。兢業爲本。公佩服焉。其他與當世知名士更切磨不勝紀。自少嗜學。老而弗衰。在蜀得官書數千卷。載與俱歸。益求平生所未見。即溪東爲堂貯之。命曰博雅。燕居無事。蚤暮繙閱。閒及浮屠老子稗官小說。惟意所適。竹間爲亭。扁以清心。風日恬暢。輒挾冊徜徉其間。自謂如魚縱壑。鳥脫籠。樂不勝旣。年八十。以朝奉大夫致仕。賜紫金魚袋。考終于家。實紹定二年六月丁巳。其所爲文曰溪齋類藁。若干卷。夫人程氏。有淑行。先卒。贈宜人。子某。夔。漕貢士。早世。某某。今某官。某業進士。女適進士吳去志。孫三人。某某。女二人。公篤厚廉直。自其所性。與德章同遊帥門。旣先後收科。則以世業盡遜二季之未仕者。居鄉不以利自營。不以私事撓公府。在官時。袁州郡所餽別貯之。及歸

里。悉班諸親故之貧者。一簪弗以自留。族姪有喪。勸其早治葬。毋弱陰陽家說。不能舉者助其貲。垂沒。教諸子守至正以奉天道。其可謂俛焉孳孳。斃而後已者矣。自淳熙後。義理之學日明。然士多假竊形似。簞弄筆舌間。弗身踐也。公初爲論語說。子朱子善之。因謂爲學以變化氣質爲功。而不在於多立說。公爲豐然。自是不敢輕論著終其身。嗚呼。觀子朱子之所以教與滕公之所以學。則士之有志於道者。當知用力之地矣。公之葬以六月庚申。里曰瑞亭。地曰井塢。後五載。予始爲之銘。銘曰。維古之學。必貴躬履。世習浸訛。迺事口耳。辨河說鈴。紛焉四起。回視其人。則或可恥。猗歟滕公。克佩師指。不譁於言。而勉諸己。我銘其藏。以詔學子。

真德秀撰 《西山文集》卷四六

### 沈仲一墓誌銘

沈君。名體仁。字仲一。先從吳興避唐亂遷溫州。爲

瑞安名家。有彬老者、北遊程氏師生間、得性命微旨、經世大意。方禁春秋學、石經甫刻、即廢彬老竊賂守者、自摹藏之。君生後百餘年、珍其遺書、嚴奉若秘文焉。志意閎雅、鄙遠聲利。常言、沈氏本以儒術廉恥興門戶、奈何求官達、問生產、與俗人較高下哉。敬士好文、十室之譽、一詠之工、無不降屈。坐者滿堂、酬義侃侃。夜後市音闐寂、乃聞獨誦聲琅然。嘉定四年、君年六十二卒。許令適來、余謂令、仲一疾幸少平、何遽。令曰、吾行也。邑之大夫集仲一所爲別、勞動而然。余始疑君豈爲縣多交關耶、而力病至此。令慘戚良久、曰、自吾爲邑三年、仲一無指尖訟到庭。然守煎倅逼、時輟假不吝。吾賴仲一、常兄事之。然每節朔、束帶相看、啜茗徑去矣。歷十餘令、無不然者。其力病至此、爲禮爾。余以是多其保家有常節也。又參之所聞、君終身有師、陳君舉是已。記其言、觀其行、老而益恭、然不依以爲重。其

取友道廣、賢者親之、貧者存之、授廬丐食、死而不貳、然不恃以自重、蓋其持身有常度也。天行或飢凶、民利欲建置、君率先推與無疑。然歲熟不以爲德、役成不以爲功、彼偶汗漫敗事、亦無恨意。不追諂首議者、蓋其應事有常準也。凡若此、豈於君於法書、書之亦爲後世法也。夫人項氏。四子、曰楹、曰東卿、曰煥道、曰得翁。爲尼未嫁七女。張埴、趙炳、項振玉、薛仲序、丘仲采爲其壻。埴、筠州錄參。仲序、鎮江府司戶。仲采、將仕郎。五年、楹等葬君於北湖馬奧山、而以項氏之命來曰、吾夫行事、知者以爲賢、不知者以爲難。吾雖婦人、不敢廢也。其在時、手鈔予文、自甲至癸。戒東卿、異日死、不得斯文以銘吾墓、猶不葬也。余念一生與君相邂逅不數四、列禦寇之於南郭子疏矣、有間矣、而能望余深如此、豈其寄情高遠、真有在於形質之外邪。銘曰、冰肝雪膽、自琢磨、書林畫苑、紛交羅、詩得好語、終



夜哦。今雖遠矣山之阿、豈無風月相與過。

葉適撰《水心文集》卷一七

校記

①政：原作「正」，據正德本《西山先生真文忠公文集》改。

②置：原作「制」，據右引改。

③泉：原作「自」，據右引改。

④東嘉：原作「永嘉」，據右引改。按宋人習稱溫州永嘉郡爲東嘉，見《方輿勝覽》卷九。

⑤此句當有誤。據下文列五壻之名，則此當爲：七女，一爲尼，一未嫁。



宋儒碑傳集卷一百六十四

唐季乙 蔣存誠 程永奇 別湜 王楙

楊士訓 黃榦 董銖 鄭可學 劉庭老

綿州教授承奉郎致仕唐君季乙墓誌銘

嘉定六年秋、晉原唐述之季乙以易學爲四川類試第一、余之表兄高南叔某、西叔某咸在高等。初、西叔有女子曰晉、生而明晤、每重於擇對、於是聞述之賢而文、遂許妻之。其年余守郡通義、述之入對大問、便道過余、留三日、穀問所試易、乃以繫辭天地定位以下八句爲題、述之對曰、求易於有象之初、固有以具其相資之理。論易於重卦之後、始有以神其至變之用。其意蓋謂天地間固有是自然之易、而包犧氏因之以作八卦、八卦既畫、又重之以極其變。此先天心法也。余曰、大哉、子之及此也。先天之學、前代無傳焉、自魏伯陽已若闕見此意、至華山陳處士圖南始盡發其秘、一再傳而爲

伊川邵子、則建圖著書以示人、且曰、萬化萬事皆生于心、其言可謂深切著明矣。而得其傳者且寡、以用之於科舉、則又絕無而僅有。今子於數往知來之義、雖斷以己意、而先天畫卦之序、包犧心法之秘、則有以得夫陳邵之指、斯不亦可尙矣夫。明年調綿州州學教授、歸自行京、西叔以子妻之。余又除郡舍館之累月、體行醇固、不以憂喜見色、而勤學厲行、人有片善寸長、則恥躬不逮、不學不能不已也。會余奉使東川、辭去。明年當上、適以婦妊及月、姑徐以待其免。既免而母子胥逝、述之傷悼不自任、凡以致其忠愛者罔弗盡。然因是邑邑寡悵。至視事于綿、乃能勉自振發、率昧旦大會諸生、以經諭一員番上迭講、而已爲訂其可否、退又督課肄之程、厲入出之禁。丙夜詣諸生、不間寒暑。太守賢之、不俟滿歲、即以姓名上聞。旁近郡邑聞風、亦願造焉。俄以婦練祥醮祭連夕、遂得疾、爲庸醫



誤下疏浚之劑、精氣頓索。其夕夢臙間有五豎子、各衣其方色、若將決去者。厥明述之請于其親曰、兒疾不可爲矣、得豆區祿不克終養、且未有後、以爲親憂。即死、願以弟季垕之子爲子。言訖乃絕。蓋嘉定十年三月二十四日、適其婦始生之日也。其月甲辰、其日己未、又與婦生之月同、嗚呼異哉。余時將漕東蜀、聞諱音即馳書幣逆其喪以歸晉原。又一年、余以心制乞身、述之之父道寧謀以十□年月□日葬述之于□□鄉□□里□□山之原、而狀其行以告余、俾識諸窆。余拊其狀、泣數行下、不忍辭也。考其世、自曾王考亘爲宣教郎、知火井縣、王考德成嘗貢于鄉、父道寧未仕、世居崇慶之晉原。母同郡康氏。先是貢士府君少孤、立志書、詩、旁涉子史、晚又讀易、將有所論著而不克終其志。一日貢士之冢子道昌夢其父危坐、若有愠色、請所以不對。道昌曰、大人得無以易傳未終乎。曰、然。既

又曰、汝弟將有子矣。道昌寤、以語其弟、明年乃生述之、遂名以述、孫而授之易。其後更名季乙以應事、而仍字以述之、示不忘其初也。然孰知潛德蘊文者蓋已累世、而述之僅以一第殞身邪。謂其有後矣、而竟亦何爲者邪。余表姪夙有嫩質、不煩姆訓、作嬪于唐、克蹈家人之正、嗚呼、亦孰知其遂止此邪。從我于眉山者累月、是時余與西叔偕侍庭闈、今西叔喪母悼妻、而余亦與於哭泣之哀、況銘吾述之也邪。銘曰、

慨自士習日卑、舍本趨末、則有未信而仕、不知而作者矣。孰能知述之之賢、早有志於本、學推儒先之緒言、以求先天之心法、使假之以年、精體篤踐、則亦庶幾孔門之所謂達者。既厚其子、而亟其奪、惟是令名、奕世不祿。

魏了翁撰 《重校鶴山先生大全文集》卷七二

蔣秉信墓銘

舜曰、道心明心即道。動乎意、則爲人心。孔子語子思曰、心之精神是謂聖。孟子亦曰、仁、人心也。心可言、不可思。孔子知門弟子必多以孔子爲有知、明告之曰、吾有知乎哉、無知也。知即思。又曰、天下何思何慮。周公仰而思之、夜以繼日、即思非思。孔子臨事而懼、好謀而成、即懼非懼、即謀非謀。如鑑之照、大小美惡、往來參錯、具有而實無。如日月之光、萬物畢照、入松穿竹、歷歷皎皎、而日月無思。曾子曰、皜皜謂此也。日至非果有所至、不動乎意。澄然昭然。一日之外、或動乎意、故曰日至。自古到今、知道者千無一、萬無一、故學者以知道爲至。聖人與人羣居、不得不因人爲言。月至亦非有所至、澄然昭然。一月之外、或動乎意、故曰月至。顏子三月不動乎意、故曰三月不違仁。某得之先兄和仲曰、同舍蔣秉信因聞歌朝中措之詞、而忽有覺。某厥後屢奉秉信周旋、灼見秉信之果有覺、非學者所知。

今其云亡、其子行中求言以發其幽光。秉信之光、非幽所可間。秉信諱存誠、自其上世居四明郡城、中小湖之西南。曾祖諱浚明、金紫光祿大夫。祖諱琚、大學諭。父諱從、儒者。秉信幼不好弄、母滕氏鍾愛之、曰、當成大器。娶任氏、盡以奩具助嫁諸妹、全身布衣。見人所行當於理、必贊必譽。有違乎理、必告必戒。嘉定三年三月寢疾、故舊訪問、必謝曰、萃聚許久、今告違矣。毋笑毋訝。七日而歿。實壬寅。十有一月丙申、葬於韓溪之青嶂。嗚呼、秉信之善、人所共知。秉信之心、人所未知。人皆有此心、多不自知。友人楊某書。

楊簡撰 《慈湖先生遺書》卷五

格齋先生程君永奇墓誌銘

秀發起謫籍、受命知徽之休寧、聞休寧有格齋先生程君、正學篤行、思友其人、以自輔、而君不幸前一月去世矣。君之弟鄉貢進士永彰適來行都、奉

所狀事行、以君子瑜之意請銘其墓。秀發鄙陋、何足以知君。然以不及見爲恨、則誼有不可辭者。君諱永奇、字次卿。其先與河南程氏同出梁將軍忠壯公靈洗之後。君曾祖諱昭、以儒起家、爲饒州軍學教授、贈朝奉大夫。妣俞氏、贈令人。祖諱全、建炎初積武功至開州團練使、池州統制、封休寧縣開國伯、死于忠、贈太尉。妣金氏、贈宣國夫人。父諱先、以長子恩累贈履正大夫。妣劉氏、贈恭人。初履正公慟父死國、誓守墓不仕、刻意問學、愛君淵穎、有受道之資、親督課之。君亦厲志於諸經子史、悉含英咀華、而卒以反躬實踐爲事。文公先生省墓婺源、履正公挈君往拜、請受教焉。因令君侍歸建安、問難究詰、所造益邃。踰年而歸、文公手書持敬明義之說百餘言勉之。君歸、遂以敬義名其堂。邑人子弟從者雲集、而郡縣大夫有稽古禮文之事悉來咨訪、一言之下、罔不敬服。江西制閫請爲白鹿

洞書院山長、浙東帥專書幣聘爲塾師、皆辭不赴。履正公晚得痺疾、君孝養備至、務適其歡。長兄永正以門功居臨安、歷官帶御器械、清遠軍承宣使。君恆以國恥未雪、勉之盡瘁以嗣世烈。又用伊川先生宗會法、以合族人、舉行呂氏鄉約、而凡冠昏喪祭悉用朱氏禮、鄉族化之。僞學難作、君去隱邑之東山。值文公訃至、合同志者設位慟哭、曰、吾道已矣。或傳其輓章于有司、被繫數月、乃免。君於經傳玩索有疑誤者必謹識之、晚歲訂其大義所繫者爲六經疑義二十卷、四書疑義十卷、又以明道定性書、伊川好學論當與太極圖說、西銘并行、各爲之註釋一卷。文公語類出于衆手、純駁不一、自加詮擇、爲朱子語粹十卷。中和之說、文公蓋有遺憾、爲集其語、爲中和考三卷。君以大學工夫始于格物、自號格齋。所著詩文曰格齋藁四十卷。君年七十有一、以嘉定十四年十二月五日終于正寢。



疾革前一日、沐浴正衣冠而坐、門人交入問疾、久之曰、吾不能多言。呼紙筆至、大書一敬字、曰、守此足矣。君配查氏、賢孝慈淑、與君比德。子一人、瑜也、亦能劬書以世其學。君墓在邑東三里許程家原。嗚呼、聖學之晦、千五百年矣、二程夫子始昌明之、至文公先生與南軒、東萊兩先生鼎峙而起、號集大成。雖更黨禍、而有志之士終不自沮、若格齋先生、豈非特立不羣者哉。秀發執經東萊之門、嘗與聞先正之緒論、而嘆同志者之不可復作也。敬序其事而銘之。銘曰、

詞華相矜、惟士之陋。虛無相高、惟士之謬。猗君之生、所稟既秀。持敬明義、得于師授。刊彼詞華、不懼世垢。黜彼虛無、不爲道疚。廓然此心、六合宇宙。其體具矣、而用弗究也。噫。

葉秀發撰 《新安文獻志》卷六九

宣義郎致仕別公墓誌銘

端平改元之年、予被命還朝。明年、別侯之傑授使者狀、以其父母墓隧之銘爲請、予謝不敏。侯申以書曰、親喪所自盡也。雖然、人處其常、吾處其變。始守德安、僅竊豆區祿、以爲養無祿。先君即世、跣護輿輶、以返葬于上泉、伏由閭廬、將伸顧復之報、會四郊多壘、起守安陸、銜哀籲天、屢請弗愈。不肖孤懼以方命貽譴、重爲吾母憂、強起視事。厥十年、再鎮荊州、先夫人又舍去。方煢煢在疚、公朝未忍棄捐、申命守荆、尋改儀真。追惟異時壓於時宰、有慙初志、乃上疏固辭、然大懼不孝之誅終無以自贖也。匪公發潛、即死將不瞑。予惟三年之喪、自天子達于庶人、堯舜至孔孟無改也。記禮者奚據、乃有金革無辟之說、以徐戎作難之年攷之、周公固無恙也。或曰、是爲母喪、然不可攷矣。獨惟伯禽治魯、方以喪三年然後除之、爲變禮易俗之先務、故遲遲而後報政、安有以此化民而身自畔之、其決不

然也。本朝宰執起復如寇、富、陳、蔣諸賢，終不可奪。雖有強起者，亦未有不持餘喪。乃自比歲怙權固位之臣，昉以伯禽藉口，雖一時賢牧守亦例被迫蹙。至端平以後，士大夫始克秉禮奉法以各如其志。於儀真之得請而侯之本心始見，則可哀已。按狀宣義公諱湜，字景甫，其先謂以大別山得氏，歲久無可考證。南渡後散居荆郢。曾祖震，祖宗考中孚妣王氏。公幼而孤，依兄澄以立。甫入黨庠，習射于圃，升降揖遜，發必中鵠。年二十，發憤力學，夙夜不懈，專以河洛諸儒及近世朱、張二先生經說爲宗。郡侯陸公九淵見而異之。後徙名數于襄，三舉於禮部而連黜於春官。晚該特恩，對策大庭，語直多忤，第居末等。會天子試士以射，公六發五中，獨冠在列，升昇上州文學。又遇郊賞，授迪功郎，監印州合同茶場。時之傑亦舉進士第，主應山簿以歸。父子並命，鄉黨榮之。家食未上，引避茶馬使親俾。

代者往，自是不復再調。挂其衣冠，隱約阡陌，族姻有不給者，稱家有無以賙之。鰥寡孤獨廢疾者，絕甘分少以扶持之。凡十有八年，僅一就養于安陸。每憑高望遠，中原在目，感慨歎歎，言言教思。人始知公非果無意於世者。以寶璽恩循修職郎。主上登極，以子陞朝恩授承事郎，再遇郊恩，進宣義郎。寶慶元年十二月□□，以疾終于府治之中和堂。享年七十有五，葬于明年三月壬午。取同郡田氏，累封太恭人，壺儀肅穆，嬋德于公。有女士風烈。後公十年，當端平元年二月<sup>④</sup>月，卒于江陵府治之正寢。年八十有三。子男二人，之英、業，進士。次即之傑，朝散大夫，直敷文閣，前知江陵府。女一人，適齊可久。孫三人，模、桷、栩。將以今年十一月庚申，祔葬上泉。予嘗觀春秋之世，楚最多材，流風所漸，至有悅周公、仲尼之道，北學於中國者。如公氣弘而毅，逮聞先獻，亦所謂楚產之豪傑矣。矧又有子承家，是宜





銘。銘曰、

允毅別公、維德之臧。維卒不施、匪天則爽。有赫其昌、遺後人以慶。我銘不亡、以旌其藏。

魏了翁撰 《重校鶴山先生大全文集》卷八五

別少師改葬墓碑

古不修墓、不改葬。蓋謂葬者、藏也。一藏之後、雖萬子孫莫能改也。然嘗讀儀禮至喪服、乃云改葬、緦子思之答司徒文子、又從而釋之、曰、禮、父母改葬、不忍無服、送至親也。穀梁氏、鄭玄氏、韓愈氏互有發明、以識其事。是改葬之說、禮經有之矣。文王之葬王季也、以墓於欒水、故出棺而更葬焉。孔子之葬徵母、并官氏也、以殯在五父、通衢、故遷柩而合葬焉。是改葬之禮、大聖人亦嘗行之矣。近世鴻儒鉅公、蓋有以蟲之孽而改者、魏公之遷於大滄是也。有以水之嚙而改者、濂溪之母之遷於廬阜是也。有以卜宅之不祥而改者、文公之父之遷於白

水鵝峰是也。誰謂改葬非禮之經歟。然未有因師旅而遷者。按春秋傳、惠公之薨、世子尚少、會時有宋師、弗克以禮奉襄事、暨隱元年冬十月、始亟圖改葬焉。不惟悼禮之不備、蓋亦虞幽宅之有後艱也。今大資政別公之傑、葬親於荆之上泉、至是廿有三年矣。忽一日、以書抵延州、來示吳子泳、曰、二尊之喪、鶴山魏公已銘諸甫竈。今不幸荊州以北戎馬驛騷、卜地之不審、以危其親、實人子之大痛。用負其喪、徧營改卜、得地協吉、葬有期矣。終以處其事之變、不得安於禮之常、爲憾。子盍爲識其遷之故。余撫書太息、曰、父母子孫一氣而分形。親之體魄安、則此心亦安。親之宅兆危、則此情亦危。一拳石之毀、一抔土之傷、見者尙爲之心惻。況丘壟隣於戎馬、仁人孝子可坐視而弗之改歟。禮緣人情而制、有經而等者、有曲而當者、其實皆禮之常、而非禮之變也。少師諱湜、字景甫、生荆楚間。少負



奇氣、靖重寡言、篤實敏行。長益降心學問、非洙泗關洛之書不好也。其文章古雅、尤精於射、意謂可以鼓行秀造之林、而三請能書、晚僅以特恩補官。夫人田氏、柔嘉淑明、克相夫子、澹如也。二子、長曰之英、季曰之傑。家事巨細、悉傳之長男。而季子則程勵課督、使之大肆于學、每黨痒術序郡國校試、必偕焉。之傑遂以明經登戊辰進士第。頃在朝、以同知樞密院事兼參知政事恩、加贈先公少師、夫人郢國。其諸子孫皆以京職官任。於戲盛哉。將以淳祐丙午七月望日辛未定遷于安吉州德清縣金鼇山之原。山舊名金鵝、改名金鼇者、皇上特書也。在喪葬令、凡諸贈官得同正官之制、奎畫昭回、綬章炳煥、則今之葬也、踰有光於前矣。泳雖不及識少師、獲拜郢國於江陵袞歸堂下、且與公第同年、寓同里、知其銜恤卜兆、祈請於上方甚哀。故譜系享年門外內之治、更不詳載、特誌夫所遷月日、

而繫之以辭曰、

人生之初兮、天依形、地附氣。人歿之後兮、還精於天、返魄於地。何地不可藏形兮、豈必故鄉是懷。紛楚氛之未靖兮、望郢門而長哀。黃沙漠漠兮、白榆夾路。魂毋歸兮、於此乎安處。傷哉北邙兮、下邊於夷纍。侯王之冢兮、碣獸之舊題。封不厚兮、草木凄止。坎不深兮、狐狸扣之。姦窺鬼瞰兮、玉不泣、金不曉。魂毋歸兮、於此乎安栖。鼇之山兮、鵝之水。後谿如帶兮、前山如几。鵝初鳴兮、田實好實褒。牛勿踐兮、草方苞。方體青烽不到兮、赤蟻皆徙。魂毋歸兮、於此乎安止。畫翬兮、輕輦。紫書兮、蜜章。置守兮、冢人。相儀兮、職喪。易士葬以公禮兮、轉蒿里兮、薤露。非後踰於前兮、以爵等爲丘封之度。魂其來兮、胡爲乎中露。古不祭墓兮、周官爲尸。古不改葬兮、儀禮曰總。憲言之垂後兮、人莫之師。乃神青鳥白鶴兮、決兆於枯骨朽著。彼不思奉先之孝兮、反營遺

後之利。魂其來兮。請視予之誌。

吳泳撰 《鶴林集》卷三四

宋王勉夫壙銘

嘉定六年四月二十九日、笠澤王先生以疾終。其年九月二十四日、葬於吳縣橫山先壙之側。其孤德文號泣致書、走介千里、訴曰、先君不求聞達、所以傳信於後者、必託諸銘。君從先君遊、知之實詳、敢請。初、紹彭先大夫僑居笠澤、先生年甫弱冠、籍籍有能文聲。先大夫禮致齋館、喜曰、汝得所矜式矣。受業六載、開迪宏多。先大夫日夕相與優游宴處、定爲文字交。繼宰華容、力挽偕行。先生以親老辭、雖相望荆浙、先生得一善必以告紹彭先大夫。一觴一咏、未嘗不屬意先生也。先大夫平時許與、每以遠者大者期之、曾不少見於世。則次其顛末、今何敢辭。先生諱楸、字勉夫、家本福之福清。自其曾大父徙平江、後居笠澤。先生資稟穎悟、趨向端

方。少失所怙、事母以孝聞。與人交、誠實無虛語。有義事、雖窘匱必竭力爲之。清淡寡欲、刻苦嗜書、寬厚長者、恥言人過、鄉里皆謂之善人君子。少嘗有志功名、蹭蹬不偶。自母夫人歿、悉棄所習、不復逐時好、取世資。或以勸之、泣曰、祿不逮親、尚奚望。榜所居曰分定齋。先大夫及浙西參議陳公造爲文以記之、富貴利達、恬不關念、安於義命若此。杜門著書、留意古學、有野客叢書三十卷、巢睫稿筆五十卷、叢書門分類聚、鈎隱挾微、考證經史百家、下至騷人墨客遺草佚事、細大不捐。士大夫爭先贖寫。親族之仕達者欲鋟木以傳、先生辭之。顧語弟子曰、吾目未瞑、且將有所增益。嘗以文謁石湖先生、一見爲之擊節、雅相推譽。客於湖南倉使張公、顧之門逾三十年、賓主相懽如一日。人皆賢之。晚得拘攣之疾、坐卧未嘗廢卷。易簣之夕、神觀不亂、作詩一絕、擲筆而逝。享年六十有三。詩中有趁著

風帆便上船之句、胸次夷坦可知。娶葛氏、能盡婦道。男二人、德文、純文、皆業進士。嗚呼、才大者用必宏、先生之才獨蓄於用。德博者壽必遐、先生之壽不報其德。命矣夫。若其譜系之詳、與先生履行之美、則有樞密曾公孝寬、司諫江公公望之志銘在、茲不復錄。銘曰、

何才之豐、何道之窮。橫山之中、是爲先生之宮。

郭紹彭撰 文淵閣四庫全書本《吳都文粹續集》卷四

○

### 楊料院墓誌銘

文公朱先生守臨漳、興學校、明禮義、以教其郡之士。擇士之志於學者、置賓賢□。以處之。楊君士訓字尹叔、實與焉。予以諸生從、始識君。君年尙少、已爲儕輩所推重。戶部郎中王君遇剛介少許可、獨器君、以子妻之。予與王君交最厚、知君志行爲尤詳。已而聞君擢進士第、初試吏、爲福州古田尉、再

轉爲潮州海陽丞、福州永福令。古田、永福又予鄉之鄰邑也。君之政譽益有聞於人。會湖廣總領請于朝、願得廉靖吏以董軍餉。君亦以邑最爲諸臺交薦、遂以選差監鄂州糧料院。未幾聞君歿。累官至宣教郎。年五十有八。嘉定己卯三月二十有六也。將以明年正月壬子葬于漳浦縣永清里官陂之原。其孤以予與君有雅故、來請銘。所以叙述君之本末者、皆予所親見聞也。君之曾祖絳、祖宗孟、世積厚德。至父成大始貢名禮部。君醇靜警敏、少刻厲自奮。處鄉校、入太學、杜門劬書、不爲獵涉綴緝、務求聖賢遺意而躬行之。文公嘗稱其學已知方、則其望之亦至矣。持身謹恪、一語笑不妄發。處家內外肅然。少孤、事祖母孝。遇所願欲、雖行數十里、不憚艱險、以求順適其意。所不樂、一毫不敢有所拂。有疾、訪醫行禱、循陔百匝、鄉空悲泣、疾瘳乃已。既歿、執喪盡禮。及葬、廬于墓左、朝夕哀號、至毀



瘠骨立。終喪、鬢髮盡白。仕於其邑者、相與爲詩歌以詠其事。厚於親族、急難乏困、竭力調救之、雖功總之戚、必爲之制服蔬食。朋友貧、願稱貸者、倒篋予之、無吝色。故君之內弟有同居終其身者、及君之歿、水漿不入口者累日、寫其悲痛之情、見之篇什、有人所不忍聞者。其居官一以寬和爲主、不爲震厲立威名、善者扶之、豪者柔之。人亦感其誠、不肅而自化。民有爭訟、先以禮義曉譬、有遂釋所爭而去者。至決事、姦無所容、而曲直咸得其情。其治永福、留意學校、更定祭器、修立社稷、風雨師壇、有以民俗險健爲言者、君不敢鄙夷其民、推誠以待之。邑之人士誦君之德、不容口、有曰、公之德量、汪乎如不撓之陂。公之接人、溫乎如可愛之日。潛心可質之上帝、操行不欺乎暗室。諸臺亦以豈弟慈祥、聽訟平允薦之、皆實錄也。自北鄙兵連、民疲轉餉、而士不宿飽、至舉荆襄兩路軍儲以屬君、君亦

以忠誠懇篤、慨然任其責、上下相慶、以爲得人。未踰月、君歿、行道之人皆爲之咨嗟涕下。君素廉介、至無以爲歛、總餉者義之、帥其僚屬爲之具棺櫬、備舟車、護其喪以歸。觀君所以感於人者如此、則其歿也、不獨爲君惜也。蓋君資稟既厚、而又切於爲己之學、故其立行無瑕玷、而孝道之篤、尤人所難及。措之事業、雖未能大見於世、即其已試者、充之、顧亦何施而不可哉。嗚呼、習俗之薄久矣、不學者無以議爲也。學焉者、工言語、事容飾、植聲名、殆類知道者、胸中所存、矛戟森列、雖父子骨肉間、不能盡其道多矣。況他人乎。況以臨其民乎。若君者、非古之所謂篤行君子乎。君之子七人、景亮、鄉貢進士。次厓、爲族人後。次□。餘夭。君之教子、以孝悌忠信爲先、其餘利祿、未嘗一語及之。故其諸子皆篤學謹行、克世其家。予旣深識君、而又參之以師友公論之所推許、是宜銘。銘曰、

厚其根、其實不蕃。流之長、不如其源。天命靡常、定理則存。濬其源、毋伐其根。不在其身、在其子孫。

黃榦撰 《勉齋先生黃文肅公文集》卷三五

### 黃榦傳

黃榦字直卿、閩縣人。受業朱熹。熹語人曰、直卿志堅思苦、與之處甚有益。遂以其子妻之。熹作竹林精舍成、遺榦書、有他時可請直卿代即講席之語。病革、以深衣及所著書授榦、手書與訣曰、吾道有託、可無憾矣。榦持心喪三年、調監石門酒庫。韓侂胄謀用兵、吳獵帥湖北、訪以兵事。榦曰、聞議者欲爲大舉深入之謀、果爾必敗。此何時、而可進取哉。知漢陽軍、值歲饑、糴客米以賑。制置司下令、欲移本軍之粟而禁其糴。榦報以乞候榦罷施行。荒政具舉、旁郡饑民惠撫均一。春暖願歸者給之糧、不願者結廬居之。民大感悅。知安慶府、金破光山、安慶相去不遠、民情震恐。榦修守備、分城爲十二料、

先自築一料、計其工費、然後委官吏寓公士人分料主之。日治府事、夜入書院講論經史。城成、上元張燈、士民扶老攜幼、往來不絕。有老嫗百歲、二子輿之、諸孫從至府致謝。榦禮之、命具酒炙、勞以金帛。嫗謝曰、老婦之來、爲一郡生靈謝耳。太守之賜、非所冀也。不受而去。金人破黃州、淮東西皆震。獨安慶按堵如故。霖潦月餘、城屹無虞。舒人相謂曰、不殘於寇、不陷於水、生我者、黃父也。徙知和州。榦移制置李珣曰、今日之計、莫若用兩淮之人、食兩淮之粟、守兩淮之地、然當先明保伍。保伍旣明、則爲之立堡砦、蓄馬繕器、以資其用、不過數月、軍政可成。珣不能用。珣往維揚視師、招榦偕行。珣幕府多輕儇之士、僚吏謀畫皆沮抑、人心不附。時流移滿庭、而諸司張宴無虛日。榦知不足與共事、歸自揚州、辭郡乞祠、閉閣謝客。復與珣書曰、浮光敵退已兩月、不知吾所措置者何事、所施行者何策。邊



儒藏

備之弛、又甚於前、日復一日、恬不知懼、恐其禍又不止今春矣。向者輕信人言、爲泗上之役、喪師萬人、良將勁卒、堅甲利兵、不戰而淪於泗水、黃團老幼、俘虜殺戮、盱眙東西數百里、莽爲邱墟、安豐、浮光之事、大率類此。竊意千乘言旋、必痛自咎責、出宿於外、大戒於國、曰：此吾之罪也。有能箴吾失者、疾人諫、日與僚屬及四方賢士討論謀畫、以爲後圖。今歸已五日矣、但聞請總領、運使至玉麟堂賞牡丹、用妓樂、又聞總領、運使答請宴賞亦然、又聞宴僚屬亦然。邦人軍士聞之、豈不痛憤。且觀牡丹之紅豔、豈不思邊庭之流血。聞管絃之啁啾、豈不思老幼之哀號。睹棟宇之宏麗、豈不思士卒之暴露。食酒饌之豐美、豈不思流民之饑餒。敵國深侵、宇內騷動、主上食不甘味、聽朝不怡、大臣憂懼、不知所出。尙書得不朝夕憂懼、而乃如是之暇逸耶。今浮光之報又至矣。金欲以十六縣之衆、四月攻

浮光、侵五關、且以一縣五千人爲率、則當有八萬人攻浮光、以萬人刈吾麥、以五萬人攻吾關、吾之守關、不過五六百人、豈能當萬人之衆、則關之不可守決矣。五關失守、則蘄、黃決不可保。蘄、黃不保、則江南危。尙書聞此、亦已數日、乃不聞有所施行、何耶。同幕共詆排之。未幾、光、蘄、黃州繼失。榦力辭、再命知安慶、不就。入廬山、訪其友李燔、陳宓、相與盤旋玉淵三峽間、俯仰其師舊跡、講乾坤二卦於白鹿書院、山南北之士皆來集。召榦入對、在位者忌榦入見、必直言邊事、以悟上意、乃羣擠之。榦遂旋里。弟子曰盛、借鄰寺以處之、質疑請益如烹時。命知潮州、辭。乞致仕、卒、贈朝奉郎、諡文肅。

無名氏撰 《勉齋先生黃文肅公文集》附錄

董縣尉墓誌銘

番陽董君叔重之子浚、以書走漢陽、叙次叔重之言行、以求銘於其父之友黃榦、曰：吾父治命也。奉





其書而泣、進使者而問故。嗚呼、幹嘗從游於晦菴先生、今四十年矣、相與始終周旋最久且厚者、惟叔重爲然、宜其疾且革而不予忘也、其何辭。叔重諱銖、世爲德興望族。唐保大間始有以仕顯名者。本朝慶曆以來、六世從祖諱淵爲太常博士、高祖諱介卿爲刪定、自是業儒益衆、登進士第者相踵。曾祖材、處州縉雲令。祖陵、隱居不仕。考琦、迪功郎致仕、有賢德。晦菴先生嘗誌其墓。叔重天資警敏、勵志於學、自其少年已爲卿閭所稱道。叔重亦自負、以功名可唾手致也。旣冠、從鄉之儒先程公洵遊、公語以晦菴先生所以教人者、叔重盡棄所學、取大學中庸語、孟諸書日夜玩習。裹糧入閩、樞趨函丈、不憚勞苦。先生亦愛其勤且敏、不倦以教之。嘗語之曰、更宜深察聖賢義利之訓、反求諸身、推類窮根、漸次銷伏、使日用之間全在義理上立腳、方是講學之地。又曰、日用功夫、更於收拾持守中、

就思慮萌處察其孰是天理、孰是人欲、取此舍彼、以致敬義夾持之功。讀書須是就自己分上體當出來、庶幾得力。又曰、此心操則自存、動靜始終、不越敬之一字。伊洛拈出此字、乃是聖學真的要妙功夫、學者於此著實用功、不患不至聖賢之域。又曰、更宜加意涵養於日用動靜之間、不然徒爲空言、無益而有害也。先生嚴重剛毅、雖樂於教人、然非其資稟志尙可與適道、未嘗陵節施也。觀其告叔重之語精切懇到如此、非愛之深、望之至耶。則叔重爲人亦可知矣。叔重學益勤、志益苦、往來師門率不一二歲輒一至、至必越累月而後歸。故於先生之書無不通、而操存持守不負其所教。慶元初、先生歸自講筵、日與諸生論學於竹林精舍、命叔重長其事。諸生日所誦習、叔重先與之反復辯難、然后即先生而折衷焉。僞學之禁方嚴、有平日從學而不通書問者、有諱言其學而更名他師者、

有變節改行、狂歌痛飲、挑達市肆、以自汙者、有昔嘗親厚、恨不薦己而反擠之者。至其深相愛者、亦勉以散遣生徒、爲遠害計。諸生雖從學、亦有爲之搖動、欲託辭以告歸者。叔重正色責之、喻以理義、然后諸生翕然以定。非其見之明、守之剛、能若是乎。叔重敏志、工於文詞、藻麗而醇正、嘗貢於鄉矣。迨其晚年、始中進士第、授迪功郎、婺州金華尉、轉從事郎、以歿。人皆以叔重不得究其用爲恨、然使叔重以少年即擢高科、爲世所用、必不能用力於學、雖學亦不能專心致志而有得也。得此失彼、亦何憾哉。叔重事親孝、於朋友義以誠。家素厚、喜施予、親舊貧不能自振者、竭力扶持之、有利於鄉閭者、爭先爲之。歲或大侵、必發粟以賑貧者。故其沒也、鄉人皆爲之垂涕焉。叔重之施於家、施於鄉、如此、則推之於世、猶是也。士奚以窮達論哉。娶祝氏、生子二人、浚之弟曰淪。孫二人、曰槩、曰栗。叔重以

嘉定甲戌卒、享年六十有三。葬于其鄉銀城九峰之原、卒之明年八月也。先師沒十有六年、交游凋落、後生無所師承、而微言將絕。榦與叔重生同年、學同師、叔重沒而予亦老矣、故重爲之悲感、次其事而爲之銘。銘曰、

師之誨兮諄諄、君之德兮恂恂。交朋友兮以義、處閭里兮以仁。世方艱兮心愈壯、身雖屈兮志則伸。正以斃兮奚所憾、尙其似之兮後之人。

黃榦撰 《勉齋先生黃文肅公文集》卷三五

持齋先生鄭公墓誌銘

大學、中庸之書、歷春秋而下、非一世、經師儒之覽、非一人、未有灼然知其爲入德之門、傳心之法。天啓文治、我宋二程夫子始表而出之。淳熙間、道化盛行、朱子以天性之純明、加師友之講習、積四五十、十年不怠之功、然後是書闡明、貫通、揭如日月、坦如康莊、目視足履、小大無疑。一時門人更迭來、



執經受業者半天下。吾鄉之士方且溺於功利之習、而升夫子之堂僅三數人焉。至於講明窮理、正心修己、治人之道、備之於身、與夫二帝三王、周公、孔子、孟軻、子思所傳之心、至精至一、執而不失、而爲失夫子之所稱道贊美者、則未有如持齋先生者也。先生諱可學、字子上、系出於周威公友。典午渡江、平難將軍庠始南徙。由庠而下五世孫諱褒、爲太府卿、始居於莆田、力學好修、世號南湖先生。曾祖諱諶、祖諱思默、父諱仕謙、皆累舉進士不第。先生幼而文、冠而孤、撫諸弟、教授生徒以自給。淳熙己酉、鄉以貢于禮部、試不利。癸卯、與兩浙漕薦考官今福建帥侍郎蔡公幼學稱美其文詞。春有司又失之。是歲與弟仲伯偕進、偕退、乃謂仲伯曰、吾女弟年及笄、猶未行、歸賣疇先嫁之、使無失時。我始以覓官爲急、今年壯乃知未聞道爲尤急、我聞朱先生傳道之統、眞所願學也。遂裹糧千里、跼

門求見、先生一見、恨相遭之晚、握手評議、如夙友焉。蓋持齋先生窮理盡性、持心守身、一以聖賢爲法、其所未達於閩奧者一間耳。故見其師若曾子之於夫子、師視之如夫子之於顏子、道同氣合、率終歲一歸、歸則以書質所疑、有問斯荅、如環無端、皆前聖所未發之旨。朱先生之守臨漳也、虛子弟之師席、俾先生西鄉而坐。旣而歸富沙也、則又虛席以書招之、且致諸子孫慕向不忘之意。至再至三、又不已焉。其所往復之書有曰、此間難得人講論、每深懷想。又曰、近日朋友少看得如此、深惠鄙懷。又曰、斯道不絕如綫、唯冀勉厲以副所望。皆親蹟、不能悉舉也。嘗以大學一編、晚所刪定、示諸生曰、此書欲付得其人、唯子上足以當之。其親傳面命如此。故四方學者至即有問、必使先生正之、而仕之來南者、命必見先生而後行、其所尊敬又如此。故先生之名實榮於時、未常有枉己爲人意、而

諸公名人皆欲招致不可得。故與大理卿曾逢、工部侍郎曾逮爲忘年交。呂寺丞祖儉、李郎中孟傳、詹監丞徽之、廖郎中德明、鄭郎中肇之皆知敬愛。從叔軍器監果仕必與諸先生與人交、氣和而清、竟日端坐、不見怠容。誠信溫恭、其所誨誘、皆爲名士。晚與古靈先生之孫、故廉州太守朴遇於湖南、與致合浦、率五鼓危坐、聽先生講書一篇、然後視事、逾年不輟。有以見先生師道之行於人也。前後三奉大對。嘉定辛未、勅授忠州文學。是歲冬、廖郎中爲廣帥、招致郡齋。明年壬申秋、親友勉先生調選、今廣西憲方公信孺時守春陵、屈以偕行、至則湖南漕曾槃留攝衡陽戶曹。還其檄、至豫章、卒于豐城。享年六十有二。春陵守徐公杞解組歸、遇於道、買棺以斂。方公遣使奉敢于臨江軍、其弟仲伯哭往護喪。交友歸賻致贈、賴以不乏用。癸酉七月一日、抵里門、治命以妣公素爲後、年二十有一。仲

伯自兄之死、哭泣逾時而哀、服心喪三年、蓋師之也。明年甲戌、當廷試、不就、可以知先生之友愛矣。遺文有春秋傳議十卷、三朝北盟舉要一卷、師說十卷、詩數百篇。先生不喜爲詩、遇事感發、時出一二、朱先生嘗止之、以故不多作、然亦已駸駸江右之風。頃年時事一變、登朱門者畏避退縮、先生獨相從於寂寞之濱、嘗曰、吾所聞於師者、皆精微要妙、口傳而不書者也。吾老矣、不可獨善其身、將書之、淑斯人。某嘗恨爲童子時侍先君閑居間、朱先生自建上來訪、留月餘、及丁未歲先君薨、先生又來弔、時某皆年少、未知求教、至今追悔無極也。所賴以扣其不傳之秘者、有持齋在、今復已矣、豈非命哉。嗚呼、士生斯世、朝聞夕死、孔門躋之。吾鄉曩時諸先生、如浹祭之學、博文雄、艾軒之理、精思古、皆足以暴白於後世。而求其得百世之師而教育之、以致於卓然成德、則先生此樂未多遜也。所得

如此宜外物不足□□。葬有日、仲伯走安溪謂某曰、而嘗從吾兄遊、知之深、不可不銘。銘曰、

惟朱先生、續道之真。友已教子、實難其人。先生脩家本與道合。一見而契、如虛斯納。壺山之下、朱紫則多。得道之傳、其人幾何。我作銘章、刻之幽室。四尺者封、千載一日。

陳必撰 《復齋先生龍圖陳公文集》卷二一

### 劉隱君墓誌銘

出安福縣北門四十里所、曰東江之劉者、儒家者流也。子所識者曰堯京暨其子子東、子方、曰立道、曰仲謙暨其子希韓、希仁。蓋予與堯京父子同登瀘溪先生王公之門、而立道、仲謙又與予同僚於贛也。獨隱君季齡無一日之雅、然亦聞其賢。予猶子壽森手攜族弟夢信所狀季齡之行來求予銘。予驚喟曰、季齡未老、何至於斯。曰年五十又一。何時。曰嘉泰壬戌二月五日。嗟乎、予年七十有六、而

閱諸劉在亡者四五世矣。信矣、人壽幾何也耶。則論次而筆之。君諱庭老、季齡其字也。其先出漢長沙定王發。在唐曰景、居高安、徙東江。景十二世曰曼、於君爲曾大父。曰彥章、於君爲大父。曰江、於君爲考。此君之系世也。安福之名儒故桂陽縣丞歐陽彥文、今通直郎戴仲弼者、此君之外舅且師範也。其初從彥文、仲弼講習切磋、學進進而文增增、朝異而夕不同。每一文出、二公必稱焉、謂同學子皆當避君三舍。及賈於有司、輒不讎。年四十即歸隱。曰、此豈古人爲己之學耶。署其堂曰養浩。尙書謝公書<sup>①</sup>之、且記焉。杜門取故書讀<sup>②</sup>之、源乎六藝以鉤其沈、派乎諸子以泝其流、泳乎遷固晉唐之史以傳其瀾、厲揭乎韓柳歐蘇之文以演迤其畔崖。此君之文學也。武經郎高某夫婦僑死于里中老子之宮、未葬、其子器之如武昌謁親故、又僑死于塗。器之有子尙幼、有女兄新寡、無子、絜一孤女



儒藏

以依其弟、至是無所於歸。君葬其三喪、教育其子而廩其家、以族子娶其甥而迎其妻母。歲大侵、細民棄嬰兒於野數百、君爲粥以食之、至西成、以歸其父母。二眚相仇、甲欲潛兵其乙、君呼來前、折其不直者、俾謝其直者、釋然解去。慶元五年秋、鄰鄉有山市曰雙田墟者、兩山牆立、一溪蛇行、其間居民數百家在焉。一日天欲明、溪水涌出、傾一市往觀、未至、水已登岸。觀者反走入室、隨入室、又升樓、水至樓、又升屋、水至屋。未一瞬間、數百家忽失所在、廬舍人畜蔽流而下。未午水涸、漂尸滿野、哭聲震天。君往拯之、載糗糧<sup>①</sup>具棺槨、恤生瘞死、活者何數。此君之行誼也。配歐陽氏、彥文女也。二子、紹元、紹雲、皆業文有稱。紹雲秋闈選充太學待試弟子員。二女、嫁進士張子華、彭逢辰。此君之家人也。鄉曰某鄉、原曰某原、山曰某山、此君之宅里也。其歲某甲子、其日某甲子、此君之崩時也。銘曰、

猗嗟季齡、洵惠且文。文不於其邦、於其身、惠不於其民、於其鄰。疇尼其仲、莫亨其屯。一豈其天、一豈其人。吁。

楊萬里撰 四庫本《誠齋集》卷一三二

校記

①「罔」下原有「末」字，據四庫本《鶴山集》刪。

②婦：右引作「父」。

③慨：原作「非」，據右引改。

④二：原脫，據右引改。

⑤生：原作「君」，據《野客叢書》附錄改。

⑥皆：原無，據右引補。

⑦原題薛紹彭撰，誤，薛紹彭乃北宋人。按《野客叢書》附錄此文題下署：「學生通直郎、權發遣安豐軍事、沿邊都巡檢使郭紹彭撰。學生通直郎、知台州天台縣、主管勸農公事盧憲敬書。學生新楚州司法參軍張願題蓋。」據改。

⑧缺字，四庫本《勉齋集》作「館」，清抄本作「堂」。

⑨下「書」字原作「爲」，據四部叢刊本《誠齋集》改。

⑩書讀：原倒，據右引乙。

⑪糧：原脫，據右引補。





宋儒碑傳集卷一百六十五

宋姓 李浹 李誠之 王之奇

宋文林郎墓誌銘

慶元二年五月某日、金華宋君以文林郎、廣西西路鹽事司主管官、終於廉州官舍、是歲十一月某日、歸窆於隆興府新建縣龍子岡。後三十有三年、君之子自適介章泉趙公昌父、有謁於建人眞某曰、先君子之逝也、黨論方譁、先友大愚呂公子約書來告、毋遽銘、自適不敢違。歲月飈馳、丘中之木、蔭數畝矣、而墓道至今無文可刻、懼終泯焉、亡以詔來者、敢請銘。某曰、僕之生也後不及、撰杖履從先大夫游、且樸學無詞華、懼不足以有發、敢辭。自適羸糧逆旅、凡三月、屢請弗予置。且出其書數通、其一曰、宋某字茂叔、生於紹興壬申、年十二三、已卓然自立、爲鄉里先進所知。從呂伯恭學、其論通鑑貫穿不窮、伯恭大奇之。紹熙改元、第進士、主筠

州高安簿。豫章帥王謙仲、邱宗卿、尤延之、皆待以上客。宗卿使虜、以爲書狀官、歸循從事郎、掾融州。裘滿、辟廣西鹽事主管官、漕張君量、胡元之、又待以上客。蓋其氣象和平、議論堅正、明敏足以決事、廉勤足以勵俗。不幸年四十餘、卒官。平時於經史、皆究極本原、尤工詩篇、興寄殊高遠。嘗次陸務觀韻、曰欲求平易多成拙、稍涉新奇卻未工。得句直須參造化、此身何必計窮通。胸次所蘊可見矣。視其名若字、則故相益國周公也。其友玉山徐斯遠、南城包顯道、又或傳其事、或爲詞以哀之。而徐之言曰、茂叔之材、內介而外通。平居一語不輒發、及其慷慨論天下事、是非可否、無所回隱。雖平生故人執政柄、在顯塗、一事不可君意、必騰書責之、弗置也。至於通練世故、熟識閭里情僞、吏治得失、則雖世之以吏能著稱者、無以過焉。茂叔其可謂有周天下之材矣。某讀已、矍然曰、益公之言、金石也。



雖微徐君之傳人其有不信者乎。夫傳猶贅也。銘之滋贅也。雖然自適之志蘊矣。不可以虛辱。則考其世系曰。曾祖裕。贈奉直大夫。祖有。朝奉郎。知郴州。其歿也。東萊呂成公誌其墓。考沆。學篤行高。鄉人尊之曰厲齋先生。君之母在郴州。獲異夢焉。既生。有異質。甫年六七歲。見經子輒成誦。若夙習。<sup>②</sup>郴州倅長沙。君年十四五。南軒張宣公一見許其資。可以任道。既又執經東萊之門。方是時。四方雋茂聚於麗澤者數十百人。君末。<sup>③</sup>至。一旦穎然出其列。成公寢疾。獨以任重道遠屬君。及大愚云。其掾融州。守貳不相能。事積弛。官奉兵食至。或經年弗予。君白守。此戶曹責也。則爲分畫措置。凡廩奉先兵後官。兵先外寨。官先下僚。而後以次徧及。燕饋他費。則以幣餘當之。郡仰鹽利以給。歲入比大虧。君爲爬梳剔治。未幾復其舊。先是郡官裘滿。多不能歸。君請次第償其逋奉。且帥同僚助以私錢。不半

歲。得替官亡留者。一日郡卒謀倡亂。其徒群詬曰。自戶曹來。吾輩妻子始亡饑凍者。若等忍負之乎。治獄細大必躬。戒吏胥毋得輒拷問。囚能書者聽自書。不能者許以吏代。而面覆之。片辭不同。輒坐書者。以故人得輸其情。雖重辟未嘗施一捶也。田主愬其佃不輸租。君命兩造至庭詰之。顧其貌頗相若。密使人盡取主家文書來驗之。則庶弟子。命還本生而均其產。以漕檄行視諸州。獨雷守陳亮弼有治郡材。已乃聞其削袞以免。蓋帥司水軍戍於雷。主兵官以等夷視守。守顧奉承之。陳至。稍絀其禮。主兵官怒。讒於帥。劾之。君爲雪其誣。且曰。兵廩於雷而不受節制。非便也。帥不獲已。騰君書於朝。以誤奏自劾。讒者坐削官。而令雷州節制水軍。如君議。帥故嘗薦君。以是浸不說。陰使人物色其過。始君以檄出州縣。禮饋如使者。君一切拒弗納。且責其文書傳吏牘。人始疑其矯。及是亡秋毫可

指摘、廉聲益暴著、疑者始大服。及爲主管官、故時月俸緡錢幾四百、君按法令纔受九十千而已。醯政垢弊久、討尋其故、大要命脈在鹽亭戶、還其未給本錢而寬其逋於官者、月再更、鹽利亦頓復。萬安黎寇作、使者以屬君。方盛暑、調兵食、勞憊不遑恤、疾甚、猶自力治文書、卻藥弗御、掩關掃地以待終。時母夫人王氏留桂府、君涕泣思念不少置。垂死、猶問得毋有從夫人所來者乎。蓋自適叙君之事如此、而其遺文有曰、人心至靈、萬善畢具。人之所以異於聖賢者、罪在自棄而不知求爾。求之如何。博學而審問、明辨而謹思、窮理以致其知、力行以踐其實、自卑而高、積小而大、造次顛沛而無自畫之間、則幾矣。若夫溺心於簡易之說、謂道可以悟入、聖賢可以立致、戒多學之累而廢見聞之益、守見性之說而忘存養之功、雖有得焉、烏知其非臆度料想之私乎。而其自贊則曰、忠信進德之基、

孝悌爲仁之本。行貴日益、文貴日損。聖賢之言、雖不吾欺、吾必求其真知。念慮之過、雖不吾罪、吾必求其亡媿。嗚呼、觀乎此、則君之所以爲學與其爲人可知矣。若是、其可不銘。君娶何氏、生子六。④曰自適、自道、自逢、自迪、⑤自述、自遜、皆能世其學。自逢易名恭、登嘉定辛未第、嘗官國子學、通判楚州、今降授宣教郎。女五、歸曹惟寅、趙與記、梁沈、⑥早夭者二人。孫男十有一。自君葬於洪、諸孤不忍去、因定居新建陽。⑦易俗坊云。銘曰、

世之誦君、曰材與文。顧是二者、孰其本根。蓋循循乎下學上達、而凜凜乎不睹不聞。履進修之實地、戒超悟之空言。斯其所以異於今人之學、而不辱其師之門者歟。

真德秀撰 《西山文集》卷四二

太府少卿福建運判直寶謨閣李公墓誌

銘



故參知政事吳興李公、以誠信質直事孝宗。時天子念討虜報仇、功緒未驗、晝夜耿耿。他執政多迎前趨和、退即覆卻異辭、上固不快。獨公謂機會難猝致、本根當牢持、諸所興爲、不宜以空意忤敵。公私懇切、始末至到。上感公忠實、久而順聽。然後大言迎附者稍復衰息、風俗浸向淳厚。而自淳熙接內禪二十餘年、天下安樂無事、中外謳歌至今、由公發之也。兩預政、終不取相位。退歸僧榻、食纔數溢米。蕭然永日、風操絕俗遠甚。三子、伯尙書、季侍郎、中子官差不遂、猶至卿少、皆有業、尙名稱著於世。而諸孫材賢矣。嗚呼、教以約而類者衆、受以薄而與之豐、天非偏厚李氏、蓋亦其理然也。余不及從參政後、而與三子躡履迹於朝會。少卿之孤仁本、以銘墓來請、因竊用常所論叙者爲書首。少卿諱浹、字兼善、有夙成之度。少游太學、諸生畏其能。授承務郎、監淮西惠民局。復鎖廳試禮部、詞致瓌

特、有司異之、曰執政子也、嫌弗敢上。親友交唁公、公嘆曰、吾旣仕矣、學有大於此者、科目何爲。自是不復求試、盡取諸書徧讀、其興壞因革一代之制、別自成編。而尤好左氏、爲作廣誨蒙、曰衆寶所藏也、獵而有之在我矣。歷幹辦軍器所、國子監書庫官。書庫在十年外、喜曰、積是歲月、足以寧吾親矣。期至、猶不忍行。參政曰、不然、今二孫已長、家問旦莫及、而爾兄弟結綬京師、吾意其少慰。公謝、勉出、監六部門、軍器監主簿、太府丞、大宗正丞。再知嚴州、不行。初、公在軍器監、言造會子者二百人、放作則散處於外、稍久則兌賣名役、恣其自便、誨其爲姦。宜置營區聚、老而後代、死而後收。及外府、又言四弊、戮僞造、一也。立營房、二也。紙綱出峽、重其防禁、無使售易、三也。暫止印造、或出內庫錢收換椿管、以救低折之害、四也。於時會子法未敝、而公之策如此。改知徽州。尋提舉浙東常平。會稽督零稅

急械繫滿府縣。值公攝帥，盡釋之。士民歌呼，叉手至額曰：「眞李參政兒也。」以兵部郎召。樞密都承旨蘇師旦倚權利傾天下，士公獨不往。師旦病之，或曰：「可餌而致也。」遷樞密院檢詳文字。公固不往，晨入局會揖而已。師旦怒，愬於專國者，徙將作監。旣而自爲節度使，賀客成市，公又不往。專國者奇之，曰：「是負氣有守，可尙已。」遷太府少卿。公建言：「治世黜虛而務實，今挾虛競僞者，醞成北伐之議，邊事旣壞矣，尙多夸詡以悞朝聽。詆虜則以強爲弱，以銳爲怯，譽己則以無爲有，以少爲多。上玩下怠，施置莽鹵，恐禍不可測。」願親札邊臣，毋得以不根無實之語輕輒來上。他日，白事宰相，又面論之。於是專國者亦怒。公因力請外，除直寶謨閣、福建運判。在職二年，孳孳爲民。蘇謙者，建之兇豪，兵興，席隅官勢，以殺人取賕賂，屢移獄矣。言路有爲道地者，使刑部諭公以建儲赦貸之。公曰：「隅官監臨也。受

財枉法也。庸可赦乎？不許。刑部吏朱書符端曰：「臺諫意也，勿誤。」公大駭，亟具奏爲吏借臺諫以令者，舉朝壯其爲，竟投謙嶺外而召公還。然卒排笮誣，瀾寢其命。公殊自喜，別墅有寒泉脩竹，留居之。以嘉定二年十一月二日卒，年五十八。三年九月十一日，葬餘杭縣茅山。夫人施氏、潘氏，贈宜人。四子：曰仁本、通直郎、新知南陵縣；曰仁方、承事郎、前知仁和縣；曰仁表、迪功郎、新海鹽主簿；曰仁元、通仕郎、五女、迪功郎、前烏程主簿、張端節、從政郎、新嘉興府司法、余過、迪功郎、吉州龍泉主簿、張恢、承務郎、監江東總領所藥局、蔣杞爲其壻。孫曰熙，曰勳。公文出新意，作生語，緻密簡雅，無刻露之態。四六絕去數十百年體裁，切對順偶，有若自然。圓行方止，不拘定質。詩騷尤清婉。其餘弄筆率就，皆有義趣。讀者雖貴珍，莫能定其價，而公亦深自積藏。雖子弟不覲也。遠齋公燕居之齋也，故公自記之。其



言曰、心遠物也。利害得喪欲惡、若一塵之起其前、遠者隔焉、心蓋近物爾。吾懼其然也、揮斥剔抉、使夫塵者不立而吾之遠者日充、充而至於無所終極、方寸之微而有不可勝用矣。嗟夫、人常求所以悅是心者、未嘗知所以病是心者、方將與利害得喪欲惡角立而並行、且竭力以奉之不暇焉。有以是爲塵而隔吾遠哉、又烏有揮斥剔抉、使是塵之不立而充吾遠也。然則公能求所以病是心者而治之矣。其能難進、其能易退、其立德深、其去姦果、仰能承其先、俯能訓其後、非偶然致者。文字之工、不足爲公道也。銘曰、

彼門地者、發身之秒。彼詞華者、得名之小。賢哉兼善、清明自躬。養心有本、聚學有宗。其在本朝、傑出特立。其在四方、護善鉏惡。豈不富貴、視若一塵。我爲悚然、思見其人。苕溪千里、湛其止止。我不見兮、庶幾在此。

葉適撰 《水心文集》卷一九

蘄州太守李公墓誌銘

李公茂欽、東萊呂成公之高弟也。淳熙中、成公之弟子約爲四明倉官、茂欽不遠數百里訪焉。余因是識之、風規峻整、志氣挺特、明于義利之辨、使人起敬。入太學、結交海內賢俊、相與講切義理益明。同舍生有病疫者、多方拯救、以身親之、義所當爲、不遑自恤。爲學錄、規繩井井、諸生嚴憚。留趙二丞相聞其賢、風使來見、一不往。嘉定中、余同官于朝、時時合并、壯其風操、每推許之。異時履險蹈難、以仗節死義稱者、必斯人也。及蘄春被圍、余日日夜念之曰、茂欽其死乎。旣而果死。嗚呼、賢如斯人、而可死乎。自古國家之立、必有正人端士焉。英特之氣、與生俱生、培之養之、益堅益壯、足以興起人心、維持三綱五常、而壽其脈、則社稷可以長保。茂欽之生、天之所以佑我宋也。茂欽之死、所以綿我宋

之無彊大歷服也。寧不偉哉。茂欽諱誠之。世家于婺之東陽。曾祖某。祖某。考某。俱不仕。考以茂欽該郊祀恩。再贈宣教郎。妣鄭氏。贈孺人。茂欽自幼莊重。不苟言笑。勤于務學。既冠而邃于易。登賢書。試舍選。俱第一。慶元初。解褐分教鄱陽。丁考妣憂。廬墓終喪。幹辦福建安撫司公事。性不喜覓舉。或勉之。則曰。彼誠知我。何必有求。彼不吾知。雖求何益。以此絕口不求。而帥若憲。俱以其公論所歸而自舉之。除刑工部架閣。擢國子錄。讒說肆誣。臺評且上。或言自辨可免。茂欽曰。吾不慣爲此態。惟有去爾。及報罷。舉朝冤之。送別者袂相屬。人更以爲榮。再期起爲江西運幹。部使者稱提會子。第其物力高下。輸錢以歛之。茂欽以爲富人至少。自中家而下。安所取辦而應此令。何如循舊例。止以鹽本錢通融。可以無擾。使者不悅。曰。商君之令。猶能必行。今乃齟齬如此。茂欽愀然曰。公以儒學發身。而欲

效商君之所爲乎。吾苦言難入。求奉祠而歸。使者遜謝。罷令而後止。改秩通判常州。總司督經總制錢甚峻。前此爲倖者。率以不辦取辱。茂欽始至。卽爲都簿。具財賦若干之目。言于主司。立爲定額。分限輸錢。罔有虧闕。宿逋亦補焉。不惟區處有方。亦由潔廉無私。吏不容姦。知郢州。時制帥頗有風力。而行事皆當。茂欽以書勉之曰。鎮壓不可以無威。必和易以通下情。斷制不可以不獨。必博咨以盡羣策。時以爲名言。揣敵必敗。盟大修邊防。戰攻守禦之具甚備。厥費緡錢十萬。舊有備邊下倉。復置上倉。糴米麥以實之。及敵至荆西。鄰州驛騷。制府調兵爲援。亟發州兵及統司所益兵。及保捷民兵。合二千五百人。撫而遣之。協古諸侯守在四鄰之義。且力請于朝。增新軍五百人。痛節冗費。財用常足。保此一邦。晏然如故。茂欽之力也。移知蘄州。蘄爲次邊。中興以來。未嘗被兵。邦人皆謂金必不至。





茂欽曰、備禦無素、忽長驅而來、將若之何。相視城壁而增益之、高與厚俱五尺、而濬其濠塹、厥深二尋而廣五之、備樓櫓、築羊馬牆、教閱廂禁民兵、激之以賞、增倉廩二十、積米以石計者四萬。先是郡中酒庫月解錢四百五十千、爲太守常俸、茂欽一無所受、寄諸公帑、兵食之儲、實此錢附益之。提點刑獄兼知黃州何大節欲堅守沙窩、黃土諸關、茂欽曰、古人守險、敵無他歧可入、故閉關足以絕其來。今五關三四百里、小路可入者以百數、安能盡守。若從小路繞出關背、毋乃大被其毒乎。不聽。大節又以黃陂一路無山可守、調民築堤、且發斬之民兵相與守關。茂欽言、黃陂之旁、地多沮洳、敵騎不能馳驟。若隄爲坦途、則其來易耳。民兵可保鄉井、遠適必無固志、皆不聽。後悉如茂欽之揣、金決策深入、以兵牽制浮光、而徑擣蘄、黃二州。時茂欽將受代、維舟江潯、欲遣其家先歸、聞敵入邊、恐人

心不寧、遂不果行。而州兵迎新者半、民兵復爲憲司所分、存者僅千餘人、勢力微矣。乃選擇城中壯丁、參以寄居宗子、分布城中。金兵將至、募敢死士三百人、迎擊于十里外、挫其先鋒、大破之。金爲連珠寨百道攻城、茂欽躬擐甲冑、朝夕巡歷、不復顧其家。歸正人張奇久居于蘄、茂欽察其有異志、并其黨誅之。金叩城呼、張奇毋誤我。則知其爲間明矣。造橋欲渡、則奪之。毀民居板木、排牆以進、則焚之。積火欲燒戰樓者、以水沃之。鑿小渠欲洩濠水、則盡殺而復窒之。佩銀牌、率衆來攻者、則射而殪之。又禽敵將七人。池陽、合肥皆遣兵三千來援、金擊之、皆敗走。統帥有擁重兵而至境上者、畏敵而不敢前。敵知外援已絕、而攻益急。茂欽調兵奪其攻具、殺兩大將、又以鉤繫長繩、拽其雲梯至前、亂斧斫之、墜者如雨。又令死士夜入敵寨、攻擊、不得寧息。又伏兵羊馬牆中、俟其至、掩之入濠、死者甚

衆製布囊以萬計、盛土積城上、礮不能傷。灌鵝車洞子以金汁、沃以膏油、頃刻煨燼。料地道所來之處、熏以毒藥、城得不陷。埋甕地中、令人潛聽動息皆知。掘城基者、擲火牛以燒之。發鐵礮者、張皮簾以障之。金不得志、將去。會黃州失守、併兵爲一、凡十餘萬。城中大震、茂欽神色自若、指所儲倉實曰、但自飽食、毋憂也。帥閫裨將徐揮以兵八百人來援、茂欽疑之、止令助守、不令出戰。揮詐稱欲迎援師、又不許。中夜率其衆縋而下、教敵登城、魚貫而進。茂欽之子士允力戰而死、茂欽率兵巷戰、自子至寅、殺傷相當。士卒感其恩、皆戰死、無一降者。茂欽于是死之。將死、呼其家人曰、城已破、汝等宜速死、無辱于敵。妻孺人許氏及婦若孫即赴水死。時嘉定十四年三月十七日也。金入郛、語人曰、非爾叛將送我登城、我明日去矣。聞者皆惜之。積官至郎壽六十有九。子士昭以守舍免。次士達蚤亡。次

士允。次士介、先一年卒。女適進士許之選。天子深知茂欽之忠、贈朝散大夫、秘閣修撰、追賜紫章服、封正節侯、賜額立廟于蘄、賻以銀二百兩、絹二百疋、仍賜爵迪功郎者三。贈其妻令人、士允通直郎子婦及孫女之歿于難者、皆贈安人。茂欽生長寒門、備嘗艱阻、授徒所入、專以養親、妻孥不預焉。中歲絕慾、獨寢一榻、泊如也。奉使典州、書尺饋遺、未嘗入修門。一心營職、計慮深長。至蘄之半年、便民五事中、力言六關不可恃、宜別駐一軍、扼其衝要、不然必殆。先見之明、有如著龜。又兩年間、與其弟書、豫以邊事爲憂、其言曰、旣任其責、不敢顧其身。又曰、一身一家、未保生死。職任所在、惟當盡死以守。此其平居真情之所形也。臨難捐軀、豈俟擬議哉。大義著明、人心奮發、通守秦君鉅、教授阮君希甫皆守節以死。茂欽實倡之。夫茂欽豈徒死者哉。世固有勇于徇義、而無奇策、拱手以就戮者、是則

徒死云爾。張巡守睢陽、賊百計攻之、隨方捍禦、出奇無窮。茂欽居重圍中、應敵之策、班班可紀。來攻者不遺餘力、捍禦者綽有餘裕。睢陽雖陷、而有蔽遮江淮之功。蘄城雖不全、而有阻遏賊勢之績。一郡罹其災、他邦受其賜、豈徒死而已哉。既歿之三年二月七日、其孤士昭葬之于邑東七里東山之原。孤欲求銘于某、其鄉人工部侍郎葛公爲達此意。某得附此以傳不朽、固所願也。銘曰、

嗚呼茂欽、萬夫之傑。學有師表、清明洞澈。如水斯寒、如火斯熱。如金斯精、如玉斯潔。死生一致、本無差別。不榮幸生、凜矣其烈。豈無才士、從容剖決。亦有詞宗、敷腴婉切。如彼春華、倏焉泯滅。潢潦無源、朝盈夕竭。維此茂欽、卓爾超越。不辱其身、全歸罔闕。茂欽云亡、梁傾棟折。凡我同志、未語先咽。東山之麓、我銘斯揭。過者肅如、斂衽祇謁。

袁燮撰 《絜齋集》卷一八

宋故蘄州使君正節李侯墓表

嘉定十四年、女真謀寇邊、邊報至蘄、蘄守李公戒將吏僚屬豫修戰守備。二月甲子、虜絕淮而南、陷六關、圍黃州、蹂蘄水縣。公命出兵迎敵、遇於橫槎橋、破之。居數日、虜擁衆臨沙河、經營欲渡、又破之。明日、虜兵大至、決隍水、焚戰樓、皆爲我師拒遏。以退。又明日、移兵要衝、爲必渡計。我師直前奮擊、殺其渠帥一人、餘烏獸散。虜雖屢挫、然自是謀益巧、攻益力、未幾遂傳城下、圍之數重。虜燔吾所立柵、我師爭之、殺將卒數十人、奪所佩印。三月丙戌朔、虜攻西門、射卻之。有據胡床督衆者、斃以一矢。虜造望樓以窺我、我爲疑兵以視之。既又使人持書來、脅降吾守者、公命戮之、而還其書。越二日、虜以攻具進、我亦設械禦之。長斧巨石、當者糜碎、烟焰所及、蕩爲飛埃。夜則壯士擣其營、每輒克獲。居數日、虜攻北門銳甚、我師縋而下、剿其人、毀其梯衝。



既又迭攻吾四墉、皆敗走。前後踰再旬、卒不能得志於我。會黃州失守、復鳩其醜類以來、我之將士軍民殊死鬪、亡一毫退沮意。虜技窮垂遁矣、不幸援師遷延莫至、我之叛將復導賊以登。辛丑城陷、公與其子士允猶率衆力戰、不克死之。嗚呼、公藐然一儒生爾、使其雍容朝著、論說古今、不過以德人莊士目之、一旦憑危堞、嬰敵鋒、奇變捷出、若老於戰陳者、援路既窮、竟以身殉。其堂堂大節、視晉之卞侍中、唐之張睢陽、無不及焉。議者徒知公倉猝所立之絕人、而不知其積之有素也。開禧中、某與公爲僚於閩帥幕府、居相鄰、游相樂也。公嘗慨然見語曰、篤信好學、守死善道、此吾輩八字箴、特患立志非堅爾。某敬佩其言。一日、有詒書廟堂、以糜捐自誓者、公毅然正色曰、士大夫此身獨當爲君父死爾、可輕以許人乎。此公伏節死義之心、已定於平昔講學之素矣。及是喟然謂其僚曰、吾以

書生、再任邊壘、行年七十、亦又何求、獨欠一死爾。寇至、當與同僚戮力以守、不濟則以死繼之。吁。公之素心堅定如此、其視事窮勢迫不得已而死者、可同日語乎。昔者子路問成人、孔子旣以見利思義、見危授命告之矣、至其門人子張、又以見危致命、見得思義、與祭思敬、喪思哀並言之。聖賢平日講論、必先以危難自處、他皆言思而此獨不言思者、豈非死生之際、惟義是徇、有不待思而決乎。此公所以自斷而弗疑也。公之學主於力行、而充以涵養、平居接物、容色粹穆、飲人以和、見者意消。至其論是非、辨邪正、則凜焉不可回奪。某久從公游、覘之熟矣。嘗竊以謂、仁以爲己任、死而後已者、公實有焉。使其見用於朝、居扶顛持危之地、則若汲長孺之不可招麾、蕭望之之折而不撓、皆公所優爲。惜也。巨木百圍、不得以棟楹九廟、暴風疾雨、僕之於窮山荒谷之中。自公而言、固得其所以死而

爲世道人材計者、可勝痛哉。世皆言公守蘄以扞賊、有蔽遮舒、巢之功、某獨謂公之一死足以激昂天下臣子之心、使知幸生不足榮、而義死不足畏。帥是以往、人人皆金城也、保全二郡、直其細爾。還觀一時邊鄙之臣、蓋有惜死而逃者矣。鼠竄偷生、迄亦不免、含媿入地、猶有餘辜。公雖歿而義烈昭然、與天地日月相爲亡極、是豈不深可貴邪。始公之議城守也、通判州事秦侯鉅、教授阮君希甫、實與公協同一心。其參與籌畫、則軍事判官趙汝標、知蘄春縣林檠、主簿甯時鳳、其分任守禦、則統領孫中、江士旺、監轄嚴剛中。是數人者、職守不同、人品亦異、然皆生盡力、死盡節、無一首鼠自全者。事方急時、或說甯君出城以追難、甯曰、平時辱太守深知、賊至之日、握手丁寧、勉以忠義、今可負之邪。觀甯君此言、則公之以誠與義感人、使至死不忍背者、其必有道矣。公旣闔門蹈難、兄之子士宏適

來省覲、亦與焉。某時憂居故山、有以其事告者、悲慟久之、顧謂家人曰、天必不絕忠臣之後。已乃聞其長子士昭以先返舍獲全、噫、天道之可憑若是哉。初公爲惠民倉、屬某書其事於石。變亂之餘、公私廬舍俱蕩滅、而此倉巋然獨存、遺民來歸、賴以有濟。公雖死、其惠猶足以救饑殍、活生靈、可不謂仁矣乎。世降俗靡、士大夫以全身保家爲賢、聞公之死、相與訾議者不可稱數。賴天子仁聖、愍書恤典、所以褒揚者甚寵、然後人知忠義之獲報、而公之道始大光明於時。故龍圖閣學士四明袁公旣銘其藏、士昭復謁某表其墓。某惟袁公之賢、其言足以信萬世、不待表而見也。獨念平生與公交踰金石、其可默亡一詞、輒叙所聞與誌銘所未及者、以俟後之君子。嗚呼、公今已矣、士大夫聞風興起、豈必危難而後見哉。立朝事主、以盡忠竭節自期、涖官臨人、去苟且自營之念、則是亦公之心也。詩



曰高山仰止、景行行止。夫高山則仰之、光明正大之行則必行之、非可以徒仰而已也。有志之士、其亦勉諸。

真德秀撰 《西山文集》卷四二

故端明殿學士王公行狀

公之先、華州人。唐末巢寇挺亂、避地慶州、家焉。公生於涇州、姿稟粹美、丰度凝遠。少師嘗曰、此吾家黃叔度也。蚤嘗從和靖先生尹焞學、探窮理盡性之妙、講貫經旨、周知物情、尹深器之。紹興元年、以少師任、補京秩。八年、奉祠、以便親養。明年、丁瑯琊夫人憂。又明年、丁少師憂。少師蓋以不主和議、忤時相、出知潭州、再貶道州以卒。公兄弟護喪、居南康之都昌。乃相謂曰、家難至此、睚眦猶未已、懼不免禍、蓋謀遠徙以避之。巫山、吾先少師之所舍也。因居焉。二十年九月、果中飛語、逮捕峻迫、人爲公危之。公平生學力、臨難不苟、舒徐區處、居者行者

之計、意甚暇豫。比至大獄、告者自相抵訐、不辯而直。迎附者猶欲傳致深文、公以家世忠孝、寧死不當受誣讟。語侵時相、竟坐謗訕、謫梅州。築樊圃、藝蔬茹、暇日從諸生講學相娛悅、了不見遷態。以南方無醫、手劑數藥、求者輒予之、所活不可計。道遠不能以書隨、乃次錄所記、命曰羣兒故事、以誨飭諸子。聞者競傳、州人家有其書。二十五年十二月、拜自便之命、尋甄叙元官。時三兄皆已物故、公自廣之蜀、間關萬里、訪求孤惻、有流落不振者、各經紀其生業。遂返巫山故廬、杖屨林泉、有終焉之志。會朝廷盡復少師故官、公亟展墓都昌、感上恩之渾雪、幡然改曰、君臣之義不可廢也。調瀘南鈐司幹官、時年踰四十矣。實初試吏、而政事諳練、憲章明習、若素宦然。婉畫之當、出人意表。剛毅有守、不爲勢力搖沮。瀘川闕令、帥難其選、檄公攝事。公即日請往、戴星出入、省斷冤菑、抉剔荒蠹。瀘邊夷獠

民風愿樸多西游民占數罔<sup>⑧</sup>利根株蟠結自爲長雄專事武斷官吏不敢誰何民無所訴及是懼公嚴明迭相規飭一事不至公庭善類吐氣眞令及境皆願借留譽處甚休在瀘三載凡三易帥俱薦公以四科隆興改元十一月虞公允文以尙書制荆襄尺書造公廬辭旨鄭重邀公以鄭倅且貽書夔帥暨諸司委曲敦遣既至則倒屣迎勞恨相見之晚語寮屬曰王公當今第一等人半刺豈足以觀設施檄守光化軍光化經劉萼蹂躪之後民力剝敝加於他州重以異時守土率行一切之政號令不常民聽滋惑公既盡力以摩撫瘡痍又悉意以奉行法令倡率其下剛柔緩急因事制宜百姓皆以爲便己有陂湖隸公帑前是歲一竭澤以爲常公謂曷若廣上好生之德施爲生池刻石以識居數月郡計既充則葺城池飭邊備百廢具舉虞公允文聞之遺公以書曰眞得良二千石爲之喜

而不寐未幾制司罷局公以辟命亦解綬去時新割唐鄧大江以北唯光化與襄陽相爲唇齒公泣事踰半載敵無飛塵之警及行百姓遮道乞留諸司交章欲挽終任公曰辟官從所辟罷法也況宸翰丁寧切至豈有身爲長吏而自爲違君命耶士大夫進退惟義竟歸巫山二年汪公應辰制置四川辟守永康沈公介制置荆襄辟置幕府沈檄備朝旨不許辭公遂東下乾道元年二月到官四月赴都堂稟議結局引見內殿極論名實之辨乞精選部使者賢守令考別實效以赴事功用激偷惰上深然之且曰卿名父之子行將大用盡行所言不數日除大府寺誥詞略云來對便殿儼有遺風行乎患難而志不渝客於諸侯而名愈立有旨參政虞公允文宣諭令條具京西湖北民間疾苦事公上<sup>⑨</sup>八事應詔皆人情所願行無矯拂語上尤器重之居亡幾何兼權戶部左曹郎官公以初官中





都嫌於驟進、力辭。旋將旨措置兩淮官莊。公按行所至、開諭重本之意、州縣樂於趨赴、增種宿麥一倍。其冬、復請重力田之科、詳定賞格、以信率天下。上嘉其請。是年、公陳乞給還少師恩數、子姪補官者五人。二年、力丐外補、差權閬州、續除淮南轉運判官。三年、虞允文以同知密院宣撫四川、陛辭、乞公偕行、曰、王某深知西邊利害、改利路漕、兼四川宣撫司參議官。蜀承積弊之後、百度廢弛、人情偷惰、一旦虞公以本兵臨之、遠民拭目、以觀新政。公從容開說、條畫事宜、如覈軍籍、團義士、量總計、以裁費、不啻不耗、舉歸於中。規摹經畫、先後次第、井井有遠圖。公之力居多。四年春、以直秘閣安撫利州兩路、兼知興元府。興元、少師舊治、威望猶存、且公任宣幕日、嚴著聞蜀、士以是美之。泊之鎮、耄倪夾道聳觀、嗟異之聲相屬。既至、嚴義士保伍之令、勉其農時、訓於暇隙。有皇甫侗善御衆、拔自偏裨、

中、奏爲利州總管、以激厲其徒、軍聲大振。是時、疆場多事、往者死事之家、其子若弟多流落邊州、雖抱負材略、無以自展、白丁者不免饑寒、有官者或未得祿。公乃廣募良家子弟、賸浮費以廩之。歲餘、願從者幾二百人。齊之紀律、給之器仗、使之各習其所能、而訓其未至。知書者則授之百將傳、以導其智識、又拔其尤者二人爲長貳以總之。由是皆知自愛。公每語人曰、若於此中養得三四輩人物、異時堪爲將帥、乃區區報國之微願也。漢中控扼西邊、形勝險固、往少師寨米倉山、不但阻絕要害、且置阱於腹中、殲侵軼之騎。敵覘知之、不敢南盼。其後浸以曠弛、公毅然欲城之、議役於宣司、將丐度牒於朝廷、以給工費。屬召還、不竟其役。公居官、庶務截日整辦。既被命、代者吳拱即趣之、交龜帑、庾錢穀簿書、文歷信宿畢具。人服公之素治。去之日、軍民父老依依不忍別、有涕泣者。用私直僦舟

東下、橐無蜀裝、惟俸給緡二千。所過鎮務、畢輸稅、無慮費三百緡。在道、促命再至、除樞密院檢詳。有大臣出判荆南、語人曰、舟楫經從、不可勝數、唯王檢詳乃清白之舟。公到闕、首陳正心誠意之學、儻能力行、其效日致、非虛文也。上嘉納之。及進陝西、河北地圖、尋除左司員外郎、有旨遣使北界。公以先臣不主和議、固辭不行、優詔褒允、有志節可尙之語。權兵部侍郎、尋兼侍講。講筵故事、舊講官開端、然後新講官繼之、蓋聖朝優儒、恐未習進止。前講一日、曹吏白故事、公遽問大略、曰、若止此、何必舊講官耶。首講需卦、至九五爻、言人君歷險以立國、詎容存意於飲食間、必於日昃不遑之際、興民情難保之思、或疑非先儒舊說、公笑而已。既講上歎賞之。次訟卦、言是卦諸爻、不永所事、不克訟、復即命、渝之類、由九五體中正之道、爲聽訟之主、故能已訟。若此、皆語含規諷、意出訓詁。他皆類是。權

吏部侍郎、封安化縣開國男、兼權吏部尙書。未幾、試吏部侍郎、兼權尙書如故。銓曹積弊已久、綱紀頽廢、法令紛糾、官不知所守、吏因緣爲姦。公命創置官簿、取前後著令及申明、續降、以類相從而編次之、吏毫髮不得隱。由是宿弊頓革。綱目既定、流品肅清、無能欺者、人服其智。七年、江西、湖北告饑、義廩不能以賙、公提舉左藏南庫、具知儲蓄之數、勸上盍捐此以活民、有民則有財、從之。兩路之民戴上恩施、脫於溝中之瘠。一日、上覽貞觀政要、慕太宗之治、得旨與二三大臣入對選德殿、上親灑宸翰、問德仁功利之說。公對畢、退、復以其意奏疏、大略謂、道有體用、治有本末。德仁、體也、本也。功利、用也、末也。德修而功自立、仁施而利自周。又謂功有未成者、將帥未得其人也。利有未至者、監司郡守未盡得人也。願精擇而久任。八年二月、賜進士第、除端明殿學士、簽書樞密院事、進封開國伯、與



張說並命。公上章懇辭。且謂。臣去年嘗論張說不協人望。爲承旨。爲知閣。尙且朝論不一。今一旦在政路。與之同列。若或緘默苟容。是臣前日迫於公論。今日利於榮進。始終自叛其說。凡三上章。至拜於榻前數四。皆慰諭不允。是時。諸軍連年揀汰。人心不安。公言。老弱不勝兵者。誠難在軍。然齒壯力勝之時。披堅執銳。常效微勞。一旦揀汰。遂有溝壑之憂。雖陛下憐之。使就食州縣。而財賦逼迫。無所從出。不免取之齊民。因以不安。況諸軍之少壯者。無不動念。乞行下諸路。檢照一郡之內。揀汰幾人。添差養老所費之數。窠名來歷。足以支撐。如有闕數。必朝廷別行措置。俟可盡給。然後立爲定制。按閱差撥。議者韙之。公初入朝。實丞相虞公薦。一進對。遂結主知。公自謂再世受恩。誓以孤忠報國。且天資峭直。不肯折節權貴。公繼室李氏。文定之曾孫。有要人自謂李氏出子。首叙姻好。公峻詞以拒。

之。爲屬右府。時都承旨用事久。勢傾中外。莫不影附。公視之藐然。一日抵掌論兵。公曰。談何容易。如是者三。坐客皆失色而罷。由是銜公。張說並命。公深鄙之。力辭不獲。對客每以爲言。張雖與公面交。而心實惡公。虞公旣出撫蜀道。公自知孤危。不能自立。淮南謀帥。公固請行。諸要人亦陰排之。得旨令條具備邊之策。奏十有七事。九年正月。遂解機政。除資政殿學士。安撫淮南。印從中錫。合兩路爲一道。且命公以嚮所奏力田之議。併推行之。公陛辭。從容奏言。臣曩歲承乏監司。奔走淮壖。誠見列城守令人自爲政。勸耕備禦。舉無一定之規。亦嘗略有奏陳。至於施行。有待今日。聞諸古人。一日不朝。其間容刀。如臣此行。怯懦者未必不謂臣識闇慮淺。導陛下以開邊。雖陛下洞照本末。豈無三至之疑。惟聖志先定。確然不移。則衆譖自銷。功業可就。上皆聽納。慰勉之。至曰。卿肯爲朕出撫淮南。社



稷之福也。公恃以無恐。開府之日、首揭榜於通衢、及移檄邊州、毋得徼功生事。時兩淮監司、守臣皆權貴姻黨、苞苴公行、賄賂成市。公至、首劾盱眙守元居實、淮陰守趙礪老、淮西漕馮忠嘉、皆不報。趙尋除太府丞。於是盡忤諸要人、內外協謀、擠公甚力。在鎮未閱三月、臺評遂及之。上深知公不欲拒言者、乃詔公以外祠舊職罷。即日理舟西歸。或勸少留九江、公曰、罪大責輕、豈敢處此。然故山三徑未葺、亦欲息陰休影、省愆念咎、以畢餘生。慨然指巫峽而西、過都昌先塋、燎墓<sup>①</sup>。道遇大雨、得腳弱之疾。尋復痊愈、而心氣頓耗、飲膳不復如初。舟次黃岡、薨於臨臯亭。先啓手足一日、驟呼家人輩席<sup>②</sup>。戶外令酌酒、語諸子似生平、且戒之力學、訓以忠孝、人人隨其才分而啓迪之。聞者固已驚疑、果以是夕逝。公平日未嘗學佛、而洞見死生之理、得喪休戚、視若一致、蓋淵源有所自來。在梅州、大慧禪師

宗杲以佛學重天下、亦以罪至。雅聞公名、知公之來、亟治館以須。逮至、惟深相勞苦、初無一語酬酢。杲以是益加尊敬。平生宦達不過十年、餘皆憂患之日。雖功業不竟、而道學日進、履忠蹈信、必於躬行、不爲空言以眩俗取譽。望之凜然、有不可犯之色。道同志合、則開心見誠、傾豁底蘊、了無畦町。在朝知無不言、言無不盡。事有當爲、盡心力而赴之、不顧譏毀、不計劇易。大抵欲力行其志、不負所學。性尤惇睦。始官瀘南、亡兄通判嫠婦弱子、義不忍委之而去、挈與之偕。廩薄口衆、痛自節約、有無同之、閨門之內離如也。雅喜賓客、至則設醴、在譴籍、或質衣治具。在官、如俸外增給、諸司互送、悉儲之公帑、以須過客、義不爲己私。故薨之日、家無餘貲、所居猶蓬門茅屋、卒不能易也。又分遣俸給、致數千里外親舊之貧乏者。所娶彭原君家門戶益衰落、公鼎貴、乃以其子妻其姪、而歸其女姪、爲之子

婦。鎮維揚、搢紳孤女爲人妾者、公亟令歸之、割俸百緡、以資嫁送。其勇於義類若此。自少師遭世多故、又嘗位樞近、不敢忘武。公復遇異人指授韜鈴、洞曉諸葛孔明八陣遺法。在興元日、鄉兵數萬、既以時訓習、將罷遣、公語皇甫倜、且將教以五大陣、乃散之、倜謝不能、且疑費重。公曰、吾擢節公帑、費已先具、爾其訓之。射御擊刺若陣法、吾自臨之。一日、涖教場、徧閱士卒、擇其勍者數百人、以爲隊長。公親按法以授、曰、如是坐作進退、如是疾徐疏數。未數四、裨校稟從、已而隊伍亦樂從事、舉旂一麾、節以金鼓、鳥散雲合、觀者駭服。第見其整、而不知其自也。大閱日、興元駐劄、都統有世將家者欲往覘焉、公已登壇、下漏<sup>③</sup>戒誓將畢、軍門呵止、不容入。欲覘者怒、閽人曰、觀此公平日所爲、斬我不爲怪。爲稟而後入。其嚴若此。公於六經無不究心、而尤邃於易、有易傳若干卷、奏議若干卷。先娶孫氏、封

彭原郡夫人、節度使某之女。再娶李氏、封隴西郡夫人。男六人、曰復、文林郎、四川茶馬幹官。曰中孚、丞務郎。曰觀、曰臨、曰大過、用公身後恩澤、並承務郎。曰渙、未命。女三人、長適承信郎孫成、次適登仕郎任渙、季尙幼。公既薨、諸子護喪入峽、因公所卜其所某鄉隴、西夫人之兆合葬、兼祔彭原夫人。大過今監平江府糧料院、乃迹公之實、將請銘於天下之能文者、而揜諸幽。大過曰、狀先君請以諉子。某既辱公知、且知公行事爲詳、因次其顛末、敬竢采擇。

蔡戡撰 《定齋集》卷一四

校記

①及：原脫，據正德本《西山先生真文忠公文集》補。

②習：原作「昔」，據文意改。

③末：原作「未」，據右引改。

④六：原作「五」，據右引改。

⑤自迪：原脫，據右引補。

⑥梁沈：右引作「沈梁」。

⑦陽：疑當作「縣」。

⑧岡：原作「岡」，據常州先哲遺書本《定齋集》改。

⑨上：原無，據右引補。

⑩「是」下原有「似」字，據右引刪。

⑪墓：原作「黃」，據右引改。

⑫席：右引作「集」。

⑬漏：右引作「訓」。



宋儒碑傳集卷一百六十六

楊子謨 程卓

中大夫祕閣修撰致仕楊公墓誌銘

上踐祚之元年、楊公子謨與蜀士五人咸被特招。公自嘉定八年累疏乞身、書祠官之考、考滿不復以請、間二三歲朝廷必時其滿而申命焉。於是卧家十有一年矣、聞詔辭不就。士爲公出處謀者不一、今屯田郎度君正移書強起公、公於屈伸之分察之已審、固謝焉。二年九月寢疾、遂致其仕、己卯屬纊、年七十有四。先是公於縣之南山築室聚友、號雲山書院、嘗曰、我死則葬于是山。至是、孤仁舉卜曰、維四年十二月庚申食、則今紹定元年也。乃以書諗某曰、維我先君子經德履道、克純厥終、海內知心宜莫子、若幽宮之銘、敢以煩執事。某執書泣曰、今復有楊公邪。士不幸而不生於三代之前、師異指殊、無所統壹。其亦幸而生於國朝諸儒之

後、理明義精、有所據依。雖然、抑又有甚不幸者焉。陰陽鬼神之蹟、性命道德之奧、與夫爲人爲己、成己成物之理、先儒之講析既精、後學之誦說滋廣、士習其讀、玩爲常談、甚者託之以飾詞辯、假之以獵聲利。反以爲學術之累。有如明辯而篤行、純德表裏、令名始終、人無知愚、皆曰浩齋先生者、則走也雖藐焉罪疚、寧敢以他爲辭。謹爲叙而銘之。楊氏世居華陰僊谷、至唐太保漢公之曾孫庭輝入蜀爲普安令、後居潼川。五季時、有爲銀青光祿大夫、潼川討擊使者、徙飛鳥。生魯珣、魯珣生延秀、延秀生惟廣、惟廣生士達、士達生南重、南重生裕。裕生四子男、其仲曰知章、該累舉恩不復仕、自號雲山老人、累贈至通議大夫。妣同郡何氏、以淳熙慶壽恩封太孺人、累贈至令人。公字伯昌、自幼孝友、端慤、能誦書屬文。通泉王晉卿教授諸生、爲第五等、公時年十六、受學旬歲、已輩行高等。既冠、有大



慮。周、程子諸書雖傳於蜀、於時未廣、通議遊廣漢、得張宣公之學以授公、且誨之曰、欲造聖門、先從此入。若造深養熟、內外合一、治己治人之道備矣。公朝夕究圖、凝然一室、往往踰月不出戶。自是默識聖賢下學上達之序、動靜語嘿不違乎誠。淳熙四年、以詞賦舉于轉運司、會父卒。七年、就外省試、文靖胡公得其文、以爲有格君氣象、置諸優等。入對大問、方阜陵銳意於治、發策數十條、公對略曰、帝王躬行之實莫大於學、學者政事之本也。雖然、欲極乎學之用、不可不求其要。何謂要。行之以至誠、要之以不息是也。大學之道自正心誠意以至乎平天下、中庸之道自尊賢以至於來遠人、皆不外乎至誠之一言。臣不知陛下之躬行果誠歟、抑未歟。臣試以天人之應而卜陛下之誠、則知容有未至也。又曰、臣聞之道路、謂陛下左右近習之人雖無顯然害治之迹、而諂諛欺矯、實繁有徒。故凡

求於速售者、率造宦寺之門、珠玉錦繡以充苞苴、絡繹于道、而陛下有所不知、此非細患也。孝宗嘉其直、擢實甲科、蓋自鄉舉至是三試、皆第八人。歷綿州、廣安軍教授、調崇慶府錄事參軍、茶馬司改辟幹辦公事、未報、堂差成都府教授、以舉主改通直郎知隆慶府普城縣、通判成都府、權發遣黎州、兼管內安撫司公事、敕差四川類省試院考試官。召赴行在、除尙書吏部郎中、遷軍器監、仍兼郎。宣差御試詳定官、遷大禮少卿、主管右治獄。累請補外、除直華文閣、成都府路提點刑獄公事、兼提舉常平等事。凡再兼知嘉定府、又累請歸田、進直猷猷閣、凡再任主管建寧府武夷山冲佑觀。差知隆州、辭不就、直顯謨閣、主管紹興府千秋鴻禧觀。提舉亳州明道宮。召赴行在、控辭未報、乞守中大夫、飛烏縣男致仕。詔除祕閣修撰。公始職教二郡、皆以義理訓迪諸生、成都學官蓋四蜀之士咸在、公



之餘論漸被滋廣。在普城純用詩書、不雜他術、爲諸邑最。歲旱、捐縣帑之贏爲民代輸者幾萬緡。李公壁除兵部侍郎、舉公自代、公未嘗有書尺之素也。成都帥守謝公源明繩下苛急、幕府憚之、公於事無巨細、劈析是非、雖逢盛怒、率爲公屈。後嘗語人曰、吾幾失楊公。礪門蕃部寇邊、宣撫司辟公之、黎務以恩信羈縻、且樽節浮費與邊民代輸。二年、又請于朝、降緡錢、厚儲峙、廣土丁、省戍卒、增義勇。患士子聞見寡陋、休沐即學官誨之、士咸知趨鄉。逆曦僭叛、諸蠻將伺釁而動、邊民皇皇、公誓以死守、飭家人毋輕去、以爲民望。移書方伯監司、起義討賊、願調禁軍、義勇爲先驅。戍將張燧將所部五百欲爲亂、士不從、號呼詣郡。燧策馬隨至、公麾郡卒縛燧歸于制置司、以張曇次補、士俯伏聽命。未幾、逆黨董鎮至成都、陵逼蜀帥、分遣裨將雷珂徑至郡、交曇所領軍、禍且不測。會安靜寨謀羌出沒、

公即遣珂軍二百乘邊以攜其黨、而令義勇軍還郡、以張聲勢、賊氣頓索。曦尋遣校王安國犒軍、安國持郡吏欲以留令誅之、公義形於色、安國不敢動。文移遷延、以底賊平、人以是服公應變之略云。主四川類省試事、兼監試事、公以取文之要五、校士之目七示同事者、大要先義理而後文采、虛心從衆而不斷以己見、且專以論策定去取。公故爲點檢官、及是典領、咸謂得人。蜀帥楊公輔遂以五要、七日聞上、且刻諸試院。尋即院拜召命、控辭不獲。秩滿去郡、郡人象而祠之。申詔趣發、入對便殿、首論權臣誤國、叛將干紀、陛下不動聲色、誅此二孽如戮狐兔、而臣愚猶有憂者、鑒邇往之已事、開惟新之令圖、在陛下審處而已。其二論、皇太子旣正儲宮之位、宜使親正人、授正學。王者之學果何學也。大學之所謂正心、中庸之所謂謹獨是也。惟輔導得人而後有所受。三乞招填黎州土軍、分番

上寨歲循舊比給緡羅粟以備緩急。典銓二年不徒例之拘、必權其資望而予奪之、吏道無壅。因轉對、請於淮上荆襄關表、漢中空閒之地招募軍民、雜耕以省餉運、節濫賜、捐內帑、以充羅緡、以收末楮、嚴貴州郡實常平之儲、歸廣惠倉元蓄以備凶歉。罷軍興一切科斂之法、復師旅饑荒之地、以紓民力。又曰、民之困苦極矣、不可以其屢經兵荒而不離。夫易失者人心、難諶者天意、修人事以符天意、其要在養民。除軍器監、尋復兼侍左郎官。輪對、申言權臣叛將之弊如初對。次論學術乃國家之壽脈、公論迺天下之元氣、所以扶持皇極、主張國是者必歸諸此。更化以來、衆正之路方啓、而羣枉之門漸開。善類雖進而忠鯁之士有相繼引去者矣。姦黨雖斥而寅緣勢要有捋拭叙用者矣。夫君、子小人如薰猶之不可同器、今顧欲調停參用之、幾何不爲君子之仇而基國家之禍歟。始公奏陳、

先帝蹙頰領首者久之、權倖側目。公謂同列、縱以此得罪、其甘如薺。乃力請補外、朝廷不欲以言罪人、進介卿以留之。棘寺有坐僞告者、株逮甚衆、公酌情爲三等、奏聞決遣。事連鉅闥鄭氏兄弟、乃移文內侍省索粥告之贓、小人由是益怨。在寺僅半年而去。公自念非達賢無以報國、會免朝辭、遂薦蜀士四十餘人于當路。公之規摹識量蓋若此。世論方隘、不足以知公也。過家上冢、歷所部郡邑、屏廚傳、廣諮訪、獎靜退、抑躁競。既抵所治、絕請託、卻饋賂、審彰瘝、一道肅然嚮風。嘉爲並邊郡、公爲築堡寨、結土丁、歲給衣裝、春秋閱習焉。刑獄司舊有備邊庫、自比歲利店之擾、儲蓄幾盡、公節縮冗費、補還其半。又上諸朝、乞給緡錢、爲新丁衣廩之儲。撥還常平免役寬剩等錢、爲水旱不測之備。恩收耄疾之人、毋得注獄官、縣尉。被命兼權嘉定府、嘉之中鎮寨控扼虛恨之境、自北二旣誅之後、虛恨



疑不受犒十餘年。公遣吏往沈黎互市。所說諭虛恨。曾領如約詣寨。寨將馬標利其犒賞。擅殺數人。公怒。縛標下吏竄徙之。巡按屬部剖決滯訟。惟成都以制閩所治典臬者例不敢孰何。公曰。是之不知。何以厲餘。乃隨事平決。新繁民曲防蒞利。歲與新都相讎訟。公臨視。度其地多寡。聚石爲象鼻堰。口以均水利。兩邑便之。嘉定守洪偲報罷。公再兼府事。偲竊用府緡。公督還其半。黥竄其嬖吏。以其狀上之。一郡稱快。然自是得請以去。不復出矣。即雲山書院講授後進。吉月月半誦論。孟中庸大學語。或至吁。聽之者各充然有得。嗚呼。自井田封建壞。君師之職分不明。六經之道。千數百年幾爲未試之書。國朝自周程張氏及近世朱張呂氏相與扶持綿延。斯道復明。於是百數十年間。往往有聞見而作者。然而依世則廢道。違俗則危殆。使浮湛州縣。出入里閭。以其所獨得私淑黨類。則國人化

之而仁遜。子弟從之而忠孝。乃猶有以行其志。況如公之寬和質實。發於精神。動於氣貌。能使人鄙吝銷釋。至其閱事久而燭理明。視精粗表裏。眞知其爲一。公私義利。實見其爲異。故雖即溫愛汎而檢履金石。儀觀山河。世所謂可悅可慕者。一無以動其心焉。又不知觀而善聞而興者。復幾人也。未嘗有所著述。惟欲使人精體實踐。以造於得。故其遺文僅有浩齋退藁若干卷。尤篤於倫類。塾居必屬其親族子弟。聘士而教之。從弟子謬自幼受學。登慶元五年進士第。甫調官而卒。終身念之。以上宗祀恩官其子仁任。登仕郎。族之孤孽不能自立者。爲辦喪葬婚聘。鄉邑嘗有旱。勸分賑糶。不遺餘力。取勾龍氏封恭人。先四年卒。加贈令人。子八人。四男。傳孫綿孫蚤夭。仁端嘗與賓貢。終儒林郎。小溪縣丞。先一年卒。仁舉再舉于鄉。今從事郎。順慶府團練判官。四女。長適從事郎新井縣令何叔丁。

次適奉議郎、知平泉縣費灋、先十年卒。次適儒林郎、簽書普州軍事判官馮仲燁、季女有癩疾、未嫁。孫男義質、以致仕恩當補官。外孫男女各二人。銘曰、血氣之知、譁世取妍。歲月惛邁、志隨氣遷。卓哉楊公、植基盛年。駢駢翼翼、陟嶺自原。知行互發、華皓益堅。雖撓弗奪、雖誘弗堦。雲山之顛、巽後丙前。有鬱者仟、公歸其全。

魏了翁撰 《重校鶴山先生大全文集》卷七四

大宋故正議大夫守同知樞密院事致仕  
新安郡開國侯食邑一千三百戶食實  
封二百戶贈特進資政殿大學士程公  
卓行狀

曾祖士彥、故贈太子少保。妣咸寧郡夫人金氏。祖  
狀、贈太子少傅。妣高平郡夫人陳氏。父世昌、贈太  
子少師。妣新安郡夫人朱氏。公諱卓、字從元。徽之

休寧人也。自儀同忠壯公靈洗效節於梁、居新安之海寧。今占籍於此者、皆其裔也。惟程氏之先、系出重黎氏。世序天地、歷夏、商、周、而失其守。及宣王時、伯休父爲周司馬、始見於詩、國於程、子孫遂以爲氏。其世次遠而分。至唐定氏族、程氏之望分爲七、惟忠壯公之後獨蕃衍。於是邦爲新安甲族。少保儻尙志氣、富而仁、延禮名儒、訓迪子弟、士有來就學、皆館粲無倦。由其家塾以成名者甚衆。少博通文史、能繼其志。長子尙書文簡公大昌、始以瑰文直道被遇阜陵、爲時儒宗。少師則以家事自任、而成其兄文簡之學、傳德襲訓、尤篤風義。儲休委祉、用集于公。程氏益以大。公生而神姿高徹、穎悟絕人、純靜無他好、惟潛心經術。文簡公深奇之、盡以其學傳焉。淳熙十一年、遂冠南宮別院、廷對又首乙科、授揚州司戶參軍。紹熙元年、因薦者陞從事郎、爲撫州崇仁縣丞。五年、該登極恩、循文林



郎。慶元二年、遇慶典、循儒林郎。四年、以薦員及格、班見、改通直郎、知處州龍泉縣。未及上、丁少師艱。六年七月服闋、再調吉州龍泉縣。嘉泰二年十月、有旨與六院差遣、轉奉議郎。四年五月、差幹辦行在諸軍糧料院。開禧元年正月、差充禮部貢院點檢試卷官。五月、以堂兄太府寺丞準親嫌、改差監行在都進奏院。九月、除宗正寺簿、轉奉議郎。二年五月、除司農寺丞。十二月、以親老抗疏請外補、差知嘉興府。丁母新安郡夫人艱。嘉定三年八月服闋、以嘉興治最、授朝奉郎。九月、入爲大理寺丞、轉朝散郎。四年正月、差充省試參詳官。二月、就升正。五月、除尙書刑部員外郎。十月、勅借朝請大夫、工部尙書、充賀金國正旦使。明年春、使回、以勞授朝請郎。五月、守刑部郎中。九月、除軍器監、兼吏部右司郎官、賜六品服。六年四月、遷權太府少卿。八月、以言者去國。七年三月、差主管建寧府武夷山冲

佑觀、轉朝奉大夫。十二月、起知泉州、轉朝散大夫。九年六月、就除福建路提點刑獄公事、兼知泉州。十年二月還司。三月、兼權福州。十一月、除直秘閣、知福州、主管福建路安撫司公事、轉朝請大夫。十二年七月、召赴行在奏事。十二月、除秘書少監。越十有三日、除起居郎。十三年正月、兼國史院編修官、實錄院檢討官。五月、差充殿試詳定官。六月、講經筵終篇、以修注推恩、特授朝議大夫。七月、進玉牒、以公嘗稽宗籍、授中奉大夫。十月、除權工部侍郎、陞同修國史實錄院同修撰、賜三品服、轉中大夫。十四年四月、兼權吏部侍郎。六月、以進書恩、特授太中大夫。八月、除給事中、賜對衣金帶。十一月、以禋禮告成、封休寧縣開國男、食邑三百戶。十五年三月、該寶璽恩、授通議大夫、進封休寧縣開國子、加食邑三百戶。四月、進寶禮成、授通議大夫。九月、拜同知樞密院事、進封休寧縣開國伯、加食邑



四百戶、食實封一百戶。十六年四月、公以疾在告。六月五日、疾稍間、出赴朝參。退朝、疾復作、二十三日遂革。上奏乞納祿、有旨轉正議大夫、守同知樞密院事致仕、進封新安郡開國侯、加食邑四百戶、食實封一百戶。越一日、公薨于正寢、享年七十有一。遺表聞、上震悼、輟視朝一日、降中使卹其家、賜東園秘器、龍腦、水銀以殮、銀絹一千匹兩。以不願勅葬、加賜五百匹兩、贈特進、資政殿大學士、官其後六人。公儀觀秀偉、凝重如山、宇量宏裕、喜愠不形於色、人莫能窺其際。自爲諸生時、識者已期有公輔之器。天分素高、加篤學力行、本之以誠、養之以厚、守之以正、以是立身、以是事君、以是治民、出入中外幾五十年、名節全瑩、終始如一。日。雖致身兩地、未爲不遇。惜在位日淺、未竟其功業。然平生所立、亦可以無愧矣。初試民漕掾時、揚帥都丞鄭公興裔、馭寮吏甚嚴、幕下有傾險者、專言人過以

取悅。帥嘗以一二事質諸公、公曰、卓所知者職而已、他無庸知。帥慍曰、君亦黨乎。色頗厲。公終不爲動。始察其忱、更加禮異焉。詆誣者反以獲罪、人服其忠厚。淮上衍沃、民多儲蓄、巨胥獻計、會其數而征、權其稅、其利甚博。至許互告、則盡籍所積以充賞、民苦其擾。命公往蒞之、公曰、民積粟以備凶荒也、亦足以寬公家之憂。且彼歲旣輸租矣、又未常販鬻、今征之何名哉。帥悟曰、微戶曹不聞此言、胥幾誤我。詰其欺、置之法、邦人甚德之。崇仁江右巖邑、民尙珥筆、有無賴宗子挾羣不逞、專持縣事、橫甚、邑人側目。公執而械之、獄、痛懲之、隨從者皆抵罪、凶猾始戢。漕使吳公獵委公攝邑事、首以教育爲急、時至學宮、與諸生講明義理、禮耆舊、獎拔雋異、以風厲之。縣有楊田、茭陂、省莊、屯田計二萬八千餘石、歲輸于郡。然民戶所入於縣者十不一二。每移他邑代解、邑以重困。公條陳其害、申於外臺、



縷析上聞、罷之、公私以爲便。泉江有遇害而失其身首、莫知孰殺之者。公燕坐默思、恍若有所見、曰、只尋親人。呼其妻詰之、曰、汝知而夫平日與何人惡。婦沉吟久之、曰、昔常與伯父因競墳土有恨。乃執其人、遣吏搜其家、得衲衣一持、示其妻。妻一見號泣曰、此即手所製與夫者也。復詰其人、何從得此。始駭服、遂正其獄。甫書初考、即有別院之命、始莫識其所自、已乃知參政袁公說友所薦。公與之素昧、亦無與爲地者。時人咸服至公、且頌其得人。時誠齋楊公萬里聞之、爲賦詩、有拜了除書卻問媒之句、蓋紀實也。公始登朝、慷慨欲掾時弊、以宗正簿輪對、首論諸州公帑妄費、謂祖宗之制於諸州軍公用須出於給賜之恩、然各有等差之辨、故人心有所底止、而不敢踰越。今之公使名曰分隸、往往罄中人十家之產、不足以供一饋之需、極細民終身之奉、不足以當一燕之費、互送將迎、無有

限極、民生益困、國本益壞、蓋制之無節、則用之無藝、此必然之理也。乞取會諸州軍公使錢之數、隨其所臨大小、以定其所用多寡、要以一歲之內、至於若干數而止。諸路監司大率準此、立爲定則。異時交替、以數來上、於是而加考覈焉、庶無過取過用之弊矣。又論馬政之弊曰、馬者、兵之本也。臣昨備數諸軍糧料院會計一歲所收之數、僅足以備補是歲斃損之半、則一歲所失可謂多矣。臣又嘗以前此數年考之、大抵歲收常少、所損常多、數年之後、馬必甚闕、豈非軍政之大害乎。夫以民養兵、以兵養馬、官給芻粟、而馬之充腹常不足、甚至有以馬養人之譏。臣欲乞責內外主帥、盡牧養之方、稽其損耗、防其減尅、而嚴其責罰。上深然之。樞李輔郡公以推擇出守、剖決如流、莫不切中其情、然終歸平恕。或僞爲倅廳印紙與奸民爲市、以充契券之用、流布既廣、吏因事覺、視爲奇貨、謂無眞僞、



當歷加追驗、則所得可裨郡計不少。公曰、此不過偽造者罪耳、若一一驗之、編民並擾。吾以安民爲先利、非所急也。乃喻民有誤買者、許自陳、立與換印。陳者畢集、一郡晏然。尋以內艱解郡。公之在憲部也、論胥吏之弊曰、有官府則有胥吏、不可闕也、亦不可冗也。吏數愈多、則民蠹愈甚。民蠹愈甚、則官府無由而清、獄訟無由而平、民生無由而日趨於厚也。欲申飭諸道、檢照條令、隨州縣大小以定吏額、私名罷吏一切逐去、庶幾胥徒簡少、文書省暇、政平民樂、不爲無補。詔有司頒行郡邑、加遵守焉。未久、北方玉帛復通、人情危疑、無敢往者。公獨請行、且以覘中原事機、節使判宗趙公師岳偕往焉。公威容端肅、專對明辨、遂爲之加禮。歸奏略曰、臣竊觀鄰國以徒威立國、故其所自恃者勢、而其

能地大力強、有加於昔日也、而頻仍侵掠、莫克誰何。倉惶周章、搏手無策、乃盡遷民兵、不遺老弱、傾其國以捍禦之、怨讟繁興、潰裂四出。乃下令曰、潰兵五日不出者死、徒揭牆壁、潰者如故。方且日夕惴惴、南向清野、惟恐本朝之兵乘危擣虛、腹背受敵、此其兵不足恃者也。又自其民觀之、螟蝗水旱連歲爲虐、昨幸小稔、軍旅之興、又復橫取無藝、常賦之外、曰和糴、曰和借、財竭力殫、咨嗟滿路、乖氣召戾。自冬涉春、數月不雨。今河南粟直旣倍常時、燕山之直萬錢石粟、饑民嗷嗷、舉無生意、怏怏然歸咎其上、其民心之不足恃又如此。顧乃飭虛僞以欺人、事形跡以示外、使事往還、異時率以州縣之吏奔走服役。今也騎士取之、鄉民甲兵取之、市戶糧食因其自備弓刀、亦其自隨、諸如此類、自謂可以惑人、而其中枵然已不可掩於斯人之口、徒威之失、今已如此、他時後患未知所終。臣欲乞陞

下制人以己、御遠以近、明政教以立治、厚德澤以  
及物、使義積而邦本愈強、恩深而人心愈固。選擇  
將帥、訓練軍伍、修車馬、備器械、徐起而收之。齊人  
歸疆、宣王復土、其在茲乎。上悅、褒勞殊渥。自是始  
議止絕歲幣、正敵國之名、不復與通、大義始明矣。  
公爲戎監、上言古之善將者、非臨戰而後計、遇敵  
而始謀也。求兵法於往古、考地理於圖誌、以啓迪  
心思、發明機變。何謂兵法、摧堅破銳、擣虛擊實、其  
攻<sup>②</sup>也有方。深溝高壘、雉堞相望、其守也有策。舳艫  
蔽江、鐵馬風馳、其用之也有宜。諸如此類、皆平日  
所當講明者也。何謂地理、兩軍相接、必知某處可  
以倍道、可以設伏、某處可以斷後、可以橫衝、取糧  
有地、會師有所。諸如此類、又皆平日所當講明者  
也。今之將帥、其果能盡知此乎。臣愚欲乞陛下嚴  
諭遠近軍帥、凡列衛之間、沿江之衆、自偏裨以上、  
各使條具方略、圖畫形勢、以滌其昏而開其明、以

發其蒙而動其機。不責其文詞、而惟考其智略、審  
擇哀類、上之樞府、擇可行者、頒下分屯去處、俾互  
相告語。閱時既多、見聞日廣、胸中之甲兵、帷幄之  
籌畫、實足以爲異日規恢之地。時上方向用、期贊  
中興、有忌嫉者、橫興萋菲、畀祠廩。未幾、起鎮溫陵、  
凡積年滯訟不決者、一經裁斷、莫不悅服。公深思  
便民之策、可經久者、一曰減免上供銀數、二曰發  
泄境內楮幣。大略謂本州舊有銀坑、而紬綿絹帛  
非本州所出、朝廷以有無相通、撥台、信、邵武、建昌  
四州軍合解上供銀、令泉州代納、卻令四州軍以  
所產紬綿絹帛折價還泉州、支散官兵。自泉州銀  
坑閉廢、銀價日增、比之舊價、十增其七。四州所收  
絹帛遇歉猶有減放。又逐歲拖欠、動輒數萬。欲乞  
將本州代納上供銀一半、科取民間買紬綿絹帛、  
支散官兵。一半將四州軍應副紬綿絹帛之數、令  
自賣起發、庶幾泉民稍紓。先是淳熙間、文簡公守

泉曰、具奏未行、公申前說而加委曲焉。政路甚以爲然。事下都司、沮止之、議者惜焉。越四年、大卿宋公鈞知泉、本公之說告于上。時公持從橐、事竟以濟。其忠信惻怛、篤於愛民、終始不倦、蓋如此。至論楮幣、則謂本州田少土瘠、逐年全籍廣米接濟、計一歲收糴之費、爲錢百四五十萬緡、錢會中半。而廣南未承朝廷指揮、行使官會、以致本州會子積而不散。乞割下廣東經略、將合解上供窠名錢銀收買、販米官會全綱起發。割下本州、告示人戶、各以錢會中半收糴。其會子賣回廣中、就官兌錢、或白金、充上供銀錢之數。庶幾本州楮幣其來雖多、而轉流廣郡、不至積滯。期年政成、民以大和、謠咏四起。於是士祠公於學、商賈父老祠公於衢、緇黃之流祠公於梵刹。尙書楊公炳、侍郎李公沆皆先朝耆德、寓是邦、敬服公曰、古君子也。閩適謀帥、上念無以易公者、就拜閩寄。公控辭甚力、朝廷不許。

公以民害之大者莫甚於盜、亦莫甚於吏、鉏姦剔蠹、滌蕩而振刷之、稅籍始明、獄訟無滯。郡圉所禁、總十二縣之事、止十有五人。公乃新學校、括學糧、增養士之員。及論三山海寇所以難制者、以兵將皆不習海道之險。欲擇選統領及所用巡兵、使之朝夕閱習、長於水戰、則盜之長技無所施矣。上念公久勞于外、有詔趣覲。公辭不獲、命入對、論舊將不可專恃、虛籍不可徒費。蓋富貴既足、則壯銳銷鑠。不若拔諸偏裨、下列志氣盛強、必求自見。至若尺籍伍符、核實未盡、或有敗衄、及差出病傷之類、不以實聞、所破之券、主將掩而有之、虛費類皆如此。要當委自總所、更加考核、使供軍無虛破之弊、士卒有可用之實、此內修外攘之急務也。又言泉貨洩於外邦、銷爲器用、法禁不能止、不急救之、中國之銅日少。上曰、然、豈止於少、殆將至於無矣。公欲以鐵、銅、錫三者合而成錢、如往者夾錫鐵銅錢



之類。外邦得之、則爲無用。小民銷之、不可爲器。如此、則重者反輕、法不嚴而弊止。上皆嘉納之。不一歲、進貳冬官、時將帥多事剋剝、士卒貧困、公極論之、以爲將之所恃在兵、兵之所恃在食。今者培尅日滋、士心寢失、請給腴削、乾利取贏、恩施於上、怨起於下。自今支散請給不宜屬之軍將、總所則委屬官、州郡則委通判、令彈壓之。則上恩可達、而士氣稍紓矣。公每因經筵進讀、必寓獻贊、規切時事。言州郡不可輕畀、必試其事、無容但拘資格。又謂三邊之勢、兩淮爲最要。上游河水多淺、秋冬可涉、恃水爲險者淮之東也、依山爲險者淮之西也。防守之計、在乎兵將得人。又以近來州郡稅賦折納、大爲民患、藝祖有折納違制之論、孝宗有無食貨兼取之說。乞明示州郡俾之遵守。又言今之兵冗、當嚴考核、以革虛名無實之弊。官冗當裁、遙領不釐務暨琳館之虛員、費冗當節、迎送修造、與夫添

給妄用。又言援例廢法、實開僥倖之門、是致賞罰無章、私情勝而公道泯、宜守成憲。凡公所敷陳、皆切中時病、深當上心。及居東臺、封駁之任、抑僥倖、振綱紀、惜名器、凡所爭執、皆關大體。有臺臣論事、專徇賄賂、旣從黜罰、而上恩寬大、復畀職名、公駁之、言貪夫徇財、以辱言路、而置不問、政刑安在上。知公果可大用也。故雖自以年邁、迭上封章、丐祠而聖眷方勤不允。未幾進貳本兵、天下想聞其風采。公膺重任、夙夜經心職思、其憂形於言色。猶念新疆雖拓於版圖、其費無藝、歸附尙煩於籠絡、其志難量。邊面故老、相繼淪亡、孰可倚仗。捍城宿將、凋喪無幾、孰備驅馳。加之逃亡不補、而尺籍多虛、將帥刻剝、而士卒怨忌、必將蒐練軍實、獎拔人才、警飭營屯、申明紀律。凡三邊之險易虛實、諸將之勇怯能否、糧儲之豐耗、城池之修圯、甲兵之利鈍、科條邊鎖、靡不備周。而所謂宏謀大略、沉機秘策、



關於國體輕重、鄰敵利害、日與廟堂講明議論、密贊廟謨、人莫預聞。每以先皇倚注之深、欲自竭仰酬隆眷、百慮嬰懷、積成煩悶。上憂之甚、欲遣中貴問疾增損狀。公力辭、遂止。少愈、入謝、上曰公有喜色、玉音問勞、聞卿近少違和幸、已平復、宜厚自調護。公再拜稱謝、退朝即自力治事。疾復作、國醫視之、已不可爲矣。其薨也、士林相弔、諸公哭之慟。公爲人篤厚平實、表裏洞然、不爲機械、持身甚嚴、待人以恕、雖年德位望俱高、而接物謙抑、賢愚貴賤皆與之均禮。自幼篤孝與敬、少師遇子弟素嚴、公先意承志、惟恐順適不至、雖雅性嗜書、不樂俗務、然東西惟命、勞冗靡辭、必挾冊以往、學不廢程、家無闕事、人以爲難。恩隆族黨、遠近數百口、雍穆無間言。與人交、終始不變。樂調人之急、解衣推食、雖重費無所靳。故舊亡歿、贈卹其終、經理其家、纖粟備至。凡鄉邦利病、視之不啻猶己。如折帛輸錢、朝

廷舊則每匹六貫五百、而休歛二縣田賦既重、民獨不堪。歛縣向已蠲減、惟休寧未有援例奏陳者。公在宥府、適臣僚論奏、公力語廟堂敷奏、事方下戶部、值公薨、背踰年、特從所申。本縣歲蠲楮錢一萬五千緡、折帛每匹裁減二貫、由是鄉邑感公遺德、相率立祠宇、以寓無窮之報。公平居不喜言人過、寸長片善、表揚汲引、不遺餘力。因公所薦進知名甚衆。自奉極約、既貴、膳羞服用無踰寒素。里第仍故居、僅創一樓貯圖書、一堂燕坐而已。嘗言富貴在天、非人力可求。分有之、則聽其自來。無之、則信其自去。至於居官之道、尤當以廉勤爲本。予平生所以省憂患得便宜者此爾。公初第而歸、四方學子不遠千里執經席下、一經師承、其所得必粹。其文必有體製可觀、門人多達者。如右史吳公格、則與公偕顯於朝、餘登桂籍、預鄉舉、升列賢關者、接武駸駸殆莫勝數。師友淵源、特盛於江左。奏議

文集共二十卷、藏於家。公娶齊安郡夫人朱氏、謹靖賢淑、事舅姑至孝、禮無違者。從公宦遊、勤儉撙節、以需賓饋。延禮師儒、未嘗少爲私奉。先公二十年卒。子男一人、以思從事郎、監西京中嶽廟。以哀疾中山行卜兆域、犯風濕得疾、後公十有一月卒。轉宣議郎致仕。女二人、長適朝奉郎賜緋魚袋姚元迪、廷魁穎之子也。幼未適人。皆先卒。孫男一人、剛中、前修職郎、監西京中嶽廟。今承遺澤、換授承務郎。孫女二人、長早亡、次適從事郎、新寧國府旌德縣尉、巡捕私茶鹽礬兼催江綱汪耒。剛中將以是年十二月十一日葬公于歙縣長壽鄉龍歸里龍山之原、千里走介馳書、謂伯成曰、先大父雅與公善、敢以行實爲不朽託。伯成辭不敢當、然竊謂公以儒起家、以勤撫仕、歷四十餘年、迄登宥府、外不爲表暴顯著之跡、而斷斷無他、休休有容、有古大臣之風、齋心服勤於燕閒之間、而民自得於畊

桑隴畝之上。使公未薨、則措施成就詎止此哉。伯成、泉人也。公守是邦、嘗獲游公之門、而且蒙公之眷相知最深。其立身行己、足以儀型當世。而一話一言、又可垂法將來。至於慈祥愷悌之政、鄉人歌詠成編、棠陰蔽芾之恩、遺愛於今未泯也。敬摭公言行之實、書以畀其子孫、以俟立言之君子。謹狀。寶慶元年四月日、顯謨閣學士、正奉大夫致仕傅伯成狀。

傅伯成撰 《新安文獻志》卷七四

故特進資政殿大學士程公墓誌銘

嘉定十六年四月、同知樞密院程公卓以疾不能朝。時國家值仇敵百年之運、疆場大計委成西府者、視常爲尤劇。上聞公疾、憂甚、中使日問狀。稍間入謝、重慰藉、自力就職而疾復作、即拜疏言、臣不幸疾進弗瘳、將先犬馬填溝壑。機務至重、懼不能復勝陛下委寄。願上印綬、乞骸骨。以六月五日薨。





上省奏、嗟惻罷朝、發賻加厚。詔有司以特進、資政殿大學士告其第、舉朝皆哭弔。某年某月某日、葬歙縣長壽鄉龍山。孫剛中以墓上之銘來請曰、先大父奮迹孤土、出藩入輔、名績略信于中外矣。蒙國厚恩、襁往錄存、哀榮略備于始終矣。惟遺耀未紀、將審所託焉。幸賜之言、以壽遠也。予於公爲同年進士、且相繼司牧于閩、蓋義知公者、乃序而銘之、不復辭。公字從元、徽休寧人、望閩甚遠、三世褒叙。士彥、太子少保。昉、太子少傅。世昌、太子少師。公蚤有絕識、世父文簡公以瓊文宿學被遇孝宗、爲時儒先。公甫勝冠、探微入窈、盡得其傳。入太學、試積取高等、衆莫敢齒列。中淳熙十一年進士第、揚州司戶。郡議計民廩積而征之、匿不自言、籍畀告者。公曰、藏於民與儲之公等也。且粟已嘗賦矣、征之何名。帥悟而止。丞崇仁縣、陂旁舊有公田、所入編甚、而郡緣虛籍、征于邑者歲累萬、償以別色。邑

遂寔困。公嘆曰、使爲此邑、永患而令不得盡其愛於民者、此田也。且吾誼不敢諉之令而弗顧。疏其實走諸司、許盡鬻之民乃已。知處州龍泉縣、少師喪不行。知吉州龍泉、令約而信、賦緩而足、廩野舒暇、門堦堦閑寂、莫識其吏迹也。有傳刃而匿其首、主名不立、掠治久無以具獄。公屏坐深念、如或助之。詰其婦曰、豈嘗產怨於族乎。婦謝無有、惟族父曩以地訟耳。索其家衣故在、泣曰、妾手所完紉也。遂直其冤。執政以才薦、入爲諸軍糧料院、以嫌改進奏院、宗正寺簿。奏言、郡帑別儲以給公費、有定制也。今恣其侈用、顯賕私餉、崇侈無厭、宜裁約以紓民力。異駿名騅、隸在親衛、有常數也。今齒色歲減、新綱續撥、纔足相補、宜課息以壯戎備。遷司農丞、知嘉興府。近畿俗豪喜鬪、稍失意則簪筆遍抵其上。公以刑鉏姦、以惠銷薄、從容摩揉而政以和有、僞鬻印紙爲左券者、辭所連逮甚衆。吏白公當

窮治、且藉是或紓郡計。公曰、爲之詭遇豈不能。政在安民爾。罪止造者、無它坐、民至今德之。爲大理丞、刑部郎、奏言、國家謹獄、狃而緩死、則宥之以遠。令部以罷卒、齎用窘絕、不稍代更、則往者未必生也。州縣仗胥吏而給事、要以少爲貴。今長及子孫、聲焰薰熾、不亟汰省、則來者未易清也。說皆施行。遷軍器監、兼右司郎官、權太守少卿。言者不樂、罷主冲祐觀。起知泉州、文簡棠陰猶在、邦人幸公來。時楮券墊陌、僅及半價、按不如令者急甚。公以法便民而勢自通。平糴舊爲民擾、攔米要市、迂費歲月。公饒所予民而事自集。郡舊以銀鑲驟溢而縲續非工、詔與台、信、邵、武昌互貢所有、烹採久涸而直售數倍。文簡請更定獻程、而未報去之、有四年矣。公曰、得地利以惠吾民可也。忍默默乎。力爲奏、具言、弊極矣、惟垂裁。朝廷尙難之、繼公者復助之請、乃皆聽可。於是累年之弊革矣。移提點福建

刑獄、民留像以祠。攝帥事、直秘閣、爲真。郡負海、暴桀椎埋、公追迹名捕、空其巢、貸所騫汙者爲之振業、境內奠枕。健吏武譎、宿姦如山。公戒僚列悉意首公事、無落吏手。遇期會迫猝、纔留一二、旁立待命、具筆牘、行文書而已。閩素多士、公在泉、新美學宮、至閩、更舊洗陋如泉時。又崇峙儲廩、增員以養、而呻誦滿廊戶矣。課縣籍計日勾稽、而複賦謬輸皆釐整。督曹牒應時剖奪、而新爭故訟皆縮卻。又條便宜數事、欲以治邑之殿最上之銓部、爲升黜。覆獄之能否、載之印歷、爲勸懲。幽繫之無所廩食者、取之常平、以寬瘼死。伉勇而熟於水鬪者、傳以海道、以戒不虞。上供間出於僧坊、則豪右勿因以貸息。租銖盡歸於吏攬、則官府勿重以漁奪。蓋其勤苦在民、亶亶一意、審其痛毒、時其安便、苟有圭撮爲利者、無不爲也。寸尺可效者、無不竭也。召爲秘書少監、論諸將酣豢於富貴、精銳銷落、褊裨後

起奮達無路。不加搜採、英豪坐老矣。軍籍溜蠹於隱占、十幾四三、贏糧剩鎗、脂腴一將。不加檢質、餉計坐失矣。泉貨以權輕重、通有無也、令泄於外、毀於器、不急救之、殆將日少。願詔鍾官兼采鐵錫以資冶鑄。上嘉納。且曰、何但於少。遂將無矣。遷起居郎、工部、吏部侍郎。奏言、擇守在牧養、當後資格。選將在備圉、當先淮堧。民餒而怨、困於折納者、當使絕息。將愚而貪、習于朘削者、當示威懲。財窮于兵、當節浮冗。法壞於例、當抑僥倖。進給事中、言、臺臣坐貪穢敗、不可與貼職。宗子以殺人抵罪、不可貸同惡。其隨時舒吐、無所回隱、而志以伸、引議規切、無所阿徇、而論以盡、皆類此。自嘉定初、忍垢講和、我幣歲入。未幾、彼有外患、因自絕。甫定、則復請賂。公前在郎省、以選往賀正旦。還言、彼寇深仇、結燼餘幾何、潰叛四起矣。而猶暴骨以逞、兵不足恃也。禍稔彰聞、歲不爲稔、粟直萬錢矣。而猶讐歛以供、

民不足恃也。願益講修攘之策、以待天意之定。上說、始議與北絕矣。在戎監言、兵法先計後戰、敵逋誅已久、願咨逮戎略首末、皆許圖上、擇其可者而咨度焉。若臨戰而計、則無及也。及是、進李德裕籌邊事。又言、敵亡無日矣。困獸猶鬪、蓄力運智、事宜在蚤。前後極言邊事、常欲以暇應猝、以弱就強、圖易于難、而無粗武以冒進。慮動于靜、而無安恬以玩敵。累疏一意也。上既默許、任屬進貳密院。于是敵勢日蹙、孤懸一隅、爭倒戈奮擊、舉地奉珍而歸。我天下翕然望中興矣。公憂邊思職、純識獨到、念蠱毒未易輕、則勢之廣莫者、尙費完守。狙伺未易測、則情之攜異者、尙勞控馭。宿將前望、坐相視盡。幹方禦侮、誰與謀長。所謂邊境安危之原、慮方深也。是以荷上簡擢、凡所以審智計、廣忠益、練才實、緝事幾者、顯贊密扶、愛日惜陰、冀行其所知、以圖永報。惜其歲月之近而不究其材也。公宿道以婉、



養德以冲、自幼內行淳備。少師持家嚴甚、公以孝敬盡瘁、無惰色。共纓緦者幾數百指、公以愛友成熟、無間言。勇于矢義、勢雖險不爲懼、費雖鉅不爲嗇。故舊歿無以斂、公爲倒奩空楮以助、且經理其家。在太學同席者歿于疫、相率委去、公挾醫護視、不輟晨暮、卒賴以生。與人謙以裕、奉己約以清、雖貴不改其度。簞土寒品、酬接盡禮。所居增一樓儲書、一堂燕坐而已。嘗曰、富貴非可力求、寧遲其自至。涖官則先以廉勤、吾所以寡憂患者、以此爾。子孫守之、謹勿渝也。異時喜誘掖後進、酬義侃侃、履滿戶外。因所霑漑、率皆有立。雅不喜言人之過、才長獨藝、曲借聲價、因所鑑許、率皆知名。誦樂天詩、慕其爲人。所居西有林壑之勝、暇日從賓御短棹、倏往、命雲侶月、觴詠悠然、其澹于榮利、不以軒冕之味而遂忘也。奏議十卷、文集二十卷、年七十一。夫人朱氏、封齊安郡君、有賢行、先卒。子以思、監西

京中嶽廟。以過、毀得疾、後十有一日而卒。江陰縣尉朱立己、知丹徒縣姚元特、其婿也。孫剛中、監西京中嶽廟。孫婿旌德縣尉汪耒。惟新安介在江左、修岑絕巘、透高入雲、奔湍濯流、倒注萬仞。其靈邁肅潔之氣、鍾美于人、則言論風操、多以諫官御史有聞于時。若夫砥節者傷于孤簡、瞻智者過于深刻、非人美于地、則未有能以義而勝俗者。公雖以冰玉自潔、而揮斥崖谷、無岸異嶄絕之行、人樂其平粹。雖以穎銳朗出、而洗削纖巧、無枝葉華蔓之迹、人信其篤厚。故立朝不過崇懇激、而周盡雅俗、如機湊的、言皆可以長國。居外不廣植聲威、而坐燭幽隱、如鏡見象、事皆可以庇民。庶幾獨鍾于賦予之全者。銘曰、

惟天降才、稽德則均。借美于地、或庇其醇。惟公懋德、自爲芳馨。疏介以通、蘊高于平。有球彼至、薦以廉清。如琴斯希、寂涵至音。有謨在國、有澤在民。以



儒藏

雅伸俗、以實遠名。三事晚矣、噫難者兵。謀胡忌蚤、	憂矣厭深。徹土未陰、效遠而近。孰盡其能、孰畱其	成。蔚兮朝濟、龍山之垠。俾來者誰、尙芘斯銘。
--------------------------	-------------------------	------------------------

衛涇撰 《後樂集》卷一八

校記

①售：原作「害」，據四庫本《鶴山集》改。

②攻：原作「政」，據《清源文獻》卷一六所引本文改。

③楮：原作「諸」，據右引改。

④汪耒：原作「來」，據衛涇《後樂集》卷一八所載程卓墓誌銘改。

宋儒碑傳集卷一百六十七

艾謙 蘇在鎔 宋天則 蔡幼學

黃疇若 劉強學 吳柔勝 姜柄

故澹軒先生艾公及其妻李氏墓誌銘

嘉定初元六月庚辰京口鄉先生澹軒艾公卒享年五十有六。七月庚申葬丹徒縣崇德鄉查澤之原。後十有九年當寶慶丙戌九月庚申其夫人李氏亦卒享年六十有九以十月丁酉合葬。先生開門授徒垂三十年熏然其和粲然其文見者知其全德君子故父兄勉其子弟子弟請於父兄來學者肩摩袂屬既戶外履滿無所容席則擇其已成立者時其課程使歸而求之嘗謂習能移人學者尤貴相觀而善故凡所進教必其質美才良否則雖情之親幣之重必謝遣故游其門者多俊秀二十年來鄉之名薦書取科第者非其門人則其壻若子又否則其肺腑之親其教益明其道益尊其

諸子與其門人猶懼方來之無窮師友之淵源或素無以發潛德之光照臨艾氏乃因夫人之葬枚述所聞授簡于某俾彙次之謹按艾氏魏晉以前皆齊大夫艾孔之後至後魏改俟斤去斤三氏皆曰艾而族始分先生裔出潁昌曾祖袞故供備庫副使騎都尉武功縣開國男祖均故從義郎父欽文十歲陷北得間南歸遇其母於京口遂奠居業醫以養有以疾請不以豐約異視不以寒暑憚行紹興辛巳我師佇敵而還遇疫郡督醫就視率具文以應惟公究心所療皆愈歲當大疫視證惟香蘇飲爲宜而病者多莫能家至則置錡釜煮藥於庭來者飲之或恣所酌取人以全活公平生陰德甚多惟舉此二事語人曰吾子孫會有興者先生丙午壬子再舉於鄉公猶及見之先生諱謙字益之明敏過人孝友天至初從小學師豐公旦歎其穎悟曰不可以吾故妨汝之進即介以從故泰興



大夫杜公士英。杜時與故吳興郡博士陳公珙、金陵郡博士田公曉、浙東部從事葛公師心，皆以鄉先生爲後進師。四公每相與評門人，無出先生右。田公唱第中都，委攝領諸生，歸視所習業，悵非所及。陳、葛皆遣子從之。葛之子文昌遂以癸未歲擢第。蚤歲兄弟以乃翁日入之裕，用頗不節。先生自買書外，一毫不妄費。知乃翁欲其力學以立門戶，晝夜服勤，隆暑亦籠燈露坐，里閭嗟異。親亡，以家務自任者十五年，中外無間言。兄弟有女無以嫁，亦有以嫁而失所托者，皆一力經理，不異己出。入鄉校，以講說爲職，每朔旦橫經堂上，聽者於其句讀抑揚之間，已得大意。及其敷述，辭暢而義明，守貳以下，無不耳受心悅。爲正錄，謂學校紀綱皆己自出，小有不謹，則上下玩視，紀綱亂矣。故動必以正。舊或以教養公法濟己私，先生飭門人，非自能文，不得食公廩。諸子雖累試優，不得列職掌。郡博

士小不合，即棄去。後雖異謝，終不屈。以其所已爲，邇其所未爲，以其施於庠序者，逆其施之朝廷，其所著見，可勝量哉。可勝量哉。初，先生長女及笄，求者多富室大家。先生靳不與，顧以與學子高君炎。高戊辰春及第，先生無恙，時擢第以歸。今官承直郎，新寧國府府學教授。志以所學見之行事，鄉里服其知人。李夫人南唐之裔，父彥，故贈承事郎。兄紳，登辛丑進士第，終通直郎。弟綸，登丙戌進士第，今官迪功郎。新無爲軍，無爲縣尉。夫人孝以事舅姑，和以處娣姒，順以事其夫，嚴以教其子。先生嗜書，夜過半未即寢，夫人不敢寢，常視膳服之宜而敬進之。先生沒，夫人猶夜課諸子讀書，不少懈，用能成其子。慶洪、慶遠皆三與鄉舉，慶長與其舅李綸偕爲丙戌進士。子謝母慈，弟德娣教，鄉人榮之。慶增更名洵，壬午舉首。慶善與季女適孫氏者前卒。孫長曰桂孫，次未名。先生歲晚理學明，世念薄，名



所居曰澹軒、集所爲文曰澹軒類藁三十卷、手編易學理窟一卷、治古事類二十五卷、古文業珍五十卷、皆藏於家。自釋氏之徒入中國、與老氏之徒相比、誑惑愚民、至謂喪祭非我不可、慶洪等曰、我儒家也、鄉人於我乎觀禮、吾何敢戾所學、以辱吾親。李綸、高炎贊之、故盡屏俗尙、來速銘。銘曰、

紫金西峙、京峴東環。鯤化鵬搏、二十年間。維子維壻、維我高第。中權後勁、有來方銳。於乎先生、身屯道亨。我嘗言之、彼作而行。查澤之源、葱葱佳氣。同我伉儷、祔於祖禰。其心孔夷、其居孔安。銘以昭之、千古不刊。

劉宰撰 《漫塘集》卷三〇

蘇和父墓誌銘

自理義之學不明、士銜於詞章之末、怵於功利之下、雖足以隨時就事、繩以聖賢之訓、終爲背戾。本朝諸儒後先相望、本諸書、詩、語、孟、易、以明時用、春

秋以驗行事、三禮以節人情、然後知人所以官天地、裕萬物者、蓋在此而不在彼。五三六經不爲虛言、而匹夫匹婦皆可以與知與行。周、邵、二程子之門人、嗣守大訓、至廣漢張子敬夫傳而習之、有胡子仁仲爲之模範、朱子元晦、呂子伯恭相與上下其論議、其學益以粹明。二江范文叔早從張子問學、剖析精微、羅絡隱遁、朱、呂氏皆推敬之。歸安故廬、若將終身、鄉人即其所居、以月舟先生稱之。是時余忘年友人蘇君和父實從之遊。其始也、淹貫諸子百家、旁及老釋二氏、旁搜博采、晚而斂博歸約、落華就實、目光炯如、頭容儼如、口授指擿、意亡厭數。人有善、稱獎風厲如弗及。或謬於理道、簡於容儀、即莊色厲聲、道師之言、以訓迪之。故公在則情者肅、譁者嘿、毋敢慢。其精神氣貌之所感發者、蓋若此。嗚呼、此其所以壽正學而繼前哲者乎。君諱在鎔、和父其字也。其先簡陽安人、後徙郫爲著

姓。大王父仲文。王父處約。父覺。贈承事郎。妣蔣氏。趙氏。皆贈孺人。君方齠而孤。趙孺人手抄經史以教之。終其身言及母氏。必流涕被面。年三十一與鄉舉。年五十六始登進士第。涖官行已無一豪愧負。初任監永康軍味江鎮。再仕綿州魏城縣丞。縣民仇其長。鼓衆入縣將爲亂。官吏竄伏。君聞變。推誠往諭。民爲散去。長官幸脫死。反以是忌疾君。乃託親嫌引去。三仕果州學官。四仕潼川路常平司

幹辦公事。會獄有疑。公不忍緘嘿以負使者。具以冤狀白之。或疑其越職私請。毅然上印西歸。旋致其仕。其剛決不撓之氣。可以觀其師友淵源之自矣。退居七年。譽處益尊。諸公要人造門請益。貽書講學。無日無之。四方大夫士識與不識想見其風采。余爲瀘州。欲挽致之。行有日矣。端平元年秋七月。以五峰先生遺文授其子子禮曰。此吾從月舟先生得之。吾手自讎校。汝可細觀。當自得之。五日。

命筆題詩。溘然而逝。得年八十有二。娶同邑王氏。封孺人。先君而卒。男三人。子賢。子起。子禮。今惟子禮在。孫男三人。堂振。剩孫。孫女三人。曾孫男子三人。子禮卜以二年三月□□□舉君之喪。葬于縣之崇文鄉乾山。前期來謁銘。銘曰。

道遠民散。師異指殊。幸而猶有。老師宿儒。散在郡國。教于里閭。儀刑前哲。領袖羣趨。世莫知之。有鬱勿祛。槁項台背。理光丘墟。我銘昭之。以覺世愚。

魏了翁撰 《重校鶴山先生大全文集》卷八六

### 宋秉彝墓誌銘

一邑一鄉之善士。若未必爲當世重輕損益。至有篤學躬行。終身不倦。隱然使後進子弟有所考法。此其存也可使爲世道助。其死也可不獨爲鄉邑惜哉。余得官遂安。藉田令呂君子約遺余書曰。宋秉彝重厚老成。可親也。比至。訪諸邑人。果翕然稱之。秉彝野居。余未及往見。秉彝亦病。以書來。曰少



藏

廖當詣子。已而病日加竟死。余爲文以奠其家。請銘遂銘之。秉彝姓宋名天則。少學於建安吳君晞。吳嘗及事龜山楊先生。授以所聞。關洛諸儒之說。則能喟然自拔流俗。知所尊慕。長無師友。琢磨獨守其學甚力。踰四十始見廣漢張先生。東萊呂先生於嚴陵。二先生喜之。延請爲郡學錄。後二年復從呂先生於金華。切切講問。還家杜門。罕出。專以讀書玩理爲事。既老愈篤。一日歎曰。吾不幸。二先生棄吾死。今海內學者。晦翁朱先生是賴。吾不可不就正。爲終身羞。則營糧治裝。將行。而病侵矣。病革。意象怡然。誦西銘之卒章曰。存吾順事。歿吾寧也。戒其子世吾學。毋用浮屠巫覡法汙我。不及家事。平生爲人朴愿。敬遜。事親孝。親歿。一聽於其兄東之。始終無間言。世俗狹隘近利。獨澹然無營。接物一以誠。衍衍和樂。無怨忌。嗚呼。斯可謂篤學躬行之士非耶。余雖竟不識君。然得其事不誣。若君

者。其不可以一邑一鄉之善士例目之矣。世家遂安。曾祖奕。祖彥邦。父時中。好義長者。士大夫多重之。秉彝嘗貢禮部。不第。兩遇慶壽恩。封其母太安人。室童氏。子男三。玘。瑄。璿。三女。適士人余宏遠。童至仁。周榆。孫男五人。尙幼。其卒以紹熙二年十月二十五日。年六十四。明年某月日葬母所。銘曰。士修其身。不必於聞。有欲知君。視此刻文。

孫應時撰 《燭湖集》卷一二

兵部尙書蔡公墓誌銘

公溫州瑞安新城里蔡氏。名幼學。字行之。曾祖昌。祖廷直。父贈通議大夫端卿。中乾道八年進士第。初同縣陳君舉。聲價喧踴。老舊莫敢齒列。公稚甚。獨相與鴈行立。比三年。芮國瑞。呂伯恭連選拔。輒出君舉右。皆謂文過其師矣。孝宗親策。將爲上首。公乃言。陛下始即位。冀太平旦暮至也。奈何今十年愈益壞乎。語諄切如家人父子。又宰相虞允文。

梁克家養虛譽苟容而張說姨子預兵柄有許史丁傳之漸孝宗初不過也或疑天子聖德方日新公少年論諫盍順導婉達由是不得高第教授廣德軍通議卒待潭州教授闕執政言蔡幼學未登朝可惜孝宗遽肯首問年幾何矣何以名幼學施參政奏孟子云幼而學之壯而欲行之故幼學其名行之其字上佇思慨然曰今壯矣可行也已差勅令所刪定官對語如策孝宗喜曰解卿意欲令朕立規摹爾甚善然後知上不以言咎臣下而公亦未嘗變所言也碩人黃氏卒除太學錄未行或請武學參用儒臣爲其博士久乃爲太學博士召試祕書省正字兼實錄院檢討官遷校書郎著作佐郎朝廷念輩流多要地猶滯館下議進擢公歎僞學禍已成朋類將散求外補特提舉福建常平茶事御史劉德秀果言公嘗迂孝宗罷再主沖佑觀凡八年知黃州福建提刑未上召爲吏部郎官

國子司業兼權中書舍人宗正少卿遷中書舍人兼侍講韓侂胄死餘黨尙梗塞正路公一掃絕竄免尤衆號稱職除刑部吏部侍郎兼直學士院趙師霁以冬官知臨安府公當不允奏師霁之人與其行事衆耳目素具也於是四典京邑非臣所知不允必有褒詔臣無辭以草遂止改兼侍讀師霁命復下除龍圖閣待制知泉州尋提舉興國宮知建寧府福州寬而不犯肅而不殘治居天下最提刑喜聲威不以獄市還州縣客謂公名盛體峻何得許公笑曰此小節耳不足校也命吏報應無失期會民恃公少安提舉使民以田高下藏新會子按不如令者沒入其貲公駭曰此大害也昔吾在朝論從民便爾不許第多其兌易而已民賴公獲免然提舉善士也後知其誤卒皆已之除寶謨閣直學士提舉萬壽宮嘉定十年召權兵部尙書修玉牒兼太子詹事其六月有疾夢神告曰可歸矣



隕星屋西南。七月二日薨。年六十四。先碩人林氏。今碩人鄭氏。子曰籥。承奉郎。仙居丞。爲二弟後者。節策。節迪功郎。浮梁簿。策補致仕官。曰範。從政郎。監鎮淮酒庫。孫曰紹老。孫女四人。十一年四月十八日。葬於永嘉吹臺鄉洋奧山。公內負實力。而憂世至深。憤恥復讎。無悠悠碌碌之論。節減與民。無奇奇怪怪之策。所知必立。所立必遂。不前銳而後挫。不外強而中弱。雖於孝宗君臣之交未合。自謂愛君惜日。當如是矣。昔子產增賦。渾罕致譏。冉有倍粟。仲尼鳴鼓。蓋據末反本之難也。非公師友深慮而知化。孰能考次熙寧而後。節斂目取。民困兵驕。所以致患之由。而告於上哉。若夫不別夷夏。不分正閏。恬其仇我。俛焉並立。甚至以爲戎狄之德。黎民懷之。若天眷命而然。則尤公師友之所諱也。初。我幣已入。值虜有難。不暇受。稍定。則以兵扣邊。索。中外恫懼。無不言當亟與。公爲尙書。即日請對。

明其不然。始詔與虜絕。因請固本根。以弭外虞。示意向。以曉衆志。公汲引而材謀奮。審懷附而南北親。條序簡捷。士皆驚誦。謂何勇之決也。上方倚以經度西北。而公病矣。嗚呼。豈亦所謂鞠躬盡力。死而後已乎。雖幼以文顯。無浮巧輕豔之作。旣長。益務關教化。養性情。花卉之炫麗。風露之淒爽。不道也。詞命最溫厚。亦不自矜貴。惟於國史研貫專一。朱墨義類。刊潤齊整。各就書法。爲續司馬公卿百官表。年曆。大事記。備志。辨疑。編年政要。列傳舉要。等百餘篇。今代之完書也。資凝重。危坐竟日。或不通一詞。龍窟陳同甫言。吾常與陳君舉極論。往往擊柝案聲。撼林木。行之在旁。邈若無聞。吾頗訥之。衆亦云。素無短長於間也。一日。客盡散。忽語吾。道一爾。奚皇帝王霸之云。吾方辨數。而行之橫啓縱闔。援今證古。釐爲十百。聚爲一二。抵夜接日。若懸江河。吾謝不能乃已。則復寡言默默如故。故雖並

舍連楊不知也。然則昔人謂得人於眉睫、定士於俄頃、亦豈盡然歟。蓋公之深中隱厚、可驗於是矣。故并記之。銘曰、

智過於師、道始可傳。有佞無仁、奚其禦焉。蔡公直方、不習而利。寂含五音、璞具六器。夜半東升、晻於方中。執德不回、終以顯融。君能責難、民病能寬。夷狄邪氣、莫能我干。木居甚安、瓢飲何有。世故雲化、三者墨守。昔余從公、一字之謙。諸子示我、書何滿匳。大典既備、法嚴義粹。玉琰其版、金騰其匱。雖貴有已、雖年有止。維書無窮、以貳遷史。

嘉定十二年六月□日。

葉適撰 《水心文集》卷二三

煥學尚書黃公神道碑

豫章之黃皆出金華、隱君子諱遇和者、居豐城縣之沅江、始爲儒家、馬公存誌其墓。是生表、表生得禮、擢元祐第、終柳州推官、贈朝議大夫。生彥輔、擢

政和第、爲了翁所敬、終吉水令、婦翁李公朴誌其墓。是生去華、贈太中大夫、配淑人周氏。生公諱疇、若、字伯庸。甫晬而孤、外祖母杜夫人奇之、曰兒必貴、誨以學。擢淳熙戊戌第、歷祁陽主簿、柳州教授、靈川令、知廬陵縣。堂審、監進奏院、太府寺簿、將作丞、兼皇弟吳興郡王府教授、太府丞、祕書丞、兼禮部郎官、兼資善堂說書、著作郎、監察御史。嘉定初元、擢殿中侍御史、兼侍講、權戶部侍郎、華文閣待制、知成都府、成都路安撫使。以父諱辭、改寶謨閣。三年至蜀、進龍圖閣待制、華文閣直學士、再任。復以諱辭、改寶謨閣。七年、召對延和殿、權兵部尚書、太子右庶子、兼同修國史、落權陞左庶子、太子詹事。十年春、知貢舉、試禮部尚書。請外、以煥章閣學士知福州。辭、提舉南京鴻慶宮。臺疏、落職罷祠。俄提舉鳳翔府上清宮。足疾告老、復職致仕。十五年正月癸亥薨于寢、年六十九。階通議大夫、爵豫章



郡侯食邑一千五百戶。遺表聞、贈宣奉大夫。淑人范氏、處士子明之女。子男五人、長策、故某官。次簡、某官。次籍、某官。次節、朝奉大夫、新知賀州。次某、某官。女五人、某官楊必復、歐陽棠、某官劉成李、馮禧、某官相桂、其婿也。孫男若干人、曾孫男若干人、女若干人。薨之明年臘月壬申、葬於故里之桐谷。既葬三十年、節奉公奏議遺文及李侍郎劉所述行狀、請於前史官劉某曰、先公遠矣、節諸昆長以毀卒、仲以病廢、叔遠宦、宰上之木已拱、道旁之碣未立、節爲此懼。其詞甚哀。予先君子與公同以江右邑最登朝、於公言論風旨耳目睹記、雖老猶歷歷未忘。初、京丞相當軸、尤援鄉曲、公寧仕嶺海、不一傍修門。祁陽與馬提刑大同爭疑獄、馬公爲誑。吉守六月督畸零欠、公以縣用錢三千緡代輸、禁吏預借。飾學增畚、日召諸生講論、衆建生祠、公止之。去日送者傾郡。其在王邸、資善也、據經析理、渠範

凝重、吳興、景獻見必加敬。茂陵由此眷公、將擢臺察。侂冑訶知、因會館閣、廣坐語公、某不知公乃山谷後、以所藏宜州家乘真蹟爲遺。公既居言責、首乞天子擇宰相、宰相擇監司、毋令天下以賄議朝廷。再疏言、善爲相者、必日以危亡災異奏于上。又謂、鼠食牛角、角盡而牛不知、口甘故也。韓、陳始怒、奏格不行。俄而二姦敗、黨人皆去、上批公奏、朕知卿忠、更化之初、正資讜論。於是鄧友龍、陳景俊、除名遠徙、內侍李益不許入國門、丘公鵠起爲江淮制置大使、行公疏也。虜請和、欲函致侂冑首、公以副端預集議、謂函首失國體。退率同列乞令虜先歸關隘、我後與歲幣。卒如公言。又言增幣。約和、國胡以支、欲專創一局、共議樽節以紓國、遂置安邊所、命公同戶部侍郎沈誨條具合節省拘催者。公奏內諸司宜委一大璫。外廷委公府掾、六曹委長貳、各限半月條奏。又乞椿官房廊、激賞庫、侂冑萬





畝莊歲入。進講面奏、乞力行此事、勿爲近習所搖。旣而它議多格、獨得諸權姦簿錄貲及白地錢等五項<sup>④</sup>、爲緡九百一十三萬、又沒官產、歲可得七十一萬五千。公曰、是亦可爲矣。其後所積益多、迄今賴之。都城貴糴、淮浙流民紛集、詔發粟十萬石糴濟。京尹籍流移僅五千口、期三月麥熟後止。公奏此實驅之去爾、乞令願歸者勿問、其未能歸者展期、詔至六月結局。旱蝗、星變、公言、天子視朝而宰相不奏事、國忌行香而宰執無一人、則其贊理萬幾者可知已。風毀前湖門、暗門、公言、楚爲禍首、楚門壞、吳將乏食、魚門傾。二門乃車駕行幸之路、宜戒佚游。在版曹、言嚴秤提而楮愈輕、宜寬新書、行之以漸。蜀自制閬移治興元、事權偏重、茂陵輟公以往。入辭、玉音云、兵革後當一意拊摩。又有旨、凡四蜀軍民利病、吏治臧否、並許諮訪密奏。兩宮錫賚甚厚。至則首蠲諸邑積欠九萬餘緡、罷遣非敕

命而辟攝者、舊俗頗崇侈飾游、公革以儉。先是天聖間、就邛、蜀、彭、漢、永康、成都六郡產布處、每下戶俵錢<sup>⑤</sup>三百輸布一疋、熙寧數及上五等、建炎軍興、始取布估疋二貫五百有奇、關外諸軍糴本仰焉。公奏、往趙汝愚念民力困、減爲一貫五百、歲減五萬六百緡、本府代輸五年。今蜀民重困、臣泣鎮歲餘、庫錢比舊稍增、遂於汝愚已減外疋再減二百、止理一貫三百。已椿錢二十五萬三千緡代輸、亦五年止。併寬他賦尤重者。諭降沈黎蠻、擊走董蠻、制臬<sup>⑥</sup>兩司謀大舉蕩蠻、公不答。大使師出東路、臬亦調兵、兩路震動、公移書兩軍還師守險。詔公兼制叙州兵甲、蠻降、公進一秩。以成都城久圯、儲錢四十萬緡備版築。出蜀、送車系路、人以方范石湖入對、言謀蜀帥當擇有文武威風、知<sup>⑦</sup>大體者、薦蜀士范子長、許沆、魏了翁、乞城興元、成都。歲旱求直言、公乞還坐虧楮價者沒入之貲。年甫六十三、援

范公景仁故事乞歸。得請。朝士祖帳都門外。皆榮其行。治第豫章城中。自號竹坡。公文律高。丞相周公稱其正大恢闕。詳雅溫醇。誠齋楊公見公詩。以爲得山谷單傳。然公貫穿百家。融液衆體。不但以元和腳。江西派爲重。考宏詞。得眞。留二公。有竹坡集四十卷。奏議三十卷。講學十卷。進故事十二卷。公承當家文獻。故風韻勝。接諸老緒。論故心事平。隆乾以來。衆芳翕集。臺閣多賢。至慶元。錮黨攻僞。邪說橫流。言事者非搏噬餘干相君所厚。則粉黛考亭先生門人。公密扶善類。素尊理學。奏篇無一語差。辛巳而後。四朝生聚。東南極盛。至開禧挑虜。禍形始露。用事者方且厚斂民足用。多造楮。紆急。公一則曰蠲弛。二則曰節縮。向使以其置安邊所者推而廣之內廷。減市估者放而行之諸道。仁言儒效。豈淺鮮哉。余讀公書有云。以無德之人而運才智之鋒。幾何而不斲天下之朴。又云。言利之

臣必不得其死。好利之君必不得其用。爲之掩卷而作曰。此有德者之言。反本之論也。公入蜀。僅帥成都一路。兵事皆屬大閫。其後關外軍潰。言者論公遺蜀患。於是公出蜀八年矣。亦怡然不辨。始公欲以奏稿屬眞公爲序。不果。予受學眞公者。追誌公墓。系以銘曰。

遠矣黃氏。望于豫章。至太史公。誇瓊軼香。雙井一支。分秀沅江。是爲竹坡。雄翰墨場。鼓朱絃瑟。織雲錦裳。曳履禁中。執簡帝傍。縻公弗留。引身高翔。出授齋鉞。井絡之方。流涕牋天。蜀民殘創。一時權宜。百年弓張。臣請弛之。以帑金償。視兩忠定。先後相望。我不識公。獲交諸郎。早誦奏篇。晚窺家藏。齒宿意新。辭婉味長。公不可作。騎麟翳皇。廬陵二老。過江歐陽。手持衡尺。親加裁量。延之宗派。列之循良。一語品題。千載耿光。謂余不信。質之周楊。

湖南運判劉公墓誌銘

嘉定初詔以敷文閣待制致仕信安劉公穎爲尙書刑部侍郎。時天子新更大化、凡當世名儒耆碩繼踵集闕庭、天下望治如元祐。獨公堅卧不起、抱全節以終、士高仰之。累贈少師。龍泉葉公適志其墓。公名強學、字行父、實少師冢子。羈巾時、王父正議授以左氏、班史諸書、朝夕吟諷不去口。後侍少師官長沙、時張宣公尙亡恙、岳麓之教大興、公往就學、日與賢雋遊處。有彪君德美者、嘗受學五峰先生、爲公言前輩師友淵源甚悉。及補國子生、又盡從四方知名士觀摩麗習、聞見益洽。屢上春官弗第、以奏補調主清湘簿。帥王公藺檄致幕府、事輒咨扣。辟京西安撫司準備差遣、楊尙書輔爲帥、尤器異之。改宣教郎、知饒之安仁縣。會邊兵失律、虜騎蹂江淮間、郡邑勇配以應期會、吏並緣爲姦、公獨從容辦治、若無事日。歲旱菑、刻意荒政、凡所

以振撙者百方、竟事民得亡流殍。學政久弛、公聞進士湯師中名、聘使領袖一學、月旦會講、率諸生以聽。由是士知勸慕、中第者相屬。湯君後亦策名太常、樂道不仕終其身、論者偉公得人如子游之於武城也。先是學不養士而歸其廩於郡、公請復焉、閒則會出內、裁冗濫、比三歲所餘滋多、乃舉以市田四百畝、名貢士莊、士之上南宮太學者賴以續食。又以餘力繕官寺、葺學宮、治津梁、而作放生亭于江之瀕、山川之觀豁然更新矣。居三年間、歲大豐、田里清晏、飛蝗過境不入、人謂美政所召云。居慶國夫人楊氏憂、外除、辟戶部提領酒庫所主管文字、勾祠便養、得主管仙都觀。明年、少師薨、外除、通判臨江軍、始罷榷酤、令民自釀輸息錢、犯茶者寬其罰。擢知南安軍、俗故獷驚、中更陳廷佐等亂、魁桀者往往得官、姦黷艷其利、是歲春南康饑、復嘯聚爲變。公至、首諭大姓出粟振贍之、蠲屬邑



賦租以萬<sup>①</sup>數。然後修其幸亂始禍者、威行惠浹、遂以無事。公謂周子、二程子昔嘗講道斯土、乃即學東偏買地建祠、率掾屬諸生薦獻如禮、且刊近思錄、俾郡之士識爲學大方。又以貢闈隘且弊、徙而大之、規摹爲江嶺間最。提點廣東刑獄、有郡守居臺下、政苛甚、亟劾去之。摧鋒卒戍淮甸歸、道中輒剽劫、公命尸數輩以徇、士始識軍律。改轉運判官、廣之屬縣曰懷集、地與島蠻接、帥府督賦急、公移文責誚、俾體名<sup>②</sup>。縣本意、毋釀怨生事。五羊故多盜、公立捕格授巡徼官、盜用衰止。連瞰湟爲郡、城外有楞伽山、貞女峽、嘉泰中、峽之東崖震陷、江流壅底、舟弗通行、郡爲荒瘠。法曹李華有巧思、且自詭疏導、公知其可用、命董厥事、斥錢緡六千資之、不數月石之爲水患者盡平、連人鑱石頌公德。帥憲倉俱缺、公兼緡數印、剴決沛然有餘力。歲瘴且疫、公分醫予藥、垂死者多賴以全。士大夫沒南中、皆

賻卹使歸、無寄殯嶺外者。提點湖南刑獄、湘民喜鬪輕死、以故重辟多、吏常飭法出之、殺人者例不死。公曰、此東坡所謂外邀雪冤之賞、內希陰德之報者、豈辟以止辟之意哉。諸郡以具獄上、惟過誤可憫、若訊鞫有疑者、乃使奏讞、餘悉論如律。然必召掾史議、反復數四、無纖芥疑乃決。故人自以不冤。按部所過、平獄犴、省牒訴、察吏問俗、冒隆暑、由潭邵歷全、永驅馳二千里乃歸。人謂前所未有。資興民鄧其姓者、推刃同氣、匿屍草野中。耕者四人見之、以告鄧、鄧執而訟之官。官加考掠、民不勝痛自誣服。獄上、公疑之、命官閱實、果得其情。四人者破械而出、叩頭呼天曰、生我者、提刑也。公晨出視事、首閱州縣申牘、或謂非所急。公曰、吾欲知部內水旱盜賊刑獄爾、不然吏將蒙蔽我。清湘縣申粟家峒爲鄰峒所屠、邑人大震恐。公曰、此峒民自相讐殺爾、置勿問、已果帖然。新化奉家峒其酋曰奉

夢賢世與省民王布有怨會布以事來衡陽夢賢  
嗾其徒殺之道旁已遁去公命巡尉諭以禍福許  
束身自歸未幾夢賢領其徒四人請罪庭下公命  
鞠治寘殺人者于理迺白之朝謂夢賢世長猺峒  
今又挺身詣官四人已抵罪足償死者冤乞貰夢  
賢一死繫蠻獠心人謂公是舉不失刑又不失恩  
於威懷谿峒爲得武岡卒蔣宗等倡亂某與公叶  
謀屬權軍事葉莫使圖之未幾梟三人首以告一  
路弭服改轉運判官以勤民致疾嘉定十七年四  
月七日卒官年七十有一累階朝奉大夫夫人李  
氏封安人柔明靚莊有婦道執公喪越期亦不起  
子常道某官常德某官常先某官女適某官趙與  
勲進士潘自慧將仕郎王灝與勲故正惠公希懌  
子公在安仁正惠實爲守嘉其政薦之朝且請昏  
焉孫伯方將仕郎仲方季方汝方一尚幼公夷澹  
雅靖自少師薨即息意榮宦買園築屋扁曰退庵

蓋將老而休焉常誦孟子求在我之言以之名齋  
當官而行無所回撓與人言傾盡肺腑不爲留藏  
四方書疏率手筆酬答字畫妍勁可觀性嗜學官  
事暇未嘗食頃去書尤喜賓接士尊酒流行娓娓  
皆文字語某之俟罪于潭也適公來使間相過劇  
談公爲道疇昔所聞於父師者窮日夜弗厭而闕  
其施置大抵有所宗本非若世之任情帥意者寬  
近縱嚴近刻也蓋嘗以吏師曰公及葬常道等請  
有紀焉輒次其事如左而系以銘其世譜見於少  
師誌者今不著墓在常山縣若干里長庚之原以  
李夫人祔實寶慶某年某月日銘曰  
嗚呼少師事紫巖而友納湖紫巖不可見矣得見  
少師猶可考中興人物之宏樞少師又不可見矣  
有子如公尚庶幾識典刑之遺餘昔話雞坡今銘  
馬鬣追懷曩游一飯三咽

真德秀撰《西山文集》卷四六



秘閣修撰吳勝之墓誌銘

勝之修撰葬有日、墓當立碑、眞希元直院已諾、執筆、柴與之秘監、又狀其事矣。二公號大手筆、一代端慤不數人、其言足以信天下後世。而壙中之銘、尙以見屬、雖茶然病餘、廢茲事且久、得附名三賢、足以自幸、且不忍辭也。請叙其略。勝之諱柔勝、家本姑蘇、八世祖徙宣城、以儒爲業。嘉祐中有諱華者、與同郡梅公堯臣友善、嘗屬梅公置京師一監書。崇觀中有諱時者、應制舉爲宗忠簡公澤所深識。後徙建康之溧水、至之始擢淳熙辛丑進士第、稍訪故里、調寧國府宣城尉、以外艱不赴。再調南康軍都昌簿、亦阻內艱。又調岳州巴陵簿、改監秀州華亭下砂鹽場、堂差秀州教授。以臺評改部闕、爲贛縣東尉。秩滿、辟浙西提刑司幹辦公事。請祠、監潭州南岳廟。擢差主管刑工部架閣文字、遷國子正、太學博士、司農寺丞、選知隨州、除京西提刑

仍領州事。以疾求閒、改知池州、又改湖北運判兼知鄂州。求歸、徙知太平州。未滿歲、求去益力、乃以直秘閣主管亳州明道宮、進直華文閣。以工部郎召不赴、進秘閣修撰。歷階至朝奉大夫而歿。特旨轉朝散大夫、此其出處之大略也。舊下砂鹽額不登、官通賄以優富戶、縱彼侵漁、使貧者失其常課。至是盡革宿弊、上下均一。又以場去海遠、水味益薄、鳩千人浚其浦、引海注之。借本錢以給空乏、增鐵盤以助煎鬻、宿瘠旣洗、課以最聞。部使者羅致幕下、頒其術以示諸場、悉獲其利。贛當二廣走集之會、仕族出嶺者貧悴于此、循至流落。乃引趙清獻守此邦日、置百艘護送故事、縱輿當路、築廣惠之館、躬任其勞、居者有食、行者有驢、陸輿水楫、悉爲辦集。至於創造弓手寨屋、閱習武藝、猶是常職。捕盜、法當改秩、棄之不顧、乃其素志。兩學厄於黨論、師儒失職、教導本旨無復介意。甫至、則甄別有



志與講明修身行己之要、利害毫釐之辨、隨其分量、各使有得。會太廟鴟尾壞、時當輪對、歷數春秋書太室屋壞之戒、與晉安帝時震太廟鴟尾、唐明皇時太廟四室壞之證、纚纚昌言、無所回互。又言人才之在天下、視上意嚮。上以表暴爲能、則下有銜鬻以希用。上以奉行爲能、則下有迎合以自見。上以發擿爲能、則下有賣值以求名。上以財計爲能、則下有聚斂以邀功。此其機括所繫、在人主操縱之間。苟取舍之際、意嚮少偏、輕銳者獲進、浮躁者得志、將以集事、未必不敗事也。隨州逼近敵境、當兵火焚蕩之後、勸賞未明、咨訪不及。下車之初、許士民得白事。皆言丙寅之戰、韓通死節未錄、和議再講、畏敵太過、邊界相犯、一切歸罪省民、死以非辜、冤者莫訴。郡欠城壁、人無固志、兵少不支、無以取重。即爲韓通立廟、請額于太常、爲文弔祭、厚卹其家。隨人大悅、無不思奮。郡有梁臯等七人獄、

按舊比皆死。訪其顛末、則敵有盜其馬者、交矢相拒、此直彼曲、立破械縱之、具以報敵、敵亦語塞。經理郡郛、又且併及棗陽、板築具舉、浚其濠塹、招徠亡命、得精兵千人、別立一軍、號曰忠勇。防城之具、纖悉不遺。教養之方、委曲備至。土豪孟宗政有保護鄉井功、縱所部自肆、輕視官府。檄來款接、勉以忠義、宗政感悟、遂爲良將。信陽屯戍將官康孝先、以疑附人獻諸敵境、安陸人陸桂僞命得官、乃注選闕、以部使者發其姦、皆得竄逐。當塗地方千里、戶口十萬、強名江東道院、實有弛政、爲之剖決訟牒、終日據案。招補禁卒、又招補又鑱手、溝通市河、民無疫癘。奏免城下稅征、商旅無壅。若乃拯民艱厄、尤所留意。初待次秀州學官、出而任浙右救荒事、芒屨杖策、躬履窮陋、捐金散粟、用及私橐。佐使者美意、蠲一道賦入以寬百姓。作尉於贛、又以使者檄視旱旁郡、具以實告、得所未聞。鄂渚旱蝗四



起田無遺粒、預講荒政、乞糴於湖南熟郡、置場損值、分旬濟給。又關官寺僧居、作饘粥以活行路、病有藥餌、不幸而死有棺衾。屬部十五郡、體而行之、皆有著效。此其臨政之大略也。事親以孝聞、事兄以弟聞、事寡嫂如事其兄、處甥姪如處其子弟。少蓄於財、每以仕不逮親爲憾。異時把麾持節、遇公宴必動色、往往對盛饌泣下。大郡故事有迓錢、則卻而不受、宴設有不盡錢、則歸之公帑、考其緡數、不下二萬餘。未入朝時、課其子以修身爲本、取大學之義榜其堂曰壹是。後得歸故里、家宣城西門、有地二十畝、爲樓三楹、矯首遐觀、千里在目、榜曰得要。蓋徜徉七年、乃始屬纊。生於紹興甲戌、卒於嘉定甲申、享年七十有一。登仕版者四十有四年、而生平游宦處、僅有贛尉三考、守隨與鄂皆不滿二歲、下砂以見忌、衝替、校官幕官以煩言改缺、鄂渚有實惠及物、乃或以干譽、好名目之。其尊德樂

義、中懷誠實、不必與賢士大夫盡接、而脈絡交貫、自無間斷。不必與非其人相惡、而柄鑿方圓、自不相入。至於鹽策以最聞、而強以虧額坐替、救荒已著效、而虛以好名得謗。人之反常害正、一至是哉。曾大父諱爽、妣胡氏。大父諱殊、妣王氏、周氏。考諱丕承、竹坡周公紫芝甥也、再試禮部不偶、贈朝奉郎、妣劉氏。娶石氏、沈氏、曹氏、皆贈安人、臧氏又受安人封。男女五人、源、待補太學生、泳、三試禮部、入太學、奉補迪功郎、湖州武康主簿、女、適進士林公榮、皆蚤世。淵、賜甲戌進士第、今爲從政郎、淮東制置司幹辦公事。潛、丁丑唱名第一、今爲奉議郎、通判廣德軍。二子將以十一月二十三日葬于宣城縣石港之原、書來謁銘。余解后與勝之爲同年進士、識面臨安邸中、論世事輒契合。後十七八年復會、則黨論已起、諸言學問者皆咋舌不復道、獨勝之鯁鯁如前日、無所沮撓。又十年、余守漢陽、會更

化詔許薦士、余取選調中不苟合者三人以進、勝之居其一。至其相與莫逆、度越於形迹之外者、不可毛舉、欲辭銘得乎。請銘之曰、

謂勝之爲道不遇耶、玉立周行、孰關厥路。風寒倚重、孰識厥素。予節兩道、外無窘步。郎宿論譔、其選益遽。謂勝之爲志得行耶、眇焉鬻海、不使終更。冷官采芹、莫獲問程。幕府何爲、亦至屏營。有惠活人、胡云近名。時乎道耶、天乎人耶。時有否泰、道無屈信。彼衆勝天、我守其真。人死萬殊、之死一律。惟有直道、可繼可述。勝之稜稜、視彼教忠。壹是脩身、旁無附庸。儉府仁言、漢廷大策。其敵益勛、其守愈力。清風時雨、萬古一陶。咨爾盲怪、無爲怒號。有狀有碑、詞正而麗。我作壙銘、以示來世。

曹彥約撰 《昌谷集》卷二〇

### 知鍾離縣姜君墓誌銘

嘉泰元年春、姜君子謙赴鍾離。旣餞之、又爲考濠

梁故迹、爲大篇以贈別、所以期之者甚遠也。明年冬初、其兄鈐轄子陽來見、涕泣而言曰、鍾離弟將亡矣、以書來相報、亟往赴之。袖出其書、言甚悲而不亂、謂得疾之不可爲而復甦、殆不可免。婦弱子幼、非兄來不可。其末猶曰、見攻媿尙書、爲致永決之意。鑰爲之失聲而泣、然猶冀其無恙也。未幾而訃至、比間關扶喪以歸、往哭之哀。見其遺書一卷、甚備、又曰、求攻媿數語、以表吾墓。其友袁木叔慙又得書云、欲懇攻媿求銘、而孤介能自植立、不肯頽墮。惟子深知我、望與發揮之。嗚呼子謙、死生之際、不亂如此、而何拳拳于我之銘。將葬、木叔爲述其平昔大槩、文核而事實。子陽又以見屬、余不得而辭也。君諱柄、子謙其字也。家世汴京。曾祖侁、故右侍禁、閤門祇候、贈武德郎。祖寬、故成忠郎、閤門祇候、贈吉州刺史。以靖康避地、始徙鄞。今爲慶元府人。父浩、故武顯大夫、累贈和州防禦使。君旣升



朝改贈宣奉大夫。母朱氏、仁懷皇后姪也。封宜人。累贈碩人。君初以世賞補承節郎、監潭州南嶽廟。秩滿、充樞密院準備差使。淳熙十二年、轉保義郎、監行在豐儲倉。丁宣奉公憂、服除、辟差監婺州蘭谿酒庫。十六年、覃恩、轉成忠郎。紹熙四年、轉忠翊郎。是年登進士科、改授承務郎、知臨安府於潛縣丞。五年、覃恩、轉授承事郎。慶元三年、轉宣教郎、知濠州鍾離縣。五年、轉奉議郎、以疾卒于縣治。十月四日也。享年四十有九。娶魏氏、丞相文節公母弟知寧國府涇縣柅之女。封孺人。男一、熾。女二、長許。嫁迪功郎、新黃州黃岡縣尉司馬遂。三年九月乙酉、葬君于縣之豐樂鄉東山唐家隩之原。從治命也。初、姜氏之富甲于京師、而喜延名儒以立家塾。宣奉記覽多聞、教子弟尤力。兵火流離、貲財蕩盡、銖積寸累、以立門戶。雖事力不及上世之一二、而儒風浸昌矣。宣奉之弟諱濤、始登科于紹興十二

年、終諸王宮大小學教授。君與四兄皆朱出、模四取漕薦、械蒙孝宗召對、特除閣職。樸雖抱疾不仕、其子有場屋聲。桐即子陽也。與君同升禮部。君最幼、一再垂翅南宮、必欲以科第發身。感慨奮發、蚤夜力學、不知飢渴寒暑、蚊蚤嚙膚、洛誦不輟。謂事不成、則無面目見先人于地下。卒遂其志。又與子陽之子光同登。後六年、光之弟燧復躡世科。自爾兄弟之子薦漕臺、登胄監、入太學者相繼。實自君興之。在密院時、已名薦書、不以官卑而辭勞。近郡有禁卒犯階級而主帥不以實聞、君上書樞密使周益公、謂軍政不修、緩急何以使人。語苦切、益公大奇之。宣奉之喪、或言可免解官者。君曰、吾忍爲此哉。倚廬三年、哭不絕聲、不如輩亦不入于家。寺丞呂子約時仕于明、見其居處容貌、愀然動色、遂相與討論喪禮、洗末俗之陋。後數年、貽書朋舊、猶曰、君執喪有禮、足勉世俗、士友所共欽也。君資素



警敏、初止銳意舉業、年二十六七、翻然自以昨非爲悔、有志于古人爲己之學、折節虛心、親近師友。里社先達及四方賢士大夫遇之、必斂衽求益、反覆叩請。其在蘭谿、與婺女諸賢尤稔、陶染既久、懲忿矯薄、見于踐履、臨事規規、典刑中、其進殆未已也。於潛巖邑、士風久不振、君之邑庠、爲選士之秀者、補弟子員、每旦升堂、講書校藝、皆有尺度。口授指畫、與士日親。期年而向學者彬彬然、鄉舉占名者三、而登第者二、尹光庭者名在第五、邑人榮之。相語曰、贊府作成之倡也。昌化爲鄰、舊許民釀酒而輸賦于官、有議欲榷酤者、衆訴于府、尹以屬君。或謂出于朝旨、且欲以裨郡計。君曰、此實民便、安可漁奪。卒免之。老稚歡呼、爭繪像立祠。君力止其議、尹益重之。檄入、僉幕贊助爲多。君本以鍾離事簡而往、而訟牒紛委、不減內地。君疚心剖析、日力不足、夜以繼之。內和外剛、勇于爲義、人不能奪。有

獄吏罪惡貫盈、而持吏短長不能去。有盜牛馬者就逮、已得其情、而輒翻異。君曰、必吏教之也。一鞠而服。白于郡、竄之、遠近無不快之。或言在君左右者皆其黨、恐有爲之報者。君不爲動。吏民聳服。聲聞煒然。外臺多以滯訟相委、隨即剖決。總領韓公亞卿以文章政事科薦于朝、郡太守尤加敬異、應用之文又以屬君。體素弱、撫字已勞、而種學績文略不少懈。縣事畢舉而君病矣。君生長膏粱、而丰度高勝、簡澹清苦、無聲色之奉、又不喜飲酒。藏書數千卷、凝塵滿室、蕭然如物外人。即所居超蓮堂池西累石創亭、名曰礪陽、時從雅士徜徉其中、坐無雜賓。尤工小楷、作詩清婉有思致。文節公于詩少許可、閒居惟雪牕張武子爲山中客。碧谿泉石勝絕、君每至甥館、遇遊賞、必參坐論詩。善與人交、同寮相與如至親。疾旣侵、至相率寢食于縣齋、醫禮盡力。前數日、即命妻子治後事。已而屏人危坐、

既爲子陽書、又書以與親故、人人致訣別之意。作  
偈以寄禪衲之厚善者。大書數紙、以戒其子弟。區  
處細故、纖悉明白、意象正大、思深而見遠、皆平時  
薰染講切、見于躬行者如此、可以信君之所存而  
推見其所未爲者。其亡也、邑人爲之聚哭。喪歸鄉  
曲、無不爲之痛惜者。哀哉。銘曰、

嗚呼子謙、是好名耶。躬行自立、疾沒世而無稱耶。  
以其學力致其身、起其家、施于政事、末而見于死  
生之際、足以不朽矣、而何待于余之銘耶。余方畸  
于人、無用于世、吾何足爲九京之重輕耶。顧言猶  
在耳、遺墨未乾、余不得而默然。悼痛之深、將何時  
而卒耶。

樓鑰撰 《攻媿集》卷一〇六

校記

①國：原作「閣」，據清抄本《後村先生大全集》改。

②幣：原作「弊」，據右引改。

③璫：原作「當」，據右引改。

④項：原作「頃」，據右引改。

⑤錢：原作「儀」，據右引改。

⑥臬：原作「臬」，據右引改。

⑦知：原作「和」，據右引改。

⑧緒：原作「諸」，據右引改。

⑨「禍」上原有「首」字，據右引刪。

⑩楮：原作「楮」，據右引改。

⑪穎：原作「穎」，據《水心先生文集》卷二〇《寶謨閣  
直學士贈光祿大夫劉公墓誌銘》改。

⑫萬：原作「亂」，據正德本《西山先生真文忠公文集》  
改。

⑬名：原作「各」，據右引改。



儒藏

⑭少：原作「幼」，據右引改。

⑮名：原作「明」，據右引改。

宋儒碑傳集卷一百六十八

高松 孫應時 陳巖 包履常 朱權

汪莘 郭叔誼 章寅臣

台州教授高君墓誌銘

君名松、字國楹、姓高氏、福州長溪人。曾祖亶、祖亨、不仕。父融、有素履、起家衡州司戶參軍。既乃遜其官、與野僧遊、一筇獨往、經年忘歸、家人常訪求深山始得之。君紹熙元年中第、授臨海主簿、青田尉、不赴。教授台州。嘉定四年十二月六日卒、年五十八。夫人何氏、先卒。三子、峻、岵、嶸。一女、從浮屠。六年後九月某日、葬廉江山門。始、陳君舉爲名師、自出新學、文體一變、集處多老成俊特。君少年、能探請深處、語移日、精銳鋒起、同進皆回目盼末坐。試入高選、史丞相當舉送、奇之、更擢第一。然君不專爲科舉、每黎明讀書、夜丙止。書益多、見聞益高遠、華枝蔓葉自然消落、以是不驟合於俗、而昔之同進

反先達矣。蓋二十年、方有名第、既而司戶死、母陳夫人又死、君益以其間放肆於書、尋流會源、今古終極、不輕費一卷頃爲洗沐地也。又二十年、同年或已改官登朝、而君方至台州。故例、博士撰解訓一二通、據案抗聲讀、諸生俯首聽、謂之講書。君曰、是何所明耶。令更進迭問、疑難交發、滿意而退。士人喜、來學日衆。學既久、敝欲大釐改、令下一郡父兄歡服、然君已病矣。嗟夫、君不以老厭仕、幾及時也。不以貧願仕、幾有行也。時有早莫、莫亦可也、而猶無時、何也。行有大小、小亦可也、而猶無行、何也。始之難於仕、不忘修也。仕而難於祿、愈其修也。修之數十年矣、而用之不能終日、何也。孔氏之言曰、良農能稼而不能穡。嗟夫、君亦不能穡而已。蓄數十年之種、而芽無獲焉。銘曰、

吾嘗歸自南方、而過桐山之里。始脫幽險、愛其衍美。模山寫水、宜產文士。曷又闕之、尙以孫子。



承議郎孫君墓誌銘

淳熙五年余贅倅天台已而會稽孫君應時季和尉黃巖見其學行吏事詞采翰墨動輒過人與之定交問其家世始知其父雪齋先生之賢甚悉方與四方士友期季和以遠到開禧二年二月二十三日將赴邵武貳車忽一疾不起遂以朝奉郎致仕識與不識莫不痛之三年十月二十五日其母太孺人張氏繼卒于家季和之兄應符遣其子祖祐來見余曰祖父雪齋之亡季父嘗持故國子錄沈君煥所狀行實乞銘于晦菴朱公公許以銘曰古所謂志士仁人今復見之恨不及展龐公之拜銘文見屬其何敢辭既而公亡迄不果銘今不幸祖妣繼季父以逝顧當今孰能繼晦菴者敢泣以請余以衰病掛衣冠而迫于上旨收置北扉震懼固辭不獲命念季和之交誼又不可以固陋爲解

讀其所示事實見雪齋七十歲時倣程公大中自誌其墓有云雪齋野叟孫介字不朋越之餘姚人也族緒寒微難援譜系但聞五代祖自睦州徙居此力田自業余曾祖諱亮生二子余祖爲長諱政孝慈馴善鄉黨稱之生四子長從釋氏爲昇師次爲十伯父次爲十三伯父次先考十七府君諱子全昇師持苦行而有高識兼通儒書喜聽賢士大夫語歸葬父母守冢三年則聚諸弟之子躬授語孟詩禮蘄變其家爲儒已而余生于政和甲午八月辛未實十三伯父之子命以爲先考嗣四歲能離家入郡庠隨兄壽朋讀書日數百言七歲學于鄉先生胡定翁家聞本生伯母及先考之訃號噎奔喪哭臨以時孝悌之端發于天性衆稍驚異其後兄常攜寓鄉館側聽講說文義粗通然退侶燕朋弛怠不進十四五潛喜哦詩兄使誦杜集頗費日寡益十八九始學舉子賦遽罹兄喪哀痛之情



如失乳哺、如割肺腸、偃偃無相、幾不自立。因從畏友厲德輔肄業紫溪、漸漬稍勝。既冠、迫于凍飢、踵兄故步、授書自給、益發憤自課。經史注疏、且閱且抄、不敢荒逸。竊志古人、務爲實學、時文非其所好、而又無師、屢試不利、決意退藏。尊拜先聖、覬扶吾道、晨誦孝經、以致時思、人多非笑、不之恤也。壯室張氏既得三子、捨館歸訓、鬻田就竭、人不堪其憂。五十九歲、始幸小子應時試入太學、閱三載、遂叨中進士科。其後長子亦廁鄉選、余于是家居寡出、諸兒分寓、歸辦菽水。今既七十、已隨應時滿尉黃巖、還鄉閉門養疴、不交人事、挾策自適。凡余自少至老、備嘗艱阻、不可具言。初侍所後母陳氏、遭義兄陵暴、慨然景念孤臣孽子、竊以舜、曾、閔爲師、承意調諧、各終其世。紹興乙丑、仲兄有重罪、余未諳律令、以身援之、幾併坐縲紲。偶值星變、原赦俱免。其他困阨危難、苦心衡慮、改過遷善、迄能自持厥

躬、不見薄于鄉里。吾家父行享年多止五十、今幸同產次兄七十有七、與余白髮相保、夫妻兒婦歡聚無缺、捫心感舊、粗足樂矣。然余所以行己立心、不忘恭敬、近而冠履、微而紙筆、未嘗輒輕易服用。嘗謂、不能動天地、不足以言誠、不能正室家、不可以爲道。故其在畎畝、未始一日忽忘君民。對妻子、惟恐食息偕違禮教、一言一事、必求合于人情、可無怨悔者、而後出之。其受人子弟之託、教之不啻己子、隨才指授、專事講釋、至老不倦。與人交、不敢失信、廢禮、受侮、不敢爭忿、蓄怨。平居確意安貧守分、不萌非義之求。聞人有善、心恨弗及、見人之惡、口不忍言。自信不移、量力而動、平生謹畏、求寡乎愧怍而已。噫、使余少年微有依怙、不歷屯剝、壯歲窒于理性、不明否泰、未必能操心慮患、固窮順命、亦何以至于今哉。凡吾子孫、勿墜家學、推本源流、念之敬之、此吾之實錄也。余三復而嘆曰、嗚呼、其



可謂躬行篤學、樂道知命之君子矣。凡君平生操履、大概已見于此。而國錄沈君所狀尤爲詳備。余復何所措其辭。至于蓬藿之居陋甚玉川、而門堦戶庭咸有銘勒、簞食菜羹終日不飽、而潔齋整齊如對大賓、子良婦教、孫枝競秀、家法修明、門雍戶肅、下逮僮僕、舉訢訢也。其遺風餘範、至今藹然、亦足以想見其典刑矣。初、君以淳熙十一年太上皇后慶壽恩封承務郎致仕。十三年、上皇再慶、進承奉郎。十五年正月二十八日甲子卒于泰州海陵縣丞官舍、享年七十有五。後應時陞朝、累贈承議郎。張氏、同邑人也、曾大父恠、大父儼、父曰休、封太孺人、享年八十有六。三子、長曰應求、後君四年卒。次曰應符、次即應時也。一女、未嫁而夭。孫男三人、祖祐、祖詒、祖開。孫女五人、長適文正范公五世孫克家。次適宣教郎、知婺州義烏縣丞胡衍。次適里士胡伯韶。次許嫁四明沈嚴曾。一尙幼。曾孫男二、

曰珍、曰瑤。君初葬于燭溪湖潘山之塢、穴頗不安。季和之亡、得吉卜于新奧竹山、始遂遷葬。今將以嘉定改元某月某日奉太孺人之柩祔焉。太孺人質性莊重、雪齋動以古人自律、孺人事之如賓、終始若一日。季和宰平江之常熟縣、號難治、吏民歡服。既滿、橫爲郡將所摺、摭困阨兩期、至開人使訴、卒無一詞、猶被鐫降。孺人曰、但不得罪于公論、足矣。窮達非所計也。閒廢累年、方權臣用事、不肯附麗、求進、菽粟不繼、族黨姻舊皆勉以祿仕。孺人獨未嘗一語及之。曰、使吾兒失節以爲養、不如粗糲之爲甘。蓋不如此不足以配君子、不足以生賢子。孫不足以成禮法之家也。季和不幸、出門軸折、不得究所抱負、以彰積慶。諸孫皆孝友、以承先訓、後其有興乎。銘曰、

德在陰、報必明。活千人、後必興。天人間、響應聲。有篤行、出志誠。子必賢、家必名。偉孫君、真不朋。動以

禮善服膺。不愧作無虧成。廟之璉壺之冰。行于家森典刑。噤不施。闕幽局。過者式視斯銘。

樓鑰撰 《攻媿集》卷一〇七

孫燭武先生壙志

孫燭武先生應時。越之餘姚人也。今爲紹興府。曾祖諱政。祖諱子全。父諱介。累封贈承議郎。某與季和承學於江西象山陸先生。季和由是信此心本善。方相與講切進德。而開禧二年二月甲戌不祿。季和早入太學。淳熙乙未登進士第。爲台州黃巖尉。士民愛之。欲其置田宅留居焉。辭不受。後丞泰州海陵。丁承議君憂。服闋。爲嚴州遂安令。從蜀帥邱公鳩之辟。邑人不得而留。至於哭送。大將有世襲朝廷患之。邱公因其病。使季和往視疾。以察軍情。盛禮十獻。辭焉。復命。以事告邱公。遂奏易他姓。厥功茂矣。改秩知平江府常熟縣。垂滿。太守以倉粟累政流欠三千斛見問。士民陳詞。願共償。不聽。

竟聞於朝。貶秩罷歸。後授通判邵武軍。將赴而已病。歷官至承議郎。後以致仕轉朝奉郎。壽五十有三。冬十有二月庚申葬於縣之龍泉鄉竹山。娶張氏。子祖開。方九齡。三女。長適文正范公五世孫克家。次適宣義郎義烏丞胡衍。葬日薄。嘉言善行不備書。姑識其略於壙石。朝散郎。主管建昌軍楊簡書。

楊簡撰 《慈湖先生遺書》補編

陳君墓誌銘

平陽陳巖。字仲石。自其成童。智之所開。師友問學而已。年進志立。習通性明。服所知於家而宗族慕焉。信所行於里而鄉黨賓焉。意愈高。力愈下。督責其身。不使一日縱於慢游也。奉持其心。不使一思慮雜於邪妄也。訓於經。講於禮者。必欲周於事達於物。不計事之異同。時之先後也。其可見者若此。嗚呼巖也。父之鉅子。弟之任兄。師之傳人。出而從

宦國之修士也夫。如木升而爲材可掄、如玉琢而爲器可縑藉也夫。不幸年三十有五。淳熙十五年十二月四日卒。明年三月、葬於安仁。其弟崇致其父及師之請曰、願有銘。夫悲哀其志意之不及於成就、此師友之所以爲君痛也。道喪久矣、士不修其實職、而皆以必用爲貴、偶不獲用爲憾、志意之卓祇重累焉。三代之時、道嘗行矣。彼家淑其道、人有其善、孰從而盡用之。然則壽夭一也、用捨一也、君之自得以正其命、宜有人之所不及知者。銘曰、卹爾婦、撫爾子、父母之力止矣。止而弗止、斯石紀之。

葉適撰 《水心文集》卷一三

朝請郎通判平江府事包君墓誌銘

君名履常、字適可、姓包氏、孝肅公七世孫也。孝肅世家合肥、曾孫莘徙永嘉之鴈池、是爲君四世祖。祖汝家又徙樂清之柳市、其居城之西洋、則自君

始。孝肅以清節直道爲昭陵名臣、後稍不振。至君少入太學、登淳熙八年進士乙科、人謂且大包氏矣。平生力學、有得於絜矩之一言。故其教授盱江、視士之無所乎館也、則首闢講堂、旣又闢諸齋、增廩生徒至五六十人。其在豫章亦然。御書閣久圯、白于郡、一新之。鄰壤之士、亦相與負笈從君遊。弟子員溢幾數百。其宰吉之吉水、視民之病在於土瘠賦重、則爲均稅之弗均者、而更新其版籍、使吏蠹亡所容。歲艱食、爲請粟于常平、使者振業之、又請于州、蠲其賦。民貧不能輸者、約縣計代其輸。時稱提楮幣之令下、郡欲因以爲功、奉行亟疾甚、他縣惕息、應令亡敢後。君於其間獨務爲安靖、以便民。郡文書朝夕下、君弗爲動。幙府有移書鐫誚者、君報之曰、某書生、知奉法循理而已、寧忤上官以譴去、不敢苟隨也。未幾、守以煩擾罷、人始服君精識。賦粟故即縣以輸、會安撫使領州、下令俾改輸



于郡民病之。君力爭至數四、事爲之止。縣有五都、各結義丁自衛。時黑風羣盜方熾、郡將提兵致討、檄縣發義丁爲犄角助。君曰：義丁爲鄉井設耳、驅之以嬰劇盜、猶羊禦狼也。則移書具言所以不可之狀。檄再下、君執如初、事亦爲中止。縣之俗素狃于訟、少不得志則徧走諸臺。或請懲其尤者。君曰：吾之於事、求其是而已。縣而是、臺猶縣也。非是、可使民有冤乎。由是邑人察君之心、卒亦無反訟者。昔子貢問：「一言可以終身行之者。」子曰：「其恕乎。」己所不欲、勿施於人。夫不以所惡者加人、而以所欲者及人、此所謂絜矩之道也。絜者何？以此度彼之謂也。大學之義不明、汲汲自謀者、知有我而已。物己之室、雖剝民之廬弗問也。參己之欲、雖腴民之膚弗恤也。以君之學、其能卓然有見如此、使得位焉而盡行所志、則功利之及物、其可勝旣耶？君之始仕、得寧海尉、後嘗分教金陵、皆以內艱不及

上。晚得倅吳門、又不幸未至而沒。其將沒也、猶以學之所得者爲從子言之、俾勿忘。其亦可哀也已。君生於紹興甲戌八月二十八日、其終也實嘉定丁丑五月二十四日。明年七月八日、窆于瑞安縣崇泰鄉漁潭之嶼。夫人高氏、宣仁后族也。三子、志鵠、以君致仕恩、今爲從事郎、建陽縣尉。志行、志修、三女、承奉郎薛師憲、從政郎丘吉老其壻也。季未行。君旣葬若干年、而志鵠始以盤洲叟徐君寓所狀事實來謁銘。予雖未悉君爲人、而惟盤洲之言可徵。故予銘之而弗辭。其世系見於水心葉公所爲考君之誌者、今不載。銘曰：

蓄之裕、狹其施。嗇諸躬、後之貽。

真德秀撰 《西山文集》卷四五

### 朱惠州行狀

本貫徽州休寧縣千秋鄉千秋里。朱公諱權、字聖與、年若干。朱氏出顓帝、周封于邾、其後子孫出邑



氏朱。世居沛國相縣。唐末有避地新安者。居歙之黃墩。十六世祖春始家首村。父朝議慷慨有尙志。尊禮名儒。篤意義方。公生而岐嶷。童丠若成人。六歲入小學。一日偶失所業課冊。先生頗有慍色。曰。毋多慮。某能盡默記。乃追寫之。他日得故帙。一字不舛。八歲能屬文。讀書率夜以繼日。寒暑不少替。鄉之南有山曰顏公。其高三十里。上有精廬。館其上。手編諸家易說。凡百餘萬言。作爲文辭。自成機軸。淳熙庚子秋試。遂魁鄉薦。十四年登進士第。授迪功郎。調隆興府分寧主簿。未赴任。丁朝議艱。服闋。調福州連江縣主簿。須次間。工部侍郎朱公晞。顏帥廣西。改辟象州連山縣尉兼主簿。留攝幹官。盡忠毗畫。多所裨贊。慶元五年。以舉主關陞從事郎。調紹興府會稽縣丞。邑當東浙會府之下。三司委送紛沓。判決晝夜不倦。前後連率如辛公棄疾。李公大性。李公浹。皆敬賞之。開禧元年。調泰州如

皋縣。買納鹽場。考舉及格。嘉定七年。改宣教郎。知饒州餘干縣。邑當孔道。敗闕不可爲之數。其至也。適當災歉之時。極力撫字。雖上司督賦急於星火。而以身當之。不忍一毫擾民。百姓感之。相與繪像立祠。十一年。轉奉議郎。賜緋魚袋。十二年。秩滿赴部。朝廷以作邑有聲。差監行在左藏東庫。時金虜渝盟。歲幣積於左帑。幾二百萬疋。浸有損腐。公條具上之。廟堂變通闢闔。因時制宜。朝廷從之。民以爲便。金韃相攻。山東歸附。方講備邊之策。遂陳七事。一曰用人望。夫一世人材自有公望。如漢用趙充國討羌。羌人已知其善爲兵。唐用郭子儀屯涇陽。回鶻見之下馬羅拜。我仁祖用范文正公帥陝西。西賊破膽。大抵人望所屬。遐邇具孚。雖不勞設。施人自悚畏。以其信服有素也。方今荆襄制帥。衆望所歸。則敵人不敵犯其境。間常窺伺。旋即敗退。蜀道前此繹騷非一。及朝廷揚制命。起已試之舊



人付以宣司之柄、則轉亂爲治、易於反掌。是皆朝廷之上處置得宜、則四方萬里、莫敢不服者也。今兩淮重地、防秋及時、倘圖任威望素隆、不減蜀荆宣制之材者、授以制使之權、委以藩籬之重、則九重之顧憂可寬矣。其二曰計戰守、自殘虜游魂、困獸猶鬪、談者每以戰乃危事而諱道、以守爲全計而同辭、是固愛國保民之善意。然自古對敵守境、未有不能戰而能守者。孫氏保有江東、以周瑜能戰而敗曹操於赤壁也。劉氏全有巴蜀、以諸葛亮出師而魏人畏之如虎也。前者殘虜寇蜀、嘗入興元至大安矣、以我師勦其類而後止。又嘗寇淮、犯濠梁、逼安豐矣、以忠義兵擒其首而後退。則是能戰而後守之明驗也。宜明飭宣制司、沿邊諸將、整軍經武、繕甲治兵、如漢將之行必爲戰備、如唐將之練卒常若寇至。平時則防關隘、謹烽燧、明斥堠、固不輕舉以徼戰功。如或虜人犯塞、必更相犄角、

設伏掩擊、出奇制勝、使匹馬隻輪不返、則虜必懲創縮畏、不敢輕於窺邊、而後可以言守也已。其三曰講備邊之至計、前者殘虜寇淮、守臣率多閉壁不出、是致醜類橫行肆侮、旁若無人、驅殺人民、殘破鄉邑、劫掠積聚、焚蕩廬舍。爲守將者如越人視秦人肥瘠、未嘗過而問焉。迨夫封豕長蛇、盈蹙溪壑、徐徐引去、亦不聞出兵追躡。問之則諉以獨力不支、是以若此。嗚呼、是可深懲前失而亟爲後計乎。當蘇秦之爲從也、約六國連衡之衆、以抗強大虎狼之秦、秦兵不敢出函谷關者十五年。夫六國至難合也、蘇秦掉三寸舌猶能合之爲一家、而獲效若此。今以我國家自有之天下、而行吾所得爲之事、宜無不可者。矧殘虜垂亡、不足以望強秦之萬一乎。宜行下兩淮帥司、疾速契勘諸將屯戍之兵、覈其事力方略。有如他日虜或犯淮東、則使某處兵制其左、某處兵禦其右、某處兵當其前、某



處兵掩其後、旣以遏其剽掠、且伺其可乘之時而擊之。其於淮西亦準此規、專命制帥司主其事。設有緩急、立以羽檄、調發所合、應援之處、遣兵會合、如逗留不進者、國有大刑、必罰無貸。規畫一定、則長淮之勢如常山之蛇、首尾相應、虜苟送死、破之必矣。其四曰興屯田之大利、蓋千里饋糧、士有饑色、輸邊一石、費三千鍾。我國家中興、高宗嘗因營田官候對曰、營田就緒、庶可以寬民力。朕頃在會稽、嘗書趙充國傳以賜諸將。孝宗乾道中制曰、欲營軍食之儲、必講屯田之制。尺籍所隸、日有增加、邦賦所入、歲有定類。旣不可剝下以取給、固不若興田以雜耕。此聖明留意屯田之家法也。今戍邊之兵連年不解、轉餉不已、民疲可知。況兩淮荆襄素多曠土、宜明飭制帥司及州郡、並開屯田、張官置局、專庀其事。相地勢、闢草萊、具牛犁、辦糧種、各修實政、毋得具文。春則具墾闢頃畝、耕作人徒、秋

則具稼穡登成、收穫斗斛、詳悉申上、朝廷考其績用之成否、歲入之豐耗、而行殿最賞罰之法。庶乎屯田之利可見、而軍食自此裕矣。其五曰收民兵之用、人皆謂自民兵之分、而民不可使爲兵。殊不知此可言於安寧無事之時、不可言於有警多事之日。如漢晁錯所論、唐李抱眞所行、今不必縷數。我真宗時、陝西歲取邊力人爲弓箭手、而無所給。曹瑋以塞上廢地募人爲之、皆爲精兵。仁宗時、元昊叛、范文正公知延州、點集鄉兵、令刺其手。此我朝用民兵故事也。蓋沿邊之民風聲氣習、剛悍果敢、馳馬荷戈、乃所素習。彼其久居土著、家室墳墓、牛羊耒耜、皆爲子孫之計。憤疾胡虜之心、人皆有之、特患莫爲之倡率糾合耳。官司倘有以一其心力、作其志氣、互保鄉井、誰不樂從。宜明飭制帥司、於荆襄兩淮州郡皆團結民兵、用三丁擇一之法、聯爲隊伍、擇其首長、授之器械、教之戰法。仍行招

誘激勸之道、使樂爲吾用、則其人皆良農也、皆精兵也。不廩於官而數十萬之衆可具、何憚而不爲哉。其六曰堅忠義之心、夫中原遺黎皆吾赤子、彼見天亡殘虜、襁負來歸、國家撫之以恩、結之以信、莫不感激思舊、志滅讐虜。或者乃以來歸者衆、糧餉難辦爲慮。殊不知古人惟患人之不吾歸、未聞以歸我之多爲病。秦民歸心於漢祖、所以創大業、漢民歸心於光武、所以濟中興、故曰得其民斯得天下矣。今來歸者皆山東人、迫於殘虜之虐、爲避災之計、吾惟有以爲之主宰、治有政令、寬其刑役、反其田里、安其生業、何患衣食之不給哉。今忠義之將功效旣著、宜以所得城邑悉使領之、彼得憑國家之威靈、非特建功於一時、且將宣力於後日、垂勳名、保富貴、固所樂爲。其忠於國家、永無窮矣。其七曰定乘機之策、嘗觀戰國時魏使龐涓伐韓、齊遣田忌將兵救之、孫臏教田忌引兵疾走大梁、

龐涓聞之、去韓而歸、齊遂大破魏兵、而龐涓自剄。古之大梁則今之汴也、古之齊則今之山東也。使殘虜不敢爲寇則已、如敢入寇、第使山東忠義之衆疾走大梁、衝其方虛、攻其必救、虜人烏得不速返以護巢穴。返則如龐涓之敗明矣。此安邊破虜之奇策也。十三年正月、差充省試中門官。四月差充御試對讀、仍兼初考官。十四年三月、轉承奉郎、監行在都進奏院。八月、轉朝奉郎。十五年正月、差通判常州、未赴、差知惠州。五月、轉朝散郎。初抵郡、飛蝗甚熾、乃默禱諸神、且深自刻責、乞以身代百姓受害。是夕大雨水漲、明日忽有鷹隼鳥雀以千萬計、相與喧噪、驅蝗赴江而斃。其爲政崇正學、獎善類、先教後刑、勸農寬賦、凡利民之事、知無不爲。一考之後、郡計稍寬、即損己俸以助公帑、自城壁倉庫廨舍橋梁祠廟皆一新之、百度脩舉。是時東廣諸州寇賊嘯聚、劫掠鄉井、或數百爲羣、或數處



俱發、凶焰所至、村落爲墟。其渠魁曰曾官、蘇況等、皆驍勇、一可當百、朝廷屢放省札、下本路重賞收捕。公察僚屬中可委任者、密授方略、且多予金帛、使遣間諜、務知其蹤跡、設伏掩捕。果生擒渠魁數十、赴帥司、梟首傳示、餘黨悉平、一路以安。廣帥應公純之上其功、得旨褒美、轉朝請郎、誥詞云、爾之爲州也、政以安民、兵以除盜、恩威之施、各當其宜。帥臣謂不一之盜、發之他州、而爾能悉取之、使濱海以南、今皆晏然。則爾之功、實被乎數州矣、豈止一境之清哉。姑進爾階、以竢明陟。公拜命曰、戢盜安民職也、其敢言功。十七年龍飛、覃恩轉朝奉大夫、解任而還。郡人惜其去、爲之攀送者數百千人、至有泣涕者、其得人心如此。是歲年七十、嘆曰、吾少赴舉、不減年以欺君。今當謝事、豈宜復入修門。即上章乞致其事。寶慶元年七月、差主管紹興府千秋鴻禧觀。三年六月任滿、再乞致仕、又差主管

成都府玉局觀。紹定二年、累章力伸前請、九月得旨、特轉官致仕、進朝散大夫。因言素癯瘠、間關踰嶺、每自揆不能久于世、今年踰七十、澤及三子、足矣。舉家務以付諸子、所居前挹清溪、喬木脩竹、隱映綠秀、乃即其地築室曰芳洲、樓曰景星、亭曰濯纓、曰拂雲、日與賓客徜徉酬唱其間。四年正月、覃恩轉朝請大夫、賜紫金魚袋。五年五月下汭、忽感冒疾、時長子官浙東、次海陵、季待銓中都。家人招醫、不許、曰、脩促數也。作三書以報三子、不及其他、惟勉以廉潔公勤而已。投筆瞑目、時六月朔旦也。公天性純誠、表裏若一、處己接物、正直而謙和、內蘊聰明、不自表暴。居官清介、常俸之外、毫髮不取。訟牒紛至、裁決如流、不可干以私。服食器用、取其僅足、不務奢華。雖仕至五馬、人以爲榮、其自處無異寒素。訓誨子孫、惟以循理讀書爲急。人有嘉言善行、稱之不容口、未嘗言人過失、喜慍不形於色。

樞密程公卓除工部侍郎時舉以自代其詞曰朱某爲士時嘗讀書蕭寺寺居深山窮谷人跡罕到。攻苦食淡如是者數年出其所學遂魁一郡之士。繼取科第。後生晚進多師承之迹其居鄉心恬氣和未嘗訟人于公庭亦未嘗謀利于私室鄉之老稚起敬起慕逮試邑鄱江以詩書行撫字無迫切峻厲之政有寬裕優游之美邑人相與安之爲立生祠其古之所謂循吏者歟。迺今分職在帑出納惟謹臣知之既詳信之甚篤舉以代臣實允公議。平生大略可見於此嗜學迨致仕不廢方冊待次學者來從不遠千里率百餘人隨材誘掖後多知名之士每言人心不可一日無用昔賢運甓可以爲法平生著述有納言十篇末議四篇默齋文集二十卷藏于家塾初朱氏聚族甚盛然未有以儒學起家者公始入太學登儒級已而分符竹列班行由是族之子弟益知向方姪申從姪況相繼登

科而詩禮之風衍矣公生於紹興乙亥十月十日終於紹定壬辰六月一日享年七十有八娶程氏先十五年卒累贈恭人子男三人長沂儒林郎辟差監紹興府石堰鹽場汶從事郎監泰州丁溪劉莊鹽場洙將仕郎女二人進士吳去非程明其壻也孫男七人錫鑰鎮鑄鉞鑑錡女七人未笄期以紹定六年四月二十二日歸窆首村西山之原一子復居故里皆治命也秘方營卜松岡而孟季朋來示以行述顧居同里仕同朝誼不容辭也乃因其辭列其狀于右俾來者有攷焉

程秘撰 《程端明公洛水集》卷一五

汪居士莘傳

汪居士莘字叔耕休寧人自幼不羈浸長卓犖有大志不肯降意場屋聲病之文乃退安丘園讀易自廣凡韜鈴之書釋老之典靡不究習屏居黃山稍遂高蹈意嘉定間會下詔求言遂三叩天闕論



天變人事、民窮吏污之弊、行師布陣之法、不報。慈湖楊公簡見其書、曰、眞愛君憂國之言也。時朱子召赴經筵、未至。莘逆通書、言財不待先生而富、兵不待先生而強、惟主上父子之間、諸公所不能濟者、待先生而濟。若憚於爲父子深愛之本、而利於爲體貌臣工之末、以是爲治、未有能久者。今日之事、先生建明稍緩、切恐言者已伺其後、是非不能爲天下學道者之地、亦恐不能爲後世學道者之地。朱子深重之、用其言。西山眞公德秀在直院日、嘗欲其俯屈以訪諸賢、其自重如此。徐貳卿誼帥江東、謂其履行素高、移檄本郡、使備書史筆札抄錄著述、欲以遺逸引薦於朝、不果。築室柳溪之上、囿以方渠、自號方壺居士。每醉、必浩歌賦詩、以宣其鬱積。有柳塘詩詞傳於世。

李以申撰 《新安文獻志》卷八七

知巴州郭君叔誼墓誌銘

慶元末、予試吏西川幕府、與郭君幼才爲僚。暨守眉、幼才爲青神宰、戢姦弭訟、崇學厲俗、有治理聲。予嘗以陞陟論薦。其後南海崔正子與之制置四川、辟君巴州、則已迫致事之年、權相持不可。予爲言君之才、開明彊濟、往往精練、少年所不及。況西山爲西南劇、惟才是擇、何可限以常制。相不能難、後果以治理聞。後九年、予論事南遷。君固無恙也。又二年、歸自瀘、其孤允文墨經過予、眎以郭方叔黃中之狀、爲艷然以駭。其略曰、公諱叔誼、幼才其字也。郭氏系出唐汾陽王、後有諱及者、爲廣都令、因家于縣。及兄甫爲御史中丞、葬縣之靈谿鄉。墓至今存。曾王考簡修、妣宇文氏。王考之邵、妣楊氏。張氏。考澤、以公貴、贈朝散大夫。妣楊氏、贈宜人。伯父汾、號冲寂居士、以孝友文學聞于鄉。娶宇文氏、生四子、君爲仲。庶母史宜人出也。大夫無子、取君爲後。氣稟凝重、七歲強記過人、十二能屬文。幼失

庶母至喪冲寂執喪哀甚。已而所後父母即世，公  
煢然自立，與羣從刻苦自勵，有聲在庠序間。淳熙  
十六年，以詞賦舉于成都路轉運司。紹熙三年，再  
舉中類省試。宇文夫人卒，服心喪。慶元元年，始賜  
同進士出身，授迪功郎，監成都錢引務。至六年，始  
領事。蓋君三十八而第，第九年而祿處之晏如。始  
仕如素宦，吏無敢易。一日，使者猝至，問歲出內幾  
何。同列噤無敢對。公引牘數陳，指畫口喻，會稽立  
就。使者奇之。後有欲減新引之料，而以鑿過舊引  
對抄。吏雖知有鏤薄銷蝕之弊，畏上官屏氣不吐。  
公曰：「不言爲愧，言爲罪。」寧罪無愧。力陳其事，退又  
白之餉所。令下，果詰所從。部使者始不能容，以鄉  
嫌去。兩易漢州綿竹主簿。朝廷復紹興舊制，命試  
教授。公中其選。參知政事李公壁爲守，檄攝理掾。  
事有盤錯，輒引與謀議，讞議稱允。改眉州教授，改  
辟東川簽書判官。用舉者改宣教郎，知眉州青神

縣。首推權酷以遠利，攷覆簿書，分泄銷注，以杜重  
催豫借之弊。兩造在庭，促席咨訪，立爲剖決，獄無  
滯囚。邑無冤民。通判簡州，一再攝郡事，節費助邊，  
爲緡錢三十萬。通判瀘州，攝安撫司機宜文字，修  
城埤，積倉斛，復養濟院，皆與有勞。會巴有劇盜，大  
爲一方患。始至，大明賞罰，盜賊屏息。潰卒過境，執  
拘以歸，制置司、巴境用寧。廩人以其羨二百石獻  
于州。公即以實常平之虛數，絕饋獻，希宴遊，不飾  
廚傳。考試類省，崇雅黜浮。四年不代。有懷歸意，會  
得怔忡之疾，遂致其仕。以慈明慶壽恩封朝奉大  
夫。尙羊林下者八年，以壽終。實紹定六年六月八  
日也。年七十有九。自號肖舟老人，築室藏萬卷書，  
皆手所校讎。遺文有雜著八十卷，肖舟詩藁二十  
卷，理學語類三十卷，續通鑑長編增添綱目二十  
卷，溫公通鑑評三卷，藏于家。元配費氏，贈宜人。先  
三十一年卒。繼室費氏，封宜人，亦先三年而卒。子



四人允成、允行、皆將仕郎。允文、允久、皆業進士。允文以後叔氏女二人、長適貢士費伯午、次適儒林郎、監懷安軍珍多鎮酒稅費伯英、內外孫十五人。端平二年三月甲子、葬于縣之靈溪鄉震山、以費宜人祔。君氣雖勁而心則厚、事親居喪、鄉黨有聞、推田廬以畀同產弟、所至與俱、易職田以周外黨之乏。不尙苟同、雖壓以達官貴人、遇所不可、慷慨論辯、不爲勢屈。人或以執拗目之、不知其惟是之從也。而嘗以謂二氣五行流行於天地間、雖曰厚薄殊稟、剛柔異劑、然陽勝者多勁直、陰柔者多委靡。世衰俗壞、士大夫依阿苟容、氣使莫敢異辭、雖梁丘據之可否、滔滔皆是、故於君之事有感焉。銘曰、

德而度、其守維固。執而求、靡迹之留。其行若流、其止若休。靈谿之幽、我銘孔昭。

魏了翁撰 《重校鶴山先生大全文集》卷八三

雒縣丞章公寅臣墓誌銘

予少之時志於博識、自書契以來數千百載、往往貫穿淹該、引筆書紙、或爲人稱誦、然不必盡協古人槩獲也。年十有七、從鄉先生章公游、先生必迪以義理、語輒心解、似不以凡兒畜之。予益奮然自愧。慶元五年、先皇帝始策進士、予猥綴科目、涉歷中外、凡二十餘年。先生始舉進士。先是淳熙十六年、先生以詞賦舉于鄉、嘉定四年再該免舉恩、與樊武仲庚、譙仲父仲午、賀春卿東寅及予弟文翁偕試于類省試、四人咸在選、先生獨被黜。又三年、與予同產兄高南叔稼、西叔崇、周宗澤巖舉、韓子獻季壬四人偕試、又獨遺先生。得失雖不足深計、而命實有制焉。又三年、當嘉定九年、始見錄于有司。明年唱第廷中、調眉山縣主簿。每謂官無卑、皆足以行己。爲簿正則稽民版、扼吏姦、攝校官則明義理、勸孝弟。再轉雒縣丞、則審券劑、明簿書、受米



粟之征、則平槩量、削贏餘。所居見稱廉平。耆講學、雖事劇不廢紬繹。耆儲書、雖家貧必畜經史。爲詩清婉而深醇、自陶杜訖蘇黃、諷詠弗置。尤善茗飲、不以酒亂德。予自潼川召爲郎從、得先生書、貧堅老壯、將歸就而正焉、而先生年七十以疾卒於官、實寶慶元年七月乙丑。是冬、予亦以言事徙湖北之下缺。

魏了翁撰 《重校鶴山先生大全文集》卷八二

校記

①忘：原作「亡」，據正德本《西山先生真文忠公文集》改。

②遷：原作「還」，據四庫本《鶴山集》改。

③代：原作「伐」，據右引改。

④八日：原脫，據右引補。

宋儒碑傳集卷一百六十九

時瀾 高禾 李鶚 李友仁 曹彥約

方其義

通判南堂時公墓誌銘

嘉定十五年夏五月望、南堂時先生卒于官。天台之民慟惜、四方士夫交吊。越三月、其孤棻以書抵其友陳某曰、先君師事東萊先生、所與交皆名人、今存無幾、相知深者無如子、子其爲我銘。某自唯寡陋不敢當、則又顧辱公之愛、深哀諸孤之請誼而有禮、不忍辭謝、勞使者往返於千里之外、益重得罪、眦勉承命。嗚呼、尙忍銘公。公諱瀾、字子瀾。其先開封人、後徙居東陽、家世業儒。曾祖諱煥、妣曹氏。祖諱汝功。妣郡氏。封太安人。考諱鎰、贈朝奉郎。妣張氏。贈安人。公生紹興丙子歲、天姿卓絕、自束髮承訓嚴父。少長、東萊一見異之、試以文、援筆立書、纔數語、東萊曰、足矣。由是親重之。公侍學左右、

未嘗一日離。一時學者以文請誨、屢相接戶外、東萊指其瑕瑜、必使公見之、迨諸生退、然後課公文、率至夜半乃寢、不以寒暑風雨變、如是累年。故公得於東萊者爲深。門人自以爲不及。登淳熙八年進士第、授迪功郎、監潭州南岳廟。刻意問學、不汲汲於祿。時故相周益公位西樞、以汲引人士爲己任、聞公至、握手談議、戒門□以時納索、索公文至、史論稱嘆久之、乃言於王丞相。丞相愧公不來見、銜之。公曰、我之見否、何足爲相君軒輊耶。十三年、用高宗慶壽恩、轉脩職郎。東萊卒、朝奉公亦卒。公懼曰、旣喪父、師爲學力倍功。半、惟此時爲危。乃益堅苦自持、居喪纍然盡制。調溫州天富鹽官、郡侯雅敬公、檄攝郡文學。生徒間有不居學而靡廩食者、公繩以規、不聽、自罰俸以礪之。有孫其姓者在罰中、挾貳車以請免、公不爲變、貳車怒、窘以鹽事。公懷鹽官印趨庭納之、不脫衣而去。貳車告郡侯、



率同寮人士數十百輩邀追踰數十里不可而反、郡以聞部使者。庾使陳杞奏請罷之、報可、調邵武軍泰寧尉。皇帝即祚、公上書言事、呂公祖儉特加敬嘆。試教官中之、戴公溪誦其文曰、周易之文也。改教授臨安府學。養士以九十人爲限、而分四方求者常數倍、朝廷優京庠、率三歲許就大學試、補者七百餘人、往往挾戚里臺諫以進、公悉以禮法裁之。廷臣請不許用舊籍之士以革冒濫、公喟然曰、舊籍可盡去乎、苟守公道、何間新故。爲條上其事。自朝至□、升黜去留纖悉詳盡、人服其公。分教西外宗學、宗子以千計、聞公名不勞教飭、兢勤以勸、宗長之子執經座下、旦旦授業不釋、由<sup>③</sup>是取科第者比他舉獨盛。諸公交薦、適有爲禮部者欲薦公、公不悅、會遷中司、倪公思代爲禮部薦公、公乃喜曰、吾不喜職司之薦、喜出倪公門下。改秩知寧國府寧國縣。或有以邑弊不可爲語公者、公曰、安

有不可爲之邑、其身不正、是爲私罪、私罪斷不可有也。催科政拙、是爲公罪、公罪其可無乎。於是舉大義、立大信、大書其楹曰、刑罰如加諸身、賦歛如取諸己。手疏諭民、不移文催租、約民自輸。有吏乘間賂欺、公覺、不正吏罪、自咎不明、榜通衢謝民。邑爲鄉十五、其二吏循舊稱頑鄉、公警曰、吾知其良而已。削去惡名、其鄉感奮、課反出諸鄉之右。漕臣以爲有古循吏風、薦之。秩滿、故事爲邑有治狀、率陞朝著、爲獨謁吏部、得佐袁州。至則戒吏毋得下縣、日與守、搏心惠愛、一郡大治、民歡呼于道。終更、再佐台州、到官踰年、如所以治袁者。一夕、不病卒。初、東萊以文詞博洽聞於乾道、淳熙間、四方學者雲集、往往取科第致聲譽、世多以文宗目之。及攷其問學、卓然以孔、孟、周、程爲師、于時南軒張先生、晦庵朱先生各以道鳴、講貫精而理義明、東萊實與之友、問難往覆、更相發揮、世所謂三先生者。故



其教人不專以文學、而道德淵源之懿、其徒有得於心、傳躬踐者固已多矣。東萊卒、其徒謹守不失、孝於親、忠於君、信於友、敬事愛民、見於從政、而伏節死難、出位敢言者、咸推東萊之門、豈其效固見於今日耶。公其上弟也、故平生立身臨政、剛正不撓、動遵禮法、天經地義、人道綱常之訓、未嘗不諄諄於口、孝悌忠信、禮義廉恥、未常不以詔其子孫。在家悖悖、如對大賓、盛暑必冠必襪。見人善則稱誦、若己出、不善不肯視其面、以故君子皆愛之、而見嫉於人亦不少。聞朝廷一事得失、則爲之喜、懼累日。尤拳拳於孟氏守身之說、待其身甚重、持其身甚嚴、嘗曰、守正之中無地不穩、求穩之中懷賢爲最、理以遷延而差、心以委曲而巧、常於實地上用力、實之一言、公所自得者也。以公之實行、驗公之實得、自始仕至改秩、未嘗降詞色於人、屢更世變、或欲誘公進取、冀公持循之隙、中以榮利、公屹

不動、卒自保其身爲全人。臨終危坐、整冠而逝。嗚呼、公可謂君子儒矣。自號南堂拙叟。積階至朝散郎。配郡氏。先公三十二歲卒。贈安人。繼室滕氏。封安人。子男四人、棻、鄉貢進士。集、更名務、國學生。梟、秉皆習進士業。某爲西宗寮時、嘗見公諸子環立、倍書爲樂、長幼雍如也。女六人、適阮穎之、莊維之、何煥、祝開元、徐士榮、劉衡。先是、女兄弟五人及女凡十一、皆公縮衣食爲資以嫁士人、無失時。孫男二人、光、燮。冬十有二月乙酉葬公于惠日鄉九里原。有南堂雜著若干卷、易講義若干卷、左氏講義若干卷、用錄若<sup>⑤</sup>干卷、日記若干卷、藏於家、蓋本六經爲法。韓文云、銘曰、人必於天、公必於己。唯道是殉、死而後已。蚤歲決科、筮仕云始。義苟不合、毅然以逝。分教天都、請託城市。權要耦入、壁立如峙。出宰宣城、書楹自誓。曰、征與刑、髮加必耻。政譽旣升、華貫可跬。再謁銓曹、

佐州是擬。于袁于台、厥績甚偉。化行於家、令妻孝子。六十七年、玉雪莫比。得正而斃、尙復奚俟。有鬻新封、過者必起。

陳必撰 《復齋先生龍圖陳公文集》卷二二

兵部開國高公墓誌銘<sup>⑥</sup>

士之儒業者常乏吏才、重厚者常不足於通敏、蓋稟於天者有偏重、兼全兩得、少見其人、自古然也。若德行詞章源流深遠、才謂政事鉅細融明、近世兵部高公是也。公諱禾、字穎叔、其本系出炎帝、世居廣陵、號著姓。五季入閩、家于泉州之晉江安海。曾大父建創義塾、幣<sup>⑦</sup>鄉先生張公登、江公致堯淑訓子弟。大父汝礪、少馳庠序、譽不仕終、家人以爲瀕報於後、以二子贈至正議大夫。伯父倬、登紹興八年進士第、歷封川、恩平兩郡守。後十九年、父伉與仲父似聯名決科、任朝請郎、臨漳通守、累贈宣奉大夫、妣碩人蘇氏。公幼有成人器、見伯氏故侯

官宰、獲以儒科發身、曰是不可<sup>⑧</sup>。於吾身、使前美不世。益戾契自力學、蚤入成均、兩貢南宮。第淳熙辛丑進士、筮尉莆田、以計獲海寇十有五輩。紹熙初、改京秩。俄碩人訃至、卒喪、知福州福清縣、撙節浮費、儉出薄入、儲蓄餘羨爲緡錢萬者二、欲創義倉、代貧民下戶輸宿逋。志未竟、丁宣奉憂去。五年、調撫州崇仁宰、不上、改知興化軍仙遊縣。縣有妖巫能作神語、一咻千煽、公亟捕姦渠置之圜、民聽不惑。邑五里溪名下頓、衆流所匯、歲有溺死者、鞭巨石爲梁、往來便之。開禧乙丑、調官中都、時揆路叙研席舊、擬留中、公亟授婺女倅以歸。嘉定更化、權黨竄斥、人以爲知機。婺近神臯、素號浩穰、不可爬梳、累年滯訟、民至是多詣台省曰、倅清彊不媚、願從之直。諸司具以名聞、被旨攝郡。會朝廷遣回新招戍兵、命以常平義倉米廩之、衆不樂陳腐、隕然白庭下。公方退食、但諭使歸營、許明日易以州倉



米皆欣然而退。公倉卒處事不少瞬。三年七月，知惠州，遲次二期。惠陽面江，巨潦暴至，侵淫千餘家，以便宜發廩賑濟。郡境歲有贛客之擾，首命屬縣籍總首鄉丁姓名、圖材落，相距近遠，使之相唇齒手足。一鄉有警，揭望伐鼓，四面赴敵，賊果退縮。廂禁軍諸縣寨卒多張虛額，公悉招刺。初，河源有盜，縱掠鄉落，尉捕不獲，反執土民，擲<sup>①</sup>撫鍛鍊以徼倖。公至，獄未具，引囚庭問，灼知其情，縱之，莫不感泣。仍上其事，奪尉官。海豐之西有楊桃、大奚二嶺，群盜出沒，神見鬼伏，公仍其地列寨居兵。又以叱馭石壁二菴相距四十里，廼於鳳河水步間剪棘夷道，別治一菴，過客始無追程盲進之恐。自是，道交廣者如履畿甸內地矣。書初考，改畀南廣琛節，條上便宜六事，朝廷施行之。屬吏有恃爲權要私人者，贓汙狼籍，彈奏罷之。自互市爲東廣鹽使者，力卻例錢餘二千緡，公使公用，二庫視舊比裁三之。

二、增鹽課錢以緡計者六十萬。時峒寇嘯聚，帥司掩以兵，類以軍法從事，復生擒百餘人，將斧之，公疑有冤濫，曰：「監司於事無所不當問。」亟馳白帥，全活大半。屬郡常平錢米多仍虛數爲具文，遣吏按視拆閱者，刻期足之。總一路爲緡錢一十九萬九千五百有奇，米以石計一十六萬九千六百有奇，金銀以兩計四千四百有奇。既覈實申朝省，因曰：「後之人更能防滲漏，時斂散，民其有瘳乎？」是時公踰嶺已三年，丐閑不報，且命入奏辭以疾，復有旨趣行。九年七月到關，奏曰：「臣竊見嶺南爲郡數十，蠻獠黎獠錯處其間，彼其飢食渴飲，好生惡死，豈與人異情哉？特州縣長吏治之不得其道耳。一曰：恩不足以撫摩，二曰：威不足以攝服，乞戒飭監司，嚴察守令，時有寬貸，無繩束過甚，以激其亡聊之謀。至於置戍兵去處，亦不必太密，宜合五爲一，要使聲勢聯屬，隱然足爲吾民之保障。如是，則二廣



之民可以枕<sup>①</sup>矣。居亡何、擢丞匠監、未幾遷太府寺丞。十一年正月、改大理正、會彌年天獄空、降詔獎諭、卿少以下各轉一官、公請長貳辭增秩恩。七月、除兵部郎官、上殿、尋陞郎中。時長貳缺員、軍功第賞文帖以萬計、采摭實狀、獨力當之、不煩以僥。武部所掌闕次、多蒙成吏手、乃前期揭于外、資格配者聽其注擬、胥獮莫售。十二月轉對、曰、天下之患、莫大於規模之不豫定、而倚辦於倉猝目前者、率多噬臍不及事之憂。上首肯之。以疾謁告、因力丐祠。嘖有煩言、無隙可抵、遂有議幕之命、朝紳冤其去。既歸、糞掃先廬之東、闢小圃、堂於其中、扁曰族桂、據幽發粹、日與之娛。性不嗜酒、晚益工詩、務爲和平不刻削。十三年、主管成都府玉局觀、寶慶改元、騰章請老、感微恙、若有所覺、曰、生死晝夜、吾豈每<sup>②</sup>生也哉。謝醫屏藥、以五月丁亥終于正寢、享年七十、積階朝議大夫、爵晉江縣男。娶安氏、故司法

撫之女、先公二十九年卒、贈恭人。再娶陳氏、故左史研之女、先公十二年卒、封安人、贈恭人。男三人、長漑、次濤、次濂。女二人、長適留元度、魏公之孫也。次許楊公濬、文昌之孫也。孫男三人、述翁、適翁、迪翁。遺文有愛、閑居士集若干卷、藏于家。以三年十月庚申葬。公端方而重、和易以莊、色夷氣清、可畏而愛。始微有知、則知學問、月開日益、卓然早茂。宣奉公倅臨漳、文公朱先生時綰郡符、公執子姪門弟子禮卑以恭、文公深器之。義利之間、辨析杳微、非所當得、一介不取。待人接物、婉婉若處子、或意外干以私、正色拒絕、雖賁育不能抗以角。歷州縣、持使節、閩廣之人至今皆曰、於我有德。其在監寺、兵屬、祇謹自力、事以幹治、爲朝聞人。當官薦士、其才可拔、不以其人寒賤不與、即不可拔、雖大官要人交口、一不以綴意。性勇於赴義、尤樂周人之急。有鄉人遊宦落以死、其孤孱弱無依、公率諸司合

力賄之、以舉其櫬。女弟適教官鄭其卿、相繼而逝。甥尙幼、以子鞠之、且爲擇婚。外弟早世、棄側出子、而子異姓爲子、公力執不可、外祖之祀賴以不絕。至於居室湫隘、終公之身、未嘗私易一椽、是可以爲知道義、先人後己者矣。某年十四五時、侍先公正獻、則聞公父子之賢、晚歲班行、嘗尾簪笏。凡四十年間、自少至老、固已得公閱閱十之六七。公之歿、其孤以公行狀見屬曰、子與吾父通家兄弟行也、子不可辭。某曰、誼雖不敢辭、旣不能文、又四五年來病日甚、以不能文之人、運凋耗之思、將何以模寫公之盛美、不固辭得乎。則又介親黨以書見督、於是掇行狀餘意爲之銘。銘曰、

公之曾祖以儒鳴、創爲義學、士行興。一門五桂相竝榮、父傳厥子弟聯兄。童丱書數長六經、耳目濡染與性成。才識卓異少可驚、四世奕奕皆朝纓。怡怡笑語輸忠誠、身不勝衣義色形。兩宰劇邑咸有

聲、關決輔郡薦牘騰。遍持南海節與旌、泯獠去害樂寬征。晚潛臺郎掌伍兵、飛鳴一去高冥冥。德全才鉅世莫京、世著令聞垂典刑。有不吾信攷諸銘。

陳宓撰 《復齋先生龍圖陳公文集》卷二二

### 李雄飛墓誌銘

雄飛、慶元奉化李氏、名鶚、雄飛字也。乾道中、吾友楊子嘉授徒里中、雄飛師事之。余時時往訪子嘉、因識雄飛、見其氣貌之深厚、學業之精專、而知其不自菲薄也。旣又從太學錄沈公、今將作監楊公學、雖余之淺陋、亦受業焉。雄飛家于金谿、沈公嘗曰、吾觀此地、山川未爲奇麗、而人物秀出、乃有若雄飛者耶。雄飛工詞賦、作策言當世得失甚辨、決科無難、而試每不利。退而誨其徒、乃有得雋場屋、至于擢第者。余然後知雄飛藝而不售、蓋有命焉。曾祖晟、祖崇、父鼎、母王氏、三世俱不顯、而乃翁隆于教子、其徙城中、便二子之從師也。雄飛發憤讀



書亦欲仰副親意。力學精思、一語不輕發、始若難合、既久相與乃厚、共學者咸愛敬之。事親不有私財、執親喪惟謹。戶部尙書李公時倅吾邦、欲遣其子就學、一日訪焉、端憂遜謝、不敢以衰服見、李公歎美而返。余讀孟氏書、有天爵人爵之辨、且曰、人之所貴者、非良貴也。三復其言、乃知良貴在躬、人爵不足多羨。雄飛隱約閭巷、而取重當世、是必有優于宦達者矣。嘉定八年五月戊寅、以疾終、享年六十。娶何氏。子四人、泳、灝、洙、瀛。女一人、適進士周某。十年正月丁酉、葬于金谿縣鄭嶼之原。泳走京都乞銘、考其平生、誠有可記者、余不敢辭。銘曰、維貴與賢、所得孰多。賢而不貴、命也奈何。無慊于心、足以不磨。

袁燮撰 《繫齋集》卷二〇

李叔文墓誌銘

予先君子雪齋先生躬行古道、教授閭里、時俗往

往、訾其闊迂弗好也。同縣李公文仲、賢長者、晚知先生名、延致家塾。每聞講繹聖賢言行、常大喜、飭其子叔文惟先生聽。叔文雖穉齒、有奇識、尤樂親先生、謂不欺我。先生歸、語家人曰、吾乃得李氏父子爲知己。予自是與叔文爲兄弟交。今三十七年矣。後李公遠宦、叔文輟學、已而嗣事持家、先生有書戒勸、必寶藏之、而終身敬誦之。先生之喪、縞冠送、哭甚哀。嗟乎、道喪俗薄、而叔文獨能尊師重義如此。叔文今死、諸孤託予以銘、予其忍辭。君名友仁、叔文其字也。世家越之餘姚。曾祖諱尙、純篤君子、五上禮部、官邕州太平主簿。鄉人紀其陰德。祖諱翊、贈宣教郎。考諱揚、伯祖贈奉直大夫諱欽之子、爲宣教子、終訓武郎、東南第六副將。李氏自奉直豐於財、而子孫多以學知名、爲望族。叔文氣志不在人下、自恨不竟其業。或曰子欲仕亦易耳、笑而不答。叔文天資通敏、而循循如有畏、樂易不拒



人而疏密淺深有節。謙厚遜弟、雍容儒雅、所居闢池館、列花竹、左右圖史、間以觴詠、蕭然無塵俗意。造次尺牘、必手書細字。聞人有善、喜見顏色。處兄弟、嫺族鄉黨之間、親而不瀆、遠而不乖、省事避禍、足未嘗及訟庭。治生不浚利、不兼并、曰、無墜先業足矣。委人以財、或十餘年不覈其贏縮。家事井井有法、豐於奉先、而儉於妻子。遇下有恩、不妄施、予以徼福沽譽、然所當周、周之無靳也。擇士教子、不責近效、久而益厚之、曰、利達有命、能使吾子寡過、斯其爲益宏矣。從父兄臨江守叔益有令德、每器叔文、事必咨而後決、曰、吾家心友也。如叔文平生本末、使得施之事業、必有大可觀者。嘉泰三年秋、不幸得末疾、然神氣清明、處事如平時。明年八月二十七日、竟不起、壽止四十有九、哀哉。娶同縣胡氏。四子、自強、自牧、自明、皆業進士。季曰嗣孫、先君一日卒。四女、長適朱點、寡居。其次後君三月卒。叔

季及孫女一、尙幼。叔文先營壽藏於蘭風鄉曹隩之麓、實先大夫墓之右。其年臘月丙午葬焉。銘曰、嗟嗟叔文兮吾友生、早服師訓兮慕躬行。志不充兮聞不章、美厥家兮善一鄉。疾弗赦兮命弗遐、天茫茫兮悲奈何。從而先兮歸九原、鍾餘慶兮在子孫。銘不誣兮永長存。

孫應時撰 《燭湖集》卷一二

寶章閣學士通議大夫致仕贈宣奉大夫

曹公墓誌銘

公諱彥約、字簡甫、南康軍都昌人。嘉定九年、了翁與公分乘使傳于蜀道、爲忘年交。上踐阼踰月、召公及眞公德秀、鄒公應龍、公以明年二月入見、又得同侍上左右。公嘗經帷進讀、三朝寶訓至太宗取士、章聖選官皆以德行為先、乃言曰、古人以德行為才、十六才子自齊聖廣淵、明允篤誠、忠肅恭懿、宣慈惠和、凡皆德行之所發見。後世以欺詐暴

虐爲才、如狄之鄆舒、晉之知伯、齊之盆成括皆以才稱、卒於敗事、其實小人、本非才也。了翁聞而嘆曰、義理之不明久矣、程子言才稟於氣、氣有清濁、稟其清者爲賢、稟其濁者爲愚、然後知無不善者性也、可爲善者情也、苟無其才則徒善不能以有行。又嘗以是觀諸近世、如先正大老以誠心實德綏靖家邦者才也、以正學卓識統承洙泗者才也、以深醇爾雅丕變文弊者才也。若口道先王語而聚斂以剝下、深文以殘民、開邊以殄國如王、呂、章、蔡、而尙曰才之云、則吾曹公之所耻也。公以孝友著于家、以忠信得乎朋友、以豈弟行諸郡國、以忠忱格於君父、嗚呼、公之所謂才、非公不足以當之。公之先避唐末之亂、繇宣之南陵徙都昌之龜山、自龜山後十有二世、皆以經行稱于鄉。曾大父克、大父敦禮、皆不仕。父興宗、故左從政郎、鄂州司理參軍、累贈光祿大夫、妣黃氏、封太安人、贈齊安郡

太夫人。公少邁爽、六歲而孤、知哀戚。年十八後、三與賓貢、擢淳熙八年進士第、授廣德軍建平尉。丁齊安憂、服除、調桂陽軍錄事參軍、改辰溪令。未上、又辟司法參軍、改宣教郎、知饒州樂平縣。秩滿入都、會擇邊守、政府以公應詔、主管江西安撫司機宜文字。開禧元年、以前詔差知澧州、未及上。明年、端明殿學士薛公叔似以湖北宣諭升宣撫京西、湖北、辟公主管機宜文字。其冬虜圍襄安、遊騎至漢陽軍、盜賊蔽野而軍、闕守、以公攝事。至軍未幾、虜大入棗陽、信陽、而襄陽將帥內自相戕。公絕江見薛、勉以持重。搜土豪得許嵩、俾總民兵。趙觀、俾防水道。党仲昇、俾將宣撫司軍屯郡城。十一月乙未、虜兵重圍安陸。辛丑、遊騎闖漢川。公授觀方略、俾漁者拒守南河。十二月丁未朔、虜騎至南河之北、觀逆擊、斬其先鋒。虜造戰艦、觀火之。大軍繼進、自十二月辛未至三年正月丁丑朔、晝夜殊死戰、



北渡追擊、虜自是不敢近漢陽。時安陸被兵已久、羣盜蠭起、公命仲昇、高擒捕、皆駭散。三月、以守禦功進秩二等、即授漢陽。宇文公紹節代吳公獵、爲宣撫治鄂、兼領江陵、公言、不築棘陽、不足以守隨、守隨而德安安矣。不築信陽、不足以守安、守安而黃安安矣。不築神馬坡、樊城、不足以守襄、守襄而光化安矣。且言沿江師少、和不可恃。又謂、京湖之勢、以鄂渚爲腹心、以江陵、德安爲兩臂、其餘猶十指。襄州雖大、不過駢拇巨擘耳。今若順腹心、臂指之勢、則宣闔不當兼江陵、若都統制在襄、則副都統當在江陵。所論皆切中事機。嘉定改元、詔求言、公上封指陳剴切。會紹節以公政績聞、詔任滿與監司差遣。八月、除荆湖北路提舉常平茶鹽、會鄂州與湖廣總領財賦皆闕、以公攝事。首劾貪吏、罷廂官受訟、還富民椿糴之穀、勸以減價出糴、免荻場經量悉歸諸民、蠲米穀薪炭之征、歲不下數萬緡。

代償前官市物緡錢。以舟運敗者千數、株連瘐死、公取開禧二年以前負者悉蠲之、餘各有差。先是、公初領常平事、每以湖北旱蝗爲慮、亟言于朝、丐糴以備春旱、又乞假鄂帑官緡以貸下戶種糧。明年旱三月、公由鄂還治常德、下教列郡、選僚屬二人興發勸分、具有科條。澧州奉行不虔、逮吏鞠之、一道皆聳。十月、改提點刑獄。十二月、改湖南路轉運判官。先是、開禧三年、盜起郴而桂陽吏不以實聞。桂陽當湖南、江西、廣東三路之脊、山川險絕、盜窟其間。江西羣不逞相挺而起、東踐吉、南安、西逼郴、衡、南蹂韶、石、北抵攸、環數千里盜區。朝廷調江鄂軍、降勅榜、捐官資、緡錢、名捕渠魁、累歲不得要領。而江西專以招安誨盜、詭降覆出、朝廷患之。公以壬午被命、甲申上道。三年正月庚寅朔、領漕事于益陽。時賊已破安仁、茶陵、桂陽三邑、迫攸縣、長沙洶懼。公親至攸督運、人心乃定。會帥去、以公攝

事朝廷下江西招安之請于帥司、公謂犯衆怒、損國威、持不可。三月、除直祕閣知潭州、荆湖南路安撫。公規置稍定、乃督諸將逼賊巢而屯、賊李新敗死、李如松、鐘安誠、李文傑稍稍出降。時郴盜李孟一謀攻桂陽、公趨屯命諸將分禦、賊知有備、乃間道突韶之樂平、公命守隘俟其歸。越三日、賊夜登百丈嶺以遁、公移軍蹙之、賊大潰。官軍焚其柵、遁入頂頭寨、又圍之。渠率李元礪率衆數千來援孟一。先是羅世傳與元礪有隙、密請于公、乘其出穴而攻之。公錄賞格以報而供其乏、世傳果擒元礪以獻。公以除夕還長沙、四年正月庚寅復出督戰。二月戊午破頂頭寨、生擒孟一、餘黨悉平。世傳恃功桀驁、池州都統制方深交之、欲委世傳盡統前後洞、悉撤湖南、江西兩路之戍。公固爭不可、宰士不悅。九月、世傳猖獗如公所料。公白于朝、俾許國糾合前後洞丁討平之。公以衡之水口、郴之青要、

桂陽之上猶皆要地、而闊遠不相應援、朝廷用其議、析茶陵、桂陽、郴縣諸鄉置鄆、資與桂東三縣、移潭、衡州禁軍闕額衣糧以召募土丁、省冗員以選辟令佐、至今便之。以功進直龍圖閣。五年春、以吏部郎官召、而謗書浸聞矣。六月上印還家。先是時相之弟守潭、兄子守士、已而盜起、躡吉搖潭、遂以公與王公居安代二郡守。盜平第功、嫌不便於前人、故二守之賞不及而歸。後反以煩言罷免、此於公奚損、而朝廷黜陟之權病矣。公慶元間由龜山徙居南康城下、既又得地數十畝於城東三里外、爲圃曰湖莊、築室讀書、罕至城市。時宰語人曰、人言曹長沙與人爭功、二年無一字至廟堂、此豈競進者耶。七年、忽被命主管武夷山冲佑觀。八年、以元職除利州路轉運判官、兼知利州。明年關外艱食、公先以本司所儲減價盡糴、又輟緡錢賑贍、勸分免役、通商蠲稅、旬僧牒于朝、告糴于鄰路以濟。



公憂蜀邊、著病夫議以風、大抵謂制總節制三司、權分而議不一、知事者不敢任事、畏事者常至失事。領帥權者當近邊境、當擁親兵。有兵權者當領經費、當寬用度。其他如訓忠義、覈間探、條理甚詳。厥後四川制閫雖暫徙利州、而兵財異掌、卒莫能合。是歲秋、命董四川類省試、訖事以病求歸。十年二月、差知寧國府、尋命守瀘州、而公已出峽。八月、差知隆興府、江南西路安撫。會江東西大旱、公入竟、罷吉、撫州糯米糴本鹽鈔、不以賦民、遣吏鬻之淮東、糴及時而民不病。十二年、蜀邊被兵、朝論以病夫議善識時務、且因蜀人之思、五月乙未朔、除大理卿、壬寅除權戶部侍郎。公力辭、未報。六月辛巳、除寶謨閣待制、知成都府。公體朝廷選用、不敢禮辭、乞赴闕奏事、不報。再移書廟堂請對、權相憚其來。八月甲子朔、改知福州。公且行且辭。十月丙子、以集英殿修撰知潭州。公再上祠請、乃得提舉

亳州明道宮。十四年冬、提舉常德府桃源萬壽宮。明年正月朔、除煥章閣待制、提舉嵩山崇福宮。泊上訪落、以公爲兵部侍郎、兼同修國史、實錄院同修撰。三辭不獲命、謁告踰月。寶慶元年二月入對、首勸上講學、防近習乘間。次言當以慶曆、元祐聽言爲法、以紹聖、崇觀諱言爲戒。卒言祖宗愛民之意、上通于天、宜敕邊吏、不當效尤醜虜、結怨吾民。上嘉勞再三。會下詔求言、公封章言、給舍欲正君臣之分、而陛下宜自伸兄弟之恩。時朝廷方以言爲諱、故公及之。九月、兼侍講。未半月、除禮部侍郎、兼職依舊。二年六月謝病、除寶謨閣直學士、提舉佑神觀、兼侍讀。公求去愈力。三年、除兵部尙書、力辭不拜。四月、除寶章閣學士、知常德府。陛辭、勸上以修身講學爲要、獻唐張蘊古、趙師民三箴、請圖之坐右。且奏求言雖切而下情猶未通、愛民雖勤而橫斂猶未革。上曰、其病安在。公曰、臺諫專論人



主不及時政、下情安得通。苞苴公行於都城、則州縣橫斂無可疑者。時權相專忌、人以公言爲難。公又奏夷狄盜賊之患、惟在處置得宜。一曰守道、二曰固本、三曰通財、四曰稽衆、五曰愛民。上顧問五者何先、奏曰稽衆爲先。是日經筵進讀高宗寶訓、徽章、公辭錫賚弗許。辭常德之命、又弗許。五月、再提舉嵩山崇福宮。公還故居之上隴、貿賜金、會宗族、病弗已、自草遺表、其略云、望陛下精勤務學、恭儉修身、屈己以求直言、不惡其訐。守信以禦外侮、不邀其功。塞災荒、遷謫之門、絕饋遺往來之路。疾姦貪以寬民力、進恬退以厚士風。病革、遺令斂以布素、不含珠玉、不用巫覡、浮屠。三月而葬。又言自陳致仕、不可叙閥閱。紹定元年十二月己巳晦、卒于正寢、年七十有二。明年三月己丑、諸孤奉柩葬于都昌縣雁澤鄉櫪田之原、公自卜也。卒官太中大夫、職寶章閣學士、爵都昌縣開國子、食邑六百

戶、詔以華文閣學士、通議大夫致仕。遺表聞、詔贈宣奉大夫、官其後二人。公元配蕭氏、國子祭酒、禮部侍郎之敏之女、先四十有五年卒、累贈淑人。繼室黃氏、通判潮州瓊之女、封淑人。子男五人、士充早卒。士況、宣教郎、新知岳州巴陵縣事。士規、故儒林郎、寧國府太平縣主簿。後公三日而卒。士亮、承務郎、新蘄州都大監轄蘄口鎮倉庫、兼煙火公事。士冕、承務郎。女三人、長適成忠郎、前監寧國府涇縣酒稅牛斗極、次適同郡陳時、幼適湖口蕭九式。長次女皆先卒。孫男八人、女二人。公篤實愛民、出於天稟、其爲政精密、務盡理道、所至救荒卹菑、蠲逋已責、寬酒榷、裁商征、察廩庾、謹儲糴、苟利於民、如己渴饑。至議役法、尤切切注意、所爲條教皆通疏縝密、可爲法。嘉泰都城災、公上書時相、乞寬黨禁、人所難言。公之行師、專以勝殘去殺爲本、封章奏篇、必以殺平民、戮降附、張虛捷爲拂天理、絕民



望、失祖宗仁愛之德、非痛革此弊不可以祈天永命。自漢陽乘邊、惟行此志。二年湖南、所誅惟各捕首惡十數、未嘗輕戮一人。方賊未平、增捕生之賞、眎舊十倍、或謂斬級亦當立賞、公曰、此非蠻夷比、朝爲峒寇、夕爲省民、吾固欲生之耳。故首惡既搢、脅從易散。公才稟<sup>④</sup>素高、輔以講學。朱文公守南康、兄弟親炙之、爲白鹿洞書院諸生。後十四年、見文公於長沙、又述所知行而請益焉。其師友淵源蓋如此、是以理明行修、出入中外垂三十年、人以其進退爲時重輕。考諸近世名卿而觀公之所成就、信乎公之所謂才者矣。平生所著輿地綱目十五卷、昌谷類藁六十卷、經幄管見七卷、藏于家。公歿之六年、士況抵予書曰、無祿先君即世、墓道之石未有以銘也、大懼幽潛未昭、將諸孤死且不瞑、莫如子也、知我父者、敢流涕百拜以請。予每歎昔之人選于衆、聽于國人、旁蒐一世之才、僅濟一世之

用、而且廩乎有不給之慮也。後世俗薄民散、才既鮮少、又率以黨論迭爲僨興。一則常以其半置在閒散、故才不周用。次則久閒者多君子、而小人雖閒不肯久也。三則棄之聰明未衰之日、而用之老疾交侵之後<sup>⑤</sup>。下缺。

魏了翁撰 《重校鶴山先生大全文集》卷八七

### 瓊州戶錄方君墓誌銘

開禧乙丑、余補國子生、時鄉先輩二方君猶在學。長君名其義、字同甫、與其族子阜鳴、字子默、齊名、皆由鄉賦入太學。二君生於丁丑、與余先君齊年、余敬事之、公私試必聯案、爐亭客舍、夜語常達曉。凡故家遺俗逸事、諸老先生舊聞、聽之入人肝脾、長人智識、余終身誦之不忘、非特筆硯間沾丐膏馥而已。然二君文戰輒不成、晚相先後奉南廊對中高等、子默猶至外郎、君僅歷英德府真陽<sup>⑥</sup>尉、梧瓊二州戶錄、秩止從事郎、士林至今嗟惜。君遊江

□<sup>①</sup>名公卿爭下榻。嘗館于金壇<sup>②</sup>。王氏實齋閣學受<sup>③</sup>業焉。真陽多盜。君至。群偷衰<sup>④</sup>息。帥聞之。曰。是六館知名士。尙作尉乎。欲羅致。守固請留<sup>⑤</sup>。以自助。梧守方侯直孺<sup>⑥</sup>。重君老成。郡政必咨。方被劾去。帥使機幕蕭蒙來攝。蕭貴介癡騃。吹求前人事以迎合上官。君辨其不然。蕭忿甚。帥移君於藤以避之。蕭去乃復。後守劉侯煒叔曰。戶錄吾父執。何敢相吏。公退。琴詩相好如賓友。君秩滿。劉侯移守瓊。請于南銓。以君爲瓊戶錄。曰。此非所以相處。瓊有機宜一員。無以易君。力挽同載。渡海財一月。卒于戶錄官舍。享年七十四。紹定庚寅八月某日也。君事母極孝。貢士歿。諸昆餬口四方。君侍膝下。跬步不離。及補入太孺人。勉君毋庸<sup>⑦</sup>歸。君一日心動。挑包徑歸。入門而丁內艱。喪費悉出君。諸昆歸則墨舍無乏事矣。事兄尤謹。諸姪孤者。無以養。與不能嫁娶者。皆以身任之。其內行如此。篤好關洛書。詩宗

陶、謝。文師蘇氏。媿黃孺人與二丈夫子阜國、阜吉皆前卒。孫男二人。應紹、應發。應發今爲某官。孫女<sup>⑧</sup>三人。初。阜國有雋才。試常<sup>⑨</sup>。占魁亞。危升舍選。余每謂君生兒如此。足慰人意。君頻蹙不語。叩之。則曰。恐華而不實耳。指阜吉曰。吾他日得此兒女。及卒。鯨波萬里外。卒賴阜吉徒步返柩。其初南轅也。應發甫三歲。與母吳拜辭堂下。君指應發謂吳曰。汝善視之。長必興我家。君卒。應發甫八歲。奮孤童。擢甲科。立兩朝爲學官、禮官。皆以論事去。君於子孫壽夭通塞。雖許負。唐舉無以加。余所目睹也。余晚還朝。應發倅建。奉家傳來曰。知吾祖事者惟子。願刻之宰上。余諾之。而詞頭山積。未暇也。及懸車還。應發曰。今可銘乎。按方氏譜。自固始遷游洋之叱石。五世祖廷評遷莆田之輪井。君於贈朝請郎伯用爲曾大父。於朝散郎南恩守漸爲大父。於鄉貢進士林爲父。母太孺人林氏。初。君葬黃氏孺人於

廣化寺之姑嶺、阜吉以君命祔。嗟夫。昔銘子默、余年四十三。今銘君七十九矣。歲月飄忽、耆舊凋謝、可悲也夫。銘曰、

莆青白吏、曰南恩牧。小閣三間、以遺嗣續。夾漈<sup>③</sup>詩之、流傳鄉國。無產十金、有書千軸。至今膾炙<sup>④</sup>、謂之實<sup>⑤</sup>錄。君少而孤、晝抄夜讀。里選歌鹿<sup>⑥</sup>、澤宮中鵠。有飄飄氣、無庸庸福。遵海而南、蛻於瘴毒。兩郎玉立、何奪之速。誰主尸之、乃若是酷。吾聞天道、乘除倚伏。是生聞孫、儒級文錄。譬家於田、昔種<sup>⑦</sup>今熟。驥來大宛、鷲出幽谷。一封骨骸、百士頸縮。歸白松楸、銘筆余屬。念昔橋門、熏炙耆宿。發藥在耳、清暢在目。今一甲子、再忘穎禿。瞻彼姑嶺、於此埋玉。有碑歸然、覽者必肅。

劉克莊撰 《後村先生大全集》卷一六一。

校記

①「是」下原衍「是」字，今刪。

②功：原作「公」，據文意改。

③「由」下原衍「一由」字，今刪。

④喜：原作「善」，據文意改。

⑤用錄：疑當作「月錄」，與下「日記」相對。

⑥據正文所述，墓主官爵爲兵部郎中、晉江縣開國男。標題當有省文。

⑦「幣」下當有脫文，疑脫「聘」一類字。

⑧「可」下疑有脫字。

⑨材落：疑當作「村落」。

⑩「牆」下原衍「一牆」字，今刪。

⑪「枕」上當有脫文，疑脫「奠」「安」一類字。

⑫每：疑誤。

⑬間：原作「開」，據四庫本《鶴山集》改。

⑭稟：原作「命」，據右引改。



儒藏

⑮侵之後：原脫，據右引補。

⑯眞陽：原作「貢陽」，清抄本《後村先生大全集》改爲「貞陽」，茲據《宋史》卷九〇《地理志》六改。後同。

⑰原無空格，據清抄本《後村先生大全集》補。

⑱金壇：原作「今壇」，據《宋史》卷四一五《王遂傳》改。

⑲「學」字原無，「受」原作「授」，據清抄本《後村先生大全集》補改。

⑳衰：原作「襄」，據右引改。

㉑留：原無，據右引補。

㉒「侯」原作「俟」，「孺」原作「儒」，據右引改。

㉓庸：原無，據右引補。

㉔女：原作「人」，據右引改。

㉕「常」下原有「薦」字，據右引刪。

㉖漆：原作「漆」，據右引改。

㉗禽：原作「肉」，據右引改。

㉘實：原作「寶」，據右引改。

㉙鹿：原無，據右引補。

㉚種：原無，據右引補。

[General Information]

书名=儒藏 史部 儒林碑传 6

作者=杨仕文，舒大刚主编

页数=690

SS号=12315580

出版日期=2005. 05

出版社=四川大学出版社

ISBN=7- 5614- 3053- 1

SSLIB-JPG=[http://image2.5read.com/image/ss2jpg.dll?di d=n21&pi d=31D597AE5613ADD04B47498105944C356139614F8CF6DBCE024DBE9429AA5999CA474C9CE3DC6C62950D3896DCDD6529E8A340F88C265F2AEE6E7B7DCDD6B3C5DA9A6B077CC361683D66304AB8660026A92C7ACFF1C85CEAA06F3855&jid=](http://image2.5read.com/image/ss2jpg.dll?di d=n21&pi d=31D597AE5613ADD04B47498105944C356139614F8CF6DBCE024DBE9429AA5999CA474C9CE3DC6C62950D3896DCDD6529E8A340F88C265F2AEE6E7B7DCDD6B3C5DA9A6B077CC361683D66304AB8660026A92C7ACFF1C85CEAA06F3855&jid/)

PDG=